

WATTI'U ALALUASSA APAN NIAPASINGKATTI MATIUS

WISARA TALAANE

Wuke *Matius* namasingkatta siite Watti'u Alaluassa manungku Mawu Yesus uddewe Ratu m Punnu Salamatta apan nipa'ire Mawu Ruata. Sulalummu Mawu Yesus udde Mawu Ruata napatipussu apa apan suete nipa'ire-Ne sulalummu Paire Tabbe su alarranang-Nge. Manimbe Mawu Yesus inasungkangnga wuassu walagu taumata n Yahudi wurru nabbiakka ere taumata n Yahudi, arawe Watti'u Alaluassa udde walineuwe tumba'u su pabbawalagu Yahudi sassane ewe'e lai su alawo'u pabbawalaga su ahewallu runia.

Wuke *Matius* indi niatokka ringannu mapia; nitattakka wuassu inasungkangngu Mawu Yesus, wua udde su ola'u pananarrani see wawono'a apan niapendaman-Ne, see su ola'u pammamanara-Ne su Galilea. Isudde Itou nannase, mangngarra'a wurru mapaapia n taumata. Wua udde wuke indi nabbatti'e ng kaamattu Mawu Yesus wuassu Galilea nabatukku Yerusalem, wurru apa apan suete nariaddi su pabbiarannu Mawu Yesus sulalummu sangkamisa panginsueannu wiakke su runia indi na'oma n su papate-Ne wurru pabbawangun-Ne.

Wuke *Matius* indi mangke mappanaungngu sambau inolaanna apan mannemakka manungku Mawu Yesus uddewe Huru apan wahewa, apan mangngarra'a manungku Mawu Ruata mamarenta ere sangkatou Ratu. Mawu Yesus lai pia sarraungnge manala'a atappasannu Tita Mawu Ruata. Anamboanne wuassu alarra'u Mawu Yesus udde suete niammulla naola'a lima ng kawageanganna eteudde: (1) Nase su wuidda matatarino su pallagu, tanggumanna, manga puss'a, wurru tudda m pabbiarannu alarrana'u Mawu Ruata (addoanne 5-7); (2) manga tatantiro su sire mapulo dua mallarreggennu Mawu Yesus su ipa'ola'a manara (addoanne 10); (3) manga sasumandingnga su ola'u tempone Mawu Ruata mamarenta ere sangkatou Ratu (addoanne 13); (4) alarra'a matatarino su ereapa maola'a mallarreggennu Mawu Yesus (addoanne 18); (5) alarra'a matatarino su ola'u tempo m panginsueanne wurru su daranta n Ana'u Taumata (addoanne 24-25).

Lalorrone

Manga arannu iupungngu alamona Mawu Yesus Kristus wurru اساسungskangge	1:1-2:23
Manara n Yohanes Mananarrani	3:1-12
Sasarani wurru wawono'a su Mawu Yesus	3:13-4:11
Pammamanara Mawu Yesus su pattangngannu taumata su leta'u Galilea	4:12-18:35
Wuassu Galilea watukku Yerusalem	19:1-20:34
Misa panginsueanne su Yerusalem wurru su wanua maranine	21:1-27:66
Pabbawangunnu Mawu Yesus wurru naipasilo m batangan-Ne	28:1-20

**Manga arannu iupunggu aḷamona Mawu
Yesus Kristus**

(Luk. 3:23-38)

1 Ete indi arannu iupunggu aḷamona Mawu Yesus Kristus, papapulunni Daud, papapulunni Abraham. Wuassi Abraham na'oma n sara Daud, arannu manga iupunggu aḷamona n Mawu Yesus Kristus ereindi:

^{2-6a} Abraham,

Ishak,

Yakub,

Yehuda wurru manga turrangnge,

Peres wurru Zerah (inangngi mangitou aranne Tamar),

Hezron,

Ram,

Aminadab,

Nahason,

Salmon,

Boas (inangngene Rahab),

Obed (inangngene eteudde Rut),

Isai,

wurru Ratu Daud.

^{6b-11} Wuassi Daud na'oma n sara tempo m balahannu Israel nirruumanna su Babel naworretta manga aranna ereindi:

Salomo (inangngene eteudde inawaḷuanni Uria),

Rehabeam,

Abia,

Asa,

Yosafat,

Yoram,

Uzia,

Yotam,

Ahas,

Hizkia,

Manasye,

Amon,

Yosia,

Yekhonya wurru manga turrangnge.

¹²⁻¹⁶ Wuassu tempo m balahannu Israel nirruumanna su Babel na'oma n sara اساسungskangngu Mawu Yesus, naworretta manga aranna ereindi:

Yekhonya,

Sealtiel,

Zerubabel,
 Abihud,
 Elyakim,
 Azur,
 Zadok,
 Akhim,
 Eliud,
 Eleazar,
 Matan,
 Yakub,
 Yusuf awingngi Maria.

Wuṛṛu wuassi Maria uddewe nasungkangke Mawu Yesus apan isassaggo lai Kristus.

¹⁷Nariaddi wuassi Abraham na'oma n sara Daud, sarang-kanambone mapuḷo appatta su wageangnge, wuassi Daud na'oma n sara pabbawalagu Israel niṛṛuumanna su Babel, udde lai mapuḷo appatta su wageangnge. Wuassu tempo n Israel niṛṛuumanna su Babel na'oma n sara asasungkangngu Mawu Yesus Kristus udde lai mapuḷo appatta su wageangnge.

Asasungkangngu Mawu Yesus Kristus

(Luk. 2:1-7)

¹⁸Ereindi watti'a su ola'u asasungkangngu Mawu Yesus Kristus. Inangngene eteudde Maria, uatatananga n Yusuf. Arawe su tempo imangitou taambe naawingnga, niasingkatanna Maria plate illoṛṛo. Yusuf ta'e waga manungku Maria plate illoṛṛo ana waugu taṛṛino n Ghaṛṛaho Mawu Ruata. ¹⁹Yusuf tunangane udde, eteudde sangkatou apan sidutu tuttuṛṛutta tita n agama. Nariaddi itou mappulute mamassutta patatunanga n tarua, arawe ringannu maḷanna-ḷannaba, tadea'u Maria tawe masili su saruannu awadaalla. ²⁰Tantalanna Yusuf maṛṛingiddu olangnge udde, itou nabaliawa. Sulalummu baliawane udde, itou naasilo sangkatou mala'ekattu Mawu nabbisara sitou, "Yusuf papapulunni Daud, arie paata'utta maawingngi Maria; ana waugu ana'a apan sulalummu illoṛṛone udde nariaddi wuassu taṛṛino n Ghaṛṛaho Mawu Ruata. ²¹Maria sarun mangunsiwe n sangkatou ana'a esakka. I'o sarun managgo n arannu ana'a udde Yesus, ana waugu Itou sarun maḷamatta alaṛṛanang-Nge wuassu rosa mangitou."

²²Sarangkanambone udde mariaddi aroddi, tadea'u matipusse apa apan suete niwisara Mawu sulalummu nabi-Ne, eteudde, ²³"Sangkatou maṛṛuala sarun mangilloṛṛo wuṛṛu mangunsiwe n sangkatou ana'a

esakka. Ana'a udde sarun isaggo aranne Imanuel." (Immanuel eteudde wisara n Ibrani atappasanne, "Mawu Ruata su sampunna ringanni ite".)

²⁴Napawe Yusuf napu'ote, itou tinumurrutte su ereapa apan suete niwatti'u mala'ekattu Mawu sitou. Itou naawingke Maria. ²⁵Arawe tantaḷanna Maria taambe nangunsiwe n ana'a udde, Yusuf taambe naammulli Maria. Wuṛṛu napawe ana'a udde nasungkangke, Yusuf nanaggote n ana'a udde Yesus.

Manga raho wuassu Ra'i

2 Mawu Yesus inasungkangnga su soa m Betlehem su wanua Yudea, su tempo pamamarenta n Ratu Herodes. Su tempo udde manga pira mapapande n anumpitanna wuassu ra'i nirumanta su Yerusalem. ²Imangitou ma'iwaḷo su aḷawo'u tampa, "Suapanete ana'a udde, apan nasungkangnga maola'a ratu n taumata n Yahudi? Iami naasilo anumpitanna nasabangnga wuassu samba'a ra'i, wuṛṛu iami nirumanta mas-subba Sitou."

³Napawe Ratu Herodes naaringikka olangnge udde, itou niṛṛumoro atonna, aroddi lai anambo n taumata su Yerusalem. ⁴Ne itou nandolokke n anambo n imam tembonanne wuṛṛu manga huru n agama taumata n Yahudi rumanta maammulla. See itou naiwaḷote simangitou, "Suapa sarun masungkangnga Ratu apan suete nipa'ire Mawu Ruata?"

⁵Imangitou sinumimbakka, "Su soa m Betlehem su wanua Yudea. Ana waugu ereindi niwoṛṛettu sangkatou nabi,

⁶I'o Betlehem, su wanua Yehuda,

i'o atonna-tonna waḷinewe addio'anne su wallattu aḷawo'u soa ahunanne su Yehuda.

Ana waugu inasabanganne wuassi'o sarun rumanta sangkatou piarṛangnge,

apan sarun mangehetta aḷarṛana-U Israel."

⁷Napawe suete naasomba taḷaane aroddi, Herodes namaggote manga mapapande n anumpitanna wuassu samba'a ra'i udde, ringannu maḷannaba. Wua udde itou naiwaḷote simangitou, ro'e n angngera iamiu nanattakka naasilo anumpitanna udde. ⁸Wua udde itou nandolokke mangitou watukku Betlehem ringannu tanatane indi, "Roote, rea'ete ana'a udde ringannu ma'uduppa. Wuṛṛu amungkangngu iamiu maasomba Sitou, waḷoa'a sia'u, tadea'u ia'u lai inai massubba Sitou."

⁹⁻¹⁰Wua udde imangitou inaitte. Imangitou naasilo lai anumpitanna apan suete niasiloanni mangitou rorone su samba'a ra'i. Lembo n lulluassa imangitou naasilo anumpitanna udde! Anumpitanna udde nalliu ṛoro wuassi mangitou, wua udde nattaalla su lantakku tampa n ana'a udde.



Ranna n alu amania (2:11)

¹¹Imangitou sinumutta sulaḷummu waḷe udde wuḷḷu naasilote ana'a udde ringanni Maria, inangngene. Imangitou inumaḷintuda wuḷḷu nassubbate ana'a udde see namu'ate tampa n darotongngi mangitou wuḷḷu nangonggolle n sasamba Sitou wuḷawanna, amania wuḷḷu mur. ¹²Mawu Ruata napanaungnga simangitou sulaḷummu waḷiawa tadea'u imbarrangnga imangitou mabelengnga ringanni Herodes. Nariaddi imangitou napuḷete niuumamatta su laḷanna waine.

Tinumalaḅngnga watukku Mesir

¹³Napawe manga mapapande n anumpitanna udde napuḷete, mala'ekattu Mawu naipasilo n batangane si Yusuf sulaḷummu waḷiawa. Mala'ekatta udde nabbisara, "Herodes pia pandumma madea'a ana'a udde pateanni tou. Ana waugu udde apu'ote, apira'e ana'a udde ringannu inangngene taḷanga'e watukku Mesir. Atana'e poiarroddi ma'oma n sara ia'u mabbaḷo si'o apia."

¹⁴Yusuf nabangunte, wuḷḷu ḷabbi udde lai itou nangapiddu ana'a udde ringannu inangngene tinumalaḅngke watukku Mesir. ¹⁵Imangitou natana'a poiarroddi, na'oma n sara Herodes nate.

Aroddi nariaddite apa apan suete niwisara Mawu sulaḷummu nabi-Ne ereindi, "Ia'u mamaggo Ana'u wuassu Mesir."

Pamamate manga aḷarḷrana'a

¹⁶Napawe Herodes naasingkatta manungku manga mapapande n anumpitanna wuassu ra'i udde namahia sitou, itou nasa'u atonna. Wua udde itou nandolokke mapapate n aḷawo'u ana'a esakka uukke rua tonna inawa su Betlehem wuḷḷu lai su wanua maranine. Udde nassuḷunggu taḷaane apan niaringirḷanna wuassu manga mapapande n anumpitanna udde su tempo anumpitanna udde niasiloanna.

¹⁷Aroddi nariaddite apa apan suete niwisara Nabi Yeremia, eteudde,
¹⁸"Su Rama niaringikka tingikku laḷallu,
 sasaliomanna wuḷḷu laḷuai.
 Rahel lulluai n aḷarḷranangnge;
 itou madiri limbatanna
 ana waugu aḷarḷranangnge natete."

Nabelengnga wuassu Mesir

¹⁹Napawe Herodes natete, tantara n Yusuf ta'e su Mesir sangkatou mala'ekattu Mawu naipasilo m batanganne si Yusuf sulaḷummu waḷiawa.
²⁰Mala'ekatta udde nabbisara, "Manga taumata apan mamate ana'a udde natete. Ana waugu udde pabbangunte apira'e ana'a udde ringannu inangnge wuḷḷu pabelengke su Israel." ²¹Ne Yusuf nabangunte, see nangapidde n ana'a udde wuḷḷu Maria nabelengke su Israel.

²²Arawe wua udde Yusuf naaringikka manungku Arkelaus, ana'i Herodes nalloḷossa iamangnge maola'a ratu su wanua Yudea. Nariaddi Yusuf matta'utta inai poiaroddi. Napawe itou suete naasomba tuḷadda Mawu panginsueanne sulaḷummu waḷiawa, itou inaita su wageanggu leta'u Galilea. ²³Isudde Itou natana'a su soa aranne Nazaret. Ringannu aroddi nariaddite apa apan niwatti'u manga nabi su ola'u ana'a udde: "Itou sarun isaggo taumata Nazaret."

Nase n Yohanes Mananarḷrani

(Mrk. 1:1-8; Luk. 3:1-18; Yoh. 1:19-28)

3 Su tempo udde nirumantate Yohanes Mananarḷrani su wadda'u Yudea wuḷḷu nanattakke mannase. ²"Awaḷute wuassu manga rosanu," wisarane, "ana waugu Mawu Ruata tate maḷannu lai mamarenta ere sangkatou Ratu!" ³Ete Yohanes udde taumata apan pappandumannu Nabi Yesaya sulaḷummu manga wisaraneindi,

"Pia taumata u'aliata su wadda'a,
 'Saddiaite laḷannu Mawu;
 rataḷḷa'e laḷanni Tou.'"

⁴Yohanes ualḷḷe n laubba wuassu wambuḷu n unta. Paperḷenne wuassu pisi m winatangnga wuḷḷu anni tou saḷḷapalanna wuḷḷu puḷa n ahuranganna. ⁵Manambo taumata wuassu Yerusalem, wuassu aḷawo'u wanua Yudea wuḷḷu wuassu wageangngu leta'u Saḷukku Yordan, nirumanta ringanni Yohanes. ⁶Imangitou nanga'u manga rosa mangitou, see Yohanes nanarḷḷanite simangitou su Saḷukku Yordan.

⁷Manambo lai taumata n Farisi wuḷḷu Saduki nirumanta ringanni Yohanes maisarḷḷani. Arawe su tempo itou naasilo simangitou nirumanta, itou nabbisara simangitou, "Iamiu taumata laḷeo! Isai suete nabbaḷo manungku iamiu maḷiudda wuassu ḷuumannu Mawu Ruata apan sarun rumanta? ⁸Pasiloa'e ringannu pallaḷagunu, manungku iamiu nawaḷute wuassu manga rosanu. ⁹Arie massunna manungku iamiu maḷiu wuassu ḷuumanna ringannu mabbisara manungku Abraham uddewe iupungngu aḷamona ng kamiu. Naunge, wuassu manga watu indi lai, Mawu Ruata wotongnge ma'ola'a papapulunni Abraham! ¹⁰Baḷiungnga nasaddiate ipanuwangnga alu, ma'oma n sara manga ḷamunne. Aḷawo'u alu apan tawe mabbua apan mapia sarun tuwanganna wuḷḷu iramme sulaḷummu putungnga. ¹¹Ia'u manarḷḷani siamiu ringannu ua'e, udde mappaaḷiatta'a manungku iamiu nawaḷute wuassu paddarosa ng kamiu, arawe apan sarun rumanta saḷimmurine wuassia'u, sarun manarḷḷani siamiu ringannu Gharḷaho Mawu Ruata wuḷḷu putungnga. Itou magge-waḷanna wuassia'u saran mangapiddu sapatune lai ia'u tawe su ḷinone. ¹²Su limane pia niḷḷu ipattappa aḷawo'u ammene ma'oma n sara mawaresi. Amme sarun iammulla sulaḷummu waḷingkakke, arawe anambo n waḷaane sarun tutunganna su putungnga apan tawe mappadumma."

Mawu Yesus nissarḷḷani

(Mrk. 1:9-11; Luk. 3:21-22)

¹³Su tempo udde Mawu Yesus inaite wuassu Galilea watukku Saḷukku Yordan. Poiaroddi Itou nirumanta ringanni Yohanes wuḷḷu naddorongnga maisarḷḷani. ¹⁴Arawe Yohanes maannamma mannoḷa'u darorongngi Tou udde. Yohanes nabbisara, "Ia'u indi ḷinone sarḷḷanianni Iamangnga. Orassa indi'e Iamangnga nirumanta ringangu maisarḷḷani sia'u."

¹⁵Arawe Mawu Yesus nisumimbakka, "Wala'e aroddi su orassa indi. Ana waugu ringannu aroddi iite ma'ola'a aḷawo'u apa apan ipaapulu Mawu Ruata." Nariaddi Yohanes nanarḷḷanite Mawu Yesus.



Inaramannu taumata n Israel dorone marrae n ganduma wuassu walaane (3:12)

¹⁶Napawe suete nissarrani, Mawu Yesus maḷiha-ḷihakka sinumapputta wuassu ua'e n saḷukka udde. Inarrombanganne langitta nawu'a wuḷḷu Mawu Yesus naasilo Gharraho Mawu Ruata niumontu'a ere manu'a merpati niumarunna Sitou. ¹⁷Wua udde niaringikka tingikku Mawu Ruata nabbisara, "Ete indi Ana'u apan arangguanna, Itou maaluassa naung-Ku."

Mawu Yesus niwono'anna

(Mrk. 1:12-13; Luk. 4:1-13)

4 Wua udde Mawu Yesus niehettu Gharraho Mawu Ruata watukku wadda'a, ana see iapawono'a su Setanna. ²Appattu puḷo su allone appattu puḷo su ḷabbine Mawu Yesus tawe umanna. Wua udde Itou naapendampe lunussa. ³Setanna nirumanta wuḷḷu nabbisara, "I'o Ana'u Mawu Ruata? Ana waugu udde doloḷḷa'e manga watu indi maola'a roti."

⁴Mawu Yesus sinumimbakka, "Sulaḷummu Wuke Susi uawoḷḷetta: Taumata tawe tumba'u mabiakku roti sassane, arawe lai ringannu ala'wo'u wisara apan niapasingkattu Mawu Ruata."

⁵Wua udde Setanna nangapiddu Mawu Yesus watukku Yerusalem, soa na'ukkassa, wuḷḷu nangadote n Tou su wowo n saḷawo n Waḷe

Mawu. ⁶See Setanna nabbisara Sitou, "I'o Ana'u Mawu Ruata? Amung-kangngu aroddi, tumpate; ana sulaḷummu Wuke Susi uaworḗretta arendi, 'Mawu Ruata sarun mandolokku manga mala'ekanne mandiaga Si'o, imangitou sarun manaḷoho Si'o ringannu lima mangitou, tadea'u leddanu tawe mattu'a su watu.'"

⁷Mawu Yesus sinumimbakka, "Arawe sulaḷummu Wuke Susi uaworḗretta lai, 'Imbarḗrangnga i'o mamono'a Mawu Ruatanu.'"

⁸Wua udde Setanna nangapidde Mawu Yesus su wuidda apan ma-tanggakka atonna wurru tina'ete Sitou aḷawo'u araratuanna su runia ringannu aḷawo'u paa'alane. ⁹See Setanna nabbisara Mawu Yesus, "Sarangkanambone indi sarun ionggolla Si'o, amung-kangngu I'o umaḷintudda massubba sia'u."

¹⁰Mawu Yesus sinumimbakka, "Passaliu i'o mamamono'a! Sula-ḷummu Wuke Susi, uaworḗretta: Passubbate Mawu Ruatanu, wurru pangimbete Sitou sassane!"

¹¹Panginsueanne Setanna nanantangke Mawu Yesus, wurru manga mala'ekan-Ne lai nappadantate nangimbe Sitou.

Mawu Yesus nanattakku manara-Ne su Galilea

(Mtk. 1:14-15; Luk. 4:14-15)

¹²Su tempo naaringikka manungku Yohanes nitarro sulaḷummu tut-tupanna, Mawu Yesus tinumaḷangke watukku Galilea. ¹³Itou nanan-tangke Nazaret, see natana'e su Kapernaum su winggi n Rano n Galilea su wageangngu leta'u Zebulon wurru Naftali. ¹⁴Ana waugu Mawu Yesus na'ola'a olangnge aroddi, nariaddite apa apan suete niwisara Nabi Ye-saya:

¹⁵"Leta'i Zebulon wurru leta'i Naftali,
su laḷanna watukku rano, su samba'a n Saḷukku Yordan,
Galilea, leta'u taumata waḷine Yahudi!

¹⁶Pabbawalaga apan mabbiakka sulaḷummu ararandumma,
suete naasilo asasemakka!

Su manga taumata apan uatana'a su wanua n ararandummu papate
nisabangante n asasemakka!"


¹⁷Nanattakke su tempo udde Mawu Yesus namasingkatta, "Awaḷute wuassu manga paddarosanu, ana waugu Mawu Ruata maḷihakke ru-manta mamarenta ere sangkatou Ratu!"

Mawu Yesus namaggo sire appatta samakka

(Mrk. 1:16-20; Luk. 5:1-11)

¹⁸Su tempo Mawu Yesus u'amatta su apannu Rano n Galilea, Itou naasilo rua ng katou samakka, eteudde Simon (apan isassaggo lai Petrus) ringannu tuarine Andreas. Imangitou tantałanna mannoma inassa su rano udde. ¹⁹Mawu Yesus nabbisara simangitou, "Wette tantalongke Sia'u. Ia'u sarun mangarra'a siamiu manoma taumata." ²⁰Imangitou lapiddu nanantangngu soma, see tinuman-talongke Mawu Yesus.

²¹Mawu Yesus lapiddu inumamata, wua udde naasilote lai rua ng katou sangkaturrangnga apan waine, eteudde Yakobus wurru Yohanes, alarrana'i Zebedeus. Imangitou su sampunna ringanni iamangngi mangitou mannapia soma sulałummu saalanna. Mawu Yesus namaggo simangitou lai, ²²wurru imangitou lapiddu nanantangngu saalanna wurru iamangngi mangitou, see tinumantalongke Mawu Yesus.



Samakka su Rano n Galilea (4:18)

Mawu Yesus mangngarra'a, mannase, wurru mapaapia n taumata

(Luk. 6:17-19)

²³Su Galilea, Mawu Yesus namaŕiwutte ahewallu wanua wurru mangngarra'a su anambo n waŕe m pattataŕramawuanna. Itou mabbatti'u Watti'u Aŕaŕuassa manungku Mawu Ruata sarun mamarenta. Wurru Itou lai mapaapia n manga taumata apan maradda'a wurru pia sangkulle. ²⁴Watti'a su ola'u Mawu Yesus udde naddingikke su aŕawo'u wanua su Siria, na'oma n sara taumata nambo rudanta ringanni Tou. Imangitou uaapiddu manga taumata apan uatataŕrangnga aŕawo'u hati n radda'a wurru asasusa. Manga taumata apan niasuttannu ghaŕraho laŕeo, apan raddangge pua, wurru lome, sarangkanambone udde nipaapia Mawu Yesus. ²⁵Manambo atonna taumata apan tinumantalongnga Mawu Yesus su tempo udde. Piaddu nirumanta wuassu Galilea, pia lai wuassu Mapuŕo Soa, wuassu Yerusalem, wuassu Yudea, wurru pia lai wuassu wanua su samba'a n Yordan.

Nase su wuidda

5 Su tempo Mawu Yesus naasilo taumata nambo udde, Itou sinumaate su wuidda. Napawe Itou ua'iante, manga mallalaŕrenggen-Ne nirumanta ringanni Tou, ²see Itou nanattakke mangngarra'a simangitou:

Laŕumanna'a apan tutune

(Luk. 6:20-23)

- ³"Laŕumanna'a su taumata apan uapendamma tawe atatohassa wurru tumba'u uaantimma Mawu Ruata sassane,
ete imangitou udde laŕoŕro n araratuannu Mawu Ruata!
- ⁴Laŕumanna'a su taumata apan massusa naungnge;
Mawu Ruata sarun malluassa naungngi mangitou!
- ⁵Laŕumanna'a su taumata apan naungnge mawawo;
Mawu Ruata sarun manipussa paaire-Ne simangitou!
- ⁶Laŕumanna'a su taumata apan sidutu ma'ola'a apulu Mawu Ruata;
Mawu Ruata sarun manuungngu apulu mangitou!
- ⁷Laŕumanna'a su taumata apan mandangngu taumata waine;
Mawu Ruata sarun mandangngu simangitou lai!

⁸Lalumanna'a su taumata apan naungnge waresi;
imangitou sarun maailala Mawu Ruata.

⁹Lalumanna'a su taumata apan mangapiddu paddarame su wallattu taumata;

Mawu Ruata sarun manga'u simangitou maola'a manga
alarranang-Nge!

¹⁰Lalumanna'a su taumata apan uatatarangnga sassansaranna ana waugu ma'ola'a apulu Mawu Ruata;

ete imangitou udde laorro n araratuannu Mawu Ruata!

¹¹Lalumanna'a siamiu amungkangngu iapaasala sassansaranna wurru aaddio'anna ana waugu Ia'u. ¹²Manga nabi apan nabbiakka su tempo iamiu taambe su runia, nisansara lai ereudde. Luasse wurru lala'e, ana waugu lalantakke manambo nisaddia Mawu Ruata siamiu."

Asimma wurru semakka

(Mrk. 9:50; Luk. 14:34-35)

¹³"Ete iamiu uddewe asimmu runia. Amungkangngu asimma udde nawaļu maammi, apa wotongnge iapaapakkada apia? Tate gunane lai, ewe'e iramme wurru rindannu taumata.


¹⁴Ete iamiu uddewe asasemakku runia. Soa apan uaaddo su wuidda tawe iawuni. ¹⁵Tawe taumata mande'omma soļo, see soļo udde luuwannu wensada. Itou sarun mangaddo n soļo udde su tampane, tadea'u mangagillu asasemakka su alawo'u taumata sulalummu wale. ¹⁶Aroddi lai asasemakku rinone lai lumansiangnga su saruannu taumata, tadea'u imangitou maasilo alawo'u pallaḡagunu apan mapia, wua udde padalote Mawu Ruata su surga."

Alarra'a su ola'u tita n agama Yahudi

¹⁷"Ariewe massunna manungku Ia'u nirumanta mamappassa tita Musa wurru alarra'u manga nabi. Ia'u nirumanta waline mamappassa tita udde, arawe sarun mangarra'u atappasanne apan su rinone.

¹⁸Naunge! Tantalanna langitta wurru runia ta'e indi, sambau worretta ara'e titi'a apan addio'anne lai sulalummu alarra'a udde, tawe papasanna amungkangngu sarangkanambone udde taambe natipussa!

¹⁹Ana waugu udde, isai-sai tawe tumurrutta manga parenta udde, manimbe parenta addio'anne, wurru mangngarra'a taumata waine ma'ola'a aroddi lai, sarun maola'a addio'anne su wallattu alarrana'u Mawu Ruata. Arawe isai-sai apan tuturrutta manga parenta udde, wurru



Sofo wurru wensada tempo n dorone (5:15)

mangngarra'a taumata waine ma'ola'a aroddi lai, sarun maola'a wahewa su wallattu alarra'ana'u Mawu Ruata. ²⁰Nariaddi, naunge: Iamiu tawe maola'a alarra'ana'u Mawu Ruata, amungkangngu iamiu tawe manampaliu manga huru n agama wurru manga taumata n Farisi sula'ummu ma'ola'a inolaanna ara'e apulu Mawu Ruata."

Ałarra'a su ola'u asasa'u

(Luk. 12:57-59)

²¹"Iamiu masingkatta manungku su iupungngu alamona ng kite pia alarra'a ereindi: Arie pamate; isai-sai mamate, sarun parikisanna. ²²Arawe orassa indi Ia'u mabbisara siamiu, isai-sai masa'u su taumata waine, sarun parikisanna; wurru isai-sai mallela taumata waine sarun parikisanna su saruannu Mallarra'ungngu Agama. Wurru isai-sai mabbisara taumata waine, 'Tingngangnga,' sarun iramme sula'ummu putungngu naraka. ²³Ana waugu udde, amungkangngu piaddu sangkatou wua-ssu wallatti amiu mangapiddu sasamba su Mawu Ruata, see naanaungnga manungku pia taumata massa'u sitou, ²⁴rinone itou manantangnga asuene sasambane su saruannu medda n sasamba see inai maddame n taumata udde. Wua udde, wotonggete itou mabelengnga wurru manantillu aonggolle su Mawu Ruata.

²⁵Amungkangngu pia taumata mangalae ng kamiu su mallarra'ungnga, paddamete n tou talabe ta'e pia tempone, tanta'anna taambe na'oma su mallarra'ungnga. Amungkangngu tawe, taumata udde sarun manantilli amiu su mallarra'ungnga apan manantilli amiu su polisi. See

polisi sarun mapaasutta ng kamiu sulalummu tuttupanna. ²⁶Wurru paa-naunge: Natantuna iamiu tawe masabangnga wuassu tuttupanna udde, amungkangngu bawaekku pasasala ng kamiu taambe nasue m baekke.”

Su ola’u sasandaga

²⁷”Iamiu masingkatta manungku pia alarra’a ereindi: Arie sumandaga. ²⁸Arawe tempo indi Ia’u mabbalo siamiu: Isai-sai ma’ellega sangkatou wawine see ninumemma n tou, taumata udde suete sinumandaga ringannu wawine udde sulalummu naungnge. ²⁹Amungkangngu mata aikkatannu napaola’u rosa si’o, lasso’a wurru rammea’a mata udde! Mappianna awuliannu sambau su wallattu aola’u wadangngu wuassu ahewallu wadangngu iramme su naraka. ³⁰Amungkangngu limanu aikkatanna maarosa si’o, pototta wurru rammea’a limanu udde! Mappianne awuliannu lima samba’a wuassu ahewallu wadangngu mataro su naraka.”

Su ola’u patatalei

(*Mat. 19:9; Mrk. 10:11-12; Luk. 16:18*)

³¹”Pia lai alarra’a ereindi: su manga taumata esakka apan nanantangngu awingnge, sarun mangagillu surattu patatalei sitou. ³²Arawe tempo indi Ia’u mabbisara siamiu; isai-sai manantangngu awingnge manimbe wawine udde tawe sinumandaga, itou napaola’u awingnge udde sinumandaga, amungkangngu awingngi tou udde maawingnga apia. Wurru isai-sai maawingnga ringannu wawine apan suete nitantangnga udde, sinumandaga lai.”

Su ola’u pasasalu

³³”Iamiu masingkatta manungku iupungngu alamona ng kite pia alarra’a ereindi: Arie pangawusu. Apa apan suete nipa’irenu ringannu pasasalu su saruannu Mawu Ruata rinone udde olaannu. ³⁴Arawe orassa indi Ia’u mabbisara siamiu: arie massalu saran addio’a, mapia ete ringannu langitta, ana waugu langitta udde ramba’u Mawu Ruata, ³⁵aroddi lai ringannu runia, ana waugu runia udde apampakku ledda-Ne; ara’e ringannu Yerusalem, ana waugu eteudde soa n Ratu wahewa. ³⁶Arie lai massalu ringannu puanu ana waugu i’o sassane tawe maawalut utangngu maola’a mawira ara’e ma’itumma manimbe man sambua.

³⁷Tumba'u pabbisara: 'Ore' ara'e 'Tawe' - manampaliu wua isudde darantane wuassu Setanna."

Aḷarḷa'a su ola'u pabawalissa

(Luk. 6:29-30)

³⁸"Iamiu masingkatta manungku pia lai aḷarḷa'a ereindi: mata hantiannu mata, isi hantiannu isi. ³⁹Arawe orassa indi Ia'u mabbisara siamiu: arie pabbalissa sangkatou taumata apan ma'ola'a aḷaleo siamiu. Apianne amungkangngu taumata mamero wambalanu aikkatanna; wala'a lai itou mamero wambalanu airri. ⁴⁰Wurru amungkangngu taumata mangalae ng kamiu su mallarḷuungnga wurru maddorongnga laungngu, ongoḷa'a lai sitou jubahnu. ⁴¹Amungkangngu sangkatou tembonanne mamata'i amiu mamasanna luranni tou araune sangkilo, pasanna lai luranna udde araune rua kilo. ⁴²Amungkangngu manga taumata maddorongnga manga apa siamiu, anggiḷa'e sitou. Wurru arie lai mapaawelengngu taumata apan maapulu mabbalassa sarannapa si'o."

Umakkannu seetta

(Luk. 6:27-28, 32-36)

⁴³"Iamiu masingkatta manungku pia lai aḷarḷa'a ereindi: pandangngute manga hawenu wurru passeette manga seennu. ⁴⁴Arawe orassa indi Ia'u mabbisara siamiu: pandangngute manga seennu, wurru aḷiomana'a manga taumata apan mammate siamiu, ⁴⁵tadea'u iamiu maola'a aḷarḷana'u lamangngi amiu su surga. Ana waugu Mawu Ruata mapasabangngu matannallo su taumata apan mapia, wurru su taumata apan laḷeo lai. Itou napa'uranna su taumata apan ma'ola'a apapia wurru su taumata apan ma'ola'a aḷaleo lai. ⁴⁶Ana waugu amungkangngu iamiu tumba'u mandangngu taumata apan mandangngu siamiu, apa hunane su Mawu Ruata mabbalissa inolaanni amiu udde? Waḷinewe manga maddarorongnga wose lai ma'ola'a aroddi? ⁴⁷Wurru amungkangngu iamiu tumba'u mangngagillu tabea su manga hawenu sassane, apa lebbene? Manga taumata apan wagga ma'illala Mawu Ruata lai ma'ola'a aroddi! ⁴⁸Iamangngu su surga mandangngu aḷawo'u taumata ringannu asasuungnge. Iamiu sarun pa'ola'a lai aroddi."

Aḷarḷa'a su ola'u aonggolla

6 "Naungete, arie iamiu ma'ola'a taturḷuttu agama su saruannu awa-daalla tadea'u ellehannu taumata. Amungkangngu iamiu ma'ola'a aroddi, iamiu tawe onggolannu laḷantakke wuassu Iamangngu su surga.

²Nariaddi, amungkangngu iamiu mangagillu aonggolla su taumata asiangnga, arie mangke itattunggalla darangngu udde, ere a'olaannu taumata lilangkamaḷe'a. Imangitou maapulu ma'ola'a udde sulaḷummu waḷe m pattataḷramawuanna, su laḷanna, tadea'u raloannu taumata. Naungete, imangitou suete nanengkamma laḷantakke. ³Arawe iamiu, amungkangngu mangagillu aonggolla, anggila'e ringannu maḷanna-ḷannaba, tadea'u tawedu maasingkatta. ⁴Wala'e pallaḷagunu udde tawe asingkatannu taumata, tumba'u Iamangngu su surga. Itou maasilo pallaḷagunu apan uawuni udde wuḷḷu sarun mangonggolu laḷantakke siamiu."

Aḷarḷa'a su ola'u umaḷiomanna

(Luk. 11:2-4)

⁵"Amungkangngu iamiu umaḷiomanna, imbarḷangnga ere manga taumata ma'ola'a awusu. Imangitou u'aḷiomanna lapiddu uarisikka su waḷe m pattataḷramawuanna wuḷḷu su penga n daḷanna, tadea'u iasilo n taumata. Paanaunge, eteudde laḷantakke apan suete nisengkammi mangitou. ⁶Arawe amungkangngu iamiu umaḷiomanna, suttate su wabbo'a wuḷḷu ruura'a ngara, see aḷiomante su Mawu Ruata Iamangnga apan tawe iasilo udde. Ne Iamangngu apan maasilo pallaḷagunu apan uawuni udde, sarun mangonggolu laḷantakke siamiu.

⁷Amungkangngu iamiu umaḷiomanna, arie maḷo'e-ḷo'e ere su manga taumata apan tawe maailaḷa Mawu. Imangitou massunna manungku darorongngi mangitou sarun daringiḷḷanna ana waugu aḷiomanni mangitou maḷo'e aroddi. ⁸Imbarḷangnga ere imangitou udde. Iamangngu masingkatta apa apan ipaapulu ng kami, salaiwe iamiu taambe na-ddorongnga. ⁹Nariaddi aḷiomante ereindi,

'Iamangngi ami su surga;

Ete I'o Mawu Ruata tumba'u sambau.

Antimanna I'o subbanna wuḷḷu wantuhanna.

¹⁰Ete I'o Ratu ng kami.

Antimanna I'o mamarenta su runia

wuḷḷu apulunu taturḷutanna ere lai su surga.

- ¹¹Onggoḷaawe siami su allo indi pabbawiakka apan ipaapulu ng kami.
- ¹²Ampungewe iami wuassu passasaḷa ng kami, ere lai iami suete nangampungnga taumata apan nassaḷa siami.
- ¹³Ariewe mamala ng kami awuḷiannu pangangimanna su tempo iami wabaḷintongnganna ewe'e liua'a iami wuassu tarḷrino n aḷaḷeo. [Ete I'o Ratu apan uatarḷrino wuḷru mawantuga ma'oma n sara maḷannu-ḷannu. Amin.]
- ¹⁴Amungkungngu iamiu mangampungnga taumata apan nassaḷa siamiu, Iamangngu su surga lai sarun mangampungnga pasasaḷa ng kamiu.
- ¹⁵Arawe amungkungngu iamiu tawe mangampungnga pasasaḷa n taumata waine, Iamangngu su surga tawe lai mangampungnga pasasaḷa ng kamiu."

Aḷarḷa'a su ola'u mappuasa

¹⁶"Amungkungngu iamiu mappuasa, imbarḷrangnga massusa ere taumata apan apulune mammahia. Imangitou mammaḷu hatine tadea'u anambo n taumata maasingkatta manungku imangitou mappuasa. Paa-naunge, eteudde laḷantakke apan suete nisengkammi mangitou. ¹⁷Arawe amungkungngu iamiu mappuasa, rammusa hatinu wuḷru paarḷro paaḷeno-ḷeno utangngu, ¹⁸tadea'u tawedu maasingkatta manungku iamiu mappuasa, ewe'e tumba'u Iamangngi amiu apan tawe asiloanna udde, masingkatta. Itou maasilo pallaḷagunu apan uawuni udde, wuḷru sarun mangonggolu laḷantakke si'o."

Darotongnga su surga

(Luk. 12:33-34)

¹⁹"Ariewe mangammullu darotongnga huna m badangngu su runia, isudde wiangnga wuḷru tai n atta'a mandaleo wuḷru manana'o rumanta manna'o. ²⁰Apianne mangammullu darotongnga su surga, isudde wiangnga wuḷru tai n atta'a tawe maahohakka wuḷru manana'o tawe rumanta manna'o. ²¹Ana wangu suapa pia darotongngu uaaddo, isudde lai naungngu uaḷrundinganna!"

Semakka huna m badangnga

(Luk. 11:34-36)

²²”Mata eteudde soḷo m badangnga. Amungkangngu matanu matilangnga ahewallu wadangngu lai masema-semakka. ²³Arawe amungkangngu matanu maḷabukka, ahewallu wadangngu marandumma lai. Nariaddi amungkangngu soḷo sulalummu wadangnga udde marandumma, lembo nabbasa lai ararandumma udde!”

Mawu Ruata wuḷḷu darotongnga

(Luk. 16:13, 12:22-31)

²⁴”Tawe saran sangkatou taumata maamanara su rua ng katou mawu. Ana waugu itou sarun lembo marangngu sangkatou wuassu sangkatou apan waine. Ara’e itou lembo matuḷḷutta su mawune apan sambau wuassu mawune apan waine. Aroddi lai matatarrino siamiu. Iamiu tawe maappammanara manara su Mawu Ruata wuḷḷu su darotongnga lai.

²⁵Ana waugu udde naunge; arie passinggawangnga su ola’u wiakki amiu, eteudde apa apan sarun annananna wuḷḷu inumanni amiu, ara’e apa sarun iluḷḷe ng kamiu. Waḷinewe wiakka nangillembu wuassu anna, wuḷḷu wadangnga nangillembu wuassu peddetta? ²⁶Pa’ellege manu’u winalanganna. Imangitou tawe massuanna, tawe mangitingnga wuḷḷu tawe lai mangammullu wua n sinuananne sulalummu waḷingkakka. Manimbe aroddi Iamangngu su surga mappaduḷi lai simangitou! Waḷinewe iamiu maareganne marau wuassu manu’u winalanganna? ²⁷Isai wuassu wallatti amiu apan ringannu asasinggawangnge mappalo’engngu uukke saran addio’a?

²⁸Anio iamiu susinggawangnga su ola’u peddennu? Panutukka manga wunga bakung apan tuttuwo su wadda’a. Anambo n wungane udde tawe mammanara wuḷḷu tawe mandadu’a; ²⁹arawe Ratu Salomo apan paa’alane aroddi anambone, tawe uapedetta ere aḷarramagu manga wunga udde! ³⁰Waḷabukka su wadda’a allo indi-tumuwo wuḷḷu tiḷḷabbine tutunganna ma’oma n sara masue. Arawe Mawu Ruata mamedetta waḷabukka udde aroddi arḷamage. Lembonete iamiu! Arawe pangangimanni amiu mattuḷungnga! ³¹Arie passinggawangnga wuḷḷu mabbisara ‘Apa apan sarun annananni ite’, ara’e ‘apa apan sarun inumanni ite’, ara’e ‘apa apan sarun iluḷḷe ng kite’? ³²Sarangkanambone udde sidutu raddeaannu taumata apan tawe maailala Mawu Ruata. Arawe Iamangngu su surga, masingkatta manungku iamiu maapulu n sa-

rangkanambone udde. ³³Nariaddi paddea'e dorone tadea'u Mawu Ruata mamarenta sulalummu wiakku wurru turutte apulu-Ne. Ne alawo'u darotongnga waine lai sarun ionggolu Mawu Ruata siamiu. ³⁴Ana waugu udde arie suminggawangnga su ola'u allo tirrabbu. Ana waugu tirrabbu lai pia asasinggawangnge sassane. Allo indi natipusse asasusane, wala'se tambanna apia."

Su ola'u maruungngu taumata waine

(Luk. 6:37-38, 41-42)

7 "Imbarangnga maruungngu taumata waine, tadea'u iamiu sassane lai tawe iruungngu Mawu Ruata. ²Ana waugu su ereapa iamiu maruungngu taumata waine, aroddi lai Mawu Ruata sarun maruungngi amiu. Wurru uurranna apan ipanguukki amiu su taumata waine sarun ipanguukku Mawu Ruata lai siamiu. ³Anio iamiu maasilo sampaddi alu sulalummu mata n turangngu, arawe salaba'u sulalummu matanu sassane tawe iatutukki amiu? ⁴Ereapa iamiu wotongnge mabbisara turangngu, 'Wette ia'u manabangngu alu sampaddi wuassu matanu,' arawe sulalummu matanu sassane pia salaba'u? ⁵Ei lilangkama'e! Sabbanga'e rorone salaba'u wuassu matanu sassane, wakkute udde i'o maasilo ringannu masemakka, wurru wotongngete mapaasabangngu alu sampaddi wuassu mata n turangngu.

⁶Arie mangonggolu sarannapa na'ukkassa su asu, tadea'u asu udde tawe mangawali'a mamangalo si'o. Wurru arie mangonggolu mutiara su wawi, tadea'u wawi udde tawe marinda mutiara udde."

Paddorongnga, paddea'a wurru panengkella

(Luk. 11:9-13)

⁷"Paddorongke, ne iamiu sarun manengkamma. Paddea'e, ne iamiu sarun maasomba. Panengkelle, ne iamiu sarun pamu'anna ngara. ⁸Ana waugu taumata maddorongnga sarun manengkamma; taumata madea'a sarun maasomba; wurru taumata mannengkella sarun wu'anna ngara. ⁹Su wallatti amiu, apa pia iamangnga mangngagillu watu su anangnge, amunggangngu itou maddorongnga roti? ¹⁰Ara'e mangagillu atoanna, amunggangngu itou maddorongnga inassa? ¹¹Salaiwe iamiu laleo, iamiu masingkatta lai mangagillu apa apan mapia su manga alarranangngu. Nangillembu Iamangngu su surga! Itou lembone lai sarun mangagillu apa apan mapia su taumata apan maddorongnga Sitou.

¹²Olaawe taumata waine ere iamiu lai maapulu olaanni mangitou. Eteudde laḷorḷo n aḷarḷa'i Musa wuḷḷu manga nabi."

Ngara apan maḷḷiputta

(Luk. 13:24)

¹³"Suttate su ngara maḷḷiputta, ana waugu ngara wuḷḷu laḷanna apan mattudda naraka wahewa wuḷḷu maḷoangnga, wuḷḷu manambo taumata apan umamatta isudde. ¹⁴Arawe ngara wuḷḷu laḷanna maḷḷiputta wuḷḷu masahada amatanne, mangapiddu taumata su pabbiarḷanna. Wuḷḷu tumba'u mattuḷungnga taumata maasomba udde."

Alu wuḷḷu wuane

(Luk. 6:43-44)

¹⁵"Paatehamma su manga nabi awusu. Imangitou nirumanta ringanni amiu, lihide ere domba, arawe imangitou ḷinone ere serigala apan maḷarḷaga. ¹⁶Iamiu sarun maailaḷa simangitou wuassu wua n inolaanne. Anggarḷmunanne tawe mabbua n anggore, wuḷḷu rapusi'a roaanna tawe mabbua n ara. ¹⁷Wuassu alu apan masuwukka, asombanganna wua apan mapia, wuḷḷu wuassu alu maḷḷisitta wua apan laḷeo. ¹⁸Alu apan masuwukka tawe mabbua wua laḷeo wuḷḷu alu maḷḷisitta tawe mabbua wua apan mapia. ¹⁹Su manga alu apan tawe mabbua wua apan mapia, tuwanganna wuḷḷu tutunganna. ²⁰Aroddi lai manga nabi awusu. Iamiu sarun maailaḷa wuassu pabbawua n inolaanni mangitou."

Pallaḷagu, waḷine tumba'u wisara

(Luk. 13:25-27)

²¹"Tawe anambo n taumata apan mammaggo Sia'u, 'Mawu, Mawu,' sarun maola'a laḷorḷo n araratuannu Mawu Ruata, arawe tumba'u manga taumata apan tuttuḷḷutta apulu n Iamanku su surga. ²²Su Allo ng Kiamatta manambo taumata sarun mabbisara Sia'u, 'Mawu, Mawu, waḷinewe ringannu arannu iami suete nabbaḷo n tanata Mawu Ruata? Wuḷḷu waḷinewe ringannu arannu Mawu lai iami suete nallimbuakka manga gharḷaho laḷeo see na'ola'a anambo n aḷarḷindu'a?' ²³Arawe Ia'u sarun sumimbakka, 'Ia'u taambe saran paassa naailaḷa siamiu! Roote paarau wua isindi, iamiu apan ma'ola'a aḷaḷeo!'"



Wua n anggore (7:16)

**Maaola'a waḷe apan pande wuḷḷu, maaola'a
waḷe apan woddo**

(Luk. 6:47-49)

²⁴"Ei, taumata apan maaringikka wisara-U indi, wuḷḷu tuttuḷḷutta, itou ere taumata pande apan napararisikku waḷene su wowo n watu.

²⁵Su tempo nanguranna, wuḷḷu nammanawangnga lapiddu anginna ma'ikkatta tinumiuppa maḷḷa'a n waḷe udde, waḷe udde tawe naḷḷa'a ana waugu niaparisikka su wowo m watu.

²⁶Wuḷḷu taumata apan maddaringikka wisara-U indi, arawe tawe tumuḷḷutta, itou nassuḷunggu taumata woddo apan napararisikku waḷene su wowo n anne. ²⁷Su tempo nanguranna wuḷḷu nammanawangnga lapiddu anginna ma'ikkatta tinumiuppa su waḷe udde, waḷe udde naḷḷa'a. Wuḷḷu ahahohakke wahewalla atonna!"

Taḷḷino Mawu Yesus

²⁸Panginsueanne Mawu Yesus nangilloḷo mangnaḷḷa'a, wuḷḷu manga taumata apan isudde lembo naherangnga naaringikka aḷaḷrang-

Nge. ²⁹Ana waugu Itou mangngarra'a ringannu sarraungge tawe ere manga huru n agama mangitou.

Mawu Yesus napaapia n sangkatou raddangge paro apan maarantina

(Mrk. 1:40-45; Luk. 5:12-16)

8 Mawu Yesus sinumossokke wuassu wuidda, wurru manambo tau-mata uatantalongnga Sitou. ²Su tempo udde nirumantate sangkatou apan pia raddangge paro maata'utta. Itou inumalintuda su saruannu Mawu Yesus, see nabbisara, "Iamangnga, amungkangngu Iamangnga maapulu, Iamangnga wotongge mapaapia'u."

³Mawu Yesus namita taumata udde lapiddu nabbisara, "Ia'u maapulu. Apiate!" Orassa udde lai raddangge nawuli. ⁴See Mawu Yesus nabbisara sitou, "Naunge! Arie pabbatti'a sisai-sai. Arawe roote ringannu imam, wurru paddorongnga sitou manantunna manungku i'o napiate. Wua udde anggi'a'e sasamba apan suete nitita Musa, maola'a manga tatiala su taumata manungku i'o napiate atonna!"

Mawu Yesus napaapia mangangimbe n tembonannu tantara n Roma

(Luk. 7:1-10)

⁵Su tempo Mawu Yesus sinumutta su Kapernaum sangkatou tembonannu tantara n Roma nirumanta naisasomba n Tou, wurru naddorongnga tulunganna Sitou. ⁶"Iamangnga," unnu tembonanne udde, "mangangimbe'u maradda'a su wale. Itou ualallowangnga lome su antila wurru mangke uatatarangnga."

⁷Mawu Yesus nabbisara, "Ia'u sarun inai mapaapia n tou."

⁸"Lasa'e Iamangnga," sasimbakku tembonanne udde, "Ia'u tawe su rinone mapaaranta n Iamangnga su wale'u. Iamangnga pamarentate sia'u. Ana see mangangimbe'u mapiate. ⁹Ana waugu ia'u lai rinone massurubawa su tembonangku. Wurru mabbawoanna wuassia'u pia lai manga tantara apan sarun massurubawa su parenta'u. Amungkangngu ia'u mandolokku sangkatou tantara, 'Inaite!' itou sarun inai. Ia'u mabbisara su tantara waine lai, 'Wette isindi!' itou sarun rumanta; wurru amungkangngu ia'u mamarenta allangku, 'Ola'e indi!' itou sarun tumurutta."

¹⁰Su tempo Mawu Yesus naaringikka apa apan niwalo n tembonannu tantara udde, Itou mangke naherangnga. Wua udde Itou na-

bbisara su manga taumata uatantalongnga Sitou, "Waḷine hampa taumata indi. Su wallattu taumata n Israel Ia'u taambe naasomba taumata pangangimanne aroddi ahewalle! ¹¹Atonna! Manambo taumata sarun rumanta wuassu samba'a n ra'i wuḷḷu waḷḷatta lulluassa su sampunna ringanni Abraham, Ishak wuḷḷu Yakub sulaḷummu Runia Wakku Mawu Ruata. ¹²Arawe manga taumata apan ḷinone maola'a aḷaḷḷana'u Mawu Ruata sarun iramme su ararandumma su liudde. Isudde imangitou sarun lumuai wuḷḷu matataḷḷangnga asasusa." ¹³See Mawu. Yesu nabbisara su tembonannu tantara udde, "Apuḷete, apa apan sulaḷummu pangangimannu udde sarun mariaddi."

Wuḷḷu su orassa udde lai mangangimbe udde napiate.

Mawu Yesu napaapia manambo taumata

(Mrk. 1:29-34; Luk. 4:38-41)

¹⁴Mawu Yesu inaite watukku waḷe m Petrus. Isudde Itou naasilo la'iananni Petrus maradda'a saḷiubba su lallowanganna. ¹⁵Mawu Yesu namita limane lapiddu napaia saḷiubba udde. Itou nabangunna wuḷḷu nangimbete Mawu Yesu.

¹⁶Su tempo wawallote, taumata nangapidde mararadda'a apan niasuttannu gharraho laḷeo. Wuḷḷu ringannu tumba'u wisara sampaddi, Mawu Yesu nallimbuakka manga gharraho laḷeo udde wuḷḷu napaapia lai anambo n taumata apan maradda'a. ¹⁷Mawu Yesu na'ola'a sarangkanambone udde, wuḷḷu ringannu aroddi natipusse apa apan niwisara Nabi Yesaya, eteudde, "Itou mamasanna asasusa ng kite wuḷḷu mapapia n radda'i ite."

Manga taumata apan maapulu maola'a mallaḷaḷḷarenggennu Mawu Yesu

(Luk. 9:57-62)

¹⁸Manambo atonna taumata uapaḷiwutta Mawu Yesu. Su tempo Mawu Yesu naasilo simangitou nambo udde, Itou nandolokku mallalaḷḷarenggen-Ne malliu lumewessa rano. ¹⁹See sangkatou huru n agama nirumanta ringanni Tou wuḷḷu nabbisara, "Iamangnga Huru, ia'u maapulu tumantalongnga Iamangnga suapa n tampa Iamangnga umamatta!"

²⁰Mawu Yesu sinumimbakka, "Serigala pia loḷḷrangnge wuḷḷu manu'u winalanganna pia saḷakke, arawe Ana'u Taumata tawe tampa n lallowanganne."

²¹See sangkatou mallar̄r̄enggen-Ne waine nabbisara, "Iamangnga, wala'a ia'u mapule dorone mallabingngu iamangku."

²²Arawe Mawu Yesus sinumimbakka, "Tantalongke Sia'u, wur̄ru wala'e taumata nate mallabingngu taumatane nate udde sassane."

Mawu Yesus napaalenakku tandi'a

(Mrk. 4:35-41; Luk. 8:22-25)

²³Mawu Yesus sinuma'ete saalanna wur̄ru mallar̄r̄enggen-Ne tinumantalongke su sampunna ringanni Tou. ²⁴Inar̄rombanganne tandi'a apan ma'ikkatta tinumiuppa su rano na'oma n sara saalanna ilalenggete n lua'a. Su tempo udde Mawu Yesus tantalan̄na mattiilla. ²⁵Ne manga mallar̄r̄enggen-Ne inait̄e ringanni Tou wur̄ru namu'o Sitou. "Iamangnga! Ontole! Iite masilakate!" unni mangitou.

²⁶"Anio iamiu matta'utta?" unnu Mawu Yesus. "Pangangimanni amiu Sia'u mattulungnga!" Wua udde Mawu Yesus dirumarisikka wur̄ru nandona anginna wur̄ru rano udde. See rano udde nabbal̄ite nal̄enakka atonna.

²⁷Manga mallar̄r̄enggen̄nu Mawu Yesus naherangnga. Imangitou nabbisara, "Taumata ereapa Itou indi, na'oma n sara anginna wur̄ru lua'a tinumurr̄utta apulu-Ne!"

Mawu Yesus napaapia n rua ng katou apan niasuttannu ghar̄raho laleo

(Mrk. 5:1-20; Luk. 8:26-39)

²⁸Mawu Yesus na'omate su samba'a n rano su wageangngu leta'u Gadara. Poiaroddi rua ng katou apan niasuttannu ghar̄raho laleo nimirumanta ringanni Tou. Rua ng katou udde tumanite mar̄ragissa, ana waugu udde tawe saran sangkatou war̄rani sumabbi isudde. ²⁹Imangitou sinumabangnga wuassu manga liangngu laḷabinganna wur̄ru mangngintuli, "Ana'u Mawu Ruata sarun olaannu ereapa iami? Apa I'o mappulute mannansara siami salaiwe taambe tempone?"

³⁰Tawe marau wua isudde, pia bawi manambo atonna tantalan̄na madea'a anna. ³¹Manga ghar̄raho laleo udde sinumalandete Mawu Yesus, "Amungkan̄ngu I'o mandolokki ami sumabangnga, rolor̄ra'a iami sumutta sulalummu manga wawi udde."

³²”Roote!” unnu Mawu Yesus. Manga gharraho laleo udde sinumabangke wuassu taumata darua udde, see sinumuttate sulaḷummu manga wawi. Wurru manga wawi udde lapiddu tinuma-ḷangnga wurru tinumumpa wuassu winggi n rampissa nabatukku rano, see nilumakkuba.

³³Mandariaga wawi udde tinumaḷangnga watukku soa, wurru nabatti’u anambo n arariadianna udde, wurru lai su ola’u taumata darua apan niasuttannu gharraho laleo udde. ³⁴Ne anambo n taumata su soa udde inaita naisasomba Mawu Yesus. Su tempo imangitou naasilo Mawu Yesus, imangitou sinumaḷande tadea’u Itou manantangngu wage-angngu leta’i mangitou.

Mawu Yesus napaapia n sangkatou lome

(Mrk. 2:1-12; Luk. 5:17-26)

9 Mawu Yesus sinuma’ete su saalanna, nalliu rano, nabelengnga watukku soa inariadianne. ²Isudde taumata nangapiddu sangkatou lome ringanni Tou apan uaḷallowangnga su wilatta. Su tempo Mawu Yesus naasilo manungku wahewa atonna pangangimanni mangitou udde, Itou nabbisara su taumata lome udde, ”Paasabare ana’u! Manga rosanu suete niampunganna.”

³Manga pira huru n agama apan isudde lai nabbisara sulaḷummu naungnga, ”Taumata indi mangngaḷuandaga Mawu Ruata!”

⁴Mawu Yesus masingkattu ringiranni mangitou, ne Itou nabbisarate, ”Anio ringirannu araḷeone aroddi? ⁵Suapa malluasanna: mabbisara, ’Rosanu suete niampunganna’, ara’e mabbisara, ’Darisikke wurru amatte’? ⁶Arawe orassa indi Ia’u mappaaḷiatta’a siamiu, manungku su wowo n runia indi Ana’u Taumata uataḷrino mangampunga rosa.” See Mawu Yesus nabbisarate su taumata lome udde, ”Darisikke, lappute wilannu wurru apulete!”

⁷Taumata lome udde dirumarisikke wurru napulete su waḷene. ⁸Su tempo manga taumata naasilo olangnge udde, imangitou nata’utta wurru naddalote Mawu Ruata, ana waugu Mawu Ruata suete napaḷiatta’u tarḷrino-Ne apan aroddi ahewalle su taumata.

Mawu Yesus namaggo si Matius

(Mrk. 2:13-17; Luk. 5:27-32)

⁹Wua udde Mawu Yesus nanantangke n tampa udde. Tantaḷanna u’amatta Itou naasilo sangkatou maddarorongnga wose, aranne Matius,

tantalanna ua'ianna su tampa mallaluru wose. Mawu Yesus nabbisara sitou, "Wette tantalongke Sia'u!"

Ne Matius nirumarisikke wuru tinumantalongke Mawu Yesus.

¹⁰Su tempo Mawu Yesus tantalanna u'anna su wale Matius, nirumantate manambo maddarorongnga wose wuru manga taumata apan sassunannu tumanangnge taumata laleo, u'anna su sampunna ringannu Mawu Yesus wuru mallalarrenggen-Ne. ¹¹Pia manga taumata n Farisi apan naasilo olangnge udde. See imangitou naiwalote mallalarrenggennu Mawu Yesus, "Anio hurunu u'anna su sampunna ringannu mallaluru wose wuru manga taumata laleo?"

¹²Mawu Yesus naaringikka aiwalo mangitou see sinumimbakka, "Taumata apan tawe maradda'a, tawe mappandumma doktere, tumba'u taumata apan maradda'a. ¹³Ringirra'o apa atappasannu wageangngu Wuke Susi indi: 'Ia'u mappandumma darangngu, waline sasamba wuassu winatangnga'. Ana waugu Ia'u nirumanta waline mamaggo taumata apan massunna ririne mapiate, ewe'e taumata apan sassunanna marusa'a."

Pattatatiakka su ola'u puasa

(Mrk. 2:18-22; Luk. 5:33-39)

¹⁴Wua udde mallalarrenggenni Yohanes Mananarriani nirumanta ringannu Mawu Yesus. See imangitou naiwalo, "Anio iami wuru manga taumata n Farisi mappuasa arawe mallalarrenggenni lamangnga tawe?"

¹⁵Mawu Yesus sinumimbakka, "Ereapa su ringiranni amiu? Wotonggewe manga raho su andeangngu awingnga massusa naungnge amungkangngu maa'awingnga esakka ta'e udde su sampunna ringanni mangitou? Asinungka tawe! Arawe sarun a'omanna tempone maa'awingnga esakka udde alapanna wua dinganni mangitou. Su tempo udde nanattakke imangitou mappuasa.

¹⁶Tawe taumata mandappela laubba tabbe ringannu pirissu malarennessa wakku. Ana waugu malarennessa ipandappela udde sarun ma'urutta see manggesa'a laubba udde, see hesangnge maola'a lembo n wahewalla. ¹⁷Aroddi lai tawe taumata apan mandalinnu anggore wakku sulalummu pato'a m pisi tabbe. Ana waugu pato'a udde sarun mape-sangnga wuru mahohakka, see anggorene mabboso. Anggore wakku sarun ilalina su pato'a apan wakku lai, tadea'u itarua sidutu mapia."

Ana'u piarra'u wale m pattatarramawuanna

Wawine apan nangindingnga Mawu Yesus

(Mrk. 5:21-43; Luk. 8:40-56)

¹⁸Tantalanna Mawu Yesus uahatto ringannu manga malalarrenggenni Yohanes Mananarrani, nirumantate sangkatou piarra'u wale m pattatarramawuanna. Itou inumalintuda su saruannu Mawu Yesus wurru nabbisara, "Ana'u wawine wakkute nate. Arawe amungkangngu wotongnge, ranta'o wurru pamita sitou tadea'u itou mabiakka apia."

¹⁹Mawu Yesus dirumarisikke wurru inaite su sampunna ringannu mallalarrenggen-Ne mattudda n taumata udde.

²⁰⁻²¹Su pattangngannu lalanna sangkatou wawine apan maradda'a radda'u wawine mapulote dua su tonnane alannune, nirumanta nangundani Mawu Yesus wuassu liudde. Itou marringidda, "Sambailiate ia'u naa'indingnga jubahne, ia'u sarun mapia." See itou nangindingke pentakku jubah Mawu Yesus.

²²Orassa udde Mawu Yesus nanaile wurru naasilo wawine udde see nabbisara sitou, "Paatammuda, ana'u! Ana waugu i'o mangngimanna Sia'u, i'o mapiate!" Orassa udde lai wawine udde napia.

²³Wua udde Mawu Yesus na'omate su wale m piarra'u wale m pattatarramawuanna udde. Napawe itou naasilo mananalangngu musikku lumalalo wurru taumata nambo mangke maggio, ²⁴Itou nabbisara simangitou, "Sabangke iamiu sarangkanambone! Ana'a indi tawe nate; itou tumba'u mattiilla."

Imangitou sarangkanambone nilumage Mawu Yesus. ²⁵Napawe manga taumata udde sinumabangke, Mawu Yesus sinumutta sulalummu wabbo'a n ana'a udde wurru namita limane. See dirumarisikke ana'a wawine udde. ²⁶Watti'a udde tinumelengke su ahewallu wageangngu leta'a udde.

Mawu Yesus napaapia n rua ng katou wuta

²⁷Mawu Yesus nanantangke n tampa udde wurru su tangnga n dalanna pia rua ng katou wuta uatantalongnga Sitou. Itarua mangngintuli, "Ana'i Daud, akkanaawe iamii!"

²⁸Napawe Mawu Yesus sinumutta sulalummu wale, taumata wuta darua udde nirumanta ringanni tou. Mawu Yesus naiwalo simangitou,

"Apa iamiu mangngimanna manungku Ia'u wotongnge mangapia siraddua?"

"Mangngimanna Iamangnga!" Sasimbakki tarua.

²⁹See Mawu Yesus namita mata n tarua ringannu wisara-Ne, "Ana waugu iraddua mangngimanna, ariadite su ereapa aantimanni amiu."

³⁰Ne itarua naasilote. Mawu Yesus napanaungnga sitarua, tadea'u tawe mabbatti'u olangnge udde sisai-sai.

³¹Arawe imangitou inaitte nabbatti'u inolaannu Mawu Yesus su aḷawo'u wageangngu leta'a isudde.

Mawu Yesus napaapia n taumata mou

³²Su tempo rua ng katou udde napuḷete, sangkatou mou apan niasuttannu gharraho laḷeo niapidida ringannu Mawu Yesus. ³³Mawu Yesus nallimbuakke gharraho laḷeo udde wuḷru su orassa udde lai taumata udde naawisarate apia. Taumata nambo isudde nirumindu'a see nabbisara, "Iami taambe naasilo olangnge ereindi su Israel!"

³⁴Arawe manga taumata n Farisi nabbisara, "Ete manga tembonannu gharraho laḷeo nangagillu tarḷrino Sitou mallimbuakka manga gharraho laḷeo udde."

Mawu Yesus inumakkanna naasilo taumata nambo

³⁵Aroddiwe Mawu Yesus inaitte namaḷiwutta wuassu soa sambau watukku soa waine wuḷru wuassu wanua sambau watukku wanua waine. Itou mangngarra'a su manga waḷe m pattatarḷramawuanna, wuḷru mam-masingkattu Watti'u Aḷaḷuassa su ola'u ereapa Mawu Ruata mama-renta ere sangkatou Ratu. Itou mapaapia n manga taumata apan uapendamma aḷawo'u radda'a wuḷru sangkullu wadangnga. ³⁶Su tempo Mawu Yesus naasilo taumata nambo udde, Itou inumakkanni mangitou, ana waugu imangitou tinumiangnga wuḷru lome, ere domba apan tawe mal-laḷu'adde. ³⁷See Mawu Yesus nabbisara su manga mallarḷrenggen-Ne, "Pangitinganna manambo arawe mangangitingnge mattuḷungnga. ³⁸Ana waugu udde paddorongke su tatahuannu wailla udde tadea'u mandolokku mangangitingnga iapa'itingnga."

Sire mapulo dua rasulle

(Mrk. 3:13-19; Luk. 6:12-16)

10 Su allo sambau Mawu Yesus namaggote mapulo dua mal-lalarrengeen-Ne maammulla. See Itou nangonggolle n tarino simangitou mallimbuakka manga gharraho laleo wurru mangapia alawo'u hati n radda'a wurru alawo'u sangkullu wadangnga. ²Arannu sire mapulo dua rasulle eteudde: paarorone Simon (apan isassaggo lai Petrus) ringannu turrangge Andreas, see Yakobus ringannu turrangge Yohanes, eteudde alarrana'i Zebedeus. ³Wua udde Filipus wurru Bartolomeus, see Tomas, see Matius, mallaluru wose, see Yakobus ana'i Alfeus, wurru Tadeus; ⁴see panginsueanne Simon, si Patriot wurru Yudas Iskariot apan nandaleo Mawu Yesus.

Manara manga rasulle

(Mrk. 6:7-13; Luk. 9:1-6)

⁵Sire mapulo dua rasulle udde nirolokke Mawu Yesus ringannu tatantiro ereindi, "Imbarangnga inai su wageanggu leta'u manga taumata apan waline Yahudi. Arie lai inai su manga soa taumata n Samaria. ⁶Arawe roote su wallattu taumata n Israel, nangillembosimangitou apan nialiwune. ⁷Waloa'e simangitou manungku Mawu Ruata malihakke lai mamarenta ere sangkatou Ratu. ⁸Paapia'e manga taumata apan maradda'a; pawanguna'e manga taumata apan nate; paapia'e manga taumata pia raddangge paro apan maarantina, wurru limbuarrete manga gharraho laleo. Iamiu suete nanengkamma sarangkanambone udde ringannu tawe bawaekke. Nariaddi pangonggolla lai ringannu tawe maddorongnga bawaekke. ⁹Arie mangapiddu roitta wulawanna, roitta sala'a, ara'e roitta witu'a. ¹⁰Arie lai mangapiddu pato'a m padaroronganna, ara'e laubba rua m parassa su amatannu, ara'e sapatu, ara'e ta'inna. Ana taumata apan mammanara sarun isuungnga hausanne.

¹¹Amungkanggu iamiu na'omate su soa ara'e su ampungnga, padea'e sangkatou apan maapulu manarimmatta siamiu. Atana'e ringannitou ma'oma n sara iamiu umamatta apia. ¹²Su tempo iamiu sumutta su wale, pabbisarate, 'Antimanna Mawu mangalamatta siamiu.' ¹³Amungkanggu manga taumata su wale udde manarimmatta siamiu, wala'e tabeanu udde matatana'a ringanni mangitou. Arawe amungkanggu imangitou tawe manarimmatta siamiu, welenga'a apia tabeanu udde. ¹⁴Amungkanggu pia bale ara'e soa apan madiri manarimmatti amiu

ara'e madiri maddaringikka siamiu, tantanga'a tampa udde wurru ton-tonga'a awu su paladu leddanu. ¹⁵Paanaunge! Su Allo ng Kiamatta, manga taumata n soa Sodom wurru Gomora malluasanna ampungannu Mawu Ruata wuassu manga taumata su soa udde!"


Pananansara apan sarun rumanta

(Mrk. 13:9-13; Luk. 21:12-17)

¹⁶"Daringirre paapia indi: Ia'u nandolokki amiu naalihidda domba apan tawe auatanne su wallattu serigala malarraga. Iamiu rinone paatehamma ere atoanna wurru matulidda naungnge ere merpati. ¹⁷Paariaga, ana waugu iamiu sarun sametanna wurru iapaasaruanna su Mallarruungngu Agama. Iamiu sarun sansaranna su manga wale m pattatarramawuanna. ¹⁸Iamiu sarun iapidda su saruannu manga tembonanne wurru mararatu ana waugu iamiu mallalarrenggeng-Ku. Wurru eteudde tempo ng kamiu mangagillu tatiala su ola'u riri'u si mangitou wurru su manga taumata apan tawe maailala Mawu Ruata. ¹⁹Arawe amungkangngu iamiu iapidda parikisanna, arie suminggawangnga su ola'u apa apan isimbakki amiu, ara'e ereapa iamiu sarun mabbatti'a. Ana waugu apa apan sarun iwisara ng kamiu udde, sarun iwalo siamiu su temponete. ²⁰Ana waugu mabbisara su tempo udde walineuwe iamiu, arawe Gharraho n Iamangnga su surga, uarrundinganna siamiu.

²¹Sarun mariaddi manungku taumata sarun manantillu turrangnge sassane iapapate. Wurru udde lai sarun mariaddi su wallattu iamangnga wurru anangnge. Alarrana'a sarun lumawangnga hagurangnge, wurru manantilli mangitou iapapate. ²²Iamiu sarun iaarantinnu anambo n taumata ana waugu iamiu mallalarrenggeng-Ku. Arawe taumata apan matatarrangnga ma'oma n sara panginsueanne sarun iapaaralukka. ²³Amungkangngu iamiu pappateanna su soa sambau, talangnga su soa waine. Ia'u mabbalo siamiu: Tantalanna iamiu taambe nama lintaddu alawo'u soa su Israel, Ana'u Taumata nirumantate.

²⁴Alarrana'a si'ola tawe maasampaliu hurune, wurru mangangimbe tawe maasampaliu mawune. ²⁵Narrinote amungkangngu sangkatou ana'a si'ola maola'a ere hurune, wurru sangkatou mangangimbe maola'a ere mawune. Amungkangngu pa'ihaguranganna su wale aranne ete nisaggo Beelzebul, lembonete lalorro n walene. I mangitou sarun onggo'annu aranna araleoane lai!"



Manu'a sanggelokka (10:29)

Ata'utte Mawu Ruata

(Luk. 12:2-7)

²⁶”Ariewe paata’uttu taumata. Tawe apa apan uawuni, apan tawe asiloanna, wuṛṛu tawedu apa apan iaadappingnga apan tawe asingkatanna. ²⁷Apa apan Ta’u iwaḷo siamiu su marandumma, ṛinone isuḷe ng kamiu apia su semakku allo. Wuṛṛu apa apan isasaḷimburungnga su taḷinganu, waḷoa’a udde su awadaalla. ²⁸Arie mata’utti mangitou apan mammate wadangnga, arawe tawe taṛṛino mamate niawa. Ata’utte Mawu Ruata apan uataṛṛino mamate, mapia ete wadangnga aroddi lai ṛimuudda sulaḷummu naraka. ²⁹Sanggalokka darua aawalliannu sambau roitta apan addio’anne. Salaiwe aroddi tawe saran sambau manawo su leta’a amungkangngu tawe ipaapulu n Iamangngu. ³⁰Reengannu uta’a su puanu suete nireengnga anambone. ³¹Ana waugu udde, arie mata’utta! Iamiu lembo maareganne wuassu sanggelokka!”

Mangnga’u Mawu Yesus su saruannu awadaalla

(Luk. 12:8-9)

³²”Isai-sai manga’u su saruannu awadaalla manungku itou malalaṛṛenggeng-Ku, Ia’u lai sarun manga’u sitou su saruannu Iamangku su surga. ³³Arawe isai-sai massinaada su saruannu awadaalla manungku

itou mallalarrenggeng-Ku, Ia'u lai sarun massinaadi tou su saruannu Iamangku su surga."

Wałine paddarame ewe'e pasaseetta

(Luk. 12:51-53, 14:26-27)

³⁴"Arie iamiu massunna manungku Ia'u mangapiddu paddarame su runia indi. Ia'u tawe mangapiddu paddarame, arawe pasaseetta. ³⁵Ia'u nirumanta na'ola'a ana'a esakka lumawangnga iamangnge, ana'a wawine lumawangnga inangngene, wurru mananambo lai wawine lumawangnga la'iananne wawine. ³⁶Ore, apa apan sarun maola'a seetta ahewalanne, eteudde lałorro n wałe udde sassane.

³⁷Taumata apan marangngu iamangnge ara'e inangngene manampaliu wuassia-U tawe maola'a mallalarrenggeng-Ku. Aroddi lai taumata apan marangngu anangnge esakka ara'e wawine manampaliu wuassia-U. ³⁸Wurru taumata apan madiri mamasanna alu arussane wurru tuman-talongnga Sia'u, tawe maola'a mallalarrenggeng-Ku. ³⁹Taumata apan tumba'u mattinau wiakke, sarun awuliannu wiakke, arawe taumata apan awuliannu wiakke ana waugu tutturutta Sia'u, sarun maasomba wiakke."

Lałantakku pallałagu apan mapia

(Mrk. 9:41)

⁴⁰"Taumata apan manarimmatti iamiu, manarimmatta Sia'u lai. Wurru taumata manarimmatta Sia'u, manarimmatta Sitou lai apan suete nandolo-U. ⁴¹Taumata apan nanarimmattu nabi ana waugu itou nabi, sarun manarimmattu lałantakke ere sangkatou nabi. Wurru isai apan manarimmattu sangkatou apan mapia ana waugu itou mapia, sarun manengkamma lałantakku sangkatou taumata apan mapia. ⁴²Isai-sai mappa'inumma, salaiwe tumba'u ua'e tallangnga, su sangkatou su wal-lattu manga taumata asiangnga indi, ana waugu itou mallalarrenggeng-Ku, pangimanna itou sarun manengkamma lałantakke!"

Darolołranni Yohanes Mananarrani

(Luk. 7:18-35)

11 Napawe Mawu Yesus suete nanantiro sire mapulo dua mallalarrenggen-Ne, Itou nanantangke n tampa udde. Itou inaité nangarra'a wurru nabbatti'u tanata Mawu Ruata su alawo'u manga soa apan marani isudde.

²Yohanes Mananarrani apan tantaḷanna uarḷuumanna naaringikka su ola'u pamamanara Mawu Yesus Kristus. See itou nandolokke manga pira mallarḷrenggenne ringannu Mawu Yesus niapaiwaḷo, ³"Ete Iamangnga taumata apan sarun rumanta ere suete pina'ire Mawu Ruata, ara'e iami sarun marḷrado lai taumata waine?"

⁴Mawu Yesus sinumimbakka, "Pabelengke ringanni Yohanes wurru waḷoa'e apa apan suete niaringiranna wurru niasiloanni amiu. ⁵Taumata wuta naasilo, taumata lome naa'amatta, taumata raddangge paro napia, taumata wengella naaringikka, taumata nate nabbiakka apia, wurru Watti'u Alaḷuassa wuassu Mawu Ruata niapasingkatta su manga taumata asiangnga. ⁶Laḷumanna'a su taumata tawe pinangiananne su ipanola'u!"

⁷Napawe raloloḷḷranni Yohanes nabelengke, Mawu Yesus nantakke nabbisara su taumata nambo su ola'i Yohanes, wisara-Ne, "Iamiu inai su wadda'a ma'ellega apa? Sangkuḷappa waḷabukka itat-talla'u anginna? ⁸Iamiu inai ma'ellega apa? Sangkatou apan uapedetta mapia? Manga taumata apan uapedetta aroddi uatana'a su tampa n araratuanna! ⁹Nariaddi anio iamiu inai su wadda'a? Inai ma'ellega sangkatou nabi? Atonna itou nangillembo wuassu sangkatou nabi. ¹⁰Ana waugu ete Yohanes udde apan isassaggo su wageangngu Wuke Susi ereindi,

'Ete indi raloloḷḷrang-Ku, unnu Mawu Ruata,
Ia'u nandolokki tou dorone wuassi'o
tadea'u itou mamu'a laḷan-Nu.'

¹¹Naunge! Su runia indi taambe sangkatou taumata nangillembo wuassi Yohanes Mananarrani. Salaiwe aroddi taumata apan addio'anne wuassu wallattu alaḷrana'u Mawu Ruata, nanampaḷiu wuassi Yohanes. ¹²Ro'e n Yohanes namasingkattu wattingnge udde na'oma n sara orassa indi, alaḷrana'u Mawu Ruata ipaseettu manga taumata apan maapulu mamarenta ringannu araragissa. ¹³Na'oma n sara raranta n Yohanes Mananarrani, anambo n tita Musa wurru manga alaḷra'u manga nabi namasingkatta su ola'u apa apan rinone mariaddi. ¹⁴Wurru amungkangngu iamiu mangngimanna, Yohanes uddewe Elia, apan darantane suete niapasingkatta. ¹⁵Amungkangngu pia taḷinga, paddaringikka!

¹⁶Ringannu apa sarun Ta'u isumandingnga manga taumata su tempo indi? Imangitou ere manga alaḷrana'a apan ua'ianna su pasakka. Sambageanganna u'ui su ammuḷanna waine, ¹⁷'Iami mangngantari aantari n laḷuassa siamiu, arawe iamiu madiri massaḷaingnga. Iami mangngantari aantari n patatampungnga, wurru iamiu madiri lumuai!' ¹⁸Yohanes nirumanta – itou mappuasa wurru tawe ma'inumma anggore; wurru manga taumata mabbisara, 'Itou niasuttannu setanna!' ¹⁹Orassa indi Ana'u Taumata, nirumanta – Itou u'anna wurru ma'inumma; see manga tau-

mata mabbisara, 'Pa'ellega taumata udde! Waḷiu, tarra wu'anna, hawene maddarorongnga wose, wuḷḷu hawene taumata marosa.' Salaiwe aroddi, apapande Mawu Ruata niatialanna wuassu manga wuane."

Manga soa apan madiri mangngimanna

(Luk. 10:13-15)

²⁰See Mawu Yesus nanattakke mapaasaḷa manga soa, suapa isudde Itou asokkanne ma'ola'a aḷarḷindu'a. Ana waugu manga taumata su soa udde madiri mawaḷu wuassu paddarosa mangitou. ²¹"Nasilakate iamiu Korazim! Wuḷḷu nasilakate lai iamiu, Betsaida! Unnu wisara manga aḷarḷindu'a apan niola'a su pattangnganni amiu suete niola'a su Tirus wuḷḷu Sidon, asinungka manga taumata poiारoddi maḷannute nawaḷu wuassu paddarosa mangitou wuḷḷu suete nalluḷḷe n laubbu massusa, see nandenote n awu su pua mangitou. ²²Paanaunge, su Allo ng Kiamatta, manga taumata n Tirus wuḷḷu Sidon malluasanna ampungannu Mawu Ruata wuassi amiu. ²³Wuḷḷu iamiu, Kapernaum! Apa iamiu sarun iapaatangakka ma'oma n sara surga? Tawe! Ewe'e iamiu sarun iwontolla su naraka! Ana waugu unnu wisara manga aḷarḷindu'a apan niola'a su pattangnganni amiu udde suete niola'a su Sodom, saran orassa indi ta'e pia Sodom! ²⁴Paanaunge, su Allo ng Kiamatta, taumata n Sodom malluasanna ampungannu Mawu Ruata wuassi amiu!"

Rantate ringang-Ku

(Luk. 10:21-22)

²⁵Su tempo udde Mawu Yesus u'aliomanna, "Iamangnga Mawu apan uatarḷino langitta wuḷḷu runia! Ia'u maadiangkamanna Si'o ana waugu sarangkanambone udde niadapping-Ngu wuassu manga taumata apan pande wuḷḷu pia asingkanne, arawe I'o manualaga su manga taumata apan tawe si'olane. ²⁶Eteudde maaluassa naungngu Iamangnga."

²⁷See Mawu Yesus nabbisara, "Sarangkanambone suete tinantillu Mawu Iamangnga Sia'u. Tawe sangkatou masingkattu Ana'a, tumba'u Mawu Iamangnga. Tawedu lai apan masingkattu Mawu Iamangnga, tumba'u Ana'a, wuḷḷu manga taumata, ete sisai Ana'a udde mamasingkattu Mawu Iamangnga.

²⁸Rantate ringang-Ku iamiu sarangkanambone apan naḷotakke, wuḷḷu uapendamma winabbawa mawakkatta; Ia'u sarun mappauḷe ng kamiu. ²⁹Tuḷḷutte parenta-U wuḷḷu pattannote pallalagu-U. Ana waugu Ia'u indi masarḷionto'a wuḷḷu mawawo naungnge, ne iamiu sarun maa-

pendamma اساسunge atatahulandimma. ³⁰Ana waugu manga parenta-U maaļuassa, wuṛru winabbawa apan Ta'u iapapasanna si'o, maṛṛanna."

Aiwaḷo su ola'u allo n Sabatta

(Mrk. 2:23-28; Luk. 6:1-5)

12 Su sambau allo n Sabatta, su tempo Mawu Yesus sinumabbi sambau waillu gandumma, mallaḷarṛenggen-Ne nanatakke mangngitingnga gandumma, see niante ana waugu maḷunussa. ²Su tempo manga taumata n Farisi naasilo udde, imangitou nabbisara Mawu Yesus, "Pa'ellega! manga mallaḷarṛenggen-Nu lullawangnga tita n agama ng kite ringannu ma'ola'a inolaanna apan isassingada su allo n Sabatta."

³Mawu Yesus sinumimbakka, "Iamiu taambe naawasa saran paa-ssa su ola'u apa apan niola'i Daud su tempo itou wuṛru manga taumatane maḷunussa? ⁴Itou sinumutta sulaḷummu Waḷe Mawu Ruata; see inumanna roti apan suete niola'a sasamba su Mawu Ruata. Sumbaḷi tumuṛruttu tita n agama ng kite, itou wuṛru manga taumatane tawe wotongnge umanna roti udde – tumba'u manga imam udde wotongnge. ⁵Ara'e iamiu taambe naawasa sulaḷummu tita Musa manungku suapa n allo n Sabatta manga imam apan mammanara su Waḷe Mawu, lullawangnga atorannu allo n Sabatta, arawe tawe iapaasaḷa? ⁶Naunge apa apan iwabbisara-U indi: isindi pia nangillembu ahewaḷanne wuassu Waḷe Mawu. ⁷Sulaḷummu Wuke Susi uaworṛetta: Ete paa'akanna apan ipaapulu-U, waḷine sasamba wuassu winatangnga. Amungkangngu iamiu atonna-tonna maasunna wisara indi, natantuna iamiu tawe mapaasaḷa manga taumata apan tawe saḷane. ⁸Ana waugu Ana'u Taumata uaagassa allo n Sabatta."

Taumata limane lome samba'a

(Mrk. 3:1-6; Luk. 6:6-11)

⁹Mawu Yesus nanantangke n tampa udde see inaitte su sambau waḷe m pattatarṛamawuanna. ¹⁰Isudde pia sangkatou taumata limane lome samba'a. Manga pira taumata apan madea'a pasasaḷa Mawu Yesus, naiwaḷo Sitou, "Apa wotongnge mapaapia n taumata su allo n Sabatta?"

¹¹Mawu Yesus sinumimbakka, "Unnu wisara pia sangkatou wuassu wallatti amiu uatahuanna domba sambau, wuṛru su allo n Sabatta domba udde nanawo su loṛrangnga apan maḷaḷumma; apa tatahuannu domba udde tawe madea'a mamatunna domba udde wuassu loṛrangnga?"

¹²Ne, taumata maareganne wuassu domba! Nariaddi amungkangngu aroddi wotongnge mantuḷungngu taumata su allo n Sabatta.” ¹³Wua udde Mawu Yesus nabbisarate taumata apan limane lome samba'a udde, "Uḷurra'e limanu."

Taumata udde nanguḷukke n limane, see lima udde napiate ere lai limane samba'a. ¹⁴Arawe manga taumata n Farisi nanantangngu waḷe m pattataḷḷamawuanna udde, see na'irete mamate Mawu Yesus.

Raloḷoḷḷanna apan nipile Mawu Ruata

¹⁵Mawu Yesus masingkatte manungku manga taumata n Farisi udde pia ḷingirḷanna laḷeo su riri n Tou. Nariaddi Itou inaite wuassu tampa udde wuḷḷu manambo taumata uatantalongnga Sitou. See Itou napaapia n manga taumata apan maradda'a. ¹⁶Arawe Itou naningaddi mangitou mamasingkati Tou su taumata waine. ¹⁷Ringannu aroddi nariaddite apa apan suete niwisara Mawu Ruata si Nabi Yesaya,

¹⁸"Ete indi raloḷoḷḷang-Ku apan Ta'u pinile

taumata apan arangnguang-Ku wuḷḷu natataḷḷino su naung-Ku.

Ghaḷḷaho-U sarun ionggolla Sitou,

atatuḷi-U sarun iapasingkatta Sitou su manga pabbawalaga.

¹⁹Itou sarun tawe matatiakka ara'e mangngintuḷi,

ara'e mabbisara su manga laḷanna.

²⁰Iawanna apan uala'ukka tawe paddianni Tou,

soḷo apan u'odo'a tawe padduman-Ne.

Itou sarun mammanara ma'oma n sara atatuḷidda a'omanna;

²¹ aḷawo'u pabbawalaga sarun pia antimma Sitou."

Mawu Yesus wuḷḷu Beelzebul

(Mrk. 3:20-30; Luk. 11:14-23)

²²Wua udde niapidda ringannu Mawu Yesus sangkatou wuta wuḷḷu mou ana waugu niintaḷḷoannu ghaḷḷaho laḷeo. Mawu Yesus napaapia n taumata udde na'oma n sara itou naawisarate wuḷḷu naasilote. ²³Anambo n taumata naherangnga wuḷḷu nabbisara, "Asinungka Itou indi Ana'i Daud apan suete pina'ire udde?"

²⁴Su tempo manga taumata n Farisi naaringikka aroddi, imangitou sinumimbakka, "Taumata indi tumba'u wotongnge mallimbuakka ghaḷḷaho laḷeo, ana waugu Beelzebul, tembonannu manga ghaḷḷaho laḷeo, suete nangagillu taḷḷino udde Sitou."

²⁵Mawu Yesus naasingkatta ringirranu manga taumata n Farisi udde. Ne Itou nabbisarate si mangitou, "Amungkangngu sambau araratuanna nattaŕei naola'a pira ng kawageanganna apan sarun pasi passee-tta, araratuanna udde tawe maŕannu. Wuŕru sambau wanua ara'e laŕoŕro n waŕe sambau apan uataae wuŕru uasasetta sangkatou ringannu sangkatou, sarun mawinasa. ²⁶Aroddi lai sulaŕummu araratuannu Setanna; amungkangngu wageangnge sambau mallimbuakka wageangnge waine, ne araratuannu Setanna udde natahiate wuŕru nahohakke. ²⁷Iamiu mabbisara manungku Ia'u mallimbuakka ghaŕraho laŕeo ana waugu taŕrino n Beelzebul. Amungkangngu aroddi ringannu taŕrino n sai mal-laŕaŕrenggennu mallimbuakka ghaŕraho laŕeo. Mallaŕaŕrenggennu udde sassane napaliatta'a manungku iamiu nassaŕa! ²⁸Arawe Ia'u mallimbuakka ghaŕraho laŕeo ringannu taŕrino Mawu Ruata. Wuŕru udde atap-pasanne manungku Mawu Ruata mannattakke mamarenta su pattangnganni amiu.

²⁹Ereapa taumata wotongnge maasutta sulaŕummu waŕe n sangkatou apan matohassa wuŕru mangarŕo darotongnge, amungkangngu itou tawe maŕrapussa dorone taumata matohassa udde? Wua udde itou wotongngete mangarŕo darotongnge.

³⁰Taumata apan tawe manamba'a Sia'u atonna-tonna itou lullawangnga Sia'u. Wuŕru taumata apan tawe mallalima Sia'u atonna-tonna itou manggohakku manara-U! ³¹Ana waugu udde, ana see i'o masingkatta, amungkangngu taumata ma'ola'a rosa wuŕru mabbatti'u aŕuandaga, itou wotongnge aampunganna! Arawe amungkangngu itou mangngaddio'a Ghaŕraho Mawu Ruata, itou tawe aampunganna! ³²Amungkangngu taumata mabbisara wisara tatompola su Ana'u Taumata, itou wotongnge aampunganna, arawe amungkangngu itou mangngaddio'a Ghaŕraho Mawu Ruata, itou tawe aampunganna, mapia orassa indi ara'e lai su panginsueanne!"

Alu ringannu manga wuane

(Luk. 6:43-45)

³³"Tadea'u maasomba wua apan mapia, alune rinone masuwukka. Amungkangngu alune maŕrisitta, wuane lai laŕeo. Masuwukka ara'e maŕrisitta alu udde asingkatanna wuassu wuane. ³⁴Iamiu taumata laŕeo, ereapa wotongnge iamiu maasaggo n aŕawo'u inolaanna apan mapia amungkangngu iamiu laŕeo? Apa apan niwisara moŕrongnga udde sinumabangnga wuassu laŕummu naungnga! ³⁵Taumata apan mapia mannaggo n inolaanna apan mapia, ana waugu itou napene n apapia.

³⁶Nariaddi, paanaunge: su Allo ng Kiamatta, sangkatou-sangkatou rinone sumimbakka manga wisara apan tawe gunane apan suete niwisara n tou. ³⁷Ana waugu wisara ng kamiu sassane apan sarun ipaatta iparrawessa apa i'o nassaḷa ara'e tawe."

Manga taumata n Farisi maddorongnga Mawu Yesus ma'ola'a aḷarḷindu'a

(Mrk. 8:11-12; Luk. 11:29-32)

³⁸Wua udde manga pira huru n agama wurru manga taumata n Farisi nabbisara, "Iamangnga Huru, iami maapulu ma'ellega Iamangnga Huru ma'ola'a aḷarḷindu'a."

³⁹"Araḷeo wurru aḷawangnga eteapa, manga taumata su tempo indi!" sasimbakku Mawu Yesus. "Iamiu maddorongnga Ia'u ma'ola'a aḷarḷindu'a? Iamiu tawe onngoḷannu sambau aḷarḷindu'a udde, tumba'u aḷarḷindu'a wuassi Nabi Yunus. ⁴⁰Yunus uatana'a tallu allo tallu ḷabbi sulaḷummu tiannu inassa masallaka. Aroddi lai Ana'u Taumata sarun matana'a tallu allo tallu ḷabbi sulaḷummu tiannu runia. ⁴¹Su Allo ng Kiamatta, laḷorḷo Niniwe sarun mabangunna su sambau ringannu manga taumata n tempo indi wurru mapaasaḷa mangitou. Ana waugu manga taumata Niniwe udde nawaḷu wuassu rosa mangitou, su tempo Yunus nannase simangitou. Arawe orassa indi pia maggewaḷanne wuassi Yunus! ⁴²Su tempo Allo ng Kiamatta, ratu wuassu wanua Timukka sarun mabangunna su sampunna ringannu manga taumata n tempo indi wurru mapaasaḷa mangitou. Ana waugu tadea'u maddaringikka aḷarḷa'i Salomo apan pande, ratu udde na'ola'a amatanna apan marau atonna wuassu pentakku runia. Arawe isindi orassa indi piaddu maggewaḷanne wuassi Salomo!"

Pabbawelengngu gharḷaho laḷeo

(Luk. 11:24-26)

⁴³"Napawe gharḷaho laḷeo nanantangke n sangkatou, gharḷaho udde namaḷiwutte manga tampa apan mamara, madea'a tampa pangngilloḷoanna arawe itou tawe naasomba. ⁴⁴Ana waugu udde itou nabbisara, 'Ia'u sarun mabelengnga su waḷe apan suete nitantangku.' Su tempo itou na'omate isudde, waḷe udde tawe lorḷone, waresi wurru uaa-tokka. ⁴⁵See itou inaite wurru nangapiddu pitu gharḷaho waine apan nangillembu n araḷeone wuassi tou. Wua udde imangitou sinumuttate sulaḷummu taumata udde, see natana'a isudde. Wurru panginsueanne

taumata udde niatambanna arafeone wuassu paarorone. Udde lai sarun mariaddi su manga taumata laleo su tempo indi.”

Inangnga wurru manga turrangngu Mawu Yesus

(Mrk. 3:31-35; Luk. 8:19-21)

⁴⁶Tantalanna Mawu Yesus ta'e uahahatto ringannu taumata nambo udde, nirumantate inangnga wurru manga turrang-Nge. Imangitou uarisikka su liudde lapiddu madea'a ana see wotongnge maahahatto n Tou.

⁴⁷Sangkatou wuassu wallattu taumata nambo udde nabbisara su Mawu Yesus, "Iamangnga, inangnga wurru turrangngi Iamangnga wowa su liudde. Imangitou maapulu maggahatto n Iamangnga."

⁴⁸See Mawu Yesus sinumimbakka, "Isai inang-Ku? Isai manga turrang-Ku?" ⁴⁹See Itou nanta'e manga mallalarrenggen-Ne wurru nabbisara, "Indi inangnga wurru manga turrang-Ku. ⁵⁰Taumata apan ma'ola'a apulu n Iamangku su surga, itou turrang-Ku esakka, turrang-Ku wawine wurru inang-Ku."

Sasumandingngu sangkatou mangangasi'a

(Mrk. 4:1-9; Luk. 8:4-8)

13 Su allo udde lai Mawu Yesus nanantangke. n wale udde see inainte su winggi n rano wurru inuma'iante isudde. ²Manambo atonna taumata uaammulla mamaliwutta Mawu Yesus, ana waugu udde Itou inainte inuma'ianna su saalanna, arawe taumata nambo udde pasirarisikka su apanne. ³See Mawu Yesus nangarra'e n alawo'u alarra'a simangitou ringannu sasumandingnga.

"Sangkatou mabbawaila inainte mangasi'u wualanna," aroddiwe Mawu Yesus nanattakku watti'i Tou. ⁴"Su tempo itou mangngasi'a, pia bualanna nanawo su lafanna. See manu'a nirumanta wurru wualanna udde nianni tou na'oma n sara nasue. ⁵Pia laiddu nanawo su tampa mawatu, apan letangnge addio'a. Manga wualanna udde lapiddu tinumuwo ana waugu mattulungnga letangnge. ⁶Arawe su orassu matanallo matanggakke, manga tatuwo n wualanna udde mannattakke tinumolangnga, ana see narangu wurru nate ana waugu ramunne tawe nusippa malalumma. ⁷Pia lai wualanna nanawo su tangnga n ahuranganna roaanna. Ahuranganna roaanna udde tinumuwo wurru namulissa tatuwo n wualanna udde na'oma n sara nate. ⁸Arawe pia lai wualanna apan nanawo su leta'a masuwukka, see nabbua; piaddu marasutta, piaddu anummu pulo, wurru pia lai paatallu m pulone anambone."



Wua n gandumma (13:4)

⁹Napawe suete nabbatti'u sasumandingnga udde, Mawu Yesus nabbisara, "Amungkangngu pia taŋinga paddaringikka!"

Anio Mawu Yesus mappaattu sasumandingnga

(Mrk. 4:10-12; Luk. 8:9-10)

¹⁰Wua udde mallarŋenggenno Mawu Yesus nirumanta naiwaŋo Sitou, "Anio Iamangnga mappaattu sasumandingnga amungkangngu mabbisara ringannu taumata nambo udde?"

¹¹Mawu Yesus sinumimbakka, "Ana waugu iamiu suete niongoŋannu aŋamatta ipani'attu addapingnga su ola'u ereapa Mawu Ruata mamarenta, arawe imangitou tawe niongoŋanna. ¹²Ana waugu taumata apan uatahuante, sarun ongoŋanna lai lembo n anamboanne, wuŋŋu itou sarun lebbeanna. Arawe taumata apan tawe tatahuananne, tumba'u addio'a lai sitou sarun anuanna. ¹³Ana waugu udde Ia'u mappaattu sasumandingnga amungkangngu maggahatto n taumata nambo, ana waugu imangitou ma'ellega, arawe ere taumata apan tawe maasilo; imangitou maddaringikka arawe ere taumata wengella, wuŋŋu tawe maasunna. ¹⁴Ringannu udde nariaddite apa apan suete niwaŋo Nabi Yesaya,

'Mawu Ruata nabbisara:

Imangitou sarun sidutu uararingikka

arawe tawe maasunna;
 imangitou sarun sidutu mannutukka
 arawe tawe maasingkatta apa apan nariaddi.
¹⁵Ana waugu ringirranu taumata indi nalumute
 taḷinga mangitou nabbengelle wuḥḥu mata mangitou tawe
 maasilo.
 Indi mariaddi tadea'u mata mangitou tawe maasilo
 taḷinga mangitou tawe maaringikka,
 ringirrani mangitou tawe maasunna
 wuḥḥu arie mabelengnga ringang-Ku,
 see Ia'u mapaapia mangitou.'"

¹⁶"Arawe auntunganna eteapa siamiu," unnu Mawu Yesus su
 mallarḥḥenggen-Ne, "ana waugu iamiu atonna-tonna suete naasilo
 wuḥḥu naaringikka. ¹⁷Paanaunge, manambo nabi wuḥḥu taumata apan
 tuttuḥḥutta Mawu Ruata maapulu ma'ellega apa apan a'elleani amiu
 orassa indi, arawe imangitou tawe maasilo. Imangitou maapulu madda-
 ringikka apa apan raddaringirrani amiu su orassa indi, arawe imangitou
 tawe maaringikka."

Mawu Yesus mannaḷa'a n sasumandingngu sangkatou mangangasi'a

(Mrk. 4:13-20; Luk. 8:11-15)

¹⁸"Daringirrete apa atappasannu sasumandingngu sangkatou manga-
 ngasi'a udde. ¹⁹Wualanna apan nanawo su laḷanna isassumandingnga su
 taumata apan naaringikka watti'u Mawu Ruata mamarenta, arawe itou
 tawe naasunna. Setanna udde nirumanta wuḥḥu nangarḥḥo wualanna apan
 suete niasi'a sulalummu naungngi mangitou. ²⁰Wualanna apan nanawo
 su leta'a mawatu, isassumandingnga su taumata apan maddaringikka
 watti'a udde wuḥḥu lapiddu nangngimanna ringannu naungnga maḷuassa.
²¹Arawe watti'a udde tawe narḥḥamutta sulalummu naungngi mangitou,
 na'oma n sara tawe tinumuwo maḷannu. Aroddi imangitou naasomba
 asasusa ara'e asasansara ana waugu watti'a udde, imangitou lapiddu
 nassinaadda. ²²Wualanna apan nanawo su tangnga n ahuranganna
 ḥḥoanna, isassumandingnga su taumata apan uararingikka watti'a udde,
 arawe susinggawangnga su ola'u wiakki mangitou wuḥḥu maapulu
 mabbiakka su aḷaḷuassa. Ana waugu udde watti'a wuassu Mawu Ruata
 nawuḷi wuassu naungngi mangitou na'oma n sara tawe buane. ²³Wuḥḥu
 wualanna apan nanawo su leta'a masuwukka, isassumandingnga su
 taumata apan maddaringikka watti'a udde wuḥḥu maasunna. Imangitou



Nannaŋo pia larangne (13:22)

nabbua manambo, piaddu maŋrasutta, piaddu anummu puŋo wuŋru pia lai wuane paatallu m puŋo anambone.”

Sasumandingngu akke su wallattu gandumma

²⁴Mawu Yesus nabbatti’u lai sambau sasumandingnga su taumata nambo, wisara-Ne, ”Amungkanngu Mawu Ruata mamarenta, tuŋadane naaŋihidda ere sasumandingnga indi: Sangkatou mabbawailla nangasi’u wualanna apan mapia su wawaiŋanne. ²⁵Su ɾabbi sambau, su tempo anambo n taumata mattiille, seettu mabbawailla udde nirumanta nangasi’u wualannu akke su wallattu gandumma udde, see napuŋe. ²⁶Su tempo sinuananna udde tinumuwote wuŋru manga raene nanattakke sus-sabangnga, niasiloante lai manga akke udde. ²⁷See manga taumata n sewa mabbawailla udde nirumanta su mawu n wailla udde wuŋru nabbisara, ’Mawu, talawe Mawu nangasi’u wualanna apan mapia su waillu Mawu? Naola’a ereapa na’oma n sara pia akke isudde?’ ²⁸Mabbawailla udde sinumimbakka, ’Udde inolaannu seetta.’ Ana see manga taumata n sewa udde naiwaŋo apia, ’Mawu maapulu, iami inai mallele akke udde?’ ²⁹’Arie,’ sasimbakku mawu udde, ’Ana waugu amungkanngu akke udde leleanna, gandumma lai maŋele. ³⁰Wala’e akke udde tumuwo su sampunna ma’oma n sara orassu pangangitingnga. Paŋrado ia’u mabbisara su manga taumata apan mangitingnga: Ammuŋa’a rorone manga akke udde, wa’issa see tutungnga. Wua udde ammuŋa’a gandumma, see sahipunna sulaŋummu waŋingkakka.’”

Sasumandingngu watu n sawi

(Mrk. 4:30-32; Luk. 13:18-19)

³¹Mawu Yesus nabbatti'e n lai sambau sasumandingnga su taumata nambo, wisara-Ne, "Napawe Mawu Ruata mamarenta, olangnge ere sasumandingnga indi: Sambau wualannu sawi nianu n sangkatou, see nisuanu su wailli tou. ³²Watu n sawi eteudde wualanna apan addio'anne. Arawe amungkangngu tinumuwote, itou maola'a ahewalanne su wallattu alawo'u sinuananna. Itou maola'a alu, ma'oma n sara manga manu'u winalanganna massalakka su manga rannane."

Sasumandingngu raga

(Luk. 13:20-21)

³³Pia sambau sasumandingnga waine, apan niwatti'u Mawu Yesus su taumata nambo. "Napawe Mawu Ruata mamarenta, olangnge ere raga apan nipaattu sangkatou wawine see niompella ringannu taponna appattu pulo su literrene na'oma n sara nalukakka mapia!"

Anio Mawu Yesus mappaattu sasumandingnga

(Mrk. 4:33-34)

³⁴Sarangkanambone niarra'u Mawu Yesus su taumata nambo sidutu mappaattu sasumandingnga. ³⁵Ringannu aroddi nariaddite apa apan niwalo nabi,

"Ia'u mappaattu sasumandingnga amungkangngu magghatto mangitou;

Ia'u sarun mabbatti'u inolaanna apan uawuni ro'e n arariadi n runia indi."

Mawu Yesus nanala'a n sasumandingngu akke su wallattu gandumma

³⁶Wua udde Mawu Yesus nanantangke n taumata nambo udde. See sinumutta su wale. Mallalarrenggen-Ne nirumanta wurru nabbisara, "Tala'a'o siami sasumandingngu akke su wallattu gandumma udde."

³⁷Mawu Yesus sinumimbakka, "Taumata apan mangngasi'u wualanna apan mapia udde, eteudde Ana'u Taumata. ³⁸Wailla eteudde

runia indi. Wualanna apan mapia, eteudde manga taumata apan nasutta aḷarḷana'u Mawu Ruata. Ahuranganna akke, eteudde manga taumata uasamba'a Setanna. ³⁹Seetta apan nangasi'u akke, eteudde Setanna. Tempo mangitingnga eteudde Allo ng Kiamatta, wuḷḷu manga taumata apan mangitingnga, eteudde manga mala'ekattu Mawu Ruata. ⁴⁰Su ereapa manga akke iammulla wuḷḷu tutungannu putungnga, aroddi lai mariaddi su allo m panginsueanne. ⁴¹Ana'u Taumata sarun mandolokku manga mala'ekan-Ne mangammullu manga taumata su wallattu aḷarḷanang-Nge apan naola'a taumata marosa, wuḷḷu anambo n taumata waine lai apan ma'ola'a aḷaḷeo. ⁴²Imangitou sarangkanambone sarun iramme sulaḷummu sunggilla pia putungnge apan luḷḷenggamma, isudde imangitou sarun lumuai wuḷḷu matatarḷrangnga. ⁴³Wuḷḷu manga taumata apan ma'ola'a apulu Mawu Ruata sarun lumansiangnga ere matannallo sulaḷummu Runia Waku Mawu Ruata, lamangngi mangitou. Nariaddi, amungkangngu pia taḷinga paddaringikka!"

Sasumandingngu darotongnga apan uaaḷi

⁴⁴"Napawe Mawu Ruata mamarenta, olangnge ere sasumandingnga indi: Pia darotongnga uaaḷi su leta'a see niabaannu sangkatou taumata, wuḷḷu niaddo apia su leta'a. Wua udde ana waugu lulluassa, taumata udde inaitte nabbalu'u aḷawo'u darotongnge, see nabelengke wuḷḷu namalli leta'a udde."

Sasumandingngu mutiara apan maḷendappa

⁴⁵"Napawe Mawu Ruata mamarenta olangnge ere sasumandingnga indi: Sangkatou mabbawalu'a madea'a manga mutiara maarega. ⁴⁶Su tempo itou naasomba sambau mutiara apan nangillembo n maḷḷamaga, ringannu maḷihakka itou niumamatta wuḷḷu nabbalu'u aḷawo'u darotongnge, see namalli mutiara sambau udde."

Sasumandingngu soma

⁴⁷"Napawe Mawu Ruata mamarenta olangnge ere sasumandingngu soma apan ipannoma su rano, see naahau aḷawo'u hati ng kinassa. ⁴⁸Napawe soma udde napenete, soma niapidde manga samakka su ammaranne. Wua udde imangitou inuma'ianna wuḷḷu narḷraete manga inassa udde: Inassa apianne niaddo su wensada wuḷḷu inassa araḷeoanne ni-

ramme. ⁴⁹Ete aroddi olangnge su Allo ng Kiamatta, manga mala'ekatta sarun inai maṛṛae manga taumata laḷeo wuassu manga taumata apan tuttuṛṛutta apulu Mawu Ruata. ⁵⁰Wua udde manga taumata laḷeo udde iramme sulalḷummu sunggilla pia putungnge. Isuddewe imangitou sarun lumuai wuṛṛu matatarṛangnga."

Darotongnga wakku wuṛṛu darotongnga tabbe

⁵¹"Apa iamiu naasunna sarangkanambone udde?" aiwaḷo Mawu Yesus.

"Maasunna lamangnga!" sasimbakki mangitou.

⁵²See Mawu Yesus nabbisara, "Ana waugu udde manga huru n agama apan suete naola'a laḷoṛṛo n araratuannu Mawu Ruata, udde ere sangkatou tatahuannu waḷe apan mappasabangngu darotongnge wakku wuṛṛu tabbe, wuassu pangadoanne."

Mawu Yesus tawe tinarimmatta su Nazaret

(Mrk. 6:1-6; Luk. 4:16-30)

⁵³Napawe Mawu Yesus suete nabbatti'u manga sasumandingnga udde, Itou nanantangke n tampa udde, ⁵⁴see nabelengke su wanua-Ne. Poi sindi Itou mangngarra'a su waḷe m pattatarṛamawuanna, wuṛṛu manga taumata apan maddaringikka Sitou isudde, mangke naherangnga. Imangitou nabbisara, "Wuassu apa taumata indi naasomba apande ereudde? Wuṛṛu wuassu apa Itou naasomba tarṛino ma'ola'a alaṛṛindu'a udde? ⁵⁵Waḷinewe Itou ana'u wase ng kalu? Waḷinewe Maria udde inangnge; wuṛṛu manga tuṛṛangnge udde Yakobus, Yusuf, Simon, wuṛṛu Yudas? ⁵⁶Wuṛṛu waḷinewe manga tuṛṛangnge wawine uatana'a lai isindi? Wuassu apa Itou naasomba sarangkanambone udde?" ⁵⁷Ne imangitou nanoḷa'e Mawu Yesus. See Mawu Yesus nabbisara simangitou, "Sangkatou nabi aaddatanna su alaḷwo'u tampa, tumba'u tawe su ampungnge wuṛṛu su waḷene sassane." ⁵⁸Ne ana waugu udde Mawu Yesus tawe na'ola'a alaṛṛindu'a manambo isudde ana waugu imangitou tawe mangngimanna.

Papate n Yohanes Mananarrani

(Mrk. 6:14-29; Luk. 9:7-9)

14 Su tempo udde Herodes, ratu m wanua Galilea, naaringikka su ola'u Mawu Yesus. ²Herodes nabbisara su manga tepellene, "Natantunte indi Yohanes Mananarrani nabbiakke apia wuassu papate! Ana waugu udde itou pia tarriño ma'ola'a alarriñdu'a."

³Ana waugu dorone Herodes nandolokka napasametti Yohanes wurru narrapussa sitou see niapasutta sulañummu tuttupanna. Herodes na'ola'a aroddi ana waugu Herodias awingngi turrangngi tou sidutu, eteudde Filipus. ⁴Ana waugu Yohanes suete nabbisara si Herodes ereindi, "Tawe wotongnge i'o maawingngi Herodias!" ⁵Atonna Herodes maapulu mamate si Yohanes, arawe itou matta'uttu manga taumata, ana waugu imangitou masingkatta Yohanes udde nabi.

⁶Su tempo Herodes na'ola'a ramea n allo pananaunganna itou niasungkangnga Herodias anangnge wawine nassañaingnga su saruannu awadaalla. Sañaingnge maaluassa naungngi Herodes, ⁷na'oma n sara Herodes naddiandi sitou ringannu nassalu, manungku alawo'u apa apan doronganne, sarun ionggola.

⁸Ana waugu niarraannu inangnge, ana'a udde nabbisara, "Ia'u maddorongnga pua n Yohanes Mananarrani onngoña'a sia'u orassa indi su wowo m baki!"

⁹Naaringikka darorongnga udde, Herodes mangke nasusa atonna naungnge. Arawe ana waugu itou suete nassalu su saruannu rahone, itou namarenta tadea'u darorongngu ana'a wawine udde watu'anna. ¹⁰Itou nandolokku taumata inai watukku tuttupanna iapapototta pua n Yohanes. ¹¹Wua udde pua n Yohanes niapidde uarandangnga su baki see nionggole su ana'a wawine udde. See ana'a wawine udde nangapiddu lai inangnge. ¹²Wua udde mallañarreggenni Yohanes nirumanta nangañappa winañunanni Yohanes wurru see nilabingnga. See imangitou napuñete wurru nabbañote olangnge udde su Mawu Yesus.

Mawu Yesus napaannu taumata lima riwu su atoune

(Mrk. 6:30-44; Luk. 9:10-17; Yoh. 6:1-14)

¹³Su tempo Mawu Yesus naaringikka watti'a udde, Itou sinuma'ete saalanna sassane wurru nanantangke n tampa udde, see inaita su sambau tampa apan mañannaba. Arawe su tempo manga taumata naaringikka olangnge udde, imangitou nanantangngu manga soa mangi-

tou inainte nananturutta Mawu Yesus inumamattu ammaranne. ¹⁴Su tempo Mawu Yesus nilumintukka wuassu saalanna wuṛṛu naasilote taumata manambo udde, Itou inumakkanni mangitou. See Itou napaapia n manga taumata maradda'a su wallatti mangitou.

¹⁵Wawallone, manga mallalarṛenggennu Mawu Yesus nirumanta wuṛṛu nabbisara Sitou, "Allo wawallote wuṛṛu tampa indi narṛae marau. Mappianne Iamangnga mandolokku manga taumata indi mapuḷe, tadea'u wotongnge mamalli anna su manga ampungnga."

¹⁶"Tawe wotongnge imangitou iapaapuḷe," unnu Mawu Yesus, "Iamiu sassane papaanni mangitou."

¹⁷"Iami tumba'u pia lima m bau roti wuṛṛu inassa rua m bua!" sasimbakku mallalarṛenggennu Mawu Yesus.

¹⁸"Apira'e udde isindi," unnu Mawu Yesus. ¹⁹Wua udde Itou nandolokku taumata nambo udde niapaa'ianna su leta'a. See Itou nanganute lima m bau roti wuṛṛu inassa rua m bua udde, see Itou naningngarate langitta wuṛṛu naadiangkamanna su Mawu Ruata. Wua udde Itou natahiate roti udde, ringannu lima-Ne wuṛṛu nianggila su mallalarṛenggen-Ne niapatahia su taumata nambo udde. ²⁰Imangitou sarangkanambone inumanna na'oma n sara naḷaidda. Wua udde mallalarṛenggennu Mawu Yesus nangammulle m lambe n anna udde: mapuḷo dua su uḷangnge napene-pene. ²¹Niumanna su tempo udde itatakasere lima ṛiwu su atoune, taambe nireengnga wawine wuṛṛu manga alaṛṛana'a.

Mawu Yesus inumamatta su wowo n ua'e

(Mrk. 6:45-52; Yoh. 6:15-21)

²²Wua udde Mawu Yesus nandolokku manga mallalarṛenggen-Ne sinuma'e saalanna wuṛṛu malliu ṛoro su samba'a n rano, tantaḷanna udde Itou nandolokku taumata nambo udde niapaapuḷe. ²³Napawe taumata nambo udde napuḷete, Mawu Yesus sinuma'a su sambau wuidda sassane ana umaḷiomanna. Allo ṛabbite arawe Mawu Yesus ta'e isudde sassane. ²⁴Tantaḷanna udde saalanna apan sasa'eannu mallalarṛenggennu Mawu Yesus, maraute su tangnga n rano. Saalanna udde mangke ia'untallu lua'a, ana wangu anginna uasomakka mona n saalanna. ²⁵Su wallattu puulla tatallu wuṛṛu puulla annumma ruaallo, Mawu Yesus nirumanta ringanni mangitou u'amatta su wowo n ua'e. ²⁶Su tempo mallalarṛenggen-Ne naasilo Sitou u'amatta su wowo n ua'e, imangitou niṛumoro atonna. "Setanna!" unni mangitou ringannu atata'unne.

²⁷Arawe Mawu Yesus lapiddu sinumimbakka, "Paatammuda! Ia'u indi, arie paata'utta!"

²⁸See Petrus nabbisara, "Amungkangngu atonna I'o Mawu Yesus, wala'a ia'u rumanta umamatta su wowo n ua'e."

²⁹"Rantate," sasimbakku Mawu Yesus. Aroddi Petrus naaring-ikka itou nilumintukka wuassu saalanna, niuamatta su wowo n ua'e wurru inaitte ringannu Mawu Yesus. ³⁰Arawe su tempo Petrus naasilo ma'ikkatta atonna anginna su rano udde, itou nata'utta wurru nanattakke nilumakkuba. "Mawu, ontole!" aintuḷine.

³¹Mawu Yesus lapiddu nanguḷukku limane wurru nanametta sitou, wurru nabbisara, "Petrus, Petrus, pangangimannu lome atonna. Anio i'o susinggawangnga Sia'u?"

³²See itarua sinuma'ete su saalanna udde, wurru anginna noḷote. ³³Ne manga mallarḷrenggennu Mawu Yesus nassubbate Sitou. Imangitou nabbisara, "Atonna Mawu uddewe Ana'u Ruata!"

Mawu Yesus napaapia n taumata maradda'a su Genesaret

(Mrk. 6:53-56)

³⁴Napawe imangitou na'omate su samba'a n rano, imangitou tinumuḷite su Genesaret. ³⁵Wurru napawe manga taumata isudde naasilo manungku nirumanta udde Mawu Yesus, imangitou namasingkattu watti'a udde su ahewallu wageangngu leta'a su soa udde. See anambo n taumata maradda'a niapidda ringannu Mawu Yesus. ³⁶Wurru imangitou sinumaḷande Sitou tadea'u wotongnge mangindingnga jubah-Ne, salaiwe tumba'u pentakke. See sarangkanambone apan nangindingnga udde napiate.

Addatta inanaramannu iupungngu aḷamona

(Mrk. 7:1-13)

15 Sangkawageanganna taumata n Farisi wurru manga pira huru n agama wuassu Yerusalem nirumanta ringannu Mawu Yesus. Imangitou naiwaḷo Sitou, ²"Anio manga mallarḷrenggennu nilumawangnga addatta inanaramannu iupungngu aḷamona ng kite? Su tempo umanna, imangitou tawe mangukkassa lima rorone ere su atoranna!"

³Mawu Yesus sinumimbakka, "Wurru anio iamiu lai lullawangnga parenta Mawu Ruata, tumba'u ana waugu maapulu tutturutta addatta inanaramannu iupungngu aḷamona? ⁴Ana waugu Mawu Ruata nabbisara, 'Pangaddatta iamangngu wurru inangngu,' wurru 'Isai-sai apan mabbisara hagurangnge sarun iruumanna ma'oma n sara mate.' ⁵Arawe

iamiu mangnga'ra'a: amungkangngu taumata mabbisara hagurangnge, 'Apa apan rinone ta'u ionggola su hagurangnga, suete ta'u nionggola su Mawu Ruata,' 'ne taumata udde tate lai iapaaddatta hagurangnge. Aroddi ana waugu addatta inanaramannu iupungngu alamonanu, iamiu mangngaddio'a wisara Mawu Ruata. 'Iamiu taumata lilangkama'e'a! Tawe sa'ane apa apan suete niwalo n Yesaya su ola'i amiu eteudde,

⁸Arendi wisara Mawu Ruata:

Manga taumata udde tumba'u massubba

Sia'u ringannu manga wisara,

arawe naungngi mangitou marau wuassia-U.

⁹Tawe gunane imangitou massubba Sia'u,

ana waugu atorannu taumata, ia'ra'i

mangitou, ere lai atorang-Ku.'"

Inolaanna apan maalaleo taumata

(Mrk. 7:14-23)

¹⁰Wua udde Mawu Yesus namaggo manga taumata wu'ru nabbisarate simangitou, "Paddaringikka tadea'u maasunna! ¹¹Apan sinumutta su morrongnga tawe maarosa taumata udde; tumba'u apan sinumabangnga wuassu morrongnge eteudde maalaleo sitou."

¹²See manga mallar'ringgennu Mawu Yesus nirumanta wu'ru naiwalo Sitou, "Iamangnga masingkatta manungku manga taumata n Farisi nasa'u su tempo naaringikka Iamangnga nabbisara aroddi?"

¹³Mawu Yesus sinumimbakka, "Manga sinuananna apan tawe nisuanu Iamangku su surga sarun abbutanna. ¹⁴Ariete maddaringikka manga taumata n Farisi udde. Imangitou udde mangngehetta taumata wuta; wu'ru amungkangngu taumata wuta mangehetta taumata wuta, itarua sarun manawo sulalummu lorrongnga."

¹⁵Petrus nabbisara, "Tulunga'a talaa'a sasumandingnga udde siami Iamangnga!"

¹⁶Mawu Yesus sinumimbakka simangitou, "iamiu taambe lai naasunna? ¹⁷Iamiu wagga, manungku apan sussutta sulalummu morrongnga masutta lai su tianna wu'ru wua udde masabangnga apia? ¹⁸Arawe apan sinumabangnga wuassu morrongnga, udde wuassu naungnga; wu'ru eteudde apan maalaleo taumata. ¹⁹Ana waugu wuassu naungnga sumabangnga manga ringir'anna laleo, apan maaola'a taumata mammate, sussandaga, ma'ola'a alaleo, manna'o, mammahia, wu'ru ma'umbilangnga. ²⁰Manga inolaanna udde maarosa taumata, waline u'anna ringannu lima tawe ukkasanna."

Pangangimannu sangkatou wawine n Kanaan

(Mrk. 7:24-30)

²¹Wua udde Mawu Yesus nanantangke n tampa udde wurru inaite su wageangngu leta'a marani n soa Tirus wurru Sidon. ²²Sangkatou wawine n Kanaan wuassu wageangngu leta'a udde, nirumanta ringannu Mawu Yesus, lapiddu u'ui, "Ana'i Daud, akkana'a ia'u! Ana'u wawine, niasuttannu gharraho laleo. Raddangge masadatta atonna."

²³Mawu Yesus tawe sinumimbakka wawine udde saran addio'a. See mallarreggennu Mawu Yesus nirumanta ringanni Tou wurru sussa'ande, "Iamangnga rolorra'e wawine udde mangingkatta. Itou tumba'u maggio su liuddi ite!"

²⁴Mawu Yesus sinumimbakka, "Ia'u nirolokka tumba'u su pabbawalagu Israel, nangillembu simangitou apan nialiwune."

²⁵Wawine udde nirumanta see inumalintuda su saruannu Mawu Yesus wurru nabbisara, "Tulunga'a ia'u Mawu."

²⁶Mawu Yesus sinumimbakka, "Tawe wotongge manganu annu manga alarrana'a wurru ilombo su asu."

²⁷"Atonna Mawu," sasimbakku wawine udde, "arawe asu lai u'anna manga taroto n anna wuassu medda mawune."

²⁸See Mawu Yesus nabbisara sitou, "Inangnga, matohassa atonna pangangimannu! Ariadite apa apan ipaapulunu!" Orassa udde lai ana'a wawine udde napia.

Mawu Yesus napaapia n manambo taumata maradda'a

²⁹Mawu Yesus nanantangke n tampa udde, see sinumallete su apannu Rano n Galilea. Wua udde Itou sinumaate su sambau wuidda see inuma'iante isudde. ³⁰Manambo taumata nirumanta ringanni Tou uaapiddu taumata perro, wuta, lome, mou, wurru manambo lai taumata maradda'a waine. Imangitou nangado n rumaradda'a udde su saruannu Mawu Yesus, ne Itou napaapiate manga rumaradda'a udde. ³¹Taumata nambo isudde, naherangnga atonna, su tempo imangitou naasilo taumata mou naawisara, taumata perro napia, taumata lome niuamatta, wurru taumata wuta naasilo. See imangitou nadalote Mawu Ruata n pabbawalagu Israel.

Mawu Yesus napaannu appattu riwu su atoune

(Mrk. 8:1-10)

³²Wua udde Mawu Yesus namaggo manga mallarṛenggen-Ne see nabbisara, "Ia'u u'akkannu taumata nambo indi. Tallute allo aḷannune imangitou su sampunna ringang-Ku, wuṛṛu orassa indi imangitou inasue-ante n anna. Ia'u tawe mapaapuḷe mangitou maḷunussa, aṛṛombanganne imangitou mawantingnga su laḷanna."

³³See manga mallarṛenggennu Mawu Yesus naiwaḷo Sitou, "Suapa iite wotongge maasomba anna su wadda'a araune indi iapaanna su taumata anambone indi?"

³⁴"Sangkura roti siamiu?" Mawu Yesus naiwaḷo simangitou.

"Pitu," sasimbakki mangitou, "wuṛṛu manga pira inassa maradio'a."

³⁵Ne Mawu Yesus nandolokku taumata nambo udde inuma'ianna su leta'a. ³⁶See Itou nanganute roti pitu m bau wuṛṛu inassa, wua udde naadiangkamanna su Mawu Ruata. Wua udde Itou nattahiate roti wuṛṛu inassa udde ringannu lima-Ne sassane, see nionggola su mallarṛenggen-Ne. Wuṛṛu imangitou nattahiate su taumata manambo udde. ³⁷Anambo n taumata udde inumanna na'oma n sara naḷaidda wua udde mallarṛenggen-Ne nangammullu lambe n anna udde. Sarangka-nambone pitu ng kuḷa'a napene-pene. ³⁸Reengannu taumata esakka sassane apan inumanna su tempo udde appattu riwu su atoune, taambe na-reengnga wawine wuṛṛu manga aḷarṛana'a.

³⁹Wua udde Mawu Yesus nandolokke manga taumata udde niapa-puḷe. Itou sassane sinuma'e sangngassa saalanna wuṛṛu inaite watukku wageangngu leta'u Magadan.

Manga taumata n Farisi maddorongnga Mawu Yesus ma'ola'a aḷarṛindu'a

(Mrk. 8:11-13; Luk. 12:54-56)

16 Pia manga pira taumata n Farisi wuṛṛu Saduki nirumanta ringannu Mawu Yesus, pandumanne mapaasaḷa n Tou. Imangitou maddorongnga Sitou ma'ola'a aḷarṛindu'a ipattiala manungku atonna Itou nirumanta wuassu Mawu Ruata. ²Mawu Yesus sinumimbakka, ["Amungkangngu matannallo mattatuppa, iamiu mabbisara, 'Hati m banua mapia, ana waugu langitta maṛṛamutta.' ³Wuṛṛu su ruaallo, iamiu mabbisara, 'Allo indi manguranna, ana waugu langitta maṛṛamutta wuṛṛu marandumma.' Ei, iamiu wotongge maṛṛangngo n hati m banua

ringannu ma'ellega ola'u langitta, arawe manga tanda n tempo tawe iaranggo ng kamiu!"] 4 "Tumanite n daleo manga taumata tempo indi. Iamiu maddorongnga Ia'u ma'ola'a alarindu'a. Iamiu tawe ongoanna saran sambau alarindu'a, tumba'u alarindu'i Nabi Yunus."

Napawe suete nabbisara aroddi, Mawu Yesus nanantangke mangitou, see napulete.

Ragi manga taumata n Farisi wurru Saduki

(Mrk. 8:14-21)

⁵Su tempo manga mallarenggenne Mawu Yesus na'omate su samba'a n rano, imangitou wakkute naasingkatta manungku imangitou naabuli mangapiddu roti. ⁶Mawu Yesus nabbisara simangitou, "Paariaga su ragi n taumata n Farisi wurru Saduki."

⁷Naaringikka wisara Mawu Yesus aroddi, mallarengen-Ne uahattote sangkatou ringannu sangkatou, "Itou nabbisara aroddi ana waugu iite tawe nangapiddu roti."

⁸Mawu Yesus naasingkatta apa ipagahato mangitou udde. Nariaddi Itou nabbisara, "Anio iamiu uatatiakka su ola'u tawe roti? Pangangimanni amiu lome! ⁹Taambe lai naasunna iamiu? Apa iamiu tate naa-naungnga su ola'u lima m bau roti apan ta'u tinahia su lima riwu su atoune? Pira ng kula'a lambene roti apan niammulli amiu? ¹⁰Wurru ereapa lai ringannu pitu m bau roti apan tinahia su appattu riwu su atoune udde? Pira ng kula'a roti lambene niammulli amiu? ¹¹Anio na'oma n sara iamiu tawe maasunna manungku ia'u waline uahatto ng kamiu su ola'u roti? Paariagai su ola'u ragi n taumata n Farisi wurru Saduki!"

¹²Panginsueanne mallarenggenne Mawu Yesus naasunnate manungku Mawu Yesus mammarenta simangitou paariaga walineuwe wuassu ragi apan ipappaatta ipa'ola'a roti, arawe su saruannu manga alarra'u taumata n Farisi wurru Saduki.

Panganga'u m Petrus su ola'u Mawu Yesus

(Mrk. 8:27-30; Luk. 9:18-21)

¹³Mawu Yesus inaitte su wageangngu leta'a marani n soa Kaisarea Filipi. Isudde Itou naiwallo mallarengen-Ne, "Unnu wisara n taumata, isai Ana'u Taumata udde?"

¹⁴Manga mallalārrenggen-Ne sinumimbakka, "Piaddu mabbisara Yohanes Mananarrani. Piaddu lai mab-bisara Elia. Waine lai mabbisara Yeremia ara'e su wallattu sangkatou nabi."

¹⁵"Arawe tumuruttu ringiranni amiu sassane, isai Ia'u indi?"

¹⁶Simon Petrus sinumimbakka, "Ete Iamangnga Ratu m Punnu Salamatta, Ana'u Mawu Ruata apan wiakka."

¹⁷"Auntunganna si'o Simon ana'i Yona!" unnu Mawu Yesus, "Ana waugu walineuwe taumata apan namasingkattu olangnge udde si'o, arawe Iamangku su surga. ¹⁸Ana waugu udde rinone iamiu masingkatta, i'o udde Petrus, watu apan matohassa. Wurru su wowo n watu indi ia'u sarun mapararisikku Gharreda-U apan tawe iahohakku taumata; salaiwe ete uasaruanna papate! ¹⁹Ia'u sarun mangonggolla siamiu a'unsi n Runia Waku Mawu Ruata. Apa apan isassingada su wowo n runia, udde lai isassingada su surga. Wurru apa apan iapaarrinonu su wowo n runia, udde lai mangke narriino su surga."

²⁰Wua udde Mawu Yesus napaanaungnga su mallalārrenggen-Ne tadea'u imangitou tawe mamasingkatta sisai-sai manungku ete Itou udde Ratu m Punnu Salamatta.

Mawu Yesus namasingkattu asansarane wurru papate-Ne

(Mrk. 8:31-9:1; Luk. 9:22-27)

²¹Nanattakka wuassu orassa udde, Mawu Yesus nabbisara ringannu uahahati su mallalārrenggen-Ne, manungku Itou sarun inai su Yerusalem wurru mamendamma anambo n asasusa wuassu manga piarrangnge, manga imam tembonanne, wurru manga huru n agama. Itou sarun pateanna, arawe su allo atallune Itou sarun mabangunna apia.

²²See Petrus nangahete Mawu Yesus watukku sandiranne wurru namo'a Sitou, wisarane, "Antimanna Mawu Ruata mapaarau n olangnge udde, Mawu! Ariewe olangnge udde mariaddi su Mawu!"

²³Mawu Yesus nanaile see nabbisara si Petrus, "Roote passaliu wua isindi, Mamamono'a! I'o manalare Sia'u. Ringiddu udde ringirannu taumata; waline ringirannu Mawu Ruata!"

²⁴Wua udde Mawu Yesus nabbisara su mallalārrenggen-Ne, "Tau-mata apan mallalārrenggenna Sia'u, rinone tawe mannaungnga manarane, mamasanna arussane, wurru sidutu uatantalongnga Sia'u. ²⁵Ana waugu taumata apan maapulu mandalukka wiakke, sarun awuliannu wiakke. Arawe taumata apan mamala m biakke ana waugu Ia'u sarun maasomba wiakka. ²⁶Apa auntunganne su sangkatou taumata, amung-

kangngu ahewallu runia indi maola'a darotongnge arawe itou awulianu wiakke? Wotongnge wiakka udde salianu sambau darotongnga?

²⁷Tate malannu lai Ana'u Taumata, su sampunna ringannu manga mala'ekanne, sarun rumanta ringannu tarino n lamangnge. Su tempo udde Itou sarun mabalissa manga taumata tumurruttu inolaannu sangkatou-sangkatou. ²⁸Asingkatawe! Wuassu wallatti amiu isindi piaddu tawe mate, tantanna taambe naasilo Ana'u Taumata rumanta marenta ere sangkatou Ratu."

Mawu Yesus niwantuhanna

(Mrk. 9:2-13; Luk. 9:28-36)

17 Napawe annummu allo nalute Mawu Yesus nangapiddi Petrus, Yakobus wurru turangnge Yohanes, nanginsassa su sambau wuidda apan matanggakka. ²Su saruanni mangitou, Mawu Yesus nawa lu sarrene: Hati-Ne nabali masemakka ere matannallo wurru laung-Nge mawira lullendapa. ³Wua udde sire tallu mallarreggen-Ne udde naasilo si Musa wurru Elia uahahatto Mawu Yesus. ⁴See Petrus nabbisara su Mawu Yesus, "Mawu, mapia atonna iite isindi. Amungkangngu Mawu maapulu, ia'u sarun mapararisikku rasanna tatallu isindi: sambau su Mawu, sambau si Musa, wurru sambau lai si Elia!"

⁵Tantanna Petrus ta'e mabbisara, winabbawa apan masemakka atonna nangooppa simangitou wurru wuassu winabbawa udde niaringiranna tingikka apan nabbisara, "Ete indi Ana'a arangnungku, Itou maaluaassa naung-Ku. Daringirre Itou!"

⁶Su tempo manga mallarreggennu Mawu Yesus naaringikka tingikka udde, imangitou nata'utta atonna, na'oma n sara hati mangitou naduma'a su leta'a. ⁷Arawe Mawu Yesus nirumanta wurru nangerretta simangitou. "Pabbangunte," wisara-Ne, "arie mata'utta!" ⁸Napawe imangitou nanutudda, imangitou tawe naasilo sisai-sai tumba'u Mawu Yesus sassane.

⁹Su tempo imangitou sinumossokke wuassu wuidda udde, Mawu Yesus napaanaungnga simangitou, "Arie pabbatti'a sisai-sai, apa apan suete niasiloanni amiu tanginna, tantanna Ana'u Taumata taambe niapawangunna wuassu papate."

¹⁰Manga mallarreggennu Mawu Yesus naiwalo Sitou, "Anio manga huru n agama mabbisara manungku Elia rinone rumanta dorone?"

¹¹Mawu Yesus sinumimbakka, "Atonna Elia rumanta wurru itou sarun manuungngu sarangkanambone. ¹²Arawe Ia'u mabbisara siami, Elia suete nirumanta, arawe manga taumata tawe maailala sitou;

imangitou ma'ola'a sitou ere su apulu mangitou sassane. Wuṛṛu aroddi lai imangitou sarun ma'ola'a Ana'u Taumata."

¹³See manga mallalārṛenggen-Ne naasunnate manungku Mawu Yesus uahahatto su ola'i Yohanes Mananarṛani.

Mawu Yesus napaapia n ana'a niasuttannu gharṛaho laḷeo

(Mrk. 9:14-29; Luk. 9:37-43a)

¹⁴Su tempo Mawu Yesus wuṛṛu sire tallu mallalārṛenggen-Ne nabe-lengke ringannu taumata nambo udde, sangkatou esakka nirumanta, nassubba su saruannu Mawu Yesus, ¹⁵wuṛṛu nabbisara, "Iamangnga, akkana'a ana'u. Raddangnge pua. Raddangnge pua udde tarṛa assa masadatta atonna ma'oma n sara itou tarṛa assa mabbantingnga su putungnga wuṛṛu tarṛa assa sulaḷummu ua'e. ¹⁶Ia'u suete nangapiddi tou ringannu mallalārṛenggeni Iamangnga, arawe imangitou tawe maapia sitou."

¹⁷Mawu Yesus sinumimbakka, "Waḷine hampa iamiu indi! Iamiu atonna tonna taumata apan wengkolla wuṛṛu tawe mangngimanna. Ma'oma n sara tingngera Ia'u rinone uatana'a ringanni amiu wuṛṛu manabare su aḷaḷeo ng kamiu? Apira'e ana'a udde inawarea!" ¹⁸See Mawu Yesus namarentate gharṛaho laḷeo udde sumabangnga wuassu laḷummu ana'a udde. Wuṛṛu gharṛaho laḷeo udde sinumabangnga, see ana'a udde napia su orassa udde lai.

¹⁹Wua udde manga mallalārṛenggennu Mawu Yesus nirumanta ringanni Tou sassane wuṛṛu naiwaḷo Sitou, "Iamangnga, ana waugu apa iamii tawe maalimbuakka gharṛaho laḷeo udde?"

²⁰Mawu Yesus sinumimbakka, "Ana waugu pangangimanni amiu lome. Naunge! Amungkannggu iamii pia pangangimanna ere ahewallu watu n sawi, iamii wotongnge mabbisara wuidda indi, 'Pangingkatta poiarroddi!' Ne atonna tonna wawone udde sarun ma'ingkatta. Tawe saran sambau manara apan tawe ia'ola'i amiu! [²¹Arawe gharṛaho laḷeo ereindi, tumba'u wotongnge limbuarṛannu aalimanna wuṛṛu mappuasa.]"

Mawu Yesus namasingkattu papate-Ne apia

(Mrk. 9:30-32; Luk. 9:43b-45)

²²Napawe manga mallalārṛenggennu Mawu Yesus naammulle su Galilea, Mawu Yesus nabbisara simangitou, "Tate maḷannu lai Ana'u



Soa su wiwikku Rano n Galilea (17:22)

Taumata sarun itantilla su apulu n taumata. ²³Itou sarun pateanna, arawe su allo atallune Itou sarun iapawangunna.”

Ne manga mallalarrנגgen-Ne mangke nasusa atonna.

Pamamaekka wose m WaꞤ Mawu

²⁴Su tempo Mawu Yesus wurru mallalarrငgen-Ne na'omate su Kapernaum, manga maddarorongnga wose m WaꞤ Mawu nirumanta ringanni Petrus wurru naiwaꞤo, "Hurunu mammaekka wose WaꞤ Mawu ara'e tawe?"

²⁵Petrus sinumimbakka, "Mammaekka!"

Napawe Petrus napuꞤete, Mawu Yesus namo'a rorone, "Simon, ereapa su ringirꞤannu? Isai rinone mamaekka wose su mararatu n runia indi? Tumanangnge ara'e taumata raho?"

²⁶"Taumata raho," sasimbakki Petrus.

"Amungkangngu aroddi," unnu Mawu Yesus, "tumanangnge ariete pamaekka. ²⁷Arawe arie iite mapaasusa naungngu manga taumata udde. Nariaddi, roote su rano pamarrꞤngnga. Apira'a inassa paarorone niawarrꞤngannu. SulalꞤummu morꞤngngu inassa udde, i'o sarun maa-somba roitta apan wotongnge ipamaekka wose ng kadua. Anute roitta udde wurru waerꞤrete simangitou wose ng kite huna n WaꞤ Mawu."

Isai ahewalanne?

(Mrk. 9:33-37; Luk. 9:46-48)

18 Su tempo udde mallalarrengennu Mawu Yesus nirumanta ringanni Tou wurru naiwalo, "Isai apan irarangngo ahewalanne su wallattu alarrana'u Mawu Ruata?"

²Mawu Yesus namaggo sangkatou ana'a addio'a, wurru niapararisikka su saruanni mangitou. ³See Mawu Yesus nabbisara, "Pangimante! Tumba'u amungkangngu iamiu mawalu wurru maola'a ere alarrana'a, iamiu sarun maola'a lalorro n araratuannu Mawu Ruata. ⁴Taumata apan mappaawawo n ririne wurru maola'a ere ana'a addio'a indi, ete itou ahewalanne su wallattu lalorro n araratuannu Mawu Ruata. ⁵Wurru taumata apan manarimattu ana'a ereindi ana waugu Ia'u, udde ere lai nanarimmatta Sia'u."

Manga inolaanna apan maarosa taumata

(Mrk. 9:42-48; Luk. 17:1-2)

⁶"Isai napa'ola'a sangkatou taumata wuassu manga taumata apan maraddio'a indi madirite mangngimanna lai Sia'u, mappianne amungkangngu watu gahilinganna iwa'issa su ullekane see itou iwontolla su tahaloangnga malalumma. ⁷Silakawe eteapa runia indi ana waugu manga pallalagu apan maarosa taumata. Atonna manga inolaanna ereudde rinone pia, arawe nasilakate taumata apan pallalagune maarosa taumata waine!

⁸Amungkangngu limanu ara'e leddanu maarosa si'o, pototta wurru rammea'a. Mappianne i'o mabiakka ringannu Mawu Ruata tawe lima samba'a ara'e ledda samba'a wuassu i'o iramme sulalummu putungngu naraka ringannu limanu wurru leddanu rua m ba'a. ⁹Wurru amungkangngu matanu maarosa si'o, loetta wurru rammea'a. Mappianne i'o mabiakka ringannu Mawu Ruata tawe mata samba'a, wuassu i'o iramme sulalummu putungngu naraka ringannu matanu rua m ba'a."

Sasumandingngu domba apan nawuli

(Luk. 15:3-7)

¹⁰"Paatehamma! Arie pangaddio'a sangkatou wuassu wallattu taumata maraddio'a indi. Ana waugu naunge, manga mala'ekatti mangitou sidutu su saruannu lamangku su surga.

[¹¹Ana waugu Ana'u Taumata nirumanta manałamatta taumata apan nialiwune!]

¹²Ereapa su ringirannu? Unnu wisara pia sangkatou uatahuanna marasutta domba, see sambau su wallattu manga domba udde nawuḷi, apa sarun olaannu taumata udde? Itou sarun manantangngu domba sio m puḷo sio udde su wuidda wuḷu inai maddea'a domba sambau apan nawuḷi udde. ¹³Wuḷu amungkangngu itou naasombate apia domba udde – pangimanna Sia'u – itou sarun lembo n lulluassa ana waugu domba sambau wuassu sio m puḷo sio waine apan tawe nawuḷi. ¹⁴Aroddi lai lamangngu apan su surga, madiri saran sangkatou su wallattu manga taumata wakku mangngimanna Sia'u indi umaḷiwu."

Amungkangngu turrangngu marosa

¹⁵"Amungkangngu turrangngu ma'ola'a rosa su saruannu, roote ringanni tou wuḷu tantiroa'e passasane. Ola'e udde ringannu maḷannaba su wallatti raddua sassane. Amungkangngu itou tinumuḷrutta aḷawo'u wisaranu, i'o naauntungnga naasomba apia turrangngu udde mabelengnga. ¹⁶Arawe amungkangngu tawe, apira'e sangkatou ara'e rua ng katou lai. Ana waugu sulalummu Wuke Susi uaworretta, 'Mattingkatuḷungnga darua ara'e sire tallu sakassi pandumanne mapaliatta'u sangkatou niarriaannu pasasala.'

¹⁷Amungkangngu itou tawe naddaringikka tatantiro manga taumata udde, waḷoa'a hatto udde su tangnga n Jamaatta. Wuḷu panginsueanne, amungkangngu itou madiri maddaringikka tatantiro n Jamaatta, ellehete itou ere sangkatou maddarorongnga wose wuḷu ere sangkatou apan tawe maailala Mawu Ruata."

Apan isassingada wuḷu iapa'ola'a

¹⁸"Asingkatawe: Apa apan isassingadi amiu su runia, udde lai isassingada su surga. Wuḷu apa apan iapa'ola'i amiu su runia, iapa'ola'a lai su surga.

¹⁹Wuḷu asingkatawe lai: Amungkangngu su wallatti amiu su runia indi pia rua ng katou ua'ire aḷawo'u inolaanna, wuḷu iaaliomanna, aaliomanna udde sarun sengkamannu lamangku su surga. ²⁰Ana waugu suapa pia darua ara'e sire tallu uaammulla ana waugu Ia'u, Ia'u isudde su pattangnganni mangitou."

Sasumandingngu allangnga apan madiri mangampungna taumata

²¹Wua udde Petrus nirumanta ringannu Mawu Yesus wuꝛꝛu naiwaꝓo, "Mawu, amungkangngu tuꝛꝛangku ma'ola'a rosa su saruangu, ma'oma n sara paapira ia'u mangampungna sitou? Ma'oma n sara paapitu?"

²²Mawu Yesus sinumimbakka, "Tawe, waꝓine paapitu, arawe paapitu m puꝓo wuassu paapitu! ²³Ana waugu napawe Mawu Ruata mama-renta, olangnge ere sulaꝓummu sasumandingnga indi: Sangkatou ratu maapulu mapawaekku aꝓawo'u utangngu manga allangnge. ²⁴Su tempo itou nanattakke mamarikissa, niapaasaruanna sitou sangkatou allangnga apan pia utangnge ringannu jutane, ²⁵wuꝛꝛu tate maawaekka. Nariaddi, ratu namarentate tadea'u allangnga udde iwaꝓu'a su sampunna ringannu aꝓaꝛꝛanangnge wuꝛꝛu awingnge, wuꝛꝛu aꝓawo'u manga rarotongnge ipamaekka utangnge. ²⁶Allangnga udde inumaꝓituda su saruannu ratu, wuꝛꝛu sinumaꝓande, 'Mawu, ampunge allangngu. Allangngu sarun ma-maekka anambo n utangnga udde.' ²⁷Ratu udde inumakkanni tou, see itou namapasse aꝓawo'u utangngu allangnga udde.

²⁸Su tempo allangnga udde sinumabangnga, nassombate n hawene; sangkatou allangnga lai apan pia utangnge sitou manga pira riwu. Itou nanamette hawene udde, nangattongnga, wuꝛꝛu nabbisara, 'Waerꝛe aꝓawo'u utangngu!' ²⁹See hawene udde inumaꝓintuda su saruanni tou see sinumaꝓande, 'Paasabare asuene hawe, sarangkanambone sarun ta'u waeꝛꝛanna!' ³⁰Arawe allangnga udde madiri. Ewe'e itou lai napasutta n tou sulaꝓummu tuttupanna ma'oma n sara itou maawaekka utangnge udde. ³¹Su tempo manga allangnge waine naasilo apa apan suete nariaddi, imangitou nasusa wuꝛꝛu nangalae n olangnge udde su ratu. ³²Ne ratu udde namaggote allangnga apan laꝓeo udde wuꝛꝛu nabbisara sitou, 'Allangnga laꝓeo! Aꝓawo'u utangngu tate ta'u niapawaekka ana waugu i'o sinumaꝓande Sia'u. ³³Waꝓinewe i'o lai umakkannu hawenu ere lai ia'u suete inumakkannu?' ³⁴Ratu udde mangke nasa'u. Allangnga apan laꝓeo udde nitaꝛꝛo n tou sulaꝓummu tuttupanna na'oma n sara itou maawaekka aꝓawo'u utangnge."

³⁵Mawu Yesus nanginsue watingnge ringannu wisara indi, "Aroddi lai Iamangku su surga sarun ma'ola'a siamiu sangkatou-sangkatou ere udde, amungkangngu iamiu tawe mangampungna tuꝛꝛangngu ringannu naungnga waresi."

Ałarğa'u Mawu Yesus su ola'u pasasasindo

(Mrk. 10:1-12)

19 Napawe Mawu Yesus suete nabbatti'u sarangkanambone udde, Itou nanantangke n Galilea see inaite su wageangngu leta'u Yudea su samba'a n Sałukku Yordan. ²Manambo taumata uatantalongnga Sitou, wuřru Itou napaapia mangitou isudde.

³See manga taumata n Farisi nirumanta madea'a sała-Ne Imangitou naiwało, "Tumuřruttu tita n agama ng kite. wotongnge taumata masasindo n awingnge ringannu tawe pinangiananne."

⁴Mawu Yesus sinumimbakka, "Apa iamiu taambe nabbasa su-lalummu Wuke Susi manungku Mandariadi apan suete na'ola'a taumata, ro'e n paarorone na'ola'a simangitou esakka wuřru wawine? ⁵Wuřru wua udde Itou nabbisara, 'Ana waugu udde, esakka manantangke n hagarangnge wuřru naaukke ringannu awingnge, itarua naola'e wadangnga sambau.' ⁶Nariaddi itarua tate lai rua ng katou, arawe naola'e sambau. Ana waugu udde apa apan suete ni'aukku Mawu Ruata tate wotongnge iapasasindo n taumata."

⁷See manga taumata n Farisi naiwało Sitou, "Amungkangngu aroddi, anio Musa nandolokku taumata mangngagillu surattu pasasasindo su awingnge apan nisindoanne?"

⁸Mawu Yesus sinumimbakka, "Musa namala ng kamiu manindo awingngu ana waugu iamiu tumanite masahada pangarřanne. Arawe rinone wałine aroddi su paarorone. ⁹Nariaddi, daringirře indi: Isai manindo awingnge - wutte'e wawine udde tawe nassała su esakka waine - wua udde maawingnga apia ringannu wawine waine, taumata udde sinumandaga."

¹⁰Ne manga mallarřenggennu Mawu Yesus naiwało Sitou, "Amungkangngu hatto m paa'aukku sangkawinganna ereudde, mappianne arie paawingnga."

¹¹Mawu Yesus sinumimbakka, "Tawe anambo n taumata wotongnge maasengkamma manga wisara udde, tumba'u manga taumata apan suete tinantunnu Mawu Ruata. ¹²Ana waugu pia taumata apan tawe maawingnga, ana waugu imangitou niasungkangnga aroddi. Wuřru pia lai namile sassane tawe maawingnga, tadea'u wotongnge mangimbe Mawu Ruata. Taumata apan wotongnge manengkamma ałarğa'a indi, wala'e itou maddaringikka."

Mawu Yesus nanga lamatta manga alarṛana'a

(Mrk. 10:13-16; Luk. 18:15-17)

¹³Pia manga taumata nangapiddu manga alarṛana'a ringannu Mawu Yesus tadea'u Itou mangaddo n limane su pua n mangitou udde wurru mangalimanni mangitou. Arawe mallarṛenggennu Mawu Yesus nasa'u su manga taumata udde. ¹⁴Ne Mawu Yesus nabbisarate su mallarṛenggen-Ne, "Wala'e manga alarṛana'a udde rumanta ringang-Ku! Arie maningaddi mangitou, ana waugu manga taumata ere imangitou indi apan maola'a laṛoṛo n araratuannu Mawu Ruata."

¹⁵See Mawu Yesus nangadote n lima n Tou su pua n manga alarṛana'a udde wurru nanga lamatte simangitou, wua udde Itou nangingkatte wua isudde.

Taumata umbasanna apan ala

(Mrk. 10:17-31; Luk. 18:18-30)

¹⁶Su sambau allo sangkatou esakka nirumanta ringannu Mawu Yesus, "Iamangnga Huru," unni tou, "pallaṛagu mapia ereapa sarun ta'u olaanna tadea'u maatarimmattu wiakka tutune wurru ma'oma n sara maṛannu-ṛannu?"

¹⁷Mawu Yesus sinumimbakka, "Anio i'o naiwaṛo Sia'u su ola'u apa apan mapia? Tumba'u pia sambau apan mapia. Amungkanngu i'o maapulu mabiakka, i'o sarun tuturuṛutta alawo'u parenta Mawu Ruata."

¹⁸"Parenta suapane udde?" aiwaṛo n taumata udde.

Mawu Yesus sinumimbakka, "Arie pamate, arie passandaga, arie panna'o, arie pangawusu, ¹⁹pangaddatta iamangngu wurru inangngu; wurru pandangngu taumata sansuṛungngu ere i'o mandangngu wadangngu sassane."

²⁰"Anambo n parenta udde suete tinuruṛutangku," sasimbakku taumata umbasanna udde. "Apa lai sarun olaangku?"

²¹Mawu Yesus nabbisara sitou, "Amungkanngu i'o maapulu maola'a taumata nasuungnga, roote waṛua'e manga darotongngu. Onggoṛa'e roinne su taumata asiangnga, wurru i'o sarun maasomba darotongnga su surga. Wua udde rantate tantalongke Sia'u!"

²²Naaringikka manga wisara udde, taumata umbasanna udde napuṛete ringannu naungnga massusa ana waugu itou taumata tumanite-nala.

²³See Mawu Yesus nabbisara su manga mallarṛenggen-Ne, "Ia'u mabbisara siamiu, masahada atonna taumata ala maola'a laṛoṛo

n araratuannu Mawu Ruata. ²⁴Wurru indi lai Ta'u iwalo siamiu; malluassanne sambau onta sumutta su lorrangngu rararumma, wuassu sangkatou ala sumutta su Runia Waku Mawu Ruata."

²⁵Napawe manga mallalarrenggen-Ne naaringikka wisara Mawu Yesus udde, imangitou naherangnga. "Amungkanngu aroddi," unni mangitou, "isai wotongnge maasomba asalamatta?"

²⁶Mawu Yesus nanutudda simangitou see nabbisara, "Su taumata, olangnge udde tawe mariaddi! Arawe su Mawu Ruata sarangkanam-bone wotongnge mariaddi."

²⁷See Petrus nabbisara, "Pa'ellega, iami suete nanantangngu alawo'u darotongngi ami tadea'u manantalongnga Iamangnga. Wurru apa sarun asombanganni ami?"

²⁸Mawu Yesus nabbisara simangitou, "Pangimante: Su Runia apan Waku, Ana'u Taumata sarun uma'ianna su addera n araratuanna apan mawantuga. Su tempo udde iamiu mallalarrenggeng-Ku sarun uma'ianna su mapulo dua addera n araratuanna wurru makkuungnga mapulo dua pabbawalagu Israel. ²⁹Wurru manga taumata apan suete nanantangngu walene, ara'e turrangnge esakka ara'e wawine, ara'e inangnga iamangnga, ara'e manga alararangnge ara'e wawailanne ana wagu Ia'u, taumata udde sarun manengkamma apia paarrasutta su wageangnge. Wurru itou sarun manengkamma lai wiakka tutune ma'oma n sara malannu-lannu. ³⁰Arawe manambo taumata orassa indi apan paarorone sarun maola'a salimmurine, wurru su orassa indi salimmurine sarun maola'a paarorone."

Sasumandingngu mamamanara su wailu anggore

20 "Napawe Mawu Ruata mamarenta, olangnge ere sasumandingnga indi: Sangkatou tatahuannu wailu anggore sinumabangnga su tempo ruaallo madea'a taumata iapamanara su wailu anggorene. ²Napawe na'irete itou mamaekka simangitou allo massallo sambau roitta sala'a, itou nandolokke mangitou mammanara su wailu anggorene. ³Puulla sio ruaallo, tatahuannu waila udde sinumabangnga apia wurru naasilo manga pira ng katou taumata uarisikka su pasakka tawe manarane. ⁴Ne nabbisarate itou simangitou, 'Roote iamiu pammanara su wailu anggore'u. Ia'u sarun mamaekka siamiu ringannu lalantakke su rinone.' ⁵Ne imangitou inaita. Puulla mapulo dua allatune wurru lai puulla tatallu wawallo, itou sinumabangnga apia wurru na'ola'a inolaanna ereudde lai. ⁶Wurru irarangngo puulla lima wawallo, itou sinumabangnga lai wurru naasilo ta'e pia lai taumata tawe manarane. See itou naiwalu simangitou, 'Anio iamiu uarisikka allo massallo indi isindi

ringannu tawe mammanara?’ ⁷Manga taumata udde sinumimbakka, ‘Tawe taumata mapamanara ng kami.’ ‘Amungkangngu aroddi, unnu tatahuannu wailla udde, roote iamiu pammanara su waillu anggore’u.’

⁸Wawallone, tatahuannu waillu anggore udde, nabbisara su mandorene, ‘Wagoite mamamanara udde wuṛṛu waerrete laṭantakki mangitou sangkatou sangkatou, manattakka wuassu sinumutta panginsueanne ma’oma n sara sinumutta paarorone.’ ⁹See nirumantate mamamanara apan nanattakka nammanara wuassu puulla lima wawallo. Imangitou sangkatou-sangkatou nanarimmattu roitta saḷa’a sangkatou sambau. ¹⁰Wua udde nirumantate lai mamamanara niapamanara ro’e n ruaallo. Imangitou maṛṛingidda, imangitou sarun manengkamma anamboanne. Arawe imangitou tumba’u inonggolannu lai sambau roitta saḷa’a. ¹¹Su tempo nanengkamma roitta udde, imangitou sussungkuta su tatahuannu wailla udde: ¹²‘Mamamanara apan nirumanta panginsueanne udde tumba’u nammanara sangka orassa. Arawe iamii nammanara allo massallo uawati su paddissu matannallo, arawe mawu namaekka simangitou ere lai siami!’ ¹³Tatahuannu waillu anggore udde sinumimbakka su sangkatou wuassu wallatti mangitou, ‘Hawe, ia’u tawe saḷa’u siamiu. Waḷinewe i’o na’ire manengkamma laṭantakke roitta saḷa’a sambau su ipammanaranu allo massallo? ¹⁴Ne anute roinnu wuṛṛu apulete. Ia’u atonna maapulu mangagilla su taumata apan nammanara panginsueanne udde ringannu laṭantakke apan nassuḷungnga ringannu ta’u nionggola siamiu. ¹⁵Anio ia’u tawe wotongnge ma’ola’a apulu’u su raro tongku? Ara’e i’o mannaungnga laḷeo ana waugu ia’u mandangngu?’”

¹⁶See Mawu Yesus nabbisara apia, “Aroddi lai su manga taumata apan saḷimmurine sarun maola’a paarorone, wuṛṛu manga taumata apan paarorone sarun maola’a saḷimmurine.”

Mawu Yesus nabbisara atallune su ola’u papate-Ne

(Mrk. 10:32-34; Luk. 18:31-34)

¹⁷Su tempo Mawu Yesus mattudda n Yerusalem, su pattangngannu laḷanna Itou namaggo mapuḷo dua mallalaṛṛenggen-Ne maammulla suaddio’a sassane. See Itou nabbisarate simangitou, ¹⁸“Paddaringikka! Iite orassa indi mattudda n Yerusalem. Poiaroddi Ana’u Taumata sarun itantilla su manga imam tembonanne wuṛṛu su manga huru n agama. See Itou sarun iṛṛuumanna ma’oma n sara mate, ¹⁹wua udde itantilla su manga taumata waḷine Yahudi. Imangitou sarun mangaḷuandaga Sitou, mannansara Sitou, wuṛṛu mangarussa n Tou. Arawe su allo atallune, Itou sarun iapawangunna apia.”

Darorongngi inangngi Yakobus wurru Yohanes

(Mrk. 10:35-45)

²⁰Wua udde awingngi Zebedeus wurru manga alararangnge nirumanta ringannu Mawu Yesus. Su saruannu Mawu Yesus itou inumalintuda ana piaddu doronganna.

²¹"Inangnga maapulu napa?" aiwalo Mawu Yesus.

Inangnga sinumimbakka, "Ia'u maapulu ana'u darua indi uma'ianna su samba'a airri wurru uanannu lamangnga su tempo lamangnga maola'a Ratu."

²²"Iamiu wagga apa apan raddoronganni amiu," wisara Mawu Yesus simangitou. "Wotongngewe iamiu ma'inumma wuassu mangko n asasusa apan sarun Ta'u inumanna?"

"Wotongnge," sasimbakki mangitou.

²³Mawu Yesus nabbisara, "Atonna iamiu sarun ma'inumma lai wuassu mangko-U udde. Arawe su ola'u isai apan sarun uma'ianna su airri wurru su uanang-Ku udde tawe Ia'u manantunna. Manga tampa udde, tampa manga taumata apan suete tinantunnu lamangku."

²⁴Su tempo sire mapulo mallalarrenggen-Ne waine naaringikka hatto udde, imangitou nasa'u sitarua sangkaturangnga udde. ²⁵Ana waugu udde Mawu Yesus namaggo simangitou sarangkanambone, see nabbisara, "Iamiu masingkatta manungku manga tembonannu pabbawalaga apan wagga Mawu Ruata mannansara tumanangnge. Wurru manga tembonanni mangitou mannasa'i mangitou. ²⁶Arawe iamiu tawe wotongnge aroddi. Arawe taumata apan maapulu maola'a wahewa su wallatti amiu, rinone maola'a mangangimbenu. ²⁷Wurru taumata apan maapulu maola'a paarorone su wallatti amiu, rinone maola'a allangngu. ²⁸Ere lai Ana'u Taumata udde, Itou nirumanta waline tadea'u imbeanna, arawe mangimbe, wurru manantillu niawa-Ne ipamallossu taumata nambo."

Mawu Yesus napaapia n rua ng katou wuta

(Mrk. 10:46-52; Luk. 18:35-43)

²⁹Su tempo imangitou nanantangngu Yerikho, manambo taumata uatantalongnga Mawu Yesus. ³⁰Pia rua ng katou wuta ua'ianna su winggi n dalanna. Su tempo itarua naaringikka manungku Mawu Yesus sumabbi, itarua inumui, "Ana'i Daud, akkanaawe iami!"

³¹Taumata nambo isudde namulo sitarua wurru nandolokki tarua mallanaba. Arawe itarua inumui lembo n aikkanne lai, "Mawu, Ana'i Daud, akkanaawe iami!"

³²See Mawu Yesus nattaalla wurru namaggo sitarua. "Apa ipaapulu n raddua Ta'u olaanna siraddua?" aiwalo Mawu Yesus.

³³Itarua sinumimbakka, "Mawu iami maapulu maasilo!"

³⁴Mawu Yesus inumakkanni tarua, see namita mata n tarua. Orassa udde lai itarua naasilote. See itarua tinumantalongke Mawu Yesus.

Mawu Yesus sinumutta su Yerusalem ringannu awawantuga

(Mrk. 11:1-11; Luk. 19:28-40; Yoh. 12:12-19)

21 Su tempo maranite n Yerusalem, imangitou na'omate su Betfage su Wuiddu Zaitun. Isudde Mawu Yesus nandolokku rua ng katou mallalarrenggen-Ne niapaļu roro. ²"Roote su ampungnga apan sasaruananna udde," tanata Mawu Yesus simangitou. "Iraddua sarun maasilo keledai sambau ua'iitta su sampunna ringannu anangnge. Wu'ate itarua wurru apira'e isindi. ³Amungkangngu pia taumata maiwalo, waloa'e sitou, 'Mawu mappandumma sitou.' Ne taumata udde malihalihakka mamala n keledai udde iapaapidda siraddua."

⁴Olangnge udde nariaddi tadea'u matipusse apa apan suete niapa-singkattu nabi ereindi,

⁵"Waloa'a su Sion,

Ratunu tantanna rudanta ringanni amiu

Itou masarrionto'a wurru uasa'e sambau keledai,

sambau ana'u keledai sarre n tumuwo."

⁶Wua udde rua ng katou mallalarrenggen-Ne udde inaitte wurru na'ola'e su ereapa nitanata Mawu Yesus sitarua. ⁷Imangitou nangapiddu keledai udde ringannu anangnge. See imangitou nangampakke liuddu keledai darua udde ringannu jubah mangitou. Wua udde Mawu Yesus sinuma'ete. ⁸Manambo taumata poiarddi mammilattu manga jubah mangitou su lanna, tantanna taumata waine mangngitingnga manga ranna ng kalu wurru iaampakka su lanna. ⁹Taumata nambo apan u'amatta rorone, wurru su liuddu Mawu Yesus u'ui, "Awawantuga su Ana'i Daud! Nialamatanna Itou apan nirumanta ringannu arannu Mawu! Padalote Mawu Ruata apan Atanggaranne!"

¹⁰See, su tempo Mawu Yesus sinumutta su Yerusalem, anambo n lalloro n soa udde naggio. "Isai indi?" aiwalo manga taumata su soa udde.

¹¹"Itou Nabi Yesus, wuassu Nazaret su Galilea," sasimbakku taumata nambo apan uatantalongnga Mawu Yesus.



Lalanna marriputta su soa n Yerusalem (21:10)

Mawu Yesus sinumutta su Waḷe Mawu Ruata

(Mrk. 11:15-19; Luk. 19:45-48; Yoh. 2:13-22)

¹²Wua udde Mawu Yesus sinumuttate su Waḷe Mawu Ruata wuḗru nallimbuakka manga taumata apan uawawalli isudde. Itou namalinsuangngu manga medda m pananu'aranna roitta, wuḗru manga wangko mabawaḷu'u merpati. ¹³See Itou nabbisara manga taumata isudde, "Sulaḷummu Wuke Susi uawoḗretta manungku Mawu Ruata nabbisara, 'Waḷe'u sarun isaggo waḷe tampa aaliomananna.' Arawe niola'i amiu waḷe udde saḷakku taumata laḷeo!"

¹⁴Manga taumata wuta wuḗru lome nirumanta ringannu Mawu Yesus su Waḷe Mawu Ruata, wuḗru Itou napaapia mangitou. ¹⁵Arawe manga imam tembonanne wuḗru manga huru n agama nasa'u naasilo manga alaḗḗrindu'a niola'u Mawu Yesus. Wuḗru imangitou nasa'u lai naaringikka manga alaḗḗrana'a mangke u'ui su Waḷe Mawu, "Awawantuga su Ana'i Daud!"

¹⁶Imangitou nabbisara Mawu Yesus, "I'o naaringikka apa apan iwabbisara mangitou?"

"Ore, Ia'u naaringikka," sasimbakku Mawu Yesus. "Iamiau taambe naawasa su wageangngu Wuke Susi ereindi: 'Manga aḷarḷana'a wuḷḷu aḷarḷana'a ro'e n wuassu arariadine suete niaḷḷaangku maddalo daralo apan nasuungnga?'"

¹⁷Wua udde Mawu Yesus nanantangngi mangitou, see sinumabangnga wuassu soa udde watukku Betania wuḷḷu nanarḷabbi poiarddi.

Mawu Yesus namontoga alu ara

(Mrk. 11:12-14, 20-24)

¹⁸Tiḷḷabbine ruaallo, su amatanna mabelengnga watukku soa, Mawu Yesus niamalunusanna. ¹⁹Itou naasilo sangkalu alu ara su winggi n dalanna. Itou inaita su aḷungngu alu udde, arawe tawe naasomba wuane saran sambau, tumba'u rongngane sassane. See Mawu Yesus nabbisarate alu udde, "I'o sarun tate mabbua!" alu ara udde lapiddu tinumolangnga.

²⁰Su tempo mallarḷrenggennu Mawu Yesus naasilo inolaanne udde, imangitou naherangnga atonna. "Ereapa alu ara udde wotongnge lapiddu narḷangu?" aiwaḷo mangitou.

²¹"Atonna," sasimbakku Mawu Yesus, "Amungkangngu iamiau mangngimanna wuḷḷu tawe humago'a, iamiau maaola'a apa apan suete niola-U su alu ara indi, wuḷḷu tawe tumba'u udde sassane, ewe'e lai iamiau maawisara lai su wuidda indi, 'Awengkette wuḷḷu awontolle sulalḷummu tahaḷoangnga': ne olangnge udde sarun mariaddi. ²²Aḷawo'u apa apan raddoronganni amiau su aḷiomanni amiau, iamiau sarun manengkamma, sambaliate iamiau mangngimanna."

Aiwaḷo su ola'u tarḷrino Mawu Yesus

(Mrk. 11:27-33; Luk. 20:1-8)

²³Wua udde Mawu Yesus nabelengke su Waḷe Mawu Ruata see sinumuttate wuḷḷu mangngarḷa'e isudde. Su tempo Itou mangngarḷa'a, manga imam tembonanne wuḷḷu manga piaḷḷa'u Yahudi iirumanta ringanni Tou wuḷḷu naiwaḷo, "Apa pinangiananne na'oma n sara I'o ma'ola'a sarangkanambone indi? Isai nangonggolu tarḷrino udde Si'o?"

²⁴Mawu Yesus sinumimbakka, "Ia'u lai maiwalo siamiu. Wuṛṛu amungkangngu iamiu sumimbakka, Ia'u sarun mabbalo siamiu ringannu taṛṛino n sai Ia'u ma'ola'a manga inolaanna indi. ²⁵Yohanes Mananaṛṛani ringannu taṛṛino n sai? Mawu Ruata ara'e taumata?"

See manga imam tembonanne wuṛṛu manga piaṛṛa'u Yahudi man-nattakke ma'ire, su wallatti mangitou. "Amungkangngu iite mabbisara, 'Ringannu taṛṛino Mawu Ruata,' Itou sarun mabbisara, 'Amungkangngu aroddi anio iamiu tawe mangngimanna Sitou?' ²⁶Arawe amungkangngu iite mabbisara, 'Ringannu taṛṛino n taumata', iite matta'uttu taumata nambo, ana waugu imangitou sarangkanambone, mangngantimma Yoha-nes udde sangkatou nabi." ²⁷Nariaddi imangitou sinumimbakka, "Iami wagga."

See Mawu Yesus nabbisara simangitou, "Amungkangngu aroddi Ia'u lai tawe mabbalo siamiu ringannu taṛṛino n sai Ia'u ma'ola'a aḷawo'u inolaanna indi."

Sasumandinggu rua ng katou ana'a

²⁸"Su orassa indi ereapa ṛingirṛannu su olangnge indi?" unnu Mawu Yesus. "Pia sangkatou iamangnga pia anangnge rua ng katou esakka. Timmade udde inaite ringannu anangnge pahuḷu wuṛṛu na-bbisara, 'Ana'a, roote pammanara su wailu anggore allo indi.' ²⁹Ia'u madiri,' sasimbakku ana'a udde. Arawe wua udde ṛingirṛanne nawaḷu wuṛṛu nanute su wailu anggore udde. ³⁰Wua udde hagurangnge inaite ringannu anangnge aruane, wuṛṛu nabbisara lai aroddi. 'Ore, Iamang-nga,' sasimbakku ana'a aruane udde. Arawe itou tawe nanu su wailla. ³¹Ne su wallattu ana'a darua indi, suapane apan tinumuṛṛutta apulu n ia-mangnge?"

"Iapa pahuḷune," sinimbakku manga imam tembonanne wuṛṛu piaṛṛa'u Yahudi udde.

Ne Mawu Yesus nabbisarate simangitou, "Pangimante: Madda-rorongnga wose wuṛṛu manga wawine masandaga sarun maola'a laḷoṛṛo n araratuannu Mawu Ruata rorone wuassi amiu. ³²Ana waugu Yoha-nes Mananaṛṛani nirumanta, wuṛṛu namasilo siamiu ola'u mabbiakka apan ipaapulu Mawu, arawe iamiu madiri mangngimanna aḷaṛṛang-Nge; arawe manga mallaluṛṛu wose wuṛṛu manga wawine masandaga mang-ngimanna Sitou. Arawe salaiwe iamiu suete naasilo sarangkanambone udde, iamiu tawe namaḷu ṛingirṛanni amiu wuṛṛu tate mangngimanna lai Mawu."

Sasumandingngu mamamanara su waillu anggore

(Mrk. 12:1-12; Luk. 20:9-19)

³³"Daringirre sasumandingnga sambau indi lai," unnu Mawu Yesus. "Sangkatou tatahuannu leta'a nassuanna su sambau waillu anggore. Itou na'ola'a paggala pinamaliwutta, wurru naali, loṛrangnga pangado-annu pamamakannu anggore, wua udde niapararisikke waḷe m panda-riaganna. Wua udde itou napasewate m waillu anggore udde su mama-manarane, see itou nangingkatte su wanua waine. ³⁴Napawe nia'omante pangangitingngu wua n anggore udde, tatahuannu leta'a nandolokku manga raloṛṛanne ringannu mamamanara m wailla udde, iapatarim-matta wageangnge. ³⁵Arawe manga mamamanara m wailla udde na-nametta manga raloṛṛannu tatahuannu leta'a udde. Sangkatou ni-puulla, waine nipate wurru waine lai niwaretannu watu. ³⁶Tatahuannu leta'a udde nandolokke apia lai raloṛṛanne waine lai tinambanna anambone wuassu paarorone. Arawe imangitou niola'a lai ere ingana'a rorone. ³⁷Panginsueanne tatahuannu leta'a udde nandolokku anangnge sassane. 'Imangitou sarun mangaddatta ana'u,' irarṛingiddi tou. ³⁸Arawe su tempo mamamanara m wailla udde naasilo ana'u tatahuannu leta'a udde, imangitou uawawisara sangkatou ringannu waine, 'Ei, indete itou apan manahuanna. Wette iite mamate sitou tadea'u iite maasomba wa-geangnge!' ³⁹Ne ana'a udde sinamette niramme su liudde, see nipate."

⁴⁰Mawu Yesus naiwaḷo, "Ei, amungkangngu tatahuannu waillu ang-gore udde mabelengnga, itou sarun ma'ola'a apa su mamamanarane udde?"

⁴¹Imangitou sinumimbakka, "Itou sarun mamate manga taumata laḷeo udde, see mapasewate m waillu anggore udde su taumata waine apan maapulu mangagillu hessi n leta'a udde su tempone."

⁴²Ne Mawu Yesus nabbisarate simangitou, "Iamiu taambe naawasa apa apan uaworretta sulaḷummu Wuke Susi?"

'Watu apan tawe ipaattu maaola'a waḷe
naola'e watu apan paarorone.

Ete indi inolaannu Mawu;
tumanite marṛamaga atonna!"

⁴³"Nariaddi paanaunge," unnu Mawu Yesus, "anambo n tarṛino su aḷarṛana'u Mawu Ruata sarun uḷeanna wuassi amiu wurru iong-golla su pabbawalaga apan mapaamattu manga parenta Mawu Ruata. [⁴⁴Taumata apan nema'a su watu udde, sarun mapussa'a; wurru taumata apan niaemaannu watu udde, sarun atalṛingianne maola'a awu.]"

⁴⁵Su tempo manga imam tembonanne wurru manga taumata n Farisi naaringikka sasumandingngu Mawu Yesus udde, imangitou naasingkatta

manungku Mawu Yesus mabbatti'i mangitou. ⁴⁶Nariaddi imangitou mangke mappandumma manametta Sitou. Arawe imangitou matta'uttu taumata nambo, ana waugu taumata nambo udde ma'ellega manungku Mawu Yesus ere sangkatou nabi.

Sasumandingngu andeangngu awingnga

(Luk. 14:15-24)

22 Mawu Yesus nabbisara apia su taumata nambo ringannu sasumandingnga, ²wisarane, "Amungkangngu Mawu Ruata marenta, olangnge ere sasumandingnga indi: Sangkatou ratu na'ola'a andeangngu awingngu anangnge esakka. ³Ratu udde nandolokku manga raloŋorŋanne inai iapasaŋoho manga taumata apan suete niwaŋoanna su andeangnga udde. Arawe manga taumata apan niwaŋoanna udde madiri rumanta. ⁴Wua udde ratu nandolokku lai manga raloŋorŋanne waine. Wisarane simangitou: 'Waŋoa'a su taumata apan suete niwaŋoanna udde: Imbe su andeangnga nasaddiate. Sapi wurru manga ana'u sapi'u apan apianne suete nipototta. Sarangkanambone nasaddiate. Ringannu addatta rantate su andeangngu awingnga!' ⁵Arawe manga raho apan niwaŋoanna udde tawe nirumanta. Imangitou nabatukku manga manara mangitou sambau-sambau - sangkatou inaita su waille, waine su tampa n pammanaranne; ⁶wurru waine lai nanametta manga raloŋorŋannu ratu udde see namuulla wurru namate simangitou. ⁷Su tempo ratu udde naaringikka olangnge udde, itou nasa'u atonna. Itou nandolokku tantarane iapapate manga tarra pate udde, wurru iapatutungnga soa mangitou. ⁸Wua udde itou namaggote mangangimbene, see nabbisara, 'Andeangngu awingnga nasaddiate, arawe manga taumata apan suete niwaŋoanna tawe nirumanta. ⁹Orassa indi roote watukku manga laŋanna maŋoangnga, waŋoite anambo n taumata apan wotongnge rumanta su andeangngu awingnga indi.' ¹⁰Ne manga raloŋorŋanne udde inaita. Imangitou inaita su manga laŋanna wahewa see nangammulle n manga taumata apan nassomba mangitou poiaronddi apan ma'pia ara'e laŋeo. Ne nape-nete andeangngu awingnga udde ringannu aŋawo'u raho.

¹¹Wua udde ratu sinumuttate ma'ellega manga raho. Itou naasilo pia sangkatou su andeangnga udde apan tawe uaŋurŋe n laubbu andeangnga. ¹²See itou naiwaŋote taumata udde, 'Hawe, ereapa i'o wotongnge sumutta isindi tawe uaŋurŋe n laubbu andeangnga?' Taumata udde tawe naawisara sara n addio'a. ¹³See ratu udde nabbisara su manga raloŋorŋanne, 'Rapussa leddane wurru lima n taumata indi, wurru rammea'a itou su liudde su tampa apan marandumma. Poiaronddi pia laŋuai wurru asasusa.'"

¹⁴See Mawu Yesus nanginsue sasumandingnga udde ereindi: "Manambo apan wagoanna, arawe mattuḷungnga atonna apan mapile."

Su ola'u pamamaekka wose

(Mrk. 12:13-17; Luk. 20:20-26)

¹⁵Wua udde manga taumata n Farisi inaite ma'ire su sampunna su ola'u ereapa imangitou wotongnge mapaasala Mawu Yesus ringannu manga aiwalo. ¹⁶Ne imangitou nandolokku mallaḷarḷenggenni mangitou ringannu Mawu Yesus su sambau ringannu manga pira taumata wuassu samba'a n Herodes. Manga taumata udde nabbisara Mawu Yesus, "Iamangnga Huru, iami masingkatta iamangnga tawe mangawusu. Iamangnga mangngarra'a masema-semakka su ola'u apulu Mawu Ruata su taumata, tawe maddaringikka adapatti sai-sai. Ana waugu iamangnga tawe mamile taumata. ¹⁷Ana waugu udde, waloa'e siami iamangnga: Tumurruttu atorannu agama ng kite, wotongngewe mamaekka wose si Kaisar ara'e tawe?"

¹⁸Mawu Yesus masingkattu pandumanni mangitou apan laleo udde, aroddi Itou nabbisara, "Ei, manga taumata lilangkamaḷe'a! Anio iamiu maapulu madea'a sala'u? ¹⁹Pantingira'a Sia'u hati n roitta apan ipappaatti amiu ipammaekka wose!"

See imangitou nangagille Sitou sambau roitta sala'a. ²⁰Mawu Yesus naiwalo simangitou, "Hambaranna wurru aranni sai indi?"

²¹"Kaisar," sasimbakki mangitou.

Ne Mawu Yesus nabbisara simangitou, "Amungkanngu aroddi, onngoḷa'e si Kaisar apa apan tatahuananni Kaisar wurru onngoḷa'e su Mawu Ruata apa apan tatahuannu Mawu Ruata."

²²Su tempo imangitou naaringikka taḷaane aroddi, imangitou mangke naherangnga. Ne imangitou inaite nanantangngu Mawu Yesus.

Su ola'u pabbawangunna wuassu papate

(Mrk. 12:18-27; Luk. 20:27-40)

²³Su allo udde lai, manga pira taumata n Saduki nirumanta ringannu Mawu Yesus. Imangitou udde wageangngu taumata apan pia adapanne manungku taumata nate tawe mabiakka apia. ²⁴"Iamangnga Huru," unni mangitou, "Musa mangngarra'a arendi: Amungkanngu sangkatou esakka nate wurru itou tawe ana'a, turrangnge sarun maawingngu inawaḷuanne udde, tadea'u maasomba papapulunna su taumata apan natete udde. ²⁵Suete nariaddi su sire pitu sangkaturangnga apan

uatana'a isindi. Pahulune naawingnga wua udde nate tawe ana'a. Ne inawaluanne tinantangke su turrangnge. ²⁶Turragngge udde see nate lai tawe ana'a. Olangnge udde nariaddi lai su turragngge atallune, see naalisansunna na'oma n sara appitune. ²⁷Panginsueanne wawine udde lai nate. ²⁸Ne su tempo taumata nate iapawangunna apia, awingngi sai wawine udde? Ana waugu sire pitu udde suete naawingngi tou."

²⁹Mawu Yesus sinumimbakka, "Iamiu nialiwune, ana waugu iamiu tawe maasunna Wuke Susi, wurru tarino Mawu Ruata. ³⁰Ana waugu napawe taumata mate iapawangunna apia, imangitou tate maawingnga apia, arawe imangitou sarun mabiakka ere mala'ekatta su surga. ³¹Iamiu taambe naawasa apa apan niapasingkattu Mawu Ruata su ola'u taumata nate iapawangunna apia? Mawu Ruata nabbisara, ³²'Ete Ia'u Mawu Ruata n Abraham, Mawu Ruata n Ishak wurru Mawu Ruata n Yakub.' Mawu Ruata udde walineuwe Mawu Ruata n taumata nate. Itou Mawu Ruata n taumata wiakka!"

³³Napawe taumata nambo udde naaringikka tal'a Mawu Yesus, imangitou mangke naherangngu alarang-Nge udde.

Parenta ahewalanne

(Mrk. 12:28-34; Luk. 10:25-28)

³⁴Su tempo manga taumata n Farisi naaringikka manungku Mawu Yesus suete na'ola'a manga taumata n Saduki tawe naawisara sara n addio'a, imangitou naammulla. ³⁵Sangkatou wuassu wallatti mangitou, eteudde sangkatou huru n agama, maannamma mapaasala Mawu Yesus ringannu sambau aiwalo. ³⁶"Iamangnga Huru," wisarane, "parenta suapane apan ahewalanne sulalummu atorannu agama?"

³⁷Mawu Yesus sinumimbakka, "Pandangngu Mawu Ruatanu ringannu ahewallu naungngu wurru ahewallu apulunu wurru ringannu alawo'u apandenu. ³⁸Eteudde parenta apan paarorone wurru ahewalanne! ³⁹Parenta aruane nassulungngu paarorone eteudde: Pandangngu sansulungngu taumata ere i'o mandangngu ririnu sassane. ⁴⁰Anambo n tita n agama apan nionggoli Musa wurru alarra'u manga nabi, rapappake ete su parenta darua udde."

Hatto n Ratu m Punnu Salamatta

(Mrk. 12:35-37; Luk. 20:41-44)

⁴¹Tantalanna manga taumata n Farisi ta'e uaammulla isudde, Mawu Yesus naiwalo simangitou, ⁴²"Apa adapatti amiu su ola'u Ratu m Punnu Salamatta? Papapulunni sai Itou?"

"Papapulunni Daud," sasimbakki mangitou.

⁴³"Amungkangngu aroddi," aiwaḷo Mawu Yesus, "anio Gharraho Mawu Ruata nangarra'a si Daud managgo n Ratu m Punnu Saḷamatta 'Mawu'? Ana waugu Daud nabbisara,

⁴⁴Mawu nabbisara su Mawu'u:

a'iante su samba'a uanang-Ku,

ma'oma n sara Ia'u ma'ola'a manga seennu massurubawa Si'o.'

⁴⁵Nariaddi amungkangngu Daud, mannaggo n Ratu m Punnu Saḷamatta udde 'Mawu', ereapa wotongnge itou papapulunni Daud?"

⁴⁶Tawe saran sangkatou wotongnge naasimbakka Mawu Yesus. Wurru nanattakka allo udde, tawedu lai warrani maiwaḷo manga apa Sitou.

Iapaanaungnga, tadea'u paatehamma su manga huru n agama wurru manga taumata n Farisi

(Mrk. 12:38-39; Luk. 11:43, 46, 20:45-46)

23 See Mawu Yesus nabbisarate taumata nambo udde wurru su mallarengen-Ne, ²"Manga huru n agama wurru manga taumata n Farisi naasomba tarino manaḷa'a n tita Musa. ³Ana waugu udde turutte wurru ola'e sarangkanambone apan iradolokki mangitou. Arawe imbarangnga ma'ola'a apa apan a'olaanni mangitou, ana waugu imangitou tawe tutturutta apa apan iaarra'i mangitou. ⁴Imangitou manggatokku manara masahada wurru mawakkatta, arawe imangitou tawe mantulungngu taumata ma'ola'a manarane. ⁵Sarangkanambone apan niola'i mangitou tumba'u iapa'ellega su taumata. Imangitou mallurre n tali n aaliomanna apan maḷala-ḷalakka wurru maḷo'engnga uatungkele su jubah mangitou! ⁶Imangitou maa-pulu n tanpa apianne su manga andeangnga, wurru addera apianne su manga waḷe m pattatarramawuanna. ⁷Imangitou lulluassa amungkangngu aaddatannu taumata su manga pasakka wurru wabbagoanna 'Iamangnga Huru'. ⁸Arawe iamiu, ariewe maapulu wagoanna 'Iamangnga Huru', ana waugu Hurunu tumba'u sambau wurru iamiu sarangkanambone sangkaturangnganna. ⁹Wurru arie lai iamiu mamaggo saran sangkatou su runia indi 'Iamangnga', ana waugu Iamangngu tumba'u sambau, eteudde Iamangnga apan su surga. ¹⁰Wurru arie lai iamiu maapulu wagoanna 'Piarangnge', ana waugu piarra'i amiu tumba'u sangkatou, eteudde Ratu m Punnu Saḷamatta apan suete pina'ire Mawu Ruata. ¹¹Taumata apan ahewalanne su wallatti amiu rinone maola'a mangangimbe ng kamiu. ¹²Taumata apan mannanggakku watanganne

sarun iapaawawo, wuṛṛu taumata apan sussallungngu watanganne sarun itanggakka.”

Mawu Yesus mapaasaḷa pallaḷagu n lilangkamaḷe’a

(Mrk. 12:40; Luk. 11:39-42, 44, 52, 20:47)

¹³”Nasilakate iamiu manga huru n agama wuṛṛu manga taumata n Farisi! Iamiu tarṛa lilangkamaḷe’a. Iamiu mannaḷawa’a taumata maapulu maola’a laḷorṛo n araratuannu Mawu Ruata. Iamiu sassane madiri maola’a laḷorṛo n araratuannu Mawu Ruata, wuṛṛu taumata waine apan maapulu, sassaḷawaanni amiu.

[¹⁴Nasilakate iamiu manga huru n agama wuṛṛu manga taumata n Farisi: Iamiu tarṛa lilangkamaḷe’a. Iamiu mangngawusu manga wawine waḷu wuṛṛu mangngarṛo waḷene wuṛṛu tadea’u maawuni n aḷaḷeo udde, iamiu u’aliomanna maḷo’e-ḷo’engnga. Ana waugu udde ṛuumanni amiu salimmurine awakkatanne!]

¹⁵Nasilakate iamiu manga huru n agama wuṛṛu manga taumata n Farisi! Iamiu tarṛa lilangkamaḷe’a! Iamiu inai massenggotta marau-rau nilumewessa tahaḷoangnga, wuṛṛu mammaḷiwutta ammaranne, tumba’u madea’a sangkatou taumata sumutta su agamanu. Wuṛṛu napawe taumata udde uasuttate su agamanu, iamiu ma’ola’a sitou taumata naraka, apan aḷaḷeone paarua wuassu aḷaḷeo ng kamiu sassane!

¹⁶Nasilakate iamiu manga piarṛangnge apan wuta! Iamiu mangngarṛa’a ereindi, ’Amungkungngu taumata massalu ringannu arannu Waḷe Mawu, taumata udde tawe aiitannu sasalune; arawe amungkungngu itou nassalu ringannu arannu wuḷawanna sulaḷummu Waḷe Mawu, itou aiitannu sasalune udde.’ ¹⁷Iamiu manga taumata woddo apan wuta! Suapa ahunanne: Wuḷawanna, ara’e Waḷe Mawu apan na’ola’a wuḷawanna udde na’ukkassa? ¹⁸Iamiu mangangarṛa’u indi lai, ’Amungkungngu sangkatou nassalu ringannu arannu tampa n sasamba, taumata udde tawe aiitannu sasalune; arawe amungkungngu itou nassalu ringannu arannu sasamba su wowo n tampane udde, itou aiitannu sasalune udde.’ ¹⁹Tumanite m wuta iamiu! Suapa ahunanne? Sasamba ara’e tampa n sasamba apan na’ola’a sasamba udde na’ukkassa? ²⁰Ana waugu udde, amungkungngu sangkatou massalu ringannu arannu tampa n sasamba, udde atappasanne itou nassalu ringannu arannu tampa n sasamba, wuṛṛu ringannu arannu aḷawo’u sasamba apan uarandangnga isudde. ²¹Wuṛṛu amungkungngu sangkatou massalu ringannu arannu Waḷe Mawu, udde atappasanne itou nassalu ringannu arannu Waḷe Mawu, wuṛṛu ringannu arannu Mawu Ruata apan uatana’a isudde. ²²Wuṛṛu amungkungngu sangkatou massalu ringannu arannu surga,

udde atappasanne itou nassalu ringannu arannu addera n araratuannu Mawu, wuṛṛu ringannu arannu Mawu Ruata apan ua'iana su addera udde. ²³Nasilakate iamiu manga huru n agama wuṛṛu manga taumata n Farisi! Iamiu lilangkamaḷe'a. Rampa-rampa ere selasi, adassa mate-mangnga, wuṛṛu jintan, nionggoli amiu sambau wuassu mapuḷo wage-angnge su Mawu Ruata. Arawe apa apan nangillembu wua isudde sulalummu aḷaṛṛa'u agama ere tuḷadane: Atatuḷidda, darangngu, wuṛṛu tatuṛṛutta tawe olaanni amiu. Sumbaḷi eteudde apan ṛinone olaanni amiu, ringannu tawe manantangngu aḷaṛṛa'a waine lai. ²⁴Iamiu manga piarṛangnge apan wuta! Lango sulalummu ua'enu, iaatapissi amiu, wutte'e unta aallupanni amiu!

²⁵Nasilakate iamiu manga huru n agama wuṛṛu manga taumata n Farisi! Iamiu tarṛa lilangkamaḷe'a! Manga mangko wuṛṛu manga lama'i amiu niukkassa waresi-waresi su liudde, arawe sulalumme nalaluhuranna ringannu aḷawo'u apa apan niasombanganni amiu ringannu ararṛagissa wuṛṛu awawaḷiu. ²⁶Farisi wuta! Ukkassa asuene paawaresi laḷummu manga mangko wuṛṛu manga lamangngu, tadea'u liudde mawaresi lai!

²⁷Nasilakate iamiu manga huru n agama wuṛṛu manga taumata n Farisi! Iamiu tarṛa lilangkamaḷe'a! Iamiu naaḷihidda ere manga holangnga apan niwuṛṛannu mawira; su liudde elle-hanna marṛansangnga, arawe sulalumme napene n duṛṛi wuṛṛu sarangkanambone apan mawuku'a. ²⁸Aroddi lai iamiu. Wuassu liudde iamiu ellehanna taumata mapia; arawe sulalumme, iamiu napene n awusu wuṛṛu aḷawo'u laḷawangnga."

Mawu Yesus namasingkatta su ola'u ṛuumannu manga huru n agama wuṛṛu manga taumata n Farisi

(Luk. 11:47-51)

²⁹"Nasilakate iamiu manga huru n agama wuṛṛu manga taumata n Farisi! Iamiu tarṛa lilangkamaḷe'a! Iamiu napararisikku holangnga apan marṛansangnga su manga nabi, wuṛṛu nallogakka manga pale m pananaunganna su manga taumata apan mabbiakka matuḷidda. ³⁰Wuṛṛu iamiu mabbisara, 'Unnu wisara iamiu mabiakka su tempo n iupungngu aḷamona ng kami dorone, iamiu tawe tinumantalongnga ringanni mangitou namate manga nabi.' ³¹Nariaddi iamiu mangnga'u sassane manungku ete iamiu papapulunnu manga taumata apan namate manga nabi! ³²Amungkangngu aroddi sidutua'e wuṛṛu insuete manga rosa apan suete tinattakku iupungngu aḷamona ng kami udde! ³³Iamiu laḷeo wuṛṛu papapulunnu taumata laḷeo! Ereapa iamiu wo-

tongnge manalamatta wadangngi amiu wuassu ruumanna su naraka? ³⁴Paddaringikka paapia-pia: Ia'u sarun mandolokku manga nabi ringanni amiu, taumata pande, wuṛṛu manga huru; sangkaadoanna wuassu mangitou sarun pateanni amiu, wuṛṛu sangkaadoanna waine lai sarun iarussa ng kamiu. Piaddu sansaranni amiu lai sulaḷummu manga waḷe m pattataṛramawuanna, wuṛṛu iamiu a'enggenanna wuassu soa sambau watukku soa apan waine. ³⁵Ana waugu udde, iamiu sarun iṛruumanna ana waugu pamamate apan niola'a su manga taumata apan tawe saḷane – nanatakka wuassu pamamate si Habel apan tawe saḷane, na'oma n sara pamamate si Zakharia ana'i Berekia apan nipate ng kamiu su wallattu Waḷe Mawu wuṛṛu tampa n sasamba. ³⁶Pangimante: sarangkanambone udde sarun maola'a winabbawa manga taumata su tempo indi!"

Mawu Yesus inumakkannu Yerusalem

(Luk. 13:34-35)

³⁷"Yerusalem, Yerusalem! Manga nabi suete nipatenu. Manga raloloṛṛannu Mawu Ruata suete tinuntungannu watu na'oma n sara nate. Paapirate Ia'u maapulu mangammullu tumana'u soa naaḷihidda ere inangngu manu'a mangooppa alaṛṛanangnge sulaḷummu papaidde, arawe iamiu madiri! ³⁸Ana waugu udde Mawu Ruata tate lai maṛṛundinganna siamiu. ³⁹Paasingkate: Manattakka wuassu orassa indi, i'o tate lai maasilo Sia'u ma'oma n sara i'o mabbisara, 'Nialamatanna Itou apan nirumanta ringannu arannu Mawu.'"

Mawu Yesus nabbatti'u ahahohakku

Waḷe Mawu

(Mrk. 13:1-2; Luk. 21:5-6)

24 Su tempo Mawu Yesus nanantangngu Waḷe Mawu, manga mal-laḷarṛenggen-Ne nirumanta ringanni Tou nanta'e watukku manga Waḷe Mawu. ²Mawu Yesus nabbisara simangitou, "Apa iamiu maasilo sarangkanambone udde? Asingkate, tawedu saran sambau watu wuassu manga waḷe udde sarun matana'a uatokka su tampane. Sarangkanambone sarun iapaahohakka."

Asasusa wuṛṛu pananansara

(Mrk. 13:3-13; Luk. 21:7-19)

³Wua udde Mawu Yesus inaita watukku Wuiddu Zaitun, wuṛṛu tantaḷanna Itou ua'iana, mallalaṛṛenggen-Ne nirumanta maggahatto n Tou sassane. "Waḷoa'e siami tinggera sarangkanambone udde sarun mariaddi," unni mangitou Sitou. "Manga tanda apa apan mamasingkattu daranta n lamangnga wuṛṛu pangudusannu runia indi?"

⁴Mawu Yesus sinumimbakka, "Paatehamma, arie ma'oma n sara iamiu awahianna. ⁵Ana waugu manambo taumata apan rumanta ringannu arang-Ku see mabbisara, 'Ia'u Ratu m Punnu Saḷamatta!' Imangitou sarun mamahia taumata nambo. ⁶Iamiu sarun maaringikka manga tingikku pangalo wuṛṛu manga watti'u pasaseetta, arawe arie iamiu mata'utta. Ana waugu sarangkanambone udde sarun mariaddi, arawe udde tawe wawaḷo manungku tempo ng kiamatta nia'omante. ⁷Pabbawalaga sambau sarun mamangalo lumawangnga pabbawalaga waine, wuṛṛu araratuanna sambau sarun mamangalo araratuanna waine. Su aḷawo'u tampa sarun mariaddi aḷaḷunussa wuṛṛu linukka. ⁸Sarangkanambone udde wakkute panattaṛṛanne, ere radda'a apan niapendamannu sangkatou wawine su tempo mangunsiwe.

⁹Wua udde iamiu sarun sametanna wuṛṛu itantilla iapasansara wuṛṛu pateanna. Ahewallu runia sarun marantinni amiu, ana waugu iamiu mallalaṛṛenggeng-Ku. ¹⁰Su tempo udde manambo taumata sarun massinaadu Mawu, wuṛṛu mandaleo see masaseetta sangkatou ringannu sangkatou. ¹¹Manambo manga nabi awusu sarun rumanta, wuṛṛu mangawusu taumata nambo. ¹²Aḷaḷeo sarun ṛumite aroddi ahewalle ma'oma n sara manambo taumata tate lai maddarangngu. ¹³Arawe taumata apan matataṛṛangnga saran pangudusanne, sarun masaḷamatta. ¹⁴Wuṛṛu Watti'u Aḷaḷuassa su ola'u ereapa Mawu Ruata mamarenta sarun iapasingkatta su ahewallu runia, tadea'u anambo n taumata maddaringikka. Wua udde rumantate kiamatta."

Aḷaḷeo apan maahohakka

(Mrk. 13:14-23; Luk. 21:20-24)

¹⁵"Iamiu sarun maasilo 'Aḷaḷeo apan maahohakka', ere suete niapasingkatti Nabi Daniel, uarisikka su tampa susi. (Iapasingkatta su mabbawasa: Rṅingira'a apa atappasanne!) ¹⁶Su tempo udde taumata uatana'a su Yudea sarun tumalaṅnga watukku panenteanna. ¹⁷Taumata apan

roso su wowo n atuppu wale, arie pasossokka manganu sarannapa sulalummu wale. ¹⁸Taumata apan su wailla arie pabelengnga manganu jubahne. ¹⁹Tumanite maata'utta manga allo udde su wawine apan pia illoŕro, wuŕru su inangnga apan ta'e mappasusu n anangnge. ²⁰Aaljomante tadea'u iamiu tawe tumalangnga su tempo manguranna ara'e su allo n Sabatta! ²¹Su manga allo apan maata'utta udde sarun pia asasusa wahewa ere apan taambe nariaddi ro'e n panattarannu runia na'oma n sara orassa indi, wuŕru tate lai mariaddi apia. ²²Unnu wisara, Mawu Ruata tawe mangalihakku tempone; tawe saran sangkatou apan wotongnge masalamatta. Arawe ana waugu alarranang-Nge, Mawu Ruata nangautta tempone udde.

²³Su tempo udde amungkangngu pia sangkatou mabbisara siamiu, 'Pa'ellega Ratu m Punnu Salamatta isindi!' ara'e 'Itou isudde!' - arie pangimanna taumata udde. ²⁴Ana waugu sarun rumanta manga mananamatta awusu wuŕru manga nabi awusu. Imangitou sarun ma'ola'a alawo'u inolaanna apan wahewalla, wuŕru manga alarrindu'a ipangawusu, amungkangngu wotongnge, alarrana'u Mawu Ruata lai. ²⁵Nariaddi paanaunge! Ia'u suete namasingkatta siamiu paarorone tantanna olangnge udde taambe nariaddi.

²⁶Amungkangngu taumata nabbisara siamiu, 'Pa'ellega Itou poiardi su wadda'a!' - arie iamiu inai. Ara'e amungkangngu imangitou mabbisara, 'Pa'ellega, Itou uaimbuni sulalummu wabbo'a isindi!' - arie pangimanna ²⁷ana waugu raranta n Ana'u Taumata semakke ere sawallo ma'ilatta wuassu punnu ra'i, wuŕru semakke na'oma n sara punnu waratta.

²⁸Suapa pia winatangnga nate, isudde lai pia manu'a u'inassa winalunannu winatangnga nate udde."

Daranta n Ana'u Taumata

(Mrk. 13:24-27; Luk. 21:25-28)

²⁹"Tawe nalannu wuassu asasusa su tempo udde, matannallo sarun maddandumma, wuŕru wulanna tate lai semakke. Manga anumpitanna sarun manawo wuassu langitta, wuŕru manga tembonannu winalanganna sarun massaliawukka. ³⁰Wua udde tanda n Ana'u Taumata sarun iasilo su langitta. Su tempo udde manga pabbawalaga su runia sarun lumuai. Imangitou sarun maasilo Ana'u Taumata rumanta wuassu winabbawa ringannu tarino wuŕru awawantuga apan wahewa. ³¹Trompeta wahewa sarun tiupanna wuŕru Ana'u Taumata sarun mandolokku manga

mala'ekanne mangammullu aḷarḷanang-Nge wuassu pi'u n runia appatta, wuassu punnu langitta sambau ma'oma n sara punnu langitta waine."

Aḷarḷa'a wuassu alu ara

(Mrk. 13:28-31; Luk. 21:29-33)

³²"Pattannote aḷarḷa'a wuassu alu ara. Amungkangngu manga ranane nangelompe wuḷḷu lullaukke, wuḷḷu maddannate, iamiu masingkatta manungku tempo m paddissa maranite. ³³Aroddi lai amungkangngu iamiu maasilo manga olangnge udde mariaddi, iamiu masingkatta manungku tempone maranite atonna. ³⁴Asingcate! Manga olangnge udde sarun mariaddi, tantaḷanna manga taumata wiakka orassa indi taambe nate abbi. ³⁵Langitta wuḷḷu runia sarun mawuḷi, arawe wisara-U ma'oma n sara maḷannu-ḷannu."

Tawedu masingkatta allone wuḷḷu oranne

(Mrk. 13:32-37; Luk. 17:26-30, 34-36)

³⁶"Tawedu masingkatta allone wuḷḷu oranne, manga mala'ekattu Mawu su surga lai wagga, Ana'u Mawu Ruata lai wagga, tumba'u lamangnga sassane masingkatta. ³⁷Napawe Ana'u Taumata rumanta olangnge naaḷihidda ere su tempo Nuh dorone. ³⁸Su miallo-miallo taambe nammanawangnga wahewa udde, manga taumata u'anna wuḷḷu ma'inumma wuḷḷu maawingnga. Aroddiwe naola'a na'oma n sara su allo Nuh sinumutta su apalla. ³⁹Su tempo manawangnga udde nangelekki mangitou sarangkanambone, wakkute udde imangitou naatutukka su ola'u apa apan tantaḷanna nariaddi udde. Aroddi lai olangnge sarun mariaddi amungkangngu Ana'u Taumata rumanta. ⁴⁰Su tempo udde pia rua ng katou apan mammanara su wailla: Sangkatou sarun iapidida, wuḷḷu sangkatou lai itantangnga. ⁴¹Rua ng katou wawine tantaḷanna manggilingngu gandumma: Sangkatou sarun iapidida, wuḷḷu sangkatou lai itantangnga. ⁴²Nariaddi, paatehamma, ana waugu iamiu wagga tinggera Mawunu sarun rumanta. ⁴³Paanaunge indi! Uniu wisara tatahuannu waḷe masingkatta puulla sangkura su tempo ḷabbi manana'o rumanta, itou tawe matiilla, tadea'u manana'o tawe maasutta sulaḷummu waḷene. ⁴⁴Ana waugu udde, iamiu lai ḷinone uariaga. Ana waugu Ana'u Taumata sarun rumanta su orassa apan tawe iaḷrangngo ng kamiu."

**Mangangimbe maturrutta wurru mangangimbe
malawangnga**
(Luk. 12:41-48)

⁴⁵Mawu Yesus nabbisara apia, "Amungkangngu aroddi, mangangimbe suapane apan maturrutta wurru pande? Ete itou sarun ite-negu mawune maola'a tembonannu manga mangangimbe waine, tadea'u itou mangagillu anna simangitou su tempone. ⁴⁶Laluassa eteapa su mangangimbe udde napawe mawune nabelengke, wurru naaratingnga sitou tantaļanna mammanara manarane. ⁴⁷Pangimante, mawu udde sarun manantillu paa'alane su mangangimbe udde. ⁴⁸Arawe amungkangngu mangangimbe udde laļeo, itou sarun mabbisara sulaļummu naungnge, ⁴⁹'Mawu'u ta'e maļannu mabelengnga,' see itou nanattakke mammuulla manga mangangimbe waine wurru u'anna, ma'inumma ringannu manga taumata wu'anna. ⁵⁰Wua udde mawune sarun mabelengnga su allone wurru oranne apan tawe iarřranggo. ⁵¹Ne mangangimbe udde sarun puuļannu mawune wurru iramme su tampa manga taumata lilangka-maļe'a. Imangitou sarun lumuai wurru matatarřrangnga poiaroddi."

Sasumandingngu sire mapuļo mařřuala

25 "Napawe Ana'u Taumata rumanta ere Mawu, olangnge ere su-laļummu sasumandingnga indi: Sire mapuļo mařřuala maman-tuga maa'awingnga, sangkatou-sangkatou nanganu soļo, see inai manaļoho maa'awingnga esakka.

²Sire lima su wallatti mangitou woddo, wurru sire lima waine pande. ³Sire lima mařřuala apan woddo uaapiddu soļo, arawe tawe nangapiddu waļunna lana. ⁴Sire lima mařřuala pande uaapiddu soļo ringannu waļunne lana. ⁵Maa'awingnga esakka udde maļannu mirumanta, nariaddi manga mařřuala udde miamatiļanna wurru natiille.

⁶Matangnga n allorane, wakku udde inaringikka aintuļi, 'Maa'awingnga esakka mirumantate! Wette manaļoho Sitou!' ⁷Sire mapuļo mařřuala udde napu'ote wurru nande'ompe soļo mangitou. ⁸Manga mařřuala woddo udde nabbisara su mařřuala-pande, 'Onggoļewe lana ng kamiu addio'a siami, ana waugu soļo ng kami mappadumpe.' ⁹'Tawe wotongnge!' simimbakku manga mařřuala pande udde, 'ana waugu takka lana tawe mattiudda siite nambo. Roote pamalli su mabbawaļu'a.' ¹⁰Ne manga mařřuala apan woddo udde inaita namalli lana. Tantaļanna inaiaroddi, mirumantate maa'awingnga esakka. Sire



Sofo wurru tampa n lana (25:4)

lima marɽuala apan nasaddiate udde sinumuttate su sampunna ringannu maa'awingnga esakka su tampa n andeangnga, wurru ngara niɽruudde!

¹¹Wua udde manga marɽuala apan woddo nabelengke. Imangitou uu'ite, 'Mawu, Mawu, wu'awe ngara siami.' ¹²Arawe maa'awingnga esakka udde sinumimbakka, 'Ia'u wagga ng kamiu!' "

¹³See Mawu Yesus nanginsuete sasumandingnga udde arendi, "Ana waugu udde paariaga, ana waugu iamiu wagga allone ara'e oranne."

Sasumandingngu sire tallu mangangimbe

(Luk. 19:11-27)

¹⁴"Napawe Ana'u Taumata nirumanta ere sangkatou Mawu olangnge ere lai sulalummu sasumandingnga indi. Sangkatou esakka maapulu inai massenggotta su tampa apan marau. Itou namaggo manga mangangimbene niapariaga darotongnge. ¹⁵Su sangkatou-sangkatou mangangimbe udde itou nangagilla tumuɽuttu auatannu sangkatou-sangkatou. Su sangkatou itou nangagillu lima ɽiwu roitta wuɽawanna. Wurru su waine lai itou nangagillu rua ɽiwu roitta wuɽawanna. Wurru su sangkatou lai itou nangagillu saɽɽiwu roitta wuɽawanna. See itou nasseng-gote. ¹⁶Mangangimbe apan nanengkamma lima ɽiwu roitta wuɽawanna udde naliha-lihakka inai nabbaɽu'a, see naasomba auntunganne lima ɽiwu roitta wuɽawanna. ¹⁷Aroddi lai mangangimbe apan nanengkamma rua ɽiwu roitta wuɽawanna udde, naasomba auntunganne lai rua ɽiwu.



Roitta wuławanna (25:15)

18 Arawe mangangimbe apan nanengkamma sarriwu roitta wuławanna udde, inaita naali loṛrangnga, see namunite n roittu mawune isudde.

19 Maḷannu atonna wua udde, mawu manga mangangimbe udde napuḷete, wuṛru nanattakke na'ola'a reenganna ringanni mangitou.

20 Mangangimbe apan nanengkamma lima riwu roitta wuławanna udde nirumanta wuṛru nanantillu mapuḷo riwu. 'Mawu,' wisarane, 'Mawu nanantillu lima riwu roitta wuławanna sia'u. Pa'ellege, ia'u naasomba auntunganna lai lima riwu.' **21** 'Mapia,' unnu mawu udde, 'ete i'o mangangimbe apan mapia wuṛru maturrutta. Ana waugu i'o apangimananna ringannu apan addio'a, ia'u sarun manantillu anamboanne si'o. Suttate wuṛru lalluasse ringanku!'

22 See mangangimbe aruane apan nanengkamma rua riwu roitta wuławanna udde nirumanta wuṛru nabbisara, 'Mawu, Mawu suete nanantillu rua riwu roitta wuławanna sia'u. Pa'ellege, ia'u naasomba auntunganne rua riwu lai.' **23** 'Mapia,' unnu mawu udde, 'i'o mangangimbe apan mapia wuṛru maturrutta. Ana waugu i'o apangimananna ringannu apan addio'a, ia'u sarun mangagillu anamboanne si'o. Suttate wuṛru lalluasse ringanku!' **24** Wua udde mangangimbe apan nanengkamma sarriwu roitta wuławanna udde nirumanta wuṛru nabbisara, 'Mawu, ia'u masingkatta i'o mawu sangkatou apan maṛragissa. Mawu mangngitingnga wuane su tampa mawu tawe nassuanna, wuṛru mam-murutta wuane su tampa mawu tawe nangasi'u wualanna. **25** Ia'u matta'utta aroddi ia'u inai namuni n roittu mawu sulaḷummu leta'a. Indete roinnu Mawu.' **26** 'I'o mangangimbe apan laḷeo wuṛru malassa!' unnu mawune udde. 'Waḷinewe i'o masingkatte manungku ia'u mangngitingnga su tampa ia'u tawe massuanna, wuṛru mammurutta su tampa ia'u tawe mangasi'u wualanna?' **27** Amungkangngu aroddi i'o riṛone manga-

ddo n roi'u su pangangadoannu roitta, tadea'u su tempo ia'u mapuḷe, ia'u manengkamma roi'u apia udde ringannu wungane. ²⁸Ana waugu udde, anute roitta wuassi tou wuḷḷu onngoḷa'e su taumata apan uatahuanna mapuḷo roitta wuḷawanna udde. ²⁹Ana waugu taumata apan piate, sarun onngoḷannu lai lembo n anamboanne wuḷḷu itou sarun pia lebbene. Arawe taumata apan tawe darotongne, addio'a apan ta'e sitou, sarun uḷeanna lai. ³⁰Wuḷḷu mangangimbe apan tawe gunane udde, rammea'e sulaḷummu ararandumma su liudde. Poiaroddi itou sarun lumuai wuḷḷu matatarangnga asasusa!"

Parikissa su Allo ng Kiamatta

³¹"Napawe Ana'u Taumata rumanta ere sangkatou ratu tatantalongannu anambo mala'ekan-Ne, Itou sarun uma'ianna su addera n araratuanna apan mawantuga. ³²Aḷawo'u pabbawalaga sarun iammulla su saruan-Ne. See Itou sarun maḷḷae mangitou maola'a rua ng kadoananna ere mallalu'adda domba maḷḷae n dombane wuassu ambingnga. ³³Manga taumata apan tuttuḷḷutta apulu Mawu Ruata sarun iammulla su samba'a uanan-Ne, wuḷḷu waine su samba'a n airri-Ne. ³⁴Wua udde ratu sarun mabbisara su manga taumata su samba'a uanan-Ne, 'Wette iamiu apan niaḷamatannu Iamangku. Suttate sulaḷummu araratuanna apan suete pinassaddia ro'e n panattarannu runia. ³⁵Ana waugu su tempo Ia'u maḷunussa, iamiu nangagillu anna Sia'u, wuḷḷu su tempo Ia'u marou, iamiu nangagillu ua'e Sia'u. Ia'u sangkatou raho, iamiu narimmatta Sia'u su walenu. ³⁶Ia'u tawe laubba, iamiu nangagillu laubba Sia'u. Ia'u maradda'a iamiu nangundamma Sia'u, Ia'u su ruumanna, iamiu nantuluḷung-Ku.'

³⁷See manga taumata udde sarun mabbisara, 'Mawu, angngerate iamii naasilo Mawu maḷunussa see iamii napaannu Mawu, ara'e marou see iamii napa'inummu Mawu? ³⁸Angngerate iamii naasilo Mawu ere sangkatou taumata raho, see iamii nanaḷoho Mawu su wale ng kami? Su tempo suapa Mawu tawe laubba see iamii nangagillu laubba? ³⁹Su tempo suapa iamii naasilo Mawu maradda'a ara'e su ruumanna, see iamii nantuluḷunggu Mawu?' ⁴⁰Ratu udde sarun sumimbakka, 'AsingKate: su tempo iamii ma'ola'a inolaanna udde, salaiwe su wallattu sangkatou taumata wuassu manga tuḷḷrangku apan addio'anne, ere lai iamii na'ola'a Sia'u!

⁴¹See ratu udde sarun mabbisara su manga taumata su samba'a airrine, 'Roote wua isindi, manga taumata laḷeo! Suttate sulaḷummu putungnga apan tawe iapadumma, apan suete nissaddia su Setanna wuḷḷu su manga raloluḷḷanne! ⁴²Ana waugu su tempo Ia'u maḷunussa, iamii

tawe nangagillu anna Sia'u; su tempo Ia'u marou, iamiu tawe nangagillu ua'e Sia'u. ⁴³Ia'u taumata raho, iamiu tawe nanarimmatta Sia'u sulalummu walenu. Ia'u tawe laubba iamiu tawe nangagillu laubba Sia'u. Ia'u maradda'a wurru su ruumanna, iamiu tawe nantulungku.' ⁴⁴See imangitou sarun mabbisara Sitou, 'Mawu, su tempo suapa iami naasilo Mawu malunussa, ara'e narou, ara'e ere sangkatou raho, ara'e tawe laubba, ara'e maradda'a ara'e su ruumanna, wurru iami tawe nantulunggu Mawu?' ⁴⁵Ratu udde sarun sumimbakka, 'Asingcate: su tempo iamiu madiri mantulunggu sangkatou taumata asusane ereindi, ere lai iamiu madiri mantulungku.' ⁴⁶Ne manga taumata udde sarun iruumanna ringannu ruumanna ma'oma n sara malannu-lannu, arawe manga taumata apan tutturutta apulu Mawu Ruata sarun maappendamma pabbiakka tutune saran malannu-lannu."

Mangngaalla su saruannu Mawu Yesus

(Mrk. 14:1-2; Luk. 22:1-2; Yoh. 11:45-53)

26 Su tempo Mawu Yesus nasue mangngarra'u manga alarra'a udde, Itou nabbisara su manga mallarallengen-Ne, ²"Iamiu masingkatta tillorege Allo Wahewa m Paskah, wurru Ana'u Taumata sarun itantilla iapaarussa!"

³Su tempo udde manga imam tembonanne wurru piarra'u Yahudi maammulla su wale n araratuannu Imam Wahewa Kayafas. ⁴Imangitou ma'ire manametta Mawu Yesus ringannu malanna-lannaba, wurru mamate Sitou. ⁵"Arawe," unni mangitou, "imbarangnga olangnge udde olaanna su tempo allo wahewa, ana waugu takka maola'a hio su wallattu tumana'u soa."

Mawu Yesus niwoborrannu lana mawangngi su Betania

(Mrk. 14:3-9; Yoh. 12:1-8)

⁶Su tempo Mawu Yesus su Betania, su wale n Simon apan dorone uatatarangnga radda'a paro, ⁷sangkatou wawine nirumanta ringannu Mawu Yesus. Itou uaapiddu wotolla sambau, laorrone lana mawangngi apan maarega. Su tempo Mawu Yesus tantalanna uaianna u'anna, wawine udde namobokku lana mawangngi udde su pua Mawu Yesus. ⁸Manga mallarallengennu Mawu Yesus naasilo olangnge udde mangke namulo, "Apa hunane sarangkanambone indi mangke iradamme tawe mangalene?" unni mangitou. ⁹"Lana mawangngi udde wo-

tongnge iwaļu'a ringannu aregane apan masaggada, wuṛṛu roinne ionggolla su taumata asiangnga!"

¹⁰Mawu Yesus naasingkatta ringiṛṛanni mangitou, see Itou nabbisara, "Anio iamiu mapaasusa n wawine indi? Itou na'ola'a inolaanna apan mapia wuṛṛu mawantuga Sia'u. ¹¹Taumata asiangnga sidutu isudde su wallatti amiu, arawe Ia'u tawe maḷannu su sampunna ringanni amiu. ¹²Ringannu namobokku lana mawangngi udde su wadanku, itou na'ola'a saddia'u su pallaḷabingku. ¹³Pangimante! su ahewallu runia, suapan tampa Watti'u Aḷaḷuassa wuassu Mawu Ruata iapasingkatta, inolaannu wawine indi sarun iwatti'a lai maola'a pananaunganna Sitou."

Yudas maapulu mamate Mawu Yesus

(Mrk. 14:10-11; Luk. 22:3-6)

¹⁴See sangkatou wuassu wallattu sire mapuḷo dua mallaḷa-ṛṛenggenṛu Mawu Yesus, aranne Yudas Iskariot, inaita ringannu manga imam tembonanne. ¹⁵Itou nabbisara simangitou, "Apa sarun ionggolli amiu sia'u, amungkangngu ia'u manantillu Mawu Yesus siamiu?" Ne imangitou nandeengngu tallu m puḷo roitta saḷa'a, see nionggole roitta udde sitou. ¹⁶Nanattakka wuassu tempo udde Yudas maddea'a tempone apan mapia ipandaḷeo Mawu Yesus.

Mawu Yesus inumanna annu Paskah ringannu mallaḷarṛenggen-Ne

(Mrk. 14:12-21; Luk. 22:7-14, 21-23; Yoh. 13:21-30)

¹⁷Su allo paarorone su Allo Wahewa n Roti Tawe Ragine, manga mallaḷarṛenggenṛu Mawu Yesus nirumanta ringanni Tou. Imangitou naiwaḷo, "Suapa tampane ipaapulu n lamangnga iamii manaddia annu Paskah n lamangnga?"

¹⁸Mawu Yesus sinumimbakka, "Roote ringannu sangkatou su soa wuṛṛu waḷoa'a sitou, Tanata n lamangnga Huru, ina'omante tempone Sia'u, Ia'u maapulu maddamea m Paskah su waḷenu, su sampunna ringannu mallaḷarṛenggenṛu-Ku."

¹⁹Manga mallaḷarṛenggenṛu Mawu Yesus tinumuṛṛutte apa apan nirolokku Mawu Yesus simangitou. Imangitou inaita nanaddia annu Paskah.

²⁰Napawe ṛabbite, Mawu Yesus wuṛṛu sire mapuḷo dua mallaḷarṛenggenṛu-Ne inuma'iante wuṛṛu inumanna. ²¹Tantaḷanna imangitou

u'anna, Mawu Yesus nabbisara, "Paddaringikka: Sangkatou wuassu wal-latti amiu sarun mandaleo Sia'u."

²²Naaringikka aroddi, mallalarrengennu Mawu Yesus mangke nasa. See imangitou, sangkatou ringannu sangkatou nanattakke naiwalo Mawu Yesus, "Walnewe ia'u apan su pandumanni lamangnga udde?"

²³Mawu Yesus sinumimbakka, "Taumata apan nangammo n roti sulalummu mangko su sampunna ringanku, ete itou sarun mandaleo Sia'u. ²⁴Atonna Ana'u Taumata sarun mate ere uaworetta sulalummu Wuke Susi. Arawe nasilakate taumata apan mandaleo Ana'u Taumata! Mappianne taumata udde tawe niasungkangnga!"

²⁵See Yudas taumata laleo udde nabbisara, "Atonna walnewe ia'u apan pandumanni lamangnga Huru?"

Mawu Yesus sinumimbakka, "Aroddi ere su wisaranu!"

Saliwangngu Mawu

(Mrk. 14:22-26; Luk. 22:14-20; 1Kor. 11:23-25)

²⁶Su tempo imangitou u'anna, Mawu Yesus nanganute roti, see inumalomanna naadiangkamanna. Wua udde itou nattahiate roti ringannu lima-Ne nionggole su mallalarrenggen-Ne ringannu wisara-Ne, "Sengkampe, wurru ante; indi wadang-Ku."

²⁷Wua udde Itou nanganute mangko n anggore sambau, see naadiangkamante su Mawu Ruata. Wua udde Itou nangagillu mangko udde su mallalarrenggen-Ne ringannu wisara-Ne, "Pa'inumpe, iamiu sarangkanambone. ²⁸Ana waugu indi rarra-U apan mannohassa paaire Mawu Ruata rarra apan niapaturo ana waugu taumata nambo wurru ipangampungnga rosa mangitou. ²⁹Pangimante: Ia'u tate ma'inumma anggore indi apia ma'oma n sara tempone Ia'u ma'inumma anggore wakku su sampunna ringanni amiu su Araratuannu lamangku."

³⁰Wua udde imangitou nangantari n sambau antari daralo. Wurru wua udde imangitou inaite watukku Wuiddu Zaitun.

Papasingkatta manungku Petrus sarun massinaadu Mawu Yesus

(Mrk. 14:27-31; Luk. 22:31-34; Yoh. 13:36-38)

³¹See Mawu Yesus nabbisarate su mallalarrenggen-Ne, "Rabbi indi lai iamiu sarangkanambone tumalangnga manantang-Ku; ana waugu sulalummu Wuke Susi uaworetta, Mawu Ruata nabbisara, 'Ia'u sarun mamate mallalu'adda udde, wurru ammulannu dombane sarun mas-

saŋiawukka.' ³²Arawe napawe Ia'u niapawangunna apia, Ia'u sarun inai malliu roro siamiu su Galilea."

³³Petrus nabbisara Mawu Yesus, "Wala'e imangitou nambo manantangngu Iamangnga, ia'u tawe manantangnga!"

³⁴"Naunge," unnu Mawu Yesus sitou, "Rabbi indi lai, tantaŋanna manu'a taambe inumu'u, paatallute i'o massinaa-U."

³⁵Petrus sinumimbakka, "Salaiwe ia'u rinone mate ringannu Iamangnga, ia'u tawe mabbisara manungku ia'u tawe maailaŋa Iamangnga!"

Wurru manga mallalaŋrenggen-Ne waine nabbisara aroddi lai.

Mawu Yesus inumaŋiomanna su Getsemani

(Mrk. 14:32-42; Luk. 22:39-46)

³⁶Wua udde Mawu Yesus inaite ringannu manga mallalaŋrenggen-Ne su sambau tanpa aranne Getsemani. Poiaroddi Itou nabbisara simangitou, "A'iante isindi tantaŋanna Ia'u inai umaŋiomanna." ³⁷See Itou nangahe si Petrus wurru rua ng katou ana'i Zebedeus inai su sampunna ringanni Tou. Itou nanattakke maapendamma susa wurru susinggawangnga. ³⁸Itou nabbisara su mallalaŋrenggen-Ne, "Naungku tumanite massusa, pendamanna ere matete. Atana'e iamiu isindi, wurru pandiagate su sambau ringang-Ku."

³⁹Wua udde Mawu Yesus inaite marau addio'a, see Itou inumaŋintuda su leta'a wurru inumaŋiomanna. "Iamangnga," wisara-Ne, "amungkanngu wotongge, paaraua'a wuassia'u asasusa apan marria'a Sia'u indi. Arawe arie tumuruttu apulu-U, arawe tumuruttu apulu n Iamangnga sassane."

⁴⁰Wua udde Mawu Yesus nabelengke apia ringannu sire tallu mallalaŋrenggen-Ne, wurru inaratinganna imangitou mattiilla. Itou nabbisara si Petrus, "Tumba'u sangka orassa, iamiu n tallu tawe maatarangnga mandiaga ringang-Ku? ⁴¹Paariagate wurru aŋiomante tadea'u iamiu tawe maasomba wawono'a. Atonna gharrahonu maapulu ma'ola'a apapia, arawe iamiu tawe maatarangnga ana waugu pallaŋagu n taumata udde lome."

⁴²Apia lai Mawu Yesus inaite inumaŋiomanna, wisara-Ne, "Iamangnga, amungkanngu asasusa indi sarun marria'a Sia'u wurru tate iaŋinda'a, apulu-Nu ariadite Iamangnga." ⁴³Wua udde Mawu Yesus nabelengke apia, wurru inaratinganna mallalaŋrenggen-Ne ta'e mattiilla, ana waugu imangitou tumanite n aamatiilanna.

⁴⁴Apia lai Mawu Yesus nanantangngi mangitou wurru su atallunete lai inumaŋiomanna nabbisara wisara apan uasuŋungnga. ⁴⁵Wua udde Itou nabelengke apia ringannu mallalaŋrenggen-Ne wurru nabbi-

sara, "Ta'e lai mattiilla iamiu wurru mangngillo Pa'ellega, nia'omante tempone Ana'u Taumata itantilla su lima n taumata marosa. ⁴⁶Pabbangunte, wette iite inaite. Pa'ellega! Taumata apan mandaleo Sia'u uddete!"

Mawu Yesus sinametta

(Mrk. 14:43-50; Luk. 22:47-53; Yoh. 18:3-12)

⁴⁷Tantalanna Mawu Yesus ta'e uahahatto, Yudas, sangkatou wua-ssu wallattu sire mapulo dua mallalarrenggen-Ne udde nirumanta. Sua-ddio'a ringanni tou, nirumanta lai taumata manambo apan uaapiddu halele wurru papuulla. Imangitou nirolokku manga imam tembonanne, wurru piarra'u Yahudi. ⁴⁸Iapa mandaleo, suete nabbafo simangitou tatialane indi, "Taumata apan ta'u ari'anna, eteudde taumata-Ne. Same-tte Itou!"

⁴⁹Aroddi na'omate su tampa udde, Yudas lapiddu inai ringannu Mawu Yesus wurru nabbisara, "Tabea, lamangnga Huru!" See itou nangaria'a Mawu Yesus.

⁵⁰Mawu Yesus sinumimbakka, "Turrangnga, apa pandumannu rumanta isindi?"

Wua udde taumata nambo udde nilumempangnga lapiddu nanametta Mawu Yesus. ⁵¹Su wallattu mallalarrenggen-Ne pia sangkatou isudde lai ringannu Mawu Yesus, nanawutta halelene wurru namilitta allangngu imam wahewa udde na'oma n sara talingane nattaiei. ⁵²Mawu Yesus nabbisara su mallalarrenggen-Ne udde, "Sutta'e apia halelenu su romane, ana waugu anambo n taumata apan ahide halele sarun pateannu halele. ⁵³Su naungngu Ia'u tawe maarorongnga tulunganna wuassi lamangku, wurru Itou ringannu malihakka mandolokku mapulo dua pia lebbene wageangngu tantara mala'ekatta? ⁵⁴Arawe amungkangngu aroddi, ere-apa wotongnge mariaddi maola'a ere suete niapaasingkatta sulalummu Wuke Susi manungku rinone sarun mariaddi ere su orassa indi?"

⁵⁵See Mawu Yesus nabbisara su taumata manambo udde, "Apa Ia'u indi taumata laleo, na'oma n sara iamiu nirumanta ringannu uaapiddu halele wurru papuulla ipanametta Sia'u? Miallo-miallo Ia'u mangngarra'a su Wale Mawu, arawe iamiu tawe manametta Sia'u. ⁵⁶Arawe atonna narriote aroddi tadea'u matipusse apa apan uiworrettu manga nabi sulalummu Wuke Susi."

Wua udde, manga mallalarrenggen-Ne tinumalangke nanantangngu Mawu Yesus.

Mawu Yesus su saruannu Mallaṛṛuungngu Agama

(Mrk. 14:53-65; Luk. 22:54-55, 63-71; Yoh. 18:13-14, 19-24)

⁵⁷Manga taumata apan nanametta Mawu Yesus nangapidde Mawu Yesus su waḷe n Imam Wahewa Kayafas. Poiaroddi manga huru n agama wuṛṛu piarṛa'u Yahudi uaammulle. ⁵⁸Petrus uantantalongnga Mawu Yesus wuassu marau na'oma n sara su passalangannu waḷe n imam wahewa. See Petrus sinumuttate su passalanganna, wuṛṛu inuma'ianna su sampunna ringannu mandariaga. Itou maapulu maa-singkatta ereapa panginsueanne sarangkanambone udde. ⁵⁹Manga imam tembonanne wuṛṛu anambo Mallaṛṛuungngu Agama mangke mam-mata'a maasomba tatiala awusu apan wotongnge maṛṛawessa manungku Mawu Yesus iṛṛuumanna ma'oma n sara mate. ⁶⁰Arawe imangitou tawe maasomba saran sambau pasasaḷa, salaiwe manambo apan nirv-manta mattiala awusu. Panginsueanne pia rua ng katou nirumanta su sa-ruanne. ⁶¹Imangitou nabbisara, "Taumata indi mabbisara, 'Ia'u wotong-nge mapaarṛa'a n Waḷe Mawu, wuṛṛu sulaḷummu tallu allo wotongnge mapararisikka apia.'"

⁶²See imam wahewa nirumarisikka, wuṛṛu nabbisara Mawu Yesus, "Apa I'o tawe sumimbakka alae apan ipa'iwaḷo Si'o?" ⁶³Arawe Mawu Yesus maḷannaba. Paassa lai imam wahewa nabbisara Sitou, "Ringannu arannu Mawu Ruata apan wiakka, Waḷoa'e siami apa ete I'o Ratu m Punnu Saḷamatta, Ana'u Mawu Ruata?"

⁶⁴Mawu Yesus sinumimbakka, "Aroddite ere su wisaranu. Arawe pangimante: manattakka orassa indi iamiu sarun maasilo Ana'u Tau-mata uma'ianna su samba'a n uanannu Mawu Ruata Lembo Matarṛino, wuṛṛu rumanta sulaḷummu winabbawa wuassu langitta!"

⁶⁵Ne imam wahewa udde nanggesa'a laungnge, wuṛṛu nabbisara, "Itou mangngaddio'a Mawu Ruata! Tawe gunane lai madea'a sakassi. Iamiu sarangkanambone suete naaringikka sassane manga wisara apan ipangngaddio'a Mawu Ruata.

⁶⁶Orassa indi ereapa adapatti amiu?"

Imangitou sinumimbakka, "Itou nassaḷa wuṛṛu ṛinone pateanna."

⁶⁷See imangitou nangaddu hati Mawu Yesus, wuṛṛu namuulla Sitou. Piaddu lai namero Sitou, ⁶⁸wuṛṛu nabbisara, "Si'ata'a wuṛṛu pasingkata'a siami, ei Ratu m Punnu Saḷamatta! Isai namero Si'o?"

Petrus nassinaaddu Mawu Yesus

(Mrk. 14:66-72; Luk. 22:56-62; Yoh. 18:15-18, 25-27)

⁶⁹Petrus tantaḷanna ua'ianna su liudde, su rallakka. Sangkatou mangangimbe wawine wuassu wallattu wawine isudde nirumanta, wuṛṛu nabbisara Petrus, "Waḷinewe i'o lai su sampunna ringannu Mawu Yesus taumata n Galilea udde?"

⁷⁰Arawe Petrus nassinaadda su saruanni mangitou sarangkambone, "Ia'u wagga apa pandumannu," sasimbakki Petrus, see itou inaite watukku ngara m passalanganna. ⁷¹Sangkatou mangangimbe wawine apan waine lai naasilo si Petrus, wuṛṛu nabbisara su manga taumata isudde, "Taumata indi lai tanginna su sampunna ringannu Mawu Yesus wuassu Nazaret udde!"

⁷²See Petrus nassinaadde apia, wuṛṛu nassalu. "Atonna-tonna ia'u wagga n taumata udde!" unni Petrus.

⁷³Tawe naḷannu wua udde, manga taumata apan uarisikka isudde nirumanta ringanni Petrus, wuṛṛu nabbisara, "Atonna-tonna i'o sangkatou wuassu wallatti mangitou. Udde naillaḷanna wuassu pabbawisanu."

⁷⁴See Petrus nanattakke mangke massalu wuṛṛu mabbisara, "Ia'u wagga n taumata udde!"

Orassa udde lai manu'a inumuute. ⁷⁵Wuṛṛu Petrus naanaungke manungku Mawu Yesus suete nabbisara sitou, "Tantaḷanna manu'a taambe niumu'u, i'o paatallute massinaa-U." See Petrus sinumabangnga, wuṛṛu nilumuaite ringannu massusa.

Mawu Yesus niapidda ringanni Pilatus

(Mrk. 15:1; Luk. 23:1-2; Yoh. 18:28-32)

27 Ruaallo atonna, manga imam tembonanne wuṛṛu piaṛṛa'u Yahudi narrawesse manungku Mawu Yesus pateanna. ²Imangitou narṛapussa Sitou, wuṛṛu nangapiddi Tou, see tinantilla si Pilatus, gubernure n araratuannu Roma.

Apapate n Yudas

(WMR. 1:18-19)

³Napawe Yudas mandalaḷeo udde naasilo manungku Mawu Yesus suete nianggiḷannu ṛumanna, itou sinumassille. See itou nangulete n roitta tallu m puḷo roitta saḷa'a udde su manga imam tembonanne wuṛṛu

piarra'u Yahudi. ⁴Itou nabbisara, ia'u suete na'ola'a rosa nandaŕeo taumata tawe saŕane, na'oma n sara Itou nirruumanna pateanna!

Arawe imangitou sinumimbakka, "Masingkattu apa iami? Udde singkannu!"

⁵Yudas nallombo n roitta udde sulaŕummu Waŕe Mawu, see napuŕe wuŕru nangele n watanganne.

⁶Manga imam tembonanne namurutta roitta udde wuŕru nabbisara, "Roitta indi roitta ɾarra. Tumuruŕuttu atorannu agama, roitta indi tawe wotongnge itarŕo sulaŕummu tampa n aonggolla su Waŕe Mawu." ⁷See napawe imangitou na'irete, imangitou nappaatte n roitta udde nipamalli leta'a apan nisaggo Leta'u Maaola'a Urinna. Leta'a udde nipaatta pallabingannu taumata raho. ⁸Ana waugu udde na'oma n sara allo indi leta'a udde nisaggo "Leta'a ɾarra".

⁹Ringannu aroddi, natipusse apa apan suete niapasingkatti Nabi Yeremia, eteudde, "Imangitou nanengkamma tallu m puŕo roitta saŕa'a, eteudde arega apan suete pina'ire m pabbawalagu Israel maola'a wawaekki Tou. ¹⁰Wuŕru roitta udde suete nipaatti mangitou pinamalli leta'u maaola'a urinna, ere apa apan suete niparenta Mawu sia'u."

Pilatus namarikissa hatto Mawu Yesus

(Mrk. 15:2-5; Luk. 23:3-5; Yoh. 18:33-38)

¹¹Su tempo Mawu Yesus sinumaruanna Pilatus, gubernure su wanua udde, Pilatus naiwaŕo, "Apa i'o ratu n taumata n Yahudi?"

"Ere su wisaranu," sinimbakku Mawu Yesus. ¹²Arawe su tempo manga imam tembonanne wuŕru piarra'u Yahudi napasabangngu anambo n alae su ola'u Mawu Yesus, Itou tawe sinumimbakka saran addio'a.

¹³Ana waugu udde Pilatus nabbisara Sitou, "Apa I'o tawe maaringikka aŕawo'u alae mangitou ipangalaenu?"

¹⁴Arawe Mawu Yesus tawe sinumimbakka saran addio'a na'oma n sara gubernure udde mangke naherangnga atonna.

Mawu Yesus irruumanna pateanna

(Mrk. 15:6-15; Luk. 23:13-25; Yoh. 18:39-19:16)

¹⁵Su anambo n Ramea m Paskah, gubernure inaramanne mammallossu sangkatou ruumanna tumuruŕuttu apulu n awadaalla. ¹⁶Su tempo udde pia sangkatou ruumanna apan niasingkatante n taumata nambo. Aranne Yesus Barabas. ¹⁷Nariaddi, su tempo taumata nambo

naammulle, Pilatus naiwaḷo simangitou, "Isai su apulu ng kamiu, ta'u ipallossa? Yesus Barabas ara'e Mawu Yesus apan isassaggo lai Kristus?" ¹⁸Pilatus nabbisara aroddi ana waugu itou masingkatta manungku manga tembonannu Yahudi nanantillu Mawu Yesus sitou ana waugu imangitou tawe maḷuassa sitou.

¹⁹Su tempo Pilatus tantaḷanna ua'ianna su waḷe m pamarikisanna, awingnge nananata sitou ereindi, "Arie i'o lumalo'a su hatto n taumata apan tawe saḷane udde, ana waugu ete Itou, ia'u niwaḷiawannu waḷiawa apan maata'utta allo indi." ²⁰Arawe manga imam tembonanne wurru piaḷḷa'u Yahudi mangke mammata'u taumata nambo udde, iaparorongnga si Pilatus tadea'u Barabas ipallossa wurru Mawu Yesus iḷḷuumanna sara mate. ²¹See gubernure udde naiwaḷo apia simangitou, "Wuassu wallatti tarua indi, isai sarun ipallossa tumuḷḷuttu apulu ng kamiu?"

"Barabas," sasimbakki mangitou.

²²"Amungkangngu aroddi, ia'u ḷinone ma'ola'a apa su Mawu Yesus apan isassaggo Kristus?" aiwaḷo m Pilatus simangitou.

"Arussa'a Itou!" sasimbakki mangitou sarangkanambone.

²³"Arawe apa aḷaḷeone?" aiwaḷo m Pilatus.

See imangitou inumui lembo n aikkanne lai, "Arussa'a Itou!"

²⁴Panginsueanne Pilatus naatutukka, manungku itou tawe wotongnge maaola'a apa-apa lai wurru manungku manga taumata udde asinungka sarun mamangalo. Nariaddi itou nanganu ua'e, see su saruannu taumata nambo udde itou nangukkassa limane wurru nabbisara, "Ia'u tawe saḷane su apapate n taumata indi! udde manarate ng kamiu!"

²⁵Awadaalla udde sinumimbakka, "Ore, wala'e siami wurru manga aḷaḷḷana'i ami mamasanna ḷuumanna wuassu papate-Ne!"

²⁶See Pilatus namallose m Barabas simangitou, wurru nandolokku taumata namuulla Mawu Yesus; wurru nanantilli Tou niapaarussa.

Manga tantara mannalangnga Mawu Yesus

(Mrk. 15:16-20; Yoh. 19:2-3)

²⁷Wua udde manga tantara m Pilatus nangapidde Mawu Yesus sumutta su waḷe n gubernure, wurru anambo n tantara udde naammulla namaḷiwutta Mawu Yesus. ²⁸Imangitou nalluatta laubbu Mawu Yesus, wurru nilluḷḷeannu jubah ungu. ²⁹Imangitou na'ola'a sambau araposa mararatu wuassu manga ranna ng kalu ḷoaanna wurru niluḷḷe su pua Mawu Yesus. Wua udde imangitou nangagillu ta'inna su lima aikkatan-Ne, see inumaḷintuda su saruan-Ne wurru mangngaḷuandaga Sitou. "Tabea ratu n taumata n Yahudi!" unni mangitou. ³⁰Imangitou nangaddu Sitou, wurru nanganu ta'in-Ne udde, see nipuulla su pua-Ne.

³¹Napawe suete nannalangnga Sitou, imangitou nalluatte jubah ungu udde see nillurante n laung-Nge apia. Wua udde Itou niapidde su liudde ana iarussate.

Mawu Yesus niarussa

(Mrk. 15:21-32; Luk. 23:26-43; Yoh. 19:17-27)

³²Su tangnga n dalanna, imangitou nassomba n sangkatou wuassu Kirene aranne Simon. Imangitou namata'u taumata udde mamasanna alu arussa Mawu Yesus. ³³Wua udde imangitou na'omate su sambau tampa apan isassaggo Golgota, atappasanne "Tampa n Tanggila". ³⁴Isudde imangitou napa'inummu anggore su Mawu Yesus apan nilo'annu paddu. Arawe napawe Mawu Yesus naattemma anggore udde, Itou madiri ma'inumma.

³⁵Wua udde imangitou nangarussate n Tou, wurru nattia laung-Nge ringannu niundi. ³⁶Wua udde imangitou inuma'ianna mandiaga Sitou poiarddi. ³⁷Su pua-Ne imangitou nangado n worretta su ola'u pinangalae n Tou eteudde: "Indiwe Mawu Yesus ratu n taumata n Yahudi". ³⁸Su sampunna ringanni Tou, imangitou nangarussa n rua ng katou lai tarra rampassa; sangkatou su samba'a uanan-Ne, wurru sangkatou lai su samba'a airri-Ne.

³⁹Manga taumata apan sinumabbi isudde mangke uapapa'ilingnga wurru mangngaddio'a Mawu Yesus. ⁴⁰Imangitou mabbisara, "I'o apan manggohakku Wale Mawu, wurru mapararisikka apia sula'ummu tallu allo! Amungkangngu I'o Ana'u Mawu Ruata, lintukke wuassu alu arussa udde, wurru pana'amatte riri-Nu!"

⁴¹Aroddi lai imam tembonanne wurru manga huru n agama see lai manga piarra'u Yahudi mangngaluandaga Mawu Yesus. Imangitou mabbisara, ⁴²"Itou manalamatta taumata waine, arawe riri-Ne sassane tawe iasalamatti Tou! Amungkangngu Itou ratu n taumata n Israel, mappianne Itou orassa indi sumossokka wuassu alu arussa udde, wakkute udde iami mangngimanna Sitou. ⁴³Itou mangngimanna Mawu Ruata wurru mabbisara manungku Itou Ana'u Mawu Ruata. Ne, wette iite ma'ellega tanne Mawu Ruata manalamatta Sitou orassa indi."

⁴⁴Manga tarra pate apan uarussa ringanni Tou udde lai, ewe'e mangngaluandaga lai Sitou.

Apapate Mawu Yesus

(Mrk. 15:33-41; Luk. 23:44-49; Yoh. 19:28-30)

⁴⁵Su allo allatune, alannune tallu ng ka'orassa ahewallu wanua udde naddandumma. ⁴⁶Puulla tatallu wawallo, Mawu Yesus nangintu'i

ringannu tingikka ma'ikkatta, "Eli, Eli, lama sabakhtani?" atappasanne, "Oh Mawu, Oh Ruata-U, anio I'o nanantang-Ku?"

⁴⁷Sire pira taumata isudde naaringikka aintuḷi udde, wuḷḷu nabbisara, "Itou mammaggo si Elia!" ⁴⁸Sangkatou wuassi mangitou ringannu maḷihakka nanganu wunga n sahatta, wuḷḷu inammo sulaḷummu anggore mapakkadda. Wua udde itou nangusu'u pentakku alu sampaddi su wunga n sahatta udde wuḷḷu tinogokka su wiwikku Mawu Yesus.

⁴⁹Arawe manga taumata waine nabbisara, "Paḷḷado, wette iite ma'ellega asinungka Elia rumanta manaḷamatta Sitou!"

⁵⁰Wua udde Mawu Yesus nangintuḷi apia ringannu tingikka apan ma'ikkatta, see sinumangngo n sasangngo panginsueanne.

⁵¹Pampele apan ua'ele sulaḷummu Waḷe Mawu nahesa'a natahia darua, wua doso na'oma n sara wowane. Runia inumio'a wuḷḷu manga wuiddu watu napesangnga. ⁵²Manga laḷabinganna nawu'a, wuḷḷu manambo laḷorḷo n araratuannu Mawu Ruata apan natete nabbiakka apia. ⁵³Imangitou sinumabangnga wuassu manga laḷabinganna napawe Mawu Yesus nabangunte wuassu papate, wuḷḷu imangitou sinumuttate su Yerusalem. Wuḷḷu poiaroddi manambo taumata naasilo simangitou.

⁵⁴Tembonannu tantara wuḷḷu manga tantara apan tantaḷanna uariaga Mawu Yesus, mangke matta'utta su tempo naappendamma linukka wuḷḷu aḷawo'u apa apan suete nariaddi udde. Imangitou nabbisara, "Atonna, Itou indi Ana'u Mawu Ruata!"

⁵⁵Isudde pia lai manambo wawine apan ua'ellega wuassu marau. Ete imangitou udde apan suete tinumantalongnga Mawu Yesus, nantuḷungngi Tou ro'e n wuassu Galilea. ⁵⁶Su wallatti mangitou eteudde Maria Magdalena, Maria inangngi Yakobus wuḷḷu Yusuf, wuḷḷu inangngu aḷarḷana'i Zebedeus.

Pallaḷabingngu Mawu Yesus

(Mrk. 15:42-47; Luk. 23:50-56; Yoh. 19:38-42)

⁵⁷Rabbi udde nirumantate sangkatou taumata ala wuassu Arimatea, aranne Yusuf. Itou lai sangkatou mallaḷarḷrenggennu Mawu Yesus. ⁵⁸Itou inaita ringanni Pilatus, wuḷḷu naddorongnga winaḷunannu Mawu Yesus. See Pilatus namarentate tadea'u winaḷunannu Mawu Yesus ionggolla si Yusuf. ⁵⁹Ne, Yusuf nanganute winaḷunanna udde, wuḷḷu pinapi'unnu maḷarḷrenessa wuassu linen apan wakku. ⁶⁰See itou nanga-dote n winaḷunannu Mawu Yesus sulaḷummu laḷabinganna wageangne sassane apan suete niola'a su sambau wowo n watu. Wua udde itou nanaḷinggi n sambau watu pinalindumma ngara n laḷabinganna udde,

see napulete. ⁶¹Maria Magdalena wuṛṛu Maria apan waine tinangngone ua'ianna uasaruanna labingnga udde.

Manga mandariaga su laḷabinganna

⁶²Su tiṛṛabbine, su allo n Sabatta, manga imam tembonanne wuṛṛu manga taumata n Farisi inaita su sambau sinumaruanna si Pilatus ⁶³wuṛṛu nabbisara, "Mawu, iami maanaungnga su tempo taṛṛa awusu udde ta'e wiakka, Itou suete nabbisara, 'Napawe tallute allo Ia'u sarun mabangunna apia.' ⁶⁴Ana waugu udde roloṛṛa'e taumata mandiaga laḷabinganna udde mapia-pia ma'oma n sara allo atallune, tadea'u mal-laḷarṛenggen-Ne tawe maapanna'o winaḷunan-Ne see mabbaḷo manga taumata manungku Itou nabangunte wuassu papate. Wuṛṛu pangangawusu panginsueanne indi sarun araleoanne wuassu paarorone."

⁶⁵"Iamiu pia tantara mandariaga," unni Pilatus si mangitou, "roote pandiaga laḷabinganna udde paapia-pia."

⁶⁶See imangitou inaita watukku laḷabinganna, nanegella watu laḷindumme wuṛṛu nangado mandariaga su saruane, tadea'u tawedu maawu'a laḷabinganna udde.

Pabawangunnu Mawu Yesus

(Mrk. 16:1-10; Luk. 24:1-12; Yoh. 20:1-10)

28 Napawe allo n Sabatta naliudde, su allo Misa ruaallo atonna, Maria Magdalena wuṛṛu Maria apan waine inaita na'ellega laḷabinganna udde. ²Inaṛṛombanganne pia limukka apan wahewalla. Sangkatou mala'ekattu Mawu sinumossokka wuassu surga see namilingngu watu laḷindumme udde, wuṛṛu inuma'ianna su wowone. ³Hati Mala'ekatta udde naalihipida sawallo wuṛṛu laungnge mawira atonna. ⁴Tantara mandariaga apan uariaga isudde mangke nata'utta na'oma n sara imangitou mangngindo, wuṛṛu naalihipide ere taumata nate.

⁵Mala'ekatta udde nabbisara manga wawine udde, "Arie paata'utta! ia'u masingkatta iamiu maddea'a Mawu Yesus apan suete marussa udde. ⁶Itou tate baddi'a isindi. Itou nabangunte ere suete mapasingkan-Ne rorone. Wette pa'ellega tanpa milallowangan-Ne. ⁷Orassa indi roote paaliha-lihakka, pasingkata'a su mallalaṛṛenggen-Ne, 'Itou nabangunte, wuṛṛu orassa indi Itou inaita malliu roro wuassi amiu su Galilea. Poiaroddi iamiu sarun maasilo Sitou!' Paanaungete apa apan suete ta'u miwaḷo siamiu."

⁸Maliha-lihakka manga wawine udde nanantangngu laḷabinganna udde. Ringannu apendamma matta'utta ualaḷo'a n laḷuassa, imangitou tinumalaḅngnga naniasingkattu olangnge udde su mallalaḅḅrenggennu Mawu Yesus.

⁹Inaḅḅrombanganne Mawu Yesus nirumanta naisasomba manga wawine udde, wuḅḅu nabbisara, "Tabea!" See imangitou nirumanta nangundani n Tou, wua udde naḅḅa'uppa ledda-Ne wuḅḅu nassubba Sitou. ¹⁰"Arie paata'utta," wisara Mawu Yesus simangitou, "roote waḷoa'a su manga tuḅḅrangku, tadea'u imangitou inai su Galilea, poiaronddi imangitou sarun maasilo Sia'u."

Tantara mandariaga nangalae su manga imam tembonanne

¹¹Tantalanna manga wawine udde napuḷete, manga pira wuassu tantara mandariaga apan uariaga laḷabinganna udde nabelengke watukku soa wuḅḅu nangalae su manga imam tembonanne anambo n apa apan suete nariaddi. ¹²Manga imam tembonanne udde na'irete ringannu manga piaḅḅa'u Yahudi, see nangagille n roitta apan manambo su mandariaga laḷabinganna udde, ¹³wuḅḅu nabbisara, "Iamiu ḅinone mabbatti'a manungku mallalaḅḅrenggennu Mawu Yesus nirumanta su tempo ḅabbi wuḅḅu nanna'o winalaḅunan-Ne su tempo iamiu mattiilla. ¹⁴Wuḅḅu amungkangngu gubernure maaringikka olangnge udde, iami sarun massaḷo'i tou tadea'u iamiu tawe maasomba asasusa apa-apa."

¹⁵Ne manga tantara mandariaga udde nanganute roitta, wuḅḅu na'ola'e ere suete nitanata simangitou. Ana waugu udde watti'a indi sidutu ta'e iwabatti'a su pattangngannu taumata n Yahudi na'oma n sara allo indi.

Mawu Yesus natingkapisilo m batangan-Ne su mallalaḅḅrenggen-Ne

(*Mrk 16:14-18; Luk 24:36-49; Yoh 20:19-23; WMR 1:6-8*)

¹⁶Sire mapuḷo assa mallalaḅḅrenggennu Mawu Yesus udde inaite watukku wuidda su Galilea ere suete nirolokku Mawu Yesus simangitou. ¹⁷Su tempo imangitou naasilo Mawu Yesus poiaronddi, imangitou inumalaḅintuda nassubba Sitou. Arawe su wallatti mangitou ta'e piaddu lai hugago'a. ¹⁸Mawu Yesus nangundani mangitou wuḅḅu nabbisara, "Anambo n taḅḅino su surga wuḅḅu su runia suete tinantilla Sia'u. ¹⁹Ana waugu udde roote su anambo n taumata su wowo n runia indi, ola'e

imangitou mallarṛenggeng-Ku. Sarṛanite imangitou ringannu arannu lamangnga, wurṛu Ana'a, wurṛu Gharṛaho Mawu Ruata. ²⁰Arṛa'ete imangitou tutturṛutta anambo n parenta apan suete niparenta-U siamiu. Wurṛu paanaunge, Ia'u sarun marṛundinganna siamiu saran panginsue-annu runia indi."

WATTI'U ALALUASSA APAN NIAPASINGKATTI MARKUS

WISARA TALAANE

Wuke m Watti'u Alaluassa wuassi *Markus* nitattakka ringannu pangau-anna: "Ete indi Watti'u Alaluassu Mawu Yesus Kristus, Ana'u Mawu Ruata". Sulalummu Watti'u Alaluassa udde, Mawu Yesus niapaliatta'a ere sangkatou apan manambo manara-Ne wurru masarraungnga. Sarraung-Nge udde inumaliatta'a sulalummu ereapa Itou manggarra'a, sulalummu tarriino-Ne su manga gharraho laleo, wurru pangangampungnga rosa. Mawu Yesus napaaliatta'u watangan-Ne ere sangkatou Ana'u Taumata apan nanantillu niawa-Ne, tadea'u taumata maliu wuassu rosa.

Watti'a su ola'u Mawu Yesus su wuke indi tinala'a wuassu arariadi-Ne, wurru mangke masema-semakka. Manga pallalagu-Ne anamboanne a'olaanna su wisara wurru su alarrang-Nge. Nanansunna wuassu manga wisara panattaranne apan maoutta su ola'i Yohanes Mananarriani wurru su ola'u pananarriani Mawu Yesus see wawono'a su riri-Ne, wuke *Markus* indi lapiddu mabatti'u pamamanara Mawu Yesus, nangillembu su manga inolaanna mapaapia n taumata marada'a apan suete niolang-Nge wurru su ola'u alarrang-Nge. Su wageangnge panginsueanne nabbati'a su ola'u arariadianna apan nariaddi su sangkamisa panginsueanne su allo m pabbarannu Mawu Yesus su runia indi, nangillembu su ola'u watangan-Ne niarussa wurru pabawangun-Ne wuassu papate.

Rua ng kawageanganna panginsueanne wuassu wuke *Markus*, apan sinutta sulalummu kurungnga wahewa, sarangkanambone sassunnanna waline worrettu mamamorrettu wuke *Markus*, arawe wuassu sangkatou taumata waine.

Lalorrone

Panattaranne	1:1-13
Manara Mawu Yesus su pattangngannu taumata su Galilea	1:14-9:50
Wuassu Galilea watukku Yerusalem	10:1-52
Sangkamisa panginsueanne su Yerusalem wurru su soa maranine	11:1-15:47
Pabawangunnu Mawu Yesus	16:1-8
Mawu Yesus namasilo m batangan-Ne wurru asasengkeng-Nge watukku surga	16:9-20

Nase n Yohanes Mananarrani

(Mat. 3:1-12; Luk. 3:1-18; Yoh. 1:19-28)

1 Ete indi Watti'u Aļaļuassa su ola'u Mawu Yesus Kristus, Ana'u Mawu Ruata. ²Watti'u Aļaļuassa udde nanattakka ere suete niwořretti Nabi Yesaya, arendi,

"Ete indi ralořorang-Ku,' wisara Mawu Ruata;

'Ia'u nandolokki tou malliu řoro wuassi'o,

tadea'u itou mamu'a laļan-Nu.'

³Pia taumata u'aliata su wadda'a,

'Saddiaite laļannu Mawu

ratařra'e manga laļanna apan amatan-Ne."

⁴Ere lai uawořretta udde, aroddi lai Yohanes nirumanta su wadda'a. Itou mannarani taumata wuřru mammasingkattu watti'a wuassu Mawu Ruata. "Awaļute iamiu wuassu manga rosanu, wuřru řinone sarřanianna, tadea'u Mawu Ruata mangampungnga siamiu," aroddi unni Yohanes. ⁵Anambo n taumata wuassu wanua n Yudea wuřru soa n Yerusalem matudda maddaringikka Yohanes. Imangitou nanga'u manga rosa mangitou, see Yohanes nanarřanite simangitou su Saļukku Yordan.

⁶Yohanes ualuřre n laubba wuassu wambuļu n unta. Papeřrenne wuassu pisi m winatangnga, wuřru wiakke aļumbati'a wuřru puļa n ahuranganna. ⁷Itou namasingkattu watti'a indi, "Řaddoi wuassia'u sarun rumanta taumata apan maggewaļanna wuassia'u. Umaruutta mamu'a taļi n sapatu-Ne lai ia'u tawe su řinone. ⁸Ia'u mannarani siamiu ringannu ua'e, arawe Itou sarun mannarani siamiu ringannu Ghařraho Mawu Ruata."

Yohanes nanarřani Mawu Yesus

(Mat. 3:13-17; Luk. 3:21-22)

⁹Su tempo udde Mawu Yesus nirumanta wuassu Nazaret su wa-geangngu leta'u Galilea, wuřru Yohanes nanarřani Sitou su Saļukku Yordan. ¹⁰Aroddi Mawu Yesus nilumapputta wuassu saļukka udde, Itou naasilo langitta nawu'a wuřru Ghařraho Mawu Ruata naaļihida ere manu'a merpati inumonto'a Sitou. ¹¹Wua udde niaringikka tingikku Mawu Ruata nabbisara, "Ete I'o Ana-U apan arangnguang-Ku. I'o maaļuassa naung-Ku."

Mawu Yesus niwono'annu Setanna

(Mat. 4:1-11; Luk. 4:1-13)

¹²Wua udde Gharraho Mawu Ruata lapiddu nangapiddu Mawu Yesus su wadda'a. ¹³Appattu puḷo su allone Itou isudde, wabono'annu Setanna. Manga winatangnga matengnga, isudde lai su sampunna ringanni Tou, wuḷḷu manga mala'ekatta sidutu lai mangngimbe Sitou.

Mawu Yesus namago sire appata samakka

(Mat. 4:12-22; Luk. 4:14-15, 5:1-11)

¹⁴Napawe Yohanes nirruumante, Mawu Yesus inaite su Galilea, wuḷḷu namasingkattu Watti'u Aḷaḷuassa wuassu Mawu Ruata poiarddi. ¹⁵Wisara-Ne, "Tempone nia'omante Mawu Ruata mamarenta. Awaḷute wuassu manga rosanu, wuḷḷu pangimante Watti'u Aḷaḷuassa wuassu Mawu Ruata!"

¹⁶Su tempo Mawu Yesus u'amatta su winggi n Rano n Galilea, Itou naasilo rua ng katou samakka, eteudde Simon wuḷḷu tuarine Andreas. Itarua tantaḷanna mannoma inassa su rano. ¹⁷Mawu Yesus nabbisara simangitou, "Tantalongke Sia'u. Ia'u sarun mangarra'a siamiu mannoma taumata." ¹⁸Itarua lapiddu nanantangngu soma mangitou see tinumantalongke Mawu Yesus.

¹⁹Mawu Yesus lapiddu inumamatta, see naasilote lai rua sangkatuḷḷangnga apan waine eteudde Yakobus wuḷḷu Yohanes, aḷarra'ana'i Zebedeus. Imangitou sulaḷummu saalanna, wuḷḷu tantaḷanna mannopia soma. ²⁰Mawu Yesus lapiddu namago sitarua. Ne itarua nanantangke n iamanggi mangitou sulaḷummu saalanna ringannu manga taumata n sewa mangitou. See itarua inaite tinumantalongka Mawu Yesus.

Taumata apan niasuttannu gharraho laḷeo

(Luk. 4:31-37)

²¹Mawu Yesus wuḷḷu manga mallaḷarḷenggen-Ne na'omate su soa Kapernaum. Su allo n Sabatta manansunna, Mawu Yesus sinumutta su waḷe m pattataḷḷamawuanna wuḷḷu nanattakke mangngarra'a. ²²Manga taumata apan uararingikka Sitou mangke naherangnga su ola'u ere-apa Itou mangngarra'a. Ana waugu, Itou mangngarra'a ringannu sarraungnga, tawe ere pangangarra'u huru n agama.

²³Su tempo udde sangkatou apan niasuttannu ghaṛṛaho laḷeo sinumutta sulaḷummu waḷe m pattataṛṛamawuanna wuṛṛu u'ui. ²⁴"Ei Yesu, taumata Nazaret, I'o maapulu ma'ola'a apa ringanni ami? I'o rumanta mamate siami? Ia'u masingkatta isai I'o: Ete I'o raloḷoṛṛanna apan na'ukkassa wuassu Mawu Ruata!"

²⁵"Paaḷannaba!" Mawu Yesu nandona ghaṛṛaho udde, "Sabbangke wuassu taumata indi!"

²⁶Ne ghaṛṛaho laḷeo udde nangio'u taumata udde maikka-ikkatta, wua udde sinumabangnga wuassu taumata udde lapiddu u'ui. ²⁷Anambo n taumata mangke naherangnga, na'oma n sara imangitou nabbisara sangkatou ringannu sangkatou, "Wah apa indi? Sambau aḷaṛṛa'a apan wakku? Ringannu saṛṛaungnga wuṛṛu taṛṛino Itou namarenta manga ghaṛṛaho laḷeo udde sinumabangnga, wuṛṛu imangitou tinumuṛṛutta Sitou!"

²⁸Ne watti'a su ola'u Mawu Yesu tinumelengke ringannu maḷihakka su ahewallu wageangngu leta'u Galilea.

Mawu Yesu napaapia n taumata manambo

(Mat. 8:14-17; Luk. 4:38-41)

²⁹Mawu Yesu wuṛṛu manga mallalaṛṛenggen-Ne nanantangke m waḷe m pattataṛṛamawuanna udde, wuṛṛu inaite su waḷe n Simon wuṛṛu Andreas. Yakobus wuṛṛu Yohanes inai lai su sampunna ringanni mangitou. ³⁰La'iananni Simon marada'a saḷiubba su tampa atatiḷanne. Nariaddi su tempo Mawu Yesu wuṛṛu manga mallalaṛṛenggen-Ne sinumutta su waḷe udde, Mawu Yesu niwaḷoannu olangnge udde. ³¹Ne Mawu Yesu nattuda n la'iananni Simon, wuṛṛu namita limane, see nantuḷunggi tou niapawangunna. Saḷiubbe nawuḷi wuṛṛu itou lapiddu nangimbe simangitou.

³²Su wawallone, napawe matannallo nattupe, manga taumata nangapidde ringannu Mawu Yesu anambo n taumata marada'a wuṛṛu taumata apan niasuttannu ghaṛṛaho laḷeo. ³³Anambo n laḷoṛṛo n soa udde uaṛṛimpulunna su passalangannu waḷe udde. ³⁴See Mawu Yesu napaapiate n anambo n taumata apan uatataṛṛangnga aḷawo'u hati n rada'a, wuṛṛu nallimbuakke lai manga ghaṛṛaho laḷeo. Itou tawe nanga-gillu tempone su manga ghaṛṛaho laḷeo udde mabbisara, ana waugu imangitou masingkatta isai Itou udde.

Mawu Yesus nannase su Galilea

(Luk. 4:42-44)

³⁵Ruaallone, su tempo ta'e maṙranggapa atonna, Mawu Yesus nabangunte see nanantangke m waḷe. Itou inaitte su tampa apan maḷannaba su liuddu soa, wuṙṙu inumaḷiomante poiaronddi. ³⁶Arawe Simon wuṙṙu manga ringanne inai nadea'a Sitou. ³⁷Wuṙṙu napawe imangitou naasombate Sitou, imangitou nabbisara, "Manambo taumata maddea'a Iamangnga."

³⁸Arawe Mawu Yesus sinumimbakka, "Wette iite manassute amatanni ite su manga soa waine apan maranine isindi. Ia'u sarun mannase lai poiaronddi, ana waugu eteudde pandumanne Ia'u nirumanta isindi."

³⁹Ana waugu udde Mawu Yesus inaitte su aḷawo'u tampa su ahewallu Galilea, wuṙṙu mannase su manga waḷe m pattataṙramawuanna, see mallimbuakka manga ghaṙṙaho laḷeo.

Mawu Yesus napaapia n sangkatou pia radangnge paro apan maarantinna

(Mat. 8:1-4; Luk. 5:12-16)

⁴⁰Sangkatou apan pia radangnge paro apan maarantinna nirumanta ringannu Mawu Yesus. Taumata udde inumaḷintuda, wuṙṙu nabbisara, "Amungkangngu Iamangnga maapulu, Iamangnga wotongnge mangapia sia'u."

⁴¹Mawu Yesus inumakkannu taumata udde. Nariaddi Itou namita taumata udde lapiddu wisara-Ne, "Ia'u maapulu, apiate!" ⁴²Orassa udde lai radangnge nawuḷi wuṙṙu itou napiate. ⁴³See Mawu Yesus nandolokki tou napuḷe ringannu tanata indi, ⁴⁴"Naunge, arie mabatti'a sisaisai, arawe roote ringannu imam wuṙṙu padorongnga sitou manantunna manungku i'o napiate. See matataṙrino su inapiannu wuassu radangngu udde, pangapidde n sasamba tumuṙṙuttu ere suete niparenta Musa, maola'a sambau pananaunganna su manga taumata manungku i'o atonna-tonna napiate."

⁴⁵Arawe taumata udde inaitte, wuṙṙu mangke tawe illoḷone mabatti'u inolaanna udde su aḷawo'u tampa, na'oma n sara Mawu Yesus tate naasutta su soa ringannu maḷuassa. Itou tumba'u uatana'a su liuddu soa su tampa apan maḷannaba. Arawe taumata sidutu lai rudanta ringanni Tou wuassu aḷawo'u tampa.

Mawu Yesus napaapia n sangkatou lome

(Mat. 9:1-8; Luk. 5:17-26)

2 Manga pira allo wua udde, Mawu Yesus nabelengke su Kapernaum. Ne tinumelengke watti'a manungku Itou tantałanna su wałe. ²See manambo taumata nirumanta. Imangitou uařimpulunna poiaroddi na'oma n sara niasueannu tampa. Su ngara taumata mangke lai uasaseppe'a. See Mawu Yesus namasingkattu watti'a wuassu Mawu Ruata simangitou. ³Tantałanna Itou mabbisara, pia sire appatta uapasanna sangkatou lome apan iaapidda ringannu Mawu Yesus. ⁴Arawe ana waugu taumata tumanite manambo, imangitou tate naaundami Mawu Yesus. Nariaddi imangitou nalla'ete atuppa su lantakku Mawu Yesus. Wua udde imangitou nangułukku taumata udde sara wilanne. ⁵Su tempo Mawu Yesus naasilo tumanite m bahewa pangangimanne, Itou nabbisara taumata lome udde, "Ana'u, manga rosanu suete niampunganna."

⁶Manga pira huru n agama apan ua'ianna isudde, mannattakke uai-wało sulałummu naungnga, ⁷"Wařrani atonna taumata indi mabbisara aroddi! Itou mangngadio'a Mawu Ruata. Isai wotongnge mangampungnga rosa, wałinewe tumba'u Mawu Ruata sassane?"

⁸Su tempo udde lai Mawu Yesus naasingkatta řingirřanni mangitou. See Itou nabbisara, "Anio iamiu ma'iwalo sulałummu naunggu? ⁹Suapa malluasanne: mabbisara, 'Rosanu suete niampunganna', ara'e mabbisara, 'Pabbangunte, lappute wilannu wuřru amatte'?" ¹⁰Arawe orassa indi Ia'u sarun mapaalıatta'a siamiu, manungku su wowo n runia indi Ana'u Taumata pia tařřino mangampungnga rosa." See Mawu Yesus nabbisara taumata lome udde, ¹¹"Pabbangunte, lappute wilannu wuřru apulete!"

¹²Itou nabangunna wuřru małiha-łihakka nanganu wilanne see sinumabangnga aellehanni mangitou sarangkanambone. Manga taumata udde naherangnga see nadalote Mawu Ruata. Unni mangitou, "Taambe saran paassa iite naasilo arariadianna ereindi!"

Mawu Yesus namago si Lewi

(Mat. 9:9-13; Luk. 5:27-32)

¹³Mawu Yesus nabelengnga apia su winggi n Rano n Galilea. Manambo taumata nirumanta ringanni Tou, ne Itou nangarřa'e simangitou. ¹⁴Tantałanna Mawu Yesus u'aamatta isudde, Itou naasilo sangkatou madarorongnga wose aranne Lewi ana'i Alfeus, tantałanna ua'ianna su

wale m pammanaranne. "Tantalongke Sia'u," unnu Mawu Yesus sitou. Ne Lewi dirumarisikka wuŕru tinumantalongke Mawu Yesus.

¹⁵Su tempo Mawu Yesus tantaŕanna u'anna su wale n Lewi, nirumantate manambo manga madarorongnga wose wuŕru manga taumata apan su aellegu awadaalla taumata laŕeo, u'anna su sampunna ringannu Mawu Yesus wuŕru mallalaŕrenggen-Ne. Ana waugu manambo su wallatti mangitou uatantalongnga Mawu Yesus. ¹⁶Sire pira huru n agama wua-ssu wallattu taumata n Farisi naasilo Mawu Yesus u'anna su sampunna ringannu manga madarorongnga wose wuŕru manga taumata laŕeo. Nariaddi imangitou na'iwaŕo su mallalaŕrenggenu Mawu Yesus, "Anio hurunu u'anna su sampunna ringannu madarorongnga wose wuŕru manga taumata apan laŕeo udde?"

¹⁷Mawu Yesus naaringikka aiwaŕo mangitou udde, see sinumimbakka, "Taumata apan tawe marada'a tawe mappandumma doktere, tumba'u taumata marada'a. Ia'u nirumanta tawe mamago taumata apan uapendamma ririne mapiate, arawe taumata apan aellehanna araŕeoanne."

Pattatatiakka su ola'u puasa

(Mat. 9:14-17; Luk. 5:33-39)

¹⁸Su sambau tempo, mallalaŕrenggenni Yohanes Mananaranni wuŕru manga taumata n Farisi tantaŕanna mappuasa. See pia taumata nirumanta ringannu Mawu Yesus wuŕru naiwaŕo, "Anio mallalaŕrenggenni Yohanes wuŕru mallalaŕrenggenu taumata n Farisi mappuasa, arawe mallalaŕrenggenu lamangnga tawe mappuasa?"

¹⁹Mawu Yesus sinumimbakka, "Su andeangngu awingnga, apa pia manga raho apan tawe umanna? Amungkangngu maa'awingnga esakka ta'e su sampunna ringanni mangitou, ŕinone imangitou umanna.

²⁰Arawe sarun rumanta tempone maa'awingnga esakka udde alaŕanna wua dinganni mangitou, su tempo udde imangitou tate umanna.

²¹Tawe taumata mandappela laubba tabbe ringannu piŕriŕsa wakku. Ana waugu piŕriŕsa rarapella udde maarinsutta wuŕru manggesa'a laubba udde, na'oma n sara hesangnge maola'a nangillemba ng kahewalle.

²²Aroddi lai tawe taumata mallaiŕinnu anggore wakku sulaŕummu pato'a pisi tabbe. Ana waugu anggore wakku udde sarun mamesangnga pato'a udde. Panginsueanne itarua mangke maramme abbi. Anggore wakku ŕinone ilaiŕinna sulaŕummu pato'a'a wakku lai!"

Aiwało su ola'u allo n Sabatta

(Mat. 12:1-8; Luk. 6:1-5)

²³Su sambau allo n Sabatta, su tempo Mawu Yesus sinumabbi su sambau wailu gandumma, mallałarřenggen-Ne nanattakke mangngitingnga gandumma. ²⁴See manga taumata n Farisi naiwało Mawu Yesus, "Anio manga mallałarřenggen nu lullawangnga tita n agama ng kite, ringannu ma'ola'a apan isassingadda su allo n Sabatta?"

²⁵⁻²⁶Mawu Yesus sinumimbakka, "Iamiu taambe naawasa saran passa apa apan niola'i Daud, su tempo Abyatar mammanara naola'a imam wahewa. Su tempo Daud wuřru manga taumatane małunussa, wuřru tawe anna, itou sinumutta su Wałe Mawu, wuřru inumanna roti apan suete niola'a sasamba su Mawu Ruata. Wuřru roti udde nianggilla lai su manga taumatane. Sumbałi tumuřruttu atorannu agama ng kite, tumba'u manga imam wotongnge umanna roti udde."

²⁷See Mawu Yesus nabbisara apia, "Allo n Sabatta niola'a huna n taumata; wałine taumata huna n allo n Sabatta. ²⁸Nariaddi Ana'u Taumata pia tařrino, see lai uatařrino allo n Sabatta."

Taumata apan limane lome samba'a

(Mat. 12:9-14; Luk. 6:6-11)

3 Mawu Yesus nabelengke apia su wałe m pattatařramawuanna. ¹Isudde pia sangkatou taumata limane lome samba'a. ²Isudde lai pia taumata apan maddea'a pasasała Mawu Yesus, tadea'u wotongnge mangalae n Tou. Nariaddi imangitou sidutu ua'ellega Sitou, apa Itou mapaapia n taumata su allo n Sabatta. ³Mawu Yesus nabbisara su taumata apan limane lome samba'a udde, "Wette darisikke isindi, su saruanne." ⁴See Itou naiwało manga taumata isudde, "Tumuřruttu agama, iite wotongnge mammanara su allo n Sabatta? Ma'ola'a apapia ara'e ma'ola'a alałeo? Manałamatta taumata ara'e mamate?"

Imangitou małannaba. ⁵Ringannu nasa'u Mawu Yesus na'ellega taumata apan uapałiwutta Sitou, arawe Itou nasusa lai, aia waugu imangitou tumanite maattikka puane. See Itou nabbisara taumata udde, "Uluřra'e limanu." Taumata udde nangułukke n limane see limane udde napiate. ⁶Ne manga taumata n Farisi nanantangke n wałe m pattatařramawuanna udde see małiha-łihakka na'ire ringannu sire pira taumata n Herodes, pandumanne mamate Mawu Yesus.

Taumata manambo su winggi n rano

⁷Mawu Yesus wuṛṛu mallaḷaṛṛenggen-Ne inaité nabelengnga wua-ssu Rano n Galilea. Ne manambo atonna taumata wuassu Galilea inai mallaṛṛenggenna Mawu Yesus. Manambo lai nirumanta wuassu Yudea, ⁸wuassu Yerusalem, wuassu wageangngu leta'u Idumea, wuṛṛu wua-ssu wageangngu leta'a samba'a n ra'i Saḷukku Yordan, wuṛṛu wuassu manga soa su Tirus wuṛṛu Sidon. Imangitou sarangkanambone nirumanta ringannu Mawu Yesus, ana waugu imangitou naaringikka manga inolaanna apan suete niola'u Mawu Yesus. ⁹Manga taumata udde tumante manambo, na'oma n sara Mawu Yesus nandolokku manga mallaḷaṛṛenggen-Ne niapasaddia saalanna sa'ean-Ne, ana waugu aṛṛengenne Itou iasesse'u taumata nambo udde. ¹⁰Itou napaapia n taumata nambo, na'oma n sara manga taumata marada'a uasasesse'a maddea'a tadea'u maa'agassa Sitou. ¹¹Wuṛṛu manga taumata apan niasuttannu ghaṛṛaho laḷeo, napawe maasilo Sitou lapiddu niumaḷintudda su saruanni Tou wuṛṛu niemui, "Ete I'o Ana'u Mawu Ruata!"

¹²Arawe Mawu Yesus mangke manningaddu ghaṛṛaho laḷeo udde mamasingkatta isai Itou.

Mawu Yesus namile sire mapuḷo dua mallaḷaṛṛenggen-Ne

(*Mat. 10:1-4; Luk. 6:12-16*)

¹³Wua udde Mawu Yesus sinumaate su sambau wuidda, wuṛṛu namagote manga taumata apan pappanduman-Ne. Manga taumata udde nirumanta, ¹⁴see Itou namilete wuassu wallatti mangitou sire mapuḷo dua su atoune. Wisara-Ne, "Ia'u mamile siamiu, tadea'u iamiu maṛṛundinganna Sia'u, tadea'u Ia'u mandolokki amiu mamasingkattu Watti'u Aḷaḷuassa wuassu Mawu Ruata, ¹⁵wuṛṛu iamiu sarun maasomba taṛṛino ipallimbuakka manga ghaṛṛaho laḷeo."

¹⁶Ete indi arannu sire mapuḷo dua taumata udde: Simon (apan isassago lai Petrus), ¹⁷Yakobus wuṛṛu Yohanes tuṛrangge, eteudde aḷaṛṛana'i Zebedeus (imangitou indi inonggoḷannu aranna Boanerges atappasanne "ana'u rallu'a"), ¹⁸Andreas, Filipus, Bartolomeus, Matius, Tomas, Yakobus ana'i Alfeus, Tadeus, Simon Patriot, ¹⁹wuṛṛu Yudas Iskariot apan nandaḷeo Mawu Yesus.

Mawu Yesus wuṛṛu Beelzebul

(*Mat. 12:22-32; Luk. 11:14-23, 12:10*)

²⁰Wua udde Mawu Yesus napuḷete su waḷe. Arawe taumata nambo nirumanta lai naammulla, na'oma n sara Mawu Yesus wuṛṛu mal-laḷaṛrenggen-Ne tawe naa'anna. ²¹Manga taumata udde nabbisara, "Itou nabewate!" Wuṛṛu napawe manga tuṛṛang-Nge naaringikka olangnge udde, imangitou nirumanta nangaḷappa Sitou.

²²Manga huru n agama apan nirumanta wuassu Yerusalem nabbi-sara, "Itou niasuttannu Beelzebul! Tembonannu manga ghaṛṛaho laḷeo apan mangngagillu taṛṛino Sitou ipallimbuakka ghaṛṛaho laḷeo."

²³Ne Mawu Yesus namago taumata nambo udde, wuṛṛu nab-bati'a simangitou manga pira sasumandingnga. "Ereapa wotong-nge ghaṛṛaho laḷeo mallimbuakka ghaṛṛaho laḷeo," unnu Mawu Yesus. ²⁴"Amungkangngu sambau araratuanna mapesangnga sulaḷummu pira ng kawageanganna apan uasaseetta, araratuanna udde tawe maataṛrangnga maḷannu. ²⁵Wuṛṛu amungkangngu sulaḷummu laḷoṛṛo n waḷe, tawe paddarame wuṛṛu manga laḷoṛṛone uasaseetta, laḷoṛṛo n waḷe udde sarun massongkakka. ²⁶Amungkangngu sulaḷummu araratuannu Setanna pia passaseetta wuṛṛu pabbawawuḷo, araratuanna udde tawe maḷannu wuṛṛu sarun maḷihakka mawuḷi.

²⁷Tawe saran sangkatou wotongnge maasutta sulaḷummu waḷe n sangkatou taumata matohassa wuṛṛu mangarṛo darotongnge amungkang-nngu itou tawe malliu ṛoro maṛṛapussa taumata matohassa udde. Wua udde itou wotongngete mangarṛo darotongnge.

²⁸Asingkatewe! Amungkangngu taumata ma'ola'a rosa wuṛṛu mang-ngadio'a, itou wotongnge aampunganna. ²⁹Arawe amungkangngu itou mangngadio'a Ghaṛṛaho Mawu Ruata, itou tawe aampunganna! Ana waugu mangngadio'a udde rosa ma'oma n sara maḷannu-ḷannu." (³⁰Mawu Yesus nabbisara aroddi ana waugu pia taumata mabbisara manungku Mawu Yesus niasuttannu ghaṛṛaho laḷeo.)

Inangnga wuṛṛu manga tuṛṛangngu Mawu Yesus

(*Mat. 12:46-50; Luk. 8:19-21*)

³¹Wua udde inangnga wuṛṛu manga tuṛṛangngu Mawu Yesus niru-mantate. Imangitou uaraṛṛaddo su liudde wuṛṛu nandolokku taumata ia-pawago Mawu Yesus. ³²Su tempo udde manambo taumata tantaḷanna ua'ianna uapaḷiwutta Mawu Yesus. Imangitou nabbisara Sitou, "Iamang-

nga, inangngu wuṛṛu manga tuṛṛangngi Iamangnga wowa su liudde. Imangitou maddea'a Iamangnga."

³³Mawu Yesus sinumimbakka, "Isai inang-Ku? Isai manga tuṛṛang-Ku?" ³⁴Wua udde Itou nanaile manga taumata apan uaḷianna ua-
paḷiwutta Sitou see nabbisara, "Ete indi inang-Ku wuṛṛu manga tuṛṛang-
Ku! ³⁵Taumata apan tuttuṛṛutta apulu Mawu Ruata, ete itou tuṛṛang-Ku
esakka, tuṛṛang-Ku wawine, wuṛṛu inang-Ku."

Sasumandingngu sangkatou mangangasi'a

(Mat. 13:1-9; Luk. 8:4-8)

4 Mawu Yesus mangngarra'a lai su winggi n Rano n Galilea. Ma-
nambo atonna taumata uapaḷiwutta Sitou. Ana waugu udde Itou
inaite inuma'ianna sulaḷummu saalanna apan uaḷallatto, wuṛṛu tau-
mata nambo uarisikka su winggi n rano. ²See Mawu Yesus nangarra'u
aḷawo'u inolaanna apan mapia simangitou ringannu sasumandingnga.
Ereindi Itou mangngarra'a simangitou.

³"Paddaringikka! Pia sangkatou mabbawaila inai mangasi'u wua-
lanna. ⁴Su tempo itou mangngasi'a, pia bualanna nanawo su laḷanna.
See manu'a nirumanta wuṛṛu inumanna wualanna udde na'oma n sara
nasue. ⁵Pia lai nanawo su tampa mawatu apan letangnge adio'a, manga
wualanna udde lapiddu tinumuwo ana waugu letangnge adio'a, ⁶arawe
su tempo matannallo matanggakka, manga tatuwone udde mannattakke
tuttolangnga wua udde narṛangu wuṛṛu nate ana waugu ṛamunne tawe
nusippa maḷaḷumma. ⁷Pia lai bualanna apan nanawo su tangnga n ahu-
ranganna ṛoaanna. Ahuranganna ṛoaanna udde tinumuwo wuṛṛu na-
muḷissa tatuwo n bualanna udde na'oman sara tawe nabbua. ⁸Arawe
pia lai bualanna apan nanawo su leta'a masuwukka. Wualanna udde ti-
numuwo, see nahewalle wuṛṛu nabbua, pia tallu m puḷo, pia annummu
puḷo, wuṛṛu pia lai paarṛasutta su wageangnge."

⁹Napawe suete nabbati'u sasumandingnga udde, Mawu Yesus nabbi-
sara, "Isai pia taḷinga, paddaringikka!"

Anio Mawu Yesus mappattu sasumandingnga

(Mat. 13:10-17; Luk. 8:9-10)

¹⁰Su tempo Mawu Yesus sassane, manga taumata apan suete naa-
ringikka aḷarṛang-Nge nirumanta ringanni Tou su sampunna ringannu
sire mapuḷo dua mallarṛenggen-Ne. Imangitou madorongnga Sitou
manaḷa'a n atappasannu sasumandingnga udde. ¹¹Ne Mawu Yesus na-

bbisarate simangitou, "Iamiu suete nionggolannu ałamatta maasingkatta adappingnga su ola'u ereapa Mawu Ruata mamarenta. Arawe manga taumata su liudde aarfaannu sasumandingnga, ¹²tadea'u

'Imangitou sidutu maatutukka

arawe wagga apa apan sarun mariaddi,

imangitou sidutu maddaringikka

arawe tawe maasunna,

olangnge indi mariaddi tadea'u imangitou

tawe maasilo wurru tawe maasunna

wurru arie imangitou rumanta ringannu Mawu Ruata

wurru Mawu Ruata mangampungnga simangitou.'"

Mawu Yesus manala'a n sasumandingngu sangkatou mangangasi'a

(*Mat. 13:18-23; Luk. 8:11-15*)

¹³Wua udde Mawu Yesus nabbisarate simangitou, "Amungkangngu iamiu tawe maasunna sasumandingnga udde, ereapa iamiu wotongnge maasunna sasumandingnga waine? ¹⁴Mangangasi'a udde sangkatou taumata apan mannalawukku watti'a wuassu Mawu Ruata. ¹⁵Wualanna apan nanawo su lałanna, iassumandingnga su taumata apan uararingikka watti'a su ola'u ereapa Mawu Ruata mamarenta. Aroddi naaringikka, Setanna nirumanta wurru nanganu wualanna apan suete niasi'a sulalummu naungngi mangitou. ¹⁶Wualanna apan nanawo su leta'a mawatu, iassumandingnga su taumata apan uararingikka watti'a udde, wurru ringannu malihakka nanengkamma ringannu naungnga maluassa. ¹⁷Arawe watti'a udde tawe nakkamutta sulalummu naungngi mangitou, na'oma n sara tawe nataarngnga malannu. Aroddi imangitou natataarngnga asasusa ara'e pandałaleo ana waugu watti'a udde, lapiddu imangitou nassinnaaddu Mawu Ruata. ¹⁸Wualanna apan nanawo su tangnga n ahuranganna roaanna, iassumandingnga su taumata apan uararingikka watti'a udde, ¹⁹arawe sussingawangngu pabbiaranni mangitou wurru maapulu mabbiakka lembo nasuungnga. Apulu m padarunia sinumuttate sulalummu naungngi mangitou. Wua udde watti'u Mawu Ruata nawuli wuassu lałummu naungngi mangitou, na'oma n sara tawe nabbua. ²⁰Wurru wualanna apan nanawo su leta'a masuwukka udde iassumandingnga su taumata apan naddaringikka watti'a udde wurru nanengkamma, imangitou nabbua manambo, pia tallu m puło, pia annummu puło, pia lai paarrasutta su wageangnge wuane."

SoĶo apan niluwannu wensada

(Luk. 8:16-18)

²¹Wua udde Mawu Yesus nabbisara apia, "Apa piate taumata nande'omma soĶo see niluwannu wensada, ara'e nangado n soĶo udde su aĶunggu lallowanganna? Apa itou tawe nangele n soĶo udde su aeleanne? ²²Tawe apa uawuni apan tawe asiloanna; wuŕŕu tawe apa iaadappingnga apan tawe asingatanna. ²³Ana waugu udde, amungkangngu pia taĶinga paddaringikka!"

²⁴See Mawu Yesus nabbisara apia, "Panutukka apa apan radaringiŕŕanni amiu indi! Uuŕŕanna apan ipaatti amiu su taumata waine sarun ipaattu Mawu Ruata lai siamiu – wuŕŕu ewe'e lembo n anamboanne lai. ²⁵Ana waugu taumata apan uatahuante, sarun onngoĶanu anamboanne lai; arawe taumata apan tawe tatahuananne, adio'a apan ta'e sitou sarun anuanna lai."

Sasumandingngu wualanna apan tinumuwo

²⁶Mawu Yesus nanassute wisara-Ne apia, "Napawe Mawu Ruata mamarenta ere sangkatou ratu, olangnge wotongnge isumandingnga ere sangkatou apan mangngasi'a su wawaiĶanne. ²⁷Rabbine itou mattiilla; napawe allote itou mabangunna, wuŕŕu tantaĶanna udde manga wualanna mangkatuwone na'oma n sara matanggakke. Arawe ereapa olangnge manga wualanna udde tinumuwo wuŕŕu matanggakke, taumata udde wagga. ²⁸Ete leta'a udde apan nangagillu wuane sassane; paarorone raene, wua udde wungane, ana see wuane. ²⁹Wuŕŕu amungkangngu gandumma udde naĶahate, taumata udde manattakke mangitingnga, ana waugu tempote m pangangitingnga."

Sasumandingngu watu n sawi

(Mat. 13:31-32; Luk. 13:18-19)

³⁰"Napawe Mawu Ruata mamarenta, ringannu apa iite wotongnge manumandingnga?" aiwaĶo Mawu Yesus. "TuĶada apa apan wotongnge ipaatti ite ipanaĶa'a? ³¹Napawe Mawu Ruata mamarenta, olangnge ere sasumandingnga indi: Sambau watu n sawi nianu n sangkatou taumata see sinuanna su leta'a. Watu n sawi eteudde watu apan adio'anne su runia. ³²Arawe amungkangngu tinumuwote, itou maola'a ahewaiĶanne su

wallattu manga sinuananna. Manga rannane manambo na'oma n sara manga manu'a rudanta, wuṛṛu ma'ola'a salakka su aḷungnge."

³³Aroddi Mawu Yesus mangngaṛṛa'a taumata ringannu mappaattu sasumandingnga ereudde, tadea'u imangitou wotongnge maasunna. ³⁴Mawu Yesus sidutu mappaattu sasumandingnga amungkangngu Itou mangngaṛṛa'a manga taumata udde. Arawe amungkangngu Itou sassane ringannu mallalaṛṛenggen-Ne, Itou mannaḷa'a n sarangkanambone simangitou.

Mawu Yesus napaalenakku tandi'a

(Mat. 8:23-27; Luk. 8:22-25)

³⁵Su allo wawallo udde lai, Mawu Yesus nabbisara su mallalaṛṛenggen-Ne, "Wette iite massenggote su samba'a n rano."

³⁶Ne Mawu Yesus sinuma'ete su saalanna, wuṛṛu mallalaṛṛenggen-Ne nanantangke n taumata nambo su winggi n rano, see sinuma'ete su saalanna su sambau. Pia lai manga saalanna waine isudde. Wua udde Mawu Yesus wuṛṛu mallalaṛṛenggen-Ne nassenggote. ³⁷Tawe naḷannu wua udde nattandi'e. Lua'a mannattakke mangngema'u saalanna wuṛṛu naasuttate sulalumme na'oma n sara saalanna udde maranite mepene n ua'e. ³⁸Su pangangulinnu saalanna udde Mawu Yesus tantaḷanna mattiilla uailulunna su apepessa. Mallalaṛṛenggen-Ne namu'o Sitou. Imangitou nabbisara, "Iamangnga Huru, apa lamangnga tawe marṛingidda iite masilakate?"

³⁹Mawu Yesus napu'ote see namulo anginna udde, wuṛṛu nabbisarate rano, "Paalannaba, aḷenakke!" Ne anginna noḷote, wuṛṛu rano naḷenakke atonna. ⁴⁰See Mawu Yesus nabbisara su mallalaṛṛenggen-Ne, "Anio iamiu matta'utta? Anio iamiu tawe mangngimanna Sia'u?"

⁴¹Ne imangitou nata'utte wuṛṛu uawawisarate sangkatou ringannu waine, "Isai ṛinone taumata indi, na'oma n sara anginna wuṛṛu lua'a mangke tuttuṛṛutta Sitou."

Mawu Yesus napaapia n taumata niasutannu ghaṛṛaho laḷeo

(Mat. 8:28-34; Luk. 8:26-39)

5 Wua udde Mawu Yesus wuṛṛu mallalaṛṛenggen-Ne na'omate su samba'a n Rano n Galilea, su wageangngu leta'u Gerasa. ²Aroddi Mawu Yesus nilumintukka wuassu saalanna, Itou nirantannu sangkatou esakka apan sinumabangnga wuassu manga loṛṛangngu laḷabinganna.

³Taumata udde tatauannu gharraho laleo wurru uatana'a su laɭabinganna. Itou tate ia'iitta salaiwe ete rateanna. ⁴Masokkate ledda wurru limane imantungnga, arawe manga rate udde wabbassutanne, wurru atta'a su leddane pappadianne. Itou matohassa atonna na'oma n sara tawedu sangkatou wotongnge maatarangnga sitou. ⁵Allo rabbi itou lullallele su laɭabinganna wurru su manga wuidda, ringannu aintuɭine wurru mallessa wadangnge ringannu watu.

⁶Napawe ro'e n marau itou naasilote Mawu Yesu nirumanta, itou tinumaɭangnga see nassubba su saruannu Mawu Yesu. ⁷Ringannu tingikka apan ma'ikkatta itou inumui, "Yesu, Ana'u Mawu Ruata Apan Atanggaranne! Sarun urannu ia'u indi? Ringannu arannu Mawu Ruata ia'u sumaɭande, arie panansara sia'u!" (⁸Taumata udde nabbisara aroddi ana wagu Mawu Yesu nabbisara sitou, "Gharraho laleo, sabbangke wuassu taumata indi!")

⁹See Mawu Yesu naiwaɭo sitou, "Isai arannu?"

Taumata udde sinumimbakka, "Arangu 'Legiun' - ana wagu iam indi tumanite manambo!" ¹⁰Masokkate itou madorongnga ringannu sussaɭande, tadea'u Mawu Yesu tawe mandolokku manga gharraho laleo udde massaɭiu wuassu wageangngu leta'a udde.

¹¹Marani n tanpa udde pia wawi manambo apan tantaɭanna madda'a anna su sendekku wuidda. ¹²Manga gharraho laleo udde sinumaɭande Mawu Yesu, "Roloɭra'e iam sumutta su manga wawi udde." ¹³Mawu Yesu inumire. Nariaddi, manga gharraho laleo udde sinumabangke wuassu taumata udde see sinumuttate su manga wawi udde. Anambo n ammuɭannu manga wawi udde tinumaɭangnga wurru tinumumpa wuassu rampissa watukku rano see nilumakkuba - wawi udde sarangkanambone, irarangngo rua riwu anambone.

¹⁴Manga mandariaga wawi udde tinumaɭangnga, wurru nama-singkattu watti'a udde su soa wurru su ampungnga maranine. See manga taumata nampassabangnga ma'ellega apa apan suete nariaddi. ¹⁵Imangitou nirumantate ringannu Mawu Yesu, see na'ellega taumata apan tanginna niasuttannu gharraho laleo udde, tantaɭanna ua'ianna isudde. Itou suete napedetta, wurru ringiranne lai masemakke. Ne imangitou sarangkanambone nata'utte. ¹⁶Manga taumata apan suete naasilo sassane inolaanna su ola'u taumata wurru manga wawi udde, nabbati'e apa apan suete nariaddi. ¹⁷See tumana'u wageangngu leta'a udde nadorongnga tadea'u Mawu Yesu manantangngu wageangngu leta'a udde.

¹⁸Su tempo Mawu Yesu sinuma'ete su saalanna, taumata apan tanginna paparentannu gharraho laleo udde sinumaɭande Mawu Yesu, tadea'u itou wotongnge tumantalongnga.

¹⁹Arawe Mawu Yesus maddiri, wisara-Ne, "Apulete wuṛṛu waḷoa'e su manga tuṛrangngu apa apan suete niola'u Mawu si'o wuṛṛu aroddi apiane Itou si'o!"

²⁰Ne taumata udde napulete wuṛṛu nanattakke mabatti'a su wage-angngu leta'u Mapuḷo Soa su ereapa apan suete niola'u Mawu Yesus sitou. Anambo n taumata naherangnga naaringikka watti'a udde.

Ana'i Yairus – Wawine apan nangindingnga jubah Mawu Yesus

(Mat. 9:18-26; Luk. 8:40-56)

²¹Mawu Yesus nabelengke apia su samba'a n rano. Su winggi n rano udde, manambo taumata uaṛṛimpulunna uapaḷiwutta Mawu Yesus. ²²Nirumantate sangkatou aranne Yairus. Itou sangkatou piaṛṛa'u waḷe m pattataṛramawuanna su soa udde. Napawe itou naasilo Mawu Yesus, itou inumaḷintuda su saruan-Ne, ²³wuṛṛu sinumaḷande, "Iamangnga, ana'u wawine marada'a masaddatta. Wotongnge Iamangnga rumanta mamita sitou, tadea'u itou mapia wuṛṛu tawe mate!"

²⁴Ne Mawu Yesus inaita su sampunna ringanni Yairus. Manambo taumata uatantalongnga Sitou wuṛṛu mannesse'i Tou wuassu aḷawo'u tampa.

²⁵Su wallatti mangitou udde pia lai sangkatou wawine apan mapuḷote dua su tonnane marada'a aamatannu ṛaṛṛa ara'e rada'u wawine. ²⁶Anambo n darotongnge nasuete nipaatta pinamaekka manga doktere, arawe tawedu naapia sitou, ewe'e radangnge mangke aatambanna awakkanne. ²⁷Wawine udde naaringikke manambo su ola'u Mawu Yesus. Ne su wallattu taumata nambo udde itou nangundani Mawu Yesus wuassu liudde, ²⁸ana wagu itou maṛṛingidda, "Sar baḷiate ia'u naaindingnga jubah-Ne, ia'u sarun mapia!"

²⁹Itou nangindingnga jubah Mawu Yesus, wuṛṛu orassa udde lai radangnge nattaalla. Itou naapendamma manungku itou napiate. ³⁰Su orassa udde lai Mawu Yesus naapendamma manungku pia auatanna apan nasabangnga wuassu wadang-Nge. Ne Itou nanaile taumata nambo udde wuṛṛu naiwaḷo, "Isai nangindingnga jubah-U?"

³¹Manga mallaḷaṛṛenggen-Ne nabbisara, "Iamangnga pa'ellega sassane aroddi anambone taumata apan uasasuṛṛuda. Wuṛṛu Iamangnga ta'e ma'iwaḷo, isai nangindingnga Iamangnga?"

³²Arawe Mawu Yesus sidutu ma'ellega taumata uapaḷiwutta Sitou wuṛṛu maddea'a taumata apan nangindingnga Sitou. ³³Wawine udde masingkatte apa apan suete nariaddi su wadangnge, ringannu mangngindo wuṛṛu matta'utta itou nassubba su saruannu Mawu Yesus wuṛṛu

nanga'u aławo'u inolaanne. ³⁴See Mawu Yesus nabbisara wawine udde, "Ana'u, ana waugu i'o mangngimanna Sia'u, i'o napiate! Roote ringannu asasałamatta. Po napiate atonna!"

³⁵Tantałamanna Mawu Yesus ta'e mabbisara, manga pira ralojořřanna nirumanta wuassu waęe n Yairus, "Ana'i Tuangnga mařřuala natete," wisara mangitou si Yairus, "Ariete Tuangnga mapaasusa n Iamangnga Huru."

³⁶Ringannu tawe naddaringikka apa apan iwabbisara n taumata nambo udde, Mawu Yesus nabbisara si Yairus, "Arie paata'utta, pangimante!" ³⁷See Mawu Yesus inumamatta, arawe Itou tawe namala n saran sangkatou tumantalongnga Sitou, tumba'u Petrus see Yakobus wuřřu Yohanes sangkatuřřangnga. ³⁸Napawe imangitou na'omate su waęe n Yairus, Mawu Yesus naasilo mangke uahahio, wuřřu naaringikka laľuui wuřřu laľallu apan ma'ikkatta. ³⁹See Mawu Yesus sinumutta wuřřu nabbisara simangitou, "Anio iamiu uahahio wuřřu lulluai? Ana'a udde tawe nate; itou tumba'u mattiilla!"

⁴⁰Imangitou nilumage Mawu Yesus. Ne Itou nandoloke mangitou nambo niapaasabangnga. See Itou nangapidde inangnga iamangngu ana'a udde wuřřu sire tallu mallaľařřenggen-Ne sinumutta sulaľummu wabbo'a n ana'a udde. ⁴¹Mawu Yesus namita lima ng kana'a udde see nabbisara sitou, "Talita kum," atappasanne, "Ana'a wawine, Ia'u mabbisara si'o: pabbangunte!"

⁴²Ana'a mařřuala udde maľiha-ľihakka nabangunna wuřřu inumamatta. (Uukke mapuľote dua su tonnane.) Anambo n tauniata apan naasilo arariadianna udde, mangke tinumiangnga! ⁴³Arawe Mawu Yesus mangke manningaddi mangitou mabatti'u olangnge udde sisai-sai. See Itou nabbisara, "Onggoľete n anna ana'a udde."

Mawu Yesus tawe tinarimmatta su Nazaret

(Mat. 13:53-58; Luk. 4:16-30)

6 Wuassu tampa udde, Mawu Yesus napuľete su sampunna ringannu mallaľařřenggen-Ne watukku ampunggi Tou. ²Su allo n Sabatta Itou nanattakke mangngarřa'a su waęe m pattatařřamawuanna. Manambo taumata isudde. Su tempo manga taumata udde naaringikka aľarřa'u Mawu Yesus, imangitou mangke naherangnga. Imangitou nabbisara, "Wuassuapa taumata indi naasomba sarangkanambone udde? Apande ereapa indi Sitou? Ereapa Itou wotongnge ma'ola'a aľarřindu'a? ³Waľinewe Itou indi ana'u wase ng kalu, ana'i Maria, wuřřu tuřřanggi Yakobus, Yoses, Yudas wuřřu Simon? Ore, manga



Wageange sulaŕummu waŕe m pattataŕramawuanna (6:2)

turŕang-Nge wawine lai udde uatana'a isindi." Ana waugu udde imangitou nanoŕai Tou.

⁴See Mawu Yesus nabbisara simangitou, "Sangkatou nabi aadda-tanna su aŕawo'u tampa, arawe su ampungnge sassane tawe addatanna, wuŕru su wallattu manga turŕangnge wuŕru walahanne."

⁵Su tampa udde Mawu Yesus tawe napa'ola'a saran sambau aŕaŕrindu'a, tumba'u napaapia n sire pira taumata inarada'a ringannu nangandangngu lima-Ne simangitou. ⁶Itou naherangnga imangitou tawe mangngimanna.

Mawu Yesus nandolokku sire mapuŕo dua mallalaŕŕenggen-Ne

(Mat. 10:5-15; Luk. 9:1-6)

Wua udde Mawu Yesus inaita su manga ampungnga maranine isudde, wuŕru manggaŕra'a. ⁷Itou namago sire mapuŕo dua mallalaŕŕenggen-Ne, see nandolokki mangitou pattarra rua ng katou wuŕru inonggoŕannu taŕrino simangitou ipallimbuakka manga ghaŕraho laŕeo. ⁸Itou nangagillu tatantiro indi simangitou, "Arie pangapiddu apa-apa su amatanna, tumba'u tatumma'inna. Arie pangapiddu anna ara'e pato'a m pondi, ara'e lai roitta. ⁹Palluŕrete n sapatu, arawe arie pangapiddu laubba rua m parassa." ¹⁰Itou lai nabbisara, "Amungkangngu iamiu sumutta su sambau waŕe, atana'e isudde ma'oma n sara iamiu manantangngu soa udde. ¹¹Arawe amungkangngu iamiu ma'oma su sambau tampa, wuŕru manga taumata isudde maddiri manarimmatta wuŕru maddiri ma-

daringikka siamiu, tantanga'a tampa udde. Wuṛṛu tontonga'a awu wua-ssu leddanu maola'a sambau pananaunganna su saruanni mangitou!"

¹²Ne sire mapuḷo dua mallaḷaṛṛenggenṇu Mawu Yesuṣ udde inaitē. I mangitou inaitē namasingkattu watti'a manungku taumata ṛinone ma-waḷu wuaṣṣu paddarosane. ¹³Manga mallaḷaṛṛenggenṇu Mawu Yesuṣ udde nallimbuaḷke manambo ghaṛṛaho laḷeo, wuṛṛu mammuṛṛa n lana n zaitun su taumata marada'a wuṛṛu napaapia mangitou.

Apapate n Yohanes Mananaṛṛani

(Mat. 14:1-12; Luk. 9:7-9)

¹⁴Manga watti'a su ola'u anambo n arariadianna udde na'omate lai ringanni Ratu Herodes, ana waugu arannu Mawu Yesuṣ niasingkatante su aḷawo'u tampa. Pia taumata mabbisara, "Yohanes Mananaṛṛani nabbiakke apia! Ana waugu udde itou pia taṛṛino ma'ola'a aḷaṛṛindu'a udde."

¹⁵Arawe manga taumata waine mabbisara, "Itou Elia."

Pia lai mabbisara, "Itou nabi, ere sangkatou su wallattu manga nabi su tempo paarorone."

¹⁶Napawe Herodes naaringikka hatto udde, itou nabbisara, "Atonna indi Yohanes Mananaṛṛani apan rorone suete ta'u niapaponggo'a puane. Orassa indi itou nabbiakke apia!"

¹⁷Ana waugu tantaḷanna taambe inolaanne udde, Herodes suete nandolokku taumata niapasametta si Yohanes, wuṛṛu napaasutta n tou sulaḷummu tuttupanna. Herodes na'ola'a aroddi ana waugu Herodias, awingngu tuṛṛangge sidutu, eteudde Filipus. Ana waugu Herodes suete naawingngi Herodias, ¹⁸wuṛṛu su olangnge udde Yohanes suete nanagu si Herodes ringannu masokka ereindi, "Tawe wotongnge i'o maawingnga ringannu awingngu tuṛṛanggu udde!"

¹⁹Ana waugu udde Herodias pia naungnga laḷeo si Yohanes wuṛṛu maapulu mamate si Yohanes, arawe itou tawe mapa'ola'a olangnge udde, ana waugu isassingaddi Herodes. ²⁰Ana waugu Herodes suete nandolokku taumata niapariaga mapia-pia asaḷamatti Yohanes su tuttupanna, ana waugu itou matta'utti Yohanes. Itou masingkatta manungku Yohanes sangkatou taumata mapia apan suete nirolokku Mawu Ruata. Wuṛṛu atonna amungkanṅgu Yohanes mabbisara, Herodes maḷutu madaringikka sitou, salaiwe itou sussingawangnga atonna ana waugu Yohanes.

²¹Panginsueanne Herodias naasomba tempone su allo inariadianni Herodes. Tempo udde Herodes na'ola'a andeangngu manga tembonannu araratuanne, manga tembonannu tantarane wuṛṛu manga piaṛṛa'u

tumana'u Galilea. ²²Su andeangnga udde ana'a maṛṛuala n Herodias nassaṛaingnga, wuṛṛu saṛaingnge udde mangke naaṛuassa naungngi Herodes see lai manga rahone. Ne Herodes nabbisara su ana'a maṛṛuala udde, "Apa ipaapulunu, padorongke. Ia'u sarun mangonggolu darorongngu udde si'o!" ²³See Herodes naddiandi su ana'a udde ringannu sasalu, Herodes nabbisara, "Aṛawo'u apa apan dorongannu sarun ta'u ionggolla, salaiwe samba'a wuassu araratuangku indi!"

²⁴Ne maṛṛuala udde sinumabangnga wuṛṛu naiwaḷo inangnge, "Inangnga, suapa apan mappianne ta'u doronganna?"

Inangnge sinumimbakka, "Padorongke pua n Yohanes Mananaṛṛani."

²⁵Maṛṛuala udde maḷiha-ḷihakka nabelengnga ringanni Herodes wuṛṛu nabbisara, "Ia'u madorongnga pua n Yohanes Mananaṛṛani ionggolla sia'u orassa indi uarandangnga su baki!"

²⁶Naaringikka darorongnga udde, Herodes mangke nasusa. Arawe itou tawe mapanoḷa'u darorongnga udde, ana waugu itou suete nassalu su pattangngannu manga rahone. ²⁷Nariaddi itou lapiddu namarenta sangkatou mandariagane niapaalappa pua n Yohanes Mananaṛṛani. Ne tantara udde inaita su tuttupanna see namonggo'e pua n Yohanes. ²⁸Wua udde itou nangapiddu pua udde uarandangnga su baki wuṛṛu tinantille su maṛṛuala udde, see maṛṛuala udde nanantille su inangnge. ²⁹Napawe mallalaṛṛenggeni Yohanes Mananaṛṛani naaringikka olangnge udde, imangitou inaita nangaḷappa winalunanni Yohanes, see nilaṅke.

Mawu Yesus napaannu lima ṛiwu su atoune

(Mat. 14:13-21; Luk. 9:10-17; Yoh. 6:1-14)

³⁰Manga rasul apan suete nirolokku Mawu Yesus, wua udde nabelengke apia, wuṛṛu naammulle ringannu Mawu Yesus. Imangitou nabaḷo Sitou aḷawo'a apan suete nimmanara wuṛṛu niaṛṛa'i mangitou.

³¹Manambo atonna taumata nirumanta wuṛṛu mappuḷe, na'oma n sara tate lai tempone Mawu Yesus wuṛṛu mallalaṛṛenggen-Ne umanna. Ana waugu udde Mawu Yesus nabbisara mallalaṛṛenggen-Ne, "Wette iite inaita su tampa apan maḷannaba, isudde iite wotongnge sassane, wuṛṛu iamiu wotongnge mangilloḷo taḷa ng kadio'a." ³²Ne imangitou inaita ringannu sinuma'e saalanna nabatukku tampa apan maḷannaba udde.

³³Arawe manambo taumata naasilo simangitou nanantangngu tampa udde, wuṛṛu masingkatta lai isai imangitou. Nariaddi, wuassu aḷawo'u soa su wageangngu leta'a udde, manga taumata tuttaḷangnga wuassu ammaranne malliu ṛoro Mawu Yesus wuṛṛu mallalaṛṛenggen-Ne.

³⁴Su tempo Mawu Yesus sinumossokka wuassu saalanna, Itou naasilo taumata manambo. Itou inumakkanni mangitou, ana waugu imangitou naal̄ihidda domba apan tawe mallal̄u'adde. Ne Itou nanattakke mangngarra'u al̄awo'u al̄arra'a simangitou. ³⁵Napawe wawallote, mallal̄ar̄r̄nggennu Mawu Yesus naiwal̄o Sitou, "Maranite mar̄r̄abi wuṛṛu tampa indi marau wuassu soa. ³⁶Mappianne Iamangnga mandolokku manga taumata indi mapuḷe tadea'u imangitou wotongge mamalli anna su manga soa wuṛṛu ampungga maranine isindi."

³⁷Arawe Mawu Yesus sinumimbakka, "Iamiute sassane papaanni mangitou."

"Uare, apa iami inai mamalli roti aregane rua ṛasutta roitta saḷa'a ana see mapaannu manga taumata indi?" aroddi unnu manga mallal̄ar̄r̄nggennu Mawu Yesus.

³⁸See Mawu Yesus naiwal̄o, "Pia sangkura roti siamiu? Roote ellehe."

Napawe imangitou suete na'ellega, imangitou nabbisara, "Pia lima m bau roti wuṛṛu rua m bua inassa."

³⁹See Mawu Yesus nandolokku manga taumata udde niapaa'ianna tumuṛṛuttu manga wageangge su nannaḷo ma'elomma. ⁴⁰Ne manga taumata udde inuma'iante ringannu uaatokka su manga wageangge. Pia mar̄r̄asutta su atoune sangkawageanganna wuṛṛu pia lai lima m puḷo su atoune sulal̄ummu sangkawageanganna. ⁴¹Wua udde Mawu Yesus nanganute lima m bau roti wuṛṛu inassa rua m bua, see naninggara langitta wuṛṛu naadiangkamanna su Mawu Ruata. Wua udde, Itou namesangke roti udde ringannu lima-Ne wuṛṛu nianggille su mallal̄ar̄r̄nggen-Ne iapatahia su taumata nambo udde, wuṛṛu inassa lai rua m bua nitahia simangitou nambo udde. ⁴²Imangitou inumanna na'oma n sara nal̄aidda. ⁴³Wua udde lambe n anna udde niammullu mallal̄ar̄r̄nggennu Mawu Yesus - sarangkanambone mapuḷo dua su uḷangge napene-pene. ⁴⁴Taumata esakka apan inumanna roti udde irar̄ranggo lima ṛiwu su atoune.

Mawu Yesus niuamatta su wowo n ua'e

(Mat. 14:22-33; Yoh. 6:15-21)

⁴⁵Wua udde ringannu mal̄ihakka Mawu Yesus nandolokku mallal̄ar̄r̄nggen-Ne nassenggotte ringannu saalanna malliu ṛoro Sitou su Betsaida su samba'a n rano, tantaḷanna Itou nandolokku taumata nambo udde niapaapuḷe. ⁴⁶Napawe suete nanondo n taumata nambo udde, Mawu Yesus inaite su wuidda umal̄iomanna. ⁴⁷Napawe ṛabbite, saalannu mallal̄ar̄r̄nggennu Mawu Yesus su pattangngante n rano, arawe

Mawu Yesus ta'e su ammaranne. ⁴⁸Itou naasilote simangitou mammun-dalla ringannu masahadda atonna, ana waugu anginna uasomakka saalanna. Ana waugu udde, irar̄ranḡgo su wallattu puulla tatallu wuṛṛu annumma ruaallo, Itou nirumantate ringanni mangitou u'amatta su wowo n ua'e. Wuṛṛu Itou sidutu u'amatta ere ola'u sumabbi simangitou. ⁴⁹Napawe imangitou naasilo manungku Itou u'amatta su wowo n ua'e, imangitou massunna Itou setanna, ⁵⁰na'oma n sara imangitou mangngintuḷi n atata'utta. Ana waugu imangitou naasilo Sitou wuṛṛu imangitou lapiddu niṛṛumoro atonna.

Arawe Mawu Yesus lapiddu namo'a simangitou, "Paatammuda! Ia'u Mawu Yesus. Arie paata'utta!" ⁵¹See itou sinuma'ete saalanni mangitou, wuṛṛu anginna noḷote. Mallaḷar̄renḡgennu Mawu Yesus mangke naheranḡga atonna. ⁵²Aḷar̄rindu'a ringannu roti lima m bau udde, taambe lai niasunnanni mangitou. Masahadda imangitou massunna.

Mawu Yesus napaapia manga taumata marada'a su Genesaret

(Mat. 14:34-36)

⁵³Napawe na'omate su samba'a n rano, imangitou nabaḷangote su tatuḷiannu Genesaret. ⁵⁴Napawe imangitou sinumossokke wuassu saalanna, manga taumata naasilote manungku nirumanta udde Mawu Yesus. ⁵⁵See imangitou tinumaḷangke su aḷawo'u tampa su wageanggu leta'a udde, wuṛṛu nangapidde manga taumata marada'a uarandanḡga su wilatta inait̄e ringannu Mawu Yesus. Amungkanḡgu imangitou maa-ringikka manungku Mawu Yesus su sambau tampa, imangitou mangapiddu manga taumata marada'a lai isudde. ⁵⁶Suapa n tampa Mawu Yesus rumanta – mapia ete su ampunḡga, su soa ara'e su ampunḡga maradio'a – isudde sidutu taumata rudanta wuṛṛu mangngaddo n rumarada'a su pasakka. See imangitou sussaḷande tadea'u manga taumata marada'a udde iwala mangindinḡga jubah Mawu Yesus, salaiwe tumba'u pentakke. Sarangkanambone apan naaindinḡga jubah udde mangke mapia.

Addatta inanaramannu iupunggu aḷamona

(Mat. 15:1-9)

7 Sambageanḡanna taumata n Farisi wuṛṛu manga pira huru n agama wuassu Yerusalem, nirumanta ringannu Mawu Yesus. ²Imangitou naasilo sire pira mallaḷar̄renḡgennu Mawu Yesus u'anna ringannu lima tawe niukkassa tumuṛṛuttu atorannu agama, eteudde tawe nangukkassa lima rorone tumuṛṛuttu atorannu agama.

³Manga taumata n Farisi, aroddi lai manga taumata n Yahudi, matuṛṛutta atonna su addatta inanaramannu iupungngu aḷamona mangitou. Imangitou tawe umanna, amungkanṅgu taambe nangukkassa lima tumuṛṛuttu atoranna apan suete nitantunna. ⁴Sarannapa niwallianna su pasakka tawe annananna, amungkanṅgu taambe niukkassa rorone. Wuṛṛu manambo atoranna waine wuassu iupungngu aḷamona mangitou apan aagasanni mangitou matoha-tohassa, ere lai atorannu pangangukkassa halasi, mangko wuṛṛu manga sarannapa wuassu witu'a.

⁵Ana waugu udde manga taumata n Farisi wuṛṛu manga huru n agama naiwaḷo Mawu Yesu, "Anio mallaṛṛengṅenu udde u'anna tawe mangukkassa lima? Anio imangitou tawe tumuṛṛutta addatta inanaramannu iupungngu aḷamona ng kite?"

⁶Mawu Yesu sinumimbakka, "Iamiu taumata lilangkamaḷe'a! Naṛṛino atonna apa apan suete niapasingkatti Yesaya su ola'i amiu ete-udde,

'Arendi wisara Mawu Ruata,

Manga taumata udde tumba'u massubba Sia'u ringannu manga wisara,

arawe naungṅi mangitou marau wuassia-U.

⁷Tawe gunane imangitou massubba Sia'u,

ana waugu imangitou mangṅaṛṛa'u atorannu taumata paṛṛimau napa udde ere atorang-Ku!

⁸Manga parenta Mawu Ruata tawe pandumanni amiu, arawe manga atorannu taumata aagasanni amiu matoha-tohassa."

⁹See Mawu Yesu nabbisara apia, "Iamiu pande atonna manola'u parenta Mawu Ruata tadea'u wotongṅe mannohassa aḷaṛṛa'i amiu sassane. ¹⁰Musa suete nangagillu parenta indi, 'Pangaddatta iamangṅu wuṛṛu inangṅu,' wuṛṛu, 'Isai-sai mabbisara iamangṅa inangṅe ṛinone iṛṛuumanna ma'oma n sara pateanna.' ¹¹Arawe iamiu mangṅaṛṛa'a: Amungkanṅgu taumata mabbisara hagurangṅe, 'Apa ṛinone ta'u iangṅila su iamangṅa wuṛṛu inangṅa, suete ta'u niangṅilla su Mawu Ruata,' ¹²ne iamiu napaaliu n taumata wuassu manarane mantuḷungṅu hagurangṅe. ¹³Nariaddi ringannu aḷaṛṛangṅu sassane, apan niangṅilla su manga taumata, iamiu mapaawuḷi m wisara Mawu Ruata. Ta'e manambo lai inolaanna ereindi apan a'olaanni amiu."

Inolaanna apan maaḷaḷeo taumata

(Mat. 15:10-20)

¹⁴See Mawu Yesu namagote paassa lai taumata nambo udde wuṛṛu nabbisara simangitou, "Padaringikka tadea'u maasunna! ¹⁵Tawe saran

sambau wuassu liudde apan sumutta sulaḷummu taumata wotongge maarosa sitou. Arawe, apan sinumabangnga wuassu sangkatou eteudde maarosa sitou. [16Nariaddi, amungkangngu pia taḷinga, padaringikka.]”

17Su tempo Mawu Yesus nanantangke n taumata nambo udde, wuḥḥu sinumuttate su waḷe, mallaḷaḥḥenggen-Ne naiwaḷote Sitou su ola’u pandummu sasumandingnga udde. 18Ne Mawu Yesus nabbisara simangitou, ”Mangaḷene iamiu taambe lai naasunna? Apa iamiu tawe maasunna manungku apan sinumutta sulaḷummu sangkatou taumata tawe wotonge maaola’a taumata udde marosa? 19Ana waugu sinumutta udde tawe sinumabbi su naungnga, arawe sinumabbi su tianna wuḥḥu wua udde sinumabangnga apia.” Ringannu wisara udde, Mawu Yesus napaaliatta’a manungku aḷawo’u anna wotongge annananna.

20See Mawu Yesus nabbisara apia, ”Apan sinumabangnga wuassu taumata, eteudde maarosa sitou. 21Ana waugu wuassu laḷumme eteudde wuassu laḷummu naungnga, sumabangnga ringirḥḥanna laḷeo apan pangin-sueanne taumata ma’ola’a aḷaḷeo, manna’ote, mmmate, 22sussandaga, mallinga, mangngadio’a, ma’ola’a aḷawo’u aḷaḷeo, waḷiu, tawe addanne, mangngune mawarabunga wuḥḥu masahadda pangarḥḥaanne. 23Anambo n aḷaḷeo udde sinumabangnga wuassu laḷumme, wuḥḥu eteudde maaola’a taumata marosa.”

Pangangimannu sangkatou wawine

(Mat. 15:21-28)

24Wua udde Mawu Yesus nanantangke n tampa udde, wuḥḥu inaite su wageangngu leta’a marani n soa Tirus. Itou sinumutta su sambau waḷe wuḥḥu maddiri asingkatanna manungku Itou uatana’a isudde. Arawe Itou tawe mappa’imbuni. 25Sangkatou inangnga, apan pia anangnge wawine niasuttannu gharḥḥaho laḷeo, naaringikka su ola’u Mawu Yesus. Itou nirumanta ringannu Mawu Yesus wuḥḥu nassubba su saruan-Ne, 26lapiddu sinumaḷande tadea’u Mawu Yesus mallimbuakka gharḥḥaho laḷeo wuassu ana’a udde. Wawine udde waḷine taumata n Yahudi, inasungkangnga su wageangngu leta’u Fenisia su Siria. 27Mawu Yesus nabbisara sitou, ”Aḷarḥḥana’a ḥḥinone anggiḥḥannu anna rorone. Laḷeo manganu annu aḷarḥḥana’a ilombo su asu.”

28”Tuangnga,” sasimbakku wawine udde, ”manga asu su aḷungngu medda lai u’anna manga lambe apan ia’ema’u aḷarḥḥana’a!”

29See Mawu Yesus nabbisara sitou, ”Ana waugu sasimbakku udde, apuḷete; gharḥḥaho laḷeo sinumabangke wuassu anangngu!”

³⁰Inangnga udde napuḷete. Su waḷe itou naaratingnga ana'i tou ma-ttiilla su lallowanganna, wuḷḷu gharraho laḷeo, atonna-tonna sinumabangke wuassu ana'a udde.

Mawu Yesus napaapia n sangkatou mou wuḷḷu wengella

³¹Wua udde Mawu Yesus nanantangke n wageangngu leta'u Tirus, wuḷḷu nanassute amatanne sinumabbi Sidon watukku Rano n Galilea. Itou namile laḷanna sumabbi wageangngu leta'u Mapuḷo Soa (De-kapolis). ³²Isudde taumata nangapiddu sangkatou mou wuḷḷu wengella ringanni Tou. Imangitou madorongnga Mawu Yesus mangado n lima-Ne su taumata udde. ³³Mawu Yesus nangapiddu taumata udde nangindau wuassu taumata nambō, see nantaḷḷo n taḷimado-Ne sulaḷummu taḷinga n taumata udde. Wua udde Mawu Yesus nangaddu, wuḷḷu namita lila n taumata udde. ³⁴Wua udde Mawu Yesus naningngara watukku langitta, see sinumangngo ma'ikkatta wuḷḷu nabbisara taumata udde, "Efata," atappasanne, "Awu'ate!"

³⁵Taḷinga n taumata udde nawu'a wuḷḷu lilane nallome apia, itou nanattakke maawisara ringannu mapia. ³⁶See Mawu Yesus naningaddi mangitou sarangkanambone mabatti'u inolaanna udde sisai-sai. Arawe mangkasingadde Mawu Yesus, imangitou mangke mabatti'a lai. ³⁷Wuḷḷu anambo n taumata apan naaringikka udde naherangnga atonna. Imangitou nabbisara, "Sarangkanambone niolang-Nge ringannu mapia! Wuḷḷu lai Itou na'ola'a taumata wengella naaringikka wuḷḷu taumata mou naawisara!"

Mawu Yesus napaannu appattu ḷiwu su atoune

(Mat. 15:32-39)

8 Tawe naḷannu wua udde, pia lai sambageanganna taumata nambo nirumanta naammulla. Ana wauḷu imangitou tawe anna, Mawu Yesus namago mallaḷarḷenggen-Ne wuḷḷu nabbisara, ²"Ia'u u'akkannu taumata nambo indi. Tallute allo aḷannune imangitou su sampunna ringang-Ku, wuḷḷu orassa indi imangitou tawe anna. ³Amungkangngu Ia'u mandolokki mangitou iapaapuḷe maḷunussa, imangitou sarun ma-wantingnga su tangnga n daḷanna. Apa lai su wallatti mangitou piaddu nirumanta wuassu tampa marau."

⁴Mallaḷarḷenggenḡu Mawu Yesus sinumimbakka, "Su tampa araune indi, suapa taumata wotongge maasomba anna iapaanna su taumata nambo indi?"

⁵"Sangkura anambone roti siamiu?" aiwaḷo Mawu Yesus.

"Pitu m bau," sasimbakki mangitou.

⁶Ne Mawu Yesus nandolokku taumata nambo udde inuma'ianḡa su leta'a, see Itou nanganute pitu m bau roti udde wuḷḷu naadiangkamante su Mawu Ruata. Wua udde Itou namesangke roti ringannu lima-Ne wuḷḷu nianggille su mallaḷarḷenggen-Ne niapatahia su taumata. Ne mallaḷarḷenggen-Ne na'ola'e aroddi. ⁷Imangitou lai pia manga pira inassa maradio'a. Mawu Yesus naadiangkamante lai su Mawu Ruata ana waugu inassa udde, see nandolokku mallaḷarḷenggen-Ne niapatahia inassa udde lai. ⁸⁻⁹Imangitou inumanna na'oma n sara naḷaidda - irarḷangḡo pia appatu riwu su atoune taumata inumanna. Wua udde mallaḷarḷenggenḡu Mawu Yesus nangammullu lambe n anna - pitu ng kuḷa'a napene-pene. See Mawu Yesus nandolokku manga taumata udde niapaapuḷe, ¹⁰wuḷḷu Itou ringannu mallaḷarḷenggen-Ne lapiddu sinuma'e saalanna wuḷḷu inaite su wageangḡu leta'u Dalmanuta.

Manga taumata n Farisi madorongḡa Mawu Yesus ma'ola'a aḷarḷindu'a

(Mat. 16:1-4)

¹¹Sire pira taumata n Farisi nirumanta ringannu Mawu Yesus, wuḷḷu nanattakke uasasimbakka ringanni Tou ana maddea'a mapaasaḷa n Tou. Imangitou madorongḡa Mawu Yesus ma'ola'a aḷarḷindu'a, maola'a sambau tatiala manungku Itou nirumanta wuassu Mawu Ruata.

¹²Mawu Yesus nasa'u, see sinumimbakka, "Anio manga taumata n tempo indi madorongḡa Sia'u ma'ola'a aḷarḷindu'a? Tawe! Ia'u tawe mangagillu tanda ereudde simangitou!"

¹³See Mawu Yesus nanantangke mangitou, wuḷḷu sinuma'ete saalanna; wua udde inaite nassenggotta su samba'a n rano udde.

Ragi n taumata n Farisi wuḷḷu Herodes

(Mat. 16:5-12)

¹⁴Manga mallaḷarḷenggenḡu Mawu Yesus naabuḷi nangapiddu roti natimu. Imangitou tumba'u pia roti sambau su saalanna. ¹⁵"Paatehamma su ragi manga taumata n Farisi wuḷḷu ragi n Herodes," unnu Mawu Yesus simangitou.

¹⁶Ne manga mallajarrenggenu Mawu Yesus mannattakke uawa-watti'u hatto udde. Imangitou nabbisara, "Itou nabbisara aroddi, ana waugu iite tawe nangapiddu roti."

¹⁷Mawu Yesus masingkattu apa ipagahato mangitou. Ana waugu udde Itou naiwało simangitou. "Anio iamiu uahahatto su ola'u tawe roti? Apa iamiu ta'e wagga wurru taambe naasunna lai? Aroddi alumune ringirranu?" ¹⁸Iamiu pia mata - anio tawe ma'ellega? Iamiu pia talinga - anio tawe madaringikka? Iamiu tawe maanaungnga, ¹⁹lima m bau roti apan nitahia-U su lima riwu su atoune? Pira ng kuła'a lambe n ana niammulli amiu?"

"Mapuło dua," sasimbakki mangitou.

²⁰"Wurru su tempo Ia'u nattahia pitu m bau roti su appatu riwu su atoune," aiwało Mawu Yesus apia, "pira ng kuła'a lambe ng kannu apan niammulli amiu?"

"Pitu," sasimbakki mangitou.

²¹"Ne, iamiu taambe lai naasunna?" wisara Mawu Yesus apia.

Mawu Yesus napaapia n taumata wuta su Betsaida

²²Imangitou na'omate su Betsaida. Isudde taumata nangapiddu sangkatou wuta ringannu Mawu Yesus, wurru nadorongnga tadea'u Itou mamita taumata udde see mapia. ²³Ne Mawu Yesus nangagassa lima n taumata wuta udde wurru nangehetta sitou su liuddu soa. Wua udde Mawu Yesus nangaddu mata n taumata udde. Itou nangado n limane su mata n taumata udde, see naiwało sitou, "Wotongngete i'o maasilo sarannapa orassa indi?"

²⁴Taumata udde na'ellega saruane, see nabbisara, "Ore, ia'u naasilo taumata u'amatta; arawe imangitou iaasilo naalihida alu."

²⁵Mawu Yesus nangado n lima-Ne apia su mata n taumata udde. Paassa indi taumata udde mammata'u matane tadea'u maasilo. Matane napiate wurru itou naasilote sarangkanambone ringannu masemasemakka. ²⁶See Mawu Yesus nabbisara sitou, "Apulete, wurru ariete pabelengnga su soa udde."

Panga'uanni Petrus su ola'u Mawu Yesus

(Mat. 16:13-20; Luk. 9:18-21)

²⁷Mawu Yesus wurru manga mallajarrenggen-Ne inaitte su manga ampungnga su leta'u Kaisarea Filipi. Su pattangngannu lałanna Mawu

Yesus naiwaļo simangitou, "Tumuŗŗuttu wisara n taumata, isai Ia'u indi?"

²⁸Imangitou sinumimbakka, "Piaddu mabbisara: Yohanes Mananaŗŗani; piaddu lai mabbisara Elia, wuŗŗu waine lai mabbisara; sangkatou su wallattu nabi."

²⁹"Arawe tumuŗŗutti amiu sassane, Ia'u indi isai?" aiwaļo Mawu Yesus.

Petrus sinumimbakka, "Iamangnga eteudde Ratu m Punnu Saļamatta!"

³⁰See Mawu Yesus napaanaungnga simangitou, tadea'u tawe mabatti'a su manga taumata su ola'u watangan-Ne.

Mawu Yesus nabbisara su ola'u asasusa-Ne wuŗŗu apapate-Ne

(*Mat. 16:21-28; Luk. 9:22-27*)

³¹Wua udde, Mawu Yesus nanattakke mangngaŗŗa'a mallaļaŗŗenggen-Ne manungku Ana'u Taumata sarun matataŗŗangngu anambo n asasusa, wuŗŗu ipaseettu manga tembonanne, manga imam tembonanne wuŗŗu manga huru n agama. Itou sarun pateanna, arawe su allo atallune Itou sarun mabangunna apia. ³²Ringannu masemakka atonna Mawu Yesus nasingkattu olangnge udde su mallaļaŗŗenggen-Ne. Ne Petrus nangehetta Mawu Yesus su sandiŗŗanne wuŗŗu nanagu Sitou. ³³Arawe Mawu Yesus nanaile wuŗŗu na'ellega mallaļaŗŗenggen-Ne wuŗŗu nanagu Petrus, "Roote wua isindi, Wawono'a! Riņiŗŗannu udde riņiŗŗannu taumata; waļine riņiŗŗannu Mawu Ruata!"

³⁴Wua udde Mawu Yesus namagote taumata nambo isudde su sampunna ringannu mallaļaŗŗenggen-Ne. See Itou nabbisara simangitou, "Taumata apan mallaŗŗenggena Sia'u, riņone manantangngu manarane wua udde mamasanna arussa-Ne wuŗŗu sidutu uatantalongnga Sia'u.

³⁵Ana waugu taumata apan mannahekku wiakku ririne, sarun awuļiannu wiakke. Arawe taumata apan mannantillu wiakke ana waugu Ia'u wuŗŗu Watti'u Aļaļuassa wuassu Mawu Ruata, sarun masaļamatta. ³⁶Apa auntunganne su sangkatou taumata, amungkangngu ahewallu runia indi maola'a darotongnge arawe itou awuļiannu wiakke? ³⁷Wotongnge wiakka udde asaļiuannu darotongnga waine?

³⁸Amungkangngu sangkatou taumata massili mangnga'u Sia'u wuŗŗu aļaŗŗa'u su tempo maļawangnga wuŗŗu laļeo indi, Ana'u Taumata lai massili manga'u taumata udde, su tempo Itou rumanta apia ringannu taŗŗino n Iamangnge, tatantalongannu manga mala'ekatta apan susi."

9 "Asingcate!" unnu Mawu Yesus, "Wuassu wallatti amiu isindi piaddu apan tawe mate, tantaḷanna taambe maasilo Mawu Ruata mamarenta ringannu taḷḷino-Ne!"

Mawu Yesus niwantuhanna

(Mat. 17:1-13; Luk. 9:28-36)

²Annammu allo wua udde, Mawu Yesus nangapiddi Petrus wuḷḷu Yakobus wuḷḷu tuḷḷangnge Yohanes, nangindau su sambau wuidda apan matanggakka. Su saruannu mata mangitou Mawu Yesus nawaḷu hati-Ne. ³Laung-Nge nabaḷi mawira lullendapa. Tawedu sangkatou mabawansalla su runia indi wotongnge maawaresi aroddi awirane. ⁴Wua udde sire tallu mallaḷaḷḷanggen-Ne naasilo Mawu Yesus uahahatto n Elia wuḷḷu Musa. ⁵Ne Petrus nabbisara su Mawu Yesus, "Iamangnga Huru, mapia atonna iite isindi. Mappianne iami mapararisikku rasanna tatallu: sambau su Iamangnga, sambau si Musa, wuḷḷu sambau lai si Elia." ⁶Petrus wagga apa apan ḷḷinone iwisarane, ana waugu itou wuḷḷu ringanne darua tantaḷanna matta'utta atonna.

⁷Wua udde winabbawa nangooppa simangitou wuḷḷu wuassu winabbawa udde inaringiḷḷanna tingikka nabbisara, "Ete indi Ana'u apan arangnguanna. Daringiḷḷe Itou!" ⁸Maḷiha-ḷihakka imangitou na'ellega su uapaḷiwutta simangitou, wuḷḷu tawe naasilo manga apa isudde ringanni mangitou, tumba'u Mawu Yesus sassane. ⁹Su tempo imangitou sinumossokke wuassu wuidda udde, Mawu Yesus napaanaungnga simangitou, "Arie pabbatti'a sisai-sai, apa apan suete niasiloanni amiu tanginna tantaḷanna Ana'u Taumata taambe niapawangunna wuassu papate."

¹⁰Imangitou tinumuḷḷutte tanata udde, arawe su wallatti mangitou sassane nanattakke uahahatto apa pandumannu Mawu Yesus nabbisara "mabbiakka apia wuassu papate". ¹¹Ne imangitou naiwaḷo Sitou, "Anio manga huru n agama mabbisara manungku Elia sarun rumanta paarorone?"

¹²Mawu Yesus sinumimbakka, "Elia atonna nirumanta paarorone ana waugu manuungngu sarangkanambone. Arawe ereapa olangnge ringannu Ana'u Taumata? Anio sulaḷummu Wuke Susi uawoḷḷetta manungku Itou sarun matataḷḷangngu anambo n asasusa wuḷḷu aaḷuandahannu taumata? ¹³Arawe Ia'u mabbisara siamiu: Elia suete nirumanta, wuḷḷu manga taumata na'ola'a sitou walate apulu mangitou. Udde naḷḷino ere suete niwoḷḷetta sulaḷummu Wuke Susi su ola'u watanganne."

Mawu Yesus napaapia n ana'a niasuttannu gharrahho laleo

(Mat. 17:14-21; Luk. 9:37-43a)

¹⁴Napawe Mawu Yesus wuṛṛu sire tallu mallalaṛṛenggen-Ne nawe-lengke apia ringannu mallalaṛṛenggen-Ne waine, imangitou naasilo pia taumata manambo isudde. Manga pira huru n agama tantaḷanna uasasimbakku mallalaṛṛenggennu Mawu Yesus isudde. ¹⁵Aroddi manga taumata udde naasilo Mawu Yesus, imangitou inagukke, lapiddu tinumaḷangnga nanaḷoho Sitou. ¹⁶"Apa ipattatiakki amiu ringannu manga huru n agama udde?" aiwaḷo Mawu Yesus su mallalaṛṛenggen-Ne.

¹⁷Sangkatou wuassu wallattu taumata nambo sinumimbakka, "Iamangnga Huru, ia'u uaapiddu ana'u iapa'ellega su Iamangnga. Itou mou ana waugu niasuttannu gharrahho laleo. ¹⁸Amungkangngu gharrahho udde sumutta sitou, wadangnge iwabatingnge su leta'a, moṛṛongnge lullupa, isine ia'garṛagitta wuṛṛu ahewallu wadangnge mannottoga. Ia'u nadorongnga mallalaṛṛenggennu Iamangnga mallimbuakka gharrahho laleo udde, arawe imangitou tawe maaliṃbuakka."

¹⁹Ne Mawu Yesus nabbisara simangitou, "Tawe hampa iamiu indii! Iamiu atonna-tonna taumata apan tawe mangngimanna. Ma'oma n sara tempo suapa Ia'u sarun matana'a su sampunna ringanni amiu wuṛṛu manabare su alaḷeo ng kamiu? Apira'e ana'a udde isindi!" ²⁰Ne imangitou nangapidde n ana'a udde ringannu Mawu Yesus.

Aroddi gharrahho laleo udde naasilo Mawu Yesus, itou napawantikku ana'a udde na'oma n sara ana'a udde nawangingnga tuttaḷingngi su leta'a. Moṛṛongnge lullupa. ²¹See Mawu Yesus naiwaḷo iamangnge, "Pirate aḷannune itou arendi?"

"Ro'e n itou ta'e adio'a!" sasimbakki iamangnge. ²²Masokkate gharrahho laleo udde mappandumma mamate sitou ringannu mangema'a su putungnga ara'e sulalummu ua'e. Arawe amungkangngu Iamangnga wotongnge mantuḷungnga, doronganna Iamangnga umakkanni ami wuṛṛu mantuḷungngi ami!"

²³"Apa wisaranu? Amungkangngu Iamangnga wotongnge?" sasimbakku Mawu Yesus. "Sarangkanambone wotongnge, sambaḷiate taumata mangngimanna!"

²⁴Iamangngu ana'a udde lapiddu inumui, "Mawu, ia'u mangngimanna, arawe pangangimangku adio'a. Tuḷunga'a ia'u tadea'u aatambanna lai pangangimangku!"

²⁵Napawe Mawu Yesus naasilo manungku taumata mannattakke rudanta maṛṛimpulunna, Itou namarenta gharrahho laleo udde ringannu na-

bbisara, "Gharraho wengella wuṛṛu mou, Ia'u mandolokku; sabbangnga wuassu ana'a indi wuṛṛu ariete passutta sitou apia."

²⁶Gharraho laḷeo udde nangintuḷi, see na'ola'a ana'a udde iwabantikke, wua udde sinumabangnga wuassu ana'a udde. Ana'a udde ellehanna ere asuangnga na'oma n sara taumata manambo mabbisara, "Itou natete!" ²⁷Arawe Mawu Yesus nangagassa limane wuṛṛu nantuluṅgi tou dirumarisikka. Ne ana'a udde nabangunte.

²⁸Napawe Mawu Yesus su waḷete, manga mallaḷarṛenggen-Ne ni-rumanta passangkatou ringanni Tou wuṛṛu naiwaḷo, "Anio iami tawe maaḷimbuakka gharraho laḷeo udde?"

²⁹Mawu Yesus sinumimbakka, "Gharraho laḷeo ere udde tawe aaḷimbuarṛanna ringannu aḷawo'u inolaanna, tumba'u aaḷiomanna."

Mawu Yesus nabalo apia su ola'u papate-Ne

(Mat. 17:22-23; Luk. 9:43b-45)

³⁰Mawu Yesus wuṛṛu mallaḷarṛenggen-Ne nanantangke n tampa udde wuṛṛu inaita nanassu amatanna sinumabbi Galilea. Mawu Yesus maddiri asingkatannu taumata su tampa Itou uatana'a, ³¹ana waugu Itou tantaḷanna manggarra'a mallaḷarṛenggen-Ne. "Ana'u Taumata sarun itantilla su tarṛino n taumata," aroddi unnu Mawu Yesus, "wuṛṛu Itou sarun pateanna, arawe su allo atallune Itou sarun mabangunna apia!"

³²Manga mallaḷarṛenggen-Ne tawe naasunna aḷarra'u Mawu Yesus, arawe imangitou matta'utta maiwaḷo Mawu Yesus.

Isai ahewalanne?

(Mat. 18:1-5; Luk. 9:46-48)

³³Imangitou na'omate su Kapernaum. Napawe su waḷete, Mawu Yesus naiwaḷote mallaḷarṛenggen-Ne, "Iamiu uasasimbakku apa tanginna su tangnga n daḷanna?"

³⁴Imangitou tawe sinumimbakka, ana waugu tanginna su tangnga n daḷanna imangitou uatatiakka su ola'u isai ahewalanne. ³⁵Mawu Yesus inuma'ianna, see namagote sire mapuḷo dua mallaḷarṛenggen-Ne udde. Itou nabbisara simangitou, "Taumata apan maapulu maola'a paarorone, itou sarun maola'a panginsueanne wuṛṛu sarun maola'a mangangimbetaumata nambo." ³⁶Wua udde Mawu Yesus nangehetta sangkatou ana'a adio'a, wuṛṛu ana'a udde niapararisikka su saruanni mangitou saranganambone. Mawu Yesus narra'uppa ana'a udde wuṛṛu nabbisara su

mallaḷarṙenggen-Ne, ³⁷”Taumata apan manarimmattu sangkatou ana’a ereindi ana waugu Ia’u, udde ere lai manarimmatta Sia’u. Wuṙṙu tau-mata apan manarimmatta Sia’u, itou waḷine tumba’u manarimmatta Sia’u, arawe manarimmattu lai Sitou apan nandolo-U.”

Isai apan tawe lumawangnga siite sarun manamba’a siite

(Luk. 9:49-50)

³⁸See Yohanes nabbisara Mawu Yesus, ”Iami naasilo sangkatou mallimbuakka setanna ringannu arannu Iamangnga. Wuṙṙu iami nangingaddi tou ana waugu itou waḷine wua dinganni ite.”

³⁹Arawe Mawu Yesus nabbisara, ”Arie maningaddi tou, ana waugu tawe sangkatou apan maaola’a aḷarṙindu’a wuassu arang-Ku, wotongnge lapiddu mandaleo arang-Ku. ⁴⁰Ana waugu taumata apan tawe mando-appa siite, udde atappassanne uasamba’a siite. ⁴¹Paanaunge! Taumata apan mappa’inummi amiu, ana waugu iamiu mallaḷarṙenggen Ratu m Punu Saḷamatta, itou sarun manengkamma laḷantakke.”

Manga inolaanna apan maarosa taumata

(Mat. 18:6-9; Luk. 17:1-2)

⁴²”Isai napa’ola’a su wallattu sangkatou taumata maradio’a indite lai mangngimanna Sia’u, mappianne amungkangngu watu gahilinganna i’itta su ullekkane, wuṙṙu itou iwontolla su tahaḷoangnga. ⁴³Amungkangngu limanu maarosa si’o, pototta limanu udde! Mappianne i’o mabbiakka ringannu Mawu Ruata tawe limanu samba’a wuassu i’o ringannu limanu rua m ba’a masutta su naraka, eteudde putungnga apan tawe mappadumma. [⁴⁴Poiaroddi putungnga tawe mappadumma wuṙṙu uḷida tawe mate.] ⁴⁵Wuṙṙu amungkangngu leddanu maarosa si’o, pototta ledda udde. Mappianne i’o mabbiakka ringannu Mawu Ruata tawe leddanu samba’a wuassu i’o ringannu leddanu rua m ba’a iramme sulaḷummu naraka. [⁴⁶Poiaroddi putungnga tawe mappadumma wuṙṙu uḷida tawe mate.] ⁴⁷Amungkangngu matanu maarosa si’o, loetta mata udde. Mappianne i’o sumutta su Runia Wakku Mawu Ruata tawe mata samba’a, wuassu i’o ringannu matanu rua m ba’a iramme su naraka. ⁴⁸Poiaroddi putungnga tawe mappadumma wuṙṙu uḷida tawe mate.

⁴⁹Sangkatou-sangkatou sarun waresiannu putungnga ere sasamba apan wabaresiannu asimma.

⁵⁰Asimma udde mapia, arawe amungkangngu naola'a maammi, wotonggewe iapaapakkada apia? Nariaddi, řinone iamiu maola'a ere asimma – pabbiakke su sampunna ringannu paddarame.”

Mawu Yesus manggarra'a su ola'u pasasasindo

(Mat. 19:1-12; Luk. 16:18)

10 Wua udde Mawu Yesus nanantangke n tampa udde, wuřru inaitte su wageangngu leta'u Yudea wuřru su wageangngu leta'u samba'a n Sařukku Yordan. Taumata manambo nirumanta apia marřimpulunna mammařiwutta Mawu Yesus. Wuřru ere wiasane Mawu Yesus manggarra'a simangitou.

²Manga pira taumata n Farisi nirumanta lai mappaasařa Mawu Yesus. Imangitou naiwařo, ”Tumuřruttu tita n agama ng kite, wotongewe taumata manindo awingnge?”

³Mawu Yesus sinumimbakka, ”Musa nangagillu parenta apa siamiu?”

⁴”Musa namala n taumata manindo awingnge, sambařiate mamorřettu surattu sindo rorone,” sasimbakki mangitou.

⁵”Musa namorřettu parenta udde ana waugu iamiu tumanite masahadda pangarřaanne,” wisara Mawu Yesus simangitou. ⁶”Arawe su paarorone, su tempo Mawu Ruata nandiaddi taumata, niwisara manungku 'Mawu Ruata nandiaddi simangitou esakka wuřru wawine. ⁷Ana waugu udde esakka sarun manantangngu inangnga iamangnge wuřru uaaukke ringannu awingnge, ⁸ne itarua naola'e sambau.' Nariaddi, imangitou wařine rua ng katou lai, awe'e sambau. ⁹Ana waugu udde, apa apan suete ni'aukku Mawu Ruata, tate wotonge iapaatařei n taumata!”

¹⁰Napawe imangitou sinumuttate su waře, manga mallařarřenggen-Ne naiwařote Mawu Yesus su ola'u hatto udde. ¹¹Mawu Yesus nabbisara simangitou, ”Isai manindo awingnge see maawingngu wawine waine, taumata udde sinumandaga su saruannu awingnge paarorone udde. ¹²Aroddi lai wawine apan nanindo awingnge see maawingnga apia ringannu esakka waine, itou lai sinumandaga.”

Mawu Yesus nangalamatta ařarřana'a

(Mat. 19:13-15; Luk. 18:15-17)

¹³Pia manga pira taumata nangapiddu ařarřana'a ringannu Mawu Yesus tadea'u Itou mamita wuřru mangalamatta simangitou. Arawe

mallalārrengennu Mawu Yesus namuḷo manga taumata udde. ¹⁴Naasilo olangnge udde Mawu Yesus namuḷo see Itou nabbisara mallalārrenggen-Ne, "Wala'e alārřana'a udde rumanta ringang-Ku! Arie passingara'a imangitou, ana waugu ete taumata ereindi maola'a laḷoṛro n araratuannu Mawu Ruata. ¹⁵Naunge indi! Isai tawe sumaruanna Mawu Ruata ere sangkatou ana'a, tawe maola'a laḷoṛro n araratuannu Mawu Ruata." ¹⁶Napawe suete nabbisara aroddi, Mawu Yesus narřa'upe alārřana'a udde, wua udde nangado n lima-Ne su wowo m pua mangitou sangkatou-sangkatou wuṛru nangaḷamatte simangitou.

Taumata ala

(*Mat. 19:16-30; Luk. 18:18-30*)

¹⁷Napawe Mawu Yesus nanassute lai amatanni mangitou, nirumantate sangkatou tuttataḷangnga inai ringannu Mawu Yesus. Taumata udde inumaḷintuda su saruannu Mawu Yesus wuṛru naiwaḷo, "Huru apan mapia, ia'u ma'ola'a apa tadea'u wotongnge maasomba pabba-wiakka tutune wuṛru saran maḷannu-ḷannu?"

¹⁸"Anio i'o mabbisara Ia'u mapia?" aiwaḷo Mawu Yesus. "Tawedu apan mapia, tumba'u Mawu Ruata sassane. ¹⁹I'o masingkate manga parenta Mawu Ruata, 'Arie pamate, arie passandaga, arie panna'o, arie mattiala awusu, arie pallinga, pangaddatta iamangngu wuṛru inangngu."

²⁰"Iamangnga Huru," unnu taumata udde, "anambo n parenta udde suete tinuṛrutangku ro'e n ta'e dario'a."

²¹Mawu Yesus nanaile taumata udde ringannu aakkanna see nabbisara, "Ete inolaanna sambau lai apan sarun olaannu. Roote waḷua'a anambo n darotongngu; onggola'e roinne su taumata asiangnga, wuṛru i'o sarun maasomba darotongnga su surga. Wua udde rantate rundingante Sia'u." ²²Naaringikka Mawu Yesus nabbisara aroddi, taumata udde sinumassilla, see nanantangke n tampa udde ringannu naungnga massusa ana waugu itou tumanite n ala.

²³Ne Mawu Yesus nanutudde mallalārrenggen-Ne see nabbisara simangitou, "Masahadda atonna taumata ala maola'a laḷoṛro n araratuannu Mawu Ruata!"

²⁴Manga mallalārrenggen-Ne naherangnga naaringikka wisara Mawu Yesus. Arawe Mawu Yesus nabbisara apia, "Alārřana'u, marahadda atonna maola'a laḷoṛro n araratuannu Mawu Ruata! ²⁵Malluasanna sambau unta sumutta su loṛrangngu rararřumma wuassu sangkatou ala sumutta su Runia Waku Mawu Ruata."

²⁶Manga wisara Mawu Yesus udde naaherangnga mallalarrënggen-Ne, na'oma n sara imangitou naaiwałote sangkatou ringannu sangkatou. "Amungkangngu aroddi, isai wotongnge masałamatta?"

²⁷Mawu Yesus nanutuda simangitou wuřru sinumimbakka, "Su tau-mata udde tawe maola'a arawe su Mawu Ruata udde mangke maola'a; sarangkanambone wotongnge maola'a su Mawu Ruata."

²⁸See Petrus nabbisara, "Pa'ellega, iami suete nanantangngu sarangkanambone ana waugu mallarënggenna Iamangnga."

²⁹Mawu Yesus nabbisara, "Pangimante: taumata apan suete nanantangngu amonanne, ara'e tuřrangnge esakka ara'e tuřrangnge wawine, ara'e inangnge ara'e iamangnge, ara'e alarřrangngge, ara'e lai manga wawaiłanne ana waugu Ia'u wuřru ana waugu Watti'u Alałuassa wua-ssu Mawu Ruata, ³⁰taumata udde sarun manengkamma lembo n anamboanne orassa indi. Itou sarun maasomba paarřasutta pia lebbene anambo n wałene, tuřrangnge esakka, tuřrangnge wawine, inangnge, alarřrangngge, wawaiłanne, - wuřru اساسا lai. Wuřru pařrangatta su tempo addantane, taumata udde sarun manengkamma pabbawiakka tutune wuřru saran małannu-łannu. ³¹Arawe manambo taumata apan orassa indi paarorone sarun maola'a panginsueanne wuřru manambo apan orassa indi panginsueanne sarun maola'a paarorone."

Mawu Yesus nabbisara atallune su ola'u papate-Ne

(Mat. 20:17-19; Luk. 18:31-34)

³²Mawu Yesus wuřru mallalarrënggen-Ne tantałanna su amatanna watukku Yerusalem. Mawu Yesus u'amatta paarorone, wuřru mallalarrënggen-Ne sussingawangnga abbi. Wuřru manga taumata apan mallarënggenna simangitou wuassu liudde lai matta'utta. Wua udde Mawu Yesus namago apia mallalarrënggen-Ne sassane wuřru namasingkatta simangitou apa apan sarun mariaddi sałimmurine su riri-Ne. ³³"Padaringikka," wisara-Ne, "Iite orassa indi tantałanna mattuda n Yerusalem. Poiaroddi Ana'u Taumata sarun itantilla su manga imam tembonanne wuřru manga huru n agama. Itou sarun iřřuumanna ma'oma n sara mate, wua udde itantilla su manga taumata wałine Yahudi. ³⁴Imangitou sarun mangałuandaga Sitou, wuřru mangaddu Sitou, manansara Sitou, wuřru mangarussa n Tou. Arawe su allo atallune Itou sarun mabangunna apia."

Darorongni Yakobus wuṛṛu Yohanes

(Mat. 20:20-28)

³⁵See Yakobus wuṛṛu Yohanes, eteudde alaṛṛana'i Zebedeus, nirumanta ringannu Mawu Yesus, "Iamangnga Huru," unni tarua, "pia ino-laanna apan ipaapulu ng kami olaanni lamangnga siami."

³⁶"Apa ipaapulu ng kamiu olaang-Ku siamiu?" aiwaḷo Mawu Yesus.

³⁷Imangitou sinumimbakka, "Iami maapulu uma'ianna su uananna wuṛṛu su aiṛṛi n lamangnga, amungkangngu lamangnga ua'iante su addera n araratuanna apan mawantuga."

³⁸"Iamiu wagga apa apan radoronganni amiu," wisara Mawu Yesus simangitou. "Wotongnge iamiu ma'inumma wuassu mangko n asasusa apan sarun inumang-Ku wuṛṛu sumutta sulaḷummu papaṛrangnga apan sarun suttang-Ku?"

³⁹"Wotongnge," sasimbakki mangitou.

Ne Mawu Yesus nabbisara apia simangitou, "Atonna iamiu sarun ma'inumma wuassu mangko n asasusa apan sarun inumang-Ku wuṛṛu sumutta sulaḷummu papaṛrangnga apan sarun suttang-Ku. ⁴⁰Arawe su ola'u isai apan uma'ianna su uananna ara'e su aiṛṛi-U, udde waḷine Ia'u manantunna. Mawu Ruata apan manantunna isai-sai sarun uma'ianna sumanga tampa udde."

⁴¹Napawe sire mapuḷo mallalaṛṛenggennu Mawu Yesus waine udde naaringikka hatto udde, imangitou nasa'u Yakobus wuṛṛu Yohanes.

⁴²Nariaddi Mawu Yesus namagote simangitou sarangkanambone, see nabbisara, "Iamiu masingkatta manungku manga piaṛṛa'u pabbawalaga apan tawe maaillaḷa Mawu Ruata, mammaṛrangnga tumanangnge. Wuṛṛu tembonanni mangitou manna'sa'i mangitou. ⁴³Arawe iamiu tawe wotongnge ma'ola'a aroddi! Arawe, taumata apan maapulu maola'a tembonanne su wallatti amiu, itou sarun maola'a mangangimbenu.

⁴⁴Wuṛṛu taumata apan maapulu maola'a paarorone su wallatti amiu sarun maola'a allangngu awadaalla. ⁴⁵Ana waugu Ana'u Taumata lai nirumanta waḷine ana see imbeanna. Itou nirumanta mangimbe wuṛṛu manantillu niawa-Ne ipanubussa rosa n taumata nambo."

Mawu Yesus napaapia n Bartimeus apan wuta

(Mat. 20:29-34; Luk. 18:35-43)

⁴⁶Imangitou na'omate su Yerikho. Wuṛṛu su tempo Mawu Yesus ringannu manga mallalaṛṛenggen-Ne see taumata nambo nanantangke n soa udde, sangkatou wuta tantaḷanna ua'ianna madoro-rorongnga su

winggi n daļanna. Aranne Bartimeus, ana'i Timeus. ⁴⁷Napawe Itou naaringikka manungku taumata sinumabbi udde Mawu Yesus taumata Nazaret, itou nangngintuļi, "Mawu Yesus Ana'i Daud! Akkanaawe ia'u!"

⁴⁸Itou niwuļoannu awadaalla wuŗru niapaļaannaba. Arawe aatambanna lai aikkanne itou mangngintuļi, "Ana'i Daud, akkanaawe ia'u!"

⁴⁹Ne Mawu Yesus nattaalle see nabbisara, "Wagoite itou."

Nariaddi imangitou namagote taumata wuta udde. Imangitou nabbi-sara sitou, "Paaļannabe! I'o wabagoannu Mawu Yesus, pabbuatte!"

⁵⁰Taumata wuta udde nallombote n jubahne, see naļiha-ļihakka nirumarisikka inaitte ringannu Mawu Yesus.

⁵¹"Apa ipaapulunu Ta'u olaang-Ku si'o?" aiwaļo Mawu Yesus sitou.

Taumata wuta udde sinumimbakka, "Iamangnga Huru, ia'u maapulu maasilo."

⁵²"Roote," unnu Mawu Yesus, "Ana waugu i'o mangngimanna Sia'u, i'o napiate."

Su orassa udde lai taumata wuta udde naasilote. See itou tinumanta-longke Mawu Yesus su laļanna.

Mawu Yesus sinumutta su Yerusalem ringannu awawantuga

(*Mat. 21:1-11; Luk. 19:28-40; Yoh. 12:12-19*)

11 Su tempo maddani n Yerusalem, imangitou na'omate su Betfage wuŗru Betania, su wele m Wuiddu Zaitun. Isudde rua ng katou mallalaŗrenggen-Ne nirolokku Mawu Yesus niapaŗoro. ²"Roote su



Betaniam (11:1)

ampungnga sasaruanna udde,” unnu Mawu Yesus sitarua. ”Aroddi iraddua sumutta suampungnga udde, iraddua sarun maasilo sambau ana’u keledai apan ua’iitta wuṛṛu taambe sina’eannu taumata. Wu’ate keledai udde wuṛṛu apira’e isindi. ³ Wuṛṛu amungkangngu pia taumata maiwaḷo siraddua, anio iraddua mamu’a keledai udde, waḷoa’a, ’Mawu mappandumma sitou, wuṛṛu Itou sarun mamelengnga ringannu maḷiha-ḷihakka.’”

⁴ Rua ng katou mallalaṛṛenggennu Mawu Yesus udde inaita, wuṛṛu naaratingnga ana’u keledai tantaḷanna ua’iitta su ngara n waḷe su winggi n daḷanna. Ne itarua namu’ate keledai udde. ⁵ Manga taumata apan uarisikka isudde naiwaḷo sitarua, ”Ei, ma’ura iraddua? Anio iraddua mamu’a ana’u keledai udde?”

⁶ Itarua sinumimbakka ereapa suete niwisara Mawu Yesus sitarua. Ne manga taumata udde namalate n tarua mangapiddu keledai udde. ⁷ Napawe na’omate ringannu Mawu Yesus, tapanna’u keledai udde niamparṛanu jubah mangitou see Mawu Yesus sinuma’ete keledai udde. ⁸ Manambo taumata mangngampakku jubah mangitou su laḷanna, pia lai mangngampakku ranna ng kalu su tangnga n daḷanna apan niapiddi mangitou wuassu wailla. ⁹ Manga taumata apan u’amatta rorone wuṛṛu manga taumata apan ualaṛṛenggenna wuassu liudde, sarangka-nambone u’ui, ”Paddalote Mawu Ruata! Niaḷamatante Itou apan nirumanta ringannu arannu Mawu! ¹⁰ Niaḷamatante araratuan-Ne apan sarun rumanta – araratuanni Ratu Daud, iupungngu aḷamona ng kite! Dalo su Mawu Ruata Apan Atanggaṛṛanne!”

¹¹ Panginsueanne Mawu Yesus na’omate su Yerusalem, see sinumutta su Waḷe Mawu. Isudde Itou na’ellega uapaḷiwutta Sitou. Arawe ana waugu marandumpe, wua udde Itou inaita watukku Betania su sampunna ringannu sire mapuḷo dua mallalaṛṛenggen-Ne.

Mawu Yesus namontoga alu ara

(Mat. 21:18-19)

¹² Su tiṛṛabbine tantaḷanna imangitou u’amatta nanantangngu Betania, Mawu Yesus niamaḷunusanna. ¹³ Ro’e n marau Itou naasilote sangkalu alu ara rongnganne masindumunna. Nariaddi Itou inaita ringannu alu ara udde ma’ellega tanne pia buane ara’e tala. Arawe su tempo Itou na’omate su alu udde, Itou tawe naasilo apa-apa, tumba’u rongngane sassane, ana waugu tempo udde taambe tempone ara mabbua. ¹⁴ See Mawu Yesus nabbisara alu ara udde, ”Manattakka orassa indi tawedu saran sangkatou lai apan umanna wuanu!”

Manga mallalaṛṛenggennu Mawu Yesus naaringikka wisara udde.

Mawu Yesus sinumutta su Waļe Mawu

(Mat. 21:12-17; Luk. 19:45-48; Yoh. 2:13-22)

¹⁵Wua udde imangitou na'omate su Yerusalem, wuŗru Mawu Yesus inaita lai su Waļe Mawu. Isudde Itou nanattakke mallimbuakka manga taumata apan uawawalli su tampa udde. Itou namaļinsuangngu manga medda mananu'addu roitta, wuŗru manga wangko mabawaļu'u manu'a merpati. ¹⁶Wuŗru tawe saran sangkatou apan iwala Mawu Yesus mangapiddu manga sarannapa sumabbi passalangannu Waļe Mawu udde. ¹⁷Wua udde Mawu Yesus nangaŗra'e manga taumata isudde. Itou nabbisara, "Sulaļummu Wuke Susi uawoŗretta ereindi: Mawu Ruata nabbisara, 'Waļe-U sarun isago waļe tampa pangangaliomanannu aļawo'u pabbawalaga.' Arawe niola'i amiu saļakku taumata tarŗa rampassa!"

¹⁸Manga imam tembonanne wuŗru manga huru n agama naaringikka wisara udde. Ne imangitou nanattakke maddea'a laļanne ipamate Mawu Yesus. Imangitou matta'utti Tou, ana waugu awadaalla naherangnga naaringikka aļarŗang-Nge.

¹⁹Napawe maramite maŗŗabi, Mawu Yesus wuŗru mallalaŗŗenggen-Ne nanantangke n soa udde.

Aļarŗa'a wuassu alu ara

(Mat. 21:20-22)

²⁰Tiŗrabbine ruaaflo, su tempo imangitou sumabbi alu ara udde, imangitou naasilo alu ara udde narŗangute na'oma n sara řamunne. ²¹See Petrus naanaungnga apa apan suete nariaddi su allo naļiu. Ne Petrus nabbisarate Mawu Yesus, "Iamangnga Huru, pa'ellega! Alu ara apan suete nitaļa n Iamangnga udde, narŗangute!"

²²Mawu Yesus sinumimbakka, "Pangimante Mawu Ruata. ²³Atonna wotongnge iamiu mabbisara wuidda indi, 'Awengkette wuŗru awontolle su tahaļoangnga!' ne olangnge udde sarun mariaddi siamiu; sambaliate iamiu tawe humago'a, wuŗru iamiu mangngimanna manungku apa apan sarun iwisara ng kamiu atonna-tonna mariaddi. ²⁴Ana waugu udde paanaunge indi: Napawe iamiu umaļiomanna wuŗru madorongnga sarannapa, pangimante manungku Mawu Ruata suete nangonggolla siamiu apa apan radoronganni amiu, ne iamiu sarun manengkamma udde. ²⁵Wuŗru amungkangngu iamiu umaļiomanna; arawe naungngi amiu tawe maļuassa su sangkatou taumata, ampungnge asuene taumata udde, tadea'u Iamangngu su surga lai mangampungnga manga rosanu.

[²⁶Amungkangngu iamiu tawe mangampungnga taumata waine, Iamangngu su surga lai maddiru mangampungnga manga rosanu.]”

Aiwaḷo su ola’u taḷḷino Mawu Yesus

(*Mat. 21:23-27; Luk. 20:1-8*)

²⁷Imangitou nabelengke apia su Yerusalem. Wuḷḷu su tempo Mawu Yesus u’amatta mammaḷiwutta sulaḷummu Waḷe Mawu, manga imam tembonanne, manga huru n agama wuḷḷu manga piaḷḷa’u Yahudi nirumanta ringanni Tou. ²⁸Imangitou naiwaḷo, ”Apa pinangiananne I’o ma’ola’a sarangkanambone indi? Isai nangonggolu taḷḷino udde Si’o?”

²⁹Mawu Yesus sinumimbakka, ”Ia’u lai maiwaḷo siamiu. Simbaḷḷete ana see Ia’u lai mamasingkatta siamiu ringannu taḷḷino n sai Ia’u ma’ola’a inolaanna indi. ³⁰Yohanes mannaḷḷani ringannu taḷḷino n sai, Mawu Ruata ara’e taumata?”

³¹See manga imam tembonanne wuḷḷu manga piaḷḷa’u Yahudi nanattakke na’ire su wallatti mangitou. Imangitou nabbisara, ”Amungkangngu iite nabbisara, ’ringannu taḷḷino Mawu Ruata,’ itou sarun mabbisara, ’Anio iamiu tawe mangngimanna si Yohanes?” ³²Arawe masahadda lai mabbisara, ’Ringannu taḷḷino n taumata,” ana waugu imangitou matta’uttu taumata nambo, wuḷḷu manambo taumata massunna manungku Yohanes sangkatou nabi. ³³Nariaddi imangitou sinumimbakka, ”Iami wagga.”

See Mawu Yesus nabbisara simangitou, ”Amungkangngu aroddi, Ia’u lai tawe mamasingkatta siamiu ringannu taḷḷino n sai Ia’u ma’ola’a sarangkanambone indi.”

Sasumandingngu mamamanara m waillu anggore

(*Mat. 21:33-46; Luk. 20:9-19*)

12 Wua udde Mawu Yesus nanattakke mangngaḷḷa’a ringannu sasumandingnga su manga imam tembonanne, manga huru n agama wuḷḷu manga piaḷḷa’u Yahudi udde. Mawu Yesus nabbati’e, ”Pia sangkatou nassuanna su sambau waillu anggore, see wailla udde pinaḷiwutannu paggala. Wua udde itou naaḷi loḷḷangnga pa’olaanna pamakkannu anggore, see itou napararisikku waḷe m pandariaganna. Wua udde itou napasewa n waillu anggore udde su sire pira mamamanara, see inaiite su wanua waine. ²Napawe nia’omante tempone mangitingnga wua n anggore, taumata udde nandolokku sangkatou allangnge ringannu mamamanara m waillu anggore udde, iapatarimmattu wageangnge.



Wale pandariaganna su waillu anggore (12:1)

³Arawe mamamanara udde nanametta mangangimbe udde. Wua udde pinuulli mangitou see nandolokki tou niapaapuŕe ringannu tawe uŕene. ⁴See tatahuannu wailla udde nandolokku apia sangkatou mangangimbe waine. Arawe mamamanara udde namuulla pua n mangangimbe udde see nillimbuaranna wuŕru nipansilianna. ⁵Tatahuannu wailla udde nandolokka apia sangkatou mangangimbe waine. Arawe imangitou namate mangangimbe udde. Wuŕru ete aroddi lai niola'i mangitou su anambo mangangimbe apan waine: lapiddu nipuulla wuŕru piaddu lai nipate. ⁶Isai lai wotongge irolokku tatahuannu wailla udde orassa indi? Ete sangkatou, eteudde anangge sassane apan arangnguanne. Nariaddi panginsueanne itou nandolokku anangge ringannu mamamanara udde. ⁷Ana'u sarun addatanni mangitou, su ringiranne. ⁷Arawe mamamanara udde nabbisara sangkatou ringannu sangkatou, 'Ete itou indi manahuanna, wette iite mamate sitou, tadea'u iite maasomba darotongge!' ⁸Ne ana'a udde sinametta, see nipate. Winalunanne niramme mangitou su liuddu wailla udde."

⁹See Mawu Yesus naiwaŕo, "Apa sarun olaannu tatahuannu wailla udde? Itou sarun rumanta wuŕru mamate manga mabbawailla udde, see manantillu wailla udde su mabawailla waine. ¹⁰Iamiu asinungka suete naawasa addoanne sulalummu Wuke Susi,

'Watu apan tawe ipaattu manga maaola'a wale naola'e watu apan paarorone.

¹¹Ete indi inolaannu Mawu; marramaga atonna!"

¹²Ne manga pira piarra'u walagu Yahudi apan naaringikka sasumandingnga udde, mangke maddea'a manametta Mawu Yesus, ana waugu imangitou masingkatte sasumandingnga udde ipammasendekku Mawu Yesus simangitou. Arawe imangitou matta'uttu taumata nambo. Nariaddi, imangitou inaita nanantangngu Mawu Yesus.

Su ola'u pamamaekka wose

(Mat. 22:15-22; Luk. 20:20-26)

¹³Manga pira taumata n Farisi wuṛṛu manga pira taumata n Herodes nirolokka maddea'a mapaasaḷa Mawu Yesus ringannu manga aiwaḷo. ¹⁴Imangitou nirumanta ringannu Mawu Yesus wuṛṛu nabbi-sara, "Iamangnga Huru, iami masingkatta Iamangnga tawe mangawusu wuṛṛu tawe madaringikka ringiranni sai-sai. Iamangnga manggarra'a ringannu masema-semakka su ola'u apulu Mawu Ruata su taumata, ana waugu Iamangnga tawe mamile taumata. Ne Iamangnga wotongnge masingkatta siami, 'Tumuṛṛuttu atorannu agama ng kite, wotongnge iite mamaekka wose su Kaisar ara'e tawe wotongnge? Iite mamaekka wose udde ara'e tawe?'"

¹⁵Mawu Yesus naasingkatta lilangkamaḷe'i mangitou. Itou sinumimbakka, "Anio iamiu maddea'a mappaasaḷa-U? Annama'a palleha'a Sia'u sambau roitta saḷa'a."

¹⁶Ne imangitou nangagillu roitta saḷa'a sambau Sitou. See Mawu Yesus naiwaḷo, "Hambaranna wuṛṛu aranni sai indi?"

"Kaisar," sasimbakki mangitou.

¹⁷"Ne, amungkangngu aroddi," wisara Mawu Yesus, "onggoḷa'a si Kaisar apa apan tatahuanannu Kaisar, wuṛṛu onggola'a su Mawu Ruata apa apan tatahuanannu Mawu Ruata." Imangitou naherangnga naaringikka Sitou.

Su ola'u pabbawangunna wuassu papate

(Mat. 22:23-33; Luk. 20:27-40)

¹⁸Sire pira taumata n Saduki nirumanta ringannu Mawu Yesus. (Imangitou udde walahannu taumata pia addapatta manungku taumata nate tawe mabangunna apia.) ¹⁹"Iamangnga Huru," wisara mangitou su Mawu Yesus, "Musa namoṛṛettu tita indi siite: 'Amungkangngu sangkatou esakka mate wuṛṛu itou tawe ana'a, ne tuṛṛangnge sarun maawingngu inawaḷuane udde tadea'u pia pabbawalaga su taumata apan natete udde.' ²⁰Suete nariaddi pia sire pitu sangkatuṛṛangnga. Pahuḷune naa-

wingnga, wua udde nate tawe naasomba ana'a. ²¹Wua udde iapa aruane naawingngu inawaŕuanne udde, arawe itou lai nate tawe naasomba ana'a. Olangnge udde nariaddi lai su turrangnge atallune, ²²wurru nal-lajisansunna na'oma n sara appitune. Panginsueanne wawine udde lai nate. ²³Su allo n taumata nate mabangunna apia, awingngi sai wawine udde? Ana waugu sire pitu sangkaturangnga suete naawingngi tou!"

²⁴Mawu Yesus sinumimbakka, "Iamiu niumaŕiwu atonna. Ana waugu iamiu tawe maasunna Wuke Susi wurru lai tarriŕino Mawu Ruata. ²⁵Ana waugu napawe manga taumata nate mabangunna apia, imangitou tate lai maawingnga, arawe imangitou sarun mabbiakka ere lai mala'ekatta su surga. ²⁶Wurru su ola'u taumata nate iapawangunna apia, iamiu taambe naawasa sulalummu wuke Musa su ola'u anggarumunanne lukkenggamma udde? Sulalummu manga addoanne udde, uaworretta manungku Mawu Ruata nabbisara si Musa, 'Ete Ia'u Mawu Ruata m Abraham, Mawu Ruata n Ishak, wurru Mawu Ruata n Yakub.' ²⁷Mawu Ruata udde waŕine Mawu Ruata n taumata nate. Itou Mawu Ruata n taumata wiakka. Iamiu inumaŕiwu atonna!"

Parenta apan ahewaŕanne

(*Mat. 22:34-40; Luk. 10:25-28*)

²⁸See nirumantate sangkatou huru n agama madaringikka hatto Mawu Yesus wurru manga taumata n Saduki udde. Huru n agama udde naasilo manungku Mawu Yesus suete sinumimbakka manga taumata udde ringannu mapia-pia. Ne itou naiwaŕote Mawu Yesus, "Parenta suapa apan ahewaŕanne wuassu aŕawo'u parenta?"

²⁹Mawu Yesus sinumimbakka, "Parenta paarorone eteudde: 'Paddaringikkawe, iamiu pabbawalagu Israel! Mawu Ruata ng kite, Mawu udde tinggassa. ³⁰Pandangngu Mawu Ruatanu ringannu ahewallu naungngu, ringannu ahewallu apulunu, ringannu ahewallu apendammu, wurru ringannu aŕawo'u auatannu.' ³¹Parenta aruane eteudde, 'Pandangngu sansuŕungngu taumata ere i'o lai mandangngu ririnu sassane.' Tate parenta waine apan nangillemba n ahewalle wuassu parenta darua udde."

³²See huru n agama udde nabbisara Mawu Yesus, "Narriŕino atonna, Iamangnga Huru! Atonna su wisara n Iamangnga: Mawu Ruata apan tinggassa, wurru tawe Mawu Ruata lai waine. ³³Wurru rinone taumata mandangngu Mawu Ruata ringannu ahewallu naungnge, wurru ringannu anambo n ringiranne see lai ringannu anambo n auatanne. Wurru itou lai rinone umakkannu sansuŕungnge ere lai ririne sassane. Udde mappianne wuassu mangngonggolu sasamba itatambunna wurru manga sasamba waine su Mawu Ruata."

³⁴Mawu Yesus naasilo manungku huru n agama udde suete sinumimbakka ringannu mapia atonna. Wurrū Mawu Yesus nabbisara sitou, "I'o maranite maola'a laḷoḷḷo n araratuannu Mawu Ruata."

Wua udde tate saran sangkatou lai apan waḥrani mapaasabangngu aiwaḷo su Mawu Yesus.

Su ola'u Ratu m Punnu Saḷamatta

(Mat. 22:41-46; Luk. 20:41-44)

³⁵Tantaḷanna mangngarra'a su Waḷe Mawu, Mawu Yesus naiwaḷo, "Ereapa manga huru n agama wotongnge mabbisara manungku Ratu m Punnu Saḷamatta udde wuassu papapulunni Daud? ³⁶Wutte'e Daud sassane – ana waugu niranannu Ghaḥraho Mawu Ruata – nabbisara,

'Mawu nabbisara su Mawu-U:

a'iante su samba'a n uanang-Ku

ma'oma n sara Ia'u ma'ola'a manga seennu

massurḥbawa si'o.'

³⁷Nariaddi amungkangngu Daud mannago n Ratu m Punnu Saḷamatta udde 'Mawu', ereapa wotongnge itou papapulunni Daud?"

Iapaanaungnga tadea'u paatehamma su saruannu manga huru n agama

(Mat. 23:1-36; Luk. 20:45-47)

Taumata nambo apan su Waḷe Mawu udde maḷuassa naungnge madaringikka Mawu Yesus mangngarra'a. ³⁸Itou nabbisara simangitou, "Paatehamma su saruannu manga huru n agama. Apulu mangitou u'amatta ualuḥḥe n jubah apan maḷo'e wurrū apulune aaddatanna su manga pasakka. ³⁹Apulu mangitou su manga tampa mawantuga sulaḷummu waḷe m pattataḥramawuanna wurrū su manga andeangnga. ⁴⁰Imangitou mallinga manga wawine waḷu wurrū mangngarḥo waḷene. Wurrū ana see maapamuni n aḷaḷeo mangitou udde, imangitou u'aḷiomanna maḷo'e-ḷo'engnga. Ruumanni mangitou saḷimmurine udde mawakkatta!"

Aonggolu wawine waḷu

(Luk. 21:1-4)

⁴¹Su tempo ua'ianna uasasaruanna tampa m pondi su Waḷe Mawu, Mawu Yesus mannutudda manga taumata mantarḥo n roitti mangitou sulaḷummu tampa n roitta udde. Manambo taumata ala nantarḥo n

roitti mangitou aroddi anambone; ⁴²see sangkatou wawine waļu apan asiangnga nirumanta lai. Itou nantařro n darua roitta witu'a, eteudde roitta aregane awawoanne. ⁴³Ne Mawu Yesus namago manga malalařřenggen-Ne see nabbisara simangitou, "Paanaunge indi: Wawine waļu asiangnga udde suete nantařro su tampa m pondi udde nilumebe anambone wuassu tinařro manga taumata waine. ⁴⁴Ana waugu imangitou sarangkanambone suete nangonggolu lebe n darotongge. Arawe wawine waļu udde salaiwe tumanite n asiangnga nangonggolu sarangkanambone apan tatahuananne - eteudde apan pia gunane su pabiarranne."

Mawu Yesus nabatti'u ahahohakku Waļe Mawu

(*Mat. 24:1-2; Luk. 21:5-6*)

13 Su tempo Mawu Yesus nanantangke n Waļe Mawu, sangkatou su wallattu mallalařřenggen-Ne, nabbisara, "Iamangnga Huru, pa'ellega manga waļe udde. Pa'ellega manga watune. Waļine hampa arřramage!"

²Mawu Yesus sinumimbakka, "To ma'ellega manga waļe apan wahewa udde? Tawe saran sambau watu wuassu waļe udde mallambe uaatokka su tampane, sarangkanambone sarun iapaahohakka."

Asasusa wuřru pananansara

(*Mat. 24:3-14; Luk. 21:7-19*)

³Wua udde Mawu Yesus inaita su Wuiddu Zaitun, wuřru inuma'iante su tampa uasaruanna Waļe Mawu. See Petrus, Yakobus, Yohanes wuřru Andreas nirumanta ringanni Tou ana maggahatto-Ne sassane. ⁴"Annama'a waļoa'a siami Iamangnga," unni mangitou Sitou, "Angngerate sarangkanambone udde sarun mariaddi? Wuřru manga tanda apa apan mammasingkatta manungku tempone nia'omante?"

⁵"Paatehamma," sasimbakku Mawu Yesus, "arie ma'oma n sara iamiu aawusuanna. ⁶Manambo taumata sarun rumanta ringannu arangku see mabbisara, 'Ete Ia'u itou udde!' see nangawusute taumata nambo udde. ⁷Amungkanngu iamiu maaringikka manga tingikku pangalo wuřru manga watti'u pasaseetta, arie paata'utta. Sarangkanambone udde sarun mariaddi, arawe sarangkanambone udde tawe papasingkatta manungku temponete kiamatta. ⁸Pabbawalaga sambau sarun mamangalo pabbawalaga waine. Araratuanna sambau sarun mamangalo araratuanna waine. Su aļawo'u tampa sarun mallinukka wuřru pia aļaļunussa.

Sarangkanambone udde wakkute panattaranne, ere rada'a apan niapendamannu sangkatou wawine apan mangunsiwe.

⁹Iamiu rinone paatehanna, ana waugu iamiu sarun sametanna wuṛru parikisanna su saruannu mallarṛuungnga. Iamiu sarun puulanna su manga waḷe m pattatarṛamawuanna. Iamiu sarun parikisanna sumaruanna manga tembonanne wuṛru manga ratu ana waugu iamiu mallalarṛenggeng-Ku. Wuṛru eteudde temponu manganggillu tatiala su ola'u riri-U simangitou. ¹⁰Watti'u Aḷaḷuassa wuassu Mawu Ruata udde sarun iapasingkatta su anambo n pabbawalaga. ¹¹Wuṛru napawe iamiu sametanna wuṛru parikisanna su saruannu mallarṛuungnga, arie passingawangnga su ola'u apa apan sarun iwisara ng kamiu. Amungkangngu nia'omante tempone mabbisara, waḷoa'a apa apan suete niapaasingkatta siamiu su tempone. Ana waugu manga wisara apan iwabbisara ng kamiu udde waline wisaranu sassane, ewe'e nirumanta wuassu Gharṛaho Mawu Ruata. ¹²Taumata sarun mandaleo turṛangnge sassane ma'oma n sara pateanna. Udde lai sarun mariaddi su wallattu iamangnga wuṛru anangnge. Aḷarṛana'a sarun lumawangnga inangnga iamangnge, wuṛru manantilli mangitou pateanna. ¹³Iamiu sarun iarintinnu anambo n taumata ana waugu iamiu mallalarṛenggeng-Ku. Arawe taumata apan matatarṛangnga ma'oma n sara panginsueanne sarun masaḷamatta."

Aḷaleo apan maahohakka

(Mat. 24:15-28; Luk. 21:20-24)

¹⁴"Iamiu sarun maasilo 'Aḷaleo apan maahohakka' uarisikka su tampa apan isassingadda sitou. (Iapasingkatta su mabawasa: Ringira'e apa atappasanne!) Su tempo udde taumata apan uatana'a su Yudea rinone tumalangnga watukku wuidda. ¹⁵Taumata apan roso su wowo n atuppu waḷe arie pallintukka wuṛru sumutta su waḷe manganu saranapa. ¹⁶Taumata apan su wailla arie pabelengnga mangalappa jubahne. ¹⁷Maata'utta atonna manga allo udde su wawine apan uailloṛro, su inangnga apan ta'e mappasusu n anangnge. ¹⁸Aaḷiomante tadea'u manga olangnge udde tawe mariaddi, su tempo manguranna. ¹⁹Su manga allo apan maata'utta udde, sarun pia sambau asasusa apan taambe nariaddi, ro'e n Mawu Ruata nandiaddi runia na'oma n sara orassa indi, wuṛru tate lai mariaddi apia. ²⁰Unnu wisara, Mawu Ruata tawe nangautta tempone udde, ne tawe saran sangkatou masaḷamatta. Arawe ana waugu manga taumata apan nipele-Ne, Mawu Ruata nangautta tempone udde.

²¹Su tempo udde amungkangngu piaddu sangkatou-sangkatou mabbisara siamiu, 'Ellehet Ratu m Punnu Saḷamatta udde isindi!' ara'e 'Ellehet Itou isudde!' – arie pangimanna taumata udde. ²²Ana

waugu mananałamatta awusu wuṛṛu manga nabi awusu sarun rumanta. Imangitou sarun ma'ola'a aḷawo'u inolaanna wahahewa wuṛṛu aḷawo'u aḷaṛṛindu'a ipangawusu aḷaṛṛana'u Mawu Ruata amungkanngu wotongnge. ²³Nariaddi, paatehamma! Sarangkanambone udde suete Ta'u nia-paasingkatta siamiu tantaḷanna olangnge udde taambe nariaddi."

Daranta n Ana'u Taumata

(Mat. 24:29-31; Luk. 21:25-28)

²⁴"Napawe tempo n asasusa udde naḷiudde, matannallo sarun mad-dandumma, wuṛṛu wuḷanna tate lai semakke. ²⁵Manga anumpitanna sarun manawo wuassu langitta, wuṛṛu manga tembonannu winalanganna sarun massongkakka. ²⁶Su tempo udde Ana'u Taumata sarun iasilo rumanta wuassu winabbawa ringannu taṛṛino apan wahewa wuṛṛu ma-wantuga. ²⁷Itou sarun mandolokku manga mala'ekatta mangammulu aḷawo'u pabbawalage wuassu pi'u n runia appatta, wuassu manga pentakku runia wuṛṛu manga pentakku langitta."

Aḷaṛṛa'a wuassu alu ara

(Mat. 24:32-35; Luk. 21:29-33)

²⁸"Panganute aḷaṛṛa'a wuassu alu ara. Amungkanngu manga rong-gane nangelompe wuṛṛu lullaukke, wuṛṛu mannattakke mallaluwo, iamiu masingkatte manungku tempo m padissa maranite. ²⁹Aroddi lai amungkanngu iamiu maasilo aḷawo'u olangnge udde mariaddi, iamiu masingkatte manungku tempone maranite atonna. ³⁰AsingKate! Anambo n arariadianna indi sarun mariaddi tantaḷanna manga taumata apan wiakka orassa indi sarangkanambone taambe nate. ³¹Langitta wuṛṛu runia sarun mawuḷi, arawe wisara-U sidutu ma'oma n sara maḷannu-ḷannu."

Tawedu masingkattu allone wuṛṛu oranne

(Mat. 24:36-44)

³²"Salaiwe aroddi, tawedu saran sangkatou masingkattu tempo suapa allone ara'e oranne. Manga mala'ekatta su surga lai wagga, Ana'a lai wagga, tumba'u Iamangnga sassane masingkatta. ³³Nariaddi iamiu ṛinone paariaga ana waugu iamiu wagga tingngerate tempone. ³⁴Olangnge isumandingnga ere sangkatou apan nanantangngu wuḷene

see inai su tampa marau. Itou nandolokku manga ralo|oranne mandi-aga wałene, wuřru nangagillu manara simangitou sangkatou-sangkatou. Su mandariaga ngara, itou nananata tadea'u mandiaga mapia-pia. ³⁵Ana waugu udde iamiu řinone paariaga, ana waugu iamiu wagga tinggerate tatahuannu wałe udde mabelengnga – asinungka wawallo, asinungka allorane, asinungka maraninnallo, ara'e asinungka su sasabangngu mattannallo. ³⁶Amungkangngu itou nirumanta awagananna, arie ma'oma n sara Itou maaratingnga siamiu tantałanna mattiilla. ³⁷Apa iwabbisara-U indi siamiu, iwabbisara-U lai su manga taumata: paariagate!"

Mangngaalla su saruannu Mawu Yesus

(Mat. 26:1-5; Luk. 22:1-2; Yoh. 11:45-53)

14 Rua allo lai Allo m Paskah wuřru Ramea n Roti Tawe Ragine. Manga imam tembonanne wuřru manga huru n agama tantałanna maddea'a lałanne manametta Mawu Yesus ringannu małanna-łannaba, wuřru mamate Sitou. ²"Arawe arie iite ma'ola'a udde su tempo n ramea," wisara mangitou, "ana waugu takka maola'a pagahahio."

Mawu Yesus niseborřannu lana mawangngi

(Mat. 26:6-13; Yoh. 12:1-8)

³Napawe Mawu Yesus na'omate su Betania, su wałe n Simon apan dorone uatatařrangnga rada'a paro, sangkatou wawine nirumanta ringanni Tou. Itou uaapiddu sambau wotolla pualam, lałorřoannu lana mawangngi apan maarega, niola'a wuassu řamutta mawangngi. Su tempo Mawu Yesus tantałanna u'anna, wawine udde namesangnga wotolla udde wuřru nanebokku lana mawangngi su pua Mawu Yesus.



Manga sarantapa wuassu pualam (14:3)

⁴Sire pira taumata isudde mangke nasa'u wuṛru uawawisara sangkatou ringannu sangkatou, "Apa hunane lana mawangngi udde iasebokka aroddi? ⁵Lana udde wotongnge iwaḷu'a ringannu aregane mallebbe wuassu tallu ṛasutta roitta saḷa'a, wuṛru roinne ionggolla su taumata asiangnga!" Ne imangitou nasa'ute su wawine udde.

⁶Arawe Mawu Yesus nabbisara, "Wala'e aroddi itou! Anio iamiu mapaasusa n tou? Itou ma'ola'a inolaanna mapia, wuṛru maaḷuassa Sia'u. ⁷Taumata asiangnga sidutu su wallatti amiu. Suapa n tempo amungkangngu iamiu maapulu, iamiu wotongnge mantuḷungngi mangitou. Arawe Ia'u tate maḷannu su sampunna ringanni amiu. ⁸Wawine indi suete na'ola'a apa wotongnge olaanni tou. Itou suete nanaddia lana mawangngi sia'u su tempo Ia'u taambe nilabingnga. ⁹Pangimante! Su ahewallu runia, su tampa Watti'u Aḷaḷuassa wuassu Mawu Ruata ia-pasingkatta, inolaannu wawine indi sarun iwatti'a lai, maola'a sambau pananaunganna sitou."

Yudas inumire mamate Mawu Yesus

(Mat. 26:14-16; Luk. 22:3-6)

¹⁰See Yudas Iskariot, sangkatou wuassu sire mapuḷo dua malalaṛṛenggenṅu Mawu Yesus, inaite ringannu manga imam tembonanne ringannu pandumma mamate Mawu Yesus. ¹¹Imangitou lembo n lulluassa naaringikka wisarane udde, wuṛru na'ire sarun mangagillu roitta si Yudas. Ne Yudas mannattakke maddea'a tempone mapia mamate Mawu Yesus.

Mawu Yesus inumanna annu Paskah ringannu manga mallalaṛṛenggen-Ne

(Mat. 26:17-25; Luk. 22:7-14, 21-23; Yoh. 13:21-30)

¹²Su allo paarorone wuassu Allo Wahewa n Roti Tawe Ragine - su tempo taumata mammototta domba n Paskah - mallalaṛṛenggenṅu Mawu Yesus naiwaḷo Sitou, "Suapa tampa ipaapulu n lamangnga iami manaddia annu Paskah su lamangnga?"

¹³Mawu Yesus nandolokku rua ng katou su wallatti mangitou, "Roote su soa, poiaronddi sangkatou esakka apan tantaḷanna uaapiddu sambau wensada laḷoṛṛoannu ua'e, sarun massomba ng kami. Tantalongke sitou, ¹⁴watukku waḷe apan suttanni tou wuṛru waḷoa'a su tahuannu waḷe udde, 'lamangnga Huru ma'iwaḷo, suapa tampane Itou

wurru mallalarrenggen-Ne umanna annu Paskah.' ¹⁵Taumata udde sarun mamantingidu sambau wabo'a ualju rosone apan wahewa. Wabo'a udde suete niatokka, nasuungnga ringannu lalorrone. Saddiaite sarangkanambone udde poiaroddi siite."

¹⁶See rua ng katou mallalarrenggenu Mawu Yesus udde inaito watukku soa. Poiaroddi itarua naaratingnga sarangkanambone ere suete niwalo Mawu Yesus. See imangitou nanaddiate annu Paskah.

¹⁷Rabbine, Mawu Yesus nirumanta ringannu sire mapulo dua mallalarrenggen-Ne. ¹⁸Wurru tantaļanna imangitou ua'ianna u'anna, Mawu Yesus nabbisara, "Padaringikka: pia sangkatou, wuassu wallatti amiu, apan su orassa indi u'anna ringang-Ku sarun mamate Sia'u."

¹⁹Naaringikka udde, mallalarrenggenu Mawu Yesus mangke nasusa. See sangkatou ringannu sangkatou nanattakke naiwalo Mawu Yesus, "Asinungka waline ia'u apan su pandummi lamangnga?"

²⁰Mawu Yesus sinumimbakka, "Itou sangkatou wuassu wallatti amiu sire mapulo dua indi, apan u'anna su lama'a sambau ringang-Ku. ²¹Atonna Ana'u Taumata sarun mate ere uaworretta su Wuke Susi. Arawe nasilikate taumata apan mamate Ana'u Taumata udde. Mappianne taumata udde tawe niasungkangnga!"

Saliwanggu Mawu

(*Mat. 26:26-30; Luk. 22:14-20; 1Kor. 11:23-25*)

²²Tantaļanna imangitou u'anna, Mawu Yesus nanganu roti inumaliomante aaliomannu aadiangkamanna su Mawu Ruata. Wua udde Itou nattahiate roti ringannu lima-Ne, wurru niaggile su mallalarrenggen-Ne ringannu wisara-Ne, "Sengkampe wurru ante, indi wadang-Ku."

²³Wua udde Itou nanganute sambau mangko n anggore. Itou inumaliomanna aaliomannu aadiangkamanna su Mawu Ruata, see nangagille mangko udde su mallalarrenggen-Ne. Wua udde imangitou sarangkanambone na'inumma anggore udde. ²⁴Wua udde Mawu Yesus nabbisara, "Ete indi rarra-U apan mapaasuunggu paaire Mawu Ruata, rarra apan suete niapatureo hunu n taumata nambo. ²⁵Pangimante: Ia'u tate ma'inumma anggore indi apia, ma'oma n sara tempone Ia'u ma'inumma anggore wakku su sampunna ringanni amiu su Runia Wakku n lamang-Ku."

²⁶Wua udde imangitou nangantari n sambau antari daralo. Wurru wua udde imangitou inaito su Wuiddu Zaitun:

Papasingkata manungku Petrus sarun massinaaddu Mawu Yesus

(*Mat. 26:31-35; Luk. 22:31-34; Yoh. 13:36-38*)

²⁷Wua udde Mawu Yesus nabbisara simangitou, "Iamiu sarangka-nambone sarun tumalangnga manantang-Ku. Ana waugu sulaŕummu Wuke Susi uaworretta, 'Mawu Ruata sarun mamate mallaŕu'adde, wurru ammuŕannu dombane sarun massaliawukka.' ²⁸Arawe napawe Ia'u iapa-wangunna apia, Ia'u sarun inai malliu roro siamiu su Galilea."

²⁹"Tawe," sasimbakki Petrus, "wala'e imangitou nambo manantangngu Iamangnga, ia'u atonna-tonna tawe manantangnga."

³⁰"Paanaunge," wisara Mawu Yesus, "rabbi indi lai, tantaŕanna manu'a taambe inumu'u aruane, i'o paatallute massinaadu riri-U."

³¹Petrus sinumimbakka ringannu atonna-tonna, "Wala'e ia'u mate su sampunna ringannu Iamangnga, saran paassa ia'u tawe mabbisara manungku ia'u wagga n Iamangnga!"

Wurru mallaŕarnggen-Ne waine lai nabbisara arodidi.

Mawu Yesus inumaliomanna su Getsemani

(*Mat. 26:36-46; Luk. 22:39-46*)

³²Imangitou na'omate su sambau tanpa aranne Getsemani, wurru Mawu Yesus nabbisarate mallaŕarnggen-Ne, "A'iante isindi tantaŕanna Ia'u inai umaliomanna."

³³See Mawu Yesus nangahe si Petrus, Yakobus wurru si Yohanes inai su sampunna ringanni Tou. Itou nanattakke massusa wurru susinggawangnga. ³⁴"Naungku massusa atonna," unnu Mawu Yesus simangitou, "pendamanna ere mappulute mate. Atana'e isindi wurru paa-riagate!"

³⁵Mawu Yesus inaita nangindau adio'a see inumaliintuda su leta'a wurru inumaliomanna. Sulaŕummu aaliomanne Itou nadorongnga amungkangngu wotongnge, Itou tawe mamendamma orassu sansara udde. ³⁶"Iamangnga, o Iamangnga," wisara-Ne, "tawe saran sambau apan tawe maola'a su Iamangnga. Aŕappe asasusa indi wuassia-U. Arawe arie tumurutta apulu-U ewe'e apulu n Iamangnga."

³⁷Wua udde Mawu Yesus nabelengke apia wurru inaratinganna mallaŕarnggen-Ne tantaŕanna mattiilla. Itou nabbisara si Petrus, "Simon, i'o mattiilla? Tumba'u sangka orassa i'o tawe maariaga?" ³⁸See Mawu Yesus nabbisara simangitou, "Pandiagate, wurru aaliomanna, tadea'u iamiu tawe maasomba wawono'a. Gharrahonu maapulu ma'ola'a su

rinone, arawe iamiu tawe maatarangnga ana waugu pallaḷagu n taumata udde lome.”

³⁹Paasa lai Mawu Yesus inai umaḷiomanna ringannu aalḷiomanne apan uasuḷungnga. ⁴⁰Wua udde Itou nabelengke apia ringannu mallaḷarḷenggen-Ne wuḷḷu naaratingnga imangitou ta'e mattiilla, ana waugu imangitou tumanite n aamaḷiḷanna. Ne imangitou wagga apa apan sarun iwisara mangitou su Mawu Yesus.

⁴¹Napawe Mawu Yesus nabelengke ringanni mangitou apia su atallune, Itou nabbisara, "Ta'e lai mattiilla iamiu wuḷḷu uailloḷo? Wotonggete! Nia'omante tempone Ana'u Taumata itantilla su lima n taumata marosa. ⁴²Pabbangunte, wette iite inaita. Pa'ellega! Taumata apan mamate Sia'u uddete!"

Mawu Yesus sinametta

(*Mat. 26:47-56; Luk. 22:47-53; Yoh. 18:3-12*)

⁴³Tantaḷanna Mawu Yesus ta'e mabbisara, nirumantate Yudas, sangkatou wuassu sire mapuḷo dua mallaḷarḷenggen-Ne udde. Uarḷundinganni sitou lai nirumanta taumata nambo uaapiddu haḷele wuḷḷu papuulla. Imangitou nirolokku manga imam tembonanne, manga huru n agama wuḷḷu manga piaḷḷa'u taumata n Yahudi. ⁴⁴Taumata taḷḷa pate suete nanantunnu sambau tanda simangitou. "Taumata apan ta'u ari'anna," unni tou simangitou, "eteudde taumata-Ne. Sametta Itou wuḷḷu apira'a ringannu riagane apan matohassa."

⁴⁵Su tempo Yudas nirumanta, itou lapiddu inai ringannu Mawu Yesus wuḷḷu nabbisara, "Iamangnga Huru!" wua udde itou nangari'a Mawu Yesus. ⁴⁶See manga taumata nirumanta su sampunna ringanni Yudas nanametta Mawu Yesus wuḷḷu niḷḷapusse Itou. ⁴⁷Arawe sangkatou su wallattu taumata isudde nanawutta haḷele wuḷḷu namilitta allangngu imam wahewa, na'oma n sara napototta taḷingane. ⁴⁸See Mawu Yesus nabbisara simangitou, "Anio Ia'u indi taumata laḷeo, na'oma n sara iamiu nirumanta uaapiddu haḷele wuḷḷu papuulla manametta Sia'u? ⁴⁹Miallo-miallo Ia'u mangngaḷḷa'a su Waḷe Mawu su saruanni amiu arawe iamiu tawe manametta Sia'u. Arawe atonna sarun maola'a aroddi, tadea'u matipusse apa apan uawoḷḷetta sulaḷummu Wuke Susi."

⁵⁰Anambo mallaḷarḷenggen-Ne tinumaḷangnga nanantangngu Mawu Yesus.

⁵¹Sangkatou umbasanna tumba'u ualuḷḷe n maḷarḷrenessa sanggesa'a uaḷindumma wadangge tinumantalongnga Mawu Yesus. Manga taumata maapulu manametta sitou, ⁵²arawe itou namallossu maḷarḷrenessa udde, see tinumaḷangnga tantoḷe.

Mawu Yesus su saruannu Mallaṛṛuungngu Agama

(Mat. 26:57-68; Luk. 22:54-55, 63-71; Yoh. 18:13-14, 19-24)

⁵³Mawu Yesus niapidde su waḷe imam wahewa. Poiaroddi anambo n imam tembonanne, piaṛṛa'u Yahudi, wuṛṛu huru n agama maam-mulla. ⁵⁴Petrus uatantalongnga Mawu Yesus wuassu marau na'oma n sara sinumutta su passalangannu waḷe m imam wahewa. Poiaroddi itou inuma'ianna mandarangnga marani m putungnga su sampunna ringannu mandariaga. ⁵⁵Manga imam tembonanne wuṛṛu manga Mallaṛṛuungngu Agama mangke maddea'a maasomba pasasaḷa Mawu Yesus tadea'u wotongnge maṛṛuumanni Tou ma'oma n sara pateanna. Arawe imangitou tawe naasomba saran sambau pasasaḷa. ⁵⁶Manambo mattatiala awusu niwagoanna iapatiala awusu su saruannu Mawu Yesus, arawe sasimbakki mangitou uapapaṛṛala sangkatou ringannu sangkatou.

⁵⁷See manga pira taumata mattatiala nirumarisikka wuṛṛu nangagillu tattiala awusu su ola'u Mawu Yesus. ⁵⁸"Iami naaringikka taumata indi mabbisara, 'Ia'u sarun manggohakku Waḷe Mawu Ruata indi apan suete niola'u taumata, wuṛṛu napawe tallute allo Ia'u sarun mapararisikku waine lai, apan waḷine niola'u taumata.'" ⁵⁹Arawe wisara manga taumata udde uapapaṛṛala sangkatou ringannu waine.

⁶⁰Ne imam wahewa dirumarisikka su saruanni mangitou sarangkanambone wuṛṛu naiwaḷo Mawu Yesus, "Anio I'o tawe sumimbakka manga aiwaḷo apan ipa'iwaḷo Si'o?"

⁶¹Arawe Mawu Yesus maḷannaba. Itou tawe sinumimbakka saran paassa. See imam wahewa udde naiwaḷo paassa lai Sitou, "Ete I'o Ratu m Punnu Saḷamatta, Ana'u Mawu Ruata Lembo Naukkassa?"

⁶²"Ete Ia'u," sasimbakku Mawu Yesus, "wuṛṛu iamiu sarangkanambone sarun maasilo Ana'u Taumata uma'ianna su uanannu Mawu Ruata Apan Lembo Mataṛṛino wuṛṛu rumanta sulaḷummu winabbawa wuassu langitta!"

⁶³Ne imam wahewa nangesa'a laungnge wuṛṛu nabbisara, "Ipa'ura lai sakassi! ⁶⁴Iamiu naaringikke sassane manga wisara-Ne apan ipanggadiao'a Mawu Ruata. Orassa indi ereapa i'o makkawessu hatto indi?"

Imangitou sarangkanambone nakkawessa manungku Mawu Yesus nassaḷa, wuṛṛu ṛinone iṛṛuumanna ma'oma n sara mate.

⁶⁵See sire pira taumata nanattakke mangngadu Mawu Yesus, wuṛṛu imangitou nallindumma mata-Ne wuṛṛu namuulla Sitou, see nabbisara, "Si'ata'a, isai namuulla Si'o?" Manga mandariaga lai namero Mawu Yesus.

Petrus nassinaadu Mawu Yesus

(*Mat. 26:69-75; Luk. 22:56-62; Yoh. 18:15-18, 25-27*)

⁶⁶Tantaļanna Petrus ta'e su passalanganna, sangkatou wawine allangu imam wahewa nirumantia isudde. ⁶⁷Napawe naasilo si Petrus manningikka marani m putungnga, itou nanutukka mapia-pia hati m Petrus wuŗru nabbisara, "Waļinewe i'o lai su sambau ringannu Mawu Yesus taumata Nazaret udde?"

⁶⁸Arawe Petrus nassinaada. "Ia'u waga wuŗru tawe maasunna apa pandumannu," unni Petrus su mangangimbe udde. See Petrus inaita su ngara m pasallangannu waļe m imam wahewa udde. [Su orassa udde lai manu'a inumu'u.]

⁶⁹Mangangimbe wawine udde na'ellega si Petrus apia, wuŗru nabbisara su manga taumata isudde, "Atonna itou sangkatou wuassu wallatti mangitou!" ⁷⁰Arawe Petrus nassinaada apia.

Tawe naļannu wua udde, manga taumata isudde nabbisara apia si Petrus, "Tate maappasinaada lai i'o, atonna i'o sangkatou wuassu wallatti mangitou, ana waugu i'o wuassu Galilea!"

⁷¹See Petrus nanattakke massalu wuŗru nabbisara, "Ia'u tawe maailala taumata apan ipappandummi amiu udde!"

⁷²Orassa udde lai manu'a inumu'u aruane. Wuŗru Petrus naanaungnga manungku Mawu Yesus suete nabbisara sitou. "Tantaļanna manu'a taambe inumu'u paarua, i'o paatallute massinaadu riri-U." Ne Petrus lulluaite ringannu massusa atonna.

Mawu Yesus su saruanni Pilatus

(*Mat. 27:1-2, 11-14; Luk. 23:1-5; Yoh. 18:28-38*)

15 Ruaallo atonna, manga Mallarŗuungngu Agama nasutta lai manga imam tembonanne, manga piarŗa'u taumata n Yahudi wuŗru manga huru n agama maļiha-ļihakka na'ire. Imangitou narŗapussa Mawu Yesus, wua udde nangapiddi Tou wuŗru tinantilla si Pilatus.

²Pilatus naiwaļo Mawu Yesus, "Atonna I'o ratu n taumata n Yahudi?"

"Aroddi ere su wisaranu," sasimbakku Mawu Yesus.

³Manga imam tembonanne nabaļo manambo ala'e su ola'u Mawu Yesus. ⁴See Pilatus naiwaļo apia Mawu Yesus. "I'o maddiri sumimbakka? Pa'ellega sangkura aalae mangitou ipangalae-Nu!"

⁵Arawe Mawu Yesus tawe sumimbakka sara n adio'a, na'oma n sara Pilatus naherangnga.

Mawu Yesus iŕruumanna pateanna

(Mat. 27:15-26; Luk. 23:13-25; Yoh. 18:39-19:16)

⁶Suapa n pia Ramea n Paskah, inanaramanne Pilatus mammallossu sangkatou ruumanna tumuŕruttu tatebo'u taumata nambo. ⁷Sulaŕummu tuttupanna su wallattu manga lumaŕawangnga apan naola'a taŕra pate su tempo m passaseetta, pia sangkatou aranne Barabas. ⁸Taumata manambo naammulla wuŕru nadorongnga si Pilatus tadea'u itou mammallossu sangkatou uarruumanna ere su inanaramanne. ⁹Pilatus naiwaŕo simangitou, "Iamiu maapulu ia'u mamallossu ratu n taumata n Yahudi udde siamiu?" ¹⁰Ana waugu Pilatus naatutukka manungku manga imam tembonanne nanantillu Mawu Yesus sitou ana waugu naungngi mangitou tawe maŕuassa.

¹¹Arawe manga imam tembonanne mammono'a awadaalla tadea'u madorongnga Pilatus mamallossi Barabas simangitou. ¹²Ne Pilatus nabbisara apia su taumata nambo udde, "Amungkangngu aroddi, ia'u rinone ma'ola'a apa su taumata apan isassago ng kamiu ratu n taumata n Yahudi udde?"

¹³Imangitou inumui, "Arussa'a Itou!"

¹⁴"Arawe apa aŕaŕeone?" aiwaŕo m Pilatus.

See imangitou inumui lembo ma'ikkatta lai, "Arussa'a Itou!"

¹⁵Pilatus maapulu mappaaŕuassu taumata nambo udde, ne itou namallosse n Barabas simangitou. Wua udde itou nandolokku taumata namuulla Mawu Yesus see tinantilli tou iapaarussa.

Manga tantara mannalangnga Mawu Yesus

(Mat. 27:27-31; Yoh. 19:2-3)

¹⁶Mawu Yesus niapidde manga tantara su tampa mallarruungnga su waŕe gubernure. Wua udde tantara niwagoante maammulla. ¹⁷See imangitou nalluŕre n jubah ungu su Mawu Yesus, wuŕru niolaanna araposa n araratuanna wuassu manga ranna roaanna, wua udde nitaappa su pua Mawu Yesus. ¹⁸Wua udde, imangitou nangadatta Sitou, "Saŕamatta ratu n taumata n Yahudi!" unni mangitou. ¹⁹Imangitou namuulla pua Mawu Yesus ringannu ta'inna, see imangitou nangaddu Sitou wuŕru nassubba su saruanni Tou. ²⁰Napawe suete nannalangnga Mawu Yesus, imangitou nalluatte jubah ungu udde see nilluŕreante n laung-Nge sassane. Wua udde Itou niapidde su liudde ana waugu iarussa.



Tantara n Roma (15:16)

Mawu Yesus niarussa

(Mat. 27:32-44; Luk. 23:26-43; Yoh. 19:17-27)

²¹Su tangnga n daļanna imangitou namata'u sangkatou iapapasanna arussa Mawu Yesus. Taumata udde wakkute wuassu ampungga inai watukku soa. (Aranne Simon, – wuassu Kirene – iamanggi Aleksander wuŗru Rufus.) ²²Mawu Yesus niapidda su sambau tampa aranne Golgota, atappasanne "Tampa n Tanggilala". ²³Isudde imangitou napa'inummu anggore laļo'annu awawanggi, arawe Mawu Yesus maddiru ma'inumma anggore udde. ²⁴Wua udde imangitou nangarussa n Tou, wuŗru nattahia laung-Nge ringannu ni'undi tadea'u maatan-tunnu wageanggu sangkatou-sangkatou. ²⁵Mawu Yesus niarussa puulla sio ruaallo. ²⁶Su wowo n arussa niwoŗreta su ola'u alae Sitou, ete-udde: "Ratu n Taumata n Yahudi". ²⁷Su sambau ringannu Mawu Yesus, imangitou lai nangarussa rua ng katou tarra rampassa; sangkatou su uananna wuŗru sangkatou lai su airri. [²⁸Ringannu aroddi nariaddite apa apan uawoŗretta sulaļummu Wuke Susi, eteudde: "Itou sassunnanna lai nareengga taumata laļeo."]

²⁹Manga taumata apan sussabbi isudde mangke uapapa'ilingnga wuŗru manggaļusa'a Mawu Yesus. Imangitou nabbisara, "Ei, Po apan

manggohakku Waļe Mawu Ruata wuŗru mapaarisikka sulaļummu tallu allo. ³⁰Annama'o lintukka wuassu arussa wuŗru panaļamatta riri-Nu!"

³¹Aroddi lai manga imam tembonanne wuŗru manga huru n agama manggeetta Mawu Yesus. Imangitou uahahatto sangkatou ringannu sangkatou, "Itou maasaļamatta taumata waine arawe tawe maasaļamatta riri-Ne sassane! ³²Amungkangngu Itou ratu n Israel, Ratu m Punnu Saļamatta, mappianne Itou orassa indi lumintukka wuassu arussa udde, tadea'u iami maasilo wuŗru mangngimanna Sitou!"

Manga taumata apan niarussa lai su sambau ringannu Mawu Yesus manggaļusa'a Mawu Yesus.

Apapate Mawu Yesus

(*Mat. 27:45-56; Luk. 23:44-49; Yoh. 19:28-30*)

³³Su allo allattune, aļannune tallu ng ka'orassa ahewallu wanua udde naddandumma. ³⁴Wuŗru su puulla tatallu wawallo, Mawu Yesus inumui ringannu tingikka ma'ikkatta, "Eloi, Eloi, lama sabakhtani?" atappasanne, "Oh Ruata'u, oh Ruata'u, anio I'o nanantang-Ku?"

³⁵Manga pira ng katou isudde naaringikka sasaliomanna udde, wuŗru nabbisara, "Padaringikka, Itou mamago si Elia!" ³⁶Sangkatou wuassi mangitou maļiha-ļihakka nanganu wunga n sahatta, see inammo sulaļummu anggore mapakkada. Wua udde wunga n sahatta udde niusu'u pentakku alu see tinogokka su wiwikku Mawu Yesus, ringannu wisarane, "Raddoi, wette iite ma'ellega tanne Elia rumanta manossokki Tou wuassu arussa udde."

³⁷See Mawu Yesus nangintuļi, wuŗru wua udde natete.

³⁸Pampele ua'ele su Waļe Mawu nahesa'a natahia darua, wua doso na'oma n sara wowane. ³⁹Tembonannu tantara uarisikka su saruannu aļungngu arussa udde, naasilo ereapa Mawu Yesus nate. Tembonannu tantara udde nabbisara, "Atonna-tonna taumata indi Ana'u Mawu Ruata!"

⁴⁰Isudde lai pia manga pira wawine tantaļanna ua'ellega saranganambone udde wuassu tampa marau. Su wallatti mangitou pia Salome, Maria Magdalena, wuŗru Maria inangngi Yakobus apan maddario'anna wuŗru Yoses. ⁴¹Ete imangitou manga wawine apan uatantalongnga wuŗru nantuļungngu Mawu Yesus, su tempo Itou ta'e su Galilea, wuŗru pia manambo lai manga wawine waine isudde apan suete nirumanta su Yerusalem su sambau ringannu Mawu Yesus.

Pallalabingngu Mawu Yesus

(Mat. 27:57-61; Luk. 23:50-56; Yoh. 19:38-42)

⁴²⁻⁴³Allo mar̄rabite napawe Yusuf wuassu Arimatea nirumanta. Itou nareengnga lai sangkatou Mallar̄ruungngu Agama apan aaddatanna. Itou lai tantaḷanna uar̄rado tempone Mawu Ruata manattakka mama-renta ere sangkatou Ratu. Allo udde allo Pananaddianna (eteudde allo taambe allo n Sabatta). Ana waugu udde ringannu war̄rani Yusuf sinumaruanna si Pilatus wur̄ru madorongnga winalunannu Mawu Yesus. ⁴⁴Pilatus naherangnga naaringakka Mawu Yesus natete. Nariaddi itou nandolokku taumata namago piar̄ra'u tantara wur̄ru naiwaḷo sitou apa Mawu Yesus maḷannute nate. ⁴⁵Napawe naaringikka wawaḷo n piar̄ra'u tantara udde, Pilatus namala n Yusuf mangalappa winalunannu Mawu Yesus. ⁴⁶See Yusuf namallite maḷar̄renessa papi'unne wuassu linenna aḷussa wur̄ru napawe suete nallintukku winalunannu Mawu Yesus, nipi'unte n maḷar̄renessa udde. Wua udde itou nangaddo n winalunanna udde sulaḷummu sambau labingnga apan niola'a sulaḷummu wuiddu watu. Wua udde itou nanaḷinggi n sambau watu wahewa nipar̄rappingnga ngara n laḷabinganna udde. ⁴⁷Tantaḷanna udde Maria Magdalena wur̄ru Maria inangngi Yoses mannutukka suapa tampa Mawu Yesus niaddo.

Pabawangunnu Mawu Yesus

(Mat. 28:1-8; Luk. 24:1-12; Yoh. 20:1-10)

16 Napawe allo n Sabatta naliute, Maria Magdalena, Maria inangngi Yakobus, wur̄ru Salome inaita namalli rampa-rampa ipalana winalunannu Mawu Yesus. ²Ruaallo atonna napawe matanallo sumabangke, su allo paarorone misa udde, imangitou inaita su laḷabinganna. ³⁻⁴Su tangnga n daḷanna imangitou uahahatto sangkatou ringannu sangkatou, "Isai wotongnge mantuḷungngi ite mangingkattu watu uar̄rappingnga lor̄rangngu laḷabinganna?" Ana waugu watu udde tumanite n wahewalla. Arawe su raranta mangitou isudde, imangitou naasilo watu udde nawilingke. ⁵See imangitou sinumuttate su laḷabinganna udde. Sulaḷumme su samba'a aikkatanna imangitou naasilo sangkatou umbasanna uaḷur̄re n jubah mawira tantaḷanna ua'ianna, ne imangitou mangke niḷrumoro.

⁶Taumata umbasanna udde nabbisara, "Arie paata'utta! Ia'u masingkatta iamiu maddea'a Mawu Yesus taumata Nazaret apan suete nia-russa. Itou tate baddia isindi. Itou nabangunte! Pa'ellega, indi tampane, imangitou napaḷallowangngi Tou. ⁷Orassa indi roote, waḷoa'e watti'a

indi su mallalarrënggen-Ne, nasutta lai Petrus. Waļoa'a, 'Itou inaitë malliu roro siamiu su Galilea. Poiroddi iamiu sarun maasilo Sitou, ere-apa suete niwaļo n Tou siamiu.'"

⁸Ne imangitou sinumabangke wuassu laļabinganna udde see tinaumalangnga ana waugu niŗrumoro wuŗru nata'utta. Imangitou tate nabati'u watti'a sisai-sai, ana waugu imangitou nata'utta.

PANGINSUEANNU WORRETTI MARKUS TUMURRUTTU WORRETTA RO'E N AĀAMONANE

Mawu Yesus naipasilo m batangan-Ne si Maria Magdalena

(Mat. 28:9-10; Yoh. 20:11-18)

⁹Napawe Mawu Yesus nabangunte wuassu papate, ruaallo atonna su allo Misa, Itou paarorone nattingkapisilo m batangan-Ne si Maria Magdalena. (Wuassi Maria udde Mawu Yesus suete napasabangngu sire pitu gharraho laļeo.) ¹⁰Ne Maria Magdalena inaitë namasingkattu aradianna udde su manga hawe Mawu Yesus, apan tantaļanna massusa wuŗru lulluai. ¹¹Arawe napawe imangitou naaringikka manungku Mawu Yesus nabbiakke apia, wuŗru manungku Maria naasilote Sitou imangitou tawe mangngimanna.

Mawu Yesus nattingkapisilo m batangan-Ne su rua ng katou mallalarrënggen-Ne

(Luk. 24:13-35)

¹²Wua udde Mawu Yesus nattingkapisilo m batangan-Ne su rua ng katou mallalarrënggen-Ne ringannu olangnge apan parralane. Udde nariaddi su tempo rua ng katou udde tantaļanna u'amatta mabatuku sambau ampungnga. ¹³Nariaddi imangitou nabelengnga wuŗru namasingkattu olangnge udde su manga hawene waine. Arawe imangitou tawe mangngimanna.

Mawu Yesus nattingkapisilo m batangan-Ne su mallalarrenggen-Ne

(Mat. 28:16-20; Luk. 24:36-49; Yoh. 20:19-23; WMR. 1:6-8)

¹⁴Panginsueanne, Mawu Yesus nattingkapisilo m batangan-Ne su sire mapuŕo assa mallalarrenggen-Ne, su tempo imangitou tantaŕanna u'anna. Itou namo'a simangitou ana waugu pangangimanni mangitou lome, wuŕru tumanite maattikka puane na'oma n sara tawe mangngimanna su manga taumata apan suete naasilo sassane manungku Mawu Yesus nabbiakke apia. ¹⁵See Mawu Yesus nabbisara simangitou, "Roote su ahewallu runia wuŕru waŕoa'e Watti'u Aŕaŕuassa wuassu Mawu Ruata udde su anambo n taumata. ¹⁶Taumata apan tawe mangngimanna sarun iŕruumanna. Arawe taumata apan mangngimanna wuŕru saŕranianna, sarun masaŕamatta. ¹⁷Maola'a sambau tatiala manungku imangitou mangngimanna, manga taumata udde sarun mallimbuakka ghaŕraho laŕeo ringannu arang-Ku; imangitou sarun mabbisara sulaŕummu aŕawo'u wisara apan taambe niasingkatanni mangitou. ¹⁸Amungkangngu imangitou mangagassa atoanna ara'e ma'inumma pasangkada, imangitou tawe maŕilaka. Amungkangngu imangitou mangandangngu lima su manga taumata marada'a, manga taumata udde sarun mapia."

Mawu Yesus nasengkengnga watukku surga

(Luk. 24:50-53; WMR. 1:9-11)

¹⁹Napawe Mawu Yesus suete nagahatto mangitou, Itou nasengkengke watukku surga. Poiaroddi Itou uaparenta su sampunna ringannu Mawu Ruata. ²⁰Ne manga mallalarrenggen-Ne inaita wuŕru namasingkatte m watti'a wuassu Mawu Ruata su aŕawo'u tampa. Wuŕru Mawu lai mammanara su sampunna ringanni mangitou wuŕru mapaaŕiatta'a lai ringannu manga aŕaŕindu'a manungku watti'i mangitou udde atonna.]

PANGINSUEANNU WORRETTU AŕAMONA APAN WAINE

[⁹Manga wawine udde inaita ringanni Petrus wuŕru manga hawene, see nabbati'a ringannu maautta anambo n apa apan suete niapasingkattu taumata umbasanna udde simangitou. ¹⁰Wua udde Mawu Yesus sassane

nappaattu mallalārrenggen-Ne nabbati'a wuassu ra'i watukku warṛatta,
watti'a susi wurru tawe panginsueanne su ola'u asasaḷamatta apan saran
maḷannu-ḷannu.]

WATTI'U AĀĀLUASSA APAN NIAPASINGKATTI LUKAS

WISARA TAĀĀANE

Wuke Watti'u AĀĀluassa wuassi *Lukas* namasingkatta, Mawu Yesus sangkatou Ratu m Punnu SaĀamatta apan pina'ire Mawu Ruata su pabbawalagu Israel wuŕŕu su anambo n taumata. SulaĀummu wukene indi Lukas namoŕŕetta manungku Mawu Yesus suete nionggoĀannu Ghaŕŕaho Mawu iapamanara mannaĀiawukku Watti'u AĀĀluassa wuassu Mawu Ruata su taumata asiangnga. Watti'u AĀĀluassa indi napene n ainnunu su saruannu manga taumata ringannu aĀawo'u hausanne. Niasiloanna lai sambau aĀĀluassa su wuke n *Lukas* indi, lembonete su manga aaddoanne paarorone su ola'u daranta Mawu Yesus, wua udde wageangnge panginsueanne lai su ola'u asasengkengngu Mawu Yesus watukku surga. Watti'a su ola'u niatambanna wuŕŕu nassaĀiawukka agama n Saŕŕani man napawe Mawu Yesus nasengkengnga su surga niwatti'u lai mamamoŕŕettu wuke indi sulaĀummu wuke *Watti'u Manga Rasul*.

Wageangnge 2 wuŕŕu 6 (pa'ellega LaĀoŕŕo n Wuke uawoŕŕetta aĀiuwowane indi) laĀoŕŕoannu manambo hati m batti'a apan tumba'u asombanganna sulaĀummu wuke m Watti'u AĀĀluassa indi. Ere lai watti'a su ola'u antari manga mala'ekatta wuŕŕu tatembo manga mal-laĀu'adda winatangnga su tempo asasungkangngu Mawu Yesus, Mawu Yesus su WaĀe Mawu su tempo ta'e aĀaŕŕana'a, wuŕŕu lai sasumandingngu taumata n Samaria naungnge apan mapia wuŕŕu Ana'a apan NawuĀi. Wuke indi tumanite manna lai su ola'u aĀĀiomanna, Ghaŕŕaho Mawu Ruata, wawine sulaĀummu manara mangngimbe Mawu Yesus wuŕŕu pangangampungnga rosa wuassu Mawu Ruata.

Lalorrone

Panattaranne	1:1-4
Asasungkanga wuꞖru tempo Yohanes	
MananarꞖani wuꞖru Mawu Yesus	
ta'e alaꞖrana'a	1:5-2:52
Pamamanara n Yohanes MananarꞖani	3:1-20
SasarꞖani Mawu Yesus wuꞖru wawono'a su riri-Ne	3:21-4:13
Pamamanara Mawu Yesus su tangnga n taumata	
n Galilea	4:14-9:50
Wuassu Galilea watukku Yerusalem	9:51-19:27
Misa panginsueanne su Yerusalem wuꞖru su soa	
maranine	19:28-23:56
Pabbawangunnu Mawu Yesus wuassu papate,	
nattingka pasilo m batangan-Ne wuꞖru	
asasengkeng-Nge watukku surga	24:1-53

Panattaŕranne

1 Teofilus apan naungnge mapia,
1 Manambo taumata suete nammanara atonna mammoŕretta ringannu uaatokka su ola'u manga arariaddianna apan suete nariaddi su pat-tangnganni ite. **2**Imangitou namoŕretta nassuŕunggu apan niwatti'a siite wuassu manga taumata apan naasilo sassane manga arariaddianna udde wuassu panattaŕranne, ana see namasingkattu watti'a udde. **3**Napawe ia'u ringannu matiti'a mammarikissa sarangkanambone udde wuassu panattaŕranne, ia'u manggantimma mappianne mammoŕrettu sambau watti'a apan uaatokka si Tuangnga. **4**Ia'u namoŕretta udde, tadea'u i Tuangnga masingkatta manungku apa apan suete niaŕra'a si Tuangnga udde atonna.

Asasungkanggi Yohanes Mananaŕrani niapaasingkatta

5Napawe Herodes naola'e ratu su leta'u Yudea, pia sangkatou imam aranne Zakharia. Itou nasutta su wageanggu manga imam Abia. Awingnge aranne Elisabet, itou lai papapulunnu imam. **6**Rua sangkawinganna udde, mabbiakka maaŕuassa naungngu Mawu Ruata. Itarua matuŕrutta anambo n parenta wuŕru tita Mawu ringannu ahewallu naungnge. **7**Itarua tawe ana'a ana waugu Elisabet tinna wuŕru itarua timmaddete.

8Su sambau allo, su tempo wageanggi imam Abia naasomba wuatta, Zakharia nangamattu manara n imam su saruannu Mawu Ruata. **9**Ringannu na'ola'a undi, ere inanaramanne a'olaannu manga imam, Zakharia niatebo'anne su mutta sulaŕummu Waŕe Mawu wuŕru manu-tungnga amania. **10**Tantaŕanna amania tattutunganna taumata nambo u'aŕiomanna su liudde. **11**Su tempo udde mala'ekattu Mawu nattingkapa-silo si Zakharia. Mala'ekatta udde uarisikka su samba'a aikkatannu me-dda, su tampa m pananutunganna amania. **12**Napawe Zakharia naasilo mala'ekatta udde, itou nabingo wuŕru nata'utta. **13**Arawe mala'ekatta udde nabbisara, "Arie paata'utta, Zakharia! Mawu Ruata suete nadda-ringikka aaljomannu. Awingngu Elisabet sarun mangunsiwe n sangkatou ana'a esakka. I'o sarun manago n aranne Yohanes. **14**I'o sarun lembo n lumuassa wuŕru manambo taumata lullala'a napawe ana'a udde inasung-kangke! **15**Itou sarun maola'a taumata mapia su aellegu Mawu, wuŕru itou tawe ma'inumma anggore ara'e inumanna maawu'anna. Ro'e n ina-sungkangge itou aintaŕroante n Ghaŕraho Mawu Ruata. **16**Manambo

taumata n Israel sarun ehetanne apia mabelengnga ringannu Mawu Ruata, Mawu mangitou. ¹⁷Itou sarun maola'a raloŋorŋannu Mawu apan matohassa wuŋŋu matarŋino ere Elia. Itou sarun mangonggolu paddarame su iamangnga wuŋŋu ana'a, wuŋŋu taumata apan tawe tumuŋŋutta sarun ehetanne apia sulaŋannu ŋingirŋanna apan mapia. Ringannu aroddi itou nanaddia sambau walahanna apan nasaddiate huna Mawu."

¹⁸"Ereapa ia'u maasingkatta manungku olangnge udde sarun mariaddi?" aiwaŋo n Zakharia su mala'ekatta udde. "Ia'u timmaddete, wuŋŋu awingku lai timmaddete."

¹⁹Mala'ekatta udde sinumimbakka, "Ia'u indi Gabriel. Ia'u mangngimbe Mawu Ruata wuŋŋu ete Itou nandolo'u mamasingkattu watti'a mapia indi si'o. ²⁰Apa apan ta'u niwisara, sarun mariaddi su tempone. Arawe ana waugu i'o tawe mangngimanna, i'o sarun tawe maawisara; i'o sarun imoune ma'oma n sara apa apan suete niwaŋo'u matipusse."


²¹Tantaŋanna udde taumata nambo sidutu uarŋado si Zakharia. Imangitou naherangnga anio itou aroddi aŋannune sulaŋummu Waŋe Mawu. ²²Wuŋŋu su tempo itou sinumabangnga, itou tate maawisara simangitou. Itou sidutu maggahatto ringannu limane wuŋŋu sidutu nimmoune. Ne manga taumata naasingkatte manungku itou suete naasilo sambau sondappa sulaŋummu Waŋe Mawu.

²³Napawe nasuete manarane su Waŋe Mawu, Zakharia napuŋete su waŋe. ²⁴Tawe naŋannu wua udde, Elisabet awingnge plate illoŋŋo, see itou sidutu uatana'a su waŋe aŋannune lima wuŋanna. ²⁵Itou nabbisara, "Panginsueanne Mawu nantuŋungku wuŋŋu namappassa asasili'u."

Asaŋkungngu Mawu Yesus niapaasingkatta

²⁶Napawe Elisabet plate illoŋŋo annumpe wuŋanna, Mawu Ruata nandolokku mala'ekattu Gabriel inai su Nazaret, sambau soa su leta'u Galilea. ²⁷Gabriel nirolokka ringannu sangkatou marŋuala aranne Maria. Marŋuala udde uatatunanga n sangkatou aranne Yusuf, papapulunni Daud. ²⁸Mala'ekatta udde nirumanta ringanni Maria wuŋŋu nabbisara, "Saŋamatta, si'o apan lembo niaŋamatannu Mawu! Mawu su sampunna ringannu!"

²⁹Naaringikka wisara mala'ekatta udde Maria niŋŋumoro, see mangke ma'iwalo sulaŋummu naungnge apa pandumannu tabea udde. ³⁰Ne mala'ekatta udde nabbisara sitou, "Arie paata'utta, Maria, ana waugu i'o naaŋuassa naungngu Mawu Ruata. ³¹I'o sarun pia illoŋŋo wuŋŋu mangunsiwe n sangkatou ana'a apan sarun isagonu aranne Yesus. ³²Itou sarun maola'a wahewa wuŋŋu sarun isago Ana'u Mawu Ruata Lembo n Atanggaranne. Mawu Ruata sarun ma'ola'a Sitou ratu ere Ratu Daud



Sambau parrihi su Nazaret (1:26)

iupunggu aļamonane. ³³Wuřru Itou sarun mamarenta ere sangkatou ratu wuassu papapulunni Yakub saran maļannu-ļannu. Araratuan-Ne tawe panginsueanne.”

³⁴”Arawe ia’u ta’e mařruala,” unni Maria su mala’ekatta udde, ”Ereapa olangnge udde wotongnge mariaddi?”

³⁵Mala’ekatta udde sinumimbakka, ”Ghařraho Mawu Ruata sarun rumanta si’o, wuřru tařrino Mawu Ruata sarun mangintarřo si’o. Ana waugu udde ana’a apan sarun iunsiwenu udde sarun isago Naukkassa, Ana’u Mawu Ruata. ³⁶Naunge; Elisabet, tuřrangngu udde plate illořro annummu wuļanna, aļannune salaiwe itou timmaddete wuřru taumata mabaļo manungku itou tinna. ³⁷Ana waugu su Mawu Ruata tawedu sambau apan tawe maola’a.”

³⁸See Maria nabbisara, ”Ia’u indi allangngu Mawu; ariaddite sia’u su erapa suete niwisaranu.” See mala’ekatta udde nanantangke Maria.

Maria nattembo si Elisabet

³⁹Ringannu maļihakka wua udde, Maria inaite su sambau soa su Yudea, su wageangngu panenteanna. ⁴⁰Itou inaite su waļe n Zakharia, wuřru napawe itou nasutta, itou nattabea si Elisabet. ⁴¹Aroddi napawe Elisabet naaringikka Maria nattabea, ana’a sulaļummu illořro n Elisabet udde inumaļore. Ne Elisabet niasuttante n Ghařraho Mawu Ruata, ⁴²see nangintuļi, ”Ete i’o apan lembo niaļamatanna su wallattu anambo n wawine! Inaļamatante ana’a apan sarun iasungkangu udde! ⁴³Isai ia’u na’oma n sara inangngu Mawu nirumanta ringangu? ⁴⁴Aroddi ia’u naaringikka tabeanu, ana’a sulaļummu illořro’u inumaļore lulluassa.

⁴⁵Lalūmanna'a si'o, ana waugu mangngimanna manungku apa apan niwalo Mawu si'o udde sarun mariaddi!"

Aadiangkamanni Maria

⁴⁶Maria nabbisara,

"Naungku maddalo Mawu

⁴⁷ wuṛṛu ṛimuu'u lullala'a

ana waugu Mawu Ruata Mananaḷama'u.

⁴⁸Itou uanaungnga sia'u, allang-Nge apan adio'anne!

Manattakka orassa indi, anambo n pabbawalaga

mabbisara manungku ia'u su lalūmanna'a.

⁴⁹Ana waugu Mawu Ruata Lembo Mataṛṛino

nandanta n inolaanna wahewa sia'u.

Naukkassa aran-Ne.

⁵⁰Papapulunna sansunannu papapulunna

Mawu napaalḷiatta'u darangngu-Ne

su taumata apan matta'uttu Mawu.

⁵¹Ringannu lima-Ne apan matohassa

Itou napaataḷei n taumata mawunga,

wuṛṛu nanongkakku pandumanni mangitou.

⁵²Manga ratu nilintukka wuassu araratuanne

wuṛṛu taumata adio'anne tinanggakka.

⁵³Taumata maḷunussa niapaalḷaidu aḷawo'u apapia,

taumata ala nillimbuaṛṛanna tawe uḷene.

⁵⁴Itou nantuḷungngu Israel allang-Nge,

tumuṛṛuttu paaire apan suete niolang-Nge

ringannu iupungngu aḷamona ng kite.

⁵⁵Mawu tawe maabuḷi m paaire-Ne,

Itou marangngu si Abraham

wuṛṛu papapulunne ma'oma n sara maḷannu-ḷannu."

⁵⁶Iraṛṛangngo tallu wuḷanna aḷannune Maria uatana'a ringanni Elisabet, wua udde itou napuḷete su wuḷene.

Asasungkangngi Yohanes Mananaṛṛani

⁵⁷Na'omate tempone Elisabet mangunsiwe. Itou nangunsiwete n sangkatou ana'a esakka. ⁵⁸Manga aḷindonganne wuṛṛu manga tuṛṛangnge naaringikka aroddi apiane Mawu Ruata si Elisabet, ne imangitou lulluasse su sampunna ringanni tou.

⁵⁹Su tempo ana'a udde uukke ualute allo, imangitou nirumanta ma-sunatta sitou. Imangitou maapulu manago arannu ana'a udde Zakharia, ere arannu iamangnge, ⁶⁰arawe inangngene nabbisara, "Tawe! Itou rinone isago Yohanes."

⁶¹"Tawe saran sangkatou wuassu wallattu manga turrangngu pia aranne aroddi," unni mangitou si Elisabet. ⁶²See ringannu isaratta, imangitou naiwało si Zakharia aranna apan ipaapulu ianggilla su ana'i tou.

⁶³Zakharia nadorongnga watullei see namorretta, "Aranne Yohanes." Imangitou sarangkanambone naherangnga. ⁶⁴Su tempo udde lai Zakharia naawisarate wufru nadalote Mawu Ruata. ⁶⁵Manga alindonganne mangke nata'utta, wufru watti'a udde natelengke su alawo'u leta'u manga panenteannu Yudea. ⁶⁶Anambo n taumata apan naaringikka olangnge udde naiwało sulałummu naungnge, "Maola'e apa ana'a udde sałimmurine?" Ana waugu Mawu uarfundinganna sitou.

Zakharia namasingkattu watti'a wuassu Mawu

⁶⁷Zakharia iamangngu ana'a udde, niasuttannu Gharraho Mawu Ruata na'oma n sara itou namasingkattu tanata wuassu Mawu. Itou nabbisara,

⁶⁸"Wette iite maddalo Mawu,

Ruata m balahannu Israel!

Itou suete nirumanta mantulungngu pabbawala-Ge wufru mamallossi mangitou.

⁶⁹Itou nangonggolla siite manalamatta matohassa, papapulunni Daud, allang-Nge.

⁷⁰Ro'e n alamonane sulałummu manga nabi arangnguan-Ne, Mawu Ruata suete nangagillu paaire-Ne,

⁷¹ipalamatta siite wuassu seetti ite wufru wuassu tarfino manga taumata apan maddantinni ite.

⁷²Wufru mammasilo naungnge mapia su iupungngu alamona ng kite, paaire-Ne apan naukkassa sarun tipusan-Ne.

⁷³⁻⁷⁴Itou nassalu si Abraham iamangngi ite, wufru na'ire manalamatta siite wuassu seetti ite, tadea'u iite tawe matta'utta mangimbe Sitou

⁷⁵sidutu mattarramawu Sitou wufru mapaałuassu naung-Nge su alo'engngu pabbiafranni ite.

⁷⁶To, ei Ana'u, sarun isago nabi Mawu Ruata Lembo n Atanggaranne.

I'o apan nirolokka malliu ɾoro Mawu
wɾɾu mamu'a laɾan-Ne,

⁷⁷see mamasingkatta su pabbawala-Ge
manungku imangitou sarun masaɾamatta,
amungkangngu Mawu Ruata suete nangampungnga manga rosa
mangitou.

⁷⁸Mawu ng kite naung-Nge masarɾionto'a wɾɾu maakkanna;
ana waugu manaɾamatta siite Itou nirumanta.

Ere matannallo
sinumabbangnga su ruaallo,

⁷⁹aroddiwe lai Itou nangonggolu semak-Ke su anambo n taumata
apan mabbiakka sulaɾummu ararandumma wɾɾu su atata'utta.

Itou manggehetta siite su laɾanna
apan matudda m paddarame."

⁸⁰Ana'i Zakharia udde maggewalla see aatambanna auatannu
gharrahone. Itou uatana'a su wadda'a, na'oma n sara tempone
nia'omanna itou namasingkattu watanganne su pabbawalagu Israel.

Asasungkanggu Mawu Yesus

(Mat. 1:18-25)

2 Su tempo udde Kaisar Agustus namarenta tadea'u anambo n tu-
mana'u Araratuannu Roma maiwoɾɾettu aranne ana see ireengnga.
²Pandareengnga paarorone indi, niamatta su tempo Kirenus naola'a
gubernure su leta'u Siria. ³Su tempo udde anambo n taumata inaita
mapawoɾɾettu aranne su soa n sangkatou-sangkatou.

⁴Yusuf inaita wuassu Nazaret su Galilea, watukku Betlehem su
Yudea, su soa inasungkanganni Ratu Daud; ana waugu Yusuf wua-
ssu papapulunni Daud. ⁵Yusuf naiwoɾɾettu aranne su sambau ringanni
Maria tunangane, apan tantaɾanna pia illoɾro. ⁶Napawe imangitou
na'omate su Betlehem, nia'omante tempone Maria mangunsiwe. ⁷Itou
nangunsiwete n sangkatou ana'a esakka, anangnge pahuɾu. Ana'a udde
nioosannu larɾeme, see niapaatiilla su tampa n aananannu winatangnga
niamparannu larɾami; ana waugu imangitou niasueannu tampa pattin-
dahoanna.

Mallaɾu'adda domba wɾɾu mala'ekatta

⁸Su ɾabbi udde pia manga mallaɾu'adda apan tantaɾanna mandiaga
manga dombane su wadda'u nannaɾo su leta'a udde. ⁹Inarɾombanganne

mala'ekattu Mawu natingkapisilo m batanganne simangitou, wuṛṛu semakku asasemakka wuassu Mawu nilumansiangnga nanemakka simangitou, wuṛṛu imangitou mangke nata'utta. ¹⁰Arawe mala'ekatta udde nabbisara, "Arie paata'utta! Ana waugu ia'u nirumanta uaapiddu Watti'u Aḷaḷuassa siamiu - watti'a apan maaḷuassa anambo n taumata. ¹¹Allo indi su soa n Daud nasungkange Ratu m Punnu Saḷamatti amiu, eteudde Kristus, Mawu. ¹²Ete indi tatialane: Iamiu sarun maaratingnga sangkatou ana'a aaosannu laṛreme, niapaatiilla su tampa n aananannu winatangnga."

¹³Inaṛṛombanganne mala'ekatta udde raṛṛundingannannu manambo mala'ekatta waine, apan maddalo Mawu Ruata. Imangitou mabbisara,

¹⁴"Daralo su Mawu Ruata su langitta apan atanggaṛṛanne!

Wuṛṛu su wowo n runia, paddarame su taumata
apan maaḷuassa naungngu Mawu!"

¹⁵Napawe manga mala'ekatta udde nanantangke mangitou wuṛṛu nabelengke su surga, manga mallalu'adda uawawisarate sangkatou ringannu sangkatou, "Wette iite inaite su Betlehem ma'ellega apa apan suete nariaddi udde, apan suete niapasinkattu Mawu siite."

¹⁶Imangitou lapiddu inai, see naaratingke si Maria wuṛṛu Yusuf, wuṛṛu ana'a adio'a udde tantaḷanna mattiilla su tampa aananannu winatangnga.

¹⁷Napawe manga mallalu'adda domba naasilo ana'a udde, imangitou nabbatti'e apa apan niapaasingkattu manga mala'ekatta su ola'u ana'a udde. ¹⁸Wuṛṛu anambo n taumata naherangnga naaringikka watti'u manga mallalu'adda domba udde. ¹⁹Arawe Maria nanahipunna saranganambone udde sulaḷummu naungnge wuṛṛu iraṛṛingida. ²⁰Manga mallalu'adda domba nabelengke watukku wadda'u nannaḷo lapiddu maddalo wuṛṛu mammantuga Mawu Ruata, ana waugu saranganambone apan suete inaringiṛṛanna wuṛṛu inasiloanni mangitou naṛṛino ere suete niapaasingkattu mala'ekatta simangitou.

Mawu Yesus nionngolaṇnu aranne

²¹Napawe uukke ualute allo, ana'a udde nissunatte. Wuṛṛu aranne nissagote mangitou Yesus, aranna apan suete nionngolu mala'ekatta Sitou tantaḷanna Itou ta'e su illoṛṛo n inangnge-Ne.

Mawu Yesus tinantilla su Mawu su Waļe Mawu

²²Na'omate tempone Yusuf wuřru Maria mapaamattu addatta pamaresi tumuřrutta Tita Musa. Nariaddi imangitou nangapiddu ana'a udde watukku Yerusalem itantilla su Mawu. ²³Ana waugu sulaļummu tita Mawu uawořretta arendi, "Suapa n ana'a esakka puhuļu sarun itantilla su Mawu." ²⁴Imangitou lai pia pandumma manantillu sasamba, eteudde sampare manu'a bakiangnga ara'e darua ana'u merpati ta'e maradio'a, ere suete tinantunna sulaļummu tita Mawu.

²⁵Tempo udde su Yerusalem pia sangkatou taumata aranne Simeon. Itou taumata mapia, apan matta'uttu Mawu Ruata wuřru tantaļanna uarařraddo tempone Mawu Ruata manaļamatta Israel. Ghařraho Mawu Ruata uařrundinganna sitou, ²⁶wuřru Ghařraho Mawu Ruata suete namasingkatta sitou manungku itou taambe mate tantaļanna taambe naasilo Ratu m Punnu Saļamatta apan suete pina'ire Mawu. ²⁷Wuassu aehettu Ghařraho Mawu Ruata, Simeon sinumutta su Waļe Mawu. Su tempo udde Yusuf wuřru Maria uaapiddu Mawu Yesus, apan ta'e adio'a udde mallagu n addatta apan suete niatokku Tita n agama. ²⁸Ne Simeon nanganute ana'a udde wuřru nisaļurute n tou, see nadalote Mawu Ruata,

²⁹"Orassa indi, Mawu, I'o suete napasuunggu paaire-Nu.

Wala'ewe allang-Ngu indi mate ringannu matammuda.

³⁰Ana waugu ringannu mata'u sassane, ia'u suete naasilo

Punnu Saļamatta wuassu Mawu Ruata.

³¹Punnu Saļamatta apan suete nisaddia-Nu

hunane su aļawo'u pabbawalaga:

³²naaļihida semakka apan manmakka laļannu manga pabbawalaga waine,

ana see rumanta ringan-Nu;

eteudde asasemakka apan mandanta n awawantuga

su aļarřanang-Ngu Israel."

³³Iamangnga wuřru inangngu ana'a udde naherangnga naaringikka apa apan suete niwisara n Simeon su ola'u ana'i mangitou. ³⁴Simeon nangaļamatta simangitou wuřru nabbisara si Maria, inangugu ana'a udde, "Ana'a indi suete nipile Mawu Ruata sarun mamate wuřru manaļamatta anambo n taumata n Israel. Itou sarun maola'a tatiala Mawu Ruata, apan sarun ipaseettu taumata nambo, ³⁵wuřru ringannu aroddi inasingkatante laļořro naungngi mangitou. Asasusa sarun mangusu'a naungngu ere haļele mařoro."

³⁶Pia lai sangkatou nabi wawine timmaddete atonna. Aranne Hana, ana'i Fanuel, wuassu walaga Asyer. Napawe pitute tonna wua naawing-

nga, ³⁷Hana naola'e wawine waļu, wuṛṛu orassa indi uukke uaļute m puļo appatta su tonnane. Tawe saran paassa itou nanantangngu Waļe Mawu. Allo ṛabbi itou mattaṛṛamawu isudde su Mawu Ruata ringannu u'aliomanna wuṛṛu mappuasa. ³⁸Orassa udde lai itou naṛṛindo'a nirumanta, see nadalo Mawu Ruata wuṛṛu uahahatto su ola'u ana'a udde ringannu awadaalla apan uaraṛṛaddo tempone Mawu Ruata mamallossu Yerusalem.

Nabelengnga watukku Nazaret

³⁹Napawe Yusuf wuṛṛu Maria suete na'ola'a sarangkanambone apan niatokku tita Mawu, imangitou napuļete watukku Nazaret su Galilea. ⁴⁰Ana'a udde aatambante ahewalle wuṛṛu atohanne. Itou pande atonna wuṛṛu lembo n aranguannu Mawu Ruata.

Yesus su Waļe Mawu

⁴¹Suapa n tonna hagurangngu Mawu Yesus inai watukku Yerusalem maddamea n Allo Wahewa m Paskah. ⁴²Wuṛṛu napawe Mawu Yesus uukke mapuļote dua su tonnane, imangitou inaite su ramea udde tumuṛṛuttu inanaramanna. ⁴³Napawe ramea udde nasuete imangitou napuļete, arawe Mawu Yesus, ana'a udde, ta'e natantangnga su Yerusalem wuṛṛu iamangnga inangnge wagga. ⁴⁴Imangitou massunna Itou uatantalongnga suadio'a ringannu ammuļanna su amatanna. Napawe suete inumamatta allo massallo wakkute udde imangitou naddea'a Sitou su wallattu manga tuṛṛangnge see hawe mangitou. ⁴⁵Arawe imangitou tawe naasangkala Sitou, nariaddi imangitou nabelengke apia watukku Yerusalem nadea'a Sitou. ⁴⁶Napawe tallute allo maddea'a, imangitou naasangkala Sitou sulaļummu Waļe Mawu. Itou tantaļanna ua'ianna madaringikka manga huru n agama wuṛṛu manggagillu manga aiwaļo. ⁴⁷Anambo n taumata apan naaringikka Sitou naherangnga ana waugu manga sasimbak-Ke apan masiṛṛongnga. ⁴⁸Hagurang-Nge lai naherangnga naasilo Sitou. Inangnge nabbisara Sitou, "Ana'a, anio Po na'ola'a arendi siami? Iamangngu wuṛṛu inangngu susinggawangnga maddea'a Si'o!"

⁴⁹Mawu Yesus sinumimbakka, "Anio iamangnga wuṛṛu inangnga maddea'a Sia'u? Iamangnga wuṛṛu inangnga wagga manungku Ia'u ṛinone su waļe n Iamang-Ku?" ⁵⁰Arawe imangitou tawe naasunna sasimbakku Mawu Yesus.

⁵¹Wua udde Mawu Yesus napuļete su sampunna ringanni mangitou watukku Nazaret, wuṛṛu uararingikka simangitou. Anambo n ino-

laanna udde sasahipunannu inangnge sulaḷummu naungnge. ⁵²Mawu Yesus mangke aatambanna ahewalle wuḥḥu aatambanna apandene, see iattaḷantuppu Mawu Ruata wuḥḥu ipaapulu n taumata.

Watti'a wuassi Yohanes Mananaḥḥani

(Mat. 3:1-12; Mrk. 1:1-8; Yoh. 1:19-28)

3 Su tonna apuḷo limane su pamamarenta n Kaisar Tiberius, Pontius Pilatus naola'a gubernure su Yudea, wuḥḥu Herodes uaparenta su Galilea, Filipus, tuḥḥangngi Herodes namarenta su wageangngu Iturea wuḥḥu Trakhonitis, arawe Lisantias namarenta su Abilene. ²Apan uaumbele manga imam wahewa eteudde i Hanas wuḥḥu i Kayafas. Su tonna udde Mawu Ruata nabbisara si Yohanes, ana'i Zakharia su wadda'a. ³Ne Yohanes inaitte mammalintadu aḷawo'u tampa su ahewallu wageangngu Saḷukku Yordan wuḥḥu namasingkattu Watti'a wuassu Mawu Ruata. Yohanes u'aḷiata, "Awaḷute wuassu manga rosanu, wuḥḥu iamiu ḥinone saḥḥanianna, tadea'u Mawu Ruata mangampungnga siamiu." ⁴Udde nassuḷungngu apa apan uawoḥḥetta sulaḷummu wuke Nabi Yesaya:

"Pia taumata u'aḷiata su wadda'a,

'Saddiaite laḥḥannu Mawu,
ratarḥḥa'e laḥḥanni Tou.

⁵Aḷawo'u liobongnge sarun soopanna,
aḷawo'u wowone wuḥḥu wuidda iapaaratakka.

Laḥḥanna apan uawengkolla sarun tuḥḥiḥḥanna,
wuḥḥu laḥḥanna apan ualḥḥobbo'a sarun iratakka.

⁶Manga taumata su ahewallu runia sarun ma'ellega
Mawu Ruata manaḷamatta taumata!"

⁷Manambo taumata nirimanta ringanni Yohanes maisaḥḥani. Yohanes nabbisara simangitou, "Iamiu taumata laḥḥeo! Isai nabbisara manungku iamiu wotongnge maḥḥiu wuassu ḥuumannu Mawu Ruata apan sarun rumanta? ⁸Pasiloa'e ringannu pallaḷagunu manungku iamiu nawaḷute wuassu manga rosanu! Arie mabbisara manungku Abraham udde iupungngu aḷamonanu. Naunge: Wuassu manga watu indi lai Mawu Ruata wotongnge ma'ola'a papapulunni Abraham! ⁹Waḥḥiungnga nasaddiate ipanuwangnga alu ma'oma n sara ḥamunne. Aḷawo'u alu apan tawe mabbua mapia sarun tuwanganna wuḥḥu iramme sulaḷummu putungnga."

¹⁰"Nariaddi, apa ḥinone olaanni ami?" aiwaḷo manga taumata si Yohanes.

¹¹Yohanes sinumimbakka, "Taumata apan laungnge darua řinone mangonggolu samparassa su taumata tawe laubba, wuřru taumata pia anna, řinone mattahia su taumata tawe anna."

¹²Manga mallaluřru wose lai nirumanta ringanni Yohanes maisarřani. Imangitou naiwařo, "Iamangnga Huru, apa řinone olaanni ami?" ¹³Yohanes sinumimbakka, "Arie padorongnga lumebbe wuassu apa apan suete tinantunna."

¹⁴Pia lai tantara naiwařo, "Ereapa iami? Apa řinone olaanni ami?"

Yohanes sinumimbakka, "Arie pamarřangnga sisai-sai, wuřru arie pangarřo roitta ringannu aansilla awusu. Wotonggete i'o mabbiakku roitta lařantakku!"

¹⁵Su tempo udde manga taumata mannatakke uaiwařo, tanne Yohanes Ratu Punnu Sařamatta apan rarřadoanni mangitou. ¹⁶Ana wangu udde Yohanes nabbisara simangitou sarangkanambone, "Ia'u mannarřani siamiu ringannu ua'e, arawe parřaddote sarun rumanta sařimmurine lembo n ahewařanne wuassia'u. Mamu'a taři n sapatune lai ia'u tawe suřřinone. Itou sarun manarřani siamiu ringannu Gharřaho Mawu Ruata wuřru putungnga. ¹⁷Su lima-Ne pia niřru ipattappa amene ma'oma n sara mawaresi. Amme sarun iammulla su wařingkakka, arawe anambo n wařaane sarun tutunganna su putungnga apan tawe mapadumma!"

¹⁸Ete aroddi Yohanes mannantiro taumata ringannu ařawo'u ařarřa'a su tempo itou mabatti'u Watti'u Ařařuassa. ¹⁹Arawe Herodes tembonanne su Galilea, wino'anni Yohanes su ola'u paa'awingnge ringanni Herodias, awingngu tuřrangnge, wuřru su ola'u manga ařařeo waine apan suete niolangnge. ²⁰Arawe Herodes niatambanna ařařeone ringannu nantarřo n Yohanes sulařummu tuttupanna.

Mawu Yesus nissarřani

(Mat. 3:13-17; Mrk. 1:9-11)

²¹Napawe manga taumata udde nissarřanite, Mawu Yesus lai nissarřani. Wuřru tantařanna Itou u'ařiomanna, langitta nati'akka, ²²wuřru Gharřaho Mawu Ruata inumonto'a Sitou ere manu'a merpati. See inaringikka tingikku Mawu Ruata nabbisara, "Ete I'o Ana'a arangguang-Ku. I'o maarřuassa naung-Ku."

Manga arannu iupungngu aļamona Mawu Yesus

(Mat. 1:1-17)

²³Su tempo udde Mawu Yesus nanattakke n manara-Ne, uukke irarřanggo tallu m puļo su tonnane. Tumuřuttu addapattu taumata, Itou ana'i Yusuf, ana'i Eli, ²⁴ana'i Matat, ana'i Lewi, ana'i Malkhi, ana'i Yanai, ana'i Yusuf, ²⁵ana'i Matica, ana'i Amos, ana'i Nahum, ana'i Hesli, ana'i Nagai, ²⁶ana'i Maat, ana'i Matica, ana'i Simej, ana'i Yosekh, ana'i Yoda, ²⁷ana'i Yohanan, ana'i Resa, ana'i Zerubabel, ana'i Sealtiel, ana'i Neri, ²⁸ana'i Malkhi, ana'i Adi, ana'i Kosam, ana'i Elmadam, ana'i Er, ²⁹ana'i Yesua, ana'i Eliezer, ana'i Yorim, ana'i Matat, ana'i Lewi, ³⁰ana'i Simeon, ana'i Yehuda, ana'i Yusuf, ana'i Yonam, ana'i Elyakim, ³¹ana'i Melea, ana'i Mina, ana'i Matata, ana'i Natan, ana'i Daud, ³²ana'i Isai, ana'i Obed, ana'i Boas, ana'i Salmon, ana'i Nahason, ³³ana'i Aminadab, ana'i Admin, ana'i Arni, ana'i Hezron, ana'i Peres, ana'i Yehuda, ³⁴ana'i Yakub, ana'i Ishak, ana'i Abraham, ana'i Terah, ana'i Nahor, ³⁵ana'i Serug, ana'i Rehu, ana'i Peleg, ana'i Eber, ana'i Salmon, ³⁶ana'i Kenan, ana'i Arpaksad, ana'i Sem, ana'i Nuh, ana'i Lamekh, ³⁷ana'i Metusalah, ana'i Henokh, ana'i Yared, ana'i Mahalaleel, ana'i Kenan, ³⁸ana'i Enos, ana'i Set, ana'i Adam, ana'u Mawu Ruata.

Mawu Yesus niwono'annu Setanna

(Mat. 4:1-11; Mrk. 1:12-13)

4 Mawu Yesus niintařroannu Gharřaho Mawu Ruata su tempo Itou nanantangeke n Saļukku Yordan. Gharřaho Mawu Ruata nangehetta Sitou watukku wadda'a maļalangnga. ²Isudde Itou niwono'annu Setanna appattu puļo allo aļannune. Su aļo'engngu allo udde, Itou tawe inumanna manga apa. Nariaddi panginsueanne Itou naapendamma maļunussa.

³Setanna nabbisara Sitou, "Amungkangngu I'o Ana'u Ruata, ola'e watu indi maola'a roti."

⁴Mawu Yesus sinumimbakka, "Sulaļummu Wuke Susi uawořretta, "Taumata tawe tumba'u maawiakku roti sassane."

⁵See Setanna nangapiddu Mawu Yesus su tampa apan matanggakka wuřru tumba'u sangkarřondapa Setanna namasilo Sitou anambo n araratuanna su runia. ⁶"Anambo n tarřino wuřru paa'ala indi sarun ta'u itantilla Si'o," unnu Setanna su Mawu Yesus, "ana waugu sarangkanambone udde suete nionggolla sia'u wuřru ia'u wotongnge mangonggolla sisai-

sai apan ipaapulu'u pangonggoꝻanne. ⁷Sarangkanambone indi sarun maola'a darotongnu, amungkangnu I'o umalintudda massubba sia'u."

⁸Mawu Yesus sinumimbakka, "SulaꝻummu Wuke Susi uawoꝻretta, 'Passubbate Mawu Ruatanu wuꝻru tumba'u pangimbe Sitou sassane.'"

⁹See Setanna nangapidde Mawu Yesus watukku Yerusalem wuꝻru nangado n Tou su saꝻawo m WaꝻe Mawu wuꝻru nabbisara Sitou, "Amungkangnu I'o Ana'u Mawu Ruata, tumpate I'o wua isindi. ¹⁰Ana waugu sulaꝻummu Wuke Susi uawoꝻretta, 'Mawu Ruata sarun mandolokku manga mala'ekatta mandiaga Si'o mapia-pia.' ¹¹WuꝻru lai, 'Manga mala'ekatta sarun manengkamma Si'o ringannu limane, tadea'u leddanu tawe mattu'a su watu.'"

¹²Mawu Yesus sinumimbakka, "SulaꝻummu Wuke Susi uawoꝻretta, 'Arie pamono'a Mawu Ruatanu.'"

¹³Napawe Setanna suete namono'a Mawu Yesus ringannu aꝻawo'u hati n wawono'a, itou nanantangke Mawu Yesus wuꝻru nallaꝻradote tephone apan mapia.

Mawu Yesus nanattakku manara-Ne su Galilea

(*Mat. 4:12-17; Mrk. 1:14-15*)


¹⁴Wua udde Mawu Yesus nabelengke watukku Galilea; wuꝻru Itou niintarꝻoannu GhaꝻꝻaho Mawu Ruata. Watti'a su ola'u watangan-Ne naddingikka su ahewallu wanua udde. ¹⁵Itou mangngaꝻꝻa'a su manga waꝻe m pattataꝻꝻamawuanna, wuꝻru anambo n taumata maddalo Sitou.

Mawu Yesus tinoꝻa'a su Nazaret

(*Mat. 13:53-58; Mrk. 6:1-6*)

¹⁶Mawu Yesus inaité lai watukku Nazaret, su wanua inahewaꝻanni Tou. Su allo n Sabatta, ere su wiasane Itou inai su waꝻe m pattataꝻꝻamawuanna. Itou dirumarisikka mabbasa n Wuke Susi, ¹⁷wuꝻru nionggoꝻannu wuke Nabi Yesaya. Itou namu'ate wuke laluluꝻnanna udde, see inasombanganna wageangne indi,

¹⁸"GhaꝻꝻaho Mawu sidutu ringang-Ku,
 ana waugu Itou suete namile Sia'u iapapasingkattu
 Watti'u AꝻaꝻuassa su taumata asiangnga.
 Itou nandolo-U iapawatti'a
 pamamallossa su taumata n ruumanna
 wuꝻru aaꝻe su taumata wuta;
 wuꝻru ipamallossu taumata allangnga



Lufunnu wuke (4:17)

¹⁹ wuṛru mamasingkattu orassu daranta Mawu manaḷamatta pabbawala-Ge.”

²⁰Mawu Yesus nallufunna apia wuke udde, niwelengke su manarane, see inuma’ianna. Anambo n taumata sulaḷummu waḷe m pattataṛramawuanna udde na’ellega Sitou. ²¹Wuṛru Mawu Yesus n-nattakke nabbisara simangitou ereindi, ”Manga wageangngu laḷorṛo n Wuke Susi su allo indi natipusse su tempo iamiu naaringikka watti’a udde.”

²²Manga wisara apan niwisara-Ne mapia atonna, na’oma n sara imangitou naherangnga wuṛru lapiddu nanamba’a Sitou. Imangitou nabbisara, ”Waḷinewe Itou indi ana’i Yusuf?”

²³Ne Mawu Yesus nabbisara simangitou, ”Atonna iamiu sarun map-paattu sasumandingnga indi Sia’u, ’Doktere, paapia’a ririnu sassane. Aḷaṛṛindu’a apan niṛringiṛṛanni ami niolang-Ngu su Kapernaum, ola’a lai su ampungngu sassane.” ²⁴Mawu Yesus nanassu wisara-Ne, ”Paa-naunge, tawe nabi apan aaddatanna su ampungnge sassane. ²⁵Arawe daringiṛṛe: su tempo n Elia, su tempo tawe manguranna tallu tonna anummu wuḷanna aḷannune, nariaddi aḷaṛṛutumma apan wahewa su aḷawo’u wanua. Su tempo udde manambo wawine waḷu su Israel. ²⁶Salaiwe aroddi, Mawu Ruata tawe nandolokki Elia su wallattu sangkatou wawine waḷu isudde, ewe’e tumba’u su sangkatou wawine waḷu su Sarfat su leta’u Sidon. ²⁷Aroddi lai su tempo Nabi Elisa manambo taumata su Israel pia radangnge paro maata’utta, arawe tawe sangkatou wuassi mangitou niapaapia, tumba’u Naaman taumata n Siria udde.”

²⁸Anambo n taumata su waḷe m pattataṛramawuanna udde mangke nasa’u naaringikka watti’a udde. ²⁹Imangitou dirumarisikka see nallim-

buakka Mawu Yesus watukku liuddu soa, wuꞛꞛu niapidida su wowo n rampissa, su tampa udde soa mangitou niapaarisikka. Imangitou pia pandumma manuꞛꞛudu Mawu Yesus su rampissa. ³⁰Arawe Mawu Yesus nilumusi'a su tangnga n taumata nambo udde wuꞛꞛu napuꞛe.

Taumata apan niasuttannu ghaꞛꞛaho laꞛeo

(Mrk. 1:21-28)

³¹Wua udde Mawu Yesus inaita su soa Kapernaum su Galilea. Poiaroddi Itou mangngaꞛꞛa'a manga taumata su allo n Sabbatta. ³²Imangitou naherangnga naasilo olangnge Itou mangngaꞛꞛa'a, ana waugu Itou mabbisara pia saꞛꞛaungnge. ³³Isudde su waꞛe m pattataꞛꞛamawuanna pia sangkatou niasuttannu ghaꞛꞛaho laꞛeo. Taumata udde mangke ma'uaire, ³⁴"Ei Mawu Yesus, taumata Nazaret, apa olaannu siami? I'o rumanta mamate siami? Ia'u masiꞛgkatta isai I'o: I'o raloꞛoꞛꞛannu Mawu Ruata apan susi!"

³⁵"Paaꞛannaba!" Mawu Yesus nandona ghaꞛꞛaho laꞛeo udde, "Sab-bangke wuassu taumata indi!" See ghaꞛꞛaho laꞛeo udde namantinggu taumata udde su saruanni mangitou sarangkanambone wuꞛꞛu wua udde sinumabangnga wuassu taumata udde ringannu tate napaaradange.

³⁶Awadaalla naherangnga, wuꞛꞛu uahahattote sangkatou ringannu sangkatou, "Waꞛine hampa aꞛawo'u wisara-Ne. Ringannu saꞛꞛaungnga wuꞛꞛu taꝼꝼino, Itou namarenta manga ghaꞛꞛaho laꞛeo niapaasabangnga wuꞛꞛu imangitou sinumabangke lai!" ³⁷Ne watti'a su ola'u Mawu Yesus tinumelengke su ahewallu wanua su wageangnge udde.

Mawu Yesus napaapia n taumata manambo

(Mat. 8:14-17; Mrk. 1:29-34)

³⁸Mawu Yesus nanantangke m waꞛe m pattataꝼꝼamawuanna udde, see inaita su waꝼꝼe n Simon. La'iananni Simon marada'a saꝼꝼihamma, wuꝼꝼꝼu manga taumata nabbati'u olangnge udde su Mawu Yesus. ³⁹Mawu Yesus inaita nattuda n lallowanganne, see nallimbuakka saꝼꝼihamma udde. Saꝼꝼihamma udde nawuꝼꝼi, wuꝼꝼꝼu la'iananni Simon lapi-ddu nabangunna wuꝼꝼꝼu nangimbe simangitou.

⁴⁰Napawe matannallo mattuppe, manambo taumata nangapiddu manga tuꝼꝼrangngi mangitou apan uatataꝼꝼrangnga aꝼꝼawo'u hati n rada'a ringannu Mawu Yesus. Mawu Yesus namita simangitou sangkatou-sangkatou wuꝼꝼꝼu napaapia mangitou. ⁴¹Manga ghaꝼꝼaho laꝼꝼeo udde

sinumabangke wuassu taumata nambo udde lapiddu mangngintuŕi, "Ete Po Ana'u Mawu Ruata!"

Arawe Mawu Yesus namuŕo simangitou wuŕru naningaddi mangitou mabbisara, ana waugu imangitou masingkatta manungku ete Itou Ratu m Punnu Saŕamatta.

Mawu Yesus nannase sulaŕummu manga waŕe m Pattataŕramawuanna

(Mrk. 1:35-39)

⁴²Su tempo matannallo sussabangke, Mawu Yesus nanantangke n soa udde see inaita su sambau tampa apan maŕannaba. Manga taumata maddea'a Sitou, wuŕru napawe imangitou nassomba Mawu Yesus, imangitou mangke mappandumma tadea'u Itou tawe manantanggi mangitou. ⁴³Arawe Mawu Yesus nabbisara, "Watti'u Aŕaŕuassa su ola'u ereapa Mawu Ruata mamarenta sarun Ta'u iwatti'a lai su manga soa waine, ana waugu Mawu Ruata nandolo-U su runia."

⁴⁴Ana waugu udde Mawu Yesus nannase sulaŕummu waŕe m pattataŕramawuanna su ahewallu leta'u Yudea.


Mawu Yesus namile manga mallaraŕŕenggen-Ne apan paarorone

(Mat. 4:18-22; Mrk. 1:16-20)

5 Su sambau tempo Mawu Yesus uarisikka su winggi n Rano Gene-saret. Manambo taumata uasaseppe'a maddaringikka watti'u Mawu Ruata. ²Mawu Yesus naasilo saalanna rua ngassa su apanne udde; manga samakka nilumintukke wuassu saalanna udde wuŕru lapiddu mangngukkassa soma mangitou. ³Mawu Yesus sinuma'e su saalanna sangngassa, eteudde saalanni Simon, see nandolokki Simon manondo n saalanne udde marau adio'a wuassu apanne. Mawu Yesus inuma'ianna su saalanna udde wuŕru mangngarra'e taumata nambo.

⁴Napawe suete nangarra'a, Itou nabbisara si Simon, "Pundaŕa'e watukku aŕaŕumanne, wuŕru pallosa'e somanu panameta'a inassa."

⁵"Iamangnga Huru," sasimbakki Simon, "su aŕo'engngu ŕabbi iami mammanara maŕimadda, arawe tawe naahau saran sambua! Arawe ana waugu Iamangnga nandolokka, aroddite; ia'u sarun mallombo n soma apia." ⁶Napawe imangitou suete namallossu soma udde, imangitou naahau inassa aroddi anambone na'oma n sara soma mangitou nahahesa'e. ⁷Ana waugu udde imangitou naituŕungnga su manga hawene su saa-



lanna waine. Manga hawe mangitou nirumanta see imangitou su sambau nallooro saalanna rua ngassa udde napene n inassa na'oma n sara manga saalanna udde maranite n lumakkuba. ⁸Napawe Simon naasilo olangnge udde, itou inumaɓintuda su saruannu Mawu Yesus, see nabbisara, "Tantanga'e ia'u, Mawu! ana waugu ia'u taumata marosa!"

⁹Simon wuɓɓu anambo n taumata ringanni tou naherangnga naasilo inassa manambo apan niahauanni mangitou udde. ¹⁰Aroddi lai ringannu mianga hawe n Simon, eteudde Yakobus wuɓɓu Yohanes, aɓaɓana'i Zebedeus. Mawu Yesus nabbisara si Simon, "Arie paata'utta! Manattakka orassa indi i'o sarun maola'a mananoma taumata."

¹¹Simon wuɓɓu manga hawene namoɓengke saalanna rua ngassa udde su apanne, wua udde nanantangke n sarangkanambone udde, see nallaɓrenggente Mawu Yesus.

Mawu Yesus napaapia n sangkatou pia radangnge paro apan maarrantinna

(Mat. 8:1-4; Mrk. 1:40-45)

¹²Su sambau allo, Mawu Yesus uatana'a su sambau soa. Poiaroddi pia sangkatou esakka wadangnge napene n radangnge paro apan maarrantinna. Napawe itou naasilo Mawu Yesus, itou inumaɓintuda su saruan-Ne lapiddu sinumaɓande, "Iamangnga, amungkanngu Iamangnga maapulu, Iamangnga wotongnge mapaapia'u!"

¹³Mawu Yesus namita taumata udde lapiddu nabbisara, "Ia'u maapulu, apiate!" Orassa udde lai radangge nawuŕi. ¹⁴See Mawu Yesus nangingaddu taumata udde mabatti'u olangge udde su manga taumata, tanatane, "Roote ringannu imam, wuŕru padorongnga sitou manantunna manungku i'o napiate. See roote pangagillu sasamba ere suete nirolokki Musa, maola'a pananaunganna su taumata manungku i'o atonna-tonna napiate."

¹⁵Arawe watti'a su ola'u Mawu Yesus nadingikke su aŕawo'u tampa, wuŕru manambo taumata nirumanta madaringikka wuŕru maapulu ia-paapia wuassu rada'i mangitou. ¹⁶Wua udde Mawu Yesus inaite inumaŕiomanna su tampa apan maŕannaba.

Mawu Yesus napaapia n sangkatou lome

(*Mat. 9:1-8; Mrk. 2:1-12*)

¹⁷Su sambau allo, tantaŕanna Mawu Yesus mangngaŕra'a, pia manga pira ng katou taumata n Farisi wuŕru manga huru n agama ua'ianna isudde. Imangitou nirumanta wuassu Yerusalem, wuŕru wuassu manga soa su leta'u Galilea wuŕru Yudea. Taŕŕino Mawu Ruata uaŕŕundinganna Mawu Yesus mapaapia n taumata marada'a. ¹⁸Su tempo udde manga pira ng katou nirumanta uaapiddu sangkatou lome uaŕallowangnga su wilatta. Imangitou suapa n wotongge mangapiddu taumata udde sulaŕummu waŕe tadea'u itou wotongge iaddo su saruannu Mawu Yesus. ¹⁹Arawe ana waugu tumanite n manambo taumata isudde, imangitou tawe naa'apiddi tou sinumutta. Ana waugu udde imangitou nangawittu taumata udde su atuppu waŕe. See imangitou nalla'ete atuppa, wuŕru nanguŕukku taumata udde ringannu wilanne su saruannu Mawu Yesus su pattangngannu taumata nambo udde. ²⁰Su tempo Mawu Yesus naasilo aroddi ahewalle pangangimanni tou, Itou nabbisara taumata udde, "Tuŕrangnga, rosanu suete niampunganna."

²¹Manga huru n agama wuŕru manga taumata n Farisi mannattakke uahahatto sangkatou ringannu sangkatou, "Isai taumata indi apan waŕrani mangngadio'a Mawu Ruata? Isai wotongge mangainpungnga rosa, su liuddu Mawu Ruata sassane?"

²²Mawu Yesus naasingkatta aiwaŕo mangitou. Nariaddi Itou nabbisara, "Anio iamiu ma'iwaŕo aroddi sulaŕummu naungngu? ²³Suapa mappianne mabbisara, 'Rosanu suete niampunganna', ara'e mabbisara, 'Pabbangunte wuŕru amatte!?' ²⁴Arawe orassa indi Ia'u sarun mapaaŕiat'a siamiu manungku su wowo n runia indi Ana'u Taumata pia taŕŕinone mangampungnga rosa." See Mawu Yesus nabbisara taumata lome udde, "Pabbangunte, apira'e lallowangannu, wuŕru apuŕete!"

²⁵Maḷiha-ḷihakka taumata udde nabangunna su saruanni mangitou sarangkanambone, see namasanna lallowanganne, wuṛṛu napuḷe lapiddu maddalo Mawu Ruata.

²⁶Imangitou sarangkanambone naherangnga atonna see imangitou nadalote Mawu Ruata. Wuṛṛu ringannu apendamma matta'utta, imangitou mabbisara, "Maṛṛindu'a atonna arariaddianna apan niasiloanni ite su allo indi!"

Mawu Yesus namaggo si Lewi

(Mat. 9:9-13; Mrk. 2:13-17)

²⁷Wua udde Mawu Yesus sinumabbangke wuṛṛu naasilo sangkatou madarorongnga wose, aranne Lewi, tantaḷanna ua'ianna su tampa n pammanaranne. Mawu Yesus nabbisara sitou, "Paṛṛundingante Sia'u."
²⁸Lewi dirumarisikka wuṛṛu nanantangngu sarangkanambone, see niru-
mandingante Mawu Yesus.

²⁹Wua udde Lewi na'ola'e andeangnga su waḷene huna Mawu Yesus. Manambo madarorongnga wose wuṛṛu manga taumata waine lai inumanna su sampunna ringanni mangitou. ³⁰Sire pira taumata n Farisi wuṛṛu manga huru n agama pia apendamma tawe maḷuassa, see nabbisara su mallalaṛṛenggennu Mawu Yesus, "Anio iamiu sarangkanambone u'anna ma'inumma su sampunna ringannu madarorongnga wose wuṛṛu manga taumata laḷeo?"

³¹Mawu Yesus sinumimbakka, "Taumata apan tawe marada'a tawe mappandumma doktere, tumba'u taumata mangkarada'a. ³²Ia'u nirumanta waḷine mamago manga taumata apan uapendamma ririne mapiate, ewe'e taumata apan marosa tadea'u imangitou mawaḷu wuassu paddarosa mangitou."

Pattatatiakka su ola'u puasa

(Mat. 9:14-17; Mrk. 2:18-22)

³³Manga taumata nabbisara Mawu Yesus, "Mallalaṛṛenggenni Yohanes wuṛṛu mallalaṛṛenggennu taumata n Farisi masokka mappuasa wuṛṛu u'aḷiomanna. Arawe mallalaṛṛenggennu u'anna wuṛṛu ma'inumma."

³⁴Mawu Yesus sinumimbakka, "Iamiu wotongnge mandolokku manga raho mappuasa su andeangngu awingnga, tantaḷanna maa'awingnga esakka ta'e su sampunna ringanni mangitou? Natantunna tawe!"

³⁵Arawe sarun a'omanna tempone maa'awingnga esakka udde ałapanna wua dinganni mangitou. Su tempo udde imangitou mappuasate."

³⁶See Mawu Yesus nabatti'e simangitou sasumandingnga indi, "Tawe taumata mandapella laubba tabbe rappelannu piřriřsu małarřnessu laubba wakku. Ana waugu itou sarun manggesa'a laubba wakku udde. Wuřru lai małarřnessa rarapela wakku udde tawe mappare n laubba tabbe. ³⁷Aroddi lai tawe taumata mandalinnu anggore wakku sulałummu pato'a pisi apan tabbe, ana waugu anggore wakku udde sarun mame-sangnga pato'a tabbe udde. Ne anggore udde mabbosote, wuřru tampane mahohakke. ³⁸Anggore apan wakku sarun ilałinna su tampane apan wakku lai. ³⁹Aroddi lai tawe taumata maapulu ma'inumma anggore wakku napawe itou suete na'inumma anggore tabbe. 'Anggore tabbe udde mattemanganna,' wisara-Ne."

Aiwało su ola'u allo n Sabatta

(*Mat. 12:1-8; Mrk. 2:23-28*)

6 Su sambau allo n Sabatta, su tempo Mawu Yesus sinumabbi sambau waillu gandumma, mallałarřenggen-Ne nangitingnga gandumma. Imangitou nangusu gandumma udde ringannu limane, see nianna. ²Sire pira taumata n Farisi nabbisara, "Anio iamiu lullawangnga manga Tita n agama ng kite ringannu ma'ola'a apa isassingadda su allo n Sabatta?"

³Mawu Yesus sinumimbakka, "Iamiu taambe naawasa su ola'u apa a'olaanni Daud, su tempo itou wuřru manga taumatane małunussa? ⁴Itou sinumutta sulałummu Wałe Mawu wuřru nanganu roti apan suete tinantilla su Mawu Ruata, see nianna. Wua udde roti nianggilla lai su manga taumatane. Sumbałi tumuřruttu Tita n agama ng kite, tumba'u manga imam sassane wotongnge umanna roti udde."

⁵See Mawu Yesus nabbisara, "Ana'u Taumata uatařrino allo n Sabatta!"

Taumata limane lome samba'a

(*Mat. 12:9-14; Mrk. 3:1-6*)

⁶Su sambau allo n Sabatta apan waine, Mawu Yesus inaite nangarřa'a su wałe m pattatařramawuanna. Isudde pia taumata limane lome samba'a. ⁷Sire pira huru n agama wuřru taumata n Farisi madda'a pasasał Mawu Yesus tadea'u wotongnge Itou ialae. Nariaddi imangitou sidutu mannutukka tanne Itou mapaapia n taumata su allo n Sabatta. ⁸Arawe Mawu Yesus naasingkatta řingirřanni mangitou. Ne

Itou nabbisarate su taumata limane lome samba'a udde, "Wette dari-sikke isindi su saruanne!" Taumata udde nabangunte, see dirumarisikke isudde. ⁹Wua udde Mawu Yesus naiwało su manga taumata isudde, "Tumurruttu agama, iite wotongnge mammanara apa su allo n Sabatta? Ma'ola'a apapia ara'e ma'ola'a ałaąeo? Mandalukka taumata ara'e manilaka?" ¹⁰Mawu Yesus na'ellega uapałiwutta simangitou sarangkanam-bone, see nabbisara taumata udde, "Ułurra'e limanu." Taumata udde nangulukke n limane, see limane udde napiate.

¹¹Arawe manga huru n agama wurru manga taumata n Farisi udde nasa'u atonna, wurru nanattakke ma'ire su ola'u apa apan wotongnge olaanni mangitou su Mawu Yesus.

Mawu Yesus namile sire mapuło dua rasul

(Mat. 10:1-4; Mrk. 3:13-19)

¹²Su tempo udde Mawu Yesus sinuma'ate su sambau wuidda ana see inumalıomanna. Isudde Itou inumalıomanna su Mawu Ruata su ało'engngu rabbi. ¹³Napawe allote, Itou namagote mallałarřenggen-Ne, see namilete sire mapuło dua su atoune wuassu wallatti mangitou. Itou nanago n sire mapuło dua su atoune udde rasul. Imangitou eteudde: ¹⁴Simon (isassago lai Petrus), wurru Andreas turrangngi Simon; Yakobus wurru Yohanes, Filipus wurru Bartolomeus, ¹⁵Matius wurru Tomas, Yakobus ana'i Alfeus, wurru Simon (isassago lai Patriot). ¹⁶Yudas ana'i Yakobus wurru Yudas Iskariot apan sałimmurine naola'a mandalaąeo.

Mawu Yesus mangngarra'a wurru mappaapia n taumata

(Mat. 4:23-25)

¹⁷Wua udde Mawu Yesus sinumossokke wuassu wuidda su sam-punna ringannu manga rasul udde, see nattaalla wurru dirumarisikka su sambau tampa ratakke. Isudde pia lai sambau ammułannu manga mallałarřenggenna waine wurru manambo lai taumata rudanta wuassu anambo n tampa su ahewallu leta'u Yudea, Yerusalem, wurru manga soa n Tirus wurru Sidon su winggi n tahałangnga. ¹⁸Imangitou niru-manta madaringikka Mawu Yesus, wurru see iapaapia wuassu manga rada'i mangitou. Imangitou apan niasuttannu gharřaho laleo nirumanta lai see niapaapia. ¹⁹Anambo n taumata maddea'a suapa n wotongnge maaggassa Mawu Yesus, ana waugu pia tarřino sussabangnga wuassu wadangnge apan maapia simangitou sarangkanam-bone.

Aļajūassa wuŗru asasusa

(Mat. 5:1-12)

²⁰Mawu Yesus nanutudda mallajarŗenggen-Ne see nabbisara,

”Laļumanna’a iamiu manga taumata asiangnga,
ana waugu ete iamiu udde laļorŗo n araratuannu Mawu Ruata!

²¹Laļumanna’a iamiu apan maļunussa orassa indi;
iamiu sarun iapaalaidda!

Laļumanna’a iamiu apan lulluai orassa indi;
iamiu sarun lumagge!

²²Laļumanna’a iamiu amungkangngu iaarantina, iaadiri, aadio’anna wuŗru haļajusaanna ana waugu Ana’u Taumata! ²³Manga nabi su tempo rorone a’olaanna lai aroddi. Amungkangngu olangnge udde mariaddi, řinone iamiu lulluassa wuŗru massaļaingnga ringannu lullala’a ana waugu wahewa laļantakke siamiu apan suete nissaddia su surga.

²⁴Arawe nasilakate iamiu taumata ala su orassa indi;
ana waugu iamiu naapendampe aļajūassa!

²⁵Nasilakate iamiu apan maļaida orassa indi;
ana waugu iamiu sarun amaļunusanna!

Nasilakate iamiu apan lullage orassa indi;
ana waugu iamiu sarun masusa wuŗru lumuai!

²⁶Nasilakate iamiu, amungkangngu anambo n taumata maddalo siamiu; ana waugu aroddi lai iupungnga aļamona mangitou maddalo manga nabi awusu su tempo rorone.”

Aakkanna su seetta

(Mat. 5:38-48, 7:12a)

²⁷”Arawe iamiu apan madingikka Sia’u orassa indi, Ia’u manna-nata ereindi: akkana’a manga seenu, wuŗru pa’ola’a pallaļagu mapia su taumata apan maddantinnu. ²⁸Aļamate taumata apan mammontoga siamiu, wuŗru aļiomana’a taumata apan laļeo siamiu. ²⁹Amungkangngu taumata mamero wambalanu samba’a, wala’a lai itou mamero wambalanu samba’a. Amungkangngu jubahnu arŗoanna, anggil’a lai laungngu. ³⁰Amungkangngu taumata madorongnga sarannapa siamiu, anggil’a lai udde sitou; wuŗru amungkangngu darotongngu arŗoanna, arie padoronge apia. ³¹Ola’a su taumata waine ere lai iamiu maapulu olaanni mangitou mapia.

³²Amungkangngu iamiu tumba’u u’akkannu manga taumata apan mandangngu siamiu, apa aļamannu? Taumata marosa lai u’akkannu

manga taumata apan mandangngu simangitou! ³³Wurru amungkangngu iamiu pia pallalagu mapia su taumata apan mapia siamiu, apa alamannu? Taumata marosa lai ma'ola'a aroddi! ³⁴Wurru amungkangngu iamiu tumba'u mapawallassu roitta su taumata apan wotongnge maawelengngu roitta udde, apa alamanne siamiu? Taumata marosa lai mapaawallassu roitta su taumata marosa, see doronganna apia roitta udde. ³⁵Rinone waline aroddi! Ewe'e iamiu rinone umakkannu seetti amiu wurru pia pallalagu mapia simangitou. Iamiu rinone mapawallassa wurru arie mangantimma mawelengnga apia. Amungkangngu aroddi, lalantakku wahewa wurru iamiu sarun maola'a alaranna'u Mawu Ruata Apan Atanggaranne. Ana waugu Mawu Ruata naungnge mapia su saruannu taumata apan waga maaidengkamanna, wurru su saruannu taumata laleo lai. ³⁶Rinone iamiu uararangngu ere lamangngu lai mandangngu siamiu!"

Maŕruungngu taumata

(Mat. 7:1-5)

³⁷"Imbarangnga maŕruungngu taumata waine, tadea'u iamiu lai sassane tawe iŕruungngu Mawu Ruata. Imbarangnga maŕruumannu taumata waine, tadea'u iamiu sassane tawe iŕruumannu Mawu Ruata. Ampungete taumata waine, tadea'u Mawu Ruata lai mangampungnga siamiu. ³⁸Pangonggolla su taumata waine, tadea'u Mawu Ruata lai mangonggolla siamiu; iamiu sarun manengkamma aonggolla nangillembu apan suete niuukka masada-sadatta maola'a wageangngu. Ana waugu auuranna apan ipanguukki amiu su taumata waine sarun ipanguukku Mawu Ruata lai siamiu."

³⁹Wua udde Mawu Yesu nabatti'u sasumandingnga simangitou ere indi, "Amungkangngu taumata wuta mangehetta taumata wuta waine, itarua sarun manawo sulaŕummu loŕrangnga. ⁴⁰Tawe ana'a si'ola nangillembu wuassu hurune. Arawe ana'a si'ola apan nasuete si'olane, sarun maola'a lai massuŕungngu hurune.

⁴¹Anio iamiu maasilo alu adio'a sulaŕummu mata n tuŕrangngu, arawe saŕaba'u su matanu sassane tawe asiloannu? ⁴²Ereapa iamiu wotongnge mabbisara tuŕrangngu, 'Wette tuŕrangnga, ia'u mapasabangngu alu adio'a su matanu,' arawe sulaŕummu matanu sassane pia saŕaba'u apan tawe asiloannu? Ei lilangkamaŕe'a! Pasabanga'e rorone saŕaba'u su matanu sassane, wakkute udde iamiu wotongnge maasilo ringannu masemakka wurru wotongnge mapasabangngu alu adio'a wuassu mata n tuŕrangngu."

Alu wurru manga wuane

(Mat. 7:16-20, 12:33-35)

⁴³"Aaluanna apan masuwukka tawe mabua wua laleo. Aroddi lai alu marissita tawe mabua wua mapia. ⁴⁴Alawo'u alu aailalanna wuassu wuane. Manga ahuranganna roaanna tawe mabua wua n ara, wurru manga ahuranganna roaanna tawe mabua wua n anggore. ⁴⁵Taumata mapia mapasabangngu pallalagu mapia ana waugu naungnge napene n apapia. Taumata pallalagune laleo mapasabangngu inolaanne laleo ana waugu naungnge napene n alaleo. Ana waugu apa apan suete niwisara morrongnga udde sinabanganne wuassu naungnga."

Maaola'a wale apan pande wurru maaola'a wale apan woddo

(Mat. 7:24-27)

⁴⁶"Anio iamiu mammago Sia'u, 'Mawu, Mawu,' arawe tawe tumurutta apa iwabbisara-U siamiu? ⁴⁷Ringanni sai iite wotongge mannungu taumata apan rudanta ringang-Ku, wurru madingikka wisara-U, see tumurutta parenta udde? - mappianne Ia'u manantiro siamiu - . ⁴⁸Itou ere taumata apan napawe mapararisikku wale naali mala-lalumma, see na'ola'a rapappake wuassu watu. Su tempo nammanawangnga wurru ua'e n salukka nangelekka su wale udde, wale udde tawe naholle, ana waugu suete niapararisikka su wowo n rapappake apan matohassa. ⁴⁹Arawe taumata apan madingikka wisara-U wurru tawe tumurutta, udde ere sangkatou apan napararisikku wale tawe rapappake. Napawe nammanawangnga, wale udde maliha-lihakka marra'a; wurru ahahohakke wahewalla atonna!"

Mawu Yesus napaapia n allangngu sangkatou tembonannu tantara n Roma

(Mat. 8:5-13)

7 Napawe suete nabati'u alarra'a udde su taumata nambo, Mawu Yesus inaita su Kapernaum. ²Isudde pia tembonannu tantara n Roma pia allangnge apan arangnguanne. Allangnga udde marada'a wurru maranite mate. ³Napawe tembonannu tantara udde naaringikka ola'u Mawu Yesus, itou nandolokku manga pira tembonannu taumata n Yahudi inai ringannu Mawu Yesus madorongnga tadea'u Itou rumanta

wurru mapaapia n allangnge. ⁴Napawe na'omate ringannu Mawu Yesu, imangitou mangke sussaḷande tadea'u Itou mantulungngu tembonanne udde. "Tebonanne udde rinone itulunggi lamangnga," unni mangitou su Mawu Yesu, ⁵"ana waugu itou marangngu pabbawalagi ite wurru suete napararisikku waḷe m pattataḷḷamawuanni ami."

⁶Ne Mawu Yesu inaitu su sampunna ringanni mangitou. Napawe Mawu Yesu maranite ma'oma su waḷe udde, tembonannu tantara udde nandolokku manga hawene iapaawaḷo, "Ariete lamangnga matingsakasa-hadda madumatingngu waḷe'u. Ia'u tawe rinone manarimmattu lamangnga su waḷe'u. ⁷Ana waugu udde ia'u sassane tawe waḷḷani sumaruanna su lamangnga. Nariaddi pangagile m parenta tadea'u mangangimbe'u mapia. ⁸Ana waugu ia'u lai tuttuḷḷrutta parenta n tembonangku wurru wuassia'u lai pia tantara pangkanne mabbawoanna apan tuttuḷḷrutta parenta'u. Amungkannggu ia'u mandolokku sangkatou, 'Inaitu!' itou sarun inai; wurru amungkannggu ia'u mamago lai waine, 'Wette isindi!' itou lai sarun rumanta. Wurru amungkannggu ia'u mamarenta allangku, 'Ola'a indi!' itou sarun tumuḷḷrutta ma'ola'a udde."

⁹Mawu Yesu naherangnga naaringikka aroddi. Itou nanaile wurru nabbisara taumata nambo apan tantaḷanna ualḷarḷenggena Sitou, "Waḷine hampa taumata indi. Su wallattu taumata n Israel, Ia'u taambe saran paassa naasomba pangangimanna ahewalle ereindi!"

¹⁰Napawe manga taumata apan nirolokka udde nabelengke su waḷe n tembonanne udde, allangnge napiate.

Mawu Yesu napaawiakka apia ana'u sangkatou wawine waḷu

¹¹Tawe naḷannu wua udde, Mawu Yesu inaitu su soa Nain. Mal-ḷaḷarḷenggen-Ne wurru taumata nambo inaitu lai su sampunna ringanni Tou. ¹²Su tempo Mawu Yesu na'omate marani ngara sasuttanna su soa udde, pia taumata manambo uapasanna asuangnga watukku liuddu soa. Taumata nate udde ana'a esakka man sambau wuassu sangkatou wawine waḷu. Manambo taumata ḷaḷoḷḷo n soa uarḷundingannu inangngene. ¹³Napawe Mawu Yesu naasilo wawine waḷu udde, Itou inumakkannu wawine udde see nabbisara, "Arie palluai Inangnga!" ¹⁴Wua udde Mawu Yesu nangundanite n tampa n asuangnga udde wurru namita. Ne manga mamamasanna nattaalle. Mawu Yesu nabbisara, "Ei umbasanna, Ia'u mabbisara si'o pabbangunna!" ¹⁵Umbasanna apan natete udde, nabangunna inuma'ianna wurru nanattakke uahahatto. Ne tinantille Mawu Yesu su inangngene.

¹⁶Anambo n taumata nata'utta wuṛṛu nanattakke maddalo Mawu Ruata. Imangitou mabbisara, "Sangkatou nabi apan wahewa suete nirumanta su wallatti ite! Mawu Ruata nirumantate manaḷamatta pabbawalage!"

¹⁷Watti'a su ola'u Mawu Yesus indi nadingikke su ahewallu leta'u Yudea wuṛṛu su wanua maranine.

Daroḷoṛṛanni Yohanes Mananaṛṛani

(*Mat. 11:2-19*)

¹⁸Mallaḷaṛṛengenni Yohanes namasingkatta si Yohanes anambo n arariaddianna udde. Ne Yohanes namagote rua ng katou mallaḷaṛṛengenne, ¹⁹see nandoloke mangitou inai ringannu Mawu Yesus wuṛṛu niapaiwaḷo, "Ete Iamangnga taumata apan sarun rumanta tumuṛṛuttu paaire Mawu Ruata, ara'e iami maṛṛado sangkatou waine lai?"

²⁰Rua ng katou mallaḷaṛṛengenni Yohanes inaitte ringannu Mawu Yesus wuṛṛu nabbisara, "Yohanes Mananaṛṛani nandolokki ami iapaiwaḷo su Iamangnga, tanne ete Iamangnga taumata apan sarun rumanta tumuṛṛuttu paaire Mawu Ruata, ara'e ṛinone iami maṛṛado taumata waine?"

²¹Su tempo udde, Mawu Yesus napaapia n taumata nambo, wuṛṛu nallimbuakka anambo n ghaṛṛaho laḷeo see na'ola'a taumata wuta naasilo. ²²Nariaddi Mawu Yesus sinumimbakka, "Pabelengke ringanni Yohanes wuṛṛu waḷoa'a apa apan suete niaringiṛṛanna wuṛṛu niasiloanni amiu: taumata wuta naasilo, taumata lome inumamatta, taumata radangge paro napia, taumata wengella naaringikka, taumata nate nabbiakka apia, wuṛṛu Watti'u Aḷaḷuassa wuassu Mawu Ruata niapaasingkatta su taumata asiangnga. ²³Laḷumanna'a su taumata apan tawe pinangiananne ipanoḷa-U."

²⁴Napawe raloḷoṛṛanni Yohanes udde napuḷete, Mawu Yesus nantakke nabbisara su taumata nambo udde su ola'i Yohanes, wisara-Ne, "Iamiu inai su wadda'a ma'ellega apa? Sangkuḷappa nannaḷo itatalla'u anginna? ²⁵Iamiu inai ma'ellega apa? Sangkatou apan uapedetta maṛṛamaga? Manga taumata apan uapedetta aroddi wuṛṛu wiakke lembo mapia uatana'a su tampa n araratuanna! ²⁶Nariaddi, iamiu sumabangnga ma'ellega apa? Ma'ellega sangkatou nabi? Atonna, ewe'e nangillembo lai wuassu sangkatou nabi. ²⁷Ana waugu Yohanes udde nipaasingkatta su wageangnu Wuke Susi ereindi,

'Ete indi raloḷoṛṛang-Ku,' wisara Mawu Ruata,
'Ia'u sarun mandolokki tou malliu ṛoro wuas-Si'o,
tadea'u itou mamu'a laḷanna amatan-Nu!'"

²⁸"Paanaunge," unnu Mawu Yesus, "su runia indi taambe saran sangkatou taumata maggewaḷanna wuassi Yohanes Mananaḗrani. Arawe tau-mata apan adio'anne su wallattu aḷaḗrana'u Mawu Ruata, magewaḷanna wuassi Yohanes Mananaḗrani."

²⁹Anambo n taumata – nasutta madarorongnga wose – naaringikka Mawu Yesus mabatti'u olangnge udde; ete imangitou manga taumata apan suete tinumuḗrutta aḷawo'u apulu Mawu Ruata wuḗru maapulu saḗranianni Yohanes. ³⁰Arawe manga taumata n Farisi wuḗru manga huru n agama maddiri manengkamma ḗinnu Mawu Ruata su wadangni mangitou. Imangitou maddiri saḗranianni Yohanes.

³¹See Mawu Yesus nabbisarate apia, wisara-Ne, "Ringannu apa Ia'u manumandinggu taumata su tempo indi? Massuḷunggu apa imangi-tou? ³²Imangitou ere aḷaḗrana'a ua'ianna su pasakka; ammuḷanna sambau mabbisara ammuḷanna waine. 'Iami manggantari n aantari n laḷuassa siamiu, arawe iamiu maddiri massaḷaingnga! Iami mangan-tari aantari n tatampungnga, arawe iamiu maddiri lumuai!' ³³Yohanes Mananaḗrani nirumanta – itou mappuasa wuḗru tawe ma'inumma ang-gore – wuḗru iamiu mabbisara, 'Itou niasuttannu setanna!' ³⁴Ana'u Tau-mata nirumanta – Itou u'anna wuḗru ma'inumma – see iamiu mabbi-sara, 'Pa'ellega taumata udde! Waḷiu, taḗra wu'anna, hawe madarorong-gnga wose wuḗru hawe n taumata marosa.' ³⁵Salaiwe aroddi, apapande Mawu Ruata niatialanna su tangnga n taumata nambo apan nanarim-matti Tou."

Mawu Yesus su waḷe n Simon

³⁶Sangkatou taumata n Farisi, aranne Simon, nangahe Mawu Yesus umanna. Mawu Yesus inaitu su waḷene wuḗru inuma'ianna see inumante. ³⁷Su soa udde pia lai sangkatou wawine apan mabbiakka su-laḷummu paddarosa. Napawe itou naaringikka manungku Mawu Yesus tantaḷanna u'anna su waḷe taumata n Farisi udde, itou nirumanta uaapi-ddu sambau wotolla wuassu pualam laḷoḗroannu lana mawangngi. ³⁸Itou dirumarisikka su liuddu Mawu Yesus marani n leddane wuḗru nilumuai lapiddu naḗrolo ledda Mawu Yesus ringannu allo matane. Wua udde ledda Mawu Yesus pinedda n utangnge see niari'i tou wuḗru niwok-kannu lana mawangngi. ³⁹Napawe taumata n Farisi apan nangahe Mawu Yesus naasilo olangnge udde, itou nabbisara sulalḷummu naungnga, "Iraḗrangngo taumata indi sangkatou nabi, Itou masingkatta isai wawine apan nangindingnga Sitou, wuḗru manungku wawine udde mabbiakka su-laḷummu paddarosa!"

⁴⁰See Mawu Yesus nabbisara si Simon, "Simon, pia sambau Ta'u iwaļo si'o."

"Ore, Iamangnga Huru," sasimbakki Simon, "Waļoa'e."

⁴¹Mawu Yesus nabbisara, "Pia rua ng katou apan pia utangnge su taumata apan mappawallassu roitta. Sangkatou pia utangnge lima řasutta roitta saļa'a, wuřru sangkatou lai lima m puļo roitta saļa'a. ⁴²Itarua tawe maawaekka utangnga udde, ana waugu udde utangngi tarua tate niapawaekka. Ne, isai su wallatti tarua lembo marangngu taumata apan napawallassu roitta udde?"

⁴³"Ia'u marřangngo taumata apan utangnge anamboanne apan tawe niapawaekka!" sasimbakki Simon.

"Asingkannu narřino," sasimbakku Mawu Yesus. ⁴⁴See Mawu Yesus na'ellega wawine udde wuřru nabbisara si Simon, "To naasilo wawine indi? Ia'u nirumanta su waļenu, arawe i'o tawe nanaddia ua'e ipangukkassa ledda-U; arawe wawine indi suete nangukkassa ledda-U ringannu allo matane, wuřru nipedda n utangnge. ⁴⁵I'o tawe nanaļoho Sia'u ringannu aari'a, arawe wawine indi tawe illoļone mangngari'a ledda-U nanattakka Ia'u naranta isindi. ⁴⁶I'o tawe nandaļinnu lana su pua-U, arawe wawine indi suete nandaļinnu lana mawangngi su ledda-U. ⁴⁷Atonna: darangngune apan wahewa udde napaaliatta'a manungku rosane apan manambo udde suete niampunganna! Amungkangngu taumata onngoļannu aampungnga matuļungnga, matuļungnga lai itou mangdangngu."

⁴⁸See Mawu Yesus nabbisara wawine udde, "Manga rosanu suete niampunganna."

⁴⁹Manga taumata waine apan ua'ianna u'anna su sampunna ringannu Mawu Yesus mannattakke uahahatto sangkatou ringannu waine, "Isai taumata indi na'oma n sara Itou wotongnge mangampungnga rosa?"

⁵⁰Arawe Mawu Yesus nabbisara wawine udde, "Ana waugu i'o mangngimanna Sia'u, i'o sarun masaļamatta. Roote ringannu padarame!"

Manga wawine apan nallaļima Mawu Yesus

8 Tawe naļannu wua udde, Mawu Yesus inaita su manga soa wuřru manga ampungnga, ana mamasingkattu Watti'u Aļaļuassa manungku Mawu Ruata manattakke mamarenta ere sangkatou Ratu. Sire mapuļo dua mallalařenggen-Ne uatantalongnga su sampunna ringanni Tou. ²Aroddi lai sire pira wawine apan suete niapaapia wuassu gharřaho laļeo wuřru rada'a. Imangitou eteudde Maria apan isassago Magdalena (pitu gharřaho laļeo apan suete niapaasabangnga wuassi tou); ³wuřru lai Yohana awingngi Khuza, marřinu n araratuanni Herodes; Susana,

wurru manambo lai wawine waine. Ringannu roitti mangitou sassane, imangitou nallaḷima Mawu Yesus wurru manga mallaḷarḷrenggen-Ne.

Sasumandingngu mangangasi'a

(Mat. 13:1-9; Mrk. 4:1-9)

⁴Manga taumata sidutu rudanta ringannu Mawu Yesus wuassu aḷawo'u soa. Wurru napawe manambote taumata uaammulla, Mawu Yesus nabbati'a simangitou sasumandingnga ereindi: ⁵"Sangkatou mabawailla inai mangasi'u wualanna. Su tempo itou mangngasi'a, pia bualanna nanawo su laḷanna. Sangkawageanganna nisaḷedanannu taumata wurru waine lai niannu manu'a, ⁶Pia lai nanawo su tampa manambo wature. Su tempo wualanna udde tutuwote, sinuananna udde tinumolangnga ana waugu letangge mamara. ⁷Pia lai bualanna nanawo su tangnga n ahuranganna roaanna. Ahuranganna roaanna udde tinumuwo su sambau ringannu wualanna udde, wurru nangangkuba na'oma n sara nate. ⁸Arawe pia lai bualanna nanawo su leta'a masuwukka, see tinumuwo wurru nabua paarḷrasutta anambone."

Napawe suete nabbati'u sasumandingnga udde, Mawu Yesus nabbi-sara, "Amungkangngu pia taḷinga padaringikka!"

Anio Mawu Yesus mappaattu sasumandingnga

(Mat. 13:10-17; Mrk. 4:10-12)

⁹Manga mallaḷarḷrenggennu Mawu Yesus naiwaḷo Sitou atappasannu sasumandingnga udde. ¹⁰Mawu Yesus sinumimbakka, "Iamiu suete nionggolaḷannu aḷamatta tadea'u maasingkatta addapingnga su ola'u ere-apa Mawu Ruata mamarenta ere sangkatou Ratu. Arawe manga taumata waine niaḷraannu sasumandingnga, tadea'u imangitou madaringikka, arawe wagga apa apan mariaddi; wurru imangitou madaringikka, arawe tawe maasunna."

Mawu Yesus nanaḷa'a n sasumandingngu sangkatou mangangasi'a

(Mat. 13:18-23; Mrk. 4:13-20)

¹¹"Ete indi atappasannu sasumandingnga udde: Wualanna eteudde watti'u Mawu Ruata. ¹²Wualanna apan nanawo su laḷanna isassumandingnga su manga taumata apan madaringikka wisara udde. Arawe Se-



Ahuranganna roanna (8:14)

tanna nirumanta wuṛṛu nangarṛo watti'a udde wuassu naungngi mangitou, tadea'u imangitou tawe mangngimanna wuṛṛu tawe masaḷamatta. ¹³Wualanna apan nanawo su leta'a pia batune isassumandingnga su taumata napawe naaringikka watti'a udde, nanengkamma ringannu naungnge maḷuassa. Arawe watti'a udde tawe narṛamutta sulaḷummu naungnge. Imangitou mangngimanna taḷa ng kadio'a, wuṛṛu napawe wawono'a nirumanta, imangitou nassinaada. ¹⁴Wualanna apan nanawo su tangnga n ahuranganna roanna isassumandingnga su taumata madaringikka watti'a udde, arawe sussingawangngu wiakki mangitou wuṛṛu maapulu mabbiakka nasuungnga wuṛṛu maḷuassa sulaḷummu runia indi. Saranganambone udde nangumpisanna simangitou na'oma n sara tawe nabua wua apan naḷaha. ¹⁵Wualanna nanawo su leta'a masuwukka isassumandingnga su taumata madaringikka watti'a udde, see sinahipunna sulaḷummu naungnge apan waresi wuṛṛu matuḷida. Imangitou natatarṛangnga na'oma n sara nabua."

Soḷo apan niluwannu wensada

(Mrk. 4:21-25)

¹⁶"Tawe taumata mande'omma soḷo see luuwannu wensada, ara'e iaddo su aḷungngu antilla. Itou sarun mangado n soḷo udde su panganga-dooane, tadea'u taumata apan sumutta maasilo semakke. ¹⁷Tawedu apa

apan uawuni apan tawe asiloanna; wuꞖꞖu tawedu apa apan iaadappingnga apan tawe sarun massongkakka wuꞖꞖu asingkatanna.

¹⁸Ana waugu udde paanaungete mapia-pia apa apan niaaringiꞖꞖanni amiu. Ana waugu taumata apan uatahuante, sarun onngoꞖꞖanna lembo n anamboanne lai; arawe taumata tawedu tatahuananne, adio'a apan ta'e sitou sarun anuanna lai."

Inangnga wuꞖꞖu manga tuꞖꞖangngu Mawu Yesus

(Mat. 12:46-50; Mrk. 3:31-35)

¹⁹Inangnga wuꞖꞖu manga tuꞖꞖangngu Mawu Yesus nirumanta ringan-Ne, arawe imangitou tawe na'oma ringan-Ne ana waugu taumata tumanite manambo. ²⁰Ne pia sangkatou apan nabbisara su Mawu Yesus, "Iamangnga, inangnga wuꞖꞖu manga tuꞖꞖangngi Iamangnga wowa su liudde. Imangitou maapulu maisasomba m Iamangnga."

²¹Arawe Mawu Yesus nabbisara simangitou, "Manga taumata apan madaringikka wisara Mawu Ruata wuꞖꞖu tutuꞖꞖrutta, ete imangitou udde inang-Ku wuꞖꞖu manga tuꞖꞖang-Ku."

Mawu Yesus napaalenakku tandi'a

(Mat. 8:23-27; Mrk. 4:35-41)

²²Su sambau allo Mawu Yesus wuꞖꞖu mallaꞖꞖaꞖꞖenggen-Ne si-numa'ete saalanna. "Wette iite inai su samba'a n rano," unnu Mawu Yesus simangitou. Ne imangitou inaitte. ²³Su tempo imangitou tantaꞖꞖanna massaalanna, Mawu Yesus inamatiiꞖꞖanna. InaꞖꞖꞖombanganne anginna ma'ikkatta tinumiuppa su rano udde. Ua'e sussuttate su saalanna, na'oma n sara maasilakate simangitou sarangkanambone. ²⁴MallaꞖꞖaꞖꞖenggen Mawu Yesus inaitte ringan-Ne wuꞖꞖu namu'o Sitou. Imangitou nabbisara, "Iamangnga Huru, Iamangnga Huru, iite masilakate!"

Mawu Yesus napu'o see nandona anginna wuꞖꞖu lua'a apan mattandi'a udde. Anginna wuꞖꞖu lua'a udde noꞖꞖote, see rano nabbalite maꞖꞖenakka atonna. ²⁵See Mawu Yesus nabbisara mallaꞖꞖaꞖꞖenggen-Ne, "Anio iamiu tawe mangngimanna Sia'u?"

Imangitou naherangnga wuꞖꞖu nata'utta. WuꞖꞖu uahahattote imangitou sangkatou ringannu waine, "Isai ꞖꞖinone taumata indi na'oma n sara namarenta anginna wuꞖꞖu lua'a, wuꞖꞖu parenta-Ne tinuꞖꞖrutanna!"

Mawu Yesus napaapia n taumata niasuttannu gharrahho lajeo

(Mat. 8:28-34; Mrk. 5:1-20)

²⁶Mawu Yesus wuṛṛu mallajarṛenggen-Ne lapiddu nassaalanna na'oma n sara leta'u Gerasa su samba'a n Rano Galilea. ²⁷Napawe Mawu Yesus nilumintukke su ammaranne, Itou nirantannu sangkatou esakka apan niasuttannu gharrahho lajeo. Taumata udde wuassu soa. Maḷannute itou uatantole wuṛṛu maddirri matana'a su waje. Itou tumba'u maapulu matana'a su manga liangnga tampa m pallabinganna. ²⁸Napawe naasilo Mawu Yesus, itou nangintuḷi see inumaḷintuda su saruannu Mawu Yesus wuṛṛu nabbisara, "Mawu Yesus, Ana'u Mawu Ruata Apan Atanggaranne! Sarun olaannu ereapa ia'u indi? Ia'u sumaḷande ariewe manansara sia'u!" ²⁹Taumata udde nabbisara arodidi ana waugu Mawu Yesus namarenta gharrahho lajeo udde sinumabangnga wuassi tou. Masokkate itou suttannu gharrahho lajeo udde, ma'oma n sara salaiwe limane wuṛṛu leddane suete niṛṛapussu rate wuṛṛu itou rariaganna mapia-pia, itou ta'e lai maawassutta rate udde see iaapiddu gharrahho lajeo watukku wadda'a.

³⁰Mawu Yesus naiwalo taumata udde, "Isai arannu?"

"Aranku 'Legiun'," sasimbakku taumata udde – ana waugu manambo gharrahho lajeo sinumutta sulaḷummu wadangge. ³¹Manga gharrahho lajeo udde sinumaḷande tadea'u Mawu Yesus tawe mallimbuakka simangitou sulaḷummu Rampissu Papate.

³²Marani n tampa udde manambo atonna wawi tantaḷanna maddea'a anna su wele n wuidda. Manga gharrahho lajeo udde sinumaḷande Mawu Yesus tadea'u iwala sumutta sulaḷummu manga wawi udde. Ne Mawu Yesus inumire. ³³Ne manga gharrahho lajeo udde sinumabangke wuassu taumata udde see nangintarrote su manga wawi udde. See manga wawi udde tinumaḷangnga wuṛṛu tinumumpa wuassu winggi n rampissa watukku laḷummu rano, wua udde naḷammissa.

³⁴Manga mandariaga wawi udde naasilo apa apan suete nariaddi. Ne imangitou tinumaḷangnga, wuṛṛu namasingkattu watti'a udde su soa wuṛṛu su ampungnga maranine. ³⁵See manga taumata nampassabangnga ma'ellega apa apan suete nariaddi. Imangitou nirumanta ringannu Mawu Yesus, wuṛṛu isudde imangitou naaratingnga taumata apan nallosse wuassu manga gharrahho lajeo udde tantaḷanna ua'ianna marani n ledda Mawu Yesus. Itou ualuṛrete n laubba wuṛṛu ringiranne masemakke. Imangitou nata'utta. ³⁶Sarangkanambone apan naasilo arriaddianna udde nabbatti'e su taumata ereapa taumata udde niapaapia. ³⁷See anambo n tumana'u leta'u Gerasa udde sinumaḷande Mawu Yesus

tadea'u Ito manantanggu tampa udde, ana waugu imangitou nambo matta'utta. Nariaddi Mawu Yesus sinuma'ete saalanna inaita mapuḷe. ³⁸Taumata apan napallosse wuassu gharraho laḷeo udde sinumaḷande Mawu Yesus tadea'u itou wotongge tumantalongga.

³⁹Arawe Mawu Yesus nandolokki tou napuḷe, wisara-Ne, "Apuḷete wuḷḷu wattia'e apa apan suete niola'u Mawu Ruata si'o."

Ne taumata udde napuḷete wuḷḷu nabbatti'e su ahewallu soa, aḷawo'u inolaanna apan suete niola'u Mawu Yesus sitou.

Ana'i Yairus - wawine apan nangindingnga Mawu Yesus

(Mat. 9:18-26; Mrk. 5:21-43)

⁴⁰Napawe Mawu Yesus nabelengke su samba'a n rano, Ito ni-saḷohoanna manga taumata ringannu aḷaḷuassa ana waugu imangitou tantaḷanna ualaḷḷado Sitou. ⁴¹See nirumanta sangkatou tembonnu waḷe m pattataḷḷamawuanna isudde. Aranne Yairus. Ito nassubba su saruannu Mawu Yesus wuḷḷu sinumaḷande tadea'u Mawu Yesus rumanta su waḷene, ⁴²ana waugu anangge wawine man sambau uukke mapuḷo dua su tonnane maranite mate.

Tantaḷanna Mawu Yesus u'amatta watukku waḷe n Yairus, manga taumata mangke mannesse'i Tou wuassu aḷawo'u tampa. ⁴³Su wallatti mangitou pia sangkatou wawine apan mapuḷote dua su tonnane uapendamma rada'u wawine. Ito suete nanginsue manga darotongge iapa'undamma su doktere, arawe tawedu sangkatou apan naapia sitou. ⁴⁴Wawine udde nangundani Mawu Yesus wuassu liudde, see nangindingnga pentakku jubah-Ne. Orassa udde lai rada'u wawine udde napia. ⁴⁵Mawu Yesus naiwaḷo, "Isai nangindingnga Sia'u?"

Anambo n taumata nassinaada. See Petrus nabbisara, "Iamangnga, manambo atonna taumata uapaḷiwutta su Iamangnga; imangitou mangke mannesse'i Iamangnga!"

⁴⁶Mawu Yesus nabbisara, "Arawe pia taumata nangindingnga Sia'u. Ia'u masingkatta ana waugu pia auatanna sinumabangnga wuassia-U." ⁴⁷Wawine udde naatutukka manungku inolaanne udde niasingkatante. Nariaddi itou nirumanta ringannu mangngindo see inumaḷintuda su saruannu Mawu Yesus. Ne itou nabbatti'e su saruannu rawadaalla, anio itou nangindingnga Mawu Yesus, wuḷḷu manungku radangge napia orassa udde lai. ⁴⁸Mawu Yesus nabbisara sitou, "Ana'u, ana waugu i'o mangngimanna Sia'u, i'o napia. Apuḷete ringannu saḷamatta."

⁴⁹Tantaḷanna Mawu Yesus ta'e uahahatto, sangkatou raloḷoḷḷanna nirumanta wuassu waḷe n Yairus. Ito nabbisara si Yairus, "Ana'i tuangnga natete. Ariete lai tuangnga mapaasusa m Iamangnga Huru."

⁵⁰Napawe Mawu Yesus naaringikka wisara udde, Itou nabbisara si Yairus, "Arie paata'utta. Pangimante, anangngu sarun mapia."

⁵¹Napawe na'omate su waļe n Yairus, Mawu Yesus tawe namala n saran sangkatou sumutta su sambau ringanni Tou tumba'u Petrus, Yohanes, Yakobus wuŗru inangnga iamangngu ana'a udde. ⁵²Anambo n taumata tantaļanna lulluai wuŗru massusa ana waugu apapate n ana'a udde. Arawe Mawu Yesus nabbisara, "Arie palluai. Ana'a udde tawe nate, itou tumba'u mattiilla!"

⁵³Imangitou nilumage Mawu Yesus, ana waugu imangitou masingkatta manungku ana'a wawine udde natete. ⁵⁴Wua udde Mawu Yesus namita lima n ana'a udde see nabbisara, "Pabbangunte, Ana'a!" ⁵⁵Niawa ng kana'a nabelengke apia su ana'a udde, wuŗru orassa udde lai itou nabangunna. Wua udde Mawu Yesus nandolokki mangitou napaannu ana'a udde. ⁵⁶Hagurangngu ana'a udde naherangnga atonna. Arawe Mawu Yesus naningaddi mangitou mamasingkattu arariaddianna udde su aļawo'u taumata.

Mawu Yesus nandolokku sire mapuļo dua mallaļarŗenggen-Ne

(*Mat. 10:5-15; Mrk. 6:7-13*)

9 Mawu Yesus namago sire mapuļo dua mallaļarŗenggen-Ne, see nangagillu tarrino simangitou ipallimbuakka gharraho laļeo wuŗru mapaapia n rada'a. ²Wua udde Itou nandolokke mangitou inai mapaapia n taumata marada'a wuŗru mamasingkattu watti'a su ola'u ereapa Mawu Ruata mamarenta ere sangkatou Ratu. ³"Arie pangapiddu saranapa su amatanni amiu," unnu Mawu Yesus simangitou. "Arie pangapiddu ta'inna, ara'e tampa m pondi, ara'e anna, ara'e roitta, ara'e lai laubba rua m parassa. ⁴Suapa n tampa iamiu itarimmatta, atana'e isudde ma'oma n sara iamiu manantangngu soa udde. ⁵Wuŗru su tampa iamiu tawe itarimmatta, su tempo iamiu manantangngu soa udde, tontonga'a awu wuassu paļadu leddanu, maola'a sambau pannanaunganna simangitou."

⁶Manga mallaļarŗenggenu Mawu Yesus nabuatte, see inaitte su manga ampungnga mabatti'u Watti'u Aļaļuassa udde wuŗru napaapia n taumata marada'a su aļawo'u tampa.

Herodes niaļiwune

(*Mat. 14:1-12; Mrk. 6:14-29*)

⁷Su tempo Herodes uaparenta su Galilea, naaringikka su ola'u anambo n arariaddianna udde, itou niaļiwune. Ana waugu piaddu

mabbisara manungku Yohanes Mananaṛrani nabbiakke apia. ⁸Piaddu lai mabbisara manungku Elia nirumantate apia. Taumata waine lai mabbisara manungku sangkatou nabi su wallattu manga nabi ro'e n aḷamonane nabbiakke apia. ⁹Herodes mabbisara, "Ia'u suete nandolokku taumata niapapototta pua n Yohanes. Arawe taumata indi, isai Itou? Manambo watti'a suete ta'u niaringiṛanna matataṛṛino Sitou." Ne Herodes mappandumma ma'ellega Mawu Yesus.

Mawu Yesus napaannu lima ṛiwu su atoune

(*Mat. 14:13-21; Mrk. 6:30-44; Yoh. 6:1-14*)

¹⁰Manga raloḷoṛṛannu Mawu Yesus nabelengke wuṛṛu nabbatti'e su Mawu Yesus, sarangkanambone apan suete niola'i mangitou. Mawu Yesus nangahe simangitou see inaita su sambau, imangitou nanginsa-ssa watukku soa Betsaida. ¹¹Arawe napawe manga taumata naasingkatta olangge udde, imangitou tinumantalongnga Mawu Yesus. Itou nanarimmatti mangitou, see nabbatti'a simangitou su ola'u ereapa Mawu Ruata mamarenta ere sangkatou Ratu. Wuṛṛu Itou lai napaapia n taumata marada'a su wallatti mangitou.

¹²Napawe matannallo mattatupe, sire mapuḷo dua mallaḷaṛṛenggennu Mawu Yesus nirumanta ringanni Tou wuṛṛu nabbisara, "Iamangnga, tampa indi naṛṛae marau. Mappianne Iamangnga mandolokku manga taumata indi iapaapuḷe, tadea'u imangitou wotongge maddea'a anna wuṛṛu maddea'a tampa atiḷanna su manga soa wuṛṛu manga ampongnga maranine isindi."

¹³Arawe Mawu Yesus sinumimbakka, "Iamiute mapaanni mangitou."

Manga mallaḷaṛṛenggennu Mawu Yesus nabbisara, "Iami tumba'u pia lima m bau roti wuṛṛu inassa rua m bua. Apa iami ṛinone inai mamalli anna iapaanna su awadaalla indi?" ¹⁴(Iraṛṛanggo sire lima ṛiwu su atoune esakka isudde.)

Mawu Yesus nabbisara mallaḷaṛṛenggen-Ne, "Doloṛṛa'e manga taumata indi uma'ianna uawahageangnga, iraṛṛanggo lima m puḷo su atoune sambageanganna."

¹⁵Manga mallaḷaṛṛenggennu Mawu Yesus udde tinumuṛṛutte su ereapa suete niwisara Mawu Yesus simangitou. ¹⁶See Mawu Yesus nanganute lima m bau roti wuṛṛu inassa rua m bua, wua udde naningngara langitta wuṛṛu naadiangkamanna su Mawu Ruata. Wua udde Itou namesangnga roti wuṛṛu inassa udde ringannu lima-Ne see nianggille su mallaḷaṛṛenggen-Ne niapatahia su taumata nambo udde. ¹⁷Imangitou sarangkanambone inumanna na'oma n sara naḷai-ḷaidda.

See manga mallaḷarḷenggenḷu Mawu Yesus nangammule n lambe ng kannu udde anambone mapuḷo dua su uḷangge.

Panga'uanni Petrus su Mawu Yesus

(*Mat. 16:13-19; Mrk. 8:27-29*)

¹⁸Su sambau allo, napawe Mawu Yesus tantaḷanna u'aliomanna sassane, mallaḷarḷenggen-Ne nirumanta ringanni Tou. Mawu Yesus naiwaḷo simangitou, "Tumuḷḷuttu wisara n taumata, Ia'u indi isai?"

¹⁹Imangitou sinumimbakka, "Piaddu nabbisara Yohanes Mananaḷḷani. Piaddu lai mabbisara Elia, waine lai nabbisara su wallattu sangkatou nabi su tempo n aḷamona apan nabbiakke apia."

²⁰"Arawe tumuḷḷutta siamiu sassane, Ia'u indi isai?" aiwaḷo Mawu Yesus.

Petrus sinumimbakka, "Iamangnga eteudde Ratu Punnu Saḷamatta apan pina'ire Mawu Ruata."

Mawu Yesus nabatti'u asasusa-Ne wuḷḷu apapate-Ne

(*Mat. 16:21-28; Mrk. 8:31-9:1*)

²¹See Mawu Yesus nabbisara mallaḷarḷenggen-Ne, "Imbarḷangnga mamasingkattu olangge indi sisai-sai." ²²Mawu Yesus nabbisara apia, "Ana'u Taumata sarun matataḷḷangnga wuḷḷu ipasseettu manga piarḷangge wuḷḷu manga imam tembonanne, see manga huru n agama. Itou sarun pateanna, arawe su allo atallune sarun iapawangunna apia."

²³Wua udde Mawu Yesus nabbisara taumata nambo isudde, "Taumata apan maapulu rumandinganna Sia'u, ḷinone tawe mannaungnga manarane sassane, mamasanna arussa-Ne miallo-miallo wuḷḷu sidutu uatantalongnga Sia'u. ²⁴Ana wauḷu taumata apan mannahekkku wiakke, sarun awuḷiannu wiakke udde. Arawe taumata apan mannantillu wiakke ana wauḷu apulu-U, itou sarun masaḷamatta. ²⁵Apa sombangeḷu su sangkatou taumata amungkangngu ahewallu runia indi maola'a pusaane, arawe itou mandaḷeo wuḷḷu awuḷiannu wiakke? ²⁶Amungkangngu taumata massili manga'u Sia'u wuḷḷu aḷara'u, Ana'u Taumata lai massili manga'u taumata udde su tempo Itou rumanta apia ringannu taḷḷirino-Ne, wuḷḷu ringannu taḷḷirino n lamangnga wuḷḷu taḷḷirino mala'ekatta apan susi! ²⁷Asingkatewe: wuassu wallatti amiḷu isindi pia sangkatou tawe mate tantaḷanna itou taambe naasilo Mawu Ruata mamarenta."

Mawu Yesus niwantuhanna

(Mat. 17:1-8; Mrk. 9:2-8)

²⁸Iraṙrangngo sangkamisa wuassu tempo Mawu Yesus nangaṙṙa'u sarangkanambone udde, Itou nangapidae n Petrus, Yohanes wuṙṙu Yakobus su sambau wowone inai uṁaliomanna. ²⁹Tantaṙanna Mawu Yesus u'aliomanna isudde, hati-Ne nawaṙu wuṙṙu laung-Nge nabaṙi mawira sussaṙendappa. ³⁰⁻³¹Inaṙṙombanganne rua ng katou, eteudde Musa wuṙṙu Elia nattingkapsilo m batanganne ringannu asasemakka wuassu surga. Imangitou uahahatto Mawu Yesus su ola'u apapate-Ne apan tate maṙannu lai mariaddi su Yerusalem. ³²Su tempo udde Petrus wuṙṙu manga hawene niamatiṙanna, arawe inaṙṙombanganne napu'o wuṙṙu naasilo Mawu Yesus lullansiangnga wuṙṙu taumata rua ng katou uarisikka ringanni Tou. ³³Su tempo rua ng katou udde manantangke Mawu Yesus, Petrus nabbisara Mawu Yesus, "Iamangnga Huru, mapia atonna iite isindi. Mappianne iami mapararisikku rasanna tatallu; sambau si Tuangnga, sambau si Musa wuṙṙu sambau lai si Elia." (Petrus nabbisara arodidi arawe tawe maasunna wisarane udde.)

³⁴Tantaṙanna Petrus ta'e uahahatto, nirumantate winabbawa, wuṙṙu nangooppa simangitou na'oma n sara imangitou nata'utta. ³⁵Wua udde wuassu winabbawa udde niaringiṙṙanna tinggikka mabbisara, "Ete indi Ana'u apan Ta'u pinile. Padaringikka Sitou!"

³⁶Napawe tingikka udde naddote, imangitou naasilo Mawu Yesus sassane isudde. Mallaṙṙenggennu Mawu Yesus nallannaba su ola'u sarangkanambone apan nariaddi udde, wuṙṙu tawe nabatti'a sisai-sai apa apan suete niasiloanni mangitou.

Mawu Yesus napaapia n ana'a apan niasuttannu ghaṙṙaho laṙeo

(Mat. 17:14-18; Mrk. 9:14-27)

³⁷Su allo tiṙṙabbine Mawu Yesus wuṙṙu sire tallu mallaṙṙenggen-Ne sinumossokke wuassu wowone udde, wuṙṙu manambo taumata nirumanta ringannu Mawu Yesus. ³⁸Sangkatou esakka wuassu pattangngannu awadaalla udde, nangintuṙi, "Iamangnga Huru, tuṙunga'a ellehe ana'u – tumba'u sangkatou udde ana'u! ³⁹Amungkangngu ghaṙṙaho laṙeo sumutta sitou, inaṙṙombanganne itou umui wuṙṙu awangnge iwabantikke ma'oma n sara moṙṙongnge lullupa. Ghaṙṙaho udde sidutu mannan-sara sitou wuṙṙu maddiri sumabangnga wua dinganni tou. ⁴⁰Ia'u suete

naituḷungnga su mallaḷaḷḷarenggenni Iamangnga mallimbuakka gharraho udde, arawe imangitou tawe naaḷimbuakka."

⁴¹Mawu Yesus sinumimbakka, "Waḷine hampa iamiu indi! Iamiu atonna manga taumata apan marrusaḷa wuḷḷu tawe mangngimanna! Ma'oma n sara tingngera Ia'u matana'a suadio'a ringanni amiu wuḷḷu manabare siamiu? Apira'e anangngu udde isindi!"

⁴²Tantaḷanna ana'a udde u'amatta mattuda Mawu Yesus, gharraho laḷeo udde nangema'i tou wuḷḷu wadangnge iwabantikke. Arawe Mawu Yesus namarenta gharraho laḷeo udde niapaasabangnga see napiate ana'a udde. See ana'a udde tinantille apia su iamangnge. ⁴³Awadaalla naherangnga naasilo tarḷḷino Mawu Ruata aroddi ahewalle.

Mawu Yesus nabbati'a apia su ola'u apapate-Ne

(Mat. 17:22-23; Mrk. 9:30-32)

Su tempo manga taumata ta'e tuttiangnga naasilo sarangkanam-bone apan niolang-Nge, Mawu Yesus nabbisara su mallaḷaḷḷarenggen-Ne, ⁴⁴"Paatutuḷḷe paapia-pia wuḷḷu arie paabulḷiane manga wisara-U indi: Ana'u Taumata sarun itantilla su tarḷḷino n taumata." ⁴⁵Arawe mallaḷaḷḷarenggennu Mawu Yesus udde tawe naasunna wisara-Ne. Olangnge udde iaadappingnga simangitou tadea'u imangitou tawe maasunna. Arawe imangitou matta'utta maiwaḷo olangnge udde Sitou.

Isai ahewaḷanne?

(Mat. 18:1-5; Mrk. 9:33-37)

⁴⁶Su wallattu mallaḷaḷḷarenggennu Mawu Yesus nariaddi pattatiakka su ola'u isai su wallatti mangitou apan ahewaḷanne. ⁴⁷Mawu Yesus naasingkatta ḷingirḷanni mangitou, ana waugu udde Itou namaggo sangkatou ana'a adio'a wuḷḷu niaparisikka su sandirḷan-Ne. ⁴⁸See Itou nabbisara manga mallaḷaḷḷarenggen-Ne, "Taumata apan manarimmattu ana'a indi ana waugu Ia'u, udde ere lai manarimmatta Sia'u. Wuḷḷu taumata apan manarimmatti Ia'u manarimmatti Tou lai apan nandolo-U. Ana waugu taumata apan adio'anne su wallatti amiu, ete itou apan ahewaḷanne!"

Taumata apan tawe mandooppa siamiu, uasamba'a siamiu

(Mrk. 9:38-40)

⁴⁹Yohanes nabbisara, "Mawu, iami naasilo taumata mallimbuakka setanna ringannu arannu Mawu, wuŕŕu iami naningaddi tou, ana waugu itou waŕine wua dinganni ite."

⁵⁰"Arie maningaddi tou," wisara Mawu Yesus si Yohanes wuŕŕu manga mallajaŕŕenggennu Mawu Yesus apan waine, "ana waugu taumata apan tawe mandooppa siamiu, udde uasamba'a siamiu."

Sambau ampungnga su Samaria maddiri manarimmattu Mawu Yesus

⁵¹Napawe maranite tempone Mawu Yesus masengkengnga watukku surga, Itou nakkawessa inai mabatukku Yerusalem. ⁵²Ne Itou nandolokku taumata inai malliu ŕoro Sitou. Manga taumata apan nirolokka udde inaita, see sinumuttate su sambau ampungnga su Samaria tadea'u manaddia manga aŕawo'a huna Mawu Yesus. ⁵³Arawe manga taumata su ampungnga udde maddiri manarimmattu Mawu Yesus, ana waugu niasingkatante atonna manungku Itou mattudate n Yerusalem. ⁵⁴Ne su tempo manga mallajaŕŕenggennu Mawu Yesus, eteudde Yakobus wuŕŕu Yohanes naasingkatta olangnge udde, imangitou nabbisara, "Mawu, apa Mawu maapulu, iami madorongnga putungnga sumossokka wuassu langitta ipamate manga taumata indi?"

⁵⁵Mawu Yesus nanaille, see namuŕo simangitou. ⁵⁶Wua udde imangitou inaita su ampungnga waine.

Manga taumata apan maapulu maola'a mallajaŕŕenggennu Mawu Yesus

(Mat. 8:19-22)

⁵⁷Tantaŕanna Mawu Yesus wuŕŕu mallajaŕŕenggen-Ne manassu amatanne, pia taumata nabbisara Mawu Yesus, "Iamangnga, ia'u maapulu tumantalongnga su Iamangnga suapa n tampa Iamangnga uma-matta!"

⁵⁸Mawu Yesus sinumimbakka, "Serigala pia liangnge, wuŕŕu manu'u winalanganna pia saŕakke, arawe Ana'u Taumata tawe tampa

lallalowangan-Ne.” ⁵⁹See Mawu Yesus nabbisara su sangkatou waine, ”Tantalongke Sia’u.”

Arawe taumata udde nabbisara, ”Iamangnga wala’a ia’u mapuḷe asuene mallabingngu iamangku.”

⁶⁰Mawu Yesus sinumimbakka, ”Wala’e taumata nate mallabingngu taumatane nate sassane. Arawe i’o roote wuḷḷu waḷoa’e watti’a manungku Mawu Ruata mannattakke mammarenta.”

⁶¹Piaddu lai taumata waine nabbisara, ”Iamangnga, ia’u maapulu tumantalongnga su Iamangnga, arawe wala’a ia’u mapuḷe rorone mabaḷo.”

⁶²Mawu Yesus nabbisara taumata udde, ”Taumata apan mannattakke mammajeko see manaile liudda, tawe ḷinone maola’a laḷoḷḷo n araratuannu Mawu Ruata.”

Mawu Yesus nandolokku sire pitu m puḷo mallajaḷḷenggen-Ne

10 Wua udde Mawu Yesus namile sire pitu m puḷo mallajaḷḷenggen-Ne lai, see nandolokki mangitou pattarra darua malliu ḷoro Sitou watukku aḷawo’u soa wuḷḷu tampa apan rantanni Tou. ²”Wuane apan itinganna manambo,” unnu Mawu Yesus simangitou, ”arawe mangangitingnge matuḷungnga. Ana waugu udde padorongke su tatahuannu wailla tadea’u itou mandolokku taumata mangitingnga wua n si-nuananne. ³Ne, roote! Ia’u mandolokki amiu ere domba su pattangngannu serigala. ⁴Arie pangapiddu tampa n roitta ara’e pato’a m padaroronganna, ara’e sapatu. Arie mangilloḷo su tangnga n daḷanna ana mattabea su sangkatou taumata. ⁵Amungkannggu iamiu sumutta su sambau waḷe, wisara’a paarorone, ’Doronganna aḷaḷuassa sulaḷummu waḷe indi.’ ⁶Amungkannggu isudde pia taumata maapulu m padarame, tabea m padaramenu udde sarun sidutu sitou, amungkannggu tawe, uḷei apia tabea m padaramenu udde. ⁷Atana’e tumba’u su waḷe sambau. Sengkamma apa apan iassaru siamiu isudde, ana waugu taumata apan mammanara wotongnge manengkamma laḷantakke. Arie massaḷiu wuassu waḷe sambau watukku waḷe waine. ⁸Amungkannggu iamiu rumanta su sambau soa wuḷḷu isudde iamiu saḷohoanna ringannu mapia, ante apa apan ia’imbe mangitou isudde. ⁹Paapia’a taumata apan marada’a su soa udde, wuḷḷu paasingkata’a su manga taumata isudde manungku, ’Mawu Ruata maḷihakke mamarenta ere sangkatou Ratu su pattangnganni amiu.’ ¹⁰Arawe amungkannggu iamiu rumanta su sambau soa wuḷḷu iamiu isudde tawe itarimmatta, sabbangke su laḷanna wuḷḷu wisara’a, ¹¹Ewe’e sara lai awu su soanu apan uareetta su ledda ng kami, itontongngi ami maola’a sambau pananaunganna siamiu. Arawe ḷinone

iamiu maasingkatta manungku maranite tempone Mawu Ruata mama-renta ere sangkatou Ratu su pattangnganni amiu!" ¹²Paananunge, su Allo ng Kiamatta, taumata n Sodom malluasanna ampungannu Mawu Ruata wuassu taumata su soa udde!"

Manga soa apan tawe mangngimanna

(Mat. 11:20-24)


¹³"Nasilakate iamiu Korazim! Wuṛṛu nasilakate iamiu Betsaida! Unnu wisara manga aḷaṛṛindu'a apan niola'a su pattangnganni amiu udde suete niola'a su soa Tirus wuṛṛu Sidon, manga taumata poiaronddi maḷannute nawaḷu wuassu manga rosa mangitou, wuṛṛu nalluṛrete n laubbu asasusa see nangado n awu su pua mangitou. ¹⁴Su Allo ng Kiamatta, manga taumata n Tirus wuṛṛu Sidon malluasanna ampungannu Mawu Ruata wuassi amiu. ¹⁵Wuṛṛu iamiu Kapernaum! Iamiu maṛṛingidda manungku iamiu sarun itanggakka ma'oma n sara surga? Tawe! Ewe'e iamiu sarun iramme su naraka!"

¹⁶See Mawu Yesus nabbisara manga mallalaṛṛenggen-Ne, "Taumata apan madaringikka siamiu, madaringikka lai Sia'u. Taumata apan mannoḷa'i amiu, mannoḷa-U lai. Wuṛṛu taumata apan mannoḷa-U, mannoḷa'i Tou lai apan nandolo-U."

Pabbawelenggu sire pitu m puḷo mallaḷaṛṛenggenna

¹⁷Sire pitu m puḷo mallaḷaṛṛenggenna udde nabelengnga ringannu aḷaḷuassa. "Mawu," wisara mangitou, "manga ghaṛṛaho laḷeo lai tuttuṛrutta siami amungkangngu iami mamarenta simangitou ringannu arannu Mawu!"

¹⁸Mawu Yesus sinumimbakka, "Ia'u naasilo Setanna nanawo wuassu langitta naaḷihida sawallo. ¹⁹Asingkatewe! Iamiu suete inonggoḷannu taṛṛino tadea'u iamiu wotongnge maṛṛinda atoanna wuṛṛu kalajengking lapiddu mamadi aḷawo'u auatannu seetta, ringannu tawe saran sambau wotongnge manilaka siamiu. ²⁰Salaiwe aroddi arie lumuassa ana waugu manga ghaṛṛaho laḷeo nassuṛrubawa siamiu. Mappianne iamiu lulluassa ana waugu arannu uawoṛṛetta su surga."



Kalajengkinga (10:19)

Mawu Yesus lullala'a

(Mat. 11:25-27, 13:16-17)

²¹Su tempo udde lai, Mawu Yesus lullala'a ana waugu niasuttannu Gharraho Mawu Ruata. Mawu Yesus nabbisara, "Iamangnga, Mawu apan uatahuanna langitta wurru runia! Ia'u maadiangkamanna Si'o ana waugu sarangkanambone udde niadappingngu su taumata nambo apan pande wurru pia asingkanne, arawe l'o napaalatta'a su manga taumata tawe si'olane. Eteudde apan maa'uassa naungngu Iamangnga.

²²Sarangkanambone suete tinantillu Iamangnga Sia'u. Tawe saran sangkatou maailla'a Ana'a tumba'u Iamangnga. Tawe saran sangkatou maailla'a Iamangnga tumba'u Ana'a, wurru su manga taumata ete sisai Ana'a udde iapaasingkattu Iamangnga."

²³See Mawu Yesus nanaile mallaarengen-Ne, see nabbisara si-mangitou sassane, "Auntunganna siamiu ana waugu suete naasilo apa apan niasiloanni amiu orassa indi. ²⁴Ana waugu paanaunge: Manambo nabi wurru ratu maapulu ma'ellega apa apan niasiloanni amiu orassa indi arawe imangitou tawe maasilo. Imangitou maapulu madaringikka apan radingiranni amiu orassa indi, arawe imangitou tawe maaringikka."

Sasumandingngu taumata n Samaria apan mapia naungge

²⁵Wua udde sangkatou huru n agama nirumanta maddea'a mapaa-sala Mawu Yesus. Itou naiwalo, "Iamangnga Huru, apa sarun ta'u manaranna tadea'u wotongnge maasengkamma wiakka tutune wurru malannu-lannu?"

²⁶Mawu Yesus sinumimbakka, "Apa udde uaworretta su Wuke Susi? Ereapa su ringirannu matarino su olangge udde?"

²⁷Taumata udde sinumimbakka, " 'Pandangngute Mawu Ruatanu ringannu ahewallu naunggu wuŕru ringannu ahewallu apendammu, ringannu aŕawo'u auatannu, wuŕru ringannu anambo n apandenu,' wuŕru 'Pandangngu sansuŕlunggu ere lai i'o mandangngu wadangngu sassane.'"

²⁸"Sasimbakku udde atonna," unnu Mawu Yesus. "Ola'e udde tadea'u i'o maralukka."

²⁹Arawe huru n agama udde maddiri mapaasala n ririne. Itou naiwalo, "Isai sansuŕlungku udde?"

³⁰Mawu Yesus sinumimbakka, "Pia sangkatou esakka sinumossokka wuassu Yerusalem watukku Yerikho. Su tangnga n daŕanna itou niampangannu mararampassa, niaŕro aŕawo'u darotongge, nipuulla na'oma n sara maranite mate, see tinantangnga ualallowangnga su laŕanna ringannu naŕaŕessa. ³¹Inaŕrombanganne sangkatou imam inumamatta lai su laŕanna udde. Napawe itou naasilo taumata udde, itou nanewadda su samba'a n daŕanna, see nanassute amatanne. ³²Aroddi lai sangkatou taumata n Lewi apan inumamatta isudde; napawe itou naasilo taumata udde, itou nangundani ma'ellega. Arawe itou lai nanewadda su samba'a n daŕanna see nanassute amatanne. ³³Arawe wua udde sangkatou taumata Samaria apan tantaŕanna u'amatta, sinumabbi isudde. Napawe itou naasilo taumata udde, naungnge nasusa wuŕru inumakanna. ³⁴Ne itou nangundani n taumata udde see namaresi manga lessane ringannu anggore wuŕru inundamannu lana, wua udde manga lessa udde niwa'issa. Wua udde, itou nallurannu taumata udde su keledai n tou sassane, see niapiddu su sambau wale m patindahoanna see niundamante. ³⁵Tirrabbine itou nanganu darua roitta saŕa'a wuŕru nianggilla su tatahuannu wale lapiddu nabbisara, 'Undamete itou, wuŕru amungkangngu pia bawaekke waine, ia'u mamaekka napawe ia'u mabelengnga apia isindi.'"

³⁶Wua udde Mawu Yesus nanginsuete watti'a udde ringannu aiwalo indi, "Wuassu sire tallu udde, suapane tumuŕruttu addapannu apan nantununggu sansuŕlungge wuassu taumata apan nipangarfoanna udde?"

³⁷Huru n agama apan naiwaloanna udde sinumimbakka, "Taumata apan suete nantununggu taumata udde."

"Ne, roote wuŕru pa'ola'e lai ereudde!" wisara Mawu Yesus.

Mawu Yesus nattembo si Maria wuŕru si Marta

³⁸Wua udde Mawu Yesus wuŕru mallarŕenggen-Ne nanassute amatanne, see na'omate su sambau ampungnga. Isudde sangkatou wa-

wine, aranne Marta, namaggo Sitou niaparanta su wałene. ³⁹ Marta pia turrangnge wawine aranne Maria. Maria indi inuma'ianna marani Mawu Yesus madaringikka manga ałarřang-Nge. ⁴⁰ Arawe Marta mangke mammanara aławo'u manara su wałene. Itou inaitu ringannu Mawu Yesus wuřru naiwało, "Mawu, anio Mawu tawe managu si Maria mappamannara'u sassane? Dolořra'e itou mallalima sia'u!"

⁴¹ "Marta, Marta!" sasimbakku Mawu Yesus. "I'o sussinggawangnga wuřru marringiddu manara indi wuřru manara udde; ⁴² arawe apa apan pia gunane tumba'u sambau. Wuřru Maria suete namile lembo n apianne, apan tawe iaalappa wuassi tou."

Ałarřa'u Mawu Yesus su ola'u aaljomanna

(Mat. 6:9-13, 7:7-11)

11 Su sambau allo Mawu Yesus inumaljomanna su sambau tampa. Man napawe suete inumaljomanna, sangkatou su wallattu manga mallalarřenggen-Ne nabbisara, "Mawu, arřa'e iami umaljomanna ere lai Yohanes manggarřa'a mallalarřenggenne umaljomanna."

² Ne Mawu Yesus nabbisara simangitou, "Amungkangngu iamiu umaljomanna, pabbisarate ereindi,

'Iamangnga,

Ete I'o Mawu Ruata apan Tinggassa.

Doronganna I'o subbanna wuřru addatanna.

³ Onggoł'a su miallo-miallo

anna apan haggasanni ami,

⁴ Ampungnge manga rosa ng kami,

ana waugu iami lai mangngampungnga taumata

sangkatou-sangkatou

apan nassala siami.

Wuřru arie mamala ng kami awuļiannu pangangimanna su tempo iami uasaruanna wawalintongnga."

⁵ Mawu Yesus nabbisara manga mallalarřenggen-Ne, "Unnu wisara sangkatou wuassu wallatti amiu inai su wałe n hawene su tempo allorane, wuřru mabbisara, 'Hawe, pawallasa'a roti tallu m bau, 'ana waugu hawe'u apan su amatanne wakkute notongnga su wałe'u wuřru ia'u tawe anna ipanaru sitou!' ⁷ Unnu wisara hawe apan nirantannu udde sinumimbakka arendi, wuassu lałummu wałene, 'Arie mapaasusa'u! Ngara suete niřruuda wuřru ia'u ringannu ałarřana'u mattiille. Ia'u tawe maawangunna wuřru mangagillu manga apa si'o.'"

⁸ "See ereapa?" wisara Mawu Yesus nanansunna. "Ia'u mabbisara ore! Salaiwe i'o udde hawene, itou maddiri mabangunna wuřru manga-

gillu sarannapa si'o. Arawe ana waugu i'o tawe apendamma massili sidutu madorongnga sitou, ne itou mabangunte wuṛṛu mangagille si'o apa apan pappandumannu. ⁹Nariaddi Ia'u mabbisara si'o: Padorongke, ne iamiu sarun ongoḷanna; padea'e, ne iamiu sarun maasomba; panengkelle, ne iamiu sarun pamu'anna ngara. ¹⁰Ana waugu taumata apan nadorongnga sarun manengkamma, taumata apan maddea'a sarun maasomba, wuṛṛu taumata apan mannengkella sarun pamu'anna ngara. ¹¹Su wallatti amiu apa pia iamangnga mangngagillu atoanna su anangnge, amungkangngu itou madorongnga inassa? ¹²Ara'e mangagillu kalajengkingnga amungkangngu itou madorongnga tallukka? ¹³Salaiwe iamiu laḷeo, iamiu masingkatta lai mangagillu sarannapa mapia su ana'i amiu. Lembonete lamangnga su surga. Itou sarun mangagillu Ghaṛṛaho-Ne simangitou apan madorongnga Sitou!"

Mawu Yesus wuṛṛu Beelzebul

(Mat. 12:22-30; Mrk. 3:20-27)

¹⁴Su sambau allo Mawu Yesus nallimbuakka ghaṛṛaho laḷeo nia-paasabangnga wuassu sangkatou mou. Napawe ghaṛṛaho laḷeo udde sinumabangnga, taumata udde nanattakke maawisara. Manambo taumata naherangnga, ¹⁵arawe piaddu mabbisara, "Itou wotongnge mallimbuakka ghaṛṛaho laḷeo ana waugu taṛṛino Beelzebul, tembonannu ghaṛṛaho laḷeo udde."

¹⁶Piaddu lai manga sire pira taumata waine maddea'a mapaa-saḷa Mawu Yesus, aroddi imangitou madorongnga Itou ma'ola'a sambau aḷaṛṛindu'a maola'a sambau tatiala manungku Itou atonna-tonna nirumanta wuassu Mawu Ruata. ¹⁷Arawe Mawu Yesus naasingkatta pandumanni mangitou. Ne Itou nabbisarate simangitou, "Amungkangngu araratuanna natahia sulaḷummu wageangnge apan uasaseetta sambau ringannu waine, araratuanna udde tawe mattatana'a maḷannu. Wuṛṛu sambau pabbawalaga apan uataḷei wuṛṛu uasaseetta sambau ringannu waine, sarun mawinasa. ¹⁸Aroddi lai sulaḷummu araratuannu Setanna, amungkangngu sambageanganna mabawuḷo ringannu wageangnge waine, araratuanna udde sarun mawinasa. Iamiu mabbisara manungku Ia'u mallimbuakka ghaṛṛaho laḷeo ana waugu taṛṛino n Beelzebul. ¹⁹Amungkangngu aroddi, ringannu taṛṛino n sai manga mallalaṛṛenggennu mallimbuakka ghaṛṛaho laḷeo udde? Manga mallalaṛṛenggennu udde sassane apan nattiala manungku iamiu nassaḷa! ²⁰Arawe Ia'u mallimbuakka ghaṛṛaho laḷeo ringannu taṛṛino Mawu Ruata, wuṛṛu udde atappasanne manungku Mawu Ruata mannattakke mammarenta su pattangnganni amiu.

²¹Amungkanngu sangkatou apan matohassa, ringannu ahidde apan nasuungnga, mandiaga waļene sassane, anambo n darotongne sarun masaļamatta. ²²Arawe amungkanngu sangkatou apan mattohasanna lumaļa'o wuŗru see itou iaansukka, ne taumata apan mattohasanna udde sarun mangarŗo anambo n ahidde apan naola'a atatohasu tatahuannu waļe udde, see nattahiate anambo n darotongne udde.

²³Taumata apan tawe uasamba'a Sia'u, atonna-tonna lullawangnga Sia'u, wuŗru taumata apan tawe massumbala Sia'u, atonna-tonna mang-gohakku manara-U!"

Pabbawelengnu gharŗaho laļeo

(Mat. 12:43-45)

²⁴"Amungkanngu gharŗaho laļeo manantangu sangkatou taumata, gharŗaho udde mammaļintaddu manga tampa apan mamara maddea'a tampa pangilloļoanna, arawe itou tawe naasomba. Ana waugu udde, itou nabbisara, 'Ia'u sarun mabelengnga su waļe'u apan suete ta'u tinantangnga!' ²⁵Su tempo itou na'omate poiarddi, itou naaratingnga waļe udde waresi wuŗru uatokka. ²⁶See itou inaito wuŗru nangapiddu sire pitu gharŗaho waine apan nangillembo araļeoanne wuassi tou. Wua udde imangitou sinumuttate sulaļummu taumata udde see natana'e isudde. Wuŗru panginsueanne taumata udde nangillembote n araļeoanne wuassu paarorone."

Laļumanna'a apan tutune

²⁷Napawe Mawu Yesus suete nabbisara arodidi, sangkatou wawine su wallattu taumata nambo udde nabbisara Mawu Yesus, "Laļumanna'a eteapa su wawine apan nangunsiwe wuŗru namasusu Si'o!"

²⁸Arawe Mawu Yesus sinumimbakka, "Nangillembo n laļumanna'a lai su taumata apan maddaringikka wisara Mawu Ruata wuŗru mappaa-mattu aļarŗang-Nge!"

Manga taumata madorongnga Mawu Yesus ma'ola'a aļarŗindu'a

(Mat. 12:38-42)

²⁹Tantaļanna manga taumata uarŗimpulunna Mawu Yesus, Itou nanassute wisara-Ne, unni Tou, "Tumanite n laļeo taumata su tempo

indi. Imangitou madorongnga sambau aḷaḷḷindu'a tadea'u imangitou wotongnge mangngimanna Sia'u, arawe imangitou tawe ongoḷannu saran sambau aḷaḷḷindu'a, tumba'u aḷaḷḷindu'i Nabi Yunus. ³⁰Su ereapa Nabi Yunus na'ola'a aḷaḷḷindu'a su taumata n soa Niniwe, aroddi lai Ana'u Taumata sarun ma'ola'a sambau aḷaḷḷindu'a su manga taumata tempo indi. ³¹Su Allo ng Kiamatta, Ratu wuassu wanua Timukka sarun mabangunna ringannu taumata n tempo indi, wuḷḷu mangansilla simangitou. Tadea'u, maaringikka aḷaḷḷa'i Salomo apan pande udde, Ratu udde nangatokku amamatta marau wuassu pentakku runia. Arawe isindi orassa indi pia sangkatou magewaḷanna wuassi Salomo! ³²Su Allo ng Kiamatta, tumana'u soa Niniwe sarun mabangunna su sambau ringannu taumata n tempo indi, wuḷḷu mangansilla simangitou, ana waugu taumata Niniwe udde nawaḷu wuassu manga rosane napawe Yunus nannase simangitou. Arawe isindi orassa indi pia magewaḷanna wuassi Nabi Yunus!"

Asasemakka wuḷḷu ararandumma

(Mat. 5:15, 6:22-23)

³³"Tawe taumata mande'omma soḷo see iwuni ara'e luuwannu wensada. Itou sarun mangado n soḷo udde su tampane, tadea'u taumata apan sumutta wotongnge maasilo semakka. ³⁴Mata eteudde soḷo m badangnga. Amungkanngu matanu matilangnga, ahewallu wadangngu masema-semakka. Arawe amungkanngu matanu maḷabukka, ahewallu wadangngu maola'a marandu-randumma. ³⁵Ana waugu udde, paa-tehamma, arie ma'oma n sara asasemakka apan si'ote udde maola'a marandumma. ³⁶Amungkanngu ahewallu wadangngu masemakka, wuḷḷu tawedu saran sambau marandumma, ne ahewallu wadangngu udde masema-semakka ere sassemarannu semakku soḷo."

Mawu Yesus napaasaḷa manga taumata n Farisi wuḷḷu huru n agama

(Mat. 23:1-36; Mrk. 12:38-40)

³⁷Napawe Mawu Yesus nangudussu wisara-Ne, sangkatou taumata n Farisi nangahe Sitou umanna su waḷene. Ne Mawu Yesus inaite inumanna isudde. ³⁸Taumata n Farisi udde naherangnga naasilo Mawu Yesus inumanna tawe nangukkassa lima rorone, tumuḷḷuttu atorannu agama. ³⁹Ana waugu udde Mawu nabbisara sitou, "Atonna iamiu manga taumata n Farisi ninumaramma mammaresi mangko wuḷḷu lama'a

tumba'u su liudde, arawe sulaḷummu watangannu napene laḷawangnga wuḷḷu aḷaḷeo. ⁴⁰Iamiu woddo! Waḷinewe Mawu Ruata apan na'ola'a wageangngu liudde udde, suete na'ola'a lai wageangngu laḷumme? ⁴¹Apan sulaḷummu mangko wuḷḷu lamangngu udde, eteudde ḷinone ionggolli amiu su taumata asiangnga. Ringannu olangnge aroddi, sarangkanambone sarun maola'a waresi hunane siamiu.

⁴²Nasilakate iamiu manga taumata n Farisi! Wua n sinuanannu ere salasih wuḷḷu inggu wuḷḷu rampa-rampa waine, iamiu mangngagillu sambageanganna su Mawu Ruata, arawe atatuḷidda wuḷḷu darangngu su Mawu Ruata tawe ia'ola'i amiu. Sumbali eteudde ḷinone olaanni amiu, ringannu tawe manantangngu atoranna waine lai.

⁴³Nasilakate iamiu manga taumata n Farisi! Iamiu maḷutu manga tampa awantuhanne sulaḷummu waḷe m pattataḷramawuanna, apulune aaddatanna su manga pasakka. ⁴⁴Nasilakate iamiu! Iamiu ere laḷabinganna tawe aranne, apan raḷḷindannu taumata awagananna."

⁴⁵Sangkatou huru n agama nabbisara Mawu Yesus, "Iamangnga Huru, ringannu manga wisara udde, Iamangnga mangngadio'a lai siami!"

⁴⁶Mawu Yesus sinumimbakka, "Iamiu lai nasilakate, manga huru n agama! Iamiu madorongnga manga inolaanna apan masahadda wuḷḷu mangagillu manga atoranna apan mawakkatta, arawe iamiu sassane maddiri mantuḷungngu taumata umaamane. ⁴⁷Nasilakate iamiu! Iamiu manggolangnga manga nabi apan suete nipate n iupungngu aḷamonanu sassane. ⁴⁸Nariaddi iamiu sassane mangnga'u manungku iamiu suadio'a lai su inolaanna apan suete niola'u iupunggi amiu; ana waugu ete imangitou apan namate manga nabi udde wuḷḷu ete iamiu apan nanggolangnga. ⁴⁹Ana waugu udde Apapande Mawu Ruata nabbisara, 'Ia'u sarun mandolokku manga nabi wuḷḷu manga raloḷoḷrang-Ku ringanni mangitou; sangkawageanganna sarun pateanna wuḷḷu waine lai sarun sansaranna!' ⁵⁰Mawu Ruata na'ola'a udde tadea'u manga taumata orassa indi iḷḷuumanna ana waugu pamamate apan suete niola'a su manga nabi ro'e n runia nariaddi, ⁵¹nanattakka wuassu pamamate si Habel na'oma n sara pamamate si Zakharia, apan nariaddi su wallattu pangadoannu sasamba wuḷḷu Waḷe Mawu. Pangimante: Manga taumata orassa indi sarun iḷḷuumanna ana waugu sarangkanambone udde.

⁵²Nasilakate iamiu, manga huru n agama! A'unsi ipamu'a ngara n apande sasahipunanni amiu, arawe iamiu sassane maddiri sumutta sulaḷumme maddea'a apande udde. Arawe iamiu mangnguḷa'ukku manga taumata apan maapulu sumutta sulaḷumme!"

⁵³Napawe Mawu Yesus nanantangke tampa udde, manga huru n agama wuḷḷu manga taumata n Farisi mammansaggu Mawu Yesus. Imangitou mannattakke mammono'a Sitou tadea'u Itou mabbisara ringannu anambo n inolaan-Ne. ⁵⁴Wuḷḷu tantaḷanna udde lai,

imangitou mannutukka Sitou mapia-pia ana see maasametta manga apan apan nassaḷa iwabbisara-Ne.

Tatagu su taumata lilangkamaḷe'a

(Mat. 10:26-27)

12 Su řiwune taumata mangke uasaseppe'a na'oma n sara pia-ddu niařřindanna leddane. Tantaḷanna manga taumata udde uarřimpulunna, Mawu Yesus nabbisara su manga mallalařřenggen-Ne, "Paatehamma su rafi n taumata Farisi, pandumang-Ku, lilangkamaḷe'i mangitou. ²Tawedu uawuni apan tawe aasiloanna, wuřru tawedu apan iadappingnga apan tawe asingkatanna. ³Apan iwabbisara ng kamiu su allorane, sarun aringirřanna lai su tempo allo; wuřru apa apan isassaḷimburunggi amiu su taḷinga n taumata sulaḷummu wabbo'a uarřruuda, sarun iaḷiata su aḷawo'u tampa."

Ata'utte Mawu

(Mat. 10:28-31)

⁴"Paanaunge, manga hawe'u! Arie paata'utti mangitou apan mam-mate wadangnga arawe tawe maaola'a manampaḷiu wua isudde. ⁵Mappianne Ta'u ita'e siamiu apan řinone iaata'utti amiu. Ata'utte Mawu Ruata! Ana waugu napawe suete namate, Itou uatarřino lai mandammenu sulaḷummu naraka! Pangimante, tumba'u Itou iaata'utti amiu.

⁶Lima m bau manu'a sanggelokka niwaḷu'a ringannu aregane darua roitta apan aadio'anne. Salaiwe aroddi tawe saran sambau inabuḷianannu Mawu Ruata. ⁷Uta'a su puanu lai suete nireengnga anambone, ana waugu udde arie paata'utta; iamiu maareganna marau wuassu manga sanggelokka udde!"

Mangnga'u si Kristus su saruannu awadaalla

(Mat. 10:32-33, 12:32, 10:19-20)

⁸"Paanaunge mapia-pia: Taumata apan nanga'u su saruannu awadaalla manungku itou mallalařřenggen-Ku, itou sarun a'uannu Ana'u Taumata lai su saruannu manga mala'ekattu Mawu Ruata. ⁹Arawe taumata apan nassinaada su saruannu awadaalla manungku itou mallalařřenggen-Ku, itou sarun isinaadu Ana'u Taumata lai su saruannu manga mala'ekattu Mawu Ruata.

¹⁰Amungkanngu taumata mabbisara wisara lullawangnga Ana'u Taumata, itou wotongnge aampunganna, arawe amungkanngu itou mangngadio'a Gharraho Mawu Ruata, itou tawe aampunganna.

¹¹Amungkanngu iamiu iapidda su manga wale m pattata-rramawuanna parikisanna su saruannu pamarenta ara'e tembonanne, arie paasinggawangnga su ola'u ereapa iamiu manahekku wadangngu ara'e su ola'u apa apan sarun iwisananu. ¹²Ana waugu apa apan sarun iwisananu udde, sarun itantiro n Gharraho Mawu Ruata si'o su tempone."

Sasumandingngu taumata ala apan woddo

¹³Sangkatou wuassu wallattu taumata nambo nabbisara Mawu Yesus, "Iamangnga Huru, wotongnge Iamangnga mandolokku turrangku mangonggolla sia'u sangkawageanganna wuassu darotongngu iamangngi ami."

¹⁴Mawu Yesus sinumimbakka, "Turrangnga, isai namile sia'u maola'a mallarruungnga ara'e matatahia darotongnga pussa'a su wallatti raddua?" ¹⁵Wua udde Mawu Yesus nabbisara su anambo n taumata isudde, "Paatehamma wurru paariaga, arie ma'oma n sara iamiu manarria'u. Ana waugu wiakku taumata tawe uaantimma wuassu paa'alane, salaiwe darotongnga uarundu'a."

¹⁶See Mawu Yesus nabatti'u sasumandingnga indi, "Pia sangkatou ala. Itou pia leta'a apan manambo hessine. ¹⁷Taumata ala udde nanattakke marringidda sulalammu naungnge, 'Inasueannu tampane hessi n leta'u. Apa apande'u orassa indi?' ¹⁸Wua udde itou narringida lai wurru nabbisara su watanganne sassane, 'Ore ia'u pia ringidda; manga tampa n darotongku iapaahohakka see ta'u iapaola'a lembo n ahewalanne. Isudde sarun pangadoannu alawo'u gandumma wurru manga darotongku waine. ¹⁹Wua udde sarun iwisara su riri'u sassane: I'o naauntungnga! Alawo'u apa apan mapia naola'e pussaanu wurru tawe masue sulalammu pira tonna alannune. Pangilloote orassa indi! Ante wurru pa'inumpe, wurru pamendampe lajumanna'u wiakku!" ²⁰Arawe Mawu Ruata nabbisara sitou, 'Ei taumata woddo! Rabbi indi lai i'o sarun mate, see isai sarun manahuanna paa'ala apan suete niammullu huna m badangngu?"

²¹Aroddi olangnge alawo'u taumata apan maddea'a maala huna n badangnge sassane, arawe tawe maddea'a maala su saruannu Mawu Ruata."

Pangimante Mawu Ruata

(Mat. 6:25-34)

²²See Mawu Yesus nabbisara su manga mallaḷarḷenggen-Ne, "Ana waugu udde Ia'u mabbisara, 'Arie paasinggawangnga su ola'u wiakki amiu, eteudde apa apan sarun annananni amiu, ara'e apa sarun ilurḷe ng kamiu.' ²³Wiakka udde nangillembo wuassu anna, wuḷḷu wadangnga nangillembo wuassu laubba. ²⁴Panutukka paapia manga manu'u winalanganna! Imangitou tawe massuanna, tawe mangitingnga, tawe lai gundangnga ara'e walḷingkakka. Arawe Mawu Ruata mappaduḷi simangitou. Iamiu lembo maareganna wuassu manga manu'a udde! ²⁵Isai su walatti amiu ringannu asasinggawangnge wotongnge maatamba uukke salaiwe adio'a? ²⁶Amungkangngu hatto adio'a udde tate ia'ola'i amiu, anio iamiu susinggawangngu inolaanna waine? ²⁷Panutukka ereapa manga wunga bakung tumuwo, manga wunga udde tawe mammanara, tawe lai mandadu'a. Arawe Ratu Salomo apan paa'alane aroddi anambone tawe mallurḷe n laubba arḷamage ere manga wunga udde! ²⁸Walabukka su wadda'a tumuwo allo indi wuḷḷu tirḷabbine masue tutunganna. Arawe Mawu Ruata mammedetta walabukka udde aroddi arḷamage. Nangillembote iamiu! Arawe pangangimanni amiu matulungnga! ²⁹Nariaddi, arie paasinggawangnga wuḷḷu umaliwu su ola'u apa apan sarun annananna wuḷḷu inumanni amiu. ³⁰Sarangkanambone udde raddeannu taumata apan wagga Mawu Ruata. Arawe lamangngu masingkatta manungku iamiu mappandumma sarangkanambone udde. ³¹Arawe iamiu ḷinone padea'a tadea'u Mawu Ruata mamarenta sulalummu wiakku, ne waine udde lai sarun ionggolu Mawu Ruata siamiu."

Darotongnga su surga

(Mat. 6:19-21)

³²"Iamiu apan tumba'u matulungnga anambone, arie paata'utta! Ana waugu lamangngu maḷuassa mangagillu alamatta siamiu wuassu Araratuan-Ne. ³³Walua'e darotongngu wuḷḷu anggila'e roinne su taumata asiangnga. Ola'e sulalummu ririnu tampa n roitta apan tawe marḷrenessa, eteudde darotongnga apan uaraddo su surga. Darotongnga udde tawe mawuḷi ana waugu tarḷa ta'o tawe maapanna'o wuḷḷu wiangnga tawe maahohakka. ³⁴Ana waugu suapa pia darotongngu uaraddo, isudde lai naungngu uaraddo!"

Mangangimbe apan sidutu uasaddia

³⁵"Paatehamma sumaruanna aḷawo'u hatto. Iamiu ṛinone sidutu uasaddia uallurṛe n laubba wuṛṛu soḷonu sidutu rare'omanna, ³⁶ere manga mangangimbe apan uasaddia mawune mawelengnga wuassu an-deangngu awingnga. Amungkangngu mawune udde mawelengnga wuṛṛu manengkella ngara, imangitou sarun maḷiha-ḷihakka' mamu'a ngara. ³⁷Tumanite naauntunga manga mangangimbe apan aratinganna tantaḷanna uaraṛṛaddo tempone mawune rumanta. Pangimante: mawune udde uasaddiate wuṛṛu mandolokku mangangimbene udde uma'ianna, see itou nangimbete simangitou. ³⁸Tumanite naauntunga manga mangangimbe udde inaratingannu mawune tantaḷanna uaraṛṛaddo, salaiwe itou nirumanta ṛabbi mattangnga ara'e mallannuanna lai wua isudde! ³⁹Paanaunge indi! Unnu wisara tatahuannu waḷe masingkatta orassa tinggera tarṛa ta'o rumanta, itou sarun mandiaga tadea'u tarṛo ta'o udde tawe maasutta sulalummu waḷene. ⁴⁰Ana waugu udde iamiu ṛinone uasasaddia, ana waugu Ana'u Taumata sarun rumanta su tempo apan tawe iaṛṛangngo ng kamiu."

Mangangimbe apan matuṛṛutta wuṛṛu mangangimbe apan maḷawangnga

(*Mat. 24:45-51*)

⁴¹"Mawu, apa aḷarṛa'a udde pandumanne siami ara'e su taumata nambo?" aiwaḷo m Petrus.

⁴²Mawu Yesus sinumimbakka, "Isai mangangimbe apan matuṛṛutta wuṛṛu pande ma'oma n sara pileannu mawune maola'a tembonannu mangangimbe waine tadea'u itou mappaanmi mangitou su tempone?"

⁴³Laḷumanna'a eteapa su mangangimbe udde napawe mawune mawelengnga wuṛṛu naaratingnga sitou tantaḷanna mammanara manarane!

⁴⁴Pangimante: Mawunu udde sarun manantillu aḷawo'u rarotongge su mangangimbe udde. ⁴⁵Arawe amungkangngu mangngimbe udde mabbisara sulalummu naungnge, 'Mawu'u ta'e maḷannu mabelengnga,' see itou namuulle anambo n mangangimbe, wuṛṛu umanna; ma'inumma ma'oma n sara iwu'anne, ⁴⁶ne mawune mabelengnga su allo wuṛṛu orassa apan tawe iaṛṛangngo. Wuṛṛu mangangimbe udde sarun puuḷannu mawune see olaanna lai ere manga taumata apan tawe tumuṛṛutta Mawu Ruata.

⁴⁷Mangangimbe apan masingkattu apulu mawune, arawe tawe uasasaddia wuṛṛu maddiri tumuṛṛutta apulu mawune udde sarun heserṛanna

ringannu ma'ikkatta. ⁴⁸Arawe mangangimbe apan masingkattu apulu mawune, wua udde na'ola'a sambau apan nassaḷa ma'oma n sara puuḷanna, tumba'u puuḷanna masi'ome. Ana waugu taumata apan suete nionnggoḷannu manambo wuassi tou sarun padoronganna lai manambo. Wuḷḷu taumata apan suete nipangimananna masokka, wuassi tou lai sarun padoronganna masokka lai."

Waḷine paddarame arawe pasasetta

(*Mat. 10:34-36*)

⁴⁹"Ia'u nirumanta su runia indi mandanta n soḷḷroba. Apia eteapa amungkangngu putungnga luḷḷenggampe! ⁵⁰Ta'e pia lai asasusa wahewa sarun ta'u pendamanna. Wuḷḷu naungku u'ambuḷisada amungkangngu udde taambe natipussa. ⁵¹Apa iamiu massunna manungku Ia'u rumanta mangapiddu paddarame su runia? Tawe, waḷine paddarame ewe'e pasasetta. ⁵²Manattakka orassa indi, su waḷe sambau apan laḷoḷḷone sire lima, sarun matatiakka, sire tallu mandooppa rua ng katou, ara'e rua ng katou mandooppa sire tallu. ⁵³Iamangnga sarun mandooppa anangnge esakka wuḷḷu anangnge esakka sarun mandooppa iamangnge. Inangnga mandooppa anangnge wawine, wuḷḷu anangnge wawine mandooppa inangngene. La'iananna wawine sarun mandooppa mananambone wawine wuḷḷu mananambo wawine sarun mandooppa la'iananna wawine."

Ma'illaḷa tatiala n tempo

(*Mat. 16:2-3*)

⁵⁴Mawu Yesus nabbisara lai su taumata nambo, "Amungkangngu iamiu maasilo winabbawa wuassu samba'a n waḷḷatta, iamiu lapiddu mabbisara, 'Sarun manguranna,' Wuḷḷu atonna-tonna mangu-ranna. ⁵⁵Amungkangngu maapendamman anginna nirumanta wuassu timukka, iamiu mabbisara, 'Sarun mapadissa.' ⁵⁶Iamiu taumata apan maapulu mangawusu! Iamiu wotongnge maḷḷangngongo n tempone ringannu ma'ellega ola'u langitta wuḷḷu runia. Anio tatiala indi tawe iaḷḷangngongo ng kamiu?"

Padamete ringannu seetta

(Mat. 5:25-26)

⁵⁷”Anio iamiu tawe marrawessa sassane apa apan narriño?
⁵⁸Amungkangngu pia taumata mangalae ng kamiu su mallarɣuungnga, suapa n wotongnge padea’a hatto udde masue ringanni tou tantalaanna iamiu ta’e su tangnga n dalanna. Amungkangngu tawe, itou sarun mangapiddi amiu su saruannu mallarɣuungnga udde wuɣru mallarɣuungnga udde sarun manantilli amiu su polisi, wuɣru polisi sarun marɣuumanni amiu su tutupanna. ⁵⁹Pangimante! Iamiu tawe maa-sabangnga wuassu tutupanna tantalaanna wawaekku ɣuumanna udde taambe niawaerɣanna.”

Amungkangngu tawe mawaɣu wuassu rosa sarun mawinasa

13 Su tempo udde taumata nabbati’a Mawu Yesus su ola’u manga pira taumata n Galilea apan nipate m Pilatus, su tempo imangitou mangngapiddu sasamba su Mawu Ruata. ²Naaringikka watti’a udde, Mawu Yesus nabbisara, ”Ana waugu taumata n Galilea nipate ereudde, iamiu massunna udde tatialane imangitou lembo marosa wuassu manga taumata n Galilea waine? ³Atonna-tonna tawe! Arawe paanaunge: amungkangngu iamiu tawe mawaɣu wuassu manga rosa ng kamiu, sarangkanambone sarun mate lai ere imangitou. ⁴Ereapa lai ringannu sire mapuɣo uaɣu taumata apan nate su Siloam, su tempo menara udde nema’a simangitou? Iamiu massunna udde ere sambau tanda manungku imangitou arosanne wuassu manga taumata waine apan uatana’a su Yerusalem? ⁵Atonna-tonna tawe! Paassa lai ia’u mabaɣo: Amungkangngu iamiu tawe mawaɣu wuassu manga rosa ng kamiu, iamiu sarangkanambone mate lai ere imangitou.”

Sasumandingngu alu ara apan tawe mabua

⁶Wua udde Mawu Yesus nabbati’u sasumandingnga indi, ”Pia sangkatou taumata uatahuanna alu ara su waillu anggorene. Su sambau allo itou inaite maddea’a wua ng kalu udde, arawe tawe naasomba saran sambau. ⁷Nariaddi itou nabbisara su mabbawaille udde, ’Pa’ellega, tallute tonna ia’u ruddanta maddea’a wua ng kalu ara indi, arawe tawe maasomba saran sambau. Tuwangke alu udde! Itou tumba’u mangngin-

sue **anna** sulaḷummu leta'a!'⁸ Arawe mabbawailla udde sinumimbakka, 'Wala'e lai itou mabbiakka tumuwo santonna indi, Mawu. Ia'u sarun **mamasolla** leta'a uapaḷiwutta sitou wuḗru pupuḗranna. ⁹Asinungka itou mabua tonna suhati. Arawe amungkangngu tawe, wotongnete Mawu mandolokka mapatuwangngi tou.'"

Mawu Yesus napaapia n sangkatou wawine uaaḷudungnga su allo n Sabatta

¹⁰Su sambau allo n Sabatta, Mawu Yesus mangngarra'a su waḷe m pattataḗramawuanna. ¹¹Isudde pia wawine mapuḷote uaḷu su tonnane marada'a, ana waugu pia gharraho laḷeo sulaḷummu wadangge. Wawine udde uaaḷudungnga wuḗru tawe maarisikka matuḷida. ¹²Napawe Mawu Yesus naasilo sitou, winagoante itou, "Inangnga i'o mapia wuassu radangngu!" ¹³See Mawu Yesus namita wawine udde, ne su orassa udde lai itou naarisikka matuḷida see nadalote Mawu Ruata.

¹⁴Piaḗra'u waḷe m pattataḗramawuanna udde namuḷo, ana waugu Mawu Yesus napaapia n taumata su allo n Sabatta, ana waugu udde itou nabbisara su manga taumata, "Pia annummu allo ipammanara; rantate su miallo-miallo udde see iapaapia, imabarrangnga su allo n Sabatta!"

¹⁵Mawu sinumimbakka, "Lilangkamaḷe'a iamiu indi! Su allo n Sabatta anambo n taumata mammallossu sapi ara'e keledai wuassu tandangge wuḗru iaapidda su liudde ana iapa'inumma. ¹⁶Ne, orassa indi pia sangkatou wawine papapulunni Abraham, apan mapuḷote uaḷu su tonnane aḷannune aiitannu Setanna. Apa itou tawe iapaapallossa wuassu aiitta udde su allo n Sabatta?" ¹⁷Sasimbakku Mawu Yesus udde naasili atonna manga ro'amme; arawe anambo n taumata waine lulluassa naasilo aḷawo'u aḷaḗrindu'a apan niola'u Mawu Yesus.

Sasumandingngu watu n sawi

(Mat. 13:31-32; Mrk. 4:30-32)

¹⁸Mawu Yesus naiwaḷo, "Napawe Mawu Ruata mamarenta, ereapa olangge? Ringannu apa Ia'u wotongnge manumandingnga? ¹⁹Olangnge ere sasumandingnga indi. Sambau watu n sawi niapiddu sangkatou taumata nisuanne su waille. Watune udde tinumuwo see naola'a alu, wuḗru manga manu'a na'ola'a saḷakke su manga ranna ng kalu udde."

Sasumandingngu ragi

(Mat. 13:33)

²⁰Paassa lai Mawu Yesus naiwaŋo, "Amungkangngu Mawu Ruata mamarenta, ringannu apa Ia'u manumandingngu olangnge? ²¹Olangnge ere ragi apan nianu n sangkatou wawine see niompelu taponna appatu puŋo su liteŋrene, na'oma n sara tinumuwo."

Ngara apan maŋriputta

(Mat. 7:13-14, 21-23)

²²Sulaŋummu amatanna watukku Yerusalem, Mawu Yesus sinumabbi manga soa wuŋru manga ampungnga lapiddu mangngaŋra'a. ²³See pia taumata naiwaŋo Sitou, "Iamangnga, apa tumba'u matuŋlungnga taumata masaŋamatta?"

Mawu Yesus sinumimbakka, ²⁴"Pattinsahadde sumutta malliu ngara apan maŋriputta. Ana waugu naunge! Manambo taumata maddea'a sumutta arawe tawe maasutta. ²⁵Napawe tatahuannu waŋe napu'o wuŋru naŋruudu ngarane, iamiu uarisikka su liudde wuŋru nanattakke manengkella lapiddu mabbisara, 'Mawu, iamiu pamu'aiwe ngara!' Mawu udde sarun sumimbakka, 'Ia'u wagga iamiu wuassuapa!' ²⁶Iamiu sarun sumimbakka, 'Iami suete inumanna wuŋru na'inumma su sambau ringannu Mawu, wuŋru Mawu suete nangaŋra'a lai su manga laŋanna su soa ng kami!' ²⁷Arawe Mawu udde sarun mabbisara apia, 'Ia'u wagga iamiu wuassuapa. Passaŋiu wua isindi, iamiu apan na'ola'a aŋaŋeo!' ²⁸Su tempo iamiu naasilo si Abraham, Ishak wuŋru si Yakub wuŋru anambo n manga nabi lulluassa sulaŋummu Runia Waku Mawu Ruata, iamiu sarun lumuai wuŋru matataŋrangnga susa ana waugu iamiu sassane nillimbuaŋrangnga watukku liudde! ²⁹Manga taumata sarun rumanta wuassu ra'i wuŋru waŋratta, wuassu sawannakka wuŋru timukka, wuŋru sarun lumuassa sulaŋummu Runia Waku Mawu Ruata. ³⁰Atonna-tonna, pia taumata panginsueanne sarun maola'a taumata paarorone, wuŋru pia taumata apan paarorone sarun maola'a panginsueanne."

Mawu Yesus niuukkannu Yerusalem

(Mat. 23:37-39)

³¹Su tempo udde lai, pia manga pira taumata n Farisi nirumanta ringannu Mawu Yesus wuṛṛu nabbisara, "Arie paatana'a isindi! Roote su tampa waine, ana waugu Herodes pia pandumma mamate Si'o."

³²Mawu Yesus sinumimbakka, "Roote waḷoa'a su taumata apan tawe gunane udde, 'Allo indi wuṛṛu tiṛṛabbi Ia'u mallimbuakka ghaṛraho laḷeo wuṛṛu mapaapia n taumata marada'a, arawe su allo atallune Ia'u sarun manginsue manara-U.' ³³Salaiwe aroddi Ia'u ṛinone manassute lai amatang-Ku allo indi, tiṛṛabbi wuṛṛu tillorega, ana waugu laḷeo sangkatou nabi pateanna su liuddu Yerusalem.

³⁴Yerusalem, Yerusalem! Manga nabi suete nipatenu! Manga raloḷoṛṛannu Mawu Ruata suete tinuntungannu watu na'oma n sara nate! Paapirate ia'u maapulu mangammullu anambo n tumana'u soa indi ere inanggu manu'a mangooppa manga anangnge sulaḷummu papaidde, arawe i'o maddiril! ³⁵Ana waugu udde Mawu Ruata tate lai maṛṛundingannu. Paasingkate, manattakka orassa indi i'o tate lai maasilu Sia'u, ma'oma n sara i'o mabbisara, 'Niaḷamatante Itou apan nirumanta ringannu arannu Mawu.'"

Mawu Yesus napaapia n sangkatou marada'a

14 Su sambau allo n Sabatta, Mawu Yesus inainte inumanna su waḷe n sangkatou piaṛṛa'u Farisi. Isudde manga taumata mannutukka Mawu Yesus mapia-pia. ²Ne nirumantate ringannu Mawu Yesus sangkatou marada'a hanne su limane wuṛṛu su leddane. ³See Mawu Yesus naiwaḷo su manga huru n agama wuṛṛu manga taumata n Farisi apan isudde, "Tumuṛṛuttu Tita n agama ng kite, wotongnge iite mapaapia n taumata marada'a su allo n Sabatta ara'e tawe?"

⁴Manga huru n agama wuṛṛu taumata n Farisi udde nallannaba. See Mawu Yesus namaggo taumata udde wuṛṛu niapaapiate n tou, wua udde itou nirolukke niapaapuḷe. ⁵Wua udde Mawu Yesus nabbisara su manga taumata, "Unnu wisara sangkatou wuassu wallatti amiu pia anangnge ara'e sapi apan nanawo sulaḷummu paṛṛihi su allo n Sabatta, apa itou tawe watunanna su liudde, ana'a ara'e sapi udde su allo udde lai?"

⁶Arawe tawe saran sangkatou wotongnge sinumimbakka Mawu Yesus su ola'u hatto udde.

Masarrionto'a wuṛṛu marangngu

⁷Mawu Yesus naasilo manga raho apan namile tampa apianne. Ana waugu udde Itou nangagillu aḷarra'a indi simangitou nambo. ⁸"Amungkanngu iamiu waḷoanna su andeangngu awingnga, arie inai uma'ianna su addera awantuhanne, ana waugu arie piaddu sangkatou waine apan lembo n aaddatanna wuassi amiu suete winaḷoanna lai, ⁹na'oma n sara tatahuannu waḷe apan suete nabaḷo siraddua udde, ringannu ipabbawata'a rumanta ringanni amiu wuṛṛu mabbisara, 'Madorongnga ampungnga, tampa indi suete nisaddia su raho udde.' Ne ringannu massili i'o nangingkatta su tampa apan su liudde. ¹⁰Ana waugu udde, amungkanngu iamiu waḷoanna, pamile tampa su liudde, tadea'u tatahuannu waḷe rumanta wuṛṛu mabbisara siamiu, 'Hawe wette aiana'e su tampa apianne.' Ringannu aroddi iamiu aaddatanna su saruannu anambo n raho waine. ¹¹Ana waugu suapa n taumata apan mannaggakku watanganne sarun iapaawawo, arawe isai mammawo n watanganne sarun iapaatanggakka."

¹²See Mawu Yesus nabbisarate mawu m baḷe, "Amungkanngu i'o mabaḷo taumata su andeangnga umanna allo ara'e rabbi, arie mabaḷo hawe ara'e tuṛrangnga, ara'e sangkatuṛrangnganna, ara'e aḷindonganne apan ala. Ana waugu pia tempone lai imangitou mabaḷo si'o, wuṛṛu ringannu aroddi i'o manengkamma wawaḷinne wuassu inolaannu. ¹³Nariaddi, amungkanngu i'o ma'ola'a andeangnga, waḷoite taumata asiangnga, taumata pia sangkulle, taumata lome wuṛṛu taumata wuta. ¹⁴I'o sarun aḷamatanna, ana waugu manga taumata udde tawe mawaḷissa apapianu. Apapiannu sarun waḷisannu Mawu Ruata su tempo manga taumata apan mapia iapaawangunna apia wuassu papate."

Sasumandingngu andeangnga apan wahewa

(Mat. 22:1-10)

¹⁵Su tempo sangkatou wuassu wallattu taumata u'anna su sambau isudde naaringikka wisara Mawu Yesus, itou nabbisara, "Auntunganna eteapa su taumata apan sarun umanna su sambau ringannu Mawu Ruata napawe Itou rumanta ere sangkatou Ratu!"

¹⁶Arawe Mawu Yesus nabbisara taumata udde, "Su sambau allo pia sangkatou na'ola'a andeangnga apan wahewa wuṛṛu nabaḷo taumata nambo. ¹⁷Napawe na'omate tempone manattakku andeangnga, taumata udde nandolokku mangangimbene inai ringannu manga raho wuṛṛu nabbisara, 'Wette rantate, sarangkanambone nasaddiate!' ¹⁸Arawe imangi-

tou sarangkanambone, sangkatou-sangkatou madorongnga ampungnga. Paarorone nabbisara su mangangimbe udde, 'Ia'u wakkute namalli leta'a, wuṛṛu ia'u inai mamarikissa leta'a udde. Ampungewe ia'u.'¹⁹ Waine lai nabbisara, 'Ia'u wakku namalli lima m pare sapi, wuṛṛu inai maannammu manga sapi udde. Ampungewe ia'u.'²⁰ Waine lai nabbi-sara, 'Ia'u wakkute naawingnga. ana waugu udde ia'u tawe maaranta.'

²¹Mangangimbe udde napuḷete wuṛṛu nabaḷo n olangnge udde su mawune. Mawune mangke nasa'u, wuṛṛu nabbisara su mangangim-bene, 'Paalihakka inai su manga laḷanna wuṛṛu manga sasuttanna su soa. Apira'e isindi taumata asiangnga, taumata pia sangkulle, taumata wuta, wuṛṛu taumata lome.'²² Wua udde mangangimbe udde nabbisara, 'Mawu, parenta Mawu suete niapaamatta, arawe tampa ta'e manambo.'²³ See mawu udde nabbisara, 'Roote watukku laḷanna wuṛṛu manga sa-suttanna su liuddu soa, wuṛṛu wataa'e taumata rumanta, tadea'u waḷe'u mapene.²⁴ Paanaunge! Tawedu saran sangkatou wuassu wallattu manga raho apan suete niwaḷoanna udde inumanna annu andeangku indi!'"

Asasahaddu sangkatou mallaḷaṛṛenggenna

(*Mat. 10:37-38*)

²⁵Manambo taumata u'amatta su sambau ringannu Mawu Yesus. Mawu Yesus nanaile wuṛṛu nabbisara simangitou, ²⁶"Amungkanngu taumata rumanta ringang-Ku, arawe lembo mandangngu inangngene, iamangnge, awingnge, aḷaṛṛanangnge, manga tuṛṛangnge, lembonete ririne sassane, itou tawe maola'a mallaḷaṛṛenggeng-Ku.²⁷ Taumata apan maddiri mamasanna arussane wuṛṛu tumantalongnga Sia'u, tawe maola'a mallaḷaṛṛenggeng-Ku.²⁸ Amungkanngu sangkatou wuassu wal-latti amiu maapulu mapararisikku menara itou sarun uma'ianna man-deengnga rorone roinne, tadea'u itou maasingkatta apa roinne wotong-nge ipanginsue menara udde ara'e tawe.²⁹ Ana waugu amungkanngu na-tualage itou tawe wotonge maasue menara udde, salaiwe rapappakke naola'e, ne alawo'u taumata apan maasilo manara udde sarun luma-gge n tou.³⁰ Imangitou sarun mabbisara, 'Ih, taumata indi maparari-sikka, arawe tawe maasue manarane!'"³¹ Amungkanngu sangkatou ratu pia tantarane mapuḷo ṛiwu su atoune inai mappapangalo ringannu ratu waine apan uatahuanna tantara rua m puḷo su ṛiwune, ratu udde sa-run uma'ianna maṛṛingidda asuene apa itou matohasse mandooppa se-enne udde.³² Amungkanngu itou masingkatta manungku itou lome, asinungka su tempo seenne ta'e marau, itou mandolokku raloḷoṛṛanne inai madorongnga maddame."³³ Panginsueanne Mawu Yesus nabbisara, "Aroddi lai matataṛṛino siamiu. Tawe saran sangkatou wuassi amiu wo-

tongnge maola'a mallalarrenggeng-Ku, amung kangngu itou tawe manantillu alawo'u darotongge."

Asimma apan maammi

(Mat. 5:13; Mrk. 9:50)

³⁴"Asimma udde mapia, arawe amung kangngu naola'e maammi, wotongnge iapaapakkada'apia? ³⁵Tate gunane lai, mapia ete su wailla aroddi lai ipanuwukka sasuanna. Nariaddi rammea'e. Amung kangngu pia talinga padaringikka!"

Domba apan nawuḷi

(Mat. 18:12-14)

15 Su sambau allo, manambo mallaluḷu wose wuḷu manga taumata apan sassunnanna laḷoḷo n soa laḷeo, nirumanta madaringikka Mawu Yesus. ²Manga taumata n Farisi wuḷu manga huru n agama mannattakke sussaljomanna. Imangitou mabbisara, "Eh, taumata indi mannengkamma taumata laḷeo wuḷu u'anna lai su sampunna ringanni mangitou!" ³Ara waugu udde, Mawu Yesus nabbati'e simangitou sasumandingga indi,

⁴"Unnu wisara sangkatou wuassi amiu uatahuanna domba marḷasutta see itou niawuḷiannu sambau - apa sarun olaanne? Natan-tunna itou sarun manantangngu sio m puḷo sio domba udde su wadda'a, wuḷu inaite maddea'a sambau apan nawuḷi udde ma'oma n sara asombanganna. ⁵Wuḷu napawe itou naasombate apia domba udde, itou aroddi lulluassa na'oma n sara pinasanna domba udde su wambangnge, ⁶see niapidida napuḷe. Wua udde itou namago manga hawene wuḷu alindonganne, wuḷu nabbisara, 'Wette iite lumuassa. Domba'u apan nawuḷi niasombangante apia!' ⁷Ne, aroddi lai su surga pia alaluassa apan wahewalla su sangkatou apan marosa nawaḷu wuassu rosane, wuassu sio m puḷo sio taumata apan mapiate wuḷu tate lai iwata'a mawaḷu wuassu rosane."

Roitta apan nawuḷi

⁸"Ara'e unnu wisara sangkatou wawine uatahuanna mapuḷo roitta saḷa'a, see sambau nawuḷi - apa sarun olaanni tou? Itou sarun mande'omma soḷo wuḷu manapu waleḷe lapiddu maddea'a su



Domba apan nawuŕi (15:4)

aŕawo'u tampa ma'oma n sara asombanganna roitta udde. ⁹Su tempo itou naasomba roitta udde, itou namago manga hawene wuŕŕu manga aŕindonganne, see nabbisara, 'Ia'u lulluassa atonna ana waugu niasombangante apia roi'u apan nawuŕi. Wette iite lumuassa!' ¹⁰Aroddi lai mala'ekattu Mawu Ruata lulluassa napawe pia sangkatou taumata laŕeo nawaŕu wuassu manga rosane. Pangimante!"

Ana'a apan nawuŕi

¹¹Mawu Yesus nabbisara apia, "Pia sangkatou iamangnga apan pia anangnge rua ng katou esakka. ¹²Iapa atuarianne nabbisara sitou, 'Iamangnga, anggiŕa'e sia'u wageangku orassa indi wuassu darotongngi ite.' Ne iamangnge nattahiate darotongnge udde su anangnge rua ng katou udde. ¹³Manga pira allo wua udde ana'a atuarianne udde nabaŕu'u wageangnge pussaane udde see inaitte su wanua marau. Poiroroddi itou nanginsuete roinne wuŕŕu mallalumanna'e. ¹⁴Napawe roinne udde nasuete, nariaddite su wanua udde ŕutumma apan wahewa, na'oma n sara itou nasusate. ¹⁵See itou inaitte nammanara ringannu sangkatou tumana'u soa isudde, apan nandolokki tou su wailla mandiaga wawi. ¹⁶Itou niamaŕunusante, na'oma n sara itou pia apulu malloŕro tianne ringannu annu manga wawi udde. Salaiwe itou maŕunussa aroddi, tawe saran sangkatou mangonggolu anna sitou. ¹⁷Panginsueanne itou naa-

naungnga wuṛru nabbisara, 'Manga taumata apan mammanara ringannu iamangku pia anna marasai arawe ia'u isindi matete n lunussa! ¹⁸Ia'u mapuḷete wuṛru inaita ringannu iamangku wuṛru mabbisara sitou: Iamangnga, ia'u suete na'ola'a rosa su saruannu Mawu Ruata wuṛru su saruanni Iamangnga. ¹⁹Ia'u tate su ṛinone lai isago ana'u Iamangnga. Ola'e ia'u ere sangkatou allangngu Iamangnga.' ²⁰Ne itou inaita napuḷe ringannu iamangnge.

Ta'e marau wuassu waḷe, itou niasiloante n iamangnge. Ringannu aakkanna iamangnge tinumaḷangnga naisasomba n tou, see narra'uppa wuṛru nangari'a sitou. ²¹'Iamangnga,' unnu ana'a udde, 'Ia'u suete na'ola'a rosa su saruannu Mawu Ruata wuṛru su saruannu Iamangnga. Tate su ṛinone lai ia'u isago ana'u Iamangnga.' ²²Arawe iamangnge namago manga mangangimbene wuṛru nabbisara, 'Paaḷihakka! Panganu laubba apianne, wuṛru luṛrea'e sitou. Luṛrea'a lai siṅsingnga su taḷimadone, wuṛru sapatu su leddane. ²³Wua udde panganute ana'u sapi atawanne wuṛru pototte. Iite sarun umanna wuṛru lumuassa. ²⁴Ana waugu ana'u indi natete, orassa indi nabbiakke apia; itou nawuḷite, orassa indi niasombangante apia.' See imangitou nanattakke naandeangnga.

²⁵Tantaḷanna udde, ana'a pahuḷune su wailla. Su tempo itou napuḷe wuṛru na'omate marani m waḷe, itou naaringikka tingikku musikka wuṛru masasaḷaingnga. ²⁶Itou namago sangkatou su wallattu mangangimbene see naiwaḷo, 'Pia apa su waḷe?' ²⁷Mangangimbe udde sinumimbakka, 'Tuarinu nawelengke! Wuṛru iamangngu suete nandoloḷka niapapototta ana'u sapi apan matawa, ana waugu nawelengnga apia ana'i tou ringannu salaḷmatta!'

²⁸Ana'a pahuḷune udde mangke nasa'u, na'oma n sara itou maddiri sumutta su waḷe. See iamangnge sinumabangnga wuṛru nassaḷo'e n tou niapaasutta. ²⁹Arawe itou nabbisara, 'Ringannu tonnane aḷannune ia'u mammanara ringanni Iamangnga. Taambe saran paassa ia'u nilumawangnga parenta m Iamangnga. Apate nionggolli Iamangnga sia'u? Ambingnga sambau lai taambe nionggolli Iamangnga sia'u ipa'ola'a andeangnga ringannu manga hawe'u! ³⁰Ana'u Iamangnga udde suete nanginsue darotongngu Iamangnga ringannu wawine masandaga, arawe napawe itou nawelengnga, Iamangnga namototta ana'u sapi apan matawa sitou!'

³¹'Ana'u,' sasimbakku iamangnge, 'i'o sidutu isindi ringanku. Anambo n darotongnga apan tatahuananku udde darotongngu lai. ³²Arawe iite sarun maandeangnga wuṛru lumuassa ana waugu tuarinu udde natete, arawe orassa indi nabbiakke apia; itou nawuḷite, arawe orassa indi nawelengke apia.'"

Mangangado n roitta apan pande

16 Mawu Yesus nabbisara mallaḷarḷenggen-Ne, "Pia sangkatou tau-mata ala. Itou pia sangkatou mangangado n roitta apan mangatokku paa'alane. Taumata ala udde naasomba alae manungku mangangado n roitta mangnginsue roinne. ²Nariaddi itou namagote mangangado n roitta udde wuḷḷu nabbisara, 'Apa indi niaringiḷrangku atonna su ola'u pamamanaranu? Orassa indi, tantiḷa'e sia'u hessi n manaranu su pinangatokku paa'ala'u. I'o tate wotongnge maola'a mananahipunna roi'u.' ³Ne mangangado n roitta udde naḷringida, 'Ia'u sarun ma'ola'e apa orassa indi? Mawu'u tate mapaamanara'u. Mamasolla ia'u alangkatta; madorongnga ia'u massili. ⁴Ia'u pia apande; amungkangngu ia'u iaddo, ia'u sarun maddea'a hawe'u manambo apan maapulu mapaatana'u su waḷe mangitou!' ⁵Nariaddi mangangado n roitta udde namagote manga taumata apan naballassa roitta su mawune. Su taumata paarorone itou nabbisara, 'Sangkura awallannu su mawu'u?' ⁶Taumata udde sinumimbakka, 'Maḷḷasutta su wensadde lana n zaitun.' Mangangado n roitta udde nabbisara apia sitou, 'Indi reengannu awalannu. A'iante wuḷḷu paaliḷhakka mamorḷretta lima m puḷo.' ⁷Wua udde itou nabbisara su taumata aruane, 'Wuḷḷu su tuḷrangnga, pira awallassi tuḷrangnga?' Taumata udde sinumimbakka, 'Saḷḷiwu su karongnge gandumma.' Mangangado n roitta udde nabbisara sitou, 'Indi reengannu awallannu. Woḷḷretta'e ualu ḷasutta.'

⁸Ne mawu mangangado n roitta apan taḷḷa ḷinga udde nadalo sitou ana waugu inolaanne apan mangngapande udde; ana waugu manga taumata n runia indi mappandeanna mangatokku manara mangitou wuassu mangatokku taumata apan mabbiakka sulaḷummu asasemakka."

⁹See Mawu Yesus nabbisara apia, wisara-Ne, "Padaringikka! Paata'e paa'ala n runia indi ipadea'a hawe, tadea'u napawe darotongngu runia indi tate aregane, iamiu sarun iapaatana'a su tampa n atatanaanna apan tawe pangudusanne. ¹⁰Taumata apan wotongnge apangimananna su manara maradio'a, wotongnge lai pangimananna su manara wahewa. Arawe taumata apan tawe apangimananna su manara maradio'a tawe apangimananna lai su manara wahewa. ¹¹Nariaddi, amungkangngu su ola'u darotongngu runia indi iamiu tate apangimananna, isai maapulu mangngimanna siamiu su darotongngu ḷimuudda? ¹²Wuḷḷu amungkangngu su ola'u sarannapa apan tatahuanannu taumata waine, iamiu niatialanna tawe apangimananna, isai maapulu mangonggolla siamiu saranapa apan tatahuananni amiu?

¹³Tawe saran sangkatou wotongnge maapammanara su rua ng katou mawu; ana waugu itou sarun lembo marangngu su sangkatou wuassu

sangkatou waine, ara'e itou sarun lembo maranggu su mawune apan sangkatou wuassu mawune waine. Aroddi lai matatarřino siamiu. Iamiu tawe maapammanara su Mawu Ruata wuřřu su darotonggu runia lai."

Manga wisara Mawu Yesus

(Mat. 11:12-13, 5:31-32; Mrk. 10:11-12)

¹⁴Manga taumata n Farisi naaringikka aławo'u wisara apan niwisara Mawu Yesus. See imangitou nilumage n Tou, ana waugu imangitou wałiu n roitta. ¹⁵Arawe Mawu Yesus nabbisara simangitou, "Ete iamiu taumata apan su saruannu taumata waine ellehanna mapia, arawe Mawu Ruata masingkattu lałořřo naunggu. Ana waugu apa apan sassunnannu taumata matanggakka, su aellegu Mawu Ruata udde mawawo.

¹⁶Tita apan nionggolli Musa wuřřu ałarřa'u manga nabi, sidutu ta'e ipappaatta na'oma n sara tempo n Yohanes Mananařřani. Wuassu tempo udde Watti'u Ałaluassa su ola'u ereapa Mawu Ruata mamarenta ere sangkatou Ratu sidutu iwabbatti'a. Wuřřu taumata mammata'e n ririne tadea'u maola'a lałořřo n araratuannu Mawu Ruata. ¹⁷Arawe malluaasanna langitta wuřřu runia mawułi, wuassu wořřetta sambau sulałummu Tita Mawu Ruata tawe matipussa.

¹⁸Isai manindo awingnge see maawingngu wawine waine, taumata udde sinumandaga. Wuřřu taumata apan maawingngu wawine apan suete sinindoanna udde, sinumandaga lai."

Taumata ala wuřřu Lazarus

¹⁹"Pia sangkatou ala. Peddenne mangkasagada aregane wuřřu wiakke mannampałiu apiane su miallo-miallo. ²⁰Su saruannu ngara n wałene niapaa'ianna sangkatou asiangnga aranne Lazarus. Awangnge napene n ibbongnga. ²¹Itou maapulu umanna manga tarřoto ng kanna apan mannawo wuassu medda n taumata ala udde. Arawe asu ewe'e niramanta nallewa lessane.

²²Taumata asiangnga udde see natete wuřřu niapiddu mala'ekatta watukku tampa awantuhanne su sandiřřanni Abraham su surga. Taumata ala udde nate lai wuřřu see nilabingnga. ²³Su runia n taumata nate itou uatatarřangnga. Wuřřu napawe itou naningngara wua poiardo-ddi, itou naasilo si Abraham su tampa apan marau wuřřu Lazarus su sandiřřanni Abraham. ²⁴'Iamangnga Abraham!' sasałande n taumata ala

udde. 'Akkanaawe ia'u. Dolorra'a Lazarus mangammo n taɓimadone su ua'e, see rumanta maɓɓolo lila'u. Ia'u mangke nasansarate sulaɓummu putungnga indi!

²⁵Arawe Abraham sinumimbakka, 'Naungewe ana'u: su alo'engngu pabbiarɓannu i'o suete naasomba manambo apianne; arawe Lazarus naasomba alaɓeanne. Orassa indi itou maɓuassa isindi, wuɓɓu i'o uatatarɓangnga. ²⁶Wuɓɓu lai, su wallatti ite suete niola'a sambau rampissa maɓoangnga, tadea'u taumata wua isindi tawe maaranta poiaronddi, wuɓɓu taumata poiaronddi tawe maaranta isindi! ²⁷'Amungkangngu aroddi, Iamangnga, 'wisara n taumata ala udde, 'ia'u sumaɓande su Iamangnga tadea'u mandolokki Lazarus watukku waɓe n iamangku. ²⁸Pia sire lima tuɓɓangku isudde. Dolorra'e Lazarus mapaanaungnga simangitou, tadea'u arie imangitou lai manawo su tampa n sansara indi.'

²⁹Abraham sinumimbakka, 'Imangitou lai piate manga wuke Musa wuɓɓu wuke manga nabi! Wala'e imangitou tumuɓɓutta apa apan uawoɓɓetta sulaɓummu manga wuke udde!' ³⁰Arawe taumata ala udde sinumimbakka, 'Udde taambe natimu, Iamangnga Abraham. Arawe amungkangngu pia taumata nate mabbiakka apia wuɓɓu rumanta ringanni mangitou, imangitou sarun mawaɓu wuassu manga rosane!' ³¹Arawe Abraham sinumimbakka, 'Amungkangngu imangitou maddiri madingikka tita Musa wuɓɓu manga nabi, atonna-tonna imangitou tawe mangngimanna lai, salaiwe pia taumata nate mabbiakka apia.'"

Manga inolaanna apan maarosa taumata

(Mat. 18:6-7, 21-22; Mrk. 9:42)

17 Mawu Yesus nabbisara manga mallaɓarɓenggen-Ne, "Manga inolaanna apan maarosa taumata udde rinone pia. Arawe nasilakate taumata apan naola'a punnene! ²Mappianne amungkangngu pia watu n gahilinganna ii'itta su ullekkane, see itou iwontolla su tahaɓoangnga wuassu itou mapaarosa n sangkatou su wallattu manga taumata maradio'a indi. ³Ana waugu udde, paatehamma!

Amungkangngu tuɓɓangngu ma'ola'a rosa, taggue itou. Amungkangngu itou sinumassilla, ampungewe itou. ⁴Amungkangngu itou nasala si'o paapitu sulaɓummu massallo wuɓɓu suapa n massaɓa rumanta ringannu wuɓɓu mabbisara, 'Ia'u madorongnga ampungnga,' ampungewe itou."

Su ola'u pangangimanna

⁵Manga rasul nabbisara Mawu Yesus, "Mawu, tohassawe pangangimanni ami." ⁶Mawu Yesus sinumimbakka, "Amungkangngu iamiu pia pangangimanna ere ahewallu watu n sawi, iamiu wotongnge mabbisara su alu murbei indi, 'Aabute i'o wuṛṛu tuwote su tahaḷoangnga,' alu indi sarun tumuṛṛutta parentanu."

Manara n sangkatou mangangimbe

⁷"Unnu wisara sangkatou wuassi amiu pia mangangimbe apan mammasolla su wailla wuṛṛu mallu'ada domba. Napawe mangangimbe udde nabelengnga, apa mawune mabbisara mangangimbene, 'Wette paalihakka umanna?' ⁸Asinungka tawe! Ewe'e itou mabbisara mangangimbene, 'Saddiae anna ia'u. Palluṛṛete n laubba waresi wuṛṛu riagaite ia'u umanna wuṛṛu ma'inumma, wua udde wotongngete i'o umanna!' ⁹Mangangimbe udde salaiwe tawe raloanna, ana waugu suete tinumuṛṛutta parenta mawune, waḷinewe aroddi? ¹⁰Aroddi lai iamiu. Amungkangngu iamiu suete tinumuṛṛutta anambo n manara nirolokka si'o, waḷoa'e, 'Iami tumba'u mangangimbe wiasa; iami tumba'u ma'ola'a manara ng kami.'"

Mawu Yesus napaapia n taumata sire mapuḷo

¹¹Sulalummu amatanna watukku Yerusalem, Mawu Yesus sinumabbi passaranu Samaria wuṛṛu Galilea. ¹²Su tempo sinumutta su sambau ampungnga, Itou nirantannu sire mapuḷo taumata marada'a paro apan maarantinna. Imangitou nirumarisikka ro'e n marau ¹³wuṛṛu mangngintuli, "Mawu Yesus! Tuangnga! Akkanaawe iami!"

¹⁴Su tempo Mawu Yesus naasilo simangitou, Itou nabbisara, "Roote ringannu manga imam, padorongke imangitou mamarikissa wadangngi amiu."

Tantaḷanna imangitou u'amatta, nawuḷite rada'i mangitou. ¹⁵Napawe sangkatou su wallatti mangitou naependamma manungku itou napiate, itou nabelengnga see ringannu tingikka ma'ikkatta itou nadalo Mawu Ruata. ¹⁶See su saruannu Mawu Yesus itou nassubba wuṛṛu naadiangkamanna Sitou. Taumata udde taumata n Samaria. ¹⁷Wua udde Mawu Yesus nabbisara, "Waḷinewe pia sire mapuḷo apan niapaapia? Suapa sire sio udde? ¹⁸Anio tumba'u taumata raho indi nabelengnga maa-

diangkamanna su Mawu Ruata?" ¹⁹See Mawu Yesus nabbisara su taumata udde, "Darisikke, wuṛṛu roote. Ana wangu i'o mangngimanna Sia'u, i'o napiate."

Tempone Mawu Ruata rumanta mamarenta

(Mat. 24:23-28, 37-41)

²⁰Sire pira taumata n Farisi naiwaḷo Mawu Yesus tingngera Mawu Ruata rumanta mamarenta. Mawu Yesus sinumimbakka, "Araratuannu Mawu Ruata tawe itattakka ringannu manga tanda apan wotongge asiloannu taumata, ²¹ma'oma n sara taumata wotongge mabbisara, 'Wette pa'ellega, indi Itou!' ara'e, 'Poiaroddi Itou!' Ana wangu Mawu Ruata suete nanattakka mamarenta su pattangnganni amiu."

²²Wua udde Mawu Yesus nabbisara su manga mallaḷarṛenggen-Ne, "Sarun rumanta tempone iamiu maapulu ma'ellega sambau al wuassu manga allo n Ana'u Taumata, arawe iamiu tawe maasilo allo udde. ²³Wuṛṛu taumata sarun mabbisara siamiu, 'Pa'ellega, isudde!' ara'e, 'Pa'ellega isindi!' Arawe imbarṛangnga iamiu sumabangnga maddea'a Sitou. ²⁴Su ereapa sawallo ma'ilatta wuassu langitta, wuṛṛu mannekakka wuassu pentakke saran pondolle, aroddi lai ola'u Ana'u Taumata napawe su allonete. ²⁵Arawe paarorone Itou ṛinone matatarṛangnga aṇambo n اساسا wuṛṛu ipaadi n taumata orassa indi. ²⁶Su allo udde Ana'u Taumata sarun iapaalḷatta'a lihidde ere su tempo Nabi Nuh rorone. ²⁷Taumata u'anna wuṛṛu ma'inumma, wuṛṛu maawingnga; aroddi lai tawe illoḷone na'oma n sara Nuh sinumutta sulaḷummu apalla wuṛṛu nammanawangnga lapiddu namate anambo n taumata udde. ²⁸Wuṛṛu ere lai su tempo n Lot. Taumata u'anna ma'inumma, mabaḷu'a, mammalli, mabbaila, massuanna wuṛṛu ma'ola'a waḷe. ²⁹Arawe napawe Lot sinumabangnga wuassu Sodom, allo udde putungnga wuṛṛu belerangnga nanawo wuassu langitta wuṛṛu namate simangitou sarangkambone. ³⁰Aroddi lai olangge su allo n Ana'u Taumata iapaalḷatta'a.

³¹Su allo udde taumata apan tantaḷanna roso uaawitta su waḷene arie pallintukka mangaḷappa darotongge sulaḷummu waḷe. Aroddi lai taumata apan tantaḷanna su wailla arie pabelengnga su waḷene. ³²Paananunge apa apan suete nariaddi su awingngi Lot! ³³Taumata apan mattinsahadda manaḷamatta wiakke, sarun awuḷiannu wiakke. Arawe taumata apan niawuḷiannu wiakke sarun maasaḷamatta wiakke udde. ³⁴Pangimante: Su ṛabbi udde rua ng katou apan mattiilla su atatiḷanna sambau, sangkatou sarun iapidḷa wuṛṛu sangkatou lai itantangnga. ³⁵Rua ng katou wawine tantaḷanna manggilingngu gandumma, sangkatou sarun iapidḷa wuṛṛu sangkatou sarun itantangnga. [³⁶Rua ng katou tan-

taḷanna mammanara su wailla, sangkatou sarun iapidda wuṛru sangkatou sarun itantangnga.]”

³⁷Mallaḷaṛṛenggen Mawu Yesus naiwaḷo, ”Suapa udde sarun mariaddi, Mawu?”

Mawu Yesus sinumimbakka, ”Suapa pia winaḷunanna, isudde pia manu’a u’inassa winaḷunanna udde.”

Sasumandinggu wawine waḷu wuṛru mallarṛuungnga

18 Wua udde Mawu Yesus nabati’u sambau sasumandingnga ipangarṛa’a manga mallaḷaṛṛenggen-Ne tadea’u imangitou sidutu u’aliomanna wuṛru tawe maadio’a naungge. ²Mawu Yesus nabbisara, ”Su sambau soa pia sangkatou mallarṛuungnga apan tawe matta’uttu Mawu Ruata, wuṛru tawe lai mappandumma sisai-sai. ³Su soa udde pia sangkatou lai wawine waḷu apan masokkate sumaruanna mallarṛuungnga udde, madorongnga hattone sambaanna. ’Tuḷungaawe ia’u sumaruanna roa’u,’ unnu wawine waḷu udde. ⁴Manga pira tempo aḷannune mallarṛuungnga udde maddiri mantuḷunggu wawine waḷu udde. Arawe panginsueanne mallarṛuungnga udde narṛingida, ’Salaiwe ia’u tawe matta’uttu Mawu Ruata wuṛru tawe mappandumma sisai-sai, ⁵arawe ana wagu wawine waḷu indi sidutu mallimbatta sia’u, mappianne ia’u manamba’a hattone. Amungkanggu tawe, itou sidutu rudanta wuṛru ma-paasusa’u.”

‘See Mawu Yesus nabbisara, ’Inunue’o paapia apa apan iwabbisara mallarṛuungnga apan wengkolla udde! ⁷Ne, apa Mawu Ruata tawe manamba’a hatto n aḷarṛanang-Nge sassane apan sussaḷande Sitou allo ṛabbi? Apa Itou sarun manorṛuttu tempone mantuḷunggi mangitou! ⁸Pangimante: Itou ringannu maḷiha-lihakka manamba’a hatto mangitou! Arawe napawe Ana’u Taumata rumanta, apa ta’e asombanganna lai taumata apan mangngimanna Sitou su runia indi?”

Sasumandinggu taumata n Farisi wuṛru mallaḷuṛru wose

⁹Mawu Yesus nabati’u lai sasumandingnga indi apan tuddane su taumata apan mangngadio’a taumata waine, arawe mangngimanna manungku ririne sassane mapiate. ¹⁰Unnu Mawu Yesus, ”Pia rua ngkatou apan inai su Waḷe Mawu umaḷiomanna. Sangkatou taumata n Farisi, sangkatou lai madarorongnga wose. ¹¹Taumata n Farisi udde

nirumarisikka sassane wuṛṛu inumaḷiomanna, 'O Mawu Ruata, ia'ū maadiangkamanna Si'o, ana waugu ia'ū tawe ere taumata waine, apan waḷju, taṛṛa ḷinga ara'e masandaga. Ia'ū maadiangkamanna ana waugu ia'ū tawe ere madarorongnga wose udde. ¹²Ia'ū paarua mappuasa sulaḷummu sangkamisa, wuṛṛu ia'ū mangngonggolu sambau wuassu mapuḷo anambo n asombangku!' ¹³Arawe madarorongnga wose udde nirumarisikka marau-rau wuṛṛu tawe maningngara langitta. Lapiddu mannapu roone, itou nabbisara, 'O Mawu Ruata, akkanawe ia'ū, taumata marosa indi!'"

¹⁴"Pangimante," unnu Mawu Yesus, "su tempo napuḷete su waḷe, ete madarorongnga wose udde tinarimmattu Mawu Ruata, waḷine taumata n Farisi udde. Ana waugu taumata apan mannanggakku watanganne sarun iapaawawo, wuṛṛu taumata apan sussallungu watanganne sarun iapaatanggakka."

Mawu Yesus nangaḷamatta aḷaṛṛana'a

(Mat. 19:13-15; Mrk. 10:13-16)

¹⁵Pia sire pira taumata uaapiddu aḷaṛṛana'a maradio'a ringannu Mawu Yesus tadea'ū Itou mamita wuṛṛu mangaḷamatta simangitou. Napawe manga mallalaṛṛenggennu Mawu Yesus naasilo olangnge udde, imangitou namuḷo manga taumata udde. ¹⁶Arawe Mawu Yesus namago aḷaṛṛana'a udde see nabbisara mallalaṛṛenggen-Ne, "Wala'e aroddi aḷaṛṛana'a indi rumanta ringang-Ku! Arie isingadda imangitou, ana waugu taumata ereindi apan maola'a laḷoṛṛo n araratuannu Mawu Ruata. ¹⁷Naungete! Taumata apan tawe sumaruanna Mawu Ruata ere sangkatou ana'a, tawe maola'a laḷoṛṛo n araratuannu Mawu Ruata."

Su ola'ū taumata ala

(Mat. 19:16-30; Mrk. 10:17-31)

¹⁸Sangkatou piaṛṛa'ū Yahudi naiwaḷo Mawu Yesus, "Iamangnga Huru apan mapia, apa sarun olaangku tadea'ū ia'ū maasomba wiakka tutune wuṛṛu maḷannu-ḷannu?"

¹⁹"Anio i'o nabbisara Ia'ū mapia?" unnu Mawu Yesus. "Tawedu apa apan mapia tumba'ū Mawu Ruata sassane. ²⁰I'o masingkate manga parenta Mawu Ruata: 'Arie passandaga, arie pamate, arie panna'o, arie mattiala awusu, wuṛṛu pangaddatta iamangngu wuṛṛu inangngu."

²¹Anambo n parenta udde suete ta'ū niola'a ro'e n ia'ū ta'e dario'a," unnu taumata udde.

²²Naaringikka udde, Mawu Yesus nabbisara, "Ta'e pia lai sambau sarun olaannu: Wa'lua'e anambo n darotongngu, onggola'e roinne su taumata asiangnga, ne i'o sarun maasomba darotongnga su surga. Wua udde rantate wu'ru tantalongke Sia'u." ²³Arawe napawe taumata udde naaringikka wisara aroddi, itou mangke nasusa ana waugu itou ala marasai.

²⁴Mawu Yesus masingkatta manungku taumata udde nasusa naungnge, ana waugu udde Itou nabbisara, "Masahadda atonna taumata ala maola'a la'or'ro n araratuannu Mawu Ruata! ²⁵Malluasanna sambau onta sumu'ri su lo'rangngu rarar'rumma, wuassu sangkatou ala sumutta su Runia Waku Mawu Ruata."

²⁶Manga taumata apan naaringikka Mawu Yesus nabbisara aroddi, imangitou naiwa'lo, "Amungkannggu aroddi, isai wotongnge ma-salamatta?"

²⁷Mawu Yesus sinumimbakka, "Apa tawe ia'ola'u taumata, udde wotongnge su Mawu Ruata!"

²⁸See Petrus nabbisara, "Pa'ellega! Iami suete nanantangngu la'or'ro n wa'e ng kami ana waugu tumantangnga Iamangnga."

²⁹"Pangimante!" wisara Mawu Yesus, "Taumata apan suete nanantangngu wa'lene, ara'e awingnge wawine, ara'e tu'rangnge, ara'e iamangnge wu'ru inangnge, ara'e a'lar'rangnge ana waugu mangngimbe Mawu Ruata, ³⁰taumata udde sarun wa'lisanna paarua wuassu tempo indi, wu'ru su tempo addantane itou sarun onggola'nnu pabbawiakka apan tune wu'ru saran ma'lanu-l'annu."

Mawu Yesus nabbisara atallune su ola'u apapate-Ne

(Mat. 20:17-19; Mrk. 10:32-34)

³¹Mawu Yesus nangammullu sire mapu'lo dua mallala'r'nggen-Ne su sambau see nabbisara, "Padaringikka! Iite orassa indi mabatukku Yerusalem. Poiaroddi, sarangkanambone apan niwo'r'rettu manga nabi su ola'u Ana'u Taumata sarun matipussa. ³²Itou sarun itantilla su manga taumata apan wa'line Yahudi, apan sarun mangaluandaga, mangngadio'a wu'ru mangaddu Sitou. ³³Imangitou sarun manansara wu'ru mamate Sitou, arawe su allo atallune, Itou sarun mabangunna."

³⁴Sarangkanambone udde tawe niasunnannu manga mallala'r'nggennu Mawu Yesus udde sara ng kadio'a. Atappasannanu manga wisara-Ne udde iaadappingnga wuassi mangitou. Imangitou wagga apa pandumannu wisara-Ne.

Mawu Yesus napaapia n sangkatou madarorongnga matane wuta

(Mat. 20:29-34; Mrk. 10:46-52)

³⁵Napawe Mawu Yesus maramite ma'oma n Yerikho, sangkatou wuta tantaŋanna ua'ianna madoro-rorongnga su winggi n daŋanna. ³⁶Napawe itou naaringikka manambo taumata sinumabbi, itou naiwaŋo, "Pia apa?"

³⁷"Mawu Yesus taumata Nazaret udde, sumabbi," unni mangitou sitou.

³⁸Ne taumata wuta udde nangintuŋi, "Yesus, Ana'i Daud! Akkanaawe ia'u!"

³⁹Manga taumata apan su saruane, namuŋo wuŋru nandolokki tou mapaaŋannabba. Arawe itou sidutu mangngintuŋi lembo n aikkanne lai, "Ana'i Daud! Akkanaawe ia'u!"

⁴⁰Mawu Yesus nattaalla wuŋru nandolokku taumata mapaaŋiddu taumata wuta udde ringanni Tou. Napawe itou na'omate, Mawu Yesus naiwaŋo, ⁴¹"Apa ipaapulunu olaang-Ku si'o?"

"Mawu," sasimbakku taumata wuta udde, "ia'u maapulu maasilo."

⁴²See Mawu Yesus nabbisara, "Amungkangngu aroddi, pa'ellege! Ana waugu i'o mangngimanna Sia'u, i'o napiate."

⁴³Orassa udde lai itou naasilote, see itou tinumantalongke Mawu Yesus ringannu maadiangkamanna Mawu Ruata. Napawe taumata nambo udde naasilote olangnge udde, imangitou nambo nadalote Mawu Ruata.

Mawu Yesus wuŋru Zakheus

19 Napawe Mawu Yesus na'omate su Yerikho, Itou nanassute amatanne sinumabbi soa udde. ²Su soa udde pia sangkatou tembonannu madarorongnga wose apan ala. Aranne Zakheus. ³Itou maapulu ma'ellega isai isassago Mawu Yesus udde, arawe ana waugu taumata tumamite manambo wuŋru wadanganŋe lai mawawo, ne itou tawe maasilo Mawu Yesus. ⁴Aroddi itou tinumaŋangnga nalliu ŋoro wuassu taumata, see itou-inumawitte su alu sangkalu, tadea'u wotongnge maasilo Mawu Yesus apan sarun sumabbi isudde. ⁵Napawe Mawu Yesus na'omate su alu udde, Itou naningngara see nabbisara, "Zakheus, lintukke paalihakka! Ana waugu allo indi Ia'u inai su waŋenu."

⁶Zakheus maŋiha-lihakka milumintukka wuŋru nanaŋoho Mawu Yesus ringannu lulluassa. ⁷Manga taumata apan naasilote olangnge udde nanat-



takke mallobbosa. Imangitou nabbisara, "Ih! Itou inai mattindaho su waļe n taumata laļeo!"

⁸Wua udde su waļene Zakheus nirumarisikka wuřu nabbisara Mawu Yesus, "Mawu, sangkawageanganna wuassu rarotongku sarun ionggolla su taumata asiangnga; wuřu su alawo'u taumata apan suete niawusu-angku, sarun waerřanna apia sitou paappatta wuassu paarorone!"

⁹See Mawu Yesus nabbisara, "Su allo indi i'o wuřu laļořo n waļenu maasomba asasaļamatta wuassu Mawu Ruata wuřu onggolañnu wiakka apan wakku, ana waugu i'o lai papapulunni Abraham. ¹⁰Ana'u Taumata nirumanta maddea'a wuřu manaļamatta taumata apan niaļiwune."

Sasumandingngu roitta wuļawanna

(Mat. 25:14-30)


¹¹Tantaļanna taumata ta'e uararingikka Mawu Yesus mabbisara, Itou nabati'u sambau sasumandingnga. Ana waugu su orassa udde Itou maranite n Yerusalem, wuřu taumata massunna manungku Mawu Ruata maļiha-ļihakka mamarenta ere sangkatou Ratu su runia indi. ¹²Mawu Yesus nabbisara, "Pia sangkatou papunna inai su wanua marau apan ite-nega maola'a ratu, wua udde itou mabelengnga. ¹³Tantaļanna taambe inai, itou namago sire mapuļo mangangimbene, see nangagille simangitou sangkatou-sangkatou passambau roitta wuļawanna. 'Pabbaļu'e ringannu roitta indi tantaļanna ia'u su amatanna,' unni tou simangitou. ¹⁴Arawe tumana'u wanuane maddantinni tou. Nariaddi, napawe itou inaite, imangitou nandolokku taumata niapawaļo, 'Iami maddiri n taumata indi maola'a ratu ng kami.'

¹⁵Arawe papunna udde nitenege naola'a ratu, wua udde nabelenge watukku wanuane. Ringannu maliha-lihakka itou namago manga mangangimbene sinumaruanna sitou, ana see maasingkatta sangkurate auntunganna apan suete niasombanganni mangitou. ¹⁶Mangangimbe paarorone nirumanta wuṛṛu nabbisara, 'Mawu, roitta wuḷawanna sambau apan nionggolu Mawu sia'u, suete ta'u niola'a mapuḷo.' ¹⁷'Mapia, unnu mawu udde, 'i'o mangangimbe mapia! Ana waugu sulaḷummu inolaanna adio'a i'o wotongnge apangimananna, ia'u sarun mamile si'o maola'a mangangatokku soa mapuḷo.' ¹⁸Mangangimbe aruane nirumanta wuṛṛu nabbisara, 'Mawu, roitta wuḷawanna sambau apan nionggolu Mawu sia'u udde suete ta'u niola'a lima.' ¹⁹Su mangangimbe udde ratu nabbisara, 'I'o sarun mapile mangangatokku soa lima.' ²⁰Mangangimbe waine nirumanta wuṛṛu nabbisara, 'Mawu indi roinnu; roitta udde ta'u niaddo su lesu. ²¹Ia'u matta'uttu Mawu, ana waugu Mawu sangkatou taumata apan maṛragissa. Mawu mangnganu apa apan tawe wageanggu Mawu, wuṛṛu Mawu lai mangngammullu auntunganna su tampa apan tawe nisuanannu Mawu.' ²²Ratu udde nabbisara sitou, 'I'o mangangimbe laḷeo! Nassuḷunggu ere wisaranu sassane, ia'u sarun maṛruumannu. I'o masingkatta ia'u taumata maṛragissa: ia'u mangnganu aḷawo a apan tawe rarotongku, wuṛṛu mangngammulu auntunganna su tampa ia'u tawe massuanna. ²³Amungkannggu aroddi, anio i'o tawe napaasutta n roitta udde su pangangadoanne, tadea'u napawe ia'u mabelengnga ia'u wotongnge manarimmattu roitta udde ringannu wungane?' ²⁴Wua udde ratu nabbisara manga taumata apan uararingikka isudde, 'Anute roitta udde wuassi tou, wuṛṛu onngoḷa'e su mangangimbe apan uasahipunna roitta wuḷawanna mapuḷo udde.' ²⁵Arawe manga taumata udde nabbisara, 'Mawu, itou piate lai mapuḷo.' ²⁶Ratu udde sinumimbakka, 'Nauinge: taumata apan piate, itou sarun onngoḷannu anamboanne lai. Arawe taumata apan tawe uatahuanna saran adio'a, apa apan tatahuananne sarun anuanna lai wuassi tou. ²⁷Wuṛṛu orassa indi apira'e inawarendi manga see'u udde apan maddiru ia'u maola'a ratune. Patete imangitou su saruanku!'"

Mawu Yesus sinumutta su Yerusalem ringannu awawantuga

(*Mat. 21:1-11; Mrk. 11:1-11; Yoh. 12:12-19*)

²⁸Napawe Mawu Yesus suete nabbisara sarangkanambone udde, Itou inumamatte nalliurṛoro wuassi mangitou watukku Yerusalem. ²⁹Napawe na'omate su Betfage wuṛṛu Betania su Wuiddu Zaitun, Itou nando-
lokku rua ng katou mallalaḷarṛenggen-Ne inai malliu ṛoro. ³⁰"Roote



Ana'u keledai (19:30)

su ampunganga apan sasaruananna udde," unnu Mawu Yesus sitarua, "amungkangngu iraddua sumutta polaroddi, iraddua sarun maasilo sambau ana'u keledai aiiitanna. Keledai udde taambe sina'eannu taumata. Wu'ate keledai udde wuṛṛu apira'e isindi. ³¹Amungkangngu pia taumata maiwaḷo siraddua, 'Anio iraddua namu'a keledai udde?' waḷoa'a, 'Mawu mappandumma.'

³²Rua ng katou mallaḷarṛenggenu Mawu Yesus udde inaite, wuṛṛu naaratingnga sarangkanambone udde nassuḷungngu ere niwisara-Ne. ³³Tantaḷanna imangitou mammu'a ana'u keledai udde, tatahuanne nabbisara sitarua, "Anio iraddua mammu'a keledai udde?"

³⁴Itarua sinumimbakka, "Mawu mappandumma." ³⁵See itarua nangapiddu ana'u keledai udde ringannu Mawu Yesus. Wua udde imangitou nangampakku jubah mangitou su tapanna'u keledai wuṛṛu nattulungngu Mawu Yesus sinuma'e su liuddu keledai. ³⁶Tantaḷanna Itou sussabbi uasa'e keledai udde manga taumata mammilattu jubah mangitou su laḷanna.

³⁷Napawe Mawu Yesus maranite n Yerusalem, su laḷanna apan sussossokka watukku Wuiddu Zaitun, manga mallaḷarṛenggen-Ne apan manambo udde mannattakke u'ui madalo Mawu Ruata wuṛṛu maadiangkamanna Sitou ana waugu manga aḷarṛindu'a apan suete niasiloanni mangitou. ³⁸Imangitou u'ui, "Niaḷamatanna Ratu apan nirumanta ringannu arannu Mawu! Paddarame su surga wuṛṛu awawantuga su Mawu Ruata!"

³⁹Manga pira ng katou taumata n Farisi wuassu wallattu taumata udde nabbisara su Mawu Yesus, "Iamangnga Huru, wo'ai paaļannawa'a mallaļarřenggeni Iamangnga."

⁴⁰Mawu Yesus sinumimbakka, "Pangimante! Amungkangngu imangitou mallannaba, manga watu indi lai sarun umui."

Mawu Yesus nilumuai n Yerusalem

⁴¹Su tempo Mawu Yesus maranite n Yerusalem, wuřru naasilote soa udde, Itou nilumuai n Yerusalem. ⁴²Wisara-Ne, "Maa'akkanna, apia eteapa amungkangngu allo indi i'o maasingkatta apa apan wotongge mandanta m padarame! Arawe orassa indi i'o tawe maasilo. ⁴³I'o sarun maependamma su sambau tempo, suapa n manga seennu ma'ola'a anambo n asasusa su pabbiařrannu miallo-miallo; imangitou sarun mamangalo malliwunna si'o wuřru manessengngu wuassu aļawo'u pabbuuanne. ⁴⁴Imangitou sarun mařrimunsa'a si'o wuřru anambo n tumangngu; wuřru tawedu saran sambau itantanggi mangitou watu uaatokka su tampane, ana waugu i'o tawe manutukka tempone Mawu Ruata rumanta manaļamatta si'o!"

Mawu Yesus sinumutta su Waļe Mawu

(*Mat. 21:12-17; Mrk. 11:15-19; Joh. 2:13-22*)

⁴⁵Mawu Yesus sinumutta su Waļe Mawu wuřru nallimbuakke manga mabbawaļu'a isudde. ⁴⁶"Sulaļummu Wuke Susi," wisara Mawu Yesus simangitou, "uawořretta arendi: Mawu Ruata nabbisara, 'Waļe'u sarun maola'a waļe tampa aaliomananna.' Arawe waļe udde niola'i amiu saļakku mařarampassa!"

⁴⁷Miallo-miallo Mawu Yesus mangngařra'a su Waļe Mawu. Manga tembonannu imam wuřru manga huru n agama, see manga piařra'u taumata n Yahudi maapulu mamate Sitou, ⁴⁸arawe tawe maasomba laļanne ipa'ola'a olangge udde, ana waugu manga taumata sidutu uararingikka Sitou, wuřru maļuassa madaringikka wisara-Ne.

Aiwaļo su ola'u tařřino Mawu Yesus

(*Mat. 21:23-27; Mrk. 11:27-33*)

20 Su sambau allo, Mawu Yesus tantaļanna mangngařra'a wuřru mabatti'u Watti'u Aļaļuassa wuassu Mawu Ruata su manga taumata sulaļummu Waļe Mawu. Manga imam tembonanne, wuřru manga huru n agama su sambau ringannu manga piařra'u Yahudi, nirumanta ²wuřru nabbisara Mawu Yesus, "Annama'a waļoa'a siami, ringannu tařřino n

sai I'o ma'ola'a sarangkanambone indi? Isai nangonggolu tarřino udde Si'o?"

³Mawu Yesus sinumimbakka, "Ia'u maapulu maiwaļo. Annama'a waļoa'a sia'u: ⁴Yohanes mannarřani ringannu tarřino n sai? Mawu Ruata ara'e taumata?"

⁵Ne imangitou nanattakke na'ire, "Amungkangngu iite mabaļo, 'Ringannu tarřino Mawu Ruata,' Itou sarun mabbisara, 'Amungkangngu aroddi anio iamiu tawe mangngimanna Sitou?' ⁶Arawe amungkangngu iite mabbisara, 'Ringannu tarřino n taumata,' manga taumata sarun manuntungngu watu siite, ana waugu imangitou mangngimanna manungku Yohanes sangkatou nabi." ⁷Nariaddi imangitou sinumimbakka, "Iami wagga."

⁸Ne Mawu Yesus nabbisara simangitou, "Amungkangngu aroddi ia'u lai tawe mabaļo siamiu ringannu tarřino n sai Ia'u ma'ola'a sarangkanambone indi."

Sasumandingngu manga mammamanara mabawailu angore

(*Mat. 21:33-46; Mrk. 12:1-12*)

⁹Mawu Yesus nabatti'e su manga taumata udde, sasumandingnga ereindi, "Pia sangkatou massuanna su sambau waillu angore. Itou napa sewa n wailla udde su sire pira mammamanara, see itou inaitu su wanua waine wurřu natana'e maļannu poiaroddi. ¹⁰Napawe temponete mangitingnga wua n angore udde, tatahuannu wailla udde nandolokku mangangimbene ringannu manga mammamanara udde iapatarimmattu wageangge. Arawe mammamanara udde namuulla mangangimbe udde wurřu nandolokki tou niapaapuļe tawe nionngoļannu wageangge. ¹¹Ne tatahuannu wailla udde nandolokka apia sangkatou mangangimbe waine; arawe mangangimbe udde lai nipuulla apia wurřu niwusannu manga mammamanara udde, see nirolokka ringannu tawe nionngoļannu wageangge. ¹²Wua udde tatahuannu wailla udde nandolokku mangangimbe atallune. Arawe daroļorřanna udde nipuullu manga mammamanara udde lai wurřu niramme su liuddu wailla udde. ¹³Panginsueanne tatahuannu wailla udde nabbisara, 'Apa řinone sarun ta'u olaanna? Ia'u sarun mandolokku ana'u sassane apan arangnguangku. Itou sarun addatanni mangitou!' ¹⁴Arawe napawe manga mammamanara m wailla udde naasilo ana'u tatahuannu wailla udde, imangitou nabbisara sangkatou ringannu sangkatou, 'Ete itou indi malloļossa manahuanna. Wette iite mamate sitou, tadea'u iite wotong-

nge manahuanna.' ¹⁵Ne imangitou namangkassa sitou su liuddu wailla udde see namate sitou."

Wua udde Mawu Yesus naiwaḷo, "Ei, amungkangngu tatahuannu wailla udde mabelengke, apa sarun olaanni tou su manga mammamamara udde? ¹⁶Itou sarun rumanta wuḷḷu mamate manga mammamanara udde, see manantillu wailla udde su mammamanara waine."

Naaringikka aroddi, nabbisarate manga taumata su Mawu Yesus, "Atonna-tonna tawe!"

¹⁷Mawu Yesus nanutudda simangitou see naiwaḷo, "Amungkangngu aroddi apa atappasannu wageangngu Wuke Susi indi?"

'Watu apan tawe ipaattu maaola'a waḷe, naola'e watu apan paarorone.'

¹⁸Anambo n taumata apan manawo su watu udde sarun maḷḷimunsa'a; wuḷḷu isai apan aemaannu watu udde sarun ataḷḷingianne mabaḷi awu."

Hatto m pamamaekka wose

(Mat. 22:15-22; Mrk. 12:13-17)

¹⁹Manga huru n agama wuḷḷu manga imam tembonanne naasingkatta manungku sasumandingnga udde ipammasendekku Mawu Yesus simangitou. Ana waugu udde imangitou pia pandumma manametta Sitou orassa udde lai, arawe imangitou matta'uttu taumata nambo.

²⁰Nariaddi imangitou maddea'a tempone mapia. Imangitou nangonggolu roitta su taumata iapaatanno lihiddu taumata matuḷida, wuḷḷu nandolokku manga taumata udde mapaasaḷa Mawu Yesus ringannu manga aiwaḷo, tadea'u imangitou wotongnge manantilli Tou su apulu wuḷḷu taḷḷino n gubernure.

²¹Ne manga taumata apan suete nionngolaḷannu roitta udde nabbisara Mawu Yesus, "Iamangnga Huru, iami masingkatta manungku anambo n apa apan iawabbisara wuḷḷu iatantiro m Iamangnga udde atonna. Iami masingkatta lai Iamangnga mangngaḷḷa'a ringannu masema-semakka su ola'u apulu Mawu Ruata su taumata, ana waugu Iamangnga tawe mamile taumata.

²²Ana waugu udde Iamangnga pabaḷote siami, tumuḷḷuttu Tita n agama ng kite, wotongnge mamaekka wose si Kaisar ara'e tawe wotongnge?"

²³Arawe Mawu Yesus masingkattu aawusu mangitou. Ana waugu udde Itou nabbisara, ²⁴"Annama'a palleha'a Sia'u sambau roitta saḷa'a. Hambaranna wuḷḷu aranni sai indi?"

"Kaisar!" sasimbakki mangitou.

²⁵"Amungkangngu aroddi," unnu Mawu Yesus simangitou, "onggoḷa'e si Kaisar, apa apan tatahuananni Kaisar wuḷḷu su Mawu Ruata, apa apan tatahuannu Mawu Ruata."

²⁶Nasemakke su saruannu taumata nambo udde, imangitou tawe naasomba saran sambau pasasaḷa Mawu Yesus. Imangitou tumba'u maḷannabba wuḷḷu naherangngu sasimbakke udde.

Hatto su ola'u pabbawangunna wuassu papate

(*Mat. 22:23-33; Mrk. 12:18-27*)

²⁷Manga sire pira wuassu taumata n Saduki nirumanta ringannu Mawu Yesus. (Imangitou ammuḷanna apan pia addapanne manungku taumata nate tawe mabangunna apia.) Imangitou naiwaḷo Mawu Yesus, ²⁸"Iamangnga Huru, Musa namoḷḷettu tita indi siite: Amungkannggu sangkatou esakka nate wuḷḷu itou tawe ana'a, tuḷḷrangnge ḷinone maawingngu inawaḷuanne tadea'u maasomba pangangawanne wuassu taumata nate udde. ²⁹Suete nariaddi pia sire pitu sangkatuḷḷrangnga. Iapa pahuḷune naawingnga, see nate tawe ana'a. ³⁰Wua udde iapa aruane naawingke lai ringannu inawaḷuanna udde, arawe itou lai nate tawe ana'a. ³¹Aroddi lai su tuḷḷrangnge atallune wuḷḷu nallaḷisansunna na'oma n sara appitune. ³²Panginsueanne wawine udde lai nate. ³³Su allo n taumata nate iapawangunna apia, awingngi sai wawine udde? Ana waugu sire pitu udde suete naawingngi tou."

³⁴Mawu Yesus sinumimbakka, "Manga taumata apan mabbiakka tempo indi, maawingnga, ³⁵arawe manga taumata apan wotongnge iapawangunna napawe suete nate, wuḷḷu mabbiakka su tempo addantane, imangitou tawe maawingnga. ³⁶Ola'i mangitou ere mala'ekatta wuḷḷu tate mate. Ete imangitou udde aḷaḷḷrana'u Mawu Ruata, ana waugu imangitou suete niapawangunna apia wuassu papate. ³⁷Musa sassane napaalḷiatta'a ringannu masemakka manungku taumata nate sarun iapawangunna apia. Sulaluḷḷu woḷḷenne nabbatti'u anggarḷḷmunanne apan luḷḷenggamma udde, itou mannago Mawu 'Mawu Ruata n Abraham, Mawu n Ruata Ishak, Mawu Ruata n Yakub'. ³⁸Ne, Mawu Ruata udde waḷḷinewe Mawu Ruata n taumata nate! Itou Mawu Ruata n manga taumata wiakka! Ana waugu hunane su Mawu Ruata, anambo n taumata mabbiakka."

³⁹Manga pira huru n agama nabbisara, "Sasimbakki Iamangnga Huru narḷḷino atonna." ⁴⁰Ana waugu udde imangitou tawe waḷḷrani lai maiwaḷo manga apa su Mawu Yesus.

Hatto su ola'u Ratu m Punnu Sałamatta

(*Mat. 22:41-46; Mrk. 12:35-37*)

⁴¹Mawu Yesus naiwaļo simangitou, "Ereapa wotongnge iwisara manungku Ratu m Punnu Sałamatta papapulunni Daud? ⁴²Sumbali Daud sassane nabbisara sulaļummu wuke Mazmur,

'Mawu nabbisara su Mawu'u:

A'iante su samba'a uanang-Ku,

⁴³ma'oma n sara ia'u ma'ola'a manga seennu
massurubawa si'o.'

⁴⁴Nariaddi amungkangngu Daud mannago n Ratu m Punnu Sałamatta udde 'Mawu', ereapa wotongnge Itou papapulunni Daud?"

Iapaanaungnga tadea'u paatehamma su saruannu manga huru n agama

(*Mat. 23:1-36; Mrk. 12:38-40*)

⁴⁵Tantaļanna manga taumata udde uararingikka Mawu Yesus, Itou nabbisara su mallaļarřenggen-Ne, ⁴⁶"Paatehamma su manga huru n agama. Imangitou apulune u'amatta ualuřre n jubah maļo'e, wuřru maļutu aaddatanna su manga pasakka. Imangitou maļutu su manga tampa mawantuga sulaļummu waļe m pattatarřamawuanna wuřru su manga andeangnga. ⁴⁷Imangitou mammahia manga wawine waļu wuřru manggarřo waļene. Wuřru see aļaļeo mangitou tawe asingkatanna, imangitou u'aliomanna maļo'e-ļo'engnga! Ruumanni mangitou mawak-katta!"

Aonggolu sangkatou wawine waļu

(*Mrk. 12:41-44*)

21 Su Waļe Mawu, Mawu Yesus naasilo manga taumata ala nantarřo n roitta sulaļummu tampa n roitta. ²Itou naasilo lai sangkatou wawine waļu asiangnga, nantarřo n rua m bau roitta witu'a. ³See Mawu Yesus nabbisara, "Padaringikka: Wawine waļu indi nantarřo mannamboanna wuassu aļawo'u taumata waine. ⁴Ana waugu imangitou sarangkanambone nangonggolla wuassu lebbe n darotongnge. Arawe wawine waļu indi, salaiwe itou asiangnga, nangonggolu apa apan tatahuananni tou apan ipappaatta su pabbiařanne."

Mawu Yesus nabbati'u ahahohakku Waļe Mawu

(Mat. 24:1-2; Mrk. 13:1-2)

⁵Pia manga taumata apan mabbisara su ola'u aroddi aṛṛamage Waļe Mawu nilogakku manga watu apan mangkaṛṛamaga wuṛṛu ringannu manga sarannapa nionggolla su Mawu Ruata. Ne Mawu Yesus nabbisarate simangitou, ⁶"Paṛṛado pia tempone, apa apan niasiloanni amiu indi sarun ihohakka; tawe saran sambau watu isindi apan mallambe uatokka su tampane!"

Asasusa wuṛṛu pananansara

(Mat. 24:3-14; Mrk. 13:3-13)

⁷Imangitou naiwaļo Mawu Yesus, "Iamangnga Huru, angngerate olangnge udde sarun mariaddi? Wuṛṛu apa tatialane manungku nia'omante tempone olangnge udde sarun mariaddi?"

⁸Mawu Yesus nabbisara, "Paatehamma, arie iamiu awahianna. Manambo taumata sarun rumanta ringannu arang-Ku, wuṛṛu mabbisara, 'Ete Ia'u Itou!' wuṛṛu 'Nia'omante tempone.' Arawe arie iamiu tumantalongnga simangitou. ⁹Arie lai iamiu matta'utta napawe maaringikka watti'a su ola'u pangalo wuṛṛu pasaseetta. Sarangkanambone udde ṛinone mariaddi paarorone. Arawe udde tawe manungku nia'omante tempone kiamatta."

¹⁰See Mawu Yesus nanassu watti-Nge, wisara-Ne, "Pabbawalaga sambau sarun mamangalo pabbawalaga waine, wuṛṛu araratuanna sambau mamangalo araratuanna waine. ¹¹Su alawo'u tampa sarun mariaddi linukka apan wahewa, aļaṛṛutumma wuṛṛu aļaṛṛusa'itta. Sarun mariaddi manga tanda apan maata'utta wuṛṛu wahewalla su langitta. ¹²Arawe tantaļanna sarangkanambone udde taambe nariaddi, iamiu sarun sametanna wuṛṛu sansaranna. Iamiu sarun parikisanna su manga waļe pattataṛṛamawuanna wuṛṛu itaṛṛo su tutupanna. Wuṛṛu iamiu sarun iapidida su saruannu mararatu wuṛṛu manga tembonanne, ana waugu iamiu mallaļaṛṛenggeng-Ku. ¹³Eteudde tempone iamiu mabatti'u Watti'u Aļaļuassa wuassu Mawu Ruata. ¹⁴Sidutua'e manungku iamiu tawe suminggawangnga su ola'u apan ṛinone iwisara ng kamiu ipanahekku watangannu. ¹⁵Ia'u sassane sarun mangonggolu wisara wuṛṛu apande udde, ma'oma n tawe saran sangkatou wuassu manga seetti amiu wotongnge lumawangnga ara'e massinaaddu apa apan suete nia-paasingkatti amiu. ¹⁶Iamiu sarun pateannu inangnga iamangngi amiu,

wurru manga turrangngu, manga ana'u turrangngi amiu wurru manga hawe ng kamiau. Sangkawageanganna wuassi amiu sarun pateanni mangitou. ¹⁷Iamiu sarun iarantinnu manga taumata ana waugu iamiu malalarrenggeng-Ku. ¹⁸Arawe uta'a sambua wuassu puanu tawe mawuli. ¹⁹Amungkangngu iamiu mataarrangnga wurru masabare iamiu masalamatta."

Mawu Yesus nabbisara su ola'u ahahohakku Yerusalem

(*Mat. 24:15-21; Mrk. 13:14-19*)

²⁰"Napawe iamiu naasilo Yerusalem tatalliwinannu tantara, iamiu sarun maasingkatta manungku soa udde tate malannu lai mahohakka. ²¹Su tempo udde rinone taumata apan uatana'a su Yudea sarun tumalangnga su wowone. Imangitou apan uatana'a su soa sarun manantangngu soa, wurru imangitou apan su liuddu soa arie passutta sula'ummu soa. ²²Ana waugu manga allo udde 'Eteudde Allo n Ruumanna Iapaamatta', tadea'u ringannu olangnge udde, apa apan uaworretta sula'ummu Wuke Susi sarun matipussa. ²³Maata'utta atonna manga allo udde su wawine apan ta'e pia illo'ro, wurru wawine apan ta'e mappasusu ana'a! Wanua indi sarun maappendamma asasusa wahewa, wurru Mawu sarun maruumannu pabbawalaga udde. ²⁴Piaddu pateannu halele, pia lai apan sarun iapidida ere taumata niatawana waktuku manga wanua n taumata; wurru manga taumata apan tawe maailala Mawu Ruata sarun marinda Yerusalem ma'oma n sara masue tempone apan suete tinantunnu Mawu simangitou."

Daranta n Ana'u Taumata

(*Mat. 24:29-31; Mrk. 13:24-27*)

²⁵"Parradote, su matannallo, wulanna, wurru manga anumpitanna sarun asiloanna manga tatialane. Su runia, manga taumata sarun matta'utta wurru maalihu sumaruanna wallada wurru tingikku lua'a. ²⁶Taumata sarun matta'utta atonna-tonna sumaruanna apa apan sarun mariaddi su ahewallu runia indi, ana waugu manga tembonanne su winalanganna, sarun massongkakka. ²⁷Su tempo udde Ana'u Taumata sarun rumanta sula'ummu winabbawa ringannu tarinone wurru awawantuga apan wahewa. ²⁸Amungkangngu manga olangnge udde mannatakke mariaddi, atimpu'ote wurru papingngarate, ana waugu ete adio'a lai iamiu sarun maasomba asalamatta."

Aḷaḷḷa'a wuassu alu ara

(*Mat. 24:32-35; Mrk. 13:28-31*)

²⁹See Mawu Yesus nabbati'a lai simangitou sasumandingnga ere indi, wisara-Ne, "Panutukka mapia-pia alu ara wuḷḷu manga alu waine. ³⁰Napawe manga laḷuwone iaasilote, iamiu masingkatta manungku tempo m padissa maranite. ³¹Aroddi lai amungkangngu iamiu maasilo manga olangnge udde mariaddi, iamiu sarun maasingkatta manungku Mawu Ruata maḷihakke mamarenta ere sangkatou Ratu.

³²Asingkatewe! Sarangkanambone udde sarun mariaddi tantaḷanna manga taumata apan wiakka tempo indi taambe nate abbi. ³³Langitta wuḷḷu runia sarun mawuḷi, arawe manga wisara-U sidutu ma'oma n sara maḷannu-ḷannu."

Sidutu Paatehamma

³⁴"Paariagai wadangngu, arie ma'oma n sara iamiu tumanite manambo ma'ola'a andeangnga wuḷḷu ma'inumma ua'e maawu'anna, ara'e tumanite maḷḷingiddu aḷawo'u hatto m wiakki amiu, na'oma n sara iamiu tawe naasaddia napawe allo udde nirumanta ringannu awagananna. ³⁵Ana waugu Allo udde sarun rumanta ere waḷati'a su anambo n taumata su wowo n runia indi. ³⁶Paariagate, wuḷḷu sidutu aḷiomanna tadea'u iamiu matohassa mamipe n aḷawo'u hatto apan sarun mariaddi wuḷḷu iamiu wotongnge sumaruanna Ana'u Taumata."

³⁷Mawu Yesus mangngaḷḷa'a su Waḷe Mawu su tempo allattune, wuḷḷu ḷabbine Itou inaité watukku Wuiddu Zaitun wuḷḷu natana'a isudde. ³⁸Suapa n ruaallo, manga taumata rudanta su Waḷe Mawu madaringikka Mawu Yesus mangngaḷḷa'a.

Maaire mamate Mawu Yesus

(*Mat. 26:1-5; Mrk. 14:1-2; Yoh. 11:45-53*)

22 Ramea n Roti Tawe Ragine apan isassago Paskah maranite. ²Manga imam tembonanne wuḷḷu manga huru n agama tantaḷanna maddea'a laḷanne mamate Mawu Yesus ringannu maḷanna-ḷannaba, ana waugu imangitou matta'uttu taumata nambo.

Yudas inumire mamate Mawu Yesus

(*Mat. 26:14-16; Mrk. 14:10-11*)

³Wua udde Setanna nangintaŕro si Yudas apan isassago lai Iskariot, eteudde sangkatou wuassu sire mapuŕo dua mallaŕŕenggennu Mawu Yesus. ⁴Ana waugu udde Yudas inaite wuŕru na'irete manga imam tembonanne wuŕru manga tembonannu mandariaga Waŕe Mawu su ola'u ereapa itou wotongnge manantillu Mawu Yesus simangitou. ⁵Imangitou mangke lulluassa wuŕru naddiandi mangonggolu roitta sitou. ⁶Yudas inumire wuŕru itou nadea'e tempone manantillu Mawu Yesus simangitou, ringannu tawe asingkatannu taumata.

Mannaddia annu Paskah

(*Mat. 26:17-25; Mrk. 14:12-21; Yoh. 13:21-30*)

⁷Na'omate allone Ramea n Roti Tawe Ragine, manungku domba annu Paskah pototante. ⁸Ne Mawu Yesus nandolokki Petrus wuŕru Yohanes, "Roote panaddia annu Paskah siite."

⁹"Suapa Iamangnga, iami manaddia anna udde?" aiwaŕo mangitou.

¹⁰Mawu Yesus sinumimbakka, "Su tempo iamiu sumutta su soa, iamiu massomba n sangkatou esakka uaapiddu sambau wensadda laŕoŕroannu ua'e. Tantalongke sitou su waŕe suttanni tou, ¹¹wuŕru waŕoa'e su tatauannu waŕe udde: Iamangnga Huru mappaiwaŕo, 'Suapa tampane manga mallaŕŕenggeng-Ku wuŕru Ia'u umanna annu Paskah?' ¹²Tatauannu waŕe udde sarun mamantingida siamiu wabbo'a wahewa sambau su rengkenne aruane, nasuungngu saranapane. Saddiaite sarangkanambone isudde."

¹³Ne inaite Petrus wuŕru Yohanes, naaratingke sarangkanambone nassuŕungnga ere iwabbisara Mawu Yesus. Imangitou nanaddiate annu Paskah isudde.

Saŕiwangngu Mawu

(*Mat. 26:26-30; Mrk. 14:22-26; 1Kor. 11:23-25*)

¹⁴Napawe na'omate tempone umanna annu Paskah udde, Mawu Yesus inuma'ianna su sampunna ringannu manga mallaŕŕenggen-Ne su saŕiwangnga udde. ¹⁵See Itou nabbisara simangitou, "Ia'u maapulu atonna umanna annu Paskah indi su sampunna ringanni amiu, tantaŕanna Ia'u taambe matataŕrangnga susa! ¹⁶Ana waugu udde, pangi-

mante: Ia'u tate umanna anna indi apia ma'oma n sara atappasannu saliwangnga indi iapaal'iatta'a su Runia Waku Mawu Ruata."

¹⁷Wua udde Mawu Yesus namengkette mangko n anggore, see inumaliomanna naadiangkamanna su Mawu Ruata, wua udde nabbisara, "Sengkampe indi, wuṛṛu tahiate; ¹⁸ana waugu asingkate: manattakka orassa indi Ia'u tate ma'inumma anggore indi apia ma'oma n sara Mawu Ruata uatarrinote sarangkanambone."

¹⁹Wua udde Mawu Yesus nanganute roti. Wuṛṛu napawe suete naadiangkamanna, Itou nattahiate roti udde ringannu lima-Ne, see nionggolla simangitou, wuṛṛu nabbisara, "Ete indi wadang-Ku [apan tinantilla ana waugu iamiu. Ola'e indi maola'a sambau pananaunganna Sia'u." ²⁰Aroddi lai napawe suete inumanna, Itou nangonggolu mangko n anggore udde simangitou wuṛṛu nabbisara, "Mangko indi, eteudde paaire Mawu Ruata apan waku, apan nitohassu darṛa-U - darṛa apan tinantilla ana waugu iamiu]."

²¹"Arawe pa'ellega! Taumata apan mamate Sia'u, isindi lai ringang-Ku! ²²Ana'u Taumata sarun mate su ereapa suete tinantunnu Mawu Ruata, arawe nasilakate taumata apan mamate Sitou!"

²³Ne imangitou nanattakke uaiwaḷo sangkatou ringannu sangkatou, isai wuassu wallatti mangitou sarun ma'ola'a olangnge udde.

Pattatatiakka su ola'u isai ahewaḷanne

²⁴Su wallattu manga mallalarrenggennu Mawu Yesus nariaddi pattatatiakka su ola'u isai wuassi mangitou apan ṛinone ellehanna lembo n ahewaḷanne. ²⁵Mawu Yesus nabbisara simangitou, "Manga ratu m pabbawalaga apan tawe maaillaḷa Mawu Ruata mannansara tumanangnge, wuṛṛu manga tembonanne isassago 'Mallalu'adda Tumanangnge'. ²⁶Arawe iamiu tawe wotongnge aroddi. Ewe'e mawaḷi'a taumata wahewa su wallatti amiu ṛinone maola'a adio'anne, wuṛṛu piaṛrangnge ṛinone maola'a ere sangkatou mangangimbe. ²⁷Isai magewaḷanne: taumata apan ua'ianna u'anna su medda, ara'e taumata apan mangngimbe sitou? Natantunna taumata apan ua'ianna udde. Arawe Ia'u isindi ringanni amiu naola'a ere sangkatou mangangimbe.

²⁸Sulalammu alawo'u asasusa-U, iamiu sidutu su sambau ringang-Ku. ²⁹Ere lai lamangnga suete nangonggolu tarṛino Sia'u ipamarenta, aroddi lai Ia'u sarun mangonggolu tarṛino udde siamiu. ³⁰Ringannu aroddi iamiu wotongnge lumuassa ringang-Ku su tempo Ia'u maola'a Ratu. Wuṛṛu iamiu sarun uma'ianna su atanggaranne su mapuḷo dua addera n araratuanna wuṛṛu mamarenta mapuḷo dua pabbawalagu taumata n Israel."

Papasingkatta manungku Petrus sarun massinaadu Mawu Yesus

(Mat. 26:31-35; Mrk. 14:27-31; Yoh. 13:36-38)

³¹"Simon, Simon, paddaringikka! Setanna suete niwala mamono'a siamiu; ere gandumma irrae wuassu wa'laane na'oma n sara apan mappianne irrae wuassu apan la'leo. ³²Arawe Ia'u suete inumaliomanni amiu, Simon, tadea'u pangangimannu tawe mallome. Wu'ru napawe i'o mabelengke ringang-Ku, i'o sarun manohassa manga turrangngu."

³³Petrus sinumimbakka, "Mawu, ia'u uasaddia sumutta su tuttupanna wu'ru mate su sampunna ringannu Mawu!"

³⁴"Pangimante, Petrus," unnu Mawu Yesus, "tanta'anna manu'a taambe inumu'u allo indi, i'o paatallute nassina'a-U."

Dompetta, pato'a wu'ru halele

³⁵Wua udde Mawu Yesus nabbisarate simangitou, "Dorone su tempo Ia'u nandolokki amiu, tawe namala ng kamiu mangapiddu dompetta, pato'a ara'e sapatu, apa auranganni amiu su tempo udde?"

"Tawe!" sasimbakki mangitou.

³⁶"Arawe orassa indi," unnu Mawu Yesus, "Isai pia dompetta ara'e pato'a, rinone iapidida; wu'ru isai tawe halele, rinone maba'lu'u jubahne ipamalli halele. ³⁷Ana waugu, pangimante, wageanggu Wuke Susi tingikke arendi, 'Itou sassunnanna ere sangkatou taumata la'leo,' rinone mariaddi su riri-U. Ana waugu apan uaworretta su Wuke Susi matatarino Sia'u tanta'anna mattipusse orassa indi."

³⁸"Mawu," unnu malla'arreggennu Mawu Yesus, "Pa'ellega, isindi pia rua m bua halele."

"Uddita'e!" sasimbakku Mawu Yesus.

Mawu Yesus inumaliomanna su Wuiddu Zaitun

(Mat. 26:36-46; Mrk. 14:32-42)

³⁹Mawu Yesus nanantangke n soa wu'ru inaita ere inanaramanne watukku Wuiddu Zaitun, wu'ru manga malla'arreggen-Ne inai lai ringanni Tou. ⁴⁰Napawe na'omate isudde, Itou nabbisara simangitou, "Aaliomante tadea'u iamiu tawe marosa amungkangngu iamiu wono'anna!"

⁴¹Wua udde Itou nangindau adio'a wuassi mangitou, irar̄rangngo araune paassa panuntungannu watu, ⁴²see inumal̄intuda wuṛṛu inumal̄iomanna, "Iamangnga," wisara-Ne, "amungkangngu wotongnge, paaraua'a wuassia-U sansara apan sasaruanang-Ku indi. Arawe arie tumuṛṛuttu apulu-U, ewe'e tumuṛṛuttu apulu n Iamangnga." [⁴³Sangkatou mala'ekatta nirumanta ringanni Tou wuṛṛu nanohassa Sitou. ⁴⁴Mawu Yesus tumanite n uatatar̄rangnga sansara sulaḷummu naung-Nge na'oma n sara Itou u'al̄iomanna atonna-tonna. Liahane naal̄ihida rar̄ra tutturo su leta'a.]

⁴⁵Napawe suete inumal̄iomanna, Mawu Yesus nabelengke apia ringannu manga mallaḷar̄ranggen-Ne. Itou naaratingnga simangitou tantaḷanna mattiilla ana waugu massusa. ⁴⁶See Itou nabbisara simangitou, "Anio iamiu mattiilla? Pabbangunte wuṛṛu aal̄iomanna tadea'u iamiu tawe awono'anna."

Mawu Yesus nisametta

(*Mat. 26:47-56; Mrk. 14:43-50; Yoh. 18:3-11*)

⁴⁷Tantaḷanna Mawu Yesus ta'e uahahatto, nirumantate taumata manambo. Imangitou uapiar̄ra'a si Yudas, sangkatou wuassu mallaḷar̄ranggennu Mawu Yesus. Wua udde Yudas inaita natudda Mawu Yesus see nangari'a Sitou. ⁴⁸Arawe Mawu Yesus nabbisara sitou, "Yudas, apa ringannu aari'a udde i'o mamate Ana'u Taumata?"

⁴⁹Napawe manga mallaḷar̄ranggennu Mawu Yesus apan isudde naasilo apa apan sarun mariaddi, imangitou nabbisara, "Mawu, iamii mandoppa simangitou ringannu haḷele!" ⁵⁰See sangkatou su wallatti mangitou namuulla allangngu imam wahewa ringannu haḷele na'oma n sara nar̄rassatta taḷingane aikkatanna.

⁵¹Arawe Mawu Yesus nabbisara, "Udita'e!" See Itou namita taḷinga n taumata udde see niapaapia.

⁵²Wua udde Mawu Yesus nabbisara manga imam tembonanne wuṛṛu manga tembonannu mandariaga Waḷe Mawu, see manga piar̄ra'u taumata n Yahudi apan nirumanta isudde, manametta Mawu Yesus, "Apa Ia'u indi taumata laḷeo, na'oma n sara iamii nirumanta uaapiddu haḷele wuṛṛu papuulla ipanametta Sia'u? ⁵³Miallo-miallo Ia'u su sambau ringanni amiu su Waḷe Mawu, arawe iamii tawe manametta Sia'u. Arawe indite tempone iamii manametta, su tempo tar̄rino n ararandumma mappamattu manarane."

Petrus nassinaadu Mawu Yesus

(Mat. 26:57-58, 69-75; Mrk. 14:53-54, 66-72; Yoh. 18:12-18, 25-27)

⁵⁴Imangitou nanamette Mawu Yesus see niapidda su waḷe m imam wahewa. Petrus tinumantalongnga ro'e n marau. ⁵⁵Su pattangngannu rallakku waḷe udde plate putungnga apan suete nire'omanna wuḷḷu Petrus inaita inuma'ianna su sampunna ringannu manga taumata ua'ianna uapaḷiwutta putungnga udde. ⁵⁶Sangkatou mangangimbe wawine naasilo si Petrus ua'ianna su winggi m putungnga udde; see mangangimbe wawine udde mannutukka si Petrus, wua udde nabbisara, "Taumata indi lai tanginna su sambau ringannu Mawu Yesus!"

⁵⁷Arawe Petrus nassinaada. Itou nabbisara, "Ia'u atonna-tonna wagga n taumata udde!"

⁵⁸Tawe naḷannu wua udde, sangkatou waine naasilo si Petrus wuḷḷu nabbisara, "I'o lai sangkatou su wallatti mangitou!"

Arawe Petrus sinumimbakka, "Tawe, waḷine ia'u!"

⁵⁹Iraḷranggo sangka orassa naḷiudda, sangkatou waine lai nabbisara ma'ikkatta, "Atonna-tonna taumata indi mallalaḷḷangngennu Mawu Yesus, ana waugu itou lai taumata n Galilea!"

⁶⁰Arawe Petrus sinumimbakka, "Apa pandumannu, ia'u wagga!"

Orassa udde lai, tantaḷanna Petrus ta'e mabbisara, manu'a inumu'u. ⁶¹Mawu Yesus nanaile wuḷḷu na'ellega si Petrus. See Petrus naanaungke Mawu Yesus suete nabbisara sitou, "Tantaḷanna manu'a taambe inumu'u allo indi, i'o paatallute massina'a-U." ⁶²Ne sinumabangke Petrus wua isudde wuḷḷu nilumuaite.

Mawu Yesus ninalangnga wuḷḷu nipuulla

(Mat. 26:67-68; Mrk. 14:65)

⁶³Manga taumata apan ualu'adda Mawu Yesus, mannalangnga wuḷḷu mamuulla Sitou. ⁶⁴Imangitou nanutuba matane wuḷḷu naiwaḷo Sitou, "Si'ata'a isai namuulla Si'o?" ⁶⁵Manambo lai manga wisara aaḷuandaga apan iwabbisara mangitou su Mawu Yesus.

Mawu Yesus su saruannu Mallalaḷḷungngu Agama

(Mat. 26:59-66; Mrk. 14:55-64; Yoh. 18:19-24)

⁶⁶Su ruaallone, manga piaḷḷa'u taumata n Yahudi, manga imam tembonanne, wuḷḷu manga huru n agama naammulla; see Mawu Yesus

niapidda su saruannu Mallarungu Agama mangitou. ⁶⁷"Pasingkata'a siami," unni mangitou Sitou, "atonna I'o indi Ratu m Punnu Sałamatta?"

Mawu Yesus sinumimbakka, "Amungkanngu Ia'u mabało siamiu, iamiu tawe mangngimanna. ⁶⁸Wurru amungkanngu Ia'u maiwało siamiu, iamiu lai tawe sumimbakka. ⁶⁹Arawe manattakka orassa indi, Ana'u Taumata sarun uma'ianna su uanannu Mawu Ruata Lembo Matarino."

⁷⁰Imangitou sarangkanambone nabbisara, "Amungkanngu aroddi, I'o indi Ana'u Mawu Ruata?"

Mawu Yesus sinumimbakka, "Aroddi ere su wisara ng kamiu."

⁷¹Ne imangitou nabbisara, "Ipa'ura lai sakassi! Iite naaringikke wuassu moꝛꝛongge sassane!"

Mawu Yesus su saruanni Pilatus

(*Mat. 27:1-2, 11-14; Mrk. 15:1-5; Yoh. 18:28-38*)

23 Awadaalla su ammułanna udde dirumarisikka see nangapiddu Mawu Yesus su saruanni Pilatus. ²Isudde imangitou mapaasała n Tou. Imangitou mabbisara, "Iami naaratingnga taumata indi mangngaliwu n laꝛoꝛo n soa. Itou mandolokku taumata tadea'u tawe maekka wose su Kaiser, ana waugu Itou mabało manungku ete Itou Kristus, sangkatou ratu."

³See Pilatus naiwało Mawu Yesus, "Atonna I'o ratu n taumata n Yahudi?"

Mawu Yesus sinumimbakka, "Aroddi ere su wisaranu."

⁴Ne Pilatus nabbisara manga imam tembonanne wurru taumata nambo udde, "Ia'u tawe naasomba sałane saran sambau su taumata indi tadea'u Itou irruumanna."

⁵Arawe imangitou lembo mammata'a lai, "Ringannu alaꝛꝛang-Nge, Itou mangngaliwu n taumata su ahewallu leta'u Yudea; paarorone su leta'u Galilea, wurru orassa indi na'omate isindi lai."

Mawu Yesus su saruanni Herodes

⁶Napawe Pilatus naaringikka hatto udde, itou naiwało, "Apa taumata indi taumata n Galilea?" ⁷Napawe nipaasingkatanna manungku Mawu Yesus wuassu leta'u wageangnu taꝛꝛino n Herodes, Pilatus nandolokku Mawu Yesus ringanni Herodes, apan tempo udde isudde lai su Yerusalem. ⁸Herodes nilumuassa napawe naasilo Mawu Yesus, ana

waugu maʔannute itou maaringikka olangnge wuʔru maapulu maʔellega Sitou. Itou mangngantimma wotongnge maʔellega Mawu Yesu maʔolaʔa aʔaʔrinduʔa. ⁹Ana waugu udde Herodes manambo naiwaʔo Sitou, arawe Mawu Yesu tawe sinumimbakka saran paassa. ¹⁰Manga imam tembonanne wuʔru manga huru n agama sinumaruanna lai isudde wuʔru ringannu pia lembone mapaasaʔa Mawu Yesu. ¹¹Herodes wuʔru manga tantarane mannalangnga wuʔru manggaʔuandaga Mawu Yesu, see nilluʔreannu laubbu awawantuga, wua udde Itou nirolokka apia ringanni Pilatus. ¹²Su allo udde lai Herodes wuʔru Pilatus, apan rorone uasaseʔetta, naddamete apia.

Mawu Yesu iʔruumanna pateanna

(*Mat. 27:15-26; Mrk. 15:6-15; Yoh. 18:39-19:16*)

¹³Pilatus nangammullu manga imam tembonanne, wuʔru manga piaʔrangnge, wuʔru laʔoʔo n soa, ¹⁴see nabbisara simangitou, "Iamiu nangapiddu taumata indi siaʔu wuʔru mabbisara manungku Itou manggaʔiwu manga taumata. Orassa indi su saruanni amiu iaʔu suete namarikissa Sitou, arawe iaʔu atonna-tonna tawe naasomba saran sambau aʔaʔeone apan iaansilli amiu Sitou. ¹⁵Aroddi lai addapatti Herodes, ana waugu itou lai suete napawelengngu Mawu Yesu udde siami. Taumata indi tawe naʔolaʔa pasasaʔa apan wotongnge maʔruumanna Sitou maʔoma n sara mate. ¹⁶Ana waugu udde iaʔu sarun manggesekka Sitou wua udde Itou ipallosa."

[¹⁷Suapa n allo ramea m Paskah, Pilatus ʔinone mammallossu sangkatou taumata n ʔuumanna su tumanaʔu soa.] ¹⁸Anambo n taumata apan uaammulla isudde mangngintuʔi, "Patete Itou! Pallosaʔa Barabas siami!" (¹⁹Barabas niʔruumanna ana waugu namangalo soa wuʔru ana waugu pamamate.)

²⁰Pilatus maapulu mamallossu Mawu Yesu, ana waugu udde itou nabbisara paassa lai su taumata nambo udde. ²¹Arawe imangitou mangngintuʔi, "Arussaʔa Itou! Arussaʔa Itou!"

²²See su atallune Pilatus nabbisara simangitou, "Arawe apa pasasaʔane? Iaʔu tawe naasomba saran sambau pasasaʔane apan ʔinone iʔruumanna ringannu ʔuumanna pateanna! Iaʔu manggesekka Sitou wua udde ipallosa."

²³Arawe imangitou sidutu uʔui maʔikka-ikkatta manungku Mawu Yesu ʔinone iarussa. Ne panginsueanne darorongngi mangitou niringingiranna. ²⁴Ne Pilatus nangonggole n ʔuumanna pateanna su Mawu Yesu ere su apulu n taumata nambo udde, ²⁵wuʔru namallossu taumata apan radoronganni mangitou, eteudde taumata apan

nirruumanna ana waugu namangalo wuḥḥu namate. Wua udde Mawu Yesus tinantille simangitou wuḥḥu walate apulu mangitou ma'ola'a Sitou.

Mawu Yesus niarussa

(*Mat. 27:32-44; Mrk. 15:21-32; Yoh. 19:17-27*)

²⁶Ne Mawu Yesus niapidde mangitou. Su pattangngannu laḥanna, imangitou nassomba n sangkatou aranne Simon, wuassu Kirene, apan tantaḥanna inai su soa. Imangitou nanametta sitou, see namata'i tou niapapasanna arussa su liuddu Mawu Yesus.

²⁷Manambo taumata uatantuḥḥutta liuddu Mawu Yesus – su wallatti mangitou pia sire pira wawine. Manga wawine udde lulluai wuḥḥu mas-susa Mawu Yesus. ²⁸Arawe Mawu Yesus nanaile wuḥḥu nabbisara, "Ei, manga wawine n Yerusalem! Ia'u arie palluaie. Luaite n watanganni amiu sassane wuḥḥu aḥḥanangngu. ²⁹Ana waugu sarun rumanta tempone taumata sarun mabbisara, 'Laḥumanna'a eteapa su manga wawine apan tawe illoḥḥo, apan tawe naasomba ana'a wuḥḥu tawe mapasusu n anangge!' ³⁰Su tempo udde taumata sarun mabbisara su manga wowone, 'Umpisanete iami!' Wuḥḥu su manga wuidda, 'Soopete iami!' ³¹Ana waugu amungkangngu matataḥḥino su alu ta'e wiakka, taumata suete na'ola'a ereindi, apa lai sarun olaanni mangitou su alu apan naḥḥangute!"

³²Pia lai rua ng katou waine – itarua taumata laḥeo – apan niapidde mangitou irruumanna lai sara mate su sampunna ringannu Mawu Yesus. ³³Napawe na'omate su tampa apan isassago "Tanggilaḥa", imangitou nangarussate Mawu Yesus wuḥḥu rua ng katou taumata laḥeo udde – sangkatou su samba'a uananna wuḥḥu sangkatou lai su samba'a airri Mawu Yesus. ³⁴See Mawu Yesus inumaḥiomanna, "O Iamang-Ku, ampungewe imangitou! Imangitou wagga apa apan a'olaanni mangitou."

Laubbu Mawu Yesus nitahia isudde su wallatti mangitou wuḥḥu niundi. ³⁵Manga taumata uarisikka isudde mabbiala lai, tantaḥanna manga tembonannu taumata n Yahudi mangngadio'a Mawu Yesus ringannu wisarane, "Itou suete nanaḥamatta taumata waine; orassa indi Itou panaḥamatta riri-Ne sassane, amungkangngu atonna-tonna Itou Ratu m Punnu Saḥamatta apan nipile Mawu Ruata!"

³⁶Manga tantara lai mangngadio'a Sitou. Imangitou nangundani wuḥḥu nangonggolu anggore mapakkada Sitou ³⁷lapiddu nabbisara, "Amungkangngu I'o ratu n taumata n Yahudi, panaḥamate riri-Nu!"

³⁸Su alu arussa Mawu Yesus aḥu rosone uawoḥḥetta wisara ereindi: "Ete indi Ratu n Taumata n Yahudi."

³⁹Sangkatou wuassu wallattu taumata laleo apan uarussa isudde mangngadio'a lai Mawu Yesus. Itou nabbisara, "Ete I'o Ratu m Punnu Saalamatta udde? Ei, panaalamatte riri-Nu wufru siami!"

⁴⁰Arawe taumata laleo sangkatou lai nanagu hawene udde, unni tou, "Apa i'o tawe matta'uttu Mawu Ruata? I'o su sampunna niiruuman na'oma n sara mate ere Itou. ⁴¹Tumba'u ruumanni addua udde atonna narfino su pallalagu ng kadua. Arawe Itou atonna-tonna tawe saane!" ⁴²See itou nabbisara, "Mawu Yesus, naungewe ia'u, napawe I'o ruman-tate maola'a sangkatou Ratu!"

⁴³"Pangimante," unnu Mawu Yesus sitou, "Allo indi i'o su sampunna lai ringang-Ku su Firdaus."

Apapate Mawu Yesus

(*Mat. 27:45-56; Mrk. 15:33-41; Yoh. 19:28-30*)

⁴⁴Irafranggo puulla mapulo dua allattune, matannallo tawe semakke wufru ahewallu wanua udde naddandumma na'oma n sara puulla tatallu wawallo. ⁴⁵Pampele apan ua'ele su Wahe Mawu nahesa'a natahia darua. ⁴⁶See Mawu Yesus inumui ma'ikka-ikkatta, "O Iamang-Ku! Sulalummu limanu Ia'u manantillu watangang-Ku!" Napawe suete nabbisara aroddi, Itou natete.

⁴⁷Napawe tembonanu tantara naasilo apa apan suete nariaddi, itou nadalote Mawu Ruata. See itou nabbisara, "Atonna-tonna, Itou indi tawe saane!"

⁴⁸Taumata nambo apan nirumanta isudde ma'ellega, naasilote apa apan suete nariaddi isudde. Imangitou sarangkanambone napule ringannu naungnga sinumassilla. ⁴⁹Wufru manga hawe Mawu Yesus, na-reengnga lai manga wawine apan utantalongnga Sitou wuassu Galilea uarisikka marau wufru na'ellega sarangkanambone udde.

Pallalabinggu Mawu Yesus

(*Mat. 27:57-61; Mrk. 15:42-47; Yoh. 19:38-42*)

⁵⁰⁻⁵¹Pia sangkatou aranne Yusuf, wuassu soa Arimatea su wanua Yudea. Itou sangkatou mapia apan aaddatannu taumata, wufru na-reengnga taumata apan sidutu uarafraddo tempone Mawu Ruata marenta ere sangkatou Ratu. Salaiwe itou nareengnga su wageangngu Mallafruungngu Agama, itou maddiri n ruumanna udde wufru inolaannu manga mallafruungnga udde. ⁵²Yusuf inaita sinumaruanna si Pilatus wufru nadorongnga tadea'u winalunannu Mawu Yesus ionggolla

sitou. ⁵³Wua udde itou nanossokku winaḷunannu Mawu Yesus udde wuassu arussane, see nipi'unnu kaengnga kafan wuassu linen. Wua udde itou nangadote n winaḷunanna sulaḷummu laḷabinganna apan niola'a sulaḷummu wuiddu watu – laḷabinganna udde taambe pinallabinganna. ⁵⁴Allo udde allo aḷimane; wuḷḷu allo n Sabatta maranite itattakka.

⁵⁵Manga wawine apan nirumanta ringannu Mawu Yesus wuassu Galilea tinumantalongnga si Yusuf na'ellega laḷabinganna udde. Imangitou na'ellega lai ereapa winaḷunannu Mawu Yesus niaddo sulaḷummu laḷabinganna. ⁵⁶Wua udde imangitou napuḷe see nanaddia manga rampa-rampa wuḷḷu lana mawangngi ipamokka winaḷunannu Mawu Yesus.

Su allo n Sabatta, imangitou nangilloḷo mammanara ipallagu n Tita n agama.

Pabbawangunnu Mawu Yesus

(*Mat. 28:1-10; Mrk. 16:1-8; Yoh. 20:1-10*)

24 Su allo Misa, ruaallo maḷḷangapa, manga wawine udde inaita su laḷabinganna nangapiddu manga rampa apan suete nisaddia mangitou. ²Su laḷabinganna, imangitou naaratinga watu ḷaḷapingnge nataḷinggite. ³See imangitou sinumuttate sulaḷummu laḷabinganna udde, arawe tawe naasomba winaḷunannu Mawu Yesus isudde. ⁴Tantaḷanna imangitou uarisikka isudde wuḷḷu tuttatiangnga maḷḷingiddu olangnge udde, inaḷḷombanganne rua ng katou ringannu laungnge sussaḷendappa nirumarisikka marani mangitou. ⁵Imangitou mangke nata'utta, see inumaḷintuda su leta'a, tantaḷanna rua ng katou udde mabbisara simangitou, "Anio iamia maddea'a taumata wiakka su tampa n taumata nate? ⁶Itou tate isindi. Itou nabangunte! Paanaunge apa apan suete niwaḷo n Tou siamio su tempo Itou ta'e su Galilea, ⁷manungku 'Ana'u Taumata sarun itantilla su taumata marosa, see iarussa, wuḷḷu su allo atallune Itou sarun mabangunna."

⁸Ne naanaungke manga wawine udde manga wisara Mawu Yesus. ⁹Napawe nawelengke wuassu laḷabinganna udde, imangitou nabatti'e anambo n apa apan suete nariaddi udde su sire mapuḷo assa mallalaḷḷenggen-Ne wuḷḷu su manga mallalaḷḷenggen-Ne apan waine. ¹⁰Manga wawine apan namasingkattu sarangkanambone udde su mallalaḷḷenggen nu Mawu Yesus eteudde: Maria Magdalena, Yohana wuḷḷu Maria inangngi Yakobus, see manga wawine waine apan su sampunna ringanni mangitou. ¹¹Arawe manga rasul udde massunna manungku manga wawine udde tumba'u mabatti'a waḷḷaḷḷa. Imangitou tawe mangngimanna watti'u manga wawine udde. ¹²Arawe Petrus

nabuatta dirumarisikka see tinumaɓangnga watukku laɓabinganna. Lapi-ddu u'aruutta itou ma'ellega watukku laɓumme, see naasilo tumba'u maɓarɓennessa kafan isudde. Petrus naherangnga, see napuɓe ringannu anambo n aiwaɓo sulaɓummu naungnge su ola'u apa apan suete nariaddi.

Su tangnga n daɓanna watukku Emaus

(*Mrk. 16:12-13*)

¹³Su allo udde lai, rua ng katou mallaɓarɓenggenu Mawu Yesus tantaɓanna u'amatta watukku sambau ampungnga, aranne Emaus, ita-takasere araune mapuɓo assa su kilone wuassu Yerusalem. ¹⁴Lapiddu u'amatta imangitou uahahatto su ola'u apa apan suete nariaddi udde. ¹⁵Tantaɓanna imangitou uahahatto wuɓɓu maɓringidda su sambau, Mawu Yesus sassane nirumanta wuɓɓu inumamatta su sampunna ringanni mangitou. ¹⁶Imangitou naasilo Mawu Yesus, arawe piaddu naaɓimbatta na'oma n sara imangitou tawe naaillaɓa Mawu Yesus. ¹⁷See Mawu Yesus nabbisara, "Apa ipagahato ng kamiu su tangnga n daɓanna indi?"

Imangitou nattaalla ringannu naungnga nasusa. ¹⁸See sangkatou wuassi mangitou, aranne Kleopas, naiwaɓo Mawu Yesus, "Ete Iamangnga sangkatou raho su Yerusalem apan wagga m batti'a apan suete nariaddi poiaronddi wakku-wakku indi?"

¹⁹"Watti'a apa?" aiwaɓo Mawu Yesus.

"Watti'a apan narɓi'a su Mawu Yesus, taumata Nazaret udde," sasimbakki mangitou. "Itou sangkatou nabi. Manga wisara-Ne wuɓɓu manga manara-Ne pia tarɓinone – mapia su aellegu Mawu Ruata aroddi lai su aellegu awadaalla! ²⁰Manga imam tembonanne wuɓɓu manga piarra'u walagi ite nanantilli Tou iɓɓuumanna na'oma n sara mate, wuɓɓu imangitou nangarussa n Tou! ²¹Sumbaɓi iami mangngantimma manungku ete Itou mamallossu Israel! Wuɓɓu allo indi allo atallune wuassu olangnge udde nariaddi. ²²Wuɓɓu lai manga sire pira wawine wuassu ammuɓanni ami suete namaɓrindu'a siami. Ruaallo maɓranggapa imangitou nabatukku laɓabinganna, ²³arawe tawe naasomba winaɓunan-Ne poiaronddi. See imangitou nabelengke wuɓɓu nabatti'a manungku imangitou suete naasilo mala'ekatta, wuɓɓu manga mala'ekatta udde nabbisara manungku Mawu Yesus nabbiakke. ²⁴Sire pira wuassi ami inaita su laɓabinganna wuɓɓu naaratinga manungku apa apan niwatti'u manga wawine udde atonna, tumba'u imangitou tawe naasilo Mawu Yesus."

²⁵See Mawu Yesus nabbisara simangitou, "Iamiu woddo atonna! Tu-manite maɓiwue iamiu mangngimanna anambo n apa apan suete niapa-singkattu manga nabi! ²⁶Waɓinewe Ratu m Punnu Saɓamatta udde sarun

mamendamma اساسا rorone, wua udde na'omate su awawantug-Ge?"
²⁷Wua udde Mawu Yesus nanaʔaate simangitou apa apan uawoʔretta sulaʔummu Wuke Susi su ola'u wadang-Nge, manattakka wuassu wuke Musa wuʔru wuke manga nabi.

²⁸Tantaʔanna udde imangitou maddani n soa patudanni mangitou. Mawu Yesus na'ola'a paʔrimaunnapa ere manassute amatan-Ne, ²⁹arawe imangitou nama'ungnga Sitou. "Atana'e su tampa ng kami." unni mangitou Sitou, "allo maranite maʔrabi wuʔru maranite marandumma lai." Ne Mawu Yesus sinumuttate manaʔrabi ringanni mangitou. ³⁰Su tempo inuma'ianna su sambau ringanni mangitou umanna, Mawu Yesus nangawakka roti, naadiangkamanna su Mawu Ruata, namesangnga roti ringannu lima-Ne, see nionggolle simangitou. ³¹Wua udde naatutukke imangitou manungku udde Mawu Yesus. Arawe Itou nattingkawuʔi wuassu aellegi mangitou. ³²Unni mangitou sangkatou ringannu waine, "Waʔinewe pendamanna naunggi ite ere ola'u sussarootta, su tempo Itou uahahatto ng kite su tangnga n daʔanna, wuʔru nanaʔa'a n laʔoʔro n Wuke Susi siite?"

³³Orassa udde lai imangitou dirumarisikka see nabelengke watukku Yerusalem. Poiaroddi imangitou naaratingnga sire mapuʔo assa mal-laʔaʔrenggennu Mawu Yesus uaammulla suadio'a ringannu taumata waine. ³⁴Imangitou nabbisara, "Atonna-tonna Mawu nabbiakke apia! Itou suete nattingkapisilo m batangan-Ne si Simon!"

³⁵Rua ng katou mallaʔaʔrenggennu Mawu Yesus apan wakku nirumanta udde nabbati'u lai addapatti mangitou su tangnga n daʔanna, wuʔru ereapa imangitou naaillaʔa Mawu su tempo Itou namesangnga roti.

Mawu Yesus nattingkapisilo m batangan-Ne su mallaʔaʔrenggen-Ne

(Mat. 28:16-20; Mrk. 16:14-18; Yoh. 20:19-23; WMR. 1:6-8)

³⁶Tantaʔanna imangitou ta'e uahahatto, inaʔrombanganne Mawu Yesus sassane nirumarisikka su pattangnganni mangitou wuʔru nabbi-sara, "Paddarame siamiu!"

³⁷Imangitou niʔrumuro wuʔru nata'utta, ana waugu imangitou ma-ssunna imangitou naasilo setanna. ³⁸Arawe Mawu Yesus nabbisara, "Anio iamiu matta'utta? Anio naunggi amiu uapapadua? ³⁹Pa'ellege lima-U wuʔru ledda-U. Asingkatawe manungku indi uarisikka Ia'u sa-ssane! Pangagasse wuʔru panutukke, ana waugu setanna tawe ʔemene ara'e duʔrine, ere iamiu maasilo Sia'u orassa indi."

⁴⁰Mawu Yesus nabbisara aroddi lapiddu namasilo n lima-Ne wuṛṛu ledda-Ne simangitou. ⁴¹Wuṛṛu tantaḷanna imangitou taambe mangngi-manna atonna ana waugu tumanite n lulluassa wuṛṛu naherangnga, Mawu Yesus naiwaḷo simangitou, "Iamiu pia anna isindi?" ⁴²Imangitou nangonggolu inassa horengnga sanduru. ⁴³Mawu Yesus nanengkamma inassa udde see inumante su saruanni mangitou.

⁴⁴Wua udde Itou nabbisara simangitou, "Ete indi manga inolaanna apan suete Ta'u niwaḷo siamiu su tempo Ia'u ta'e su sambau ringanni amiu manungku manga inolaanna apan uawoṛṛetta matataṛṛino Sia'u sulaḷummu manga wuke Musa, Manga Nabi, wuṛṛu Mazmur, ṛinone matipussa."

⁴⁵Wua udde Mawu Yesus nanualaga ṛingiṛṛanni mangitou ana see maasunna pandumannu Wuke Susi. ⁴⁶See Itou nabbisara simangitou, "Sulaḷummu Wuke Susi uawoṛṛetta manungku Ratu m Punnu Saḷamatta ṛinone matataṛṛangnga, wuṛṛu sarun mabangunna apia wuassu papate su allo atallune. ⁴⁷Wuṛṛu lai manungku ringannu arannu Ratu m Punnu Saḷamatta udde ṛinone iwatti'a su anambo n pabbawalaga manungku ṛinone taumata mawaḷu wuassu rosane, wuṛṛu manungku Mawu Ruata mangampungnga rosa mangitou. Wuṛṛu watti'a udde ṛinone iapasingkatta manattakka wuassu Yerusalem. ⁴⁸Ete iamiu maola'a manga tatialane wuassu sarangkanambone udde. ⁴⁹Wuṛṛu Ia'u sassane sarun mandolokka ringanni amiu apa apan suete pina'ire n Iamangnga. Arawe iamiu ṛinone marṛado su soa indi ma'oma n sara taṛṛino wuassu Mawu Ruata mannilla'uppa siamiu."

Mawu Yesus nasengkengnga watukku surga

(Mrk. 16:19-20; WMR. 1:9-11)

⁵⁰Wua udde Mawu Yesus nangapidde mangitou sinumabangnga wuassu soa nadatingngu Betania. Isudde Itou namatte n lima-Ne, see nangaḷamatta simangitou. ⁵¹Tantaḷanna Itou mangngaḷamatta, Itou nasengkengnga watukku surga, see narṛae wua dinganni mangitou. ⁵²Imangitou inumaḷintuda nassubba Sitou, wua udde nabelengke su Yerusalem ringannu naungnga lulluassa atonna, ⁵³wuṛṛu sidutu maḍalo Mawu Ruata su Waḷe Mawu.

WATTI'U AĀĀLUASSA APAN NIAPASINGKATTI YOHANES

WISARA TALAANE

SulaĀummu Watti'u AĀĀluassa apan niapasingskatti *Yohanes* indi, Mawu Yesu niapaasingkatta ere sangkatou Rengetannu Mawu Ruata apan awasa apan naola'a taumata wuĀu natana'a su runia ringanni ite. Ere lai suete niwaĀo su wuke indi, Watti'u AĀĀluassa indi niwoĀetta ringannu pandumma tadea'u manga mabawasane wotongge mangngimanna manungku ete Mawu Yesu Ratu m Punnu SaĀamatta apan pina'ire - Itou Ana'u Mawu Ruata sassane. WuĀu lai tadea'u ringannu mangngimanna Sitou imangitou maasomba wiakka (20:31).

Napawe su paarorone apan namasingkatta manungku Rengetannu Mawu Ruata apan awasa udde eteudde Mawu Yesu, wageangge paarorone su wuke indi mabatti'u aĀawo'u aĀaĀrindu'a apan niola'u Mawu Yesu. Manga aĀaĀrindu'a udde napaalĀatta'a manungku ete Mawu Yesu udde Ratu m Punnu SaĀamatta apan pina'ire, Itou Ana'u Mawu Ruata. Sambau-sambau su ola'u aĀaĀrindu'a indi, pia lai manga pagahahatto Mawu Yesu ringannu manga taumata. Wuassu manga pagahahatto udde nasemakke apa apan niapaalĀatta'u manga aĀaĀrindu'a udde. SulaĀummu wageangge indi niapaasingkatta lai manungku pia taumata mangngimanna Mawu Yesu wuĀu naola'a mallaĀaĀrrenggen-Ne, arawe piaddu lai mannaĀare Sitou wuĀu maddiri mangngimanna Sitou. Addoanne 13-17 namoĀetta maĀo'engnga su ola'u ereapa paa'aukku Mawu Yesu ringannu mallaĀaĀrrenggen-Ne su tempo ŀabbi napawe Itou sametante, wuĀu ereapa Itou nanaddia wuĀu nanohassa naunggi mangitou su ŀabbi udde. Manga addoanne panginsueanne nanaĀa'a su ola'u ereapa Mawu Yesu nisametta wuĀu niparikisanna, ereapa Itou niarussa, nate wuĀu nabbiakka apia, wuĀu ereapa Itou nattingkapasilo m batangan-Ne su manga mallaĀaĀrrenggen-Ne napawe Itou nabbiakke apia.

Watti'a su ola'u wawine apan niaratinganna sussandaga (8:1-11), nitaĀo su kurungga wahewa, ana wagu manambo woĀetta wuĀu

manga wuke niaḷinna apan suete nitappassa su tempo rorone tawe nabbati'u watti'a udde, arawe ingana'a waine namoḷḷretta su aḷawo'u tampa.

Sulaḷummu wukene indi Yohanes mangke manantiro su ola'u aonggolla, eteudde wiakka tutune wuḷḷu maḷannu-ḷannu, apan nionggolu Mawu Ruata sulaḷummi Kristus. Aonggolla udde suete tinattakka su runia, wuḷḷu wotongge apendamannu manga taumata apan mangngimanna Mawu Yesus maola'a laḷanna mattuda Mawu Ruata, ere lai napaaliatta'u Mawu Ruata, wuḷḷu sangkatou apan nangonggolu wiakka. Inanaramanni Yohanes eteudde manga sasanato'a apan nianu wuassu inolaanna miallo-miallo tadea'u mapaaḷiatta'u apapia m pangangimanna, ere: ua'e, roti, asasemakka, mallalu'adda wuḷḷu dombane, punnu anggore wuḷḷu wuane.

Laḷoḷḷone

Panattaḷḷanne	1:1-18
Yohanes Mananaḷḷrani wuḷḷu manga taumata apan paarorone-rorone naola'a mallalaḷḷrenggennu	
Mawu Yesus	1:19-51
Pangangimbe Mawu Yesus su tangnga n laḷoḷḷo n soa	2:1-12:50
Manga allo pangudusanne su Yerusalem wuḷḷu marani n Yerusalem	13:1-19:42
Pabbawangunnu Mawu Yesus wuḷḷu nattingkapisilo m batangan-Ne	20:1-31
Panginsueanne: nattingkapisilo m batangan-Ne lai su Galilea	21:1-25

R̥engetanna apan mangngonggolu wiakka

- 1** Su paarorone, tantaḷanna runia taambe niriaddi, R̥engetanna udde piate.
 R̥engetanna udde su sambau ringannu Mawu Ruata
 wuṛṛu R̥engetanna udde uasuḷunggu Mawu Ruata.
- 2** Ro'e n paarorone Itou su sambau ringannu Mawu Ruata.
- 3** Sarangkanambone niola'a sulaḷummi Tou,
 wuṛṛu wuassu aḷawo'u apan piate,
 tawe saran sambau apan inola'a tawedi Tou.
- 4** R̥engetanna udde punnu wiakka,
 wuṛṛu wiakka udde mannemakka taumata.
- 5** Semakka udde lullansiangnga sulaḷummu ararandumma,
 wuṛṛu ararandumma tawe maapadumma Sitou.
- 6** Nirumantate taumata apan nirolokku Mawu Ruata,
 aranne Yohanes.
- 7** Itou nirumanta mammasingkattu asasemakka udde,
 tadea'u anambo n taumata mangngimanna.
- 8** Itou sassane waḷine asasemakka udde,
 itou tumba'u mabawaḷone.
- 9** Semakka tutune apan mannemakka anambo n taumata,
 nirumanta su runia.
- 10** R̥engetanna piate su runia,
 runia niola'a sulaḷummi Tou,
 arawe runia tawe maailaḷa Sitou.
- 11** Itou nirumanta su wanua-Ne sassane,
 arawe pabbawala-Ge maddiri manarimmatti Tou.
- 12** Arawe pia lai taumata apan manarimmatti Tou
 wuṛṛu mangngimanna Sitou;
 imangitou nionngoḷannu taṛṛino maola'a ana'u Mawu Ruata,
- 13** apan niasungkangnga waḷine wuassu taumata,
 ana waugu wiakka wakku udde punnene wuassu Mawu Ruata.
- 14** R̥engetanna naola'e taumata,
 Itou uatana'a su wallatti ite,
 wuṛṛu iite suete naasilo awawantu-Ge.
 Awawantuga udde suete sinengkammi Tou
 ana waugu Itou Ana'u Iamangnga tinggassa.
 Sulaḷummi Tou iite naasilo Mawu Ruata
 wuṛṛu darangngu-Ne siite.
- 15** Yohanes nirumanta naola'a tatialane,
 itou mammasingkatta:

"Ete Itou indi apan ta'u iwabbatti'a:
Itou sarun rumanta, nasalimmuri wuassia'u,
arawe magewalanna wuassia'u,
ana waugu tantałanna ia'u taambe,
Itou nirumantate."

¹⁶Itou napene n darangngu;

tawe illołone,

Itou mangngałamatta siite.

¹⁷Tita Mawu, nisengkammi ite wuassi Musa.

Arawe darangngu wurru tatałantupu Mawu Ruata

niapaalatta'a sulałummi Yesus Kristus.

¹⁸Tawe saran sangkatou apan suete naasilo Mawu Ruata,

tumba'u ana'u lamangnga tinggassa,

apan uasulunggu lamangnga wurru uaauka atonna ringanni Tou.

Ete Itou apan napaalatta'u lamangnga siite.

Tatiala n Yohanes

(Mat. 3:1-12; Mrk. 1:1-8; Luk. 3:1-18)

¹⁹Manga piarra'u Yahudi su Yerusalem nandolokku manga imam wurru manga taumata n Lewi inai ringanni Yohanes wurru naiwało sitou, "I'o indi isai?"

²⁰Yohanes nanga'u atonna-tonna, "Ia'u waline Ratu m Punnu Sałamatta."

²¹"Amungkangngu aroddi, i'o isai?" aiwało mangitou. "Apa i'o Elia?"

"Waline," sasimbakki Yohanes.

"Apa i'o sangkatou Nabi?" aiwało mangitou apia.

"Waline," sasimbakki tou.

²²"Amungkangngu aroddi, wałoa'e siami isai i'o indi," unni mangitou, "tadea'u iami wotongnge sumimbakka aiwało manga taumata apan nandolokki ami. Apa wisaranu su ola'u ririnu sassane?"

²³Yohanes sinumimbakka, "Ete ia'u apan niapaasingkatti Nabi Ye-saya:

"Taumata apan u'aljata su wadda'a:


Ratarra'e lałanna amatannu Mawu."

²⁴Manga taumata apan nirolokku taumata n Farisi, ²⁵naiwało, "Amungkangngu i'o waline Ratu m Punnu Sałamatta, waline Elia, waline lai sangkatou Nabi, anio i'o mannařrani?"

²⁶Yohanes sinumimbakka, "Ia'u mannařrani ringannu ua'e. Arawe su pattangnganni amiu pia taumata apan tawe aillałanni amiu. ²⁷Itou

nirumanta saļimmurine wuassia'u, arawe mamu'a taļi n sapatu-Ne lai ia'u tawe wotongnge."

²⁸Sarangkanambone udde nariaddi su Betania, samba'a n ra'i n Saļukku Yordan, su tampa n Yohanes mannařrani.



Soa n Yerusalem (1:19)

Ana'u Domba Mawu Ruata

²⁹Su allo tiřrabbine, Yohanes naasilo Mawu Yesus nirumanta ringanni tou. See Yohanes nabbisara, "Pa'ellega, eteudde Ana'u Domba Mawu Ruata apan namappassa rosa n runia indi. ³⁰Ete Itou apan ta'u iwabbatti'a apan nirumanta murine wuassia'u, arawe maggewaļanna wuassia'u, ana waugu ia'u taambe niasungkangnga, Itou uddete su runia. ³¹Su paarorone, ia'u wagga isai Itou udde. Sumbaļi ia'u nirumanta mannařrani ringannu ua'e, tadea'u taumata n Israel maailaļa Sitou."

³²Yohanes nangagillu lai tatiala indi, "Ia'u naasilo Ghařraho Mawu Ruata niumontu'a ere manu'a merpati wuassu langitta see nangintarřo Sitou. ³³Tempo udde ia'u ta'e wagga isai Itou. Arawe Mawu Ruata apan nandolu'u manarřani ringannu ua'e suete nabbisara sia'u, 'Napawe i'o maasilo Ghařraho Mawu Ruata niumontu'a, see matana'a mangintarřo su sangkatou, ete Itou apan manarřani ringannu Ghařraho Mawu Ruata.' ³⁴Ia'u suete naasilo sassane," unni Yohanes, "wuřru ia'u mangonggolu tatiala manungku ete Itou Ana'u Mawu Ruata."

Manga mallaḷarḷrengennu Mawu Yesus paarorone

³⁵Su allo tiḷḷabbine Yohanes su tampa udde lai ringannu rua ng katou mallaḷarḷrengenne. ³⁶Napawe itou naasilo Mawu Yesus sinumabbi, itou nabbisara, "Pa'ellega! Eteudde Ana'u Domba Mawu Ruata."

³⁷Rua ng katou mallaḷarḷrengenni Yohanes naaringikka manga watti'a udde, see inaitte tinumantalongnga Mawu Yesus. ³⁸Mawu Yesus nanaile su liudde, wuḷḷu naasilo simangitou uatantalongnga Sitou, Itou naiwaḷo, "Iamiu maddea'a apa?"

Imangitou sinumimbakka, "Rabi, Rabi uatana'a suapa?" (Wisara 'Rabi' atappasanne huru.)

³⁹"Wette pa'ellege sassane," unnu Mawu Yesus. Imangitou inaitte su sambau ringanni Tou ma'ellega suapa Itou uatana'a. Orassa udde puulle appatta wawallo. Allo udde imangitou uatana'a su sampunna ringanni Tou.

⁴⁰Sangkatou su wallatti tarua apan suete naaringikka apa apan iwabatti'i Yohanes wuḷḷu see inaitte tinumantalongnga Mawu Yesus, eteudde Andreas, tuḷḷranggi Simon Petrus. ⁴¹Maḷiha-ḷihakka Andreas naddea'a si Simon, tuḷḷrangge, wuḷḷu nabbisara sitou, "Iami suete nassomba Mesias!" (Mesias nassuḷunggi Kristus, eteudde: Ratu m Punnu Saḷamatta.) ⁴²Andreas nanguntudi Simon ringannu Mawu Yesus.

Mawu Yesus nanutuda si Simon, see nabbisara, "I'o Simon, ana'i Yona. I'o sarun isago Kefas." (Kefas uasuḷunggi Petrus, atappasanne: wowo m batu.)

Mawu Yesus namaggo si Filipus wuḷḷu si Natanael

⁴³Su allo tiḷḷabbine Mawu Yesus naḷḷawessa inai watukku Galilea. Itou nassomba m Filipus, wuḷḷu nabbisara sitou, "Wette tantalongke Sia'u!" ⁴⁴Filipus inasapputanne wuassu Betsaida, eteudde tampa atata-naanni Andreas wuḷḷu Petrus. ⁴⁵Filipus nassomba Natanael wuḷḷu nabbisara sitou, "Iami suete nassomba n taumata apan iwabaḷo Musa su-laḷummu Wuke n Tita Mawu Ruata, wuḷḷu niapaasingkattu manga nabi. Itou eteudde Mawu Yesus wuassu Nazaret ana'i Yusuf."

⁴⁶Arawe Natanael sinumimbakka, "Wotongngewe sambau apapia rumanta wuassu Nazaret?"

"Wette pa'ellega sassane," sasimbakki Filipus.

⁴⁷Mawu Yesus naasilo si Natanael nirumanta, see nabbisara su ola'i tou, "Pa'ellega, udde taumata n Israel tutune. Tawe awusune itou."

⁴⁸"Ereapa Iamangnga maaillaḷa sia'u?" aiwaḷo Natanael su Mawu Yesus.

Mawu Yesus sinumimbakka, "Tantaḷanna Filipus taambe namaggo si'o, Ia'u naasilote si'o su aḷungngu alu ara udde."

⁴⁹"Iamangnga Huru," unni Natanael, "Iamangnga eteudde Ana'u Mawu Ruata! Ete Iamangnga Ratu m pabbawalagu Israel!"

⁵⁰Mawu Yesus nabbisara, "I'o mangngimanna, tumba'u ana waugu Ia'u nabbisara manungku Ia'u naasilote si'o su aḷungngu alu ara udde? Manga inolaanna apan maggewaḷanna wuassu inolaanna udde sarun asiloannu!" ⁵¹Mawu Yesus nabbisara apia, "Atonna, pangimante, i'o sarun maasilo langitta mawu'a, wuḷḷu manga mala'ekattu Mawu Ruata uapapaḷele ringannu Ana'u Taumata."

Andeangngu awingnga su Kana

2 Rua allo wua udde pia andeangngu awingnga su soa n Kana su Galilea, wuḷḷu inangngu Mawu Yesus isudde lai. ²Mawu Yesus wuḷḷu mallaḷaḷḷenggen-Ne niwaḷoanna lai su andeangnga udde. ³Napawe ang-gore nasuete, inangngu Mawu Yesus nabbisara Sitou, "Imangitou niasueannu anggore."

⁴Mawu Yesus sinumimbakka, "Inangnga, arie mandolo-U. Taambe tempone Ia'u mapaaliatta'u riri-U."

⁵Arawe inangngu Mawu Yesus nabbisara su mangangimbe, "Tuḷḷutte apa apan irolokki Tou siamiu."

⁶Isudde pia annumma wensada apan nissaddia pangangukkasanna tumuḷḷuttu inanaramannu Yahudi. Wensada udde sambau-sambau irarḷangngo loḷḷone marḷasutta su liteḷḷene. ⁷Mawu Yesus nabbisara su mangangimbe udde, "Loḷḷoite ng kua'e manga wensada udde." Imangitou nalloḷḷote na'oma n sara napene-pene. ⁸See Mawu Yesus nabbisara simangitou, "Orassa indi pangabbate ua'e adio'a wuḷḷu apira'e su piaḷḷa'u andeangnga." Imangitou nangapiddu ua'e udde su piaḷḷa'u andeangnga, ⁹wuḷḷu itou naatemma ua'e apan nawaḷute anggore udde. (Itou wagga wuassuapa anggore udde, tumba'u manga mangangimbe apan nallaḷḷinu anggore udde masingkatta.) Ne, piaḷḷa'u andeangnga udde nangundani maa'awingnga esakka, ¹⁰see nabbisara sitou, "Wiasane taumata mannaru n anggore apianne paarorone wuḷḷu napawe manga raho nawusate ma'inumma, wakkute udde anggore wiasa isaru. Arawe tuḷḷangnga nanahipunna anggore apan apianne sara n orassa indi!"

¹¹Eteudde aḷaḷḷindu'a paarorone apan niola'u Mawu Yesus. Itou na'ola'a udde su wanua Kana su Galilea. Ringannu tanda udde Itou mapaaliatta'u awawantu-Ge. Ne mallaḷaḷḷenggen-Ne nangimante Sitou.

¹²Wua udde Mawu Yesus inaité watukku Kapernaum su sampunna ringannu inang-Nge, manga turrang-Nge see manga mallajarrengen-Ne. Imangitou natana'a poiaroddi manga pira allo alannune.

Mawu Yesus sinumutta su Waļe Mawu

(Mat. 21:12-13; Mrk. 11:15-17; Luk. 19:45-46)

¹³Napawe Allo Wahewa m Paskah Yahudi maranite, Mawu Yesus inaité watukku Yerusalem. ¹⁴Su Waļe Mawu su Yerusalem Itou naaringnga mabawaļu'u sapi, domba, wuřru manga manu'a merpati; wuřru lai manga mananu'addu roitta ua'ianna isudde. ¹⁵Mawu Yesus na'ola'a sambokka wuassu taļi wua udde nallimbuakka anambo n winatanga udde, mawae domba ara'e sapi, wuassu laļummu Waļe Mawu. Manga medda mananu'addu roitta niwaļinsuang-Nge na'oma n sara roitti mangitou nassaļawukka. ¹⁶See Itou nabbisara su mabawaļu'u manu'a merpati, "Pangingkatta wua isindi. Arie Waļe n Iamang-Ku maola'a tampa m pabawaļu'anna!" ¹⁷Ne manga mallajarrengen-Ne naanaungnga wageanggu Wuke Susi ereindi, "Naung-Ku su Waļe-Nu, o Mawu Ruata, maatutungnga naung-Ku."

¹⁸Manga tembonannu Yahudi sussimbakka Mawu Yesus, unni mangitou, "Annama'a pa'ola'a alarřindu'a maola'a sambau tatiala siami manungku I'o pia tarřino ma'ola'a ereindi."

¹⁹Mawu Yesus sinumimbakka, "Hoharřa'a Waļe indi, wuřru sulaļummu tallu allo Ia'u sarun mapararisikka apia."

²⁰See imangitou nabbisara, "Appattu puļo annumma su tonnane nipaatta mapararisikku Waļe Mawu indi. Wuřru I'o sarun mapararisikka apia sulaļummu tallu allo?"

²¹Arawe Waļe Mawu apan su pandummu Mawu Yesus eteudde wadang-Nge sassane. ²²Wua udde, napawe Mawu Yesus niapawangunna wuassu papate, naanaungke manga mallajarrengen-Ne manungku hatto udde suete niapasingkatti Tou. Ne imangitou nangimante apa apan uaworřetta sulaļummu Wuke Susi wuřru apa apan niapaasingkattu Mawu Yesus.

Mawu Yesus masingkattu anambo n taumata

²³Tantaļanna Mawu Yesus ta'e su Yerusalem, su tempo n Ramea m Paskah, manambo taumata mangngimanna Sitou ana waugu manga

aļarřindu'a apan suete niolang-Nge. ²⁴Arawe Mawu Yesus tawe mangngimanna simangitou, ana waugu Itou masingkattu anambo n taumata. ²⁵Taumata salaiwe tate manala'a Sitou su ola'u isai-sai, ana waugu Itou sassane masingkatta apa apan uatarřo su naungngu taumata.

Mawu Yesus wuřru Nikodemus

3 Pia sangkatou piařra'u agama wuassu taumata n Farisi aranne Nikodemus. ²Su sambau řabbi itou nirumanta ringannu Mawu Yesus wuřru nabbisara, "Iamangnga Huru, iami masingkatta Iamangnga nirolokku Mawu Ruata. Ana waugu tawe saran sangkatou apan wotongnge ma'aola'a tanda maarřindu'a ere niola'u Iamangnga, amungkanngnu Mawu Ruata tawe uarřundinganna sitou."

³Mawu Yesus sinumimbakka, "Pangimante, tawe saran sangkatou apan wotongnge maola'a lařořo n araratuannu Mawu Ruata, amungkanngnu itou tawe iasungkanngnga apia."

⁴"Ratadde taumata timmaddete wotongnge iasungkanngnga apia," sasimbakki Nikodemus su Mawu Yesus, "Wotongnge itou mabelengnga apia sulařummu illořo inangngene wuřru see iasungkanngnga apia?"

⁵Mawu Yesus sinumimbakka, "Atonna-tonna wisara'u indi: amungkanngnu taumata tawe iasungkanngnga wuassu ua'e wuřru Gharřaho Mawu Ruata, taumata udde tawe mawaļi su reengannu walagu Mawu Ruata. ⁶Taumata su ola'u wadangnge niasungkanngnu hagurangnga, arawe su pangangimanna niasungkanngnu Gharřaho Mawu Ruata. ⁷Arie paaherangnga amungkanngnu Ia'u mabbisara: iamiu sarangkanambone řinone iasungkanngnga apia. ⁸Anginna tuttiupa watukkuapa ipaapuļune; iite maaringikka tingikke, arawe iite wagga wuassuapa rarantane wuřru watukku apa amatanne. Aroddi lai taumata apan niasungkanngnu Gharřaho Mawu Ruata."

⁹"Ereapa udde wotongnge mariaddi?" aiwaļo Nikodemus.

¹⁰Mawu Yesus sinumimbakka, "I'o huru su Israel; řatadde i'o wagga? ¹¹Pangimante: iami mabbisara tumba'u apa apan asingkatanni ami, wuřru iami mattiala tumba'u su ola'u apa apan niasiloanni ami; arawe iamiu maddiru mangngimanna tatiala wuassi ami. ¹²Iamiu tawe mangngimanna amungkanngnu ia'u mabatti'a siamiu su ola'u inolaannu runia indi; ereapa iamiu wotongnge mangngimanna, amungkanngnu ia'u mabatti'a siamiu su ola'u surga? ¹³Tawe saran sangkatou apan suete nasengkengnga watukku surga, tumba'u Itou apan sinumossokka su runia, eteudde Ana'u Taumata.

¹⁴Ere lai Musa nanduittu atoanna witu'a su alu sambua su wadda'a, aroddi lai Ana'u Taumata rinone iruitta, ¹⁵tadea'u taumata nambo apan mangngimanna Sitou maasomba wiakka tutune wuꞖru saran maꞑannu-ꞑannu."

¹⁶Ana waugu Mawu Ruata aroddi arangngune su taumata n runia indi, na'oma n sara Itou nanantillu Anang-Nge tinggassa, tadea'u suapa n taumata apan mangngimanna Sitou tawe mate, ewe'e maasomba wiakka tutune wuꞖru saran maꞑannu-ꞑannu. ¹⁷Ana waugu Mawu Ruata nandolokku Anang-Nge waꞑine maꞑꞑuunggu runia indi, arawe maꞑamatta runia indi.

¹⁸Taumata apan mangngimanna Sitou tawe irꞑuumanna. Arawe taumata apan tawe mangngimanna suete nirꞑuumannu Mawu Ruata, ana waugu itou tawe mangngimanna Ana'u Mawu Ruata apan tinggassa udde. ¹⁹Itou niapaasaꞑa ana waugu inolaanna indi: Asasemakka udde nirumantate su runia, arawe taumata lembo maapulu n ararandumma wuassu asasemakka, ana waugu pallaꞑagu mangitou laꞑeo. ²⁰Suapa n taumata apan ma'ola'a aꞑaꞑeo, maddiru n asasemakka; tadea'u pallaꞑagune apan laꞑeo tawe asiloanna. ²¹Arawe taumata apan tutuꞑꞑutta apulu Mawu Ruata, nirumanta ringannu asasemakka tadea'u lumiatta'a manungku aꞑawo'u inolaanne udde tumuꞑꞑutta apulu Mawu Ruata.

Mawu Yesus wuꞖru Yohanes Mananꞑꞑani

²²Wua udde Mawu Yesus wuꞖru mallaꞑaꞑꞑenggen-Ne inaitte watukku Yudea. Itou natana'a poiaronddi manga pira allo aꞑannune ringanni mangitou wuꞖru mananꞑꞑani. ²³⁻²⁴Su tempo udde Yohanes Mananꞑꞑani taambe sinumutta su tutuꞑꞑanna. Itou mananꞑꞑani su Aion, tawe marau wuassu Salim, ana waugu poiaronddi manambo ua'e. Manga taumata nirumanta ringanni tou, ne itou nananꞑꞑanite simangitou.

²⁵Manga sire pira mallaꞑaꞑꞑenggeni Yohanes mannatakke uata-tiakka ringannu taumata n Yahudi su ola'u atorannu pamamaresi. ²⁶Imangitou inaitte ringanni Yohanes, wuꞖru nabbisara, "Iamangnga Huru, Iamangnga ta'e maanaungnga taumata apan su sambau ringannu Iamangnga su samba'a n Saꞑukku Yordan udde, apan tina'e n Iamangnga dorone? Itou orassa indi lai mananꞑꞑani wuꞖru manambo taumata rudanta ringanni tou!"

²⁷Yohanes sinumimbakka, "Taumata tawe maatahuanna aꞑawo'a amungkangngu tawe ionggolu Mawu Ruata sitou. ²⁸Iamiu sassane suete naaringikka sia'u nabbisara, 'Ia'u waꞑine Ratu m Punnu Saꞑamatta. Ia'u nirolokka malliu ꞑoro Sitou.' ²⁹Maa'awingnga wawine tatahuannu

maa'awingnga esakka. Hawe maa'awingnga esakka udde tumba'u uarisikka su sandiranne wuṛṛu uararingikka, wuṛṛu itou lulluassa napawe naaringikke tingikku maa'awingnga esakka. Aroddi lai ia'u. Orassa indi ia'u lembo n lulluassa. ³⁰Ete Itou apan ṛinone magewaḷanna, wuṛṛu ia'u maadio'anne."

Itou apan nirumanta wuassu surga

³¹Apan nirumanta wuassu atanggaṛanne nangillembo wuassu sarangkanambone. Apan nirumanta wuassu runia nareengnga taumata n runia, wuṛṛu uahahatto m pallaḷagu runia. Itou apan nirumanta wuassu atanggaṛanne nangilembo wuassu sarangkanambone. ³²Itou mabbisara su ola'u apa apan suete niasiloanna wuṛṛu niaringiranne, arawe tawe saran sangkatou apan mangngimanna tatiala-Ne. ³³Taumata apan mangngimanna tatiala-Ne udde, mangnga'u manungku Mawu Ruata udde atonna. ³⁴Ana waugu taumata apan nirolokku Mawu Ruata mabatti'u wisara Mawu Ruata, ana waugu Ghaṛṛaho Mawu Ruata suete nionggolla Sitou sarangkanambone. ³⁵Iamangnga mandangngu Anang-Nge, wuṛṛu suete nanantillu taṛṛino Sitou. ³⁶Taumata apan mangngimanna Ana'a udde saru maasomba pabbawiakka tutune wuṛṛu saran maḷannu-ḷannu. Arawe taumata apan tawe madingikka Ana'a udde tawe maasomba wiakke. Itou irruumannu Mawu Ruata sarangkaḷo'engnge.

Mawu Yesus wuṛṛu wawine n Samaria

4 Manga taumata Farisi naaringikka manungku Mawu Yesus naasomba wuṛṛu mannaṛrani mannamboanne wuassu mallaḷaṛṛenggenni Yohanes. (2Mawu Yesus sassane tawe mannaṛrani ewe'e tumba'u mallaḷaṛṛenggen-Ne.) ³Napawe Mawu Yesus naasingkatta manungku manga taumata n Farisi naaringikke olangnge udde, Itou inaitte wuassu Yudea mabelengnga watukku Galilea. ⁴Sulaḷummu amatan-Ne udde Itou ṛinone sumabbi Samaria. ⁵Ne na'omate Mawu Yesus su sambau soa su Samaria aranne Sikhar, tawe marau wuassu leta'a apan paarorone nionggolli Yakub su anangnge Yusuf. ⁶Isudde pia paṛrihi n Yakub. Mawu Yesus naḷoḷote u'amatta, ana waugu udde Itou inuma'ianna su winggi m paṛrihi. Tempo udde irarṛangngo puulla mapuḷo dua allattune, ⁷⁻⁸wuṛṛu mallaḷaṛṛenggennu Mawu Yesus inaitte aroddi su soa mamalli anna.

Wua udde sangkatou wawine n Samaria nirumanta mania ua'e, Mawu Yesus nabbisara sitou, "Inangnga, wotongnge Ia'u madorongnga ma'inumma?"

⁹Wawine n Samaria udde sinumimbakka, "Mawu taumata n Yahudi, ia'u taumata n Samaria; anio Mawu madorongnga ma'inumma ua'e wuassia'u?" (Ana waugu taumata n Yahudi tawe padaramene su taumata n Samaria.)

¹⁰Mawu Yesus sinumimbakka, "Unnu wisara i'o masingkattu aong-golu Mawu Ruata wuṛṛu isai madorongnga ma'inumma ringannu, i'o sassane lai sarun madorongnga sitou ma'inumma, wuṛṛu itou sarun mangonggola si'o ua'e apan wiakka."

¹¹Wawine udde nabbisara, "Mawu tawe sasia, wuṛṛu paṛṛihi indi tu-manite maḷaḷumma. Wuassuapa Mawu maasomba ua'e apan wiakka udde? ¹²Yakub, iamangngi ami aḷamona, nanantillu paṛṛihi indi siami. Itou sassane mangngalappa ua'e wua isindi; aroddi lai manga aḷaṛṛanangnge see manga winatangnge. Apa Mawu massunna manungku Mawu magewaḷanna wuassi Yakub?"

¹³"Taumata apan ma'inumma ua'e indi sarun marou apia," wisara Mawu Yesus, ¹⁴"arawe taumata apan ma'inumma ua'e apan Ta'u ionggolla, itou tawe marou saran maḷannu-ḷannu. Ana waugu ua'e apan sarun Ta'u ionggolla udde maola'a aḷimata ng kua'e sulaḷummu wadangnge apan sumabangnga su liudde wuṛṛu mangonggolla sitou wiakka tutune wuṛṛu sara maḷannu-ḷannu."

¹⁵Wisara n wawine udde, "Mawu, ia'u onngoḷe ng kua'e udde, tadea'u ia'u tate lai marou; wuṛṛu tate mabelengnga isindi mania ua'e."

¹⁶"Roote, waggioi awingngu, see pabelengnga apia isindi," unnu Mawu Yesus.

¹⁷"Ia'u tawe awingngu," sasimbakku wawine udde.

"Atonna wisaranu," unnu Mawu Yesus. ¹⁸"Ana waugu i'o suete naawingnga paḷima, wuṛṛu esakka apan mabbiakka su sampunna ringannu orassa indi waḷine awingngu."

¹⁹"Orassa indi ia'u naasingkatte Mawu sangkatou nabi," unnu wawine udde. ²⁰"Iupungngu aḷamona ng kami massubba Mawu Ruata su wuidda indi, arawe walagu Mawu mabbisara manungku tumba'u su Yerusalem tampane taumata massubba Mawu Ruata."

²¹"Pangimante," unnu Mawu Yesus sitou, "su sambau tempo taumata sarun massubba Iamangnga, waḷine lai su wuidda indi, wuṛṛu waḷine lai su Yerusalem. ²²Iamiu taumata n Samaria massubba apa apan awagananni amiu, arawe iami taumata n Yahudi massubba Sitou apan asingkatanni ami, waugu asasaḷamatta darantane wuassu taumata n Yahudi. ²³Arawe tempone sarun rumanta, nirumantate, manungku ringannu taṛṛino Ghaṛṛaho Mawu Ruata manga taumata saru massubba

Iamangnga maola'a Mawu Ruatane apan atonna ere lai ipaapulu n Iamangnga. ²⁴Ana waugu Mawu Ruata udde Gharraho, wuṛṛu tumba'u ringannu tarṛino n Gharraho Mawu Ruata manga taumata wotongnge massubba Iamangnga ere lai su olangnge udde."

²⁵Wawine udde nabbisara Mawu Yesus, "Ia'u masingkatta Ratu m Punnu Saḷamatta (apan isassago Kristus) sarun rumanta. Amungkangngu Itou rumanta, Itou sarun mamasingkattu aḷawo'u watti'a siite."

²⁶"Ete Ia'u Itou," unnu Mawu Yesus, "Ia'u apan orassa indi tantaḷanna uahahatonu."

²⁷Su tempo udde manga mallaḷarṛenggennu Mawu Yesus nabe-lengke. Imangitou tinumiangnga naasilo Mawu Yesus uahahatto n sangkatou wawine. Arawe tawe saran sangkatou wuassu wallati mangitou apan naiwaḷo wawine udde, "Inangnga mappandumma apa?" ara'e maiwaḷo Mawu Yesus, "Anio Iamangnga uahahatto m wawine udde?"

²⁸Ne wawine udde nanantanggu wensada isudde see tinumaḷangnga watukku soa wuṛṛu nabbatti'a su manga taumata poiaronddi, ²⁹"Wette pa'ellega taumata apan suete namasingkatta sia'u aḷawo'u arariaddianna apan suete niola'u. Asinungka Itou Ratu m Punnu Saḷamatta?" ³⁰Ne manga taumata udde nanantangke n soa see inaite ringannu Mawu Yesus.

³¹Tantaḷanna udde manga mallaḷarṛenggen-Ne nangahe Mawu Yesus umanna. "Iamangnga Huru," unni mangitou, "saḷamatte umanna."

³²Arawe Mawu Yesus sinumimbakka, "Ia'u pia anna, apan awagananni amiu."

³³Ne manga mallaḷarṛenggen-Ne mannattake uaiwaḷo, "Apa pia taumata uaapiddu anni Tou?"

³⁴See Mawu Yesus nabbisara, "Angku eteudde tuttuṛṛutta apulu n Tou apan nadolo-U, wuṛṛu mangnginsue manara apan tinantilli Tou Sia'u. ³⁵Iamiu mabbisara, 'Ete appatu wuḷanna tempo mangitingnga.' Arawe Ia'u mabbisara siamiu: Pa'ellege wawaiḷannu amme maririkke, wotonggete itinganna! ³⁶Taumata apan mangitingnga manattakke manengkamma laḷantakke wuṛṛu mangammulu wuane ipadea'a wiakka tutune wuṛṛu saran maḷannu-ḷannu. Ne taumata apan nangasi'a wuṛṛu taumata apan mangngitingnga wotongnge lumuassa su sambau. ³⁷Sasanato'a indi tawe saḷane, 'Waine mangngasi'a, waine mangngitingnga.' ³⁸Ia'u nandolokki amiu inai mangitingnga su wailla apan tawe nirusahaddi amiu; taumata waine suete nammanara poiaronddi, wuṛṛu iamiu nanengkamma auntunganne wuassu manara mangitou."

³⁹Manambo taumata n Samaria tumana'u soa udde nangimanna Mawu Yesus, ana waugu wawine udde nabbisara, "Itou nabbatti'a sia'u aḷawo'u inolaanna apan suete ta'u inola'a." ⁴⁰Ne napawe manga taumata n Samaria udde nassombate Mawu Yesus, imangitou madorongnga

ringannu sussaḷande tadea'u Itou matana'a ringanni mangitou. Nariaddi Mawu Yesus natana'a isudde rua allo aḷannune.

⁴¹Wua udde niatambanna lai anambone taumata mangngimanna Mawu Yesus ana waugu apa apan niaḷrang-Nge sassane simangitou. ⁴²Imangitou nabbisara wawine udde, "Orassa indi iami mangngimanna, waḷinewe ana waugu wisaranu siami, arawe ana waugu iami sassane suete naaringikka Sitou, wuḷḷu masingkatta manungku Itou atonna Punnu Saḷamattu Runia."

Mawu Yesus napaapia n ana'u mamana n waḷe n araratuanna

⁴³Napawe ruate allo naḷiu uatana'a su Sikhar, Mawu Yesus inaita watukku Galilea. ⁴⁴Mawu Yesus sassane suete nabbisara, "Sangkatou nabi tawe addatanna su wanuane sassane." ⁴⁵Arawe su tempo Itou na'omate su Galilea, manga taumata su Galilea mannoḷoho Sitou ringannu naungnga maḷuassa, ana waugu imangitou su Yerusalem su tempo Allo Wahewa m Paskah, suete naasilo sarangkanambone apan niola'u Mawu Yesus.

⁴⁶Wua udde Mawu Yesus nabelengke watukku Kana su Galilea, isudde Itou suete namaḷu ua'e nabaḷi anggore. Su soa udde pia sangkatou mammamanara n tembonanne, anangnge marada'a su Kapernaum. ⁴⁷Napawe itou naaringikka manungku Mawu Yesus nirumantate su Galilea wuassu Yudea, itou inaita ringannu Mawu Yesus wuḷḷu madorongnga Mawu Yesus rumanta su Kapernaum mapaapia n anangnge apan maranite mate. ⁴⁸Mawu Yesus nabbisara su mammamanara n tembonanne udde, "Amungkangngu iamiu tawe maasilo manga aḷaḷḷindu'a, iamiu tawe mangngimanna."

⁴⁹"Mawu," sasimbakku mammamanara n tembonanne udde, "paahakke rumanta tantaḷanna ana'u taambe nate."

⁵⁰Mawu Yesus nabbisara sitou, "Roote anangngu napiate."

Taumata udde nangimanna wisara Mawu Yesus, see itou napuḷete. ⁵¹Su tangnga n daḷanna manga mangangimbene nirumanta ringanni tou wuḷḷu nabatti'a, "Ana'i Tuangnga napiate."

⁵²See itou naiwaḷo simangitou orassa ereapa ana'a udde mannattake mapia. Imangitou sinumimbakka, "Aḷḷabi irarḷangngo puulla sambau allattune saḷihangnge nawuḷi." ⁵³See iamangngu ana'a udde naanaungnga manungku su orassa udde Mawu Yesus nabbisara sitou, "Anangngu napiate." Ne itou wuḷḷu anambo n laḷoḷḷo n waḷene nangimante Mawu Yesus.



Sambau laʔanna su soa n Yerusalem (5:1)

⁵⁴Eteudde aʔaʔrindu'a aruane apan niola'u Mawu Yesus su Galilea napawe Itou nirumanta wuassu Yudea.

Pangangapia su li'u m Betesda

5 Wua udde pia ramea n Yahudi, ne Mawu Yesus inaite watukku Yerusalem. ²Su Yerusalem marani "Ngara n Domba" pia sambau li'u, apan su wisara n Ibrani isassago Betesda. Isudde pia lima panumbaʔe. ³Su manga panumbaʔe udde manambo taumata marada'a uaʔallowangnga, piaddu wuta, piaddu u'ento, wuʔru pia lai lome. [Imangitou sarangkanambone uaraʔraddo ua'e n li'u udde umio'a. ⁴Ana wangu wiasane mala'ekattu Mawu sussosokka su li'u udde wuʔru mangngio'u ua'ene. Wuʔru taumata marada'a apan paarorone uinurumma sulaʔummu li'u udde su tempo ua'e rudaʔua'a, sarun mapia wuassu radangge.] ⁵Su tampa udde pia sangkatou esakka apan marada'a tallute m puʔo uaʔu su tonnane aʔannu'e. ⁶Mawu Yesus naasilo sitou

uaꞑallowangnga poiaroddi, wuꞑꞑu masingkatta manungku itou maꞑannute marada'a; ne Mawu Yesus naiwaꞑo sitou, "I'o maapulu iapaapia?"

⁷Taumata marada'a udde sinumimbakka, "Iamangnga, tawe taumata isindi mapasutta'u sulaꞑummu li'u napawe ua'ene rudaꞑua'e. Wuꞑꞑu tantaꞑanna ia'u mattuda n li'u, taumata waine niumurumpe rorone."

⁸Ne Mawu Yesus nabbisarate sitou, "Pabbangunte, lappute wilannu wuꞑꞑu apuꞑete." ⁹Su tempo udde lai taumata udde napia. Itou nallapute wilanne wuꞑꞑu inumamate.

Olangnge udde nariaddi su allo n Sabatta. ¹⁰Ana waugu udde manga tembonannu Yahudi nabbisara taumata apan wakkute napia udde, "Allo indi allo n Sabatta. I'o tawe wotongnge mallapu wilannu."

¹¹Arawe taumata udde sinumimbakka, "Taumata apan napaapia'u tanginna nandolokka nallapu wilatta wuꞑꞑu ia'u niapaamatta."

¹²"Isai itou apan nandolokku mallapu wilannu wuꞑꞑu niapaamatta?" aiwaꞑo mangitou.

¹³Arawe taumata apan napiate udde wagga isai taumatane, ana waugu Mawu Yesus nattingkawuꞑite su wallattu taumata nambo isudde.

¹⁴Wua udde Mawu Yesus nassomba n taumata udde sulaꞑummu Waꞑe Mawu, wuꞑꞑu nabbisara sitou, "Orassa indi i'o napiate. Ariꞑ pa'ola'a rosa apia, tadea'u tawe mamendamma rada'a lembo n araꞑeoanne."

¹⁵Ne taumata udde napuꞑete see namasingkatta su tembonannu Yahudi manungku ete Mawu Yesus napaapia n tou. ¹⁶Wuꞑꞑu ana waugu udde imangitou mannattakke mapaasusa Mawu Yesus ana waugu Itou mapaapia n taumata su allo n Sabatta.

¹⁷Arawe Mawu Yesus nabbisara simangitou, "Iamang-Ku sidutu mammanara sara orassa indi, wuꞑꞑu Ia'u lai mammanara."

¹⁸Manga wisara udde naaola'a manga tembonannu Yahudi mangke maddea'a mamate Sitou. Imangitou na'ola'a aroddi, waꞑine tumba'u ana waugu Itou nilumawanna Tita n agama su ola'u allo n Sabatta, arawe ana waugu Itou lai nabbisara manungku Mawu Ruata udde Iamang-Nge; atappasanne Itou mannuꞑunggu watangan-Nge ringannu Mawu Ruata.

Taꞑꞑino n Ana'a

¹⁹Mawu Yesus sinumimbakka su manga taumata udde arendi, "Pangimante, Ana'a tawe mapa'ola'a aꞑawo'u inolaanna ringannu taꞑꞑino-Ne sassane. Itou tumba'u maaola'a apa apan niasiloanni Tou niola'u Iamang-Nge. Ana waugu apa apan niola'u Iamangnga, udde lai a'olaannu Ana'a. ²⁰Ana waugu Iamangnga mandangngu Ana'a wuꞑꞑu manantiro Sitou aꞑawo'u inolaan-Ne sassane. Ewe'e lai Iamangnga sa-

run manantiro Sitou manga inolaanna apan magewaḷanna lai ma'oma n sara iamiu tumiangnga. ²¹Iamangnga udde mapaawangunnu taumata nate, wuḷḷu mangngonggolu wiakka tutune wuḷḷu maḷannu-ḷannu; aroddi lai Ana'a mangngonggolu wiakka tawe panginsueanne su taumata apan maapulu onggolaḷannu wiakka. ²²Iamangnga sassane tawe makkuungngi sai-sai. Anambo n taḷḷino ipakkuungnga suete tinantilla su Anang-Nge. ²³Iamangnga na'ola'a udde tadea'u anambo n taumata mangngaddatta Ana'a ere lai imangitou mangngaddatta Iamangnga. Taumata apan maddiri mangngaddatta Ana'a maddiri lai mangngaddatta Iamangnga apan nandolokku Ana'a.

²⁴Mangke atonna manga wisara-U indi: Taumata apan madingrikka manga wisara-U wuḷḷu mangngimanna Sitou apan nandolo-U, maatahuanna wiakka tutune wuḷḷu saran maḷannu-ḷannu. Itou tawe iḷḷuumanna; itou naḷiute wuassu papate wuḷḷu naaba'e wiakka. ²⁵Pangimante: Sarun rumanta tempone - ewe'e nia'omante lai tempone - taumata nate sarun maddingrikka tingikku Ana'u Mawu Ruata. Wuḷḷu taumata apan maddingrikka sarun masaḷamatta. ²⁶Ere lai Iamangnga sassane punnu wiakka, Itou na'ola'a Anang-Nge lai punnu wiakka. ²⁷Itou suete nangonggolla su Anang-Nge taḷḷino ipakuungnga, ana waugu Itou Ana'u Taumata. ²⁸Arie iamiu tumiangnga maaringikka manga olangnge indi, ana waugu tempone sarun a'omanna manungku taumata nambo apan natete maaringikka tingikke, ²⁹see sumabangnga wuassu laḷabinganna. Taumata apan suete na'ola'a apapia sarun mabangunna mabbiakka. Arawe taumata apan suete na'ola'a aḷaḷeo sarun mabangunna wuḷḷu iḷḷuumanna."

Manga tatiala su ola'u Mawu Yesus

³⁰"Ia'u tawe mapa'ola'a manga apa wuassu apulu-U sassane. Ia'u tumba'u makkuungnga wuassu parenta Mawu Ruata. Wuḷḷu Ia'u maḷḷawessa tawe saḷane, ana waugu Ia'u tawe tumuḷḷrutta apulu-U sassane, arawe apulu n Iamangnga apan nandolo-U.

³¹Unnu wisara Ia'u mangngagillu tatiala su ola'u riri-U sassane, tatiala udde tawe apangimananna. ³²Arawe pia taumata waine apan mangngagillu tatiala su ola'u riri-U, wuḷḷu Ia'u masingkatta manungku tatialane udde atonna. ³³Iamiu suete nandolokku daroloḷḷanna ringanni Yohanes, wuḷḷu itou suete nangagillu tatialane su ola'u riri-U. ³⁴Olangnge indi Ta'u iwisara, waḷine ana waugu Ia'u mapandumma tatiala wuassu taumata, arawe tadea'u iamiu maasomba asasaḷamatta. ³⁵Yohanes udde naaḷihida soḷo apan luḷḷenggamma wuḷḷu mannemakka. Tumba'u sangkatempo iamiu maḷuassa mannengkamma semakka udde.

³⁶Arawe tatiala-U magewalanna wuassu tatiala n Yohanes. Apa apan niola-U orassa indi, eteudde manara apan nianggillu Iamangnga Sia'u, mattiala manungku Iamangnga suete nandolo-U. ³⁷Wuṛṛu Iamangnga apan nandolo-U lai nangagillu tatiala su ola'u riri-U. Iamiu taambe naaringikka tingikke ara'e naasilo pahudde. ³⁸Manga wisara-Ne tawe maaddo sulaḷummu naungngu ana waugu iamiu tawe mangngimanna Sia'u apan nirolokki Tou. ³⁹Iamiu mangngurumma Wuke Susi ana waugu mangngantimma manungku ringannu olangnge udde iamiu maatahuanna wiakka tutune wuṛṛu saran maḷannu-ḷannu. Wuṛṛu Wuke Susi udde sassane mattiala su ola'u riri-U. ⁴⁰Arawe iamiu maddiri rumanta ringang-Ku tadea'u maasomba wiakka apan tawe panguddusanne.

⁴¹Ia'u tawe maddea'a daralo wuassu taumata. ⁴²Ia'u masingkatti amiu, Ia'u masingkatti amiu maddiri mandangngu Mawu Ruata sulaḷummu naungngu. ⁴³Ia'u nirumanta ringannu taṛṛino n Iamang-Ku, arawe iamiu maddiri manarimma-U. Arawe amungkangngu taumata waine rumanta ringannu taṛṛinone sassane, iamiu maapulu manarim-matti tou. ⁴⁴Ereapa iamiu wotongnge apangimananna, amungkangngu iamiu maddea'a daralo wuassu sansuḷungngu taumata, wuṛṛu tawe mappandumma maddea'a daralo wuassu Mawu Ruata apan Tinggassa? ⁴⁵Arie massunna Ia'u mapaasaḷa ng kamiu su saruannu Iamangnga. Arawe mapaasaḷa ng kamiu eteudde Musa, ete itou apan aantimanni amiu. ⁴⁶Unnu wisara iamiu mangngimanna si Musa, iamiu sarun mangngimanna lai Sia'u, ana waugu ete su ola'u riri-U, itou namoṛṛetta. ⁴⁷Arawe amungkangngu iamiu tawe mangngimanna apa apan suete niwoṛṛetti Musa, ereapa iamiu wotongnge mangngimanna apa apan iwabaḷo-U siamiu?"

Mawu Yesus napaannu lima ṛiwu su atoune

(*Mat. 14:13-21; Mrk. 6:30-44; Luk. 9:10-17*)

6 Manga pira allo wua udde, Mawu Yesus inaita su samba'a Rano n Galilea, apan isassago lai Rano n Tiberias. ²Napawe na'omate poiारoddi, manambote taumata uatantalongnga Sitou ana waugu imangitou suete naasilo manga aḷaṛṛindu'a apan niolang-Nge ringannu napaapia n taumata marada'a. ³Mawu Yesus sinuma'a su wowo m wuidda, wua udde inuma'ianna isudde ringannu mallaḷaṛṛenggen-Ne. ⁴Tempo udde maranite Allo Wahewa m Paskah Yahudi. ⁵Napawe Mawu Yesus na'ellega su uapaḷiwutta, Itou naasilo taumata mangngelekka rudanta ringanni Tou. Ne Itou nabbisara si Filipus, "Suapa iite wotongnge malli anna, tadea'u taumata nambo indi wotongnge umanna?" (⁶Mawu



Rano n Galilea (6:1)

Yesus masingkate apa apan sarun olaan-Ne, arawe Itou nabbisara aroddi ana waugu Itou maapulu maannamma si Filipus.)

⁷Filipus sinumimbakka, "Roti aregane rua rasutta roitta saļa'a, tawe maattiudda su manga taumata indi, salaiwe sangkatou tumba'u maabba'a adio'a."

⁸Sangkatou mallajarřenggennu Mawu Yesus apan waine eteudde Andreas, turřranggi Simon Petrus nabbisara, ⁹"Isindi pia sangkatou ana'a esakka uaapiddu roti lima m bau wuřru inassa rua m bua. Arawe apa hunane su taumata anambone indi?"

¹⁰"Dolořra'e manga taumata udde uma'ianna," wisara Mawu Yesus. Su tampa udde manambo nannaļo, nariaddi manga taumata udde inuma'iante su nannaļo – sarangkanambone itatakasere esakka lima řiwu su atoune. ¹¹Wua udde Mawu Yesus nanganu roti udde, see maadiangkamanna su Mawu Ruata. Nasue udde Itou natahiate roti udde su taumata nambo. Wua udde Itou nattahia inassa, wuřru imangitou inumanna mangke nawusa-wusa. ¹²Napawe sarangkanambone suete inumanna na'oma n sara naļaidda, Mawu Yesus nabbisara su manga mallajarřenggen-Ne, "Ammuļa'e lambe ng kanna udde; arie ma'oma n sara piaddu maramme." ¹³See imangitou nangammullu mapuļo dua su uļangnge napene lambe ng kanna wuassu lima m bau roti apan nianna n taumata nambo udde.

¹⁴Napawe taumata nambo udde naasilo alarřindu'a apan niola'u Mawu Yesus, imangitou nabbisara, "Atonna, ete indi Nabi apan aantimanna rumanta su runia!" ¹⁵Mawu Yesus masingkate imangitou

nirumanta tuddane mamata'i Tou maola'a ratu mangitou. Ana waugu udde Itou inaita nassaŋiu watukku wageangnge pia wuidda.

Mawu Yesus niuamatta su wowo n ua'e

(Mat. 14:22-33; Mrk. 6:45-52)

¹⁶Napawe allo mar̄rabite, manga mallaŋar̄renggennu Mawu Yesus sinumossokke watukku rano. ¹⁷See imangitou sinuma'ete saalanna malliu rano udde mabatukku Kapernaum. Allo marandumpe arawe Mawu Yesus taambe lai nirumanta ringanni mangitou. ¹⁸Tantaŋanna udde rano mannattakke mattandi'a ana waugu anginna ma'ikkatte. ¹⁹Napawe nasenggotte itatakasere lima ara'e anummu kilo meter̄re araune, imangitou naasilo Mawu Yesus mattuda n saalanna u'amatta su wowo n ua'e. Imangitou mangke nata'utta. ²⁰Arawe Mawu Yesus nabbisara simangitou, "Arie paata'utta, Ia'u indi!" ²¹See ringannu naungnga lulluassa imangitou nanaŋoho Sitou watukku saalanna, wuŋŋu orassa udde lai saalanni mangitou na'omate su tampa tattudanna.

Manga taumata maddea'a Mawu Yesus

²²Su allo tiŋrabine taumata nambo apan ta'e uatana'a su samba'a n rano, natutukka manungku tanginna tumba'u pia sangngassa saalanna poiaronddi. Imangitou masingkatta manungku manga mallaŋar̄renggennu Mawu Yesus nasenggotte ringannu saalanna udde, arawe Mawu Yesus tawe nar̄rundinganna. ²³Wua udde manga pira ngassa saalanna wuassu Tiberias nirumanta wuŋŋu nabbaŋango marani n tampa n taumata nambo udde u'anna roti napawe Mawu Yesus suete naadiangkamanna. ²⁴Napawe taumata nambo udde naasilo manungku mawae Mawu Yesus ara'e mallaŋar̄renggen-Ne tawe isudde, imangitou sinuma'ete manga salaanna udde wuŋŋu inaita watukku Kapernaum maddea'a Mawu Yesus.

Mawu Yesus, roti apan mangngonggolu wiakka

²⁵Napawe manga taumata udde nassombate Mawu Yesus su samba'a n rano, imangitou naiwaŋo Sitou, "Iamangnga Huru, ro'e n angngera Iamangnga na'oma isindi?"

²⁶Mawu Yesus sinumimbakka, "Atonna iamiu maddea'a Sia'u waŋinewe ana waugu iamiu naasunnate pandumannu manga aŋarindu'a apan Ta'u niola'a, arawe ana waugu iamiu suete inumanna na'oma n sara naŋaidda. ²⁷Arie pammanara ipaddea'a anna apan wotongnge masue wuŋŋu mawukku'a. Pammanarate tadea'u maasomba anna apan

tawe mawukku'a wuṛṛu apan mangngonggolu wiakka tutune wuṛṛu saran maḷannu-ḷannu. Anna udde sarun ionggolu Ana'u Taumata siamiu, ana waugu Itou suete niteneḡu Mawu Ruata Iamangnga."

²⁸See imangitou naiwaḷo Sitou, "Iami ṛinone ma'ola'a apa tadea'u maatuṛṛutta apulu Mawu Ruata?"

²⁹Mawu Yesus sinumimbakka, "Ete indi apan ipaapulu Mawu Ruata wuassi amiu: pangimante Sitou apan nirolokku Mawu Ruata."

³⁰"Amungkangngu aroddi," unni mangitou, "tatiala apa apan ionggolli Iamangnga tadea'u iami maasilo wuṛṛu mangngimanna Iamangnga? Apa apan sarun olaannu Iamangnga? ³¹Iupungngu aḷamona ng kami u'anna manna su wadda'a, ere lai uawoṛṛetta sulalḷummu Wuke Susi, 'Itou napaanni mangitou roti wuassu surga."

³²See Mawu Yesus nabbisara simangitou, "Pangimante: Waḷine Musa ewe'e ete Iamang-Ku apan nangonggolu roti surṛinone wuassu surga. ³³Ana waugu roti apan nionggolu Mawu Ruata eteudde Itou apan nirumanta wuassu surga wuṛṛu nangonggolu wiakku taumata su runia."

³⁴"Iamangnga," unni mangitou, "onggoḷa'awe lai siami roti udde uatialu."

³⁵"Ete Ia'u roti apan mangonggolu wiakka," unni Mawu Yesus simangitou. "Taumata apan rumanta ringang-Ku tawe amaḷunusanna sarangkaḷo'engnge. Wuṛṛu taumata apan mangngimanna Sia'u tawe marou lai sarangkaḷo'engnge."

³⁶"Arawe ere suete Ta'u niapaasingkatta siamiu, salaiwe iamiu suete naasilo Sia'u, iamiu tawe mangngimanna. ³⁷Anambo n taumata apan nionggolu Iamangnga Sia'u sarun rumanta ringang-Ku. Ia'u tawe mapawelengngi sai-sai apan rumanta ringang-Ku. ³⁸Ana waugu Ia'u nirumanta wuassu surga, waḷine ma'ola'a apulu-U sassane, ewe'e apulu n Tou apan nandolo-U. ³⁹Wuṛṛu ete indi apulu-Ne apan nandolo-U: tadea'u wuassu anambo n taumata apan tinantilla Sia'u, tawe saran sangkatou apan mawuḷi; tadea'u Ia'u mapaawangunni mangitou su Allo ng Kiamatta. ⁴⁰Atonna, eteudde apulu n Iamang-Ku: Tadea'u anambo n taumata maasilo Ana'a wuṛṛu mangngimanna Sitou maasomba wiakka tutune wuṛṛu saran maḷannu-ḷannu, wuṛṛu iapaawiakka apia su Allo ng Kiamatta."

⁴¹Manga taumata n Yahudi manattakke sussawutulla su saruannu Mawu Yesus, ana waugu Itou nabbisara: "Ia'u roti apan niumontu'a wuassu surga." ⁴²Imangitou nabbisara, "Waḷinewe indi Yesus ana'i Yusuf? Iami masingkattu inangnga iamangnge! Ereapa Itou wotongnge mabbisara Itou niumontu'a wuassu surga?"

⁴³See Mawu Yesus nabbisara simangitou, "Arie passawutulla. ⁴⁴Tawe saran sangkatou maaranta ringang-Ku, amungkangngu Iamangnga apan nandolo-U tawe mangapiddi tou ringang-Ku; wuṛṛu isai

apan rumanta, sarun Ta'u iapaasengkengnga su Allo ng Kiamatta. ⁴⁵Sulaŕummu Wuke Manga Nabi uawoŕretta arendi, 'Anambo n taumata sarun tantiroannu Mawu Ruata.' Nariaddi anambo n taumata apan madingikka Iamangnga wuŕru mangngurumma wuassi Tou, rumanta ringang-Ku. ⁴⁶Udde tawe atapasanne manungku plate taumata apan suete naasilo Iamangnga. Tumba'u Itou apan nirumanta wuassu Mawu Ruata, suete naasilo Iamangnga.

⁴⁷Paanaunge: Taumata apan mangngimanna, maatahuanna wiakka tutune wuŕru saran maŕannu-ŕannu. ⁴⁸Ete Ia'u roti apan mangong-golu wiakka. ⁴⁹Iupunggu aŕamonanu u'anna manna su wadda'a wuŕru imangitou nate lai. ⁵⁰Arawe tawe aroddi roti apan niumontu'a wuassu surga; taumata apan inumanna roti udde tawe mate. ⁵¹Ete Ia'u roti apan niumontu'a wuassu surga - roti apan mangonggolu wiakka. Taumata apan umanna roti indi sarun mabbiakka sarangkaŕo'engnge. Roti apan Ta'u ionggolla ipabiakku taumata su runia eteudde ŕeme-U."

⁵²Naaringikka udde, manga taumata n Yahudi uatatiakke sangkatou ringannu waine. "Ereapa taumata indi wotongnge mangonggolu ŕemessi Tou siite iapaanna?" unni mangitou.

⁵³See Mawu Yesus nabbisara simangitou, "Pangimante: Amungkang-ngu iamiu tawe umanna ŕemessu Ana'u Taumata wuŕru ma'inumma raŕra-Ne, iamiu atonna-tonna tawe mabbiakka. ⁵⁴Taumata apan umanna ŕeme-U wuŕru ma'inumma raŕra-U maatahuanna wiakka tutune wuŕru saran maŕannu-ŕannu wuŕru Ia'u sarun mapaawiakki tou apia su Allo ng Kiamatta. ⁵⁵Ana waugu ŕeme-U atonna-tonna udde anna, wuŕru raŕra-U atonna-tonna udde inumanna. ⁵⁶Taumata apan umanna ŕeme-U wuŕru ma'inumma raŕra-U sidutu su sambau ringang-Ku wuŕru Ia'u ringanni tou. ⁵⁷Iamangnga apan wiakka udde, nandolo-U wuŕru Ia'u lai mabbiakka sulaŕummu Iamangnga. Aroddi lai taumata apan umanna ŕeme-U sarun mabbiakka wuassia-U. ⁵⁸Ete indi roti apan niumontu'a wuassu surga: waŕine ere roti apan niannu iupunggu aŕamonanu. Ana waugu napawe niumannu roti udde, imangitou nate lai. Arawe taumata apan umanna roti indi sarun mabbiakka sarangkaŕo'engnge."

⁵⁹Sarangkanambone udde niwisara Mawu Yesus su tempo Itou manggarra'a su waŕe m pattatarraamawuanna su Kapernaum.

Manga wisara apan mangngonggolu wiakka tutune wuŕru saran maŕannu-ŕannu

⁶⁰Napawe suete naddaringikka manga wisara Mawu Yesus udde, manambo su wallattu mallaraŕrenggen-Ne nabbisara, "Tatantiro indi tumanite masahadda. Isai wotongnge maasunna!"

⁶¹Mawu Yesus sassane masingkatta manungku manga mallalarrenggen-Ne sussawutulla su ola'u hatto udde. Ne Itou nabbisara, "Apa iamiu naludda ana waugu manga wisara-U indi? ⁶²Ereapa olangnge amungkangngu iamiu maasilo Ana'u Taumata masengkengnga apia su tampane apan paarorone? ⁶³Apan maawiakka taumata eteudde Gharraho Mawu Ruata. Atatohassu taumata tawe gunane. Manga wisara apan niwisara-U siamiu indi eteudde wisara Gharraho Mawu Ruata wurru manga wisara apan mangngonggolu wiakka. ⁶⁴Arawe pia lai su wallatti amiu apan tawe mangngimanna." (Mawu Yesus massingkatte ro'e n paarorone isai-sai apan tawe mangngimanna wurru isai-sai sarun mamate Sitou.) ⁶⁵See Mawu Yesus nabbisara apia, "Ana waugu udde Ia'u mamasingkatta siamiu manungku tawe saran sangkatou apan maara ringang-Ku, amungkangngu lamangnga tawe mamala."

⁶⁶Nanattakka orassa udde manambo mallalarrenggen-Ne manantangngi Tou, wurru maddirite mallalarrenggenna Sitou. ⁶⁷See Mawu Yesus naiwalo su sire mapulo dua mallalarrenggen-Ne, "Apa iamiu maapulu lai manantang-Ku?"

⁶⁸"Mawu," wisara n Simon Petrus Sitou, "ringanni sai iamii sarun inai? Wisara Mawu mangngonggolu wiakka tutune wurru saran malannu-lannu. ⁶⁹Iami mangngimante wurru naatutukke manungku ete Mawu daroloorranna apan naukassa wuassu Mawu Ruata."

⁷⁰Mawu Yesus sinumimbakka, "Walinewe Ia'u apan namile siamiu mapulo dua indi? Arawe sangkatou wuassu wallatti amiu eteudde gharraho laleo!" ⁷¹Apan su pandumanna Mawu Yesus eteudde Yudas ana'i Simon Iskariot. Ana waugu salaiwe Yudas sangkatou wuassu sire mapulo dua mallalarrenggennu Mawu Yesus, ete itou apan namate Mawu Yesus.

Mawu Yesus wurru manga turrang-Nge

7 Wua udde Mawu Yesus inaita su alawo'u tampa su Galilea. Itou maddirite mabatukku leta'u Yudea ana waugu manga tembonannu Yahudi poiaroddi pia pandumma mamate Sitou.

²Su tempo udde maranite Allo Wahewa Rasannu Rongnga. ³Ne manga turrangngu Mawu Yesus nabbisara Sitou, "Tantanga'e tampa indi wurru roote su Yudea, tadea'u manga mallalarrenggen-Nu maasilo lai manara-Nu. ⁴Tawe taumata apan maapamuni apa apan a'olaanne. Amungkangngu itou maapulu asingkatannu awadaalla. Amungkangngu i'o maapulu ma'ola'a inolaanna ere udde, ahewallu runia indi rinone maasingkatta!" (⁵Ana waugu manga turrang-Nge sassane tawe mangngimanna Sitou.)

⁶"Taambe tempone Sia'u," unnu Mawu Yesus simangitou, "arawe siamiu, suapa n tempo udde wotongnge. ⁷Runia indi tawe marantinni amiu. Arawe Ia'u atonna-tonna iaarantinnu runia, ana waugu Ia'u sidutu mabbisara runia manungku inolaanne laļeo. ⁸Roote iamiu sassane su ramea udde. Ia'u tawe inai ana waugu tempone taambe nia'omanna Sia'u." ⁹Eteudde wisara Mawu Yesus su manga tuřrang-Nge, wuřru Itou lai natana'a su Galilea.

Mawu Yesus su ramea n Rasannu Rongnga

¹⁰Napawe manga tuřrang-Nge inainte watukku ramea udde, maļanna-ļannaba Mawu Yesus nattuda sassane tawe niasingkatannu taumata. ¹¹Su aļannu n ramea udde, manga tembonannu Yahudi maddea'a Sitou wuřru uaaiwaļo, "Suapa Itou?"

¹²Manambo taumata mannattake uasasaļimburongnga su ola'i Tou. Piaddu mabbisara, "Itou taumata mapia." Piaddu lai mabbisara, "Tawe! Itou mangngaļiwu n taumata nambo." ¹³Arawe tawe saran sangkatou warřani mabbisara uasasaruanna su ola'i Tou ana waugu imangitou matta'uttu manga tembonannu Yahudi.

¹⁴Mattangnga n ramea, Mawu Yesus sinumutta sulaļummu Waļe Mawu, see nanattakke mangngařra'a. ¹⁵Manga tembonannu Yahudi naherangnga wuřru nabbisara, "Ereapa taumata indi asingkanne aroddi anambone, sumbaļi Itou tawe nassi'ola?"

¹⁶Mawu Yesus sinumimbakka, "Apan Ta'u iaařra'a indi waļinewe aļařra-U arawe aļařra'i Tou apan nandolo-U. ¹⁷Taumata apan matuřrutta apulu Mawu Ruata, sarun maasingkatta tanne aļařra-U indi darantane wuassu Mawu Ruata ara'e wuassia-U sassane. ¹⁸Taumata apan mangngonggolu aļařrangnge sassane maddea'a awawantugu ririne sassane. Arawe taumata apan maddea'a awawantugi Tou apan nandolokki Tou, taumata udde matuļida, itou tawe awusune. ¹⁹Waļinewe Musa suete nangonggolu Tita Mawu Ruata siamiu? Arawe su wal-latti amiu tawedu tinumuřrutta Tita udde. Anio iamiu maapulu mamate Sia'u?"

²⁰Awadaalla udde sinumimbakka, "I'o wewa! Isai maapulu mamate Si'o?"

²¹Mawu Yesus sinumimbakka, "Tumba'u sambau manara Ta'u olaanna su allo n Sabatta, wuřru naaherangnga siamiu. ²²Musa nangonggolu atoranna siamiu iapasunatta - salaiwe sunatta udde tawe wuassi Musa, arawe wuassu manga iamangngu aļamona ro'e n Musa taanna. Ana waugu udde, su allo n Sabatta lai iamiu maapulu mannunatta tau-mata. ²³Amungkangngu iamiu ma'ola'a udde tadea'u tawe lumawang-

nga atoranni Musa su ola'u sunatta, anio iamiu mannaungnga laleo sia'u ana waugu mapaapia n ahewallu wadangngu taumata su allo n Sabatta? ²⁴Arie mamarikissa taumata ana waugu pinangiananne apan aasiloanna, arawe ana waugu atatujidda."

Atonnawe Mawu Yesus Ratu m Punnu Saalamatta?

²⁵Wua udde pia manga pira taumata n Yerusalem mabbisara, "Waḷinewe indi taumatane apan tantaḷanna raddeanna pateanna? ²⁶Pa'ellege Itou mabbisara tawe singgawangnge su saruannu awadaalla, wuḷḷu tawe saran sangkatou apan mabbisara n apa-apa Sitou! Asinungka manga tembonanni ite naatutukke manungku Itou indi Ratu m Punnu Saalamatta? ²⁷Arawe amungkangngu Ratu m Punnu Saalamatta udde rumanta, tawe saran sangkatou maasingkatta wuassuapa atatanaan-Ne! Sumbaḷi iite masingkatta wuassuapa darantane taumata indi."

²⁸Wua udde, tantaḷanna Mawu Yesus mangngaḷḷa'a su Waḷe Mawu, Itou nangintuḷi ringannu tingikka ma'ikkatta, "Nariaddi iamiu masingkatta isai Ia'u indi, wuḷḷu wuassuapa Ia'u nirumanta? Ia'u tawe nirumanta ana waugu apulu-U sassane. Ia'u nirolokki Tou apan pia taḷḷino wotongnge mandolo-U, wuḷḷu Itou wotongnge apangimananna. Arawe iamiu tawe maaillaḷa Sitou. ²⁹Ia'u maaillaḷa Sitou, ana waugu Ia'u nirumanta wua dinganni Tou, wuḷḷu ete Itou apan nandolo-U."

³⁰Su tempo udde imangitou maapulu manametta Mawu Yesus, arawe tawedu waḷḷani mangagassa Sitou, ana waugu taambe nia'omanna tempone. ³¹Manambo su wallattu manga taumata udde mannattakke mangngimanna Sitou, wuḷḷu mabbisara, "Amungkangngu Ratu m Punnu Saalamatta udde rumanta, apa Itou wotongnge maaola'a mannamboanna aḷaḷḷindu'a wuassu taumata indi?"

Ma'ire manametta Mawu Yesus

³²Manga taumata m Farisi naaringikka ereapa taumata nambo udde uasasaḷimburungnga su ola'u Mawu Yesus. Ana waugu udde su sampunna ringannu manga imam tembonanne, imangitou nandolokku manga pira mandariaga Waḷe Mawu inai manametta Mawu Yesus. ³³Mawu Yesus nabbisara su taumata nambo su Waḷe Mawu, "Ete lai taḷa ng kadio'a Ia'u su sambau ringanni amiu. Wua udde Ia'u sarun mabelengnga ringanni Tou apan nandolo-U. ³⁴Iamiu sarun maddea'a Sia'u, arawe tawe maasomba Sia'u; ana waugu iamiu tawe maaranta su tampa atatanaang-Ku."

³⁵See manga tembonannu Yahudi uawawisarate sangkatou ringannu waine, "Taumata indi inai suapa na'oma n sara iite tawe maasomba Sitou? Apa Itou inai ringannu manga taumata n Yahudi apan uatana'a su wanua marau su wallattu taumata n Yunani, wuṛṛu mangngarra'a taumata n Yunani?" ³⁶Apa pandumanne ringannu mabbisara manungku iite sarun maddea'a Sitou, arawe tawe maasomba Sitou, wuṛṛu manungku iite tawe maaranta su tampa Itou uatana'a?"

Ua'e apan mangngonggolu wiakka

³⁷Su allo panginsueannu ramea udde, eteudde allo apan apianne, Mawu Yesus dirumarisikka sulaḷummu Waḷe Mawu see nabbisara, "Taumata apan marou ṛinone rumanta ringang-Ku ma'inumma. ³⁸Su ola'u taumata apan mangngimanna Sia'u, uawoṛṛetta sulaḷummu Wuke Susi, 'Wuassu laḷummu naungnge mangngelekka manga aeleṛṛannu ua'e apan mangngonggolu wiakka.'" (³⁹Mawu Yesus mabbisara su ola'u Gharraho Mawu Ruata apan sarun sengkamannu manga taumata apan mangngimanna Sitou. Ana waugu su tempo udde Gharraho Mawu Ruata taambe nionggolla; ana waugu Mawu Yesus taambe niapaawantuga ringannu papate-Ne.)

⁴⁰Manambo taumata maaringikka apa apan niwisara Mawu Yesus, wuṛṛu su wallatti mangitou piaddu mabbisara, "Taumata indi natantunna ete Nabi udde!"

⁴¹Arawe piaddu lai mabbisara, "Ete indi Ratu m Punnu Saḷamatta!"

Arawe piaddu lai mabbisara, "Eh, ṛatadde Ratu m Punnu Saḷamatta nirumanta wuassu Galilea?" ⁴²Sulaḷummu Wuke Susi uawoṛṛetta manungku Ratu m Punnu Saḷamatta udde sinossoṛṛanne wuassi Daud wuṛṛu sarun rumanta wuassu Betlehem, eteudde soa atatanaanni Daud."

⁴³Panginsueanne manga taumata mannatakke uatatiakka su ola'u Mawu Yesus. ⁴⁴Piaddu maapulu manametta Sitou, arawe tawe saran sangkatou mamita Sitou.

Manga tembonannu Yahudi tawe mangngimanna

⁴⁵Su tempo manga mandariaga Waḷe Mawu, apan nirolokka manametta Mawu Yesus nabelengke apia, manga imam tembonanne wuṛṛu manga taumata n Farisi udde naiwaḷo simangitou, "Anio iamiu tawe nangapiddi Tou inawarendi?"

⁴⁶Manga mandariaga udde sinumimbakka, "Ah, taambe saran paassa pia taumata mabbisara naaḷihida ere Itou!"

47" Apa iamitu lai suete nialiwu-Ne?" unnu manga taumata n Farisi udde. 48" Apa wuassu manga tembonanni ite wuṛṛu manga taumata n Farisi piaddu mangngimanna Sitou? 49" Arawe awadaalla indi, imangitou waga n Tita Musa, wuṛṛu salaiwe ereapa imangitou niawontohante."

50" Sangkatou su wallattu manga taumata n Farisi udde eteudde Nikodemus apan suete nirumanta ringannu Mawu Yesus. Nikodemus nabbisara su manga taumata n Farisi waine, 51" Tumuruṛuttu Tita, sangkatou tawe wotongnge iṛṛuumanna amungkangngu hattone taambe niaringiṛṛanna wuṛṛu pallaḷagune niparikisanna."

52" Apa i'o lai wuassu Galilea?" sasimbakki mangitou, "Pamarikisse Wuke Susi! I'o sarun maasingkatta manungku tawe sangkatou nabi apan darantane wuassu Galilea!"



Wuiddu Zaitun (8:1)

Sangkatou wawine niaratinganna sussandaga

[53] Wua udde, taumata nambo udde napuḷete watukku waḷe.

8 Arawe Mawu Yesus inaitte watukku Wuiddu Zaitun. 2Tiṛṛabbine ruaallo maṛṅgapa Itou inaitte lai su Waḷe Mawu, wuṛṛu manambo taumata nirumanta ringanni Tou. Mawu Yesus inuma'iana see nanattakke manggaṛṛa'a simangitou. 3Tantaḷanna udde, manga huru n agama wuṛṛu manga taumata n Farisi nangapiddu sangkatou wawine ringanni Tou apan niaratinganna sussandaga. Imangitou nandolokku wawine udde niapararisikka su pattangganne, 4see nabbisara su Mawu Yesus, "Iamangnga Huru, wawine indi niaratinganna sussandaga. 5Sulaḷummu Tita Musa pia atoranna manungku wawine ereindi ṛinone tuntungannu watu ma'oma n sara mate. Orassa indi ereapa addapattu Iamangnga?" 6Imangitou naiwaḷo aroddi maddea'a pasasaḷa-Ne,

tadea'u imangitou wotongge mapaasala n Tou. Arawe Mawu Yesus inumaruutta wuṛṛu mamorṛettu talimado-Ne su leta'a. ⁷Napawe imangitou sidutu mammata'a, Itou tinumatagekka wuṛṛu nabbisara simangitou, "Taumata apan tawe dosane su wallatti amiu, wotongge itou manuntunggu watu paarorone su wawine udde." ⁸Wua udde Mawu Yesus inumaruutta apia wuṛṛu namorṛetta apia su leta'a. ⁹Napawe naaringikka Mawu Yesus nabbisara aroddi, imangitou nanantangke n tampa udde, passangkatou nanattakka wuassu atimmaranne. Panginsueanne Mawu Yesus natantangnga sassane isudde ringannu wawine apan ta'e uarisikka su dararisiranne. ¹⁰See Mawu Yesus namatti'u puane wuṛṛu nabbisara wawine udde, "Suapate imangitou sarangkanambone? Tawedu nakkuumannu?"

¹¹"Tawe, Ama," sasimbakke.

"Aroddite," unnu Mawu Yesus, "Ia'u lai tawe makkuumannu. Orassa indi apulete, imbarrangnga ma'ola'a rosa apia.]"

Mawu Yesus asasemakku runia

¹²Mawu Yesus nabbisara apia su taumata nambo udde, wisara-Ne, "Ete Ia'u asasemakku runia. Taumata apan tumantalongnga Sia'u tawe umamatta su ararandumma, arawe maatahuanna asasemakku pabbiaranna."

¹³"Orassa indi I'o mangngonggolu tatiala su ola'u riri-Nu sassane," unnu manga taumata n Farisi udde Sitou, "Tatialanu udde awusu."

¹⁴Mawu Yesus sinumimbakka, "Salaiwe Ia'u mangngonggolu tatiala su ola'u riri-U sassane, tatiala-U udde atonna; ana waugu Ia'u masingkatta wuassuapa Ia'u nirumanta wuṛṛu watukku apa Ia'u inai. Iamiu waggga wuassuapa Ia'u nirumanta wuṛṛu watukku apa Ia'u inai. ¹⁵Iamiu mammarikissa taumata ringannu apulu n taumata; Ia'u tawe mammarikissa saran sangkatou. ¹⁶Arawe unnu wisara Ia'u mammarikissa taumata, Ia'u maṛṛawessa udde matulida, ana waugu Ia'u tawe sassane; Iamangnga apan nandolo-U su sambau lai ringang-Ku. ¹⁷Sulaḷummu Tita Musa uaworṛetta arendi; Tatiala apan atonna eteudde tatiala wuassu rua ng katou. ¹⁸Apan mangngonggolu tatiala su ola'u riri-U udde rua ng katou - Ia'u wuṛṛu Iamangnga apan nandolo-U."

¹⁹"Iamanggu udde suapa?" aiwaḷo mangitou.

Mawu Yesus sinumimbakka, "Iamiu tawe maailala Sia'u aroddi lai Iamang-Ku. Unnu wisara iamiu maailala Sia'u, amiu lai sarun maailala Iamang-Ku."

²⁰Sarangkanambone udde niwisara Mawu Yesus su tempo Itou tantallanna manggarra'a su Waḷe Mawu marani manga pangangadoannu

roitta sasamba. Arawe tawe saran sangkatou apan nanametta Sitou, ana waugu taambe nia'omanna tempone.

Su tampa Ta'u rantanna, iamiu tawe maaranta

²¹Mawu Yesus nabbisara apia simangitou, "Ia'u inaita, wuɽɽu iamiu sarun maddea'a Sia'u, arawe iamiu sarun mate sulaɽummu rosanu. Su tampa Ta'u rantanna, iamiu tawe maaranta."

²²Ne manga tembonannu Yahudi nabbisara, "Asinungka Itou matingkaate, ana waugu Itou nabbisara, 'Su tampa Ta'u rantanna, iamiu tawe maaranta.'"

²³See Mawu Yesus nabbisara simangitou, "Iamiu nirumanta wua bowane; arawe Ia'u nirumanta wua dosone. Iamiu wuassu runia arawe Ia'u tawe wuassu runia. ²⁴Ana waugu udde Ia'u mabbisara siamiu, manungku iamiu sarun mate sulaɽummu manga rosanu. Wuɽɽu atonna iamiu sarun mate sulaɽummu manga rosanu, amungkanggu iamiu tawe mangngimanna manungku, 'ete Ia'u Itou apan isassago IA'U INDI'."

²⁵"Rinone isai P'o?" aiwaɽo mangitou.

Mawu Yesus sinumimbakka, "Ipa'ura maggahato ng kamiu apia! ²⁶Ta'e manambo lai hatto su ola'i amiu apan Ta'u iwisara wuɽɽu ipamarikissa. Arawe Itou apan nandolo-U wotongge apangimananna. Wuɽɽu Ia'u mamasingkatta su runia apa apan Ta'u niaringiɽɽanna wuassi Tou."

²⁷Imangitou tawe maasunna manungku Itou tantaɽanna mabbisara simangitou su ola'u lamangnga. ²⁸Ana waugu udde Mawu Yesus nabbisara simangitou, "Raddoi amungkanggu iamiu suete nanduittu Ana'u Taumata, iamiu sarun maasingkatta manungku 'ete Ia'u Itou apan isassago IA'U INDI', wuɽɽu iamiu sarun maasingkatta manungku tawe saran sambau apan a'olaang-Ku wuassu riri-U sassane. Ia'u tumba'u mamasingkattu apa apan niarɽa'u lamangnga Sia'u. ²⁹Wuɽɽu Itou apan nandolo-U indi su sambau ringang-Ku. Itou tawe mamala-U sassane, ana waugu Ia'u sidutu ma'ola'a inolaanna apan maaluassa naung-Nge."

³⁰Napawe Mawu Yesus suete nabbati'u sarangkanambone udde, manambo taumata mangngimanna Sitou.

Mawu Ruata apan narɽino mapaaɽiu ng kamiu

³¹Wua udde Mawu Yesus nabbisara su manga taumata n Yahudi apan nangimante Sitou, "Amungkanggu iamiu mabbiakka tuttuɽɽutta

ałarřa-U, iamiu atonna-tonna mallarřrenggeng-Ku, ³²ne iamiu sarun maailała Mawu Ruata apan narřino, wuřřu ana waugu udde iamiu sarun ipallossa.”

³³”Iami indi papapulunni Abraham,” unni mangitou. ”Taambe saran paassa iami naola’a allangngi sai-sai! Apa pandumannu ringannu mabbisara, ’Iamiu sarun ipallossa?’ ”

³⁴”Mangke atonna wisara-U indi,” unnu Mawu Yesus simangitou. ”Taumata apan ma’ola’a rosa, eteudde allangngu rosa. ³⁵Wuřřu sangkatou allangnga tawe atatanaanne uasidutu sulałummu wałene, arawe ana’a pia atatanaanne sarangkało’engnge sulałummu wałene. ³⁶Ana waugu udde, amungkangngu ana’a mamallossi amiu, iamiu atonna-tonna mapallossa. ³⁷Atonna Ia’u masingkatta manungku iamiu indi papapulunni Abraham. Arawe iamiu maapulu mamate Sia’u, ana waugu iamiu maddiri manarimmattu ałarřa-U. ³⁸Apa apan niasiloang-Ku wuassu Iamang-Ku eteudde apan iwabbisara-U. Arawe iamiu tuttuřřutta apa apan iaarřa’i iamangngu siamiu.”

³⁹Imangitou sinumimbakka, ”Iamangngi ami eteudde Abraham.”

”Unnu wisara atonna-tonna iamiu ana’i Abraham,” unnu Mawu Yesus, ”iamiu řinone ma’ola’a apa apan a’olaanni Abraham. ⁴⁰Ia’u mamasingkatta siamiu atatulałidda apan niaringiřrang-Ku wuassu Mawu Ruata, arawe iamiu maapulu mamate Sia’u. Abraham tawe inolaanne ereudde! ⁴¹Iamiu ma’ola’a ere apa apan niola’u iamangngu sassane.”

Sasimbakki mangitou, ”Iami wałine ałarřana’a su liuddu awingnga. Iamangngi ami tumba’u sangkatou eteudde Mawu Ruata sassane.”

⁴²See Mawu Yesus nabbisara simangitou, ”Unnu wisara Mawu Ruata udde Iamangngu, iamiu sarun mandangngu Sia’u, ana waugu Ia’u nirumanta wuassu Mawu Ruata. Ia’u tawe nirumanta ringannu apulu-U sassane, arawe ete Itou apan nanadolo-U. ⁴³Anio iamiu tawe maasunna apa iwabało-U? Ana waugu iamiu tawe maatarřangnga maddaringikka ałarřa-U. ⁴⁴Ete Setanna iamangngu, wuřřu iamiu tuttuřřutta apulu n iamangngu. Ro’e n panatarřanne Setanna udde tarřa pate. Itou taambe saran paassa manamba’a apapia, ana waugu tawe apapia sitou. Amungkangngu itou mangawusu, udde narřino ana waugu ete aroddi pal-lałagune. Itou tarřa awusu wuřřu punnu aławo’u awusu. ⁴⁵Arawe Ia’u mabatti’u atatulałidda, wuřřu ana waugu eteudde iamiu maddiri mangngimanna Sia’u. ⁴⁶Isai su wallatti amiu wotongnge maatiala manungku Ia’u pia dosa? Amungkangngu Ia’u mabatti’u atatulałidda, anio iamiu tawe mangngimanna Sia’u? ⁴⁷Taumata apan darantane wuassu Mawu Ruata, madaringikka wisara Mawu Ruata. Arawe iamiu wałine wuassu Mawu Ruata, ana waugu udde iamiu maddiri madaringikka.”

Mawu Yesus wuṛṛu Abraham

⁴⁸Manga taumata n Yahudi udde sinumimbakka Mawu Yesus, "Waḷinewe atonna wisara ng kami manungku I'o taumata n Samaria apan niasuttannu setanna?"

⁴⁹Mawu Yesus sinumimbakka, "Ia'u tawe niasuttannu setanna. Ia'u mangngaddatta Iamang-Ku, arawe iamiu mangngaḷuandaga Sia'u. ⁵⁰Ia'u tawe maddea'a awawantugu riri-U sassane. Pia sangkatou apan maddea'a awawantu-U, wuṛṛu tumba'u Itou apan mammarikissa. ⁵¹Mangke atonna wisara-U indi, taumata apan tuttuṛṛutta wisara-U, tawe mate saran maḷannu-ḷannu."

⁵²See manga taumata n Yahudi udde nabbisara Mawu Yesus, "Orassa indi iamii masingkatta I'o indi atonna-tonna niasuttannu setanna! Abraham sassane natete, aroddi lai manga nabi. Arawe I'o mabbisara, 'Taumata apan tuttuṛṛutta wisara-U, tawe mate saran maḷannu-ḷannu.' ⁵³Amungkangngu Abraham sassane natete, wuṛṛu manga nabi sarangkambone lai natete, I'o indi isai? Raṭadde I'o magewaḷanna wuassi iamangngi ami Abraham!"

⁵⁴Mawu Yesus sinumimbakka, "Unnu wisara Ia'u maddea'a awawantugu riri-U sassane, awawantugu udde tawe gunane. Apan mangngaddatta Sia'u eteudde Iamang-Ku apan unni amiu Mawu Ruata ng kami, ⁵⁵arawe iamiu tawe maillaḷa Sitou. Arawe Ia'u maillaḷa. Amungkangngu Ia'u mabbisara manungku Ia'u tawe maillaḷa Sitou, ne Ia'u sangkatou taṛṛa awusu, ere lai iamiu. Ia'u maillaḷa Sitou wuṛṛu tuttuṛṛutta wisara-Ne. ⁵⁶Iamangngu Abraham lembo n lulluassa, manungku itou sarun maasilo allo-U. Itou naasilote wuṛṛu itou mangke lulluassa!"

⁵⁷See manga taumata n Yahudi nabbisara Mawu Yesus, "Uukku taambe naṛṛatubba lima m puḷo su tonnane, arawe I'o naasilote si Abraham?"

⁵⁸Mawu Yesus sinumimbakka, "Atonna Ia'u mabbisara siamiu: Tantaḷanna Abraham taambe niasungkangnga, Ia'u nariaddite."

⁵⁹See manga taumata n Yahudi nanganute watu ipanuntungnga Sitou; arawe Mawu Yesus na'imbuni, see napuḷete nanantangngu Waḷe Mawu.

Mawu Yesus napaapia n taumata wuta naasilo apia

9 Su tempo Mawu Yesus u'amatta, Itou naasilo sangkatou wuta ro'e niariaddine. ²Manga mallaḷaṛṛengennu Mawu Yesus naiwaḷo Mawu Yesus, "Iamangnga Huru, anio taumata indi niasungkangnga matane wuta? Apa ana waugu itou sassane marosa ara'e hagurangnge marosa?"

³Mawu Yesus sinumimbakka, "Itou wuta wałine ana waugu rosane sassane ara'e rosa n hagurangnge, arawe tadea'u taumata wotongnge maasilo taffino Mawu Ruata mammanara sulałummu ririne. ⁴Tantałanna ta'e allo, iite řinone mammanara manara n Tou apan nandolo-U. Rabbi sarun rumanta, wuřru tawe saran sangkatou apan wotongnge maapammanara. ⁵Tantałanna Ia'u ta'e su runia indi, ete Ia'u asasemakku runia."

⁶Napawe suete nabbisara aroddi Mawu Yesus nangaddu su leta'a, wuřru addune niluakka ringannu leta'a. Wua udde Itou nangapu su mata n taumata udde ⁷see nabbisara sitou, "Roote pamaresi hatinu su Li'u n Siloam." (Siloam atapasanne 'Nirolokka'.) Ne taumata udde inaita namaresi hatine. Su tempo itou nabelengga, itou wotongngete maasilo.

⁸Manga ałindonganna wuřru manga taumata apan paarorone maasilo sitou sangkatou madarorongnga, sarangkanambone nabbisara, "Wałinewe itou indi taumata apan inaramanne ua'ianna madorongnga?"

⁹Piaddu mabbisara, "Atonna itou." Arawe piaddu lai mabbisara, "Tawe itou tumba'u lihıddu taumata udde."

Arawe taumata udde sassane nabbisara, "Ete ia'u itou."

¹⁰"Ereapa olangnge na'oma n sara i'o naasilo?" aiwało mangitou sitou.

¹¹Itou sinumimbakka, "Taumata apan aranne Mawu Yesus udde na'ola'a labbo adio'a, see niapu su mata'u lapıddu nabbisara, 'Roote pamaresi hatinu su Li'u n Siloam.' See ia'u inaita. Wuřru su tempo ia'u namaresi hati'u, orassa udde lai ia'u naasilote."

¹²"Suapa taumata udde?" aiwało mangitou.

Itou sinumimbakka, "Ia'u waggate."

Taumata n Farisi mannutudda arariaddianna napaapia n taumata udde

¹³⁻¹⁴Allo udde allo n Sabatta su tempo Mawu Yesus nalluakku leta'a ringannu addune nipangundamma taumata wuta udde wotongnge naasilo. Ne taumata wuta tanginna udde niapıdda ringannu manga taumata n Farisi. ¹⁵Imangitou lai naiwało sitou ereapa na'oma n sara itou naasilo. Itou sinumimbakka, "Itou nangado n labbo su mata'u, see ia'u namaresi wuřru ia'u wotongngete maasilo."

¹⁶Manga pira su wallattu manga taumata n Farisi udde nabbisara, "Tawe mariaddi taumata na'ola'a indi darantane wuassu Mawu Ruata, ana waugu Itou tawe mallaghu n allo n Sabatta."

Arawe taumata waine lai mabbisara, "Tawe mariaddi taumata marosa wotongnge maaola'a manga ałarřindu'a ereindi?" See nasaputte patatatiakka su wallattu addapatti mangitou.

¹⁷Ne manga taumata n Farisi udde naiwało apia su taumata udde, "Apa addapannu su ola'i Tou apan naapia si'o na'oma n sara naasilo?"

"Itou sangkatou nabi," sasimbakku taumata udde.

¹⁸Arawe manga piařa'u Yahudi udde maddiri mangngimanna manungku taumata udde atonna wuta ro'e niariaddine, wuřru orassa indi naasilote. Ana waugu udde imangitou namago hagurangnge, ¹⁹wuřru naiwało, "Atonna indi anangngu apan niasungkangnga wuta? Ereapa itou wotongnge naasilo orassa indi?"

²⁰Inangnga iamangngu taumata udde sinumimbakka, "Atonna indi ana'i ami; wuřru atonna itou niasungkangnga wuta. ²¹Arawe ereapa itou naasilote orassa indi, iami wagga. Wuřru isai apan nangundamma sitou wotongnge naasilo, udde lai iami wagga. Pa'iwałote sitou, itou timmaddete; itou wotongnete sumimbakka sassane." ²²Inangnga iamangngu taumata udde sinumimbakka aroddi ana waugu imangitou matta'uttu manga piařa'u Yahudi; ana waugu imangitou na'irete, manungku taumata apan manga'u Mawu Yesus Ratu m Punnu Sałamatta, tate wotongnge sumutta su wałe m pattatařramawuanna. ²³Ana waugu udde inangnga iamangngu taumata udde nabbisara, "Itou timmaddete; paiwałote sitou."

²⁴See imangitou namago apia taumata apan tanginna wuta udde, wuřru nabbisara sitou, "Passalute manungku i'o mabbisara su řinone. Iami masingkatta taumata udde taumata marosa."

²⁵"Apa Itou marosa ara'e tawe," sasimbakku taumata udde, "ia'u wagga. Arawe ete sambau asingkatanku; ia'u dorone wuta, arawe orassa indi ia'u naasilote."

²⁶See imangitou nabbisara apia sitou, "Itou na'ola'a apa si'o? Ereapa itou na'ola'a si'o na'oma n sara naasilo?"

²⁷Taumata udde sinumimbakka, "Suate ta'u niwatti'a siamiu, arawe iamiu tawe madaringikka. Anio iamiu maapulu madaringikka apia? Asinungka iamiu maapulu maola'a mallałarřenggen-Ne lai?"

²⁸See imangitou nallela sitou wuřru nabbisara, "Ete i'o mallałarřenggen-Ne; wałine iami! Iami mallałarřenggeni Musa. ²⁹Iami masingkatta manungku Mawu Ruata suete nabbisara si Musa. Arawe su ola'u taumata udde, iami wagga wuassupa inarantan-Ne."

³⁰Taumata udde sinumimbakka, "Maatiangnga atonna manungku iamiu wagga wuassupa inarantan-Ne, wuřru see Itou suete na'ola'a sia'u naasilo. ³¹Iite masingkatta manungku Mawu Ruata tawe madaringikka taumata marosa, ewe'e taumata apan mangngaddatta Mawu Ruata, wuřru tuttuřrutta apulu-Ne. ³²Ro'e n panatařrannu runia taambe

niaringiranna pia taumata maapia taumata wuta ro'e niasungkangnga see wotongnge maasilo. ³³Amungkangngu taumata udde waļine wuassu Mawu Ruata, itou tawe maaola'a apa-apa."

³⁴Sasimbakki mangitou, "Apa? I'o apan napene n rosa ro'e nia-riaddine, i'o maapulu mangngařra'a siami?" Ne nanattakka orassa udde itou isassingadde sumutta su waļe m pattatařramawuanna.

Wuta sulaļummu pangangimanna

³⁵Mawu Yesus naaringikka manungku imangitou suete naningaddu taumata udde sumutta su waļe m pattatařramawuanna. Itou nadea'e taumata udde see nabbisara sitou. "Apa i'o mangngimanna Ana'u Taumata?"

³⁶Taumata udde sinumimbakka, "Isai itou, Mawu? Tuļunga'a waļoa'a tadea'u ia'u mangngimanna Sitou."

³⁷"I'o suete naasilo Sitou," sasimbakku Mawu Yesus, "Ete Itou apan orassa indi uahahattonu."

³⁸"Ia'u mangngimanna, Mawu," sasimbakku taumata udde, see inumalintudda su saruannu Mawu Yesus.

³⁹Mawu Yesus nabbisara, "Ia'u nirumanta su runia indi, makkuungngu taumata; tadea'u taumata wuta wotongnge maasilo, wuřru taumata maasilo, maola'a wuta."

⁴⁰Manga pira taumata n Farisi naaringikka Mawu Yesus nabbisara aroddi, see imangitou naiwaļo Sitou, "Pandumannu iami indi lai wuta?"

⁴¹Mawu Yesus sinumimbakka, "Unnu wisara iamiu wuta, iamiu tawe marosa. Arawe ana waugu iamiu mabbisara, 'Iami maasilo,' udde atappasanne iamiu ta'e marosa."

Sasumandingngu domba wuřru mallaļu'adde

10 "Mangke atonna wisara-U indi: Taumata apan sumutta su laļummu tanda'u domba lumiu pagalla, wuřru tawe sumutta su ngara, arawe umawitta sumabbi laļanna waine, taumata udde tařra ta'o wuřru tařra rampassa. ²Arawe taumata apan sinumutta wuassu ngara, ete itou mallaļu'adda domba. ³Mandariaga tanda'a mammu'a ngara sutanni tou, wuřru manga domba uatantalongnga tingikke su tempo itou mammago simangitou ringannu aranne sambau-sambau wuřru manggehetta simangitou su liudde. ⁴Napawe manga domba udde niapidde su liudde, mallaļu'adda udde u'amatta rorone, wuřru manga domba udde uatantalongnga sitou, ana waugu imangitou maaillaļa tingikke.

⁵Imangitou maddiri tumantalongnga taumata waine, ewe'e tumaŋangngu taumata udde, ana waugu imangitou tawe maaillaŋa tingikke."

⁶Mawu Yesus nabbati'u sasumandingnga udde, arawe imangitou tawedu naasunna apa panduman-Ne.

Mawu Yesus, mallaŋu'adda apan mapia

⁷Ne Mawu Yesus nabbisara paassa lai, "Mangke atonna wisara-U indi: Ete Ia'u ngara suttannu domba. ⁸Sarangkanambone apan nirumanta nalliu ŋoro wuassia-U, udde taŋra ta'o wuŋru taŋra rampassa, arawe manga domba udde tawe maddaringikka tingikki mangitou. ⁹Ete Ia'u ngara. Isai apan sumutta sumabbi Sia'u, sarun masaŋamatta; itou sumabangnga wuŋru sumutta sarun maasomba wiakka. ¹⁰Taŋra ta'o rumanta tumba'u manna'o, mamate, wuŋru manggohakka. Arawe Ia'u nirumanta tadea'u taumata maasomba wiakka - wiakka apan tawe masue.

¹¹Tumba'u Ia'u mallaŋu'adda apan mapia. Mallaŋu'adda mapia manantillu niawa-Ne ipanaŋi manga domba-Ne. ¹²Taumata n sewa apan waŋine mallaŋu'adda wuŋru waŋine lai tatahuannu manga domba udde, sarun tumaŋangnga manantangngu manga dombane napawe itou naasilo serigala rumanta. Ne manga domba udde sarun sametanne wuŋru isaŋiawukku serigala. ¹³Taumata n sewa udde tumaŋangnga, ana waugu itou mammanara tumba'u maddea'a roitta. ¹⁴⁻¹⁵Tumba'u Ia'u mallaŋu'adda apan mapia. Ere lai lamangnga maaillaŋa Sia'u, wuŋru Ia'u lai maaillaŋa lamangnga, aroddi lai Ia'u maaillaŋa manga domba'u wuŋru imangitou lai maaillaŋa Sia'u. Ia'u mannantillu niawa-U ana waugu imangitou. ¹⁶Ta'e pia manga domba waine lai apan tatahuanang-Ku, arawe tawe nareengnga sulaŋummu wageangngu domba indi. Imangitou lai ŋinone Ta'u iapidda wuŋru imangitou sarun madingikka tingi-U. Imangitou sarangkanambone sarun maola'a ammuŋanna sambau ringannu mallaŋu'adde sangkatou.

¹⁷Iamangnga mandangngu Sia'u ana waugu Ia'u mannantillu niawa-U, see manengkamma apia. ¹⁸Tawe saran sangkatou wotongge mangarŋo wuassia-U. Ia'u manantilla wuassu apulu-U sassane. Ia'u uataŋrino manantilla, wuŋru uataŋrino manguŋe apia. Eteudde manara apan Ta'u sinengkakama wuassu lamang-Ku."

¹⁹Ana waugu Mawu Yesus nabbisara aroddi, manga taumata n Yahudi mannattakke uatataiakka. ²⁰Manambo taumata mabbisara, "Itou niasuttannu setanna! Itou wewa! Ipa'ura iamiu madingikka Sitou?"

²¹Arawe piaddu lai mabbisara, "Taumata apan niasuttannu setanna tawe maawisara aroddi! Wotongnge setanna maaola'a taumata wuta maasilo?"

Taumata n Yahudi maddiri manarimmattu Mawu Yesus

²²Su Yerusalem manga taumata tantaḷanna mallaggu n Allo Wahewa Manattakka Sumutta su Waḷe Mawu. Tempo udde runia masunge. ²³Mawu Yesus tantaḷanna u'amatta su panumbaḷe n Salomo sulaḷummu Waḷe Mawu, ²⁴su tempo manga taumata n Yahudi nirumanta maamulla mamaḷiwutta Mawu Yesus. Imangitou nabbisara, "Sara tingngera Po mamala ng kami uapapadua? Waḷoa'e paasemakka, amungkangngu Po atonna-tonna Ratu m Punnu Saḷamatta."

²⁵Mawu Yesus sinumimbakka, "Suete Ta'u niwaḷo siamiu, arawe iamiu maddiri mangngimanna. Manga manara Ta'u ola'anna su arannu Iamang-Ku, mangngonggolu tatiala su ola'u riri-U ²⁶Iamiu maddiri mangngimanna ana waugu iamiu tawe nareengnga manga domba-U. ²⁷Manga domba-U madaringikka tingi-U. Ia'u maailaḷa simangitou, wuḷḷu imangitou uatantalongnga Sia'u. ²⁸Ia'u mangngonggolu wiakka tutune wuḷḷu saran maḷannu-ḷannu simangitou, wuḷḷu sarangkaḷo'engnge imangitou tawe mate. Tawe saran sangkatou apan wotongnge mangarḷo simangitou wuassu lima-U. ²⁹Iamang-Ku, apan suete nanantilli mangitou Sia'u, nanampaḷiu wuassu sarangkanambone. Wuḷḷu tawe saran sangkatou wotongnge mangarḷo simangitou wuassu lima n Iamangnga. ³⁰Ia'u wuḷḷu Iamangnga tumba'u sambau."

³¹See manga taumata n Yahudi namurutta watu ipanuntungnga Mawu Yesus. ³²Arawe Mawu Yesus nabbisara simangitou, "Iamiu suete naasilo Sia'u ma'ola'a manambo manara apan mapia, apan niapamanara n Iamangku Sia'u. Wuassu anambo manara udde, suapane apan naa'aḷudda siamiu na'oma n sara iamiu mammareta Sia'u?"

³³Manga taumata n Yahudi udde sinumimbakka, "Waḷinewe ana waugu manga manaranu apa mapia udde iami manuntungngu watu Si'o, arawe ana waugu Po mangngadio'a Mawu Ruata. Po sangkatou taumata, maapulu ma'ola'a riri-Nu ere Mawu Ruata."

³⁴See Mawu Yesus sinumimbakka, "Waḷinewe sulaḷummu Wuke n Titanu uaworḷetta: Mawu Ruata nabbisara, 'Ete iamiu udde mawu?"

³⁵Iite masingkatta manungku apa apan uaworḷetta sulaḷummu Wuke Susi ipappaatta sarangkaḷo'engnge. Nariaddi, amungkangngu Mawu Ruata mangonggolu aranna 'mawu' su manga taumata apan madaringikka wisara-Ne, ³⁶anio iamiu mabbisara Sia'u mangngadio'a Mawu

Ruata ana waugu nabbisara Ia'u Ana'u Mawu Ruata? Sumbaļi Ia'u nipile Mawu Ruata wuŗru nirolokka watukku runia. ³⁷Amungkangngu Ia'u tawe ma'ola'a manara apan tinantillu Iamangnga, iamiu arie pangimanna Sia'u. ³⁸Arawe ana waugu Ia'u, tinumuŗrutta manara udde, pangimante apa apan Ta'u ola'anna udde, salaiwe iamiu maddiri mangngimanna Sia'u. Ringannu aroddi iamiu maasingkatta wuŗru naasunna manungku Iamangnga sidutu su sambau ringang-Ku, wuŗru Ia'u sidutu su sambau ringannu Iamangnga."

³⁹Imangitou maddea'a lai manametta Mawu Yesus, arawe Itou naataļangnga wuassi mangitou.

⁴⁰Mawu Yesus nabelengke watukku samba'a n Saļukku Yordan, su tampa n Yohanes dorone mannarani, see natana'e poiaronddi. ⁴¹Manambo taumata nirumanta ringanni Tou, Imangitou mabbisara, "Yohanes tawe ma'ola'a manga aļarŗindu'a, arawe anambo n wisara su ola'u taumata indi mangke atonna." ⁴²See manambo taumata poiaronddi mangngimanna Mawu Yesus.

Apapate n Lazarus

11 Sangkatou aranne Lazarus uatana'a su Betania su sampunna ringannu tuŗrangnge Maria wuŗru Marta. ²Maria eteudde wawine apan nallaļinnu lana mawangngi su ledda Mawu Yesus, wuŗru see niapu n uta'i tou. Su sambau allo Lazarus nirumada'a. ³Rua ng katou tuŗrangnge namasingkatta Mawu Yesus, "Mawu, tuŗrangngi ami apan arangnguannu Mawu udde marada'a."

⁴Napawe Mawu Yesus naaringikka watti'a udde, Itou nabbisara, "Rada'a indi tawe maapate. Indi mariaddi tadea'u Mawu Ruata wantuhanna, wuŗru tadea'u ana waugu udde Ana'u Mawu Ruata lai iapaa-wantuga."

⁵Mawu Yesus marangngu si Marta, si Maria wuŗru si Lazarus. ⁶Arawe napawe Mawu Yesus naaringikka watti'a manungku Lazarus marada'a, Itou natana'a rua allo lai su tampane. ⁷Wua udde Itou nabbisara su mallaļarŗenggen-Ne, "Wette iite mabelengnga su Yudea."

⁸Imangitou sinumimbakka, "Iamangnga Huru, wakkute tanginna manga taumata n Yahudi maapulu manuntungngu watu su Iamangnga see orassa indi Iamangnga maapulu mabelengnga apia poiaronddi?"

⁹"Waļinewe allo aļannune mapuļo dua su oranne?" Wisara Mawu Yesus. "Taumata apan u'amatta su tempo allo, tawe matara ana waugu itou maasilo semakku runia indi. ¹⁰Arawe taumata apan u'amatta su tempo rabbi, mattara ana waugu tawe asasemakka sitou." ¹¹Ete aroddi

unnu Mawu Yesus. Wua udde Itou nabbisara apia, "Hawe ng kite Lazarus mattiille, arawe Ia'u sarun inai mamu'o sitou."

¹²Manga mallalajjengennu Mawu Yesus nabbisara, "Mawu, amungkangu Lazarus mattiilla, raddoite itou sarun mapia."

¹³Pandumannu Mawu Yesus eteudde manungku Lazarus natete. Arawe imangitou massunna manungku pandumannu Mawu Yesus udde Lazarus mattiilla wiasa. ¹⁴Ana waugu udde Mawu Yesus nabbisara simangitou ringannu masema-semakka, "Lazarus natete. ¹⁵Arawe Ia'u lulluassa lai ana waugu Ia'u tawe poiarroddi, ana waugu mappianne siamiu, tadea'u iamiu wotongnge mangngimanna. Wette iite inaita orassa indi ringanni Lazarus."

¹⁶Tomas isassago "I Rindua" nabbisara su manga ringanne mallalajjengennu Mawu Yesus, "Wette iite tumantalongnga, salaiwe iite mate su sambau ringanni Tou!"

Apan mapaawiakka apia wuṛṛu mangngonggolu wiakka

¹⁷Napawe Mawu Yesus na'omate su tampa udde, Lazarus appate allo alannune nilabingnga. ¹⁸Betania marani n Yerusalem, itatakasere tallu kilo meteṛṛe araune. ¹⁹Manambo taumata n Yahudi nirumanta nattembo si Marta wuṛṛu si Maria malluassa naungngi mangitou ana waugu apapate n tuṛṛangnge.

²⁰Napawe Marta naaringikka Mawu Yesus nirumanta, itou sinumabangnga nanaḷoho Mawu Yesus, arawe Maria natana'a su waḷe. ²¹Wisara Marta su Mawu Yesus, "Mawu, wuṛṛu Mawu isindi su orassa udde, asinungka tuṛṛangu tawe nate. ²²Arawe aroddi Ia'u masingkatta manungku orassa indi lai Mawu Ruata sarun mangagillu apa apan ra-dorongannu Mawu Sitou."

²³"Tuṛṛanggu sarun mabbiakka apia," wisara Mawu Yesus si Marta.

²⁴Marta sinumimbakka, "Ia'u masingkatta Lazarus sarun mabbiakka apia napawe taumata nate iapawangunna su Allo ng Kiamatta."

²⁵"Ete Ia'u apan mangngonggolu wiakka wuṛṛu mapaawangunnu taumata nate," wisara Mawu Yesus si Marta. "Taumata apan mangngimanna Sia'u sarun mabbiakka, salaiwe itou natete. ²⁶Wuṛṛu taumata wiakka apan mangngimanna Sia'u sarangkaḷo'engnge, itou tawe mate. Mangngimannawe i'o su olangnge udde?"

²⁷"Mawu," sasimbakki Marta, "ia'u mangngimanna Mawu Ana'u Mawu Ruata, Ratu m Punnu Saḷamatta apan sarun rumanta su runia indi."

Mawu Yesus nilumuai

²⁸Napawe i Marta nabbisara aroddi, itou inaita namago si Maria, tuffrangge wuŕru sinumaŕimburingnga sitou, "Iamangnga Huru isindite; Itou ma'iwaloŕonu." ²⁹Naaringikka udde, Maria maŕiha-ŕihakka nabuatta see inaita naisasomba Mawu Yesus. ³⁰Tempo udde, Mawu Yesus taambe sinumutta su ampungnga. Itou ta'e su tampa Marta naisasomba n Tou. ³¹Manga taumata n Yahudi apan tantaŕanna mallimbatta naungngi Maria su waŕe, naasilo si Maria nabbuatta wuŕru maŕiha-ŕihakka sinumabangnga; nariaddi imangitou inai lai tinumantalongnga sitou, ana waugu imangitou massunna manungku itou inai su laŕabinganna lumuai.

³²Napawe Maria na'omate su tampa Mawu Yesus wuŕru naasilo Sitou, Maria inumaŕintuda su saruannu Mawu Yesus wuŕru nabbisara, "Mawu, amungkangngu Mawu isindi su orassa udde, asinungka tuffrangku tawe nate."

³³Napawe Mawu Yesus naasilo si Maria lulluai, wuŕru manga taumata n Yahudi nirumanta sangkaŕrindo'i Maria udde lai lulluai, naung-Nge nasusa, wuŕru Itou niasiloanna mangke natuno atonna. ³⁴Ne Itou naiwaŕote simangitou, "Suapa iamiu nallabingngi tou?"

"Wette pa'ellega, Mawu." sasimbakki mangitou.

³⁵See Mawu Yesus nilumuai. ³⁶Ne manga taumata n Yahudi udde nabbisara, "Pa'ellega tawe hampa darangngu-Ne si Lazarus!"

³⁷Arawe pia su wallatti mangitou apan nabbisara, "Itou na'ola'a taumata wuta naasilo, anio Itou tawe naawa'ungnga tadea'u Lazarus tawe mate?"

Lazarus niapaawiakka apia

³⁸Mawu Yesus lembo natuno naung-Nge, see inaita su laŕabinganna. Laŕabinganna udde sambau loŕrangnga apan nitaapannu watu wahewa.

³⁹"Irua'a watu udde," unnu Mawu Yesus.

Marta, tuffrangngu taumata nate udde sinumimbakka, "Arawe Mawu, itou appate allo nilabingnga. Haŕurune mawukku'e!"

⁴⁰Mawu Yesus nabbisara si Marta, "Waŕinewe suete niwaŕo-U si'o: amungkangngu i'o mangngimanna, i'o saruŕn maasilo aroddi ahewalle taŕrino Mawu Ruata!" ⁴¹Ne imangitou nangirute n watu udde. See Mawu Yesus naningngara watukku langitta wuŕru nabbisara, "Aadiangkamanna, Iamangnga, ana waugu I'o suete naddaringikka Sia'u. ⁴²Ia'u masingkatta I'o sidutu uararingikka Sia'u. arawe Ia'u mabbisara indi, hunane su manga taumata isindi; tadea'u imangitou mangngimanna

manungku ete I'o apan nandolo-U." ⁴³Napawe suete nabbisara aroddi, Mawu Yesus inumui ringannu tingikka ma'ikkatta, "Lazarus, sab-bangke!" ⁴⁴Ne sinumabbangke taumata apan natete udde. Lima wuṛṛu leddane ta'e papi'unannu kaengnga kafan, wuṛṛu hatine tataappannu kaengnga tataappa hati. "Wu'ate kaengnga udde; tadea'u itou wotong-nge umamatta," unnu Mawu Yesus su manga taumata isudde.

Ammuḷannu taumata lumawangnga Mawu Yesus

(*Mat. 26:1-5; Mrk. 14:1-2; Luk. 22:1-2*)

⁴⁵Manambo manga taumata n Yahudi nirumanta mattembo si Mariá, nangimanna Mawu Yesus su tempo imangitou naasilo arariaddianna udde. ⁴⁶Arawe manga pira su wallatti mangitou inaita ringannu taumata n Farisi wuṛṛu nangalae apa apan suete niola'u Mawu Yesus. ⁴⁷Ana waugu udde manga taumata n Farisi wuṛṛu manga imam tembonanne naamulla ringannu Mallaṛṛuungngu Agama. Imangitou nabbisara, "Iite ṛinone ma'ola'a apa? Taumata indi ma'ola'a anambo n aḷaṛṛindu'a! ⁴⁸Amungkangngu iite sidutu mamala n Tou arendi, manambo taumata sarun mangngimanna Sitou. Wuṛṛu panginsueanne tembonannu Roma sarun rumanta wuṛṛu manggohakku Waḷe Mawu wuṛṛu anambo n walagi ite!"

⁴⁹Sangkatou su wallatti mangitou apan aranne Kayafas, imam wahewa su tonna udde, nabbisara, "Iamiu wagga n apa-apa. ⁵⁰Apa iamiu tawe maatutukka manungku ana waugu tumanangnge, mappianne sangkatou mate wuassu aḷawo'u pabbawalaga indi maṛṛimunsa'a?" ⁵¹Su ṛinone Kayafas nabbisara aroddi, waḷine wuassu ṛingiranne sassane. Arawe ana waugu itou sangkatou imam wahewalla tonna udde, itou namasingkatta manungku Mawu Yesus sarun mate hunane tumba'u su pabbawalagu Yahudi. ⁵²Wuṛṛu waḷine tumba'u su pabbawalagu Yahudi sassane, arawe hunane lai mangammula wuṛṛu manggemonnu manga aḷaṛṛana'u Mawu Ruata apan uasaḷiawukka.

⁵³Nanattakka allo udde manga tembonannu Yahudi na'irete mamate Mawu Yesus. ⁵⁴Ana waugu udde Mawu Yesus tate nattingkapasilo su saruannu awadaalla su pattangngannu taumata n Yahudi. Itou nanantangke n Yudea, see inaita watukku soa aranne Efraim marani wadda'a. Isudde Itou natana'a su sampunna ringannu mallaḷaṛṛenggen-Ne.

⁵⁵Tempo udde maranite Allo Wahewa m Paskah n Yahudi. Manambo taumata wuassu manga ampungnga inai watukku Yerusalem mallaghu m pamamaresi wadangnga tantaḷanna taambe ramea udde.

⁵⁶Imangitou maddea'a Mawu Yesus, wuṛṛu su tempo uaammulla su

Waļe Mawu, imangitou naiwaļo sangkatou ringannu waine. "Ereapa addapannu? Asinungka Itou tawe rumanta su ramea indi." ⁵⁷Imangitou nabbisara aroddi ana waugu manga imam tembonanne wuŗu manga taumata n Farisi suete namarenta manungku taumata apan masingkattu tampa Mawu Yesus, řinone mabaļo tadea'u Itou wotongnge sametanna.

Mawu Yesus niseborŗannu lana mawangngi su Betania

(*Mat. 26:6-13; Mrk. 14:3-9*)

12 Annummu allo tantaļanna taambe Allo Wahewa m Paskah, Mawu Yesus inaitu su Betania. Su soa udde uatana'a Lazarus apan suete niapawangunna wuassu papate. ²Poiaroddi Mawu Yesus sinaruanni mangitou, wuŗu Marta nangimbe. Lazarus wuŗu manga raho ua'ianna su sampunna u'anna ringannu Mawu Yesus. ³Wua udde Maria nirumanta uaapiddu irarŗangngo maļoara su liteŗe lana mawangngi narwastu apan masagada atonna aregane. Itou nanebokku lana udde su ledda Mawu Yesus, see niapu n uta'i tou. Ahewallu waļe udde nabaļi mawangngi ana waugu haļuru n lana udde. ⁴Arawe Yudas Iskariot, sangkatou su wallattu mallaļarŗenggenno Mawu Yesus - apan wua udde nandaļeo Sitou - nabbisara, ⁵"Anio lana mawangngi udde tawe niwaļu'a ringannu aregane tallu řasutta roitta saļa'a, wuŗu roinne ionggolla su taumata asiangnga?" ⁶Yudas nabbisara aroddi waļine ana waugu itou tuttundaallu taumata asiangnga, arawe ana waugu itou taŗa ta'o. Itou masokka manna'o roitti mangitou wuassu pangadoannu roitta apan uaraddo sitou.

⁷Arawe Mawu Yesus nabbisara, "Wala'e wawine udde! Itou na'ola'a indi huna n allo pallabingang-Ku. ⁸Taumata asiangnga sidutu su wallatti amiu, arawe Ia'u tawe."

Ammuļannu taumata lumawanna si Lazarus

⁹Manambo taumata n Yahudi naaringikka manungku Mawu Yesus poi su Betania, nariaddi imangitou inaitu lai poiaroddi. Imangitou inai tawe tumba'u ana waugu Mawu Yesus. Arawe ana waugu imangitou lai maapulu ma'ellega si Lazarus apan suete niapaawiakki Tou wuassu papate. ¹⁰Ana waugu udde manga imam tembonanne maapulu lai mamate si Lazarus; ¹¹ana waugu ete itou naanambo taumata n Yahudi nanantangngi mangitou, wuŗu nangimanna Mawu Yesus.

Mawu Yesus sinumutta su Yerusalem ringannu awawantuga

(Mat. 21:1-11; Mrk. 11:1-11; Luk. 19:28-40)

¹²Su allo tiṛṛabbine manga taumata apan suete nallaghu m Pas-kah, naaringikka manungku Mawu Yesus tantaḷanna u'amatta matudda n Yerusalem. ¹³Ne imangitou nanappo manga rongngu palem see inainte nanansomakka Sitou, lapiddu u'ui, "Paddalote Mawu Ruata! Inaḷamatanna Itou apan nirumanta ringannu arannu Mawu. Niaḷamatanna Ratu n Israel!"

¹⁴Mawu Yesus naasomba sambau keledai saṛṛe n tumuwo wuṛṛu sina'eanni Tou. Natipusse apa apan uawoṛṛetta sulaḷummu Wuke Susi:

¹⁵"Arie paata'utta, maṛṛuala n Sion!

Pa'ellege Ratunu nirumanta,

uasa'e sambau keledai saṛṛe n tumuwo!"

¹⁶Su tempo udde manga mallalaṛṛenggenno Mawu Yesus taambe naasunna saranganambone udde. Arawe napawe Mawu Yesus niaapawantuga ringannu papate-Ne, wakkute udde imangitou naanaungnga manungku apa apan niola'u manga taumata Sitou uawoṛṛette sulaḷummu Wuke Susi su ola'i Tou.

¹⁷Manga taumata apan uasemodda su tempo Mawu Yesus namago si Lazarus niapaasabangnga wuassu laḷabinganna wuṛṛu namangunna sitou wuassu papate, sidutu mattiala su olangnge udde. ¹⁸Ana waugu udde taumata nambo inainte ringannu Mawu Yesus ana waugu imangitou naaringikka manungku ete Itou apan na'ola'a alaṛṛindu'a udde. ¹⁹Ne manga taumata n Farisi uawawisarate sangkatou ringannu sangkatou, "Iite tawe mapa'ola'a apa-apa! Pa'ellege, anambo n laḷoṛṛo n runia uatantalongnga Sitou!"

Manga pira taumata n Yunani maddea'a Mawu Yesus

²⁰Su wallattu manga taumata apan inai su Yerusalem mattaṛṛamawu su tempo n ramea udde pia lai manga pira taumata n Yunani.

²¹Imangitou nirumanta ringanni Filipus wuṛṛu nabbisara, "Tuṛṛangnga, amungkanngu wotongnge, iami maapulu maisasomba Mawu Yesus." (Filipus taumata wuassu Betsaida su Galilea.)

²²Ne Filipus inainte namasingkattu pandumanne udde si Andreas, wuṛṛu saḷimmurine itarua namasingkatte Mawu Yesus. ²³Mawu Yesus

nabbisara simangitou, "Nia'omante tempone Ana'u Taumata wanutuhanna. ²⁴Mangke atonna wisara-U indi: Amungkanngu gandumma sambatu tawe iasi'a su leta'a wuṛru mate, itou ta'e matatana'a sambatu. Arawe amungkanngu watu n gandumma udde mate, wakkute udde itou mabua manambo. ²⁵Taumata apan mandanngu wiakke sarun awuḷianu wiakke. Arawe taumata apan maddantinnu wiakke su runia indi, sarun maapaduḷi wiakka tutune wuṛru saran maḷannu-ḷannu. ²⁶Taumata apan maapulu mangimbe Sia'u ṛinone tumantalongnga Sia'u; tadea'u mangangimbe'u wotongge su sambau ringang-Ku su tampa Ia'u uatana'a. Taumata apan mangngimbe Sia'u sarun addatannu Iamang-Ku."

Mawu Yesus namasingkattu papate-Ne

²⁷"Naungku susinggawangnga; apa Ta'u iwisara su orassa indi? Rinonewe Ia'u mabbisara, 'Iamangnga liua'awe Ia'u wuassu orassa indi'? Arawe tadea'u Ia'u maappendamma orassu asasusa indi Ia'u nirumanta. ²⁸Iamangnga, mawantuga arannu!" Ne niaringirṛanna tingikka wuassu langitta nabbisara, "Ia'u suete namantuga Sitou, wuṛru Ia'u sarun mamantuga lai Sitou."

²⁹Awadaalla isudde naaringikka tingikka udde. Imangitou nabbisara, "Udde rallu'a!" Arawe piaddu lai nabbisara, "Waḷine! Mala'ekatta uahahatto n Tou!"

³⁰See Mawu Yesus nabbisara simangitou, "Tingikka udde niaringirṛanna, waḷine hausang-Ku, arawe maola'a hausannu. ³¹Tempone nia'omante runia parikisanna; orassa indi tembonannu runia tate ipaatta. ³²Arawe Ia'u indi, amungkanngu Ia'u suete niruitta su wowo n runia, Ia'u sarun mamago anambo n taumata rumanta ringang-Ku." ³³Itou nabbisara aroddi tadea'u mapaaḷiatta'u ereapa olangge Itou mate.

³⁴Manga taumata nambo udde nabbisara Sitou, "Tumuṛruttu Wuke n Tita ng kami, Ratu m Punnu Saḷamatta sarun mabbiakka sarangkaḷo'engge. Ereapa I'o wotongge mabbisara manungku Ana'u Taumata ṛinone iruitta su wowo n runia? Isai Ana'u Taumata udde?"

³⁵Mawu Yesus sinumimbakka, "Tumba'u tantaḷanna adio'a semakka udde su wallatti amiu. Nariaddi amatte tantaḷanna semakka udde ta'e pia, tadea'u iamiu tawe aratingannu randumma. Taumata apan u'amatta su ararandumma wagga suapa pattudanne. ³⁶Pangimante su semakka udde, tantaḷanna semakka udde ta'e ringanni amiu, tadea'u iamiu maola'a alaṛṛana'u asasekakka."

Manga taumata n Yahudi tawe mangngimanna

Napawe Mawu Yesus suete nabbisara aroddi, Itou nangingkatte wua isudde wuṛṛu maddirite mattingkapasilo m watangan-Ne simangitou. ³⁷Salaiwe manambote aḷarṛindu'a apan niola'u Mawu Yesus su saruanni mangitou, imangitou tawe lai mangngimanna Sitou. ³⁸Ne natipusse apa apan niapasingkatti Nabi Yesaya,

"Mawu, isai mangngimanna watti'i ami?

Ete sisai tarṛino Mawu niapaaliatta'a?"

³⁹Ana waugu udde imangitou tawe mangngimanna, ana waugu Yesaya suete nabbisara apia,

"Mawu Ruata nabbisara,

⁴⁰Ia'u mapaawuta mata mangitou,
maola'a naungngi mangitou maatikka;
tadea'u imangitou tawe maasilo,
ṛingirṛanni mangitou tawe maasunna.

Tadea'u imangitou tawe mabelengnga ringang-Ku,
see Ia'u mapaapia mangitou."

⁴¹Yesaya nabbisara aroddi ana waugu itou suete naasilo awawantugu Mawu Yesus wuṛṛu nabbatti'a su ola'i Tou.

⁴²Salaiwe aroddi, manambo taumata, ewe'e lai su wallattu tembonannu Yahudi lai mangngimanna Mawu Yesus. Arawe imangitou tawe waṛṛani manga'u udde ringannu uahahati, ana waugu imangitou matta'utta arṛengenne taumata n Farisi maningaddi mangitou sumutta su waḷe m pattatarṛamawuanna. ⁴³Imangitou lembo maapulu maasomba daralo n taumata wuassu daralo Mawu Ruata.

Wisara Mawu Yesus ipamarikissa taumata

⁴⁴See Mawu Yesus inumui, "Taumata apan mangngimanna Sia'u, waḷinewe Sia'u itou mangngimanna, arawe Sitou apan nandolo-U.

⁴⁵Wuṛṛu taumata apan naasilo Sia'u, naasilo lai Sitou apan nandolo-U. ⁴⁶Ia'u nirumanta su runia indi maola'a sambau asasemakka, tadea'u anambo n taumata apan mangngimanna Sia'u tawe matana'a sulalṛummu ararandumma. ⁴⁷Taumata apan maddaringikka aḷara-U, arawe tawe tumuṛṛutta - waḷine Ia'u makkuumanni tou. Ana waugu Ia'u nirumanta waḷinewe mamarikissa runia indi, arawe rumanta manaḷamatta.

⁴⁸Taumata apan mannoḷa-U wuṛṛu maddiri maddaringikka wisara-U, piate mallarṛuungnge. Wisara apan Ta'u iapaasingkatta, eteudde sarun ipamarikissa sitou su Allo ng Kiamatta. ⁴⁹Ana waugu Ia'u tawe

mabbisara wuassu apulu-U sassane; lamangnga apan nanadolo-U, ete Itou apan namarenta Sia'u apa apan Ta'u iwisara wuꞖru iapaasingkatta. ⁵⁰ WuꞖru Ia'u masingkatta manungku parenta-Ne udde mangngonggolu wiakka tutune wuꞖru saran maꞖannu-Ꞗannu. Ne Ia'u lai namasingkatta ere lai niaꞖra'u lamangnga Sia'u."

Mawu Yesus nangukassa ledda manga mallaꞖaꞖrenggen-Ne

13 Allo massallo tantaꞖanna taambe nia'omanna Allo Wahewa m Paskah, Mawu Yesus naasingkatte manungku temponete Itou manantangngu runia indi mabelengnga ringannu lamang-Nge. Itou mandangngu manga taumata apan tatahuanan-Ne su runia, wuꞖru Itou sidutu mandangngu simangitou ma'oma n sara m panginsueanne.

²Mawu Yesus wuꞖru manga mallaꞖaꞖrenggen-Ne tantaꞖanna u'anna annu Ꞗabbi. Setanna suete napaasutta m pandumanne sulaꞖummu naunggi Yudas ana'i Simon Iskariot ipamate Mawu Yesus. ³Mawu Yesus masingkatta manungku lamangnga suete nanantillu aꞖawo'u taꞖrino Sitou. Itou masingkatta lai manungku Itou nirumanta wua dingannu Mawu Ruata wuꞖru sarun mabelengnga lai ringannu Mawu Ruata. ⁴Ana waugu udde Itou nirumarisikka, nalluatta jubah-Ne, wuꞖru nama'issu handukka su lawan-Ne. ⁵Wua udde Itou nallaꞖinnu ua'e sulaꞖummu sambau pangangukasanna lima, see nanattakke nangukassa ledda manga mallaꞖaꞖrenggen-Ne wuꞖru niapaamara n handukka apan uawa'issa su lawan-Ne. ⁶Na'omate Itou ringanni Simon Petrus, apan nabbisara, "Mawu, Ꞗatadde Mawu nangukkassa ledda'u?"

⁷Mawu Yesus sinumimbakka, "Orassa indi i'o tawe maasunna apa apan a'olaang-Ku indi, arawe saꞖimmurine i'o sarun maasunna."

⁸"Arie Mawu," wisara m Petrus su Mawu Yesus, "Arie saran paassa Mawu mangukkassa ledda'u!"

Arawe Mawu Yesus sinumimbakka, "Amunggangngu Ia'u tawe mangukkassa leddanu, i'o tawe paa'aukka ringang-Ku."

⁹Simon Petrus nabbisara, "Amunggangngu aroddi, Mawu, arie tumba'u ledda'u, ewe'e lima'u wuꞖru pua'u lai!"

¹⁰"Taumata apan suete nandeno, nawaresite sarangkanambone," wisara Mawu Yesus si Petrus. "Itou salaiwe tate waresianna; tumba'u leddane. Iamiu indi nawaresite, arawe tawe sarangkanambone." (¹¹Mawu Yesus masingkatte isai apan sarun mamate Sitou. Ana waugu udde itou nabbisara, "Iamiu indi nawaresite arawe tawe sarangkanambone.")

¹²Napawe Mawu Yesus suete nangukassa ledda mangitou, Itou nalluꞖrete apia jubah-Ne see inuma'ianna apia. See Itou nabbisara

simangitou, "Iamiu maasunna apa apan wakkute niola-U siamiu?
¹³Iamiu mammago Sia'u huru wurru Mawu. Wurru atonna aroddi.

¹⁴Amungkangngu Ia'u Mawu wurru hurunu nangukkassa leddanu, iamiu rinone lai uaa'ukkasa ledda. ¹⁵Ia'u mangngonggolu tulada indi siamiu, tadea'u iamiu lai ma'ola'a apa apan suete Ta'u inola'a siamiu. ¹⁶Mangke atonna wisara-U indi: Sangkatou allangnga tawe magewalanna wuassu mawune, wurru sangkatou daroloŕŕanna tawe magewalanna wuassu mandarolokke. ¹⁷Amungkangngu iamiu maasingkate n sarangkanambone indi, alaŕuassa siamiu apan suete na'ola'a manara udde.

¹⁸Apa apan Ta'u niwisara indi walineuwe su ola'i amiu sarangkanambone. Ia'u masingkatta isai-sai apan suete nipile. Arawe apa apan uawoŕŕetta sulaŕummu Wuke Susi rinone matipussa, eteudde 'Tau-mata apan u'anna su sambau ringang-Ku sarun lumawangnga Sia'u.'

¹⁹Olangnge udde Ta'u iapaasingkatta siamiu orassa indi, tantaŕanna taambe natipussa, tadea'u amungkangngu olangnge udde mariaddi, iamiu sarun mangngimanna manungku ete Ia'u apan isassago IA'U INDI. ²⁰Mangke atonna wisara-U indi: Isai manarimmattu taumata Ta'u nirolokka, mannarimma-U lai. Wurru isai mannarimma-U, itou lai manarimmatti Tou apan nandolo-U."

Mawu Yesus namasingkattu pamamate watangan-Ne

(Mat. 26:20-25; Mrk. 14:17-21; Luk. 22:21-23)

²¹Napawe Mawu Yesus suete nabbisara aroddi, naunggi Tou mangke natuno. See Itou nabbisara, "Mangke atonna wisara-U indi; sangkatou wuassu wallatti amiu sarun mamate Sia'u."

²²Manga mallaŕŕenggen-Ne uaa'ellega sangkatou ringannu sangkatou, wurru lembo n tinumiangnga ana wangu wagga isai apan ipappandum-Me uddè. ²³Mallaŕŕenggenna apan arangnguannu Mawu Yesus ua'ianna su samba'a Mawu Yesus. ²⁴Simon Petrus inumeramma sitou, tadea'u itou maiwaŕo Mawu Yesus tanne isai apan pappandumanne udde.

²⁵Ne mallaŕŕenggenna udde nangundani Mawu Yesus wurru naiwaŕo, "Isai itou Mawu?"

²⁶Mawu Yesus sinumimbakka, "Taumata apan Ta'u ongoŕannu roti apan Ta'u iammo sulaŕummu mangko, ete itou taumatane." Ne Mawu Yesus nanganu roti sampaddi, niammo sulaŕummu mangko see nionggolla si Yudas ana'i Simon Iskariot. ²⁷Napawe Yudas nanengkamma roti udde, Setanna sinumuttate sulaŕummu naungnge. See Mawu Yesus nabbisara sitou, "Ola'e paaŕihakka apa apan sarun olaannu."

²⁸Tawe saran sangkatou wuassi mangitou apan ua'ianna u'anna isudde

naasunna anio Mawu Yesus nabbisara aroddi si Yudas. ²⁹Piaddu masunna Mawu Yesus mandolokki Yudas mamalli sarannapa apan ipaatta su andeangnga udde, ara'e mangonggolu roitta adio'a su taumata asiangnga ana waugu Yudas eteudde sangkatou mananahipunna roitti mangitou.

³⁰Napawe Yudas nanengkamma roti udde, itou lapiddu sinumabangnga. Allo rabbite.

Parenta apan wakku

³¹Napawe Yudas sinumabangke, Mawu Yesus nabbisara, "Orassa indi Ana'u Taumata wantuhanna, wuɽu Mawu Ruata wantuhanna sulaɽummi Tou. ³²Amungkangngu Mawu Ruata wantuhanna sulaɽummi Tou, Itou lai sarun wantuhannu Mawu Ruata sulaɽummu wadang-Nge sassane. Ewe'e Mawu Ruata lai sarun mamantuga Sitou ringannu maɽihakka. ³³Manga aɽaɽrana-U, Ia'u tate matana'a maɽannu lai ringanni amiu. Iamiu sarun maddea'a Sia'u, arawe ere suete niwaɽo-U su manga tembonannu Yahudi, aroddi lai iwaɽo-U siamiu; su tampa patuddang-Ku, iamiu tawe maaranta isudde. ³⁴Parenta wakku apan Ta'u ionggolla siamiu: Padarangngute sangkatou ringannu waine. Ere lai Ia'u mandangngu siamiu, aroddi lai iamiu ɽinone uararangngu. ³⁵Amungkangngu iamiu uararangngu, anambo n taumata sarun maasingkatta manungku iamiu mallaɽaɽrenggeng-Ku."

Papatta manungku Petrus sarun massinaadu Mawu Yesus

(*Mat. 26:31-35; Mrk. 14:27-31; Luk. 22:31-34*)

³⁶"Mawu, Mawu inai watukkuapa?" aiwaɽo n Simon Petrus su Mawu Yesus. Mawu Yesus sinumimbakka, "Su tampa tuddang-Ku, i'o tawe maatantalongnga orassa indi. I'o sarun tumantalongnga Sia'u saɽimmurine."

³⁷"Mawu, anio ia'u tawe maatantalongnga Mawu orassa indi?" aiwaɽo n Simon Petrus apia. "Ia'u maɽuassa mate ana waugu Mawu!"

³⁸Mawu Yesus sinumimbakka, "Atonna i'o maɽuassa mate ana waugu Ia'u? Paanaunge, tantaɽanna manu'a taambe inumu'u, paatallute i'o nabbisara manungku i'o wagga-U!"

Mawu Yesus laʔanna matudda n lamangnga

14 "Arie naungngu suminggawangnga," wisara Mawu Yesus simangitou. "Pangimante Mawu Ruata, wuʔru pangimante Sia'u lai. ²Su wale n lamang-Ku manambo tampa atatanaanna. Ia'u inai watukku tampa udde manaddia tampa ng kamiu. Ia'u tawe mabbisara aroddi siamiu amungkangngu udde tawe mariaddi. ³Napawe Ia'u suete nanaddia tampa ng kamiu, Ia'u sarun mabelengnga wuʔru manaʔoho siamiu, tadea'u suapa Ia'u isudde, isudde lai iamiu. ⁴Watukku tampa Ia'u umamatta iamiu lai masingkattu laʔanne."

⁵See Tomas nabbisara Mawu Yesus, "Mawu, iami wagga suapa Mawu inai, ereapa iami maasingkattu laʔanne?"

⁶Mawu Yesus sinumimbakka, "Ete Ia'u laʔanna ipa'illaʔa Mawu Ruata wuʔru see maasomba wiakka. Tawe saran sangkatou wotongnge rumanta ringannu lamangnga, amungkangngu tawe umamatta lumiu Sia'u. ⁷Unnu wisara iamiu maaillaʔa Sia'u, iamiu lai maaillaʔa lamang-Ku. Orassa indi iamiu naaillaʔate Sitou, wuʔru suete naasilo Sitou."

⁸Ne Filipus nabbisara Mawu Yesus, "Mawu ta'ea'a lamangnga udde siami tadea'u iami maasunnate."

⁹Arawe Mawu Yesus sinumimbakka, "Maʔannute Ia'u su sambau ringanni amiu, iamiu taambe lai naaillaʔa Sia'u, Filipus? Taumata apan naasilote Sia'u, naasilote lai lamangnga. Ereapa i'o wotongnge mabbisara, 'Ta'ea'a lamangnga siami'?" ¹⁰Filipus! I'o tawe mangngimanna, manungku Ia'u su sambau ringannu lamangnga, wuʔru lamangnga su sambau ringang-Ku? Apa niwisara-U si'o, tawe niwisara-U wua-ssu wadang-Ku sassane. lamangnga apan sidutu su sambau ringang-Ku ete Itou apan nammanara sarangkanambone udde. ¹¹Pangimante Sia'u, manungku Ia'u su sambau ringannu lamangnga wuʔru lamangnga su sambau ringang-Ku. Ara'e amungkangngu tawe, pangimante, ana waugu aʔawo'u inolaang-Ku apan suete niola-U. ¹²Mangke atonna wisara-U indi; Taumata apan mangngimanna Sia'u, sarun tumuʔrutta apa apan suete Ta'u niola'a, - ewe'e itou sarun ma'ola'a lembo n ahewaʔanne lai - ana waugu Ia'u inai ringannu lamangnga. ¹³Wuʔru aʔawo'u apa apan raddoronganni amiu sulaʔummu arang-Ku, udde sarun olaang-Ku lai siamiu, tadea'u lamangnga wantuhanna sulaʔummu Ana'a. ¹⁴Aʔawo'u apa apan raddoronganni amiu sulaʔummu arang-Ku, sarun olaang-Ku."

Mawu Yesus na'ire n daranta n Gharraho Mawu Ruata

15"Amungkanngu iamiu maranggu Sia'u, iamiu sarun tumurputta manga parenta-U. 16Ia'u sarun madorongnga su Iamangnga, wurru Itou sarun manganggilla siamiu Mattatujungnga waine, apan sarun matana'a ringanni amiu saran ma'annu-l'annu. 17Itou udde Gharraho Mawu Ruata apan sarun mapaaljatta'u atatujiddu Mawu Ruata. Runia maddiri n Tou, ana waugu tawe maasilo wurru tawe maailala Sitou. Arawe iamiu maailala Sitou, ana waugu Itou uatana'a su sambau ringanni amiu wurru uauukka ringanni amiu.

18Iamiu tawe itantang-Ku sassane ere asisi m pa'ussa. Ia'u sarun mabelengnga ringanni amiu. 19Tate ma'annu runia maasilo Sia'u. Arawe iamiu sarun maasilo Sia'u. Wurru ana waugu Ia'u wiakka, iamiu lai sarun mabbiaakka. 20Napawe nia'omante allo udde, iamiu sarun maasingkatta manungku Ia'u uauukka ringannu Iamangnga, wurru iamiu uauukka ringang-Ku, wurru Ia'u uauukka ringanni amiu.

21Taumata apan tutturputta manga parenta-U wurru ma'ola'a, itou maranggu Sia'u. Iamang-Ku sarun mandangngu taumata apan mandangngu Sia'u. Ia'u lai sarun mandangngu taumata udde wurru mapaaljatta'u riri-U sitou."

22Yudas (wa'ine Yudas Iskariot) naiwalo Mawu Yesus, "Mawu, anio Mawu mapaaljatta'u riri-Nu siami wurru tawe su runia?"

23Mawu Yesus sinumimbakka, "Taumata apan mandangngu Sia'u, sarun tumurputta alarra-U. Iamang-Ku sarun mandangngu sitou. Iamang-Ku wurru Ia'u sarun rumanta ringanni tou wurru matana'a su sampunna ringanni tou. 24Taumata apan tawe mandangngu Sia'u, tawe tumurputta alarra-U. Alarra'a apan niaringiranni amiu udde, wa'ine wuassia-U, ewe'e wuassu Iamangnga apan nandolo-U.

25Sarangkanambone udde suete niwalo-U siamiu, tanta'anna Ia'u ta'e su sambau ringanni amiu. 26Arawe Gharraho Mawu Ruata, Mattatujungnga apan sarun irolokku Iamangnga sula'ummu arang-Ku, ete Itou apan mangarra'a siamiu su ola'u sarangkanambone wurru mapanaungnga su ola'u sarangkanambone apan suete Ta'u niapaasingkatta siamiu.

27Alajuassa Ta'u itantangnga siamiu. Alaju-U sassane apan Ta'u nionggolla siamiu. Ta'u nionggolla udde wa'ine ere nionggolu runia indi siamiu. Arie passinggawangnga, arie paata'utta. 28Iamiu suete naaringikka Sia'u mabbisara, 'Ia'u sarun manantangngi amiu, arawe Ia'u sarun mabelengnga apia ringanni amiu'. Amungkanngu iamiu mandangngu Sia'u, iamiu sarun lumuassa ana waugu Ia'u inai ringannu Iamangnga, ana waugu Iamangnga magewalanna wuassia-U. 29Ia'u mamasingkattu

udde siamiu orassa indi, tantaļanna sarangkanambone udde taambe mariaddi, tadea'u napawe mariaddite, iamiu sarun mangngimanna. ³⁰Ia'u tate mabbisara manambo lai ringanni amiu, ana waugu nia'omante tempone tembonannu runia indi rumanta. Arawe itou tawe uatařřino su riri-U. ³¹Arawe sarangkanambone udde sarun mariaddi tadea'u runia maatutukka manungku Ia'u marangngu Iamangnga wuřřu tuttuřřutta aļawo'u apa apan nirolokku Iamangnga Sia'u.

Ne, wette iite inaite mangingkatta wua isindi."

Mawu Yesus punnu anggore apan tutune

15 Mawu Yesus nabbisara apia, "Ia'u punnu anggore apan tutune, wuřřu Iamang-Ku mabbawaille. ²Suapa n ranna Sia'u apan tawe mabua, pototanna, wuřřu ranna apan mabua, hainganna rongngane, wuřřu lauřřanna tadea'u lembo manambo lai wuane. ³Iamiu naļaukke,



Solla n alu anggore (15:5)

ana waugu aļarřa'a apan Ta'u nionggolla siamiu. ⁴Paasidutua'e uaaukka ringang-Ku wuřřu Ia'u lai mangke sidutu ringanni amiu. Ranna sassane tawe mabua, tabene'e itou sidutu uaammullu punene. Aroddi lai iamiu tumba'u wotongnge mabua, amungkangngu sidutu su sambau ringang-Ku.

⁵Ete Ia'u punnu anggore, wuřřu iamiu manga rannane. Taumata apan sidutu uaaukka ringang-Ku wuřřu Ia'u ringanni tou, sarun mabua manambo; ana waugu amungkangngu tawe Ia'u, iamiu tawe maola'a

apa-apa. ⁶Taumata apan maddiri uaukka ringang-Ku, sarun iramme ere ranna, ana see marrangute. Manga ranna ereudde sarun iammulla wuṛṛu iramme su putungnga, see tutunganna. ⁷Amungkangngu iamiu sidutu uaukka ringang-Ku wuṛṛu aḷaṛṛa-U uatataka'a sulaḷummu naungngu, padorongke su lamangnga apa apan ipaapulunu; darorongngu udde sarun suunganna. ⁸Amungkangngu iamiu mabua manambo, lamang-Ku wantuhanna; wuṛṛu ringannu aroddi iamiu atonna-tonna maola'a mallaḷaṛṛenggeng-Ku. ⁹Ere lai lamangnga marangngu Sia'u, aroddi lai Ia'u marangngu siamiu. Rinone iamiu sidutu mabbiakka ere taumata apan arangngu-Ku. ¹⁰Amungkangngu iamiu tuttuṛṛutta manga parenta-U, iamiu sidutu matammuda su darangngu-U ere lai sidutu matuṛṛutta su darangngu n lamangnga ana waugu tuttuṛṛutta manga parenta-Ne.

¹¹Sarangkanambone indi Ta'u iapaasingkatta siamiu, tadea'u aḷaḷua-U mangke pia sulaḷummu naungngu, wuṛṛu aḷaḷuannu maola'a masuungnga. ¹²Indite parenta-U; pandangngute sangkatou ringannu waine, ere lai Ia'u mandangngu siamiu. ¹³Taumata apan lembo mandangngu manga hawene eteudde taumata apan mangngonggolu wiakke simangitou. ¹⁴Ete iamiu manga hawe-U, amungkangngu iamiu tuttuṛṛutta apa apan ipaparenta-U siamiu. ¹⁵Ia'u tate lai mamago siamiu allangnga, ana waugu allangnga wagga apa apan tantaḷanna mammanarannu mawune. Iamiu wagoangkute hawe, ana waugu sarangkanambone apan niaringiṛrang-Ku wuassu lamangnga, suete Ta'u niapaasingkatta siamiu. ¹⁶Waḷine iamiu namile Sia'u. Ete Ia'u apan namile siamiu, wuṛṛu nandolokki amiu tadea'u mabua manambo - manga wua apan tawe maḷaḷeo. Ne lamangnga sarun mangngogolla siamiu aḷawo'u apa apan radoronganni amiu Sitou sulaḷummu arang-Ku. ¹⁷Ete indi parenta-U siamiu: Padarangngute sangkatou ringannu sangkatou."

Runia maddantinni amiu

¹⁸"Amungkangngu runia maddantinni amiu, paanaunge manungku Ia'u doronete pinaddantinnu runia. ¹⁹Amungkangngu iamiu tatahuanannu runia, iamiu sarun rangnguannu runia maola'a pussaane. Arawe Ia'u suete namile siamiu wuassu runia indi, nariaddi iamiu tate lai tatahuanannu runia. Ana waugu udde runia maddantinni amiu. ²⁰Paanaunge wisara apan suete niwaḷo-U siamiu, 'Allangnga tawe magewaḷanna wuassu mawune.' Amungkangngu imangitou suete mamate Sia'u, imangitou sarun mamate siamiu lai. Amungkangngu imangitou tuttuṛṛutta aḷaṛṛa-U, imangitou sarun tumuṛṛutta aḷaṛṛangngu lai. ²¹Sarangkanambone udde sarun olaanni mangitou siamiu, ana waugu iamiu mallaḷaṛṛenggeng-Ku, ana waugu imangitou tawe maailaḷa Sitou

apan nandolo-U. ²²Unnu wisara Ia'u tawe nirumanta, wuṛṛu tawe namasingkattu sarangkanambone udde simangitou, imangitou tawe dosane. Arawe orassa indi imangitou tawe mapassinaaddu rosa mangitou. ²³Taumata apan maddanting-Ku, maddantinnu Iamang-Ku. ²⁴Unnu wisara su pattangnganni mangitou Ia'u tawe na'ola'a apa apan taambe niola'u taumata waine, imangitou tawe dosane. Arawe orassa indi imangitou suete naasilo apa apan suete niola-U, wuṛṛu imangitou maddanting-Ku wuṛṛu maddantinnu Iamang-Ku lai. ²⁵Arawe aroddite ṛinone, tadea'u matipusse apa apan uawoṛṛetta sulafummu Wuke m Tita mangitou, eteudde: 'Imangitou maddanting-Ku tawe pinangiananne.'

²⁶Ia'u sarun mandolokku Mantataṛungnga siamiu apan darantane wuassu Iamangnga. Ete Itou Ghaṛṛaho apan sarun mapaaṛiatta'u taṛṛino Mawu Ruata. Amungkanngu Itou rumanta, Itou sarun mangonggolu tatiala su ola'u riri-U. ²⁷Wuṛṛu iamiu lai ṛinone mangonggolu tatiala su ola'u riri-U ana waugu iamiu uaukke ringang-Ku ro'e n paarorone.

16 Sarangkanambone udde Ta'u niapaasingkatta siamiu tadea'u iamiu tawe massinaadda. ²Iamiu sarun iapaasabangnga wuassu manga waḷe m pattataṛamawuanna. Wuṛṛu sarun a'omanna tempone manungku taumata apan mamate siamiu massunna itou massubba Mawu Ruata. ³Imangitou ma'ola'a udde siamiu ana waugu imangitou taambe naaillaḷa Iamangnga aroddi lai Sia'u. ⁴Arawe orassa indi iwaḷo-U olangnge udde siamiu, tadea'u amungkanngu udde mariaddi murine, iamiu maanaungnga manungku Ia'u suete namasingkatta siamiu."

Manara n Ghaṛṛaho Mawu Ruata

"Hatto indi tawe Ta'u niwaḷo siamiu ro'e n paarorone, ana waugu Ia'u ta'e su sampunna ringanni amiu. ⁵Arawe orassa indi Ia'u sarun inai ringanni Tou apan nandolo-U; wuṛṛu tawe saran sangkatou wuassi amiu maiwaḷo, watukkuapa Ia'u inai. ⁶Orassa indi ewe'e naungngu niatambanna asasusane, ana waugu Ia'u namasingkattu olangnge udde siamiu. ⁷Arawe Ia'u mamasingkatta atonna siamiu: Mappianne siamiu amungkanngu Ia'u inai; ana waugu amungkanngu Ia'u tawe inai, Mantataṛungnga udde tawe rumanta ringanni amiu. Arawe amungkanngu Ia'u inai, Ia'u sarun mandolokki Tou ringanni amiu. ⁸Amungkanngu Itou nirumantate, itou sarun mapaaṛiatta'a su runia atapasannu rosa, apan ṛinone, wuassu inolaanna apan atonna, wuṛṛu wuassu ṛuumannu Mawu Ruata. ⁹Itou sarun mapaaṛiatta'a manungku tawe mangngimanna Sia'u, udde lai rosa; ¹⁰manungku Ia'u atonna, ana waugu Ia'u inai ringannu Iamangnga wuṛṛu iamiu tate maasilo Sia'u lai; ¹¹wuṛṛu manungku Mawu

Ruata mannattake marꞑuumanna, ana waugu tembonannu runia indi suete niꞑuumanna.

¹²Manambo lai Ta'u iwaḷo siamiu, arawe orassa indi iamiu tawe maa-sengkamma. ¹³Arawe amungkangngu Ghaꞑꞑaho udde rumanta, eteudde itou apan napaaliatta'u atatuḷiddu Mawu Ruata iamiu sarun ehetanne iapaailaḷa anambo n taꞑꞑino. Itou tawe mabbisara wuassu riri-Ne sa-sane arawe mamasingkattu apa apan suete niaringiꞑꞑanne, wuꞑꞑu Itou namasingkatta siamiu apa apan sarun mariaddi su allo n saḷimmurine. ¹⁴Itou sarun mamantuga Sia'u, ana waugu apa apan suete niapaasing-katta siamiu, sinengkamma wuassia-U. ¹⁵Sarangkanambone apan tata-huanannu Iamangnga udde lai tatahuanang-Ku. Ana waugu udde Ia'u mabbisara manungku apa apan niapaasingkattu Ghaꞑꞑaho siamiu, ni-sengkamme wuassia-U."

Asasusa wuꞑꞑu aḷaḷuassa

¹⁶"Ete adio'a lai tempone, iamiu tate maasilo Sia'u, wuꞑꞑu ete adio'a lai tempone iamiu sarun maasilo Sia'u."

¹⁷Sire pira mallaḷaꞑꞑenggenno Mawu Yesus uaiwaḷote sangkatou ringannu waine, "Apa pandumanne Itou nabbisara siite, 'Ete adio'a lai iamiu tate maasilo Sia'u, wuꞑꞑu ete adio'a lai iamiu sarun maasilo Sia'u'? Apa lai pandummu wisara-Ne: 'Ia'u inai ringannu Iamangnga?'"

¹⁸Imangitou sidutu uaiwaḷo, "Apa atappasanne, 'ete adio'a tempone'? Iite tawedu maasunna Itou mabbisara su ola'u apa!"

¹⁹Mawu Yesus masingkatta manungku imangitou maapulu maiwaḷo Sitou. Ne Itou nabbisara, "Tanginna suete niwaḷo-U, 'Ete adio'a tempone iamiu tate maasilo Sia'u, wuꞑꞑu ete adio'a tempone iamiu sarun maasilo Sia'u'. Eteudde apan naola'a pattatiakka su wallatti amiu?"

²⁰Pangimante, iamiu sarun lumuai wuꞑꞑu sumangitta, arawe runia sarun lumuassa. Naunggi amiu sarun masusa, arawe asasusanu udde sarun mawaḷu maola'a aḷaḷuassa. ²¹Amungkangngu sangkatou wawine maranite n mangunsiwe, itou massusa, ana waugu temponete itou matataꞑꞑangnga. Arawe aroddi anangnge niasungkangnga, wawine udde naabuḷite n asasusane ana waugu lulluassa manungku sangkatou ana'a niasungkangke su runia. ²²Aroddi lai iamiu; Orassa indi naunggi amiu massusa, arawe Ia'u sarun maisasomba apia ringanni amiu, ne naunggi amiu sarun lumuassa; wuꞑꞑu tawedu sangkatou maapanganu aḷaḷuassa udde wuassu laḷummu naunggi amiu.

²³Su allo udde, iamiu tate maiwaḷo manga apa Sia'u. Pangimante: Aḷawo'u apa apan raddoronganni amiu su Iamangnga sulaḷummu arang-Ku, udde sarun ionggolu Iamangnga siamiu. ²⁴Na'oma n sara orassa

indi iamiu taambe nadorongnga manga apa sulaꞑummu arang-Ku. Pa-dorongke, ne iamiu sarun manengkamma, tadea'u aꞑaꞑuannu udde ma-suungnga."

Auntunganna su wowo n runia

²⁵"Sarangkanambone indi Ta'u iwaꞑo siamiu ringannu sasumandingnga. Arawe sarun a'omanna tempone, Ia'u tate mappaattu sasumandingnga lai, arawe mabbisara uahahati siamiu su ola'u Iamangnga. ²⁶Su tempo udde iamiu sarun madorongnga su Iamangnga sulaꞑummu arang-Ku; Paanaungete, Ia'u tawe madorongnga wuassu Iamangnga ionggolla siamiu, ²⁷ana waugu Iamangnga sassane marangngu siamiu. Itou marangngu siamiu ana waugu iamiu marangngu Sia'u, wuꞑꞑu mangngimanna manungku Ia'u nirumanta wuassu Mawu Ruata. ²⁸Atonna Ia'u nirumanta wua dingannu Iamangnga, wuꞑꞑu suete nirumanta sulaꞑummu runia. Arawe orassa indi Ia'u manantangke n runia inai mabelengnga ringannu Iamangnga."

²⁹See manga mallaꞑaꞑrenggenu Mawu Yesus nabbisara Sitou, "Orassa indi Mawu mabbisara uahahati wuꞑꞑu tawe mappaattu sasumandingnga, ³⁰wuꞑꞑu iamii masingkatta manungku Mawu masingkattu sarangkanambone. Ipa'ura lai taumata maiwaꞑo manga apa su Mawu. Ana waugu udde iamii mangngimanna Mawu nirumanta wua dingannu Mawu Ruata."

³¹Mawu Yesus sinumimbakka simangitou, "Nariaddi orassa indi iamii mangngimanna? ³²Paanaunge! Tempone sarun rumanta, ewe'e nia'omante, iamii sarun massaꞑiawukka. Iamii sarun mapuꞑe su waꞑe n sangkatou-sangkatou wuꞑꞑu manantang-Ku sassane. Arawe Ia'u tawe sassane ana waugu Iamangnga udde ringang-Ku. ³³Sarangkanambone indi iwabaꞑo-U siamiu, tadea'u iamii maasomba aꞑaꞑuassa ana waugu su sampunna ringang-Ku. Su runia iamii sarun matataꞑrangnga. Arawe siddutu'a naungngu! Ia'u suete napaarugi n runia!"

Mawu Yesus inumaꞑiomannu manga mallaꞑaꞑrenggen-Ne

17 Wua nabbisara aroddi, Mawu Yesus naningngara langitta wuꞑꞑu nabbisara, "Iamangnga, orassa indi nia'omante tempone. Wantuhete Anangngu, tadea'u Anangngu lai mamantuga Iamangnga. ²Iamangnga suete nangonggolu taꞑꞑino su Ana'a iparenta anambo n taumata, tadea'u Itou mangonggolu wiakka tutune wuꞑꞑu saran maꞑannu-

lanu su anambo n taumata apan nionggolu Iamangnga Sitou. ³Ete indi wiakka tutune wuṛṛu maḷannu-ḷannu; tadea'u taumata maailaḷa Iamangnga, eteudde Mawu Ruata tinggassa apan atonna, wuṛṛu maailaḷa si Yesus Kristus apan nirolokku Iamangnga. ⁴Ia'u suete namantuga Iamangnga su wowo n runia indi ringannu nanginsue manara apan nirolokku Iamangnga Sia'u. ⁵Iamangnga! Wantuhete Ia'u orassa indi ringannu Iamangnga, ringannu awawantuga apan tatahuanang-Ku sua-dio'a ringannu Iamangnga ro'e n runia indi taambe nariaddi.

⁶Ia'u suete namasingkattu Iamangnga su nanga taumata su runia indi apan suete nionggolu Iamangnga Sia'u. Imangitou udde pussa'a n Iamangnga, wuṛṛu Iamangnga suete nangonggoli mangitou Sia'u. Imangitou suete tinumuṛṛutta wisara n Iamangnga. ⁷Orassa indi imangitou masingkatte manungku sarangkanambone apan nionggolu Iamangnga Sia'u darantane wuassu Iamangnga. ⁸Suete Ta'u niapaasingkatta simangitou wisara n Iamangnga apan nionggolu Iamangnga Sia'u; wuṛṛu suete nisengkammi mangitou. Imangitou masingkatta manungku Ia'u atonna-tonna nirumanta wuassu Iamangnga wuṛṛu imangitou lai mangngimanna manungku ete Iamangnga apan nandolo-U.

⁹Ia'u inumaḷiomanni mangitou. Ia'u tawe inumaḷiomannu runia ewe'e inumaḷiomannu manga taumata apan suete nionggolu Iamangnga Sia'u, ana waugu imangitou pussa'a n Iamangnga. ¹⁰Anambo n pussaa-U lai pussa'a n Iamangnga; wuṛṛu anambo n pussa'a n Iamangnga udde lai pussa'a-U. Ia'u niwantuhanna su wallatti mangitou. ¹¹Orassa indi Ia'u nirumanta ringannu Iamangnga. Ia'u tate lai matana'a su runia; arawe imangitou su runia. Iamangnga apan naukkassa! Lu'arete imangitou ringannu taṛṛino n arannu Iamangnga, eteudde aranna apan suete nionggolu Iamangnga Sia'u – tadea'u imangitou maola'a sambau; ere Iamangnga wuṛṛu Ia'u sambau. ¹²Su tempo Ia'u ta'e su sambau ringanni mangitou, Ia'u suete nallu'adda simangitou ringannu taṛṛino n arannu Iamangnga – aranna apan suete nionggolu Iamangnga Sia'u. Ia'u suete nallu'adda simangitou, wuṛṛu tawe saran sangkatou wuassi mangitou nawuḷi; tumba'u itou apan ṛinone sarun mawuḷi; tadea'u ringannu aroddi matipusse apa apan uawoṛṛetta sulaḷummu Wuke Susi. ¹³Orassa indi Ia'u rumanta ringannu Iamangnga. Sarangkanambone indi iwaḷo'u tantaḷanna Ia'u ta'e su runia; tadea'u imangitou ringannu nasuungnga mamendamma aḷaḷuassa wuassia-U. ¹⁴Ia'u suete namasingkattu wisara n Iamangnga simangitou, wuṛṛu runia maddantinni mangitou, ana waugu imangitou waḷine pussa'a n runia, ere Ia'u lai waḷine tatahuanannu runia. ¹⁵Ia'u tawe madorongnga tadea'u Iamangnga mangaḷappa simangitou wuassu runia indi, arawe Ia'u madorongnga tadea'u iamangnga mallu'adda simangitou wuassi Raḷeo. ¹⁶Ere lai Ia'u waḷine pussa'a n runia, imangitou lai waḷine pussa'a n runia. ¹⁷Olaawe imangitou pussa'a

n Iamangnga sassane sulaꞑummu atatuꞑidda; wisara n Iamangnga ete-udde-atatuꞑidda. ¹⁸Ere lai Iamangnga suete nandolo-U su runia, aroddi lai Ia'u mandolokki mangitou watukku runia. ¹⁹Su hausanni mangitou, Ia'u nanantillu riri-U maola'a pussa'a n Iamangnga sassane, tadea'u imangitou lai maola'a pussa'a n Iamangnga sassane sulaꞑummu atatuꞑidda.

²⁰Waꞑine tumba'u imangitou sassane Ia'u u'aꞑiomanna. Ia'u lai u'aꞑiomannu manga taumata apan mangngimanna Sia'u sulaꞑummu tatiala n mangitou indi. ²¹Ia'u sumaꞑande, Iamangnga, tadea'u imangitou sarangkanambone maola'a sambau, ere lai Iamangnga sambau ringang-Ku, wuꞑꞑu Ia'u ringannu Iamangnga. Saꞑandeanna imangitou maola'a sambau ringanni Ite, tadea'u runia mangngimanna manungku ete Iamangnga apan nandolo-U. ²²Ia'u suete nangonggolu awawantuga simangitou apan nionggolu Iamangnga Sia'u, tadea'u imangitou maola'a sambau ere iite lai sambau; ²³Ia'u ringanni mangitou, wuꞑꞑu Iamangnga ringang-Ku; tadea'u imangitou atonna-tonna sambau. Ne runia indi sarun maasingkatta manungku ete Iamangnga apan nandolo-U, wuꞑꞑu manungku Iamangnga mandangngu simangitou ere lai Iamangnga mandangngu Sia'u.

²⁴Iamangnga, Ia'u maapulu tadea'u imangitou, apan nionggolu Iamangnga Sia'u, mangke su sambau su tampa atatanaa'ang-Ku, tadea'u imangitou maasilo awawantu-U; eteudde awawantuga apan nionggolu Iamangnga Sia'u, ana waugu Iamangnga marangngu Sia'u ro'e n runia taambe niriaddi. ²⁵Iamangnga apan matuꞑidda! Runia tawe maailaꞑa Iamangnga, arawe Ia'u maailaꞑa Iamangnga; wuꞑꞑu manga taumata indi masingkatta manungku ete Iamangnga, apan nandolo-U. ²⁶Ia'u suete napaꞑiatta'u arannu Iamangnga simangitou; wuꞑꞑu Ia'u sidutu sarun ma'ola'a aroddi, tadea'u darangngu n Iamangnga Sia'u sidutu sulaꞑummu naungngi mangitou, wuꞑꞑu Ia'u mangke sambau ringanni mangitou."

Mawu Yesus sinametta

(Mat. 26:47-56; Mrk. 14:43-50; Luk. 22:47-53)

18 Napawe Mawu Yesus suete n inumaꞑiomanna aroddi, Itou wuꞑꞑu manga mallalaꞑꞑenggen-Ne inaitte su samba'a n Saꞑukku Kidron. Isudde pia sambau wailla, ne Mawu Yesus wuꞑꞑu manga mallalaꞑꞑenggen-Ne sinumuttate su wailla udde. ²Yudas mandalaꞑaꞑeo udde, masingkattu tampa udde; ana waugu Mawu Yesus masokkate maam-mulu manga imallaꞑꞑenggen-Ne isudde. ³Ne Yudas inaitte su tampa udde wuꞑꞑu uaapiddu sangkawiliꞑꞑanna tantara n Romawi wuꞑꞑu manga pira mandariaga Waꞑe Mawu apan nirolokku manga imam tembonanne

wuṛṛu manga taumata n Farisi. Imangitou uaapiddu ahidda, lentera wuṛṛu auttutta. ⁴Mawu Yesus masingkattu sarangkanambone apan sarun mariaddi su watangan-Ne. Ne Itou nangundanite manga taumata udde wuṛṛu naiwaḷo, "Iamiu maddea'a sisai?"

⁵"Mawu Yesus, taumata Nazaret," sasimbakki mangitou.

"Ete Ia'u indi," sasimbakku Mawu Yesus.

Yudas mamamate udde uarisikka isudde ringanni mangitou. ⁶Su tempo Mawu Yesus nabbisara simangitou, "Ete Ia'u indi," imangitou sarangkanambone sinumorrota see narṛa'a su leta'a. ⁷Paassa lai Mawu Yesus naiwaḷo simangitou, "Iamiu maddea'a sisai?"

"Mawu Yesus taumata Nazaret," sasimbakki mangitou.

⁸"Suetē niwaḷo-U ete Ia'u indi," unnu Mawu Yesus. "Wuṛṛu amung-kanggu atonna Ia'u radeaanni amiu, wala'e imangitou waine indi inai." (⁹Ringannu nabbisara aroddi, natipusse apa apan suetē niwisara Mawu Yesus paarorone: "Iamangnga, wuassu manga taumata apan nionggolu Iamangnga Sia'u, tawe saran sangkatou apan mawuḷi.")

¹⁰Simon Petrus apan uaapiddu haḷe sammata, sinawutta see namuulla allanggu imam wahewa na'oma n sara narṛassatta taḷingane aikkatanna. Arannu allangnga udde Malkus. ¹¹Ne Mawu Yesus nabbisara si Petrus, "Sutta'a apia haḷelenu su romane! Apa i'o marṛingidda Ia'u tawe maainumma ua'e n asasusa apan nionggolu Iamangnga Sia'u?"

Mawu Yesus niapidda sinumaruanna si Hanas

¹²See manga tantara n Romawi wuṛṛu piaṛrangnge see manga mandariaga n Yahudi nanametta wuṛṛu narṛapussa Mawu Yesus. ¹³Paarorone imangitou nangapiddu Mawu Yesus ringanni Hanas, la'iananni Kayafas. Kayafas eteudde sangkatou imam wahewa su tonna udde. ¹⁴Wuṛṛu ete itou apan nanantiro manga tembonannu Yahudi, manungku mappianne sangkatou mate hunane su anambo n pabbawalaga.

Petrus nassinaaddu Mawu Yesus

(*Mat. 26:69-70; Mrk. 14:66-68; Luk. 22:55-57*)

¹⁵Simon Petrus wuṛṛu sangkatou mallaṛaṛrenggenna waine tinumantalongnga Mawu Yesus. Mallaṛaṛrenggenna waine indi asingkatannu imam wahewa; nariaddi itou sinumutta su sambau ringannu Mawu Yesus su rallakku waḷe n imam wahewa, ¹⁶arawe Petrus uaraṛṛaddo su liudde, su ngara. Wua udde mallaṛaṛrenggenna apan waine udde

sinumabangnga wuṛru nagahatto mangangimbe wawine apan uariaga ngara, see nangapiddi Petrus sinumutta sulalumme. ¹⁷Mangangimbe wawine apan uariaga ngara udde nabbisara si Petrus, "Ei, walinewe i'o lai sangkatou wuassu wallattu mallalaṛṛenggennu taumata udde?"

"Waline," sasimbakki Petrus.

¹⁸Orassa udde runia masunge, nariaddi manga mangangimbe wuṛru manga mandariaga suete nāṛrunuttu putungnga wuassu waṛra see imangitou manningikke isudde. Petrus inai lai poiaroddi wuṛru nirumarisikka manningikke su sambau ringanni mangitou.

Imam wahewa naiwaḷo Mawu Yesus

(Mat. 26:59-66; Mrk. 14:55-64; Luk. 22:66-71)

¹⁹Imam wahewa naiwaḷo Mawu Yesus su ola'u manga malalaṛṛenggen-Ne wuṛru su ola'u alaṛṛang-Nge. ²⁰Mawu Yesus sinumimbakka, "Ia'u sidutu mabbisara ringannu uahahati su saruannu awadaalla. Ia'u sidutu mangngaṛṛa'a su manga waḷe m pattataṛṛamawuanna wuṛru su Waḷe Mawu Ruata, su tampa n taumata n Yahudi wiasane maamula. Taambe saran paassa Ia'u mabbisara ringannu itattullampingnga. ²¹Nariaddi anio ituangnga maiwaḷo Sia'u? Paiwaḷote simangitou apan suete naaringikka Sia'u mangngaṛṛa'a. Imangitou masingkatte apa apan niwisara-U."

²²Napawe Mawu Yesus suete nabbisara aroddi, sangkatou su wallattu mandariaga isudde namero Sitou wuṛru nabbisara, "Waṛṛani atonna I'o mabbisara aroddi su imam wahewa!"

²³Mawu Yesus sinumimbakka, "Amungkangngu Ia'u mabatti'u wisara nassaḷa, waḷoa'e isindi suapa saḷane! Arawe amungkangngu niwisara-U udde atonna, anio i'o namero Sia'u?"

²⁴Wua udde Hanas nandolokku taumata nangapiddu Mawu Yesus ringannu ṛaṛṛapusanna watukku Imam Wahewa Kayafas.

Petrus nassinaaddu Mawu Yesus apia

(Mat. 26:71-75; Mrk. 14:69-72; Luk. 22:58-62)

²⁵Simon Petrus ta'e lai uarisikka manningikka isudde. Manga taumata nabbisara sitou, "Walinewe i'o lai mallalaṛṛenggennu taumata udde?" Arawe Petrus nassinaadda, unni tou, "Waline!"

²⁶Sangkatou allangngu imam wahewa, eteudde walahannu taumata taḷingane niponggo'i Petrus, nabbisara, "Walinewe ia'u naasilo si'o su wailla udde suadio'a ringanni Tou?"

²⁷See Petrus nassinaadde apia, "Tawe" – wuṛṛu naṛṛino su orassa udde lai manu'a niumu'u.

Mawu Yesus sinumaruanna si Pilatus

(*Mat. 27:1-2, 11-14; Mrk. 15:1-5; Luk. 23:1-5*)

²⁸Ruaallo maṛṛangapa imangitou nangapiddu Mawu Yesus wuassu waḷe n Kayafas watukku waḷe n gubernure. Manga taumata n Yahudi sassane tawe sinumutta sulaḷummu waḷe n araratuanna, tadea'u imangitou tawe mabbali marosa su ola'u agama, ana waugu imangitou lai umanna umante annu Paskah. ²⁹Ana waugu udde Pilatus sinumabangnga ringanni mangitou wuṛṛu naiwaḷo, "Apa alaenu su ola'u taumata indi?"

³⁰Imangitou sinumimbakka, "Unnu wisara Itou tawe saḷane, iami tawe nangapiddi Tou ringannu Iamangnga Gubernure."

³¹Pilatus nabbisara simangitou, "Apira'e Itou wuṛṛu parikisete Itou tumuṛṛuttu titanu sassane!"

Arawe manga taumata n Yahudi udde sinumimbakka, "Iami tawe maṛṛuumannu taumata ma'oma n sara mate." (³²Indi mariaddi tadea'u matipusse apa apan niapaasingkattu Mawu Yesus su ola'u Itou sarun mate.)

³³Pilatus sinumutta apia su waḷene see namaggo Mawu Yesus wuṛṛu naiwaḷo, "Atonna I'o ratu n taumata n Yahudi?"

³⁴Mawu Yesus sinumimbakka, "Apa aiwaḷo indi wuassi'o sassane ara'e pia taumata waine apan suete namasingkatta si'o su ola'u riri-U?"

³⁵Pilatus sinumimbakka, "Antimannu ia'u indi taumata n Yahudi? Apan nanantillu riri-Nu sia'u udde pabbawalagu sassane wuṛṛu manga imam tembonanne. Apa apan suete niolangngu?"

³⁶Mawu Yesus nabbisara, "Araratuang-Ku waḷine wuassu runia indi. Unnu wisara araratuang-Ku wuassu runia indi, manga taumata-U sarun mando'appa, tadea'u Ia'u tawe itantilla su manga tembonannu Yahudi. Arawe atonna araratuang-Ku waḷine wuassu runia indi!"

³⁷Ne Pilatus naiwaḷo Sitou, "Amungkangngu aroddi, I'o indi ratu?"

Mawu Yesus sinumimbakka, "I'o nabaḷo manungku Ia'u indi ratu. Ia'u niasungkangnga wuṛṛu nirumanta su runia indi ringannu sambau pandumma, eteudde mangonggolu tatiala su ola'u atatuḷidda. Taumata apan wuassu atatuḷidda udde maddaringikka Sia'u."

³⁸Pilatus naiwaḷo Sitou, "Apa atappasannu atatuḷidda?"

Mawu Yesus iŕŕuumanna pateanna

(*Mat. 27:15-31; Mrk. 15:6-20; Luk. 23:13-25*)

See Pilatus sinumabangnga apia wuassu waŕe n araratuanna wuŕŕu nabbisara su manga taumata n Yahudi, "Ia'u tawe naasomba saran sambau pasasaŕa n taumata indi. ³⁹Arawe tumuŕŕuttu inanaramannu, ia'u wiasane mammallossu sangkatou taumata n ŕuumanna su Allo Wahewa m Paskah. Iamiu maapulu tadea'u ia'u mamallossu ratu n taumata n Yahudi siamiu?"

⁴⁰Imangitou sinumimbakka ringannu u'ui, "Tawe, arie Itou, ewe'e Barabas!" (Barabas udde, sangkatou taŕŕa rampassa.)

19 Wua udde Pilatus sinumutta see nandolokku taumata nange-sekka Mawu Yesus. ²Manga tantara na'ola'a sambau araposa wuassu manga ranna ng kalu ŕoaanna, see niluŕŕe su pua Mawu Yesus. Wua udde Itou nilluŕŕeanni mangitou jubah ungu, ³see masokka-sokka



Manga tantara n Roma (19:2)

rumanta ringanni Tou wuŕŕu mabbisara, "Nabbiakke ratu n taumata n Yahudi!" Wua udde imangitou namero Sitou.

⁴Wua udde Pilatus sinumabangnga apia wuŕŕu nabbisara su taumata nambo udde, "Pa'ellega! Ia'u mangapiddi Tou su liudde ringanni amiu, tadea'u iamiu maasingkatta manungku ia'u tawe naasomba pasasaŕa saran sambau Sitou." ⁵Ne Mawu Yesus sinumabbangnga ringannu uaŕŕe n araposa pia ŕoangge wuŕŕu jubah willossa. Pilatus nabbisara simangitou, "Pa'ellege taumata udde."

⁶Napawe manga imam temboanne wurru manga mandariaga udde naasilo Mawu Yesus, imangitou u'ui, "Arussa'a Itou! Arussa'a Itou!"

Pilatus nabbisara simangitou, "Apira'e Itou, wurru arussa'e ng kamiu sassane, ia'u tawe naasomba saran sambau pasasaja-Ne."

⁷Manga taumata n Yahudi udde sinumimbakka, "Tumurruttu tita ng kami, Itou rinone pateanna ana waugu Itou mangnga'u watangan-Ne Ana'u Mawu Ruata."

⁸Napawe Pilatus naaringikka simangitou mabbisara aroddi, itou lembo nata'utta lai. ⁹Ne itou nabelengnga sinumutta sulajumlahu wale n araratuanna wurru napawe Mawu Yesus niapidde sulajumlahu, Pilatus naiwalo Sitou, "I'o indi daranta-Nu wuassuapa?"

Arawe Mawu Yesus tawe sinumimbakka. ¹⁰Ne, Pilatus nabbisara apia, "I'o maddiri maggahato'u? Ana see I'o masingkatta, ia'u pia tarjino mamallosu riri-Nu, wurru tarjino mangarussa-Nu!"

¹¹Mawu Yesus sinumimbakka, "Amungkanggu Mawu Ruata tawe mangonggolu tarjino udde si'o, i'o atonna-tonna tawe tarjino su riri-U. Ana waugu udde taumata apan nanantillu riri-U si'o, magewajanna rosane wuassu rosanu."

¹²Napawe Pilatus naaringikka udde, itou mangke maddea'a lajanne mamallosu Mawu Yesus. Arawe manga taumata n Yahudi mangke u'ui, "Amungkanggu ituangnga mamallosi Tou, ituangnga wajine hawe ng Kaisar! Taumata apan mangnga'u ririne ratu, ete itou seetti Kaisar!"

¹³Napawe Pilatus naaringikka manga wisara udde, itou nangapiddu Mawu Yesus su liudde see inuma'ianna su addera m pamarikisanna su tampa aranne Wawilanne Watu. (Sulajumlahu wisara n Ibrani aranne Gabata.)

¹⁴Tempo udde maranite m puulla mapulo dua allattune, taambe Allo Wahewa m Paskah. Pilatus nabbisara su manga taumata udde, "Indi ratunu!"

¹⁵Imangitou mangke pasi ui, "Patete Itou; Patete Itou! Arussa'a Itou!"

Pilatus naiwalo, "Apa rinone ia'u mangarussa n ratunu?"

Manga imam tembonanne sinumimbakka, "Tumba'u Kaisar sassane ratu ng kami!" ¹⁶Ne Pilatus nanantillu Mawu Yesus simangitou niapaa-russa. Imangitou nangehetta Mawu Yesus, see niapiddi mangitou inai wua isudde.

Mawu Yesus niarussa

(Mat. 27:32-44; Mrk. 15:21-32; Luk. 23:26-43)

¹⁷Mawu Yesus sinumabangnga uapasanna alu arussane sassane waktuku tampa apan aranne "Tampa n Tanggila'a". (Sulajumlahu wisara n

Ibrani isassago Golgota.) ¹⁸Poiaroddi Itou niarussa. Su sambau ringanni Tou pia lai rua ng katou taumata waine apan uaarussa; sangkatou su samba'a airri, sangkatou su samba'a uananna wuɽɽu Mawu Yesu su tangngane. ¹⁹Su alu arussa Mawu Yesu, Pilatus napa'ele n woɽɽetta indi: "Yesu wuassu Nazaret, Ratu n Taumata n Yahudi." ²⁰Manambo taumata n Yahudi naawasa n woɽɽetta udde, ana waugu su tampa Mawu Yesu niarussa udde tawe marau wuassu soa. Woɽɽetta udde niwoɽɽetta sulaɽummu wisara n Ibrani, Latin wuɽɽu Yunani. ²¹Manga imam tembonnan nabbisara si Pilatus, "Arie pabboɽɽetta'a Ratu n Taumata n Yahudi, ewe'e woɽɽetta'a, "Taumata indi nabbisara, Ia'u Ratu n Taumata n Yahudi."

²²Arawe Pilatus sinumimbakka, "Apa ta'u niwoɽɽetta, udde aroddite."

²³Napawe manga tantara udde nangarussate n Mawu Yesu, imangitou nanganute laung-Nge. Laubba udde nitahia appatta: sambau-sambau naasomba sambageanganna. Imangitou lai nanganu jubah-Ne. Jubah udde tawe tatabingnge – niradu'a wua dosone sara wowane.

²⁴Manga tantara udde nabbisara sangkatou ringannu waine, "Arie iite mamonggo'a jubah indi, wette iite masasi'atta asinginne isai wotongnge maabba'a." Hatto udde mariaddi tadea'u natipusse apa apan uawoɽɽetta sulaɽummu Wuke Susi, eteudde:

"Imangitou mattahia lau-U,
wuɽɽu nasasi'attu jubah-U."

Wuɽɽu atonna manga tantara udde na'ola'a aroddi.

²⁵Marani n arussa Mawu Yesu uarisikka inangngu Mawu Yesu, wuɽɽu tuɽrangngu inangnge-Ne wawine, Maria awingngi Klopas, wuɽɽu Maria Magdalena. ²⁶Napawe Mawu Yesu naasilo inangnge-Ne wuɽɽu mallalaɽɽenggenna apan arangnguan-Ne uarisikka isudde, Itou nabbisara inang-Nge, "Inangnga, udde ana'i Inangnga."

²⁷Wua udde Mawu Yesu nabbisara su mallalaɽɽenggen-Ne udde, "Udde inangngu." Nanattakka orassa udde mallalaɽɽenggenna nanengkampe inangngu Mawu Yesu matana'a su wale.

Apapate Mawu Yesu

(Mat. 27:45-56; Mrk. 15:33-41; Luk. 23:44-49)

²⁸Mawu Yesu masingkatta manungku orassa udde sarangkanam-bone natipusse, wuɽɽu tadea'u apa apan uawoɽɽetta sulaɽummu Wuke Susi wotonggete mariaddi, Itou nabbisara, "Ia'u marou."

²⁹Isudde pia sambau mangko napene ng kua'e anggore mapakadda. Ne sambau wunga n sahatta niammo sulaɽummu ua'e n anggore udde, wuɽɽu nitukka su sandanna hisop, see nitogokka su moɽɽongngu Mawu

Yesus. ³⁰Mawu Yesus naattemma ua'e n anggore udde see nabbisara, "Nia'omante!"

See nałapute pua-Ne wuřru natete.

Mawu Yesus niusu'a

³¹Manga tembonannu Yahudi maddiri winałunannu manga taumata apan niarussa udde mangke ua'ele su alu arussa su allo n Sabatta, lembonete Sabatta paassa indi Allo Wahewa apan apianne. Ana waugu allo Mawu Yesus niarussa nařrino massallo taambe allo n Sabatta, manga taumata n Yahudi nadorongnga si Pilatus mamadi ledda manga taumata apan suete niarussa wuřru manossokku manga winałunanna udde wuassu alu arussa. ³²Ne manga tantara udde inaitte wuřru namadite rorone ledda n taumata darua apan niarussa su sambau ringannu Mawu Yesus. ³³Napawe imangitou na'omate ringannu Mawu Yesus, imangitou naasilo Itou natete. Imangitou tate nariaddi namadi ledda-Ne. ³⁴Arawe sandiřrannu Mawu Yesus niusu'u sangkatou tantara ringannu sambeangnga; wuřru tawe nałannu sinumabangke rařra wuřru ua'e.

³⁵Taumata apan naasilo sassane arariaddianna udde, ete itou apan namasingkattu olangnge udde, tadea'u iamiu lai mangngimanna. Wuřru tatialane udde atonna, wuřru Itou masingkatta manungku olangnge udde atonna. ³⁶Olangnge udde mariaddi tadea'u apa apan uawořretta sulałummu Wuke Susi, eteudde, "Tawe saran sambau wuassu duřri-Ne paddianna." ³⁷Sulałummu Wuke Susi uawořretta lai: "Imangitou sarun ma'ellega Sitou apan suete niusu'i mangitou."

Mawu Yesus nilabingnga

(*Mat. 27:57-61; Mrk. 15:42-47; Luk. 23:50-56*)

³⁸Wua udde Yusuf wuassu Arimatea nadorongnga si Pilatus, margałappa winałunannu Mawu Yesus. (Yusuf eteudde mallałarřrenggennu Mawu Yesus, arawe ringannu małannaba, ana waugu itou matta'uttu manga tembonannu Yahudi.) Pilatus namalate n tou, wua udde itou inaitte nangałappa winałunannu Mawu Yesus. ³⁹Nikodemus apan paarorone suete nirumanta ringannu Mawu Yesus su tempo řabbi, inai lai suadio'a ringanni Yusuf. Nikodemus uaapiddu undamma mur wuřru gaharu - sarangkanambone irarřangngo tallu m puło kilo gramma - anambone. ⁴⁰Itarua nanosokku winałunannu Mawu Yesus, see nipi'unnu kaengnga kafan su sambau ringannu udamma mawangngi udde tumuřruttu addattu pallałabingngu taumata n Yahudi. ⁴¹Su tampa Mawu Yesus niarussa pia sambau wailla. Su wailla udde pia sambau lałabinganna wakku, apan taambe nipaatta pallabingannu tau-

mata. ⁴²Ana wangu laḷabinganna udde marani, wuḥḥu allo n Sabatta maranite manattakka, Mawu Yesus nilabingngi mangitou su wailla udde.

Laḷabinganna tawe loḥḥone

(*Mat. 28:1-8; Mrk. 16:1-8; Luk. 24:1-12*)

20 Su allo Misa ruaallo, su tempo ta'e marandumma, Maria Magdalena inaita watukku laḷabinganna. Itou naasilo watu larḥapingnge na'irute wuassu loḥḥangngu laḷabinganna udde. ²Ne itou tinumaḷangnga nadea'a si Simon Petrus wuḥḥu mallaḥarḥenggenna apan arangnguannu Mawu Yesus, wuḥḥu nabbisara simangitou, "Mawu suete niaḷappa wuassu laḷabinganna, wuḥḥu ia'u wagga suapa Itou niapaḷallowanga."

³See Petrus wuḥḥu mallaḥarḥenggenna waine udde inaita watukku laḷabinganna. ⁴Itarua tuttaḷangnga, arawe mallaḥarḥenggenna waine udde mallihaḥḥanna wuassi Petrus, wuḥḥu itou na'oma rorone su laḷabinganna. ⁵Itou nallinge sulaḷummu laḷabinganna wuḥḥu naasilo kaengnga kafan uaraddo isudde, arawe itou tawe sinumutta. ⁶Simon Petrus uatanturḥutta wuassu liudde, lapiddu sinumutta sulaḷummu laḷabinganna udde. Itou naasilo kaengnga kafan uaraddo isudde, ⁷arawe kaengnga apan uawa'issa pua Mawu Yesus tawe gaddi'a maranine arawe lalulunanna paḥḥalane. ⁸Wua udde mallaḥarḥenggenna apan na'oma paarorone su laḷabinganna, sinumuttate lai. Itou na'ellegga wuḥḥu nangimante. (⁹Na'oma n sara orassa udde imangitou taambe naasunna apa apan uaworḥetta sulaḷummu Wuke Susi manungku Itou ḥinone mabangunna wuassu papate.) ¹⁰Wua udde manga mallaḥarḥenggennu Mawu Yesus napuḷete.

Mawu Yesus naipasilo n batangan-Nesi Maria Magdalena

(*Mat. 28:9-10; Mrk. 16:9-11*)

¹¹Maria Magdalena uarisikka su saruannu laḷabinganna lapiddu lullu'ai. Tantaḷanna lullu'ai itou ua'ellega laḷummu laḷabinganna, ¹²see itou naasilo rua ng katou mala'ekatta uapedettu mawira. Imangitou udde ua'ianna su lanna'u winaḷunannu Mawu Yesus, sangkatou su wageangngu pua, wuḥḥu waine lai su wageangngu ledda. ¹³Manga mala'ekatta udde naiwaḷo, "Inangnga, anio lullu'ai?"

Maria sinumimbakka, "Mawu'u suete nianu, wuḥḥu ia'u wagga Itou niaddo suapa."

¹⁴Napawe wua nabbisara aroddi, itou nanaile liudde wuṛṛu naasilo Mawu Yesus uarisikka isudde. Arawe itou wagga manungku udde Mawu Yesus. ¹⁵Mawu Yesus naiwaḷo sitou, "Inangnga, anio lulluai? Inangnga maddea'a sisai?"

Maria massunna manungku udde mabawaila, nariaddi itou nabbi-sara, "Iamangnga, amungkangngu Iamangnga nangingkatti Tou wua isindi, tuḷunga'a waḷo'a sia'u suapa Iamangnga nangado n Tou, tadea'u ia'u wotongnge mangalaḷappa Sitou."

¹⁶Mawu Yesus nabbisara sitou, "Maria!"

Maria nanaile Mawu Yesus see nabbisara sulaḷummu wisara n Ibrani, "Rabuni!" (Atatappasanne "Huru".)

¹⁷"Arie pamita Sia'u" wisara Mawu Yesus sitou, "ana waugu Ia'u taambe nasengkengnga ringannu Iamangnga. Arawe roote ringannu manga tuṛrang-Ku, wuṛṛu pasingkata'e simangitou manungku orassa indi Ia'u ireete ringannu Iamang-Ku wuṛṛu Iamangngu, Ruata-U wuṛṛu Ruatanu."

¹⁸Ne Maria inaitte namasingkatta su manga mallaḷaṛṛenggennu Mawu Yesus manungku itou suete naasilo Mawu Yesus wuṛṛu manungku Mawu suete namasingkattu sarangkanambone udde sitou.

Mawu Yesus naipasilo n watangan-Ne su manga mallaḷaṛṛenggen-Ne

(*Mat. 28:16-20; Mrk. 16:14-18; Luk. 24:36-49*)

¹⁹Su allo Misa udde lai, su tempo ṛabbite, manga mallaḷaṛṛenggennu Mawu Yesus uaammulla su sambau waḷe apan ngarane uarṛuudda, ana waugu imangitou matta'uttu manga tembonannu Yahudi. Inaṛṛombanganne Mawu Yesus nirumanta wuṛṛu dirumarisikka su pattangganni mangitou wuṛṛu nabbisara, "Saḷamatta wuṛṛu paddarame siamiu."

²⁰Napawe suete nabbisara aroddi, Itou namasilote n lima-Ne wuṛṛu sandiṛṛan-Ne simangitou. Su tempo naasilo Mawu, imangitou lembo nilumuassa. ²¹See Mawu Yesus nabbisara simangitou paassa lai, "Saḷamatta wuṛṛu paddarame siamiu. Ere lai Iamangnga nandolo-U aroddi lai Ia'u mandolokki amiu." ²²See Itou napaasabangngu singangu-Ne simangitou wuṛṛu nabbisara, "Sengkampe Ghaṛṛaho Mawu Ruata. ²³Amungkangngu iamiu mangampungnga rosa n sangkatou taumata, Mawu Ruata lai mangampungnga rosane. Amungkangngu iamiu tawe mangampungnga rosa n taumata waine, Mawu Ruata lai tawe mangampungnga rosane."

Mawu Yesus wuɽɽu Tomas

²⁴Tomas (apan isassago lai "Rindua"), sangkatou wuassu sire mapuɽo dua mallajɽɽenggennu Mawu Yesus, apan tawe suadio'a ringannu mallajɽɽenggenna waine su tempo Mawu Yesus nirumanta. ²⁵Ne manga mallajɽɽenggennu Mawu Yesus apan waine nabbisara si Tomas, "Iami naasilote Mawu!"

Arawe Tomas sinumimbakka, "Amungkangngu ia'u taambe naasilo lanna'u lessa m pa'u su lima-Ne, udde wuɽɽu taambe napangado n taɽimado'u su manga lanna'u lessa m pa'u udde wuɽɽu taambe napangado n lima'u susandiɽɽan-Ne, ia'u tawe mangngimanna saran paassa."

²⁶Sangkamisa naliudda, manga mallajɽɽenggennu Mawu Yesus naammulla apia su tampa udde, wuɽɽu Tomas isudde lai. Anambo ngara uɽɽuudda. Arawe Mawu Yesus nirumanta wuɽɽu nirumarisikka su pattangnganni mangitou, see nabbisara, "Saɽalamatta wuɽɽu paddarame siamiu." ²⁷Wua udde Mawu Yesus nabbisara si Tomas, "Pa'ellege lima-U, wuɽɽu addoa'e taɽimadonu isindi. Uɽɽɽa'e limanu wuɽɽu addoa'e su sandiɽɽang-Ku. Arie mapapadua lai ewe'e pangimante!"

²⁸Tomas nabbisara Mawu Yesus, "Mawu'u wuɽɽu Ruata'u!"

²⁹Ne Mawu Yesus nabbisara sitou, "I'o mangngimanna ana waugu naasilote Sia'u? Asasaɽamatta su taumata apan mangngimanna salaiwe tawe naasilo Sia'u!"

Pandumannu wuke indi

³⁰Ta'e manambo lai manga aɽɽɽindua'a waine apan suete niola'u Mawu Yesus su saruannu manga mallajɽɽenggen-Ne, arawe tate nawoɽɽeta sulaɽummu wuke indi. ³¹Arawe sarangkanambone indi niwoɽɽetta, tadea'u iamiu mangngimanna manungku Mawu Yesus ete-udde Ratu Punnu Saɽalamatta, Ana'u Mawu Ruata, wuɽɽu ana waugu mangngimanna Sitou, iamiu naasomba wiakka.

Mawu Yesus naipasilo n watangan-Ne su sire pitu mallajɽɽenggen-Ne

21 Wua udde Mawu Yesus namasilo watagan-Ne paassa lai su Rano n Tiberias su manga mallajɽɽenggen-Ne. Arendi watinge: ²Su sambau allo Simon Petrus, Tomas apan isassago lai i Rindua, Natanael wuassu Kana su Galilea, aɽɽɽana'i Zebedeus, wuɽɽu rua ng katou

mallaḷarḷenggenḡu Mawu Yesus apan waine tantaḷanna uaammulla. ³Wisara n Simon Petrus singana'a waine, "Ia'u maapulu inai tumondo."

"Iami tumantalongga", unni mangitou si Petrus. Ne inaité imangitou sinuma'e saalanna. Arawe sarḷabbi tuudda udde imangitou tawe naahau saran sambua. ⁴Napawe matannallo sussabangke, Mawu Yesus uarisikka su apanne, arawe imangitou wagga manungku udde Mawu Yesus. ⁵Mawu Yesus nabbisara simangitou, "Aḷarḷana'u, iamiu naahaute inassa?"

"Tawe" sasimbakki mangitou.

⁶Mawu Yesus nabbisara simangitou, "Lombo'a'a somanu su aikkatannu saalanna, iamiu sarun maahau inassa." See soma udde nilombate mangitou, arawe imangitou tate maawoḷengnga apia ana waugu aroddi anambone inassa sulaḷummu soma.

⁷Mallaḷarḷenggenḡa apan aranguannu Mawu Yesus, nabbisara si Petrus, "Udde Mawu!" Napawe Simon Petrus naaringikka manungku udde Mawu, itou nallurḷe n laubba (ana waugu itou uatantoḷe) see inumurumma sulaḷummu ua'e. ⁸Manga mallaḷarḷenggenḡa waine nananturḷutta watukku ammaranne ringannu saalanna, lapiddu namoḷengnga soma apan napene ng kinassa. Imangitou tawe marau wuassu ammaranne, irarḷrangngo tumba'u marḷasutta su meterḷene. ⁹Napawe imangitou sinumossokke wuassu saalanna, imangitou naasilo pia warḷa m putungnga isudde ringannu inassa uatambunna wurḷu roti. ¹⁰Mawu Yesus nabbisara simangitou, "Apira'a inawarendi manga pira m bua inassa apan wakku niasametanni amiu."

¹¹Simon Petrus sinuma'e su saalanna, see namoḷengnga somane watukku ammaranne. Soma udde napene ng kinassa apan mangkasalaka; sarangkanambone marḷasutta lima m puḷo tallu su wuane. Wurḷu salaiwe anambone aroddi, somane tawe nahesa'a. ¹²Mawu Yesus nabbisara simangitou, "Wette umanna." Tawe saran sangkatou wuassu mallaḷarḷenggen-Ne warḷrani maiwaḷo, "Iamangnga isai?" Ana waugu imangitou masingkatta manungku Itou Mawu. ¹³Wua udde Mawu Yesus nangundani mangitou, nanganu roti udde, wurḷu nitahia simangitou. Inassa udde lai nitahia n Tou ere udde.

¹⁴Indi atallune Mawu Yesus maipasilo n watangan-Ne su manga mallaḷarḷenggen-Ne napawe Itou niwangunna wuassu papate.

Mawu Yesus wurḷu Petrus

¹⁵Napawe imangitou suete niumannu, Mawu Yesus nabbisara si Simon Petrus, "Simon ana'i Yona, apa i'o lembo marangngu Sia'u wuassi mangitou indi mandangngu Sia'u?"

"Atonna, Mawu," sasimbakki Petrus, "Mawu masingkatta ia'u maranggu Mawu."

Mawu Yesus nabbisara sitou, "Paduļianete aļarņana'u domba-U."

¹⁶Su aruane Mawu Yesus naiwaļo sitou, "Simon ana'i Yona, atonna i'o maranggu Sia'u?"

"Atonna, Mawu," sasimbakki Petrus, "Mawu masingkatta manungku ia'u maranggu Mawu."

Mawu Yesus nabbisara sitou, "Paduļianete manga domba-U."

¹⁷Su atallune Mawu Yesus naiwaļo sitou, "Simon ana'i Yona, atonna i'o maranggu Sia'u?"

Petrus nasusa naungnge ana waugu Mawu Yesus naiwaļo sitou na'oma n sara atallune. Ne Petrus sinumimbakka apia, "Mawu, Mawu masingkattu sarangkanambone. Mawu masingkatta manungku ia'u maranggu Mawu!"

See Mawu Yesus nabbisara sitou, "Paduļianete manga domba-U.

¹⁸Mangke atonna wisara-U indi: Su tempo i'o ta'e dario'a, i'o sassane mamma'issa lawannu, wuŗru u'amatta su aļawo'u tampa ipaapulunu. Arawe amungkangngu i'o timmaddete, i'o mangnguļukku limanu, wuŗru taumata waine mamma'issa si'o wuŗru mangapidda su tampa apan ipaadirinu." ¹⁹(Ringannu manga wisara udde Mawu Yesus mapaaliatta'u ereapa Petrus sarun mate ipamantuga Mawu Ruata.) Wua udde Mawu Yesus nabbisara si Petrus, "Tantalongke Sia'u!"

Mawu Yesus wuŗru mallaļarņenggen-Ne apan waine

²⁰Su tempo Petrus nanaile, itou naasilo su liudde mallaļarņenggenna apan arangnguannu Mawu Yesus. (Ete itou ua'ianna marani Mawu Yesus su tempo u'anna wuŗru naiwaļo Sitou, "Mawu, isai apan sarun mamate Mawu?") ²¹Naasilo sitou, Petrus naiwaļo Mawu Yesus, "Mawu, ereapa su ola'i tou indi?"

²²Mawu Yesus sinumimbakka, "Unnu wisara Ia'u maapulu itou matatana'a wiakka ma'oma n sara Ia'u rumanta apia, udde waļine manaranu. Arawe i'o tantalongke Sia'u!"

²³Ne tinumelengke watti'a su mallaļarņenggennu Mawu Yesus manungku mallaļarņenggenna udde tawe mate. Sumbaļi Mawu Yesus tawe nabbisara manungku mallaļarņenggenna udde tawe mate, ewe'e: "Unnu wisara Ia'u maapulu itou matatana'a wiakka ma'oma n sara Ia'u rumanta apia, udde waļine manaranu."

²⁴Yohanes apan nangongolu tatiala su ola'u manga riadianna indi. Ete itou lai suete namoꝛꝛeta. Wuꝛꝛu iite masingkatta manungku apa apan niapaasingkatti tou udde atonna.

Wisara Panginsueanne

²⁵Ta'e manambo lai hatto waine apan niola'u Mawu Yesus. Unnu wisara sarangkanambone udde iwoꝛꝛetta passa m bau, ia'u mammen-damma tawe a'ionanne ahewallu runia indi pangadoannu anambo n wuke apan sarun iwoꝛꝛeta udde.

WATTI'U MANGA RASUL

WISARA TAŁAANE

Watti'u Manga Rasul eteudde sasampa'u Wuke n *Watti'u Ałaluassa* apan niapaassingkatti Lukas. Tuddane paarorone *Watti'u Manga Rasul* indi eteudde mannantiro su ola'u ereapa manga mallalarrenggennu Mawu Yesus - ringannu aehettu Gharraho Mawu Ruata - mammasingkattu *Watti'u Ałaluassu* Mawu Yesus "su Yerusalem, su ahewallu Yudea, su Samaria, wuřru sara pentakku runia" (1:8). Wuke indi eteudde watti'u pammamanara n taumata n Sařrani apan tinattakka su wallattu taumata n Yahudi, see maola'a agama sambau su ahewallu runia. Mamamořrettu wuke indi pia pandumma mapaałiatta'a su mabawasane manungku manga taumata n Sařrani wałinewe maola'a sambau angngo su araratuannu Roma, arawe manungku agama n Sařrani maola'a asasuungngu agama n Yahudi.

Watti'u Manga Rasul wotongnge tahianna sulałummu tallu ng kawa-geanganna. Sulałummu tallu ng kawageanganna udde niasilo manungku aatambanna ahewallu leta'a suapa *Watti'u Ałaluassa* su ola'u Mawu Yesus iappaasingkatta wuřru gharreda iapararisikka: (1) paarorone pammamanara n taumata n Sařrani su Yerusalem napawe Mawu Yesus nasengkengnga watukku surga; (2) niatambannu ahewalle manga wage-angnge su Palestina; wuřru (3) niatambannu ahewalle lai watukku wanua su marani n Tahałoangnga Tangngane na'oma n sara araune su Roma.

Inolaanna sambau apan apianne sulałummu wuke n *Watti'u Manga Rasul* indi eteudde pammamanara n Gharraho Mawu Ruata apan ni-rumanta ringannu tarřino su manga taumata mangngimanna su Yeru-salem su allo m Pentakosta. Sulałummu anambo n arariadianna apan uawořretta sulałummu wuke indi natualage manungku Gharraho Mawu Ruata udde sidutu mangngehetta wuřru mannohassa gharreda wuřru manga piařrangnge. Watti'a apan niarřa'u agama n Sařrani su tempo paarorone indi inautta sulałummu anambo nase. Aławo'u arariadianna apan niwořretta sulałummu wuke indi manualaga lai aroddi ahewalle tarřino n watti'a udde sulałummu pabbiařrannu manga taumata n Sařrani wuřru sulałummu pasasangkaturangannu gharreda.

Lorraine

Sasaddia mabatti'a	1:1-26
a. Parenta panginsueanne wuꝛꝛu paaire Mawu Yesus	1:1-14
b. Pinalloꝛossa si Yudas	1:15-26
Pabbawatti'a Watti'u Aꝛaꝛuassa su Yerusalem	2:1-8:3
Pabbawatti'a Watti'u Aꝛaꝛuassa su Yudea wuꝛꝛu Samaria	8:4-12:25
Pammamanara m Paulus	13:1-28:31
a. Amamatta paarorone ipammasingkattu Watti'u Aꝛaꝛuassa	13:1-14:28
b. Ammuꝛanna su Yerusalem	15:1-35
c. Amamatta aruane ipammasingkattu Watti'u Aꝛaꝛuassa	15:36-18:22
d. Amamatta atallune ipammasingkattu Watti'u Aꝛaꝛuassa	18:23-21:16
e. Paulus sangkatou ruumanna su Yerusalem, Kaisarea, wuꝛꝛu Roma	21:17-28:31

1 Teofilus apan ma'imanna, Sulalümmu wuke'u paarorone suete ta'u tinala'a sarangkanambone apan niola'a wuṛṛu niaṛṛa'u Mawu Yesus ro'e n Itou nanattakku manara-Ne, ²na'oma n sara allone Itou nasengkengnga su surga. Tantalanna Itou taambe nasengkengnga su surga, ringannu taṛṛino n Ghaṛṛaho Mawu Ruata Itou manantiro manga rasul apan suete pinile. ³Napawe Itou wua nate, alannune appatu puḷo su allone Itou masokka mapalṛiatṛa'u inolaan-Ne apan masemakka su manga rasul udde manungku Itou atonna-tonna wiakka. Imangitou maasilo Sitou, wuṛṛu Itou lai uahatto mangitou su ola'u ereapa Mawu Ruata mamarenta ere sangkatou Ratu. ⁴Wuṛṛu su tempo Itou uaammulla suadio'a ringanni mangitou, Itou nangonggolu parenta indi simangitou, "Arie pangingkatta wuassu Yerusalem. Paṛṛaddo isudde ma'oma n sara lamangnga mangonggolu apa apan suete pinaire-Ne, eteudde apa apan suete nia-pasingkatta siamiu rorone.

⁵Ana waugu Yohanes mannaṛṛani ringannu ua'e, arawe ete pira allo lai iamiu sarun saṛṛaniannu Ghaṛṛaho Mawu Ruata."

Mawu Yesus nasengkengnga su surga

⁶Napawe manga rasul udde uaammulla su sampunna ringannu Mawu Yesus, imangitou naiwaḷo Sitou, "Mawu, apa orassa indi Mawu mapararisika apia Araratuannu walagu Israel?"

⁷Mawu Yesus sinumimbakka, "Iamangku sassane manantunnu allone wuṛṛu tempone. Udde tawe wotongnge asingkatanni amiu, ana waugu udde apulu n lamangnga. ⁸Arawe iamiu sarun miaasomba taṛṛino, amungkangngu Ghaṛṛaho Mawu Ruata nirumantate ringanni amiu. Wuṛṛu iamiu sarun ma'ola'a manga tatiala-U su Yerusalem, su ahewallu Yudea, su Samaria, wuṛṛu sara pentakku runia." ⁹Napawe Mawu Yesus suete nabbisara aroddi, Itou nasengkengnga su surga su saruannu mata mangitou, wuṛṛu winabbawa nallindumma Sitou wuassu aellegi mangitou.

¹⁰Tantalanna imangitou ta'e uatingngara langitta, su tempo Mawu Yesus nasengkengnga, inaṛṛombanganne rua ng katou uapedettu mawira uarisikka su samba'a mangitou. ¹¹"Ei, manga taumata n Galilea," unnu taumata darua udde, "anio iamiu uarisikka isudde uatingngara langitta? Mawu Yesus apan aellehanni amiu nasengkengnga watukku surga udde su saruanni amiu, sarun mabelengnga apia ringannu olangnge ereudde lai apan niasiloanni amiu tanginna."

Hahanti n Yudas

¹²See manga rasul udde nabelengnga watukku Yerusalem wu-assu Wuiddu Zaitun. Wuidda udde araune irarrangngo sangkilo wu-assu Yerusalem. ¹³Su Yerusalem imangitou inaitte watukku wale su tampa imangitou mattindaho, see nirumanganna su wabbo'a rengkenne aliurosone. Manga rasul eteudde Petrus wurru Yohanes, Yakobus wurru Andreas, Filipus wurru Tomas, Bartolomeus wurru Matius, Yakobus ana'i Alfeus, Simon Patriot wurru Yudas ana'i Yakobus; ¹⁴sarangkanambone sidutu ringannu naungnga uasampinunutanna uaammulla u'aliomanna. Imangitou lai u'aliomanna suadio'a ringannu manga wawine nasutta Maria inangngu Mawu Yesus, wurru manga turrangngu Mawu Yesus.

¹⁵Su allo sambau, su tempo imangitou tanta'anna uaammulla - irarrangngo pia marrasutta rua m pu'lo su atoune nirumanta - Petrus dirumarisikka mabbisara. Itou nabbisara, ¹⁶"Manga turrangnga! Apa apan uaworretta sula'ummu Wuke Susi, udde sarun matipussa. Paarorone wuassi Daud, Gharraho Mawu Ruata suete namasingkatta su ola'i Yudas, piarra'u manga taumata apan nanametta Mawu Yesus udde. ¹⁷Yudas eteudde sangkatou wuassu wallatti ite, wurru itou suete nipile lai mammanara suadio'a ringanni ite."

(¹⁸Yudas indi suete naasomba leta'u la'abinganne wuassu la'antakku ala'uanne apan la'eo. Itou nanawo wurru nate ringannu tianne nawasse na'oma n sara la'orro n sinangngone sinumabangnga. ¹⁹Anambo n taumata apan uatana'a su Yerusalem masingkattu hatto udde. Ana waugu udde sula'ummu wisara mangitou leta'a udde nissago Akeldama, atappasanne 'Leta'a Rarra'.)

²⁰"Ana sula'ummu Wuke Mazmur uaworretta arendi,

'Wala'e atatanaan-Ne maola'a ma'annaba;

arie piaddu sangkatou matana'a sula'umme.'

Pia uaworretta arendi lai,

'Wala'e aianan-Ne anuannu taumata waine.'

²¹⁻²²Ana waugu udde, rinone pia sangkatou apan tumantalongnga siite maola'a tatiala manungku Mawu Yesus nabbiakke apia wuassu papate-Ne. Taumata udde rinone sangkatou wuassu wallattu manga taumata apan sidutu suadio'a ringanni ite su tempo iite uatantalongnga Mawu Yesus su alawo'u tampa, ro'e n Yohanes nanattakka mannarani na'oma n sara Mawu Yesus nasengkengnga su surga wuassu pattangnganni ite."

²³Ne manga taumata apan uasemodda isudde nanebo'u rua ngkatou, eteudde Yusuf apan isassago lai Barsabas (itou isassago lai

Yustus), wuṛṛu Matias. ²⁴⁻²⁵See imangitou inumaḷiomanna. Imangitou nabbisara, "Mawu, ʼo masingkattu naungngu awadaalla. Yudas suete niaddo wuassu manarane sangkatou rasul wuṛṛu see natete. Nariaddi pantingira'a siami isai wuassu wallattu rua ng katou indi apan pileannu Mawu ongoḷannu manara ipalloḷossa si Yudas." ²⁶Wua udde aranna darua udde niundi, see niata'eanne eteudde Matias. Nariaddi itou netenega maola'a rasul mammanara su sambau ringannu sire mapuḷo assa rasul waine.

Daranta n Ghaṛṛaho Mawu Ruata

2 Napawe nia'omante allo m Pentakosta, anambo n taumata apan mangngimanna naammulla su sambau tampa. ²Inaṛṛombanganne niaringiṛṛanna tingikka wuassu langitta naaḷihida anginna ma'ikkatta. Waḷe aianannu manga taumata udde mangke napene n tingikka. ³See imangitou naasilo manga lila ere ṛenggammu putungnga mangngeekka su aḷawo'u tampa wuṛṛu inumarunna simangitou sangkatou-sangkatou. ⁴Imangitou sarangkanambone naasomba taṛṛino n Ghaṛṛaho Mawu Ruata, wuṛṛu nanattakke mabbisara sulaḷummu aḷawo'u manga wisara waine. Imangitou mabbisara tumuṛṛuttu apa apan ia'onggolou Ghaṛṛaho udde simangitou iapawisara.

⁵Su tempo udde manambo taumata n Yahudi, wuṛṛu wuassu aḷawo'u wanua su ahewallu runia, natana'a su Yerusalem. Imangitou udde taumata matuṛṛutta Mawu Ruata. ⁶Napawe naaringikka tingikka udde, manambo taumata naṛṛimpulunna. Imangitou sarangkanambone niṛṛumindu'a naaringikka manga taumata mangngimanna udde magga-hatto sulaḷummu wisara mangitou sambau-sambau. ⁷Ringannu nahe-rangnga wuṛṛu inagukke imangitou nabbisara, "Manga taumata apan mabbisara indi sarangkanambone waḷinewe taumata n Galilea? ⁸Ereapa arariaddine na'oma n sara iite naaringikka imangitou mabbisara sulaḷummu wisara wanua ng kite sambau-sambau? ⁹Iite manga taumata wuassu Partia, Media, Elam; wuassu Mesopotamia, Yudea wuṛṛu Kapadokia; wuassu Pontus wuṛṛu Asia, ¹⁰wuassu Frigia wuṛṛu Pamfilia, wuassu Mesir wuṛṛu manga leta'u Libia marani n Kirene; piaddu wuassi ite lai apan nirumanta wuassu Roma, ¹¹pia manga taumata n Yahudi wuṛṛu pia lai manga taumata m pabbawalaga waine apan suete sinumutta agama n Yahudi; pia lai nirumanta wuassu Kreta wuṛṛu Arab. Iite sarangkanambone maaringikka imangitou mabbisara sulaḷummu wisara ng kite sambau-sambau su ola'u hatto apan maaherangnga apan niola'u Mawu Ruata!" ¹²Ringannu naherangnga wuṛṛu niagukke imangitou sa-

rangkanambone uaiwaŋo sangkatou ringannu waine, "Apa atapasanne indi?"

¹³Arawe piaddu lai manga taumata mangngaŋuandaga. Imangitou nabbisara, "Ei, manga taumata udde wu'anna!"

Nase m Petrus

¹⁴See Petrus dirumarisikka suadio'a ringannu sire mapuŋo assa rasul waine, wua udde nabbisara su taumata nambo udde. Ringannu tingikka ma'ikkatta itou nabbisara, "Manga tuŋrangnga, manga taumata n Yahudi wuŋru sarangkanambone apan uatana'a su Yerusalem! Padaringikka paapia-pia, ana waugu olangnge indi ta'u itala'a siamiu ringannu masema-semakka. ¹⁵Manga taumata indi waŋine wu'anna, ere su sunna ng kamiu; ana waugu orassa indi wakku puulla sio ruaallo. ¹⁶Arawe indi suete niapaasingkattu Mawu Ruata si Nabi Yoel:

¹⁷Mawu Ruata nabbisara, 'Su panginsueannu runia

Ia'u sarun mangonggolu Ghaŋraho-U su anambo n taumata.

Aŋaŋrangngu esakka wuŋru aŋaŋrangngu wawine sarun mamasingkatta siamiu manga inolaanna apan Ta'u ipaasingkatta simangitou.

Manga dario'a sarun maasilo inolaanna apan Ta'u iapasilo simangitou.

Manga taumata timmaddenu sarun mabaŋiawa su ola'u waŋiawa apan Ta'u ionggolla simangitou.

¹⁸Su manga allang-Ku lai - mawae esakka ara'e wawine -, sarun onggolannu Ghaŋraho-U su allo udde.

Imangitou sarun mamasingkattu inolaanna apan Ta'u iapaasingkatta simangitou.

¹⁹Ia'u sarun ma'ola'a manga aŋaŋrindu'a roso su langitta,

wuŋru inolaanna apan wahewalla su runia;

sarun pia ŋaŋra wuŋru putungnga, sawudda wuŋru timbulla.

²⁰Matannallo sarun maddandumma,

wuŋanna mabbaŋi maŋramu ere ŋaŋra

tantaŋanna Allo Mawu, Allo apan wahewa wuŋru Allo apan mawantuga udde rumanta.

²¹Su tempo udde taumata apan mailaŋare su Mawu sarun masaŋamatta.'

²²Manga tuŋrangnga taumata n Israel! Padaringikka wisara'u indi: Mawu Yesus taumata Nazaret udde suete nionggolannu Mawu Ruata manara huna ng kamiu. Udde natualaga su manga aŋaŋrindu'a wuŋru inolaanna apan wahewalla apan niola'u Mawu Ruata su pattangngani amiu sulaŋummu Mawu Yesus udde. Sarangkanambone udde tuŋrangnga

sassane masingkatta. ²³Ere su řingirřan-Ne sassane, Mawu Ruata narřawessa, Itou manantillu Mawu Yesu siamiu. Wuřřu su tempo Itou tinantilla, iamiu namate Sitou ringannu namala manga taumata lařeo nangarussa n Tou. ²⁴Arawe Mawu Ruata napaawiakki Tou apia wuassu wallattu manga taumata nate. Itou niallupu papate, arawe Mawu Ruata napaaliu n Tou, ana waugu tawe řinone Itou sidutu aagasannu papate. ²⁵Su ola'u Mawu Yesu indi Daud suete nabbisara,

'Ia'u sidutu ua'ellega Mawu su saruanku;

Itou uaammungnga sia'u, tadea'u ia'u tawe awono'anna.

²⁶Ana waugu udde naungku mangke lulluassa,
mořřongku mangke maddalo:

wuřřu wadanku indi sarun

mallařřado ringannu matammuda sulařummu lařabinganna.

²⁷Ana waugu I'o tawe namala řimuu'u matantangnga su runia n taumata nate.

I'o tawe mamala n allang-Ngu apan matuřřutta indi

mařřimunsa'a wuřřu masue.

²⁸I'o suete namantingidu lařanna sia'u ipatudu wiakka apan tutune.

Ařařuassa sia'u ete niapangillemo ana waugu I'o sidutu uatantalongnga sia'u.'

²⁹Manga tuřřangnga, ia'u madorongnga mabbisara ringannu mase-makka su ola'i Daud, iamangngu ařamona ng kite udde. Itou nate wuřřu suete nilabingnga lai; lařabinganne ta'e udde saran orassa indi. ³⁰Mawu Ruata suete na'ire si Daud, ringannu sasalu, manungku sangkatou wuassu wallattu papapulunne sarun itenegu Mawu Ruata maola'a ratu. Ana waugu Daud masingkattu paaire udde wuřřu ana waugu itou lai sangkatou nabi, ³¹itou masingkatta lai apa apan sarun olaannu Mawu Ruata. Nariaddi itou suete namasingkatta manungku Ratu m Punnu Sařamatta apan pina'ire Mawu Ruata, sarun mabbiakka apia wuassu papate. Daud nabbisara,

'Itou tawe iwala matantangnga sulařummu runia n taumata nate;

wadang-Nge tawe mařřimunsa'a wuřřu masue.'

³²Ete Mawu Yesu udde apan niapaawiakku Mawu Ruata apia wuassu papate. Iami sarangkanambone suete naasilo sassane olangnge udde.

³³Itou nitenega su aiananna apan matanggakka wuřřu nionggolařannu Mawu Ruata tařřino, see nanengkamma Ghařřaho Mawu Ruata apan suete pina'ire iamangnga. Wuřřu apan niaringirřanna wuřřu aellehanni amiu orassa indi eteudde Ghařřaho apan suete nionggolla siami. ³⁴Daud sassane tawe nasengkengnga watukku surga, arawe Daud nabbisara,

'Mawu nabbisara su Mawu-U:

³⁵ A'iante su samba'a uanang-Ku,

ma'oma n sara Ia'u ma'ola'a manga seennu massuřřubawa Si'o!'

³⁶Ana waugu udde anambo n taumata n Israel řinone maasingkatta atonna-tonna manungku Mawu Yesus apan niarussa ng kamiu udde, eteudde Mawu Yesus apan nitenege Mawu Ruata maola'a Mawu wuřru Ratu m Punnu Sařamatta!"

³⁷Napawe manga taumata udde naaringikka olangnge udde, naungngi mangitou u'ambulısada. See imangitou naiwařo si Petrus wuřru manga rasul apan waine, "Manga tuřrangnga apa řinone olaanni ami?"

³⁸Petrus sinumimbakka, "Awařute wuassu manga rosanu. Wuřru iamiu sambau-sambau řinone sařřanianna su arannu Mawu Yesus Kristus, tadea'u manga rosanu ampunganna. Ne manga tuřrangnga sarun manengkamma Ghařřaho Mawu Ruata wuassu Mawu Ruata. ³⁹Ana waugu paaire Mawu Ruata udde maola'a wageangngu wuřru papapulunnu see manga taumata apan uatana'a su tampa apan marau - eteudde anambo n taumata apan niwagoannu Mawu Ruata rumanta ringanni Tou."

⁴⁰Ete aroddi Petrus mannařa'a simangitou. Wuřru ringannu wisara apan manambo waine lai itou nandolokki mangitou tadea'u imangitou mapaalıu watanganne wuassu pabbawalaga apan dařeo indi apan sarun iřřuumannu Mawu Ruata. ⁴¹Manambo taumata mangngimanna watti'i Petrus, see imangitou naisařřanite. Ne reengannu taumata mangngimanna su allo udde niatambanna lai tallu řiwu su atoune. ⁴²Ringannu mařřimada imangitou sidutu mangngurumma ařařřa'a wuassu manga rasul wuřru sidutu uaammulla suadio'a. Imangitou u'anna su sambau wuřru u'ařiomanna su sampunna.

Ola'u manga taumata mangngimanna udde mabbiakka

⁴³Manambo atonna ařařřindu'a apan maarindu'a apan niola'u manga rasul udde na'oma n sara manambo taumata naherangnga wuřru nata'utta. ⁴⁴Manga taumata apan mangngimanna udde sarangkanambone sidutu uaaukka wuřru apa apan tatahuannani mangitou ipappaatti mangitou suadio'a. ⁴⁵Imangitou nabařu'u manga sarannapa wuřru pussa'a mangitou, see tinahia roinne simangitou sarangkanambone tumuřřuttu hausannu sangkatou-sangkatou. ⁴⁶Miallo-miallo imangitou sidutu uaammulla su Waře Mawu; lapiddu u'anna suadio'a, ringannu lulluassa wuřru masařřionto'a su manga waře mangitou. ⁴⁷Imangitou sidutu madalo Mawu Ruata wuřru ipaapulu n taumata nambo. Miallo-miallo reenganni mangitou aatambanna ana waugu Mawu nangonggolu manga taumata apan tantařanna sassařamattanna.

Taumata lome niapaapia

3 Su sambau allo Petrus wuṛṛu Yohanes inai su Waḷe Mawu su puulla tatallu wawallo, eteudde orassa umaḷiomanna. ²Poiaroddi ngara wawewa apan isassago "Ngara Maṛṛamaga", pia sangkatou esakka lome ro'e n dariaddine. Miallo-miallo taumata udde iaapidda isudde ia-parorongnga su manga taumata apan sumutta su Waḷe Mawu. ³Napawe taumata udde naasilo si Petrus wuṛṛu Yohanes sussutta su Waḷe Mawu, itou nadorongnga sitarua mangonggolu sarannapa sitou. ⁴Ne itarua nanutuda sitou, wua udde Petrus nabbisara, "Pa'ellege siami!" ⁵See taumata udde nanutuda sitarua ringannu antimma sarun onggolaṅṅannu sarannapa wuassi mangitou. ⁶Arawe Petrus nabbisara sitou, "Ta'u tawe doitta sara ng kadio'a. Arawe apa apan indi sia'u, sarun ta'u ionggolla si'o: Ringannu taṛṛino n Yesus Kristus taumata Nazaret udde, amatte i'o!" ⁷See Petrus nangagassa taumata udde su lima aikkatanne wuṛṛu nantulunggi tou dirumarisikka. Ledda n taumata udde wuṛṛu wawuḷannu leddane, lapiddu nabaḷi matohassa. ⁸See itou sinumolo'a dirumarisikka, wuṛṛu inumamatte uapapaḷele isudde. Wua udde itou sinumutta su Waḷe Mawu suadio'a ringanni Petrus wuṛṛu Yohanes lapiddu u'amatta wuṛṛu sussolo'a wuṛṛu maddalo Mawu Ruata. ⁹Awadaalla naasilo sitou u'amatta wuṛṛu maddalo Mawu Ruata. ¹⁰See imangitou naatutukka manungku ete itou madarorongnga apan wiasane ua'ianna su "Ngara Maṛṛamaga" su Waḷe Mawu. Imangitou naherangnga wuṛṛu niagukke naasilo apa apan suete nariaddi sitou.

Nase m Petrus sulaḷummu Waḷe Mawu

¹¹Taumata udde sidutu uatantalongnga si Petrus wuṛṛu si Yohanes. Wuṛṛu napawe imangitou n tallu na'omate su panumbaḷe apan isassago "Panumbaḷe n Salomo", anambo n taumata nirumanta maṛṛimpulunna simangitou n tallu ana waugu niagukke. ¹²Napawe Petrus naasilo manga taumata udde, itou nabbisara simangitou, "Ei manga taumata n Israel, anio manga tuṛṛangnga maggerangngu olangnge indi? Anio iamiu sidutu ua'ellega siami? Apa iamiu massunna manungku taumata indi naamatta ana waugu taṛṛino wuassi ami ara'e ana waugu iamii matuṛṛutta Mawu Ruata? ¹³Mawu Ruata apan sassubbanni Abraham, Ishak, Yakub, Mawu Ruata aḷamona ng kite, Mawu Ruata udde suete namantuga Allang-Nge eteudde Mawu Yesus, ete Mawu Yesus udde tinantilli amiu su tembonanne wuṛṛu niroopanni amiu su saruanni Pilatus, su tempo Pilatus maapulu mamallosi Tou. ¹⁴Itou na'ukkassa wuṛṛu mapia,

arawe iamiu mannaḷare wuḷḷu mammata'a tadea'u Pilatus mamallossu sangkatou taḷḷa pate siamiu. ¹⁵Manga tuḷḷangnga namate Sitou, sumbaḷi ete Itou punnu wiakku taumata nambo. Wuḷḷu Mawu Ruata suete napaawiakki Tou apia wuassu papate. Wuḷḷu iamii suete naasilo sassane olangnge udde. ¹⁶Manga tuḷḷangnga suete naasilo wuḷḷu nattiaala apa apan nariaddi su taumata lome indi. Itou nabaḷi matohassa, wuḷḷu napia ana waugu mangngimanna Mawu Yesu wuḷḷu taḷḷino-Ne. Ana waugu mangngimanna Mawu Yesu, ne taumata indi napiate apia su saruannu manga tuḷḷangnga sarangkanambone.

¹⁷Manga tuḷḷangnga! Orassa indi ia'u masingkate manungku apa apan a'olaanni amiu wuḷḷu manga piaḷḷa'i amiu su Mawu Yesu, udde a'olaanni amiu ana waugu iamiu wagga apa apan tantaḷanna a'olaanni amiu. ¹⁸Wuḷḷu ana waugu eteudde natipusse apa apan suete niapaasingkattu Mawu Ruata ro'e n aḷamonane sulaḷummu manga nabi-Ne, manungku Ratu m Punnu Saḷamatta apan pina'ire udde ḷinone matataḷḷangnga. ¹⁹Ana waugu udde manga tuḷḷangnga, awaḷute wuassu manga rosanu wuḷḷu pabelengke ringannu Mawu Ruata tadea'u Itou mapassa manga rosanu. ²⁰Mawu sarun rumanta ringanni amiu, wuḷḷu iamiu sarun maapendamma atahassa wakku sulaḷummu pangangimanna. Wuḷḷu Mawu sarun mandolokku Mawu Yesu rumanta ringanni amiu, ana waugu Itou suete tinantunnu Mawu Ruata maola'a Ratu m Punnu Saḷamatti amiu. ²¹Itou sarun matana'a su surga ma'oma n sara Mawu Ruata ma'ola'a sarangkanambone wakku ere lai suete niapaasingkattu Mawu Ruata su manga nabi-Ne tempo rorone. ²²Musa suete nabbisara, 'Mawu Ruatanu sarun mandolokka ringanni amiu sangkatou nabi wuassu pabbawalagu sassane ere lai Itou nandolo'u. Iamii ḷinone madaringikka anambo n watti'a apan nipasingkattu nabi udde siamiu. ²³Taumata apan tawe madaringikka wisara nabi udde, taumata udde sarun limbuaḷḷanna wuassu pabbawalagu Mawu Ruata wuḷḷu pateanna.' ²⁴Manga nabi apan suete namasingkattu watti'u Mawu Ruata, manattakka wuassi Nabi Samuel wuḷḷu manga nabi waine apan nirumanta saḷimmurine, sarangkanambone namasingkatta su ola'u tempo indi. ²⁵Manga paaire Mawu Ruata apan niapaasingkattu manga nabi, eteudde huna manga tuḷḷangnga. Sulaḷummu paaire apan niola'u Mawu Ruata su iupunggu aḷamonanu, Mawu Ruata nabbisara si Abraham arendi, 'Wuassu papapulunnu, Ia'u sarun mangalaḷamatta aḷawo'u taumata su runia.' Paaire udde hunane siamii lai. ²⁶Ana waugu udde Mawu Ruata namile Allang-Nge, see nandolokki Tou nirumanta ringanni amiu paarorone, tadea'u Itou mangalaḷamatta siamii. Olangnge Itou mangalaḷamatta eteudde na'ola'a manga tuḷḷangnga sarangkanambone nawaḷu wuassu ola'u wiakki amiu apan laḷeo."

Petrus wuṛṛu Yohanes su saruannu Mallaṛṛuunggu Agama

4 Tantalanna Petrus wuṛṛu Yohanes ta'e uahahatto manga taumata udde, manga imam tembonanne wuṛṛu piaṛṛa'u mandariaga Waḷe Mawu wuṛṛu manga taumata n Saduki nirumanta ringanni Petrus wuṛṛu Yohanes. ²Imangitou massa'u ana waugu Petrus wuṛṛu Yohanes mabatti'a manungku Mawu Yesus suete nabbiakka apia wuassu papate. Wuṛṛu udde maola'a tatiala manungku taumata nate sarun mabbiakka apia. ³Ne imangitou nanametta rasul darua udde see niapaasutta sulaḷummu tutupanna. Wuṛṛu ana waugu ṛabbite, ne Petrus wuṛṛu Yohanes tinaṛṛanganna isudde na'oma n sara tiṛṛabbine. ⁴Arawe manga taumata apan naaringikke aḷaṛṛa'u manga rasul udde, manambo nampangimanna. Ne reenganni mangitou niatambanna na'oma n sara iraṛṛangngo lima ṛiwu su atoune.

⁵Tiṛṛabbine manga mapapande Mallaṛṛuunggu Agama, manga piaṛṛa'u taumata n Yahudi wuṛṛu manga huru n agama naammulla su Yerusalem. ⁶Imangitou naisasomba n Imam Wahewa Hanas, see lai Kayafas, Yohanes, Aleksander, wuṛṛu sarangkanambone apan nasutta su reengannu pabbawalagu imam wahewa udde. ⁷Petrus wuṛṛu Yohanes niapidda sinumaruanna simangitou, see imangitou naiwaḷo, "Ereapa olangnge iamiu napaapia n taumata lome udde? Ringannu atatohassa sassane ara'e ringannu taṛṛino n sai iamiu ma'ola'a udde?"

⁸Petrus apan niintaṛṛoannu Ghaṛṛaho Mawu Ruata, sinumimbakka, "Manga mawu piaṛṛa'u pabbawalaga, wuṛṛu manga mawu wageangngu mallaṛṛuungnga! ⁹Iami niparikisanna allo indi ana waugu na'ola'a apapia ipantulungngu taumata lome, wuṛṛu ana waugu manga mawu maapulu maasingkatta taumata udde pinapaapia. ¹⁰Ne, manga mawu sarangkanambone rinone maasingkatta wuṛṛu anambo n walagu Israel rinone lai maasingkatta manungku taumata indi uarisikka orassa indi ringannu wadangnga apan mapia su saruannu manga mawu, ana waugu atatohassa wuṛṛu taṛṛino wuassu Mawu Yesus Kristus taumata Nazaret. Manga mawu suete nangarussa Mawu Yesus udde, arawe Mawu Ruata suete napaawiakki Tou apia. ¹¹Ete Mawu Yesus udde apan su pandummu aaddoanne indi sulaḷummu Wuke Susi,

'Watu apan tate ipaatta su manga waḷe,
nasemakka naola'e watu apan paarorone.'

¹²Tumba'u sulaḷummu Mawu Yesus sassane taumata masaḷamatta. Ana waugu su ahewallu runia indi su wallattu taumata tawe saran sangkatou taumata waine maasomba taṛṛino wuassu Mawu Ruata ipanaḷamatta siite."

¹³Manga wageanggu ammuḷannu Mamamarikissa udde naherangnga naasilo awawarḷrani n Petrus wuḷḷu Yohanes, see lai imangitou masingkatta manungku rasul darua udde taumata wiasa apan tawe si'oḷane. See imangitou naatutukke manungku rasul darua eteudde manga taumata apan uatantalongnga Mawu Yesus. ¹⁴Arawe imangitou tawe naasinaukka saran adio'a, ana waugu taumata apan suete niapaapia udde uarisikka lai isudde su saruanni mangitou suadio'a ringanni Petrus wuḷḷu Yohanes. ¹⁵Ne imangitou nandolokku rasul darua udde sinumabangnga wuassu tampa m paammuḷanna, wua udde imangitou na'ire. ¹⁶Imangitou mabbisara, "Rinone olaanni ite ereapa manga taumata indi? Anambo n taumata apan uatana'a su Yerusalem masingkate manungku aḷarḷrindu'a apan wahewalla indi, niola'i tarua. Iite tawe mappassinaaddu olangnge udde. ¹⁷Arawe tadea'u hatto indi tawe massaḷiawukka su manga taumata, wette iite mapaanaungngi tarua manungku tate wotongnge itarua mabbisara taumata ringannu mappaattu arannu Mawu Yesus."

¹⁸Ne imangitou namago rasul darua udde niapaasutta apia, wuḷḷu niwaḷoanna manungku itarua tate wotongnge manago ara'e mangarḷra'a ringannu mappaattu arannu Mawu Yesus.

¹⁹Arawe Petrus wuḷḷu Yohanes sinumimbakka, "Ringirḷra'e sassane apa apan rinone su saruannu Mawu Ruata: tumuḷḷuttu parenta manga mawu ara'e tumuḷḷutta parenta Mawu Ruata. ²⁰Ana waugu iami tawe maailloḷo mabbisara su ola'u apa apan suete niasiloanni ami wuḷḷu niaringirḷranni ami sassane." ²¹Manga laḷoḷḷo n ammuḷanna udde tawe naasomba sambau pinangiananne ipakkuumanni Petrus wuḷḷu Yohanes. Nariaddi imangitou napaanaungngi tarua apia, see itarua nipallosse, ana waugu anambo n taumata mangke maddalo Mawu Ruata ana waugu arariaddianna udde. ²²Taumata apan suete niapaapia udde appate m puḷo su tonnane pia lebene uukke.

Manga taumata mangngimanna madorongnga awawarḷrani wuassu Mawu

²³Napawe Petrus wuḷḷu Yohanes nipallose, imangitou nabelengke ringannu manga hawene wuḷḷu nabatti'u manga wisara n imam tembomanne wuḷḷu manga piarḷra'u Yahudi udde simangitou. ²⁴Napawe manga hawene naaringikka udde, imangitou suadio'a inumaḷiomanna ringannu naungnga sambua su Mawu Ruata. Imangitou mabbisara, "Mawu, tumba'u I'o nandiaddi langitta wuḷḷu runia wuḷḷu tahaḷoangnga ringannu aḷawo'u laḷoḷḷone. ²⁵Ringannu Gharḷraho-Nu I'o suete nabbisara su iupunggu aḷamona n kami Daud, eteudde allang-Ngu; I'o nabbisara,

'Anio manga taumata, apan tawe maailaḷa Mawu, massa'u;
anio manga pabbawalaga ma'ola'a ringiranna laḷeo?

²⁶Manga ratu su runia uasasaddia mappapangalo,
wuru manga piarange uaukka lumawangnga Mawu wuru
Ratu m Punnu Saḷamatta.'

²⁷Ana waugu Herodes wuru Pontius Pilatus suete na'ola'a ammula ringannu manga taumata apan tawe maailaḷa Mawu wuru ringannu taumata n Israel su soa indi. Imangitou maamulla lumawangnga Mawu Yesus allang-Ngu apan na'ukkassa udde, apan suete nitene-Gu maola'a Ratu m Punnu Saḷamatta. ²⁸Imangitou naukka ma'ola'a alawo'u manara, apan suete tinantunna ro'e n paarorone manungku udde sarun matippussa. Wuru I'o sarun manantunnu udde wuassu tarriṅno wuru apulu-Nu sassane. ²⁹Orassa indi, Mawu, ellehete ereapa imangitou mammalsaggi ami. Wuru wala'e iami, manga allang-Ngu indi mamingkattu watti'a ringannu tawe matta'utta. ³⁰Onggoḷaawe aakannu, tadea'u taumata marada'a iapaapia wuru manga alarindu'a see inolaanna apan wahewalla mariaddi wuassu tarriṅno wuru atatohassa wuassu arannu Mawu Yesus, Allang-Ngu apan na'ukkassa udde."

³¹Napawe imangitou suete inumaliomanna, tampa imangitou uaamulla udde inumio'a. Imangitou sarangkanambone naasomba tarriṅno n Gharraho Mawu Ruata, wuru nanattakke mabbisara ringannu warriṅni atonna, su ola'u watti'u Mawu Ruata.

Sarangkanambone su sambau

³²Anambo n taumata apan mangngimanna udde mabbikka ringannu naungnga wuru apendamma sambau. Tawe saran sangkatou wuassi mangitou mammalsamma manungku apa tatahuananne udde darotongnge sassane. Alawo'u apa simangitou, ipappaatti mangitou su sambau. ³³Ringannu tarriṅno apan wahewa, manga rasul udde mangngonggolu tatiala manungku Mawu Yesus nabbiakke apia. Ne Mawu Ruata lembo nangalamatta simangitou. ³⁴Wuru tawe saran sangkatou wuassu walatti mangitou apan niatalannu manga apa. Ana waugu imangitou apan uatahuanna leta'a ara'e wale, nabaḷu'u leta'a ara'e wale mangitou udde; roinne niapiddi mangitou ³⁵wuru tinantilli mangitou su manga rasul. Wua udde roitta tinahia su manga taumata apan mappandumma.

³⁶⁻³⁷Aroddi lai Yusuf. Itou lai nabaḷu'u leta'a, see roinne niapiddi tou wuru tinantilla su manga rasul. Yusuf indi sangkatou wuassu papapuluni Lewi wuassu Siprus; manga rasul mammalsaggi sitou lai Barnabas (atappasanne Mallaḷuassa).

Ananias wuṛṛu Safira

5 Arawe pia sangkatou aranne Ananias. Itou ringannu awingnge aranne Safira, nabaḷu'u leta'a santampa pussa'a mangitou. ²Roitta wuassu la'unnu leta'a udde, sambageanganna niwa'ungngi tou ipaatta sassane wuṛṛu waine tinantilli tou su manga rasul. Itou na'ola'a udde asingkatannu awingnge. ³Ne Petrus nabbisara sitou, "Ananias, anio i'o namala n Setanna namiaṛṛa'u naungngu, na'oma n sara i'o nangawusu Ghaṛṛaho Mawu Ruata, ringannu maḷanna-ḷannaba nama'ungnga roitta ipaannu sassane sambageanganna roitta la'unnu leta'a udde? ⁴Leta'a udde pussaanu, ro'e n i'o taambe nabaḷu'a. Wuṛṛu napawe leta'a udde suete niwaḷu'a, roinne lai ta'e pussaanu. Nariaddi anio i'o pia pandumma ereudde sulaḷummu naungngu ma'ola'a pallaḷagu udde? Waḷine taumata aawusuannu ewe'e Mawu Ruata!" ⁵Aroddi Ananias naaringikka manga wisara udde, itou nawantingnga see nate. Anambo n taumata apan naaringikka olangnge udde nata'utta. ⁶Ne manga umbasanna nirumanta wuṛṛu nami'unna winaḷunanni Ananias see niapidda suliudde wuṛṛu nilabingnga.

⁷Iraṛranggo tallu ng ka'orassa naḷiu, awingnge nirumanta. Itou wagga apa apan wakku nariaddi. ⁸Petrus nabbisara sitou, "Annama'a waḷoa'a sia'u: Apa leta'a apan niwaḷungngu wuṛṛu awingngu udde, aregane arendi?" "Atonna ereudde aregane," sasimbakku awingngi Ananias.

⁹See Petrus nabbisara sitou, "Anio i'o wuṛṛu awingngu na'ire manabaḷu'atta Ghaṛṛaho Mawu Ruata? Padaringika! Manga taumata apan nallabingngu awingngu nabelengke. Imangitou sarun mangapiddu lai su liudde." ¹⁰Orassa udde lai awingngi Ananias nawantingnga wuṛṛu nate su saruanni Petrus. Wuṛṛu su tempo manga umbasanna udde sinumutta, imangitou naaratingnga sitou natete. See imangitou nangapiddu winaḷunanne su liudde see nilabingnga su sandiṛṛannu awingnge. ¹¹Ne anambo n taumata apan mangngimanna udde wuṛṛu manga taumata waine, apan naaringikka arariaddianna udde, nata'utta.

Manga aḷaṛṛindu'a wuṛṛu manga inolaanna apan wahewalla

¹²Ana waugu pamamanara manga rasul, ne manambo aḷaṛṛindu'a wuṛṛu manga inolaanna apan wahewalla nariaddi su wallattu laḷoṛṛo n soa. Ringannu naungnga sambua anambo n taumata apan mangngimanna naammulla su Panumbaḷe n Salomo su Waḷe Mawu. ¹³Wuṛṛu

taumata waine tawedu waṛṛani rumanta maammula ringannu manga taumata apan mangngimanna udde. Arawe manga taumata mangngimanna udde lembo n aaddatannu laḷoṛṛo n soa. ¹⁴Wuṛṛu mallannu mangke aatambanna anambone manga taumata apan mangngimanna Mawu – mapia esakka ara'e wawine. ¹⁵Ewe'e olangnge naola'e aroddi na'oma n sara manga taumata marada'a niaddo su lallowanganna ara'e wilatta, see niapidda su laḷanna, tadea'u imangitou salaiwe mattuḷungnga aṛṛinoannu lintau m Petrus, amungkangngu Petrus sumabbi isudde. ¹⁶Mangke mangngelekka manga taumata nirumanta wuassu soa marani n Yerusalem. Imangitou mangngapiddu manga taumata marada'a wuṛṛu niasuttannu manga gharraho laḷeo. Ne manga taumata udde sarangkanambone niapaapia.

Manga rasul pinassansara

¹⁷Panginsueanne imam wahewa wuṛṛu anambo mallalaṛṛengenne, eteudde wageangngu manga taumata n Saduki mannattake lullawangnga ana waugu imangitou pia naungnga laḷeo. ¹⁸Manga rasul udde sinametta, see nitarṛo sulaḷummu tuttupannu awadaalla. ¹⁹Arawe ṛabbine, sangkatou mala'ekattu Mawu namu'a manga ngara n tuttupanna, see nangapiddu manga rasul udde sinumabangnga. Mala'ekatta udde nabbi-sara su manga rasul, ²⁰"Roote darisikka su Waḷe Mawu wuṛṛu pasingkata'a su taumata su ola'u wiakka apan wakku indi." ²¹Ne manga rasul udde tinumuṛṛutte tanata n mala'ekatta udde. Ruaallo atonna imangitou inaitte su Waḷe Mawu wuṛṛu mannattake mangngaṛṛa'a isudde.

Tantaḷanna udde imam wahewa wuṛṛu mallalaṛṛengenne nirumanta, see na'ola'a ammullu mallalaṛṛuungnga ringannu manga piaṛṛa'u Yahudi. Wua udde imangitou nandolokku taumata inai mangaḷapa manga rasul udde su tuttupanna iapaapidda sumaruanna simangitou. ²²Arawe napawe manga taumata nirolokka udde na'omate su tuttupanna, imangitou tawe naasilo manga rasul isudde. Nariaddi imangitou nabelengke, see nabaḷo n olangnge udde su mallalaṛṛuungnga. ²³"Su tempo iami na'omate su tuttupanna," unni mangitou su mallalaṛṛuungnga, "niaratinganni ami ngara n tuttupanna uaṛṛuuda mapia-pia, wuṛṛu manga mandariaga uariaga su ngara. Arawe su tempo iami namu'a ngara udde, iami tawe naasilo saran sangkatou sulaḷumme." ²⁴Napawe piaṛṛa'u mandariaga Waḷe Mawu wuṛṛu manga imam tembonanne naaringikka alae udde, imangitou tinumiangnga su ola'u manga rasul wuṛṛu matta'uttu apa apan sarun mariaddi. ²⁵Wua udde nirumantate sangkatou esakka uaapiddu watti'a indi, "Daringiṛṛe! Manga taumata apan tinaṛṛangannu manga Tuangnga su tuttupanna udde orassa indi tantaḷanna mangngaṛṛa'a awadaalla

su Waļe Mawu!" ²⁶Ne piarŗa'u mandariaga Waļe Mawu udde su sambau ringannu mandariagane inaita nangaļappa manga rasul udde apia. Arawe imangitou tawe nangaļappu ararŗagissa ana waugu imangitou matta'uttu taumata nambo; arŗengenne taumata nambo udde mamareta m batu simangitou.

²⁷Manga rasul udde niapidda sinumutta sinumaruanna mallaŗruungnga. See imam wahewa namarikissa simangitou. ²⁸Itou nabbi-sara, "Iami suete naningaddi amiu tadea'u ariete pangarŗa'u arannu taumata udde. Arawe orassa indi pa'ellege apa inolaanni amiu! Iami mannaļiawukku aļarŗa'i amiu su ahewallu Yerusalem, wuŗru iami mangngansilla manungku ete iami nipandansilanannu papate n taumata udde."

²⁹Petrus wuŗru manga rasul apan waine sinumimbakka, "Iami rinone tumuŗrutta Mawu Ruata wuŗru waļine tumuŗrutta taumata. ³⁰Mawu Yesus, apan niarussa ng kamiu suete niapaawiakku Mawu Ruata iupungngu aļamona ng kite apia wuassu papate. ³¹Mawu Ruata suete nangonggolu aiananna wuŗru tarŗino apan matanggakka Sitou eteudde Piarŗrangge wuŗru Punnu Saļamatta; tadea'u walagu Israel onngoļannu tempo mawaļu wuassu manga rosane wuŗru ampunganna. ³²Ete iami manga mattatiale su ola'u sarangkanambone udde - iami wuŗru lai Gharŗaho Mawu Ruata apan nionggolu Mawu Ruata su manga taumata apan matuŗrutta Sitou."

³³Su tempo manga Mallaŗruungngu Agama naaringikka udde, imangitou mangke nasa'u, wuŗru imangitou na'irete mamate inanga rasul udde. ³⁴Arawe su wallattu manga Mallaŗruungngu Agama udde pia sangkatou Farisi aranne Gamaliel. Itou huru n agama apan aaddatannu anambo n taumata. Itou dirumarisikka see nandolokku taumata niapaapiddu manga rasul udde sinumabangnga su liudde taļa ng kadio'a. ³⁵Wua udde itou nabbisara su Mallaŗruungngu Agama udde, "Manga tuŗrangnga manga taumata n Israel! Ringirŗa'a paapia-pia su ola'u apa apan sarun olaannu manga tuŗrangnga su saruannu manga taumata indi. ³⁶Ana waugu dorone suete nirumanta Teudas, apan mangngantimma itou taumata wahewa, na'oma n sara irarŗangngo appatu rasutta su atoune tinumantalongnga sitou. Arawe itou nipate wuŗru mallaļarŗengenne nassaļiawukka wuŗru tuddane nawuļi. ³⁷Wua udde, su tempo m pandareengngu aranna, nilumapputa apia Yudas, taumata wuassu Galilea. Ana waugu sasaļongge manambo taumata tinumantalongnga sitou. Arawe itou lai nipate, wuŗru anambo mallaļarŗengenne nassaļiawukka. ³⁸Nariaddi orassa indi ringannu arariaddianna udde, tatantiro'u eteudde: imbarŗangnga ma'ola'a apa-apa su manga taumata indi, wala'e aroddi imangitou. Ana waugu aļarŗa'a wuŗru tatantiro mangitou indi eteudde wuassu taumata, ne aļarŗa'a wuŗru tatantiro

udde sarun mawuḷi. ³⁹Arawe amungkanngu udde nirumanta wuassu Mawu Ruata, ne manga tuṙrangnga tawe mapaasaḷa mangitou. Ewe'e asinungka sarun matualaga manungku manga tuṙrangnga lullawangnga Mawu Ruata."

Aḷaṙṙa'i Gamaliel udde nisengkammu mallaṙṙuungnga. ⁴⁰Ne manga rasul udde niwagoante, see nihesekka, wua udde nisingadda mangarṙa'a apia aḷaṙṙa'u Mawu Yesus. Wua udde imangitou nipallosse. ⁴¹Manga rasul udde nanantangngu Mallaṙṙuungngu Agama ringannu lulluassa ana waugu Mawu Ruata suete na'ola'a simangitou naasomba aaluandaga ana waugu Mawu Yesus. ⁴²Wuṙṙu miallo-miallo su Waḷe Mawu see lai su manga waḷe n taumata, imangitou sidutu manggarṙa'a wuṙṙu mabatti'a Watti'u Aḷaḷuassa su ola'u Mawu Yesus manungku tumba'u Itou Ratu m Punnu Saḷamatta apan pina'ire udde.

Sire pitu mallaḷajima

6 Manga mallaḷaṙṙenggennu Mawu Yesus mallannu aatambanna anambone. Su tempo udde manga taumata n Yahudi apan mabbisara n Yunani naola'a tawe maḷuassa su saruannu manga taumata n Yahudi tumanangnge. Apan mabbisara n Yunani udde nabbisara, "Manga wawine ng kami apan inawaḷuanna tawe naasomba tahia ipabiakka miallo-miallo apan nitahia su manga taumata." ²Ana waugu udde sire mapuḷo dua rasul udde nangammullu anambo mallaḷaṙṙenggenne wuṙṙu nabbisara simangitou, "Daḷeo amungkanngu iami umaddo mamasingkattu wisara Mawu Ruata, ana waugu ta'e marṙingiddu anna. ³Nariaddi, mappianne manga tuṙrangnga mamile wuassu wallatti amiu sire pitu apan pallaḷagune mapia wuṙṙu pia taṙṙino n Gharṙaho Mawu Ruata see lai pande, apan wotongnge iapamanara ng kami mangatokku hatto indi; ⁴ana waugu iami inai umaḷiomanna wuṙṙu mabatti'u wisara Mawu Ruata."

⁵Awadaalla udde nanengkamma addapattu manga rasul udde. See imangitou namilete si Stefanus, sangkatu apan mangngimanna Mawu Yesus wuṙṙu pia Gharṙaho Mawu Ruata. Napile lai Filipus, Prokhorus, Nikanor, Timon, Parmenas, wuṙṙu Nikolaus wuassu Antiokhia; ito waḷine taumata n Yahudi arawe sinumuttate agama n Yahudi. ⁶Sire pitu udde niapidda su manga rasul, see manga rasul udde inumaḷiomanna wuṙṙu nadorongnga aḷamattu Mawu rumanta simangitou.

⁷Aroddite watti'u Mawu Ruata mangke nassaḷiawukka wuṙṙu manga mallaḷaṙṙenggennu Mawu Yesus su Yerusalem lembo n aatambanna anambone. Wuṙṙu manambo lai manga imam apan nangngimanna Mawu Yesus.

Stefanus sinametta

⁸Stefanus lembo niaŋamatannu Mawu Ruata, na'oma n sara itou ma'ola'a manambo aŋaŋrindu'a wuŋru inolaanna apan wahewalla su walattu tumana'u soa. ⁹Arawe pia lai manga taumata apan mannaŋare sitou; imangitou eteudde taumata waŋe m pattataŋramawuanna apan isa-sago waŋe m pattataŋramawuannu manga Taumata Tawe Limbanne. Manga taumata waŋe m pattataŋramawuanna udde eteudde manga taumata n Yahudi wuassu Kirene wuŋru Aleksandria. Imangitou wuŋru manga taumata n Yahudi wuassu Kilikia wuŋru Asia uasasimbakki Stefanus. ¹⁰Arawe imangitou tawe maapanompolla wisara n Stefanus, ana waugu Ghaŋraho Mawu Ruata mangngonggolu apande sitou iapawisara. ¹¹Ana waugu udde imangitou nangonggolu roitta su manga pira taumata iapawisara, "Iami naaringikka taumata udde mangngadio'a si Musa wuŋru Mawu Ruata!" ¹²Ete aroddi imangitou mapawawuŋo manga taumata, wuŋru manga piara'u Yahudi, wuŋru manga huru n agama. See imangitou inaita nanametta si Stefanus, wua udde itou niapidda sinumaruanna Mallaŋruunggu Agama. ¹³Wuŋru imangitou lai nanga-piddu manga mattatjala apan mangngonggolu taŋa'a awusu su ola'i Stefanus. Manga mattatjala udde nabbisara, "Taumata indi sidutu mangngadio'a Waŋe Mawu apan na'ukkassa, wuŋru mangngadio'a manga parenta Mawu Ruata apan niapaasingkatti Musa. ¹⁴Iami suete naaringikka sitou mabbisara, manungku Mawu Yesus wuassu Nazaret udde sarun mangngohakku Waŋe Mawu indi, see mamaŋu anambo n inanamanna apan nisossokki Musa siite!" ¹⁵Awadaalla apan uasemodda sulalummu ammuŋannu Mallaŋruunggu Agama udde nanutudda si Stefanus. Wuŋru su tempo udde hati n Stefanus aellehanna naaŋihidda hati mala'ekatta.

Sasinaukki Stefanus

7 Imam wahewa naiwaŋo si Stefanus, "Apa anambo n wisara n taumata udde atonna?" ²Stefanus sinumimbakka, "Manga tuŋrangnga wuŋru manga Iamangnga! Padaringikka sia'u! Tantaŋanna iupunggu aŋamona ng kite Abraham taambe nangingkatta watukku Haran, su tempo itou ta'e uatana'a su Mesopotamia, Mawu Ruata apan mawantuga nirumanta ringanni tou ³wuŋru nabbisara, 'Tantanga'e wanuanu wuŋru manga tuŋrangngu. Roote su wanua apan sarun ipantingida si'o.' ⁴Ne Abraham nanantangke n wanua Kasdim, see nangingkatte watukku Haran. Napawe iamangngi Abraham natete, Mawu Ruata napa'ingatti

Abraham watukku wanua indi atatanaannu manga tuřrangnga wuřru manga iamangnga orassa indi. ⁵Su tempo udde tawe saran sambageanganna wuassu wanua indi nionggolu Mawu Ruata si Abraham maola'a pussa'a n Abraham; tawe saran sandango nionggolla sitou. Arawe Mawu Ruata na'ire manungku Itou sarun mangonggolla si Abraham maola'a pussa'a n Abraham wuřru papapulunne. Tempo udde Abraham tawe ana'a. ⁶Arawe indi bawařo Mawu Ruata sitou, 'Papapulunne sarun matana'a ere taumata raho su wanua n taumata waine. Manga tumana'u wanua udde sarun mangallangnga simangitou wuřru ma'ola'a simangitou mařragisa appatu řasutta su tonnane ařannune. ⁷Arawe Ia'u sarun makkuumannu pabbawalaga apan mangngallangnga siamiu, wuřru imangitou sarun masařiu wuassu wanua udde wuřru sarun massubba Sia'u su tampa indi.' ⁸Napawe suete nabbisara aroddi paaire udde pinattohassu Mawu Ruata ringannu sunatta. Ne napawe Ishak, ana'i Abraham niasungkangnga, Abraham nassunatte sitou napawe uukke uařute allo. Wua udde Ishak nassunatta lai ařařanangnge, eteudde Yakub. Wuřru Yakub nassunatta lai sire mapuřo dua ařařanangnge, eteudde apan naola'a iamangngu ařamona n walagu Yahudi.

⁹Manga iamangngu ařamona ng kite udde massa'u si Yusuf, na'oma n sara imangitou nabařu'i tou naola'a allangnga su Mesir. Arawe Mawu Ruata sidutu uatantalongnga sitou, ¹⁰wuřru napaařiu n tou wuassu ařawo'u asasusa. Mawu Ruata nangonggolu apapia wuřru apande sitou su tempo itou sinumaruanna si Firaun ratu Mesir, na'oma n sara Firaun nanenegi tou naola'a gubernure su wanua Mesir wuřru tembonannu wale n araratuannu Mesir. ¹¹Wua udde nariaddite ařařatumma apan wahewa su ahewallu wanua Mesir wuřru Kanaan na'oma n sara taumata uatatařrangnga lunussa. Iupungngu ařamona ng kite tawe maasomba anna. ¹²Ne napawe Yakub naaringikka pia gandumma su Mesir itou nandolokku ařařanangnge, iupungngu ařamona ng kite, inai poiaroddi su paarorone. ¹³Su tempo imangitou inai aruane, Yusuf namasingkatta manga tuřrangnge udde manungku ete itou Yusuf. Wakkute udde ratu Mesir naasingkatta manga tuřrangngi Yusuf. ¹⁴Wua udde Yusuf nananata n watti'a su iamangnge, eteudde Yakub tadea'u Yakub wuřru manga tuřrangnge mangingkatta watukku Mesir – sarangkanambone pitu m puřo řima su atoune. ¹⁵Ne Yakub nangingkate watukku Mesir wuřru isudde itou wuřru iupungngu ařamona ng kite, nate. ¹⁶Winařunanni mangitou niapidida apia su Sikhem wuřru nilabingnga su lařabinganna apan suete niwallianni Abraham ringannu roitta wuassu taumata n walagu Hemor su Sikhem.

¹⁷Napawe maranite tempone Mawu Ruata manipussa paaire-Ne si Abraham, walagi ite su Mesir niatambante anambone. ¹⁸Panginsueanne

sangkatou ratu waine apan wagga n Yusuf, namarenta su Mesir. ¹⁹Ratu udde mannalangnga walagi ite ringannu araragissa su iupungngu alamonu ng kite. Itou mammata'i mangitou mandamme n alarana'a apan wakkute niasungkangnga tadea'u masusa wufu mate. ²⁰Su tempo udde Musa niasungkangnga; itou ana'a aramahanne. Tallu wulanna alannune itou papadulianannu iamangnge, ²¹wufu napawe itou nirammete, maruala n Firaun nangambi sitou, see namaduli sitou naalihida ere anangnge sassane. ²²Alawo'u apande n taumata Mesir niafra'a sitou wufu itou naola'a taumata apan lembo n tarfino sulaumu wisara wufu inolaanne.

²³Su tempo Musa uukke appatu puo su tonnane, nirumantate apulune sulaumu naungnge inai mattembo walagu taumata n Israel. ²⁴See itou naasilo sangkatou wuassi mangitou sassanrannu taumata Mesir, ne itou nanamba'a taumata apan sassanranna udde wufu namate taumata Mesir. ²⁵Musa massunna pabbawalage sarun maatutukka manungku Mawu Ruata tanta'anna mappaatti tou mamallossi mangitou. Arawe imangitou tawe maatutukka. ²⁶Tirabbine itou naasilo lai rua ngkatou taumata n Israel uawawulo, see itou nallaassa wufu nandame mangitou. Itou nabbisara, 'Iamiu indi sangkatufuranga, anio iamiu uawawulo?' ²⁷Arawe taumata apan namuulla hawene udde nanurudi Musa su winggine see nabbisara, ²⁸'Isai namile si'o maola'a piaranga wufu mallaruunggi ami? I'o pia pandumma mamate sia'u ere lai i'o namate taumata Mesir udde narabbi?' ²⁹Napawe Musa naaringikka wisara n taumata udde, Musa tinumalangnga wuassu Mesir see natana'a su wanua Midian. Poiroddi itou naasomba ana'a darua.

³⁰Appatu puo su tonnane wua udde, sangkatou mala'ekatta nirumanta ringanni Musa su wadda'a marani Wowo n Sinai. Mala'ekatta udde nirumanta sulaumu putungnga su anggarumunanne apan lukkengamma. ³¹Musa naherangnga naasilo olangnge udde, na'oma n sara itou inaita nangundani tadea'u maasingkatta apa nariaddi udde. See itou naaringikka tingikku Mawu nabbisara, ³²'Ete Ia'u Mawu Ruata iupungngu alamonanu; Ia'u Mawu Ruata n Abraham, Ishak, wufu Yakub.' Musa nangindo n atata'utta na'oma n sara itou tate warani ma'ellega anggarumunanne udde. ³³Wua udde Mawu nabbisara apia, 'Luatte silope apan ualufe si'o udde ana waugu leta'a apan dararisirannu udde leta'a na'ukkassa. ³⁴Ia'u suete naasilo wufu naatutukka aroddi apettane asasusa m pabbawala-U su Mesir. Ia'u naaringikke sasalomanni mangitou wufu ia'u sinumossokka mamallossi mangitou. Orassa indi wette! Ia'u sarun mandolokku mabelengnga watukku Mesir.'

³⁵Musa indi Musa apan tawe nia'u m walagu Israel wufu nito'e ringannu wisara indi, 'Isai suete namile si'o maola'a piara'a wufu mallaruunggi ami?' Arawe ete itou taumata apan nirolokku Mawu

Ruata maola'a piaṛrangnge wuṛṛu mananaḷamatta, ringannu sasumbala mala'ekatta apan nirumanta ringanni tou su anggaṛṛumunanne apan lukkengamma udde. ³⁶Ete Musa udde apan namiaṛṛa'u walagu Israel sinumabangnga wuassu Mesir ringannu na'ola'a aḷaṛṛindu'a wuṛṛu inolaanna apan wahewalla su Mesir, su Tahaḷoangnga Maṛṛamu wuṛṛu su wadda'a, appatu puḷo su tonnane aḷannune. ³⁷Ete itou lai Musa apan nabbisara su pabbawalagu Israel, 'Mawu Ruata sarun mangonggolla siamiu sangkatou nabi apan nipile wuassu wallatti amiu sassane, ere lai Itou namile sia'u.' ³⁸Ete Musa lai apan su pattangngannu pabbawalagu Israel su wadda'a, naola'a uatangnga mala'ekatta apan mabbisara sitou su Wowo n Sinai ringannu iupungngu aḷamona ng kite. Ete itou apan nanengkamma watti'a apan wiakka wuassu Mawu Ruata niapaasingkatta siite.

³⁹Salaiwe aroddi iupungngu aḷamona ng kite maddiri tumuṛṛutta sitou. Imangitou maddiri n tou wuṛṛu maapulu mabelengnga watukku Mesir. ⁴⁰Imangitou nabbisara si Harun, 'Pallanginte manga paaḷuanna huna ng kami, tadea'u manga paaḷuanna udde mamiaṛṛa'i ami. Ana waugu iami wagate lai apa apan sarun mariaddi si Musa udde, apan nangapiddi ami sinumabangnga wuassu Mesir!' ⁴¹See su tempo udde imangitou nalanginnu sambau paaḷuanna ana'u sapi, wua udde imangitou nangonggolu sasamba su paaḷuanna udde wuṛṛu na'ola'a andeangnga ipassubba paaḷuanna apan nilanginni mangitou sassane. ⁴²Ne Mawu Ruata nanantangngi mangitou wuṛṛu namala mangitou massubba manga anumpitanna su langitta. Udde ere lai uawoṛṛetta sulaḷummu Wuke Manga Nabi. Arendi,

'Ei manga taumata n Israel! Waḷinewe hunane Sia'u
iamiu mammototta wuṛṛu ma'ola'a sasamba wuassu winatangnga
appatu puḷo su tonnane aḷannune su wadda'a.

⁴³Ete rasanna pasasubbanna si Molokh apan iaapiddi amiu
suadio'a ringannu paaḷuanna winatangnga sassubbannu, eteudde
Refan; eteudde paaḷuanna niola'a 'sassubbanni amiu.

Ana waugu udde Ia'u sarun mallimbuakka siamiu marau-rau
watukku samba'a wanua Babel.'

⁴⁴Rasanna tampa rantannu Mawu Ruata ringannu taumata, pia lai su
iupungngu aḷamona ng kite su wadda'a. Rasanna udde niola'a wuassu
parenta Mawu Ruata si Musa tumuṛṛuttu saṛṛene apan niapaasilo Mawu
Ruata si Musa. ⁴⁵See rasanna udde niapiddu iupungngu aḷamona ng
kite su tempo imangitou wuṛṛu Yosua inai mangaṛṛo wanua ng kite indi
wuassu tatahuanannu manga pabbawalaga apan nilimbuṛṛannu Mawu
Ruata su saruanni mangitou. Rasanna udde uaraddo isudde na'oma n
sara Daud. ⁴⁶Daud maaluassa naungngu Mawu Ruata wuṛṛu sussaḷande
Sitou tadea'u itou iwala mapararisikku sambau Waḷe Mawu Ruata

apan sassubbanni Yakub udde. ⁴⁷Arawe ete Salomo napararisikku Waḷe Mawu Ruata.

⁴⁸Ewe'e Mawu Ruata lembo n ahewaḷanne tawe matana'a su waḷe apan niola'u taumata; ana waugu su Wuke Nabi uawoḷḷetta arendi,

⁴⁹Langitta eteudde aḷḷa'uang-Ku,
wuḷḷu runia apampakku ledda-U.

Waḷe ereapa ḷinone iapararisikki amiu Sia'u?
Suapa tampa pangilloḷoang-Ku?

⁵⁰Waḷinewe Ia'u sassane nandiaddi sarangkanambone udde?
ere udde wisara Mawu Ruata.

⁵¹Waḷine hampa aatikku pua n manga tuḷḷrangnga, wuḷḷu aroddi asahadde tumuḷḷrutta Mawu Ruata! Taḷanganu wengella ipadaringikka wisara Mawu Ruata! Iamiu naaḷihida ere iupungngu aḷamonanu; si-dutu lullawangnga Ghaḷḷaho Mawu Ruata! ⁵²Apa pia sangkatou nabi apan tawe nisansarannu iupungngu aḷamonanu? Imangitou namate daroloḷḷannu Mawu Ruata apan dorone suete namasingkatta manungku Allangngu Mawu Ruata apan atonna udde sarun rumanta. Wuḷḷu orassa indi iamiu nandaḷeo wuḷḷu namate Allangngu Mawu Ruata udde. ⁵³Manga mala'ekatta suete namasingkattu manga parenta Mawu Ruata si'o arawe iamiu maddiri tumuḷḷrutta!"

Stefanus tinuntungannu watu

⁵⁴Aroddi manga ammuḷannu Mallaḷḷruungngu Agama udde naa-ringikka sarangkanambone apan niwisara n Stefanus, imangitou nan-naungnga laḷeo wuḷḷu nasa'u atonna sitou. ⁵⁵Arawe Stefanus apan aintaḷḷoannu Ghaḷḷaho Mawu Ruata, naninggara langitta. Itou naasilo awawantugu Mawu Ruata, wuḷḷu Mawu Yesus uarisikka su tampa pia taḷḷrino su samba'a n uanannu Mawu Ruata. ⁵⁶"Pa'ellega" unni Stefanus, "ia'u maasilo surga nawu'a wuḷḷu Ana'u Taumata uarisikka su samba'a n uanannu Mawu Ruata!"

⁵⁷Manga ammuḷannu mallaḷḷruungnga udde nanapingnga taḷinga mangitou lapiddu inumui, see sangkaḷḷrindo'a naḷḷimpulunna si Stefanus. ⁵⁸Imangitou namoḷengnga sitou su liuddu soa wua udde itou tinuntungannu watu. Manga taumata apan naasilo arariadianna udde nanantangngu laubbi mangitou su sangkatou umbasanna aranne Saulus. ⁵⁹Tantaḷanna imangitou mannuntungnga si Stefanus, Stefanus sussaḷande, "Mawu Yesus, sengkammawe niawa'u!" ⁶⁰See itou inumaḷintuda wuḷḷu inumui ringannu tingikka ma'ikkatta, "Mawu,

ariewe rosa indi maola'a winabbawa mangitou!" Napawe wua nabbisara aroddi itou nate.

8 Wuṛṛu Saulus lulluassa lai su ola'u pamamate udde.

Saulus mappaasusa n jamaatta

Allo udde lai jamaatta su Yerusalem mannattake a'enggenanna, na'oma n sara anambo n taumata mangngimanna, tabene'e manga rasul, nassaḷiawukke watukku ahewallu leta'u Yudea wuṛṛu Samaria. ²Manga taumata apan matta'uttu Mawu Ruata nallabingngi Stefanus wuṛṛu nilumuai n tou ringannu massusa atonna.

³Arawe Saulus sidutu maddea'a manongkakku jamaatta. Itou ru-danganna su manga waḷe wuṛṛu mammoḷengnga su liudde manga tau-mata apan mangngimanna, see imangitou nitaṛṛo su tuttupanna.



Sambau soa su Yudea (8:1)

Watti'u Aḷaḷuassa wuassu Mawu Ruata niapaasingkatta su Samaria

⁴Manga taumata mangngimanna apan nassaḷiawukka udde, mabatti'u Watti'u Aḷaḷuassa wuassu Mawu Ruata su aḷawo'u tampa. ⁵Filipus inaita watukku soa n Samaria wuṛṛu nabbati'a su manga taumata poi-aroddi su ola'u Ratu m Punnu Saḷamatta apan pina'ire Mawu Ruata. ⁶Napawe manga taumata naaringikka si Filipus mangngarra'a, wuṛṛu

see imangitou naasilo manga aḷaḷḷindu'a apan niolangnge, manambo su wallatti mangitou madaringikka apa apan iaarra'i Filipus. ⁷Ana waugu manga ghaḷḷaho laleo sinumabangke ringannu mangngintuḷi wuassu laḷummu taumata nambo apan niasuttannu setanna. Taumata lome wuḷḷu u'ento manambo lai niapaapia. ⁸Ne manga taumata su soa n Samaria udde mangke lulluassa.

⁹Su soa udde pia sangkatou esakka aranne Simon, apan maḷannute maaola'a taumata n Samaria iaaguke su ola'u apande baḷimmata. Itou mabaḷo simangitou manungku itou taumata paḷḷalane wuassu taumata nambo. ¹⁰Ne anambo n taumata su soa udde wuassu aḷawo'u taumata tumanangnge mangke mangngimanna sitou. "Ete taumata indi atatohassu Mawu Ruata apan niasingkatanna 'Atatohassa apan Wahewa' udde," wisara mangitou. ¹¹Maḷannute atonna itou mappaagukku taumata ringannu baḷimmatane, na'oma n sara imangitou mangngimanna sitou. ¹²Arawe Filipus mabatti'u Watti'u Aḷaḷuassa simangitou su ola'u ereapa Mawu Ruata mamarentate ere sangkatou ratu, wuḷḷu su ola'u Mawu Yesus Kristus, Ratu m Punnu Saḷamatta udde. Ne imangitou nangngimante watti'a apan niapasingkatti Filipus, see imangitou nissaḷḷanite – mawae esakka ara'e lai wawine. ¹³Simon sassane lai nangngimanna. Wuḷḷu napawe suete nissaḷḷani, itou sidutu uatantalongnga si Filipus. Manga aḷaḷḷindu'a apan suete nariaddi udde, mangke maatiangnga si Simon.

¹⁴Manga rasul su Yerusalem naaringikka manungku manga taumata n Samaria suete nanengkamma wisara Mawu Ruata. Ana waugu udde imangitou nandolokki Petrus wuḷḷu Yohanes inai poiaroddi. ¹⁵Napawe Petrus wuḷḷu Yohanes na'omate, imangitou inumaḷiomannu manga taumata n Samaria udde tadea'u imangitou maasomba Ghaḷḷaho Mawu Ruata, ¹⁶ana waugu Ghaḷḷaho Mawu Ruata taambe nirumanta nangintaḷḷo su saran sangkatou su wallatti mangitou; imangitou wakkute nissaḷḷani tumba'u ringannu arannu Mawu Yesus. ¹⁷See Petrus wuḷḷu Yohanes nangaddo lima mangitou su manga taumata n Samaria udde; ne imangitou nanengkampe Ghaḷḷaho Mawu Ruata.

¹⁸Simon na'ellega manungku ana waugu lima manga rasul niaddo su wowo manga taumata udde, Ghaḷḷaho Mawu Ruata niunggolla simangitou. Ana waugu udde Simon nangapiddu roitta ionggolla si Petrus wuḷḷu Yohanes, ¹⁹see nabbisara, "Onggola'e sia'u taḷḷino udde lai, tadea'u amungkangngu lima'u iaddo su aḷawo'u taumata, taumata udde sarun maasengkamma Ghaḷḷaho Mawu Ruata."

²⁰Arawe Petrus sinumimbakka, "Nasilakate i'o wuḷḷu roinnu! Sunanu aonggolu Mawu Ruata wotongnge aawalliannu roitta? ²¹I'o tawe maatantalongnga sulaḷummu manara ng kami, ana waugu naungngu wengkola su saruannu Mawu Ruata. ²²Ana waugu udde tantanga'e pan-

dumannu apan laleo udde, wuṛru padorongke su Mawu tadea'u Itou mangampungnga ṛingirṛannu apan laleo udde! ²³Ana waugu ia'u masingkatta manungku i'o napene n sasihikka wuṛru naola'a allangngu aḷaleo."

²⁴See Simon nabbisara si Petrus wuṛru Yohanes, "Tuḷunga'a padorongnga su Mawu tadea'u tawe saran sambau wuassu wisara manga tuṛrangnga udde mariaddi su riri'u."

²⁵Napawe imangitou suete nattiala wuṛru napaasingkattu wisara Mawu, Petrus wuṛru Yohanes nabelengke watukku Yerusalem. Wuṛru su amatanna lai imangitou mammasingkattu Watti'u Aḷaḷuassa udde su anambo manga ampungnga su Samaria.

Filipus wuṛru sangkatou tembonannu Etiopia

²⁶Sangkatou mala'ekattu Mawu nabbisara si Filipus, "Ote amata'e! Roote watukku timukka su laḷanna apan uasampa'u Yerusalem wuṛru Gaza." Laḷanna udde maḷannaba tawe damene. ²⁷⁻²⁸Ne Filipus inaite. Su tempo udde pia sangkatou tembonannu Etiopia apan tantaḷanna u'amatta mappule watukku wanuane. Taumata udde sangkatou mamamanara n tembonanne apan mangngatokka wuṛru mallu'ada paa'ala n Kandake ratu wanua Etiopia. Taumata udde suete wuassu Yerusalem mattaṛramawu Mawu Ruata wuṛru orassa udde tantaḷanna mabelengnga uasa'e keretane. Tantaḷanna ua'ianna sulaḷummu kereta, itou mabasa Wuke Nabi Yesaya. ²⁹Ghaṛraho Mawu Ruata nabbisara si Filipus, "Roote pangundani n Kereta udde." ³⁰Ne Filipus inaite nangundani n Kereta udde see itou naaringikka taumata udde mabbasa Wuke n Yesaya. Filipus naiwaḷo sitou, "Tuangnga maasunna apa apan iwabbasa n Tuangnga udde?"

³¹Taumata udde sinumimbakka, "Ereapa ia'u maasunna, amungkangngu taweddu manaḷa'a sia'u?" See itou nangahe si Filipus sinuma'e su kereta wuṛru inuma'ianna su adio'a ringanni tou. ³²Ete indi tatialane apan iwabbasa n Tou,

"Itou naaḷihida ere domba apan ahetanna inai pototanna,
naaḷihida ere ana'u domba apan tawe ṛumeo'a amungkangngu
wambuḷune huntinganna,
ete aroddi Itou tawe nabbisara saran sangka paddi.

³³Itou nilobossa wuṛru niola'a ringannu tawe su ṛinone.

Niawa-Ne nisawutta wuassu wowo n runia
na'oma n sara taweddu sangkatou apan wotongnge mabatti'a su
ola'u pabbawala-Ge."

³⁴Tembonanne wuassu Etiopia udde nabbisara si Filipus, "Pasingkata'a sia'u, isai apan su pandummu nabi indi? Watanganne sassane ara'e taumata waine?" ³⁵Ne Filipus nanattakke mabbisara, itou nappaattu manga tatialane udde ipanattaku Watti'u Aļaļuassa su ola'u Mawu Yesus su tembonanne wuassu Etiopia udde. ³⁶Su pattangngannu amatanne, itarua na'omate su sambau tampa pia ua'e. Tembonanne udde nabbisara, "Pa'ellega udde pia ua'e! apa lai auranganne tadea'u ia'u sarřanianna?"

[³⁷Filipus nabbisara, "Amungkangngu Tuangnga mangngimanna ringannu naungnga atonna, Tuangnga wotongnge sarřanianna."

"Ia'u mangngimanna manungku Mawu Yesus Kristus eteudde Ana'u Mawu Ruata," unnu tembonanne wuassu Etiopia udde.]

³⁸See itou napaataallu kereta udde, see itarua, Filipus wuřru tembonanne udde nilumintuka sulaļummu ua'e wuřru Filipus nanařranite sitou. ³⁹Napawe imangitou nilumapputa wuassu ua'e, Gharřaho Mawu Ruata nangaļappa si Filipus wua isudde. Tembonanne wuassu Etiopia udde tate naasilo sitou. Ringannu lulluassa tembonanne udde nanasute amatanne. ⁴⁰Inařrombanganne Filipus uddete su Asdod. Wuřru napawe itou nanassute amatanne, itou mammasingkatu Watti'u Aļaļuassa su ola'u Mawu Yesus su aļawo'u soa na'oma n sara itou na'omate su Kaisarea.

Saulus nawaļu wuassu rosane

(WMR. 22:6-16, 26:12-18)

9 Tantaļanna udde Saulus sidutu mangke maapulu mammasaga wuřru mamate manga mallaļarřenggennu Mawu Yesus. Itou inaitte ringannu imam wahewa, ²wuřru madorongnga surattu parenta inai su manga piarřa'u waļe m pattatařramawuannu taumata n Yahudi su Damsyik, tadea'u amungkangngu itou maaratingnga poiारoddi manga taumata apan mangngimanna Mawu Yesus, itou wotongnge manametta wuřru mangapiddi mangitou su Yerusalem.

³Tantaļanna mattuda n Damsyik, napawe maranite n soa udde, inařrombanganne sambau semakka wuassu langitta natuakka si Saulus. ⁴Itou nema'a su leta'a see naaringikka sambau tingikka mabbisara sitou, "Saulus, Saulus! Anio i'o mandaleo Sia'u?"

⁵"Isai I'o, Mawu?" aiwaļo n Saulus.

Tingikka udde sinumimbakka, "Ete Ia'u Mawu Yesus, apan radaleoannu. ⁶Arawe orassa indi darisikke wuřru suttate su soa. Isudde sarun iapaasingkatta si'o apa apan sarun manarannu."

⁷Manga taumata apan uatantalongnga suadio'a ringanni Saulus, niŕumindu'a na'oma n sara tawe napattingikka; ana waugu imangitou naaringikka tingikka udde arawe tawe naasilo taumatane. ⁸See Saulus dirumarisikka namu'a matane, arawe matane tate maasilo manga apa lai. Nariaddi imangitou nangagassa limane wuŕru nangehette sitou sinumutta su Damsyik. ⁹Tallu allo aŕannune itou tawe maasilo wuŕru aŕannune udde lai itou tawe umanna wuŕru ma'inumma sara ng kadio'a.

¹⁰Su Damsyik pia sangkatou mallaŕarŕenggenu Mawu Yesuŕ aranne Ananias. Sulaŕummu sambau sondappa, Mawu nabbisara sitou. Mawu nabbisara, "Ananias!"

Ananias sinumimbakka, "Ia'u, Mawu."

¹¹Mawu nabbisara, "Otte inaitte orassa indi. Roote watukku waŕe n Yudas su Laŕanna Matuŕida. Iwaŕoi poiारoddi taumata aranne Saulus wuassu soa n Tarsus. Taumata udde tantaŕanna u'aŕiomanna, ¹²wuŕru sulaŕummu sondappa udde itou naasilo sangkatou esakka, aranne Ananias, nirumanta ringanni tou wuŕru namita sitou tadea'u itou wotongge maasilo apia."

¹³Ananias sinumimbakka, "Mawu, ia'u suete naaringikka manambo taumata uahahatto n taumata indi, lembonete su ola'u pandaŕaŕeo apan niolangnge su saruannu pabbawalaga su Yerusalem. ¹⁴Wuŕru su orassa indi itou nirumantate isindi, niwala manga imam tembonanne iapasametta anambo n taumata apan mangngimanna Si'o."

¹⁵Arawe Mawu nabbisara si Ananias, "Roote! Ana waugu Ia'u suete namile sitou mangimbe Sia'u, tadea'u itou mamasingkatta su ola'u riri-U su manga pabbawalaga waine apan agamane waŕine Yahudi wuŕru su manga ratu wuŕru lai su pabbawalagu Israel. ¹⁶Wuŕru Ia'u sassane sarun mapaŕiatta'u anambo n asasusa apan ŕinone apendamanni tou ana waugu Ia'u."

¹⁷Ne Ananias inaitte watukku waŕe udde wuŕru namitate si Saulus. "Tuŕrangku Saulus," unni Ananias, "Mawu Yesuŕ apan niasiloannu su tangnga n daŕanna su tempo n tuŕrangnga mattuda n Damsyik, ete Itou nandolo'u rumanta tadea'u tuŕrangnga wotongge maasilo apia wuŕru maasomba taŕrino n Ghaŕraho Mawu Ruata." ¹⁸Orassa udde lai pia sarannapa naaŕihida ere onappu inassa napallossa wuassu mata n Saulus see itou naasilote apia. Ne itou napu'ote, see nissaŕranite. ¹⁹Wuŕru napawe suete inumanna, itou natohasse apia.

Saulus manggarra'a su Damsyik


Saulus natana'a su Damsyik su adio'a ringannu mallaŕarŕenggenu Mawu Yesuŕ manga pira allo aŕannune. ²⁰Itou lapiddu rudanta

su manga waļe m pattatařramawuanna wuřru mannattake mabatti'a manungku ete Mawu Yesus udde Ana'u Mawu Ruata.

²¹Awadaalla naherangnga naaringikka si Saulus. Imangitou nabbi-sara, "Waļinewe ete itou indi su Yerusalem suete namate anambo n taumata apan mangngimanna Mawu Yesus? Itou nirumanta isindi pandu-manne manametta wuřru mangapiddi mangitou su imam tembonanne!"

²²Arawe Saulus mangke mattohassa wawohene. Manga tatiala apan niapaasilo n tou su ola'u Mawu Yesus aroddi aapangimananna manungku eteudde Mawu Yesus Ratu m Punnu Saļamatta, na'oma n sara taumata n Yahudi apan uatana'a su Damsyik tawe maapanompolla.

²³Napawe naļu manga pira allo aļannune manga taumata n Yahudi na'ire mamate si Saulus. ²⁴Arawe řingiranni mangitou udde niasingkatanni Saulus. Allo řabbi imangitou uaļařraddo su ngara wahewallu soa tadea'u mapamate sitou. ²⁵Arawe su sambau řabbi, manga mal-laļařřengenni Saulus nangaļappa sitou, see niuļukka sulaļummu sambau so'anna nalliu darandunggu soa.



Saulus su Yerusalem

²⁶Saulus inaitte watukku Yerusalem, wuřru poiaroddi itou maddea'a maammullu manga mallalařřengennu Mawu Yesus. Arawe imangitou matta'utti Saulus, ana wagu imangitou tawe mangngimanna manungku atonna-tonna Saulus naola'e mallalařřengennu Mawu Yesus. ²⁷Wua udde Barnabas nirumanta ringanni tou, see nangapiddi tou ringannu

manga rasul. Barnabas nabatti'a simangitou ereapa Saulus naasilo Mawu su tangnga n daļanna wuŗu ereapa Mawu nabbisara sitou. Barnabas nabbatti'a lai su ola'u ereapa awawarriani n Saulus mangngarri'a su Damsyik ringannu arannu Mawu Yesus. ²⁸Ne Saulus natana'e ringanni mangitou, wuŗu mangngarri'e ringannu warriani su ahewallu Yerusalem sulaļummu arannu Mawu. ²⁹Itou mangngarri'a wuŗu uaai-waļo lai ringannu manga taumata n Yahudi apan mabbisara n Yunani, arawe imangitou maddea'a mamate sitou. ³⁰Su tempo manga taumata mangngimanna waine naasingkatta olangnge udde, imangitou nangapidi Saulus watukku Kaisarea, wua udde nandolokki tou watukku Tarsus.

³¹Ne jamaatta su ahewallu Yudea, Galilea, wuŗu Samaria nadamete. Ringannu pammamanara n Gharriho Mawu Ruata, wuŗu matta'uttu Mawu, manga jamaatta udde lembo natohassa wuŗu aatambanna anambone.

Petrus su Lida wuŗu Yope

³²Petrus nanute su aļawo'u tampa nattembo manga jamaatta. Su sambau allo itou nattembo aļarriana'u Mawu apan uatana'a su Lida. ³³Poiaroddi itou nassomba n sangkatou esakka aranne Eneas, apan lome wuŗu tate maawangunna wuassu tampa atatiļanne tallute tonna aļannune. ³⁴Petrus nabbisara si Eneas, "Eneas, Mawu Yesus ma-paapianu. Pabbangunte wuŗu sahangginte tattereannu." Orassa udde lai Eneas dirumarisikke. ³⁵Anambo n tumana'u Lida wuŗu Saron naasilo si Eneas, see imangitou sarangkanambone nangngimante Mawu Yesus.

³⁶Su Yope pia sangkatou wawine aranne Tabita. Itou sangkatou apan mangngimanna Mawu Yesus. (Aranne sulaļummu wisara n Yunani eteudde Dorkas atappasanne rusa.) Inolaanni tou sidutu mapia wuŗu mantuļunggu taumata asiangnga. ³⁷Su tempo udde itou nardda'a see nate. Napawe winaļunanne nireno, itou niaddo su wabbo'a řengkenne rosone. ³⁸Yope tawe marau wuassu Lida. Nariaddi su tempo manga mallaļarřenggenno Mawu Yesus su Yope naaringikka Petrus uatana'a su Lida, imangitou nandolokku rua ng katou inai ringanni Petrus ringannu tanata indi, "Paaliħakka rumanta isindi." ³⁹Petrus lapiddu dirumarisikka wuŗu tinumantalongnga simangitou. Na'oma poiaroddi, itou niapidda su wabbo'a řengkenne rosone. Anambo n wawine waļu isudde narřimpulunna si Petrus lapiddu lulluai wuŗu manta'e sitou manga laubba wuŗu manga jubah apan nitabbi'i Dorkas simangitou su tempo itou ta'e wiakka. ⁴⁰Petrus nandolokki mangitou sarangkanambone sinumabangnga, see itou inumaļintuda wuŗu inumaļiomanna.

Wua udde itou sinumaruanna winaḷunanni Dorkas wuḷḷu nabbisara, "Tabita, apu'ote." Ne Dorkas inumaallate, wuḷḷu napawe itou naasilo si Petrus, itou inuma'iana. ⁴¹See Petrus namita limane wuḷḷu nantuḷunggi tou dirumarisikka. Wua udde Petrus namaggo manga taumata apan mangngimanna isudde suadio'a ringannu manga wawine waḷu udde, see nanantilli Dorkas apan nabbiakke udde simangitou. ⁴²Watti'a su ola'u arariadianna udde nassaḷiawukke su ahewallu Yope, na'oma n sara manambo taumata mangngimanna Mawu Yesus maola'a Ratu m Punnu Saḷamatti mangitou. ⁴³Petrus uatana'a isudde manga pira allo lai su waḷe n sangkatou mallaḷaha pisi aranne Simon.


Petrus wuḷḷu Kornelius

10 Su Kaisarea pia sangkatou esakka aranne Kornelius. Itou sangkatou apitennu "Tantara n Italia". ²Itou sangkatou apan matta'uttu Mawu Ruata wuḷḷu anambo n laḷoḷḷo waḷene mattaḷḷamawu Mawu Ruata. Itou masokka mantuḷunggu taumata n Yahudi apan asiangnga wuḷḷu itou sidutu u'aḷiomanna su Mawu Ruata. ³Su sambau allo irarḷanggo puulla tatallu allattune itou naasilo ringannu masemakka sulalḷummu sondappa, sangkatou mala'ekattu Mawu nirumanta wuḷḷu namaggo sitou, "Kornelius!"

⁴Kornelius nanutuda mala'ekatta udde ringannu atata'utta see nabbisara, "Pia apa Mawu?"

Mala'ekatta udde sinumimbakka, "Aaḷiomannu wuḷḷu asasaḷḷionto'u naunggu sinengkampe Mawu Ruata wuḷḷu Mawu Ruata mannaungnga si'o. ⁵Orassa indi pandolokke n taumata watukku Yope pawagoa'a si Simon apan aranne nasuungnga Simon Petrus. ⁶Itou tantaḷanna uaintaḷa su waḷe n sangkatou mallaḷaha pisi aranne Simon waḷene su winggi n apanne." ⁷Napawe mala'ekatta apan uahahatto n Kornelius udde inaite, Kornelius namago rua ng katou mangangimbe sulalḷummu waḷene wuḷḷu sangkatou tantara mandariagane apan ma'imanna. ⁸Kornelius nabatti'a simangitou apa apan suete nariaddi, see nandolokki mangitou watukku Yope.

⁹Tiḷḷabbine, tantaḷanna imangitou sulalḷummu amatanne wuḷḷu maranite n Yope; Petrus nirumanganna su pangketta ana umaliomanna. ¹⁰See itou naapendamma lunussa wuḷḷu maapulute umanna. Tantaḷanna anna iaatokka, itou nisondapanna. ¹¹Itou naasilo langitta nawu'a wuḷḷu pia sambau naaḷihida ere maḷarḷrenessa apan maḷaḷakka, ia'uḷukka watukku runia ua'ele su wuune appata. ¹²Sulalḷumme pia aḷawo'u winatangnga leddane appata, aḷawo'u winatangnga tuttundo n



Atuppu waḷe su Palestina (10:9)

tianne wuḷḷu manga manua'a matengnga. ¹³See pia tingikka nabbisara sitou, "Petrus, apu'ote! wuḷḷu Pamototte wuḷḷu ante!"

¹⁴Petrus sinumimbakka, "Tawe, Mawu! Taambe saran paassa ia'u inumanna apa ipappalli ara'e iaarantina." ¹⁵Arawe tingikka udde nabbisara apia sitou, "Apa apan suete niwala Mawu Ruata wotongnge ipaattu taumata, imbarangnga iwaḷonu palli." ¹⁶Sondappa udde na'oma n sara paatallu sinuḷe, wua udde maḷaḷḷrenessa udde nasengkengnga watukku surga.

¹⁷Petrus nabingo maḷḷingiddu apa atappasannu sondappa udde. Tantaḷanna Petrus maḷḷingidda, manga taumata apan nirollokki Kornelius naasombate waḷe n Simon wuḷḷu imangitou uddete su ngara. ¹⁸See imangitou namago taumata wuḷḷu naiwaḷo, "Apa isindi pia daho uaintaḷa, aranne Simon Petrus?"

¹⁹Tantaḷanna Petrus ta'e maddea'a maasingkatta apa atappasannu sondappa udde, Ghaḷḷraho Mawu Ruata nabbisara sitou, "Ei Petrus, pia sire tallu maddea'a si'o. ²⁰Paaḷihakke sumossokka wuḷḷu arie mapapadua tumantalongnga simangitou, ana waugu ete Ia'u nandolokki mangitou." ²¹Ne Petrus sinumossokke wuḷḷu nabbisara su manga taumata udde, "Ete ia'u apan raddeaanni amiu. Manga tuḷḷangnga rumanta mapandumma apa?"

²²Imangitou sinumimbakka, "Apitenna Kornelius nandolokki ami isindi. Itou sangkatou taumata mapia wuḷḷu matta'uttu Mawu Ruata, wuḷḷu lembo n aaddatannu anambo n taumata n Yahudi. Sangkatou mala'ekattu Mawu Ruata nandolokki tou madorongnga Tuangnga rumanta su waḷene, ana waugu maola'a ere sambau sasimbakku aaḷiomanne, itou nirolokka madaringikka apa apan iapaasingkatti Tuangnga sitou." ²³Ne Petrus napaasuttate mangitou natana'a isudde.

Tiṛrabine Petrus nabuatte wuṛru inaite suadio'a ringanni mangitou. Manga pira taumata mangngimanna wuassu Yope tinumantalongnga lai. ²⁴Massallo wua udde imangitou na'omate su Kaisarea. Poiaroddi imangitou ṛaṛradoante n Kornelius ringannu manga tuṛrangnge wuṛru manga hawene apan suete niwaḷoanne. ²⁵Napawe Petrus na'omate, Kornelius inai nanaḷoho sitou wuṛru inumaḷintuda su saruanne. ²⁶Arawe Petrus nantuḷunggi tou niapararisikka, see nabbisara, "Darisikke! Ia'u lai sassane taumata." ²⁷Tantaḷanna uahahatto n Kornelius, Petrus sinumutta sulaḷummu waḷe. Isudde itou naasilo manambote taumata uaammulla. ²⁸See itou nabbisara simangitou, "Manga tuṛrangnga sassane masingkatta manungku taumata n Yahudi isassingadu agamane mattembo ara'e maammulu manga taumata wuassu pabbawalaga waine. Arawe Mawu Ruata suete namasingkatta sia'u manungku ia'u tawe wotongnge massunna taumata waine laḷeo wuṛru ipapalli. ²⁹Ana waugu udde su tempo i Tuangnga madorongnga tadea'u ia'u rumanta, ia'u tawe nano'e rumanta. Nariaddi orassa indi ia'u maddea'a maasingkatta, anio i Tuangnga maparanta'u."

³⁰Kornelius sinumimbakka, "Tallu allo naḷiu, irarṛrangngo su tempo ereindi, ia'u tantaḷanna u'aḷiomanna su waḷe puulla tatallu wawallo. Inarṛrombanganne sangkatou esakka nirumarisikka su saruangu. Laubbu taumata udde sussaḷoḷotta. ³¹Itou nabbisara, 'Kornelius! Mawu Ruata suete nadaringikka aḷiomannu wuṛru uanaungnga sasarṛionto'u naungngu. ³²Nariaddi pandolokke n taumata watukku Yope pamaḡgo taumata aranne Simon Petrus, itou tantaḷanna uaintaḷa su waḷe n sangkatou mallaḷaha pisi aranne Simon; waḷe udde su winggi n taḷaḷoangnga.' ³³Ana waugu udde ia'u nasasarṛawutta nandolokku taumata inai namaggo si Tuangnga. Wuṛru Tuangnga naungnge mapia atonna nirumanta isindi. Orassa indi iami nambo uaammulle isindi su saruannu Mawu Ruata madaringikka apa apan niapasilo Mawu Ruata si Tuangnga iapaasingkatta siami."

Sasinaukki Petrus

³⁴See Petrus nabbisara, "Orassa indi ia'u atonna-tonna naependampe manungku inolaannu Mawu Ruata su anambo n taumata udde nasuḷungnga. ³⁵Taumata apan matta'uttu Mawu Ruata wuṛru ma'ola'a apapia, taumata udde sengkamannu Mawu Ruata, tawe mamile itou wuassu pabbawalagu apa. ³⁶Manga tuṛrangnga masingkate laḷoṛro n watti'a apan niapaasingkattu Mawu Ruata su pabbawalagu Israel. Ete-udde Watti'u Aḷaḷuassa su ola'u padarame sulaḷummu Mawu Yesus Kristus, eteudde Mawu n anambo n taumata. ³⁷Iamiu masingkate apa

apan nariaddi su ahewallu Yudea, eteudde nitattakka wuassu Galilea napawe naliudde sasarrani apan nitita n Yohanes. ³⁸Iamiu masingkatta manungku Mawu Ruata suete namile Mawu Yesus taumata Nazaret udde wuṛṛu nangonggolu Gharraho Mawu Ruata wuṛṛu tarṛino Sitou. Iamiu masingkatta lai manungku Mawu Yesus u'amatta su aḷawo'u tanpa ma'ola'a apapia; Itou mapaapia n taumata apan niasuttannu Setanna, ana waugu Mawu Ruata uatantalongnga Sitou. ³⁹Ete iami indi manga taumata apan suete naasilo sassane aḷawo'u manga apa apan niola'i Tou su wanua n taumata n Yahudi wuṛṛu su Yerusalem. Salaiwe aroddi imangitou nangarussa wuṛṛu namate Sitou. ⁴⁰Arawe su allo atallune Mawu Ruata napaawiakki Tou apia wuassu papate wuṛṛu namasilo n Tou su taumata; ⁴¹tawe su anambo n taumata ewe'e tumba'u siami apan suete nipile Mawu Ruata paarorone tadea'u maola'a manga tiala-Ne: Iami u'anna wuṛṛu ma'inumma ringanni Tou napawe Itou nabbiakke apia wuassu papate. ⁴²Wuṛṛu Itou nandolokki ami masingkattu Wattu'u Aḷaḷuassa udde su manga taumata apan mattiala manungku ete Itou apan niteneḡu Mawu Ruata maola'a Mallaṛruunggu manga taumata apan ta'e wiakka wuṛṛu manga taumata apan natete. ⁴³Anambo manga nabi mabatti'i Tou. Imangitou mabbisara manungku anambo n taumata apan mangngimanna Mawu Yesus, sarun ampunganna rosane ringannu tarṛino wuassu Mawu Ruata."

Manga taumata lai waḷine Yahudi naasomba Gharraho Mawu Ruata

⁴⁴Tantaḷanna Petrus ta'e mabbisara, Gharraho Mawu Ruata inumontu'a wuṛṛu nangintarṛo su anambo n taumata apan uararingikka wattu'a udde. ⁴⁵Manga taumata n Yahudi apan mangngimanna Mawu Yesus wuṛṛu taumata uatantalongnga si Petrus wuassu Yope, saranganambone naherangnga naasilo Mawu Ruata nangonggolu Gharraho-Ne su manga taumata pabbawalaga waine apan waḷine Yahudi. ⁴⁶Ana waugu imangitou naaringikka manga taumata udde uahahatto sulalummu aḷawo'u wisara wuṛṛu mangke maddalo awawantugu Mawu Ruata. See Petrus mabbisara, ⁴⁷"Pa'ellege, manga taumata indi naasombate Gharraho Mawu Ruata ere lai iite. Nariaddi apa wotongnge taumata apan mannaḷare simangitou sarṛaniannu ua'e?" ⁴⁸Ne Petrus nandolokki mangitou sarṛanianna su arannu Mawu Yesus Kristus. Wua udde imangitou nadorongnga tadea'u Petrus matana'a ringanni mangitou manga pira allo aḷannune.

Petrus namasingkatta jamaatta su Yerusalem

11 Manga rasul wuṛṛu manga taumata apan mangngimanna su ahewallu leta'u Yudea naaringikka manungku manga taumata apan agamane waḷine Yahudi lai naasengkampe wisara Mawu Ruata. ²Wua udde napawe Petrus inaita watukku Yerusalem, manga taumata n Yahudi apan suete nangngimanna udde, mapaasaḷa m Petrus. ³"Anio i'o rudanta su waḷe manga taumata apan taambe nissunatta? Ewe'e i'o lai inumanna suadio'a ringanni mangitou!" ⁴Ana waugu udde Petrus nanaḷa'a simangitou sarangkanambone apan suete nariaddi, nanattakka wuassu panattaṛanne. Petrus nabbisara,

⁵"Ia'u tantaḷanna u'aḷiomanna su soa n Yope, see ia'u nisson-dapanna. Ia'u naasilo pia sambau sarannapa naaḷihida ere sangkuḷappa maḷaṛṛnessa apan maḷaḷakka nonto'a wuassu langitta, ua'ele su wuune appata, wua udde nattaalla su sandiṛrangku. ⁶Su tempo ia'u na'ellega sulaḷumme, ia'u naasilo manga winatangnga leddane appata, manga winatangnga matengnga, manga winatangnga tuttundo n tianne wuṛṛu manga manu'a matengnga. ⁷See ia'u naaringikka, pia tingikka nabbi-sara sia'u, 'Ote apu'ote, Petrus! Pototte udde wuṛṛu ante!" ⁸Arawe ia'u sinumimbakka, 'tawe, Mawu! Taambe saran paassa ia'u inumanna anna apan ipappalli wuṛṛu iaarantinna.' ⁹Arawe tingikka udde nabbisara apia wuassu langitta, 'Apa apan suete niwala Mawu Ruata wotongge ipaattu taumata imbaṛrangnga iwaḷonu palli.' ¹⁰Ia'u naasilo sondappa udde na'oma n sara paatallu sinuḷe, wua udde sarangkanambone na-sengkengnga watukku surga. ¹¹Arawe sutempo udde lai sire tallu wuassu Kaisarea, apan nirolokka ringanku na'oma su waḷe pangngintaḷanku. ¹²See Ghaṛṛaho Mawu Ruata nandolo'u inai suadio'a ringanni mangitou wuṛṛu tawe mapapadua. Sire annumma tuṛrangnga indi lai tinumanta-longnga sia'u watukku Kaisarea, wuṛṛu iami sarangkanambone sinumut-tate su waḷe n Kornelius. ¹³Wua udde Kornelius nabhati'a siami ereapa itou naasilo sangkatou mala'ekatta uarisikka sulaḷummu waḷene wuṛṛu nabbisara, 'Pandolokku taumata watukku Yope pawagoa'a sangkatou esakka aranne Simon Petrus. ¹⁴Itou sarun mamasingkatta si'o watti'a apan maasaḷamatta si'o wuṛṛu laḷoṛṛo n waḷenu.' ¹⁵Wuṛṛu su tempo ia'u mannatakke mabbisara aroddi," aroddi Petrus nanassute watting-nge, "Ghaṛṛaho Mawu Ruata nonto'a simangitou, ere lai nariaddi siite rorone su panattaṛanne. ¹⁶See ia'u naanaungnga Mawu suete nabbisara, 'Yohanes mannaṛrani ng kua'e arawe iamiu sarun saṛṛaniannu Ghaṛṛaho Mawu Ruata.' ¹⁷Nariaddi nasemakke Mawu Ruata lai mangngonggolla su taumata apan agamane waḷine Yahudi udde, aonggolla apan ua-suḷungnga nionggolli Tou siite su tempo iite mangngimanna Mawu

Yesus Kristus. Ana waugu udde, tawe mariaddi ia'u maningaddu Mawu Ruata!"

¹⁸Napawe naaringikke udde, imangitou tate nanompola apia. See imangitou nadalote Mawu Ruata. Imangitou mabbisara, "Amungkangngu aroddi, manga taumata apan wałine Yahudi lai inonggołannu Mawu Ruata tempone mawału wuassu manga rosane wuřru massunna wiakka apan tutune!"

Jamaatta su Antiokhia

¹⁹Napawe Stefanus nipate, manga taumata apan mangngimanna Mawu Yesus, nanattakke a'enggenanna, na'oma n sara imangitou nasalıawukka su aławo'u tampa. Piaddu tinumałangnga su Fenisia, wuřru piaddu lai na'oma su Siprus wuřru Antiokhia. Imangitou mammasing-kattu Watti'u Mawu Ruata tumba'u su manga taumata n Yahudi sassane. ²⁰Arawe wuassu wallattu manga taumata mangngimanna udde,



Soa Antiokhia (11:19)

apan darantane wuassu Siprus wuřru Kirene, pia lai manga taumata inai watukku Antiokhia mamasingkattu Watti'u Ałaluassa su ola'u Mawu Yesus udde su manga taumata apan agamane wałine Yahudi lai. ²¹Tařrino Mawu mangke simangitou na'oma n sara taumata nambo mangngimanna wuřru nanantillu watanganne su Mawu.

²²Manga watti'a su ola'u manga ałarřindu'a udde na'omate lai su jamaattu Yerusalem. Ne imangitou nandolokki Barnabas watukku Antiokhia. ²³Wuřru napawe Barnabas na'omate su Antiokhia, wuřru naasilo ereapa Mawu Ruata nangałamatta manga taumata udde, itou

lembo n lulluassa. See itou nadorongnga tadea'u imangitou atonna-tonna tumuŕŕutta Mawu Ruata ringannu ahewallu naungnge. ²⁴Barnabas indi sangkatou taumata apan mapia naungnge wuŕŕu pia taŕŕino n Ghaŕŕaho Mawu Ruata see lai lembo mangngimanna Mawu na'oma n sara taumata nambo tinumantalongnga Mawu.

²⁵Wua udde i Barnabas nanute su Tarsus nadea'a si Saulus. ²⁶Napawe nassombate n Saulus, itou nangapidi Saulus watukku Antiokhia wuŕŕu santonna aŕannune imangitou uaammulla ringannu jamaatta poiaronddi lapiddu mangngaŕŕa'a taumata nambo. Ete su Antiokhia udde, manga taumata apan mangngimanna Mawu Yesus paarorone nisago taumata n Saŕŕani.

²⁷Su tempo udde pia sire pira nabi nirumanta wuassu Yerusalem matukku Antiokhia. ²⁸Su wallatti mangitou pia sangkatou aranne Agabus. Wuassu piaŕŕa'u Ghaŕŕaho Mawu Ruata itou nabbati'a manungku su ahewallu runia sarun mariaddi tempo aŕaŕŕutumma apan wahe-walla: (Wuŕŕu olangnge udde natipusse su tempo Klaudius uaparenta.) ²⁹Ne anambo mallalaŕŕenggenno Mawu Yesus na'ire mapaapiddu sumbala su manga tuŕŕangnge apan uatana'a su Yudea, sangkatou-sangkatou nangonggolla tumuŕŕuttu asombangnge. ³⁰Paaire udde niola'a lai, see Barnabas wuŕŕu Saulus nirolokka manguntudu aonggola udde su manga piaŕŕa'u jamaatta.

Pananansara mangke aatambanna

12 Su tempo udde lai Ratu Herodes mannattake mapaasusa manga jamaatta. ²Wuassu parentane, Yakobus tuŕŕangngi Yohanes nimate n halele. ³Su tempo Herodes naasilo manungku inolaanne udde maaluassa naungngu manga taumata n Yahudi, itou nattanno lai ereudde; itou nandolokku taumata lai manametta si Petrus. Olangnge udde nariaddi su tempo Allo Wahewa n Roti Tawe Ragine. ⁴Napawe niasamette, Petrus nisutta sulalummu tutupanna. Appatu wageangnga tantara niapaariaga si Petrus - sangkawageanganna udde anabone sire appata. Napawe ramea m Paskah nasuete, wakkute udde Herodes namarikissa si Petrus su saruannu awadaalla. ⁵Nariaddi Petrus tataŕŕangante su tutupanna; arawe manga jamaatta sidutu u'aŕiomanni Petrus su Mawu ringannu atonna-tonna.

Petrus niapaasabangnga wuassu tutupanna

⁶Sambau ŕabbi tantaŕanna Herodes sarun mapaasaruanni Petrus su awadaalla, Petrus mattiilla aittannu ŕate darua, su wallattu rua ng katou tantara mandariaga. Su ngara n tutupanna, manga mandariaga waine

lai uariaga tuttupanna. ⁷Inaṛrombanganne mala'ekattu Mawu uarisikka isudde wuṛṛu sambau semakka natuakka sulaḷummu wabo'a n tuttupanna udde. Mala'ekatta udde nangio'i Petrus na'oma n sara itou napu'o. See mala'ekatta udde nabbisara, "Ei paasaṛawutte mapu'o!" Orassa udde lai ṛate atta'a nawu'a wuassu lima m Petrus. ⁸Wua udde mala'ekatta nabbisara, "Luṛṛea'e laungngu wuṛṛu wa'isa'e taḷi n sapatunu." Ne Petrus nalluṛṛete n laungnge wuṛṛu nama'issu taḷi n sapatune. Wua udde mala'ekatta nabbisara apia, "Luṛṛea'e paḷiwungngu wuṛṛu tantalongke sia'u." ⁹Ne Petrus tinumantalongke mala'ekatta udde sinumabangnga wuassu tuttupanna. Arawe Petrus tawe naatutukka manungku inolaannu mala'ekatta udde atonna-tonna nariaddi. Petrus massunna manungku udde tumba'u sambau sondappa. ¹⁰Su tempo imangitou suete sinumabbi tampa pandariaganna paarorone wuṛṛu aruane, itarua na'omate su ngara atta'a, apan mabatukku soa. Ngara udde nawu'a sassane, see itarua sinumabangke wuṛṛu inumamatta su laḷanna maṛṛiputta. Inaṛrombanganne mala'ekatta udde nanantangngi Petrus.

¹¹Wakkute udde Petrus naatutukka apa apan suete nariaddi sitou, see itou nabbisara, "Orassa indi ia'u masingkate manungku Mawu atonna-tonna suete nandolokku mala'ekan-Ne mapasabangu wuassu taṛṛino n Herodes wuṛṛu wuassu aḷawo'u inolaannu pabbawalagu Yahudi sia'u."

¹²Napawe naatutukke olangnge udde, Petrus inaita watukku waḷe Maria, inangngi Yohanes apan isassago lai Markus. Isudde manambo taumata uaammulla wuṛṛu u'aḷiomanna. ¹³Petrus nanengkella ngara n liudde, see sangkatou mangangimbe wawine aranne Rode, nirumanta mamu'a ngara. ¹⁴Itou lapiddu naaillaḷa tingikki Petrus. Ana waugu lulluassa, itou maḷiha-ḷihakka sinumutta apia ringannu tawe namu'a ngara, see nabaḷo manga taumata isudde manungku Petrus wowa su liudde. ¹⁵"I'o wewa!" unni mangitou. Arawe Rode mangke mangngattikka manungku udde atonna-tonna Petrus. Ne imangitou nabbisara, "Udde mala'ekanne!"

¹⁶Tantaḷanna udde Petrus sidutu mannengkela ngara. Ne napawe imangitou namu'a ngara, wuṛṛu naasilo si Petrus, imangitou mangke naherangnga. ¹⁷Petrus namasingkatta ringannu limane tadea'u imangitou mallannaba, wua udde itou nabbati'e ereapa Mawu suete nangapiddi tou sinumabangnga wuassu tuttupanna. See itou nabbisara, "Waḷoa'a hatto indi si Yakobus wuṛṛu su manga tuṛrangnga waine lai." Wua udde Petrus nanantangke n tampa udde wuṛṛu inaita su tampa waine.

¹⁸Tiṛṛabbine ruaallo nariaddite hio su wallattu tantara mandariaga. Imangitou inaḷiwune su ola'u apa apan suete nariaddi si Petrus. ¹⁹See Herodes nandolokke n taumata niaparea'a si Petrus, arawe imangitou

tawe naasomba si Petrus. Nariaddi Herodes namarenta tadea'u manga mandariaga udde iwaŋoanna see pateanna.

Wua udde Herodes nanantangke n Yudea wuŋu natana'e pira allo aŋannune su Kaisarea.

Apapate n Herodes

²⁰Herodes mangke mandona su manga taumata n Tirus wuŋu Sidon. Ana waugu udde imangitou suadio'a nirumanta sumaruanna sitou. Paarorone imangitou nassalo'i Blastus, apan uapiaŋra'u waŋe n araratuanni Herodes, na'oma n sara itou nanamba'a simangitou. Wua udde imangitou inaita sinumaruanna si Herodes, see nadorongnga maddame, ana waugu wanua mangitou tumba'u uaantimma anna wuassu wanua n Herodes.

²¹Su sambau allo, apan suete tinantunna, Herodes nalluŋe n laubbu araratuanna see inuma'iana su addera n araratuanna wuŋu nanattakke massinaukka su saruannu laŋoŋo n soa. ²²Laŋoŋo n soa apan uararing-ikka udde mangke u'ui, "Indi tingikku monganna, waŋine tingikku taumata!" ²³Su orassa udde lai mala'ekattu Mawu namerō si Herodes, ana waugu itou tawe manggaddatta Mawu Ruata. Herodes niinassu uŋidda see nate.

²⁴Ne wisara Mawu Ruata mangke inaringiŋŋannu taumata nambo wuŋu lembo matohassa.

²⁵Napawe Barnabas wuŋu Saulus nanginsue manara mangitou, imangitou nabelengke wuassu Yerusalem ringannu uaapiddi Yohanes Markus suadio'a ringanni mangitou.

Barnabas wuŋu Saulus nipile wuŋu nirolokka

13 Sulaŋummu jamaatta su Antiokhia pia manga nabi wuŋu manga huru eteudde Barnabas, Simeon apan isassago lai Ma'itumma, Lukius wuassu Kirene, Menahem apan niwuwunna suadio'a ringanni Herodes wuŋu Saulus. ²Su tempo imangitou tantaŋanna mattaŋŋamawu su Mawu wuŋu mappuasa, Ghaŋraho Mawu Ruata nabbisara simangitou, "Pamilete si Barnabas wuŋu si Saulus tumba'u hunane su manara-U, tadea'u imangitou mammanara manara apan suete niapamanara-U simangitou."

³Napawe suete nappuasa wuŋu inumaŋiomanna, imangitou nangan-dangnu lima si Barnabas wuŋu si Saulus see nandoloke n tarua.

Su Siprus

⁴Ana waugu nirolokku Gharraho Mawu Ruata, Barnabas wuṛṛu Saulus inaité watukku Seleukia. Wua isudde imangitou nassenggotte watukku tarṛanusa n Siprus. ⁵Napawe na'omate su Salamis imangitou nabbati'u wisara Mawu su manga waḷe m pattatarṛamawuannu Yahudi. Yohanes Markus nallaḷima su amatanni mangitou.

⁶Ahewallu tarṛanusa udde niamatanni mangitou na'oma n sara watukku Pafos. Poiaroddi imangitou nassomba n sangkatou taumata n Yahudi aranne Bar Yesus. Itou tarṛa waḷiimmata apan mangnga'u itou nabi. ⁷Sergius Paulus gubernure su tarṛanusa udde hawene tarṛa waḷiimmata udde. Gubernure udde sangkatou pande wuṛṛu masarṛaungnga. Itou namago si Barnabas wuṛṛu si Saulus ana waugu itou maapulu madaringikka wisara Mawu Ruata. ⁸Arawe Barnabas wuṛṛu Saulus sinigaddi Elimas tarṛa waḷiimmata udde, ana waugu Elimas (eteudde aranne sulaḷummu wisara n Yunani) maddea'a tadea'u gubernure udde tawe mangngimanna Mawu Yesus. ⁹Arawe Saulus – apan isassago lai Paulus – pia tarṛino n Gharraho Mawu Ruata, na'oma n sara itou nanutudda tarṛa waḷiimmata udde, ¹⁰wuṛṛu nabbisara, "Ei tarṛa awusu, ana'u aḷaḷeo! I'o seettu aḷawo'u apapia. Anio i'o tawe mangilloḷo mandaleo pandummannu Mawu ruata, ipanaḷamatta taumata?" ¹¹Orassa indi pa'ellega, Mawu sarun makkuumannu! I'o sarun mawuta, ma'oma n sara i'o tawe maasilo semakku matannallo lai taḷa ng kadio'a."

Orassa udde lai Elimas naependamma pia awu ma'itumma nallindumma matane, na'oma n sara itou u'amatta uasasarṛipo maddea'a taumata mangehetta sitou. ¹²Napawe gubernure udde naasilo apa apan suete nariaddi, itou nangngimante Mawu Yesus; ana waugu itou mangke niaguku aḷarṛa'u Mawu.

Su Antiokhia, Pisidia

¹³Wuassu Pafos, Paulus wuṛṛu manga hawene nassenggotte watukku Perga su Pamfilia. Isudde Yohanes Markus nanantangngi mangitou, see nabelengnga watukku Yerusalem. ¹⁴Wuassu Perga imangitou nanassute amatanne watukku Antiokhia su Pisidia, wua udde su allo n Sabatta imangitou inaité inuma'ianna sulaḷummu waḷe m pattatarṛamawuanna. ¹⁵Napawe Wuke Musa wuṛṛu Wuke Manga Nabi niwasate, manga piaṛṛa'u waḷe m pattatarṛamawuanna udde nandolokku taumata iapaiwaḷo si Paulus wuṛṛu manga hawene, "Manga turṛangnga, amungkang-

ngu turrangnga pia sambau alarra'a su manga taumata indi, waloa'e alarra'a udde." ¹⁶Paulus dirumarisikka, see namatte n lima wua udde nabbisara,

"Manga turrangku pabbawalagu Israel wuru manga turrangku apan waine isindi, apan tutturutta Mawu Ruata! Padaringikka sia'u: ¹⁷Mawu Ruata m pabbawalagu Israel suete namile iupungngu alamona ng kite, wuru na'ola'a pabbawalaga indi pabbawalaga apan wahewa su tempo imangitou uatana'a su Mesir naalihida ere taumata raho. Wua udde ringannu tarfino apan wahewa Mawu Ruata nangapiddi mangitou sinumabangnga wuassu Mesir. ¹⁸Itou masabare su pallaagu mangitou su wadda'a appattu puo su tonnane alannune. ¹⁹Pitu pabbawalaga nipate n tou su wanua Kanaan tadea'u maatahia wanua udde su pabbawalagu Israel tadea'u wanua udde maola'a pussa'a mangitou. ²⁰Sarangkanambone udde nariaddi appatu rasutta lima m puo su tonnane alannune.

Napawe suete nattahia leta'u Kanaan udde, Mawu Ruata nangonggolu manga mallaruungnga simangitou. Mallaruungnga panginsueanne eteudde Nabi Samuel. ²¹Wua udde imangitou nadorongnga sangkatou ratu. Mawu Ruata nangonggoli Saul simangitou ana'i Kis wuassu pabbawalagi Benyamin maola'a ratu mangitou appatu puo su tonnane alannune. ²²Napawe Mawu Ruata nanossokki tou wuassu aiananne, Mawu Ruata nanenegi Daud maola'a ratu mangitou. Wuru ete indi apan iwabalo Mawu Ruata su ola'i Daud, 'Ia'u suete naasomba si Daud ana'i Isai udde sangkatou apan maaluassa naung-Ku. Tumba'u itou taumata apan mangngamattu apulu-U.' ²³Ete wuassi papapulunni Daud udde Mawu Ruata nangonggolla su pabbawalagu Israel sangkatou Ratu m Punnu Salamatta su ereapa suete pina'ire. Wuru ete Mawu Yesu udde Ratu m Punnu Salamatta. ²⁴Ro'e n Mawu Yesu taambe napaa-mattu manara-Ne, Yohanes suete inumaliata su manga taumata n Israel tadea'u imangitou mawalu wuassu rosa mangitou wuru sarranianna. ²⁵Napawe maranite m panginsueannu manarane, Yohanes nabbisara su manga taumata, 'Isai ia'u indi tumuruttu addapatti amiu? Ia'u waline taumata apan rarradoanni amiu. Paanaunge, taumata udde sarun rumanta mananturutta sia'u; sara mamu'a sapatu-Ne lai ia'u tawe wotongge.'

²⁶Manga turrangnga papapulunni Abraham, wuru manga turrangnga waine apan isindi apan tutturutta Mawu Ruata! Mawu Ruata suete nangonggolu Watti'u Asasalamatta udde siite; ²⁷ana waugu manga taumata apan uatanaa'a su Yerusalem wuru manga piarra'i mangitou tawe maatutukka manungku ete Itou punnu salamatta udde. Imangitou tawe maasunna alarra'u manga nabi apan iwabasa su manga allo u Sabatta, na'oma n sara imangitou nakkuumanni Mawu Yesu. Arawe ringannu

na'ola'a aroddi, imangitou napaatipussa manungku apa apan iapaasingkattu manga nabi udde nariaddite. ²⁸Salaiwe imangitou tawe maasomba sambau pasasaŋa wuassi Tou, apan wotongnge maaruumanna ringannu ruumanna pateanna, arawe imangitou nadorongnga si Pilatus tadea'u Itou pateanna. ²⁹Wurru napawe imangitou suete na'ola'a sarangkanambone apan uaworretta su Wuke Susi su ola'i Tou, imangitou nallintukku winalunan-Ne wuassu alu arussa, see niaddo su laŋabinganna. ³⁰Arawe Mawu Ruata napaawiakki Tou apia wuassu papate. ³¹Wua udde manga pira allo aŋannune Itou nirumanta namasilo watangan-Ne su manga taumata apan suete nirumanta ringanni Tou wuassu Galilea watukku Yerusalem. Ete imangitou udde orassa indi naola'a manga tatiala n Tou su pabbawalagu Israel. ³²Nariaddi, orassa indi iami mamasingkattu Wattu Aŋaluassa udde siamiu: Apa apan suete pina'ire Mawu Ruata su iupungngu aŋamona ng kite, ³³udde suete nimanara n Tou siite ringannu napaawiakku Mawu Yesus apia wuassu papate. Ana waugu sulaŋummu Mazmur aruane uaworretta,

'Ete Po Ana-U

su allo indi Ia'u naola'e Iamang-Ngu.'

³⁴Mawu Ruata suete napaawiakki Tou apia wuassu papate. Orassa indi Itou tate lai mamendamma papate sulaŋummu laŋabinganna. Su olangnge udde Mawu Ruata nabbisara,

'Ia'u sarun mangonggolu paaire susi Si'o apan sarun tipusanna, apan suete pina'ire-U si Daud.'

³⁵Aroddi lai sulaŋummu tatialane waine niapaasingkatta,

'Po tawe mapaawala n Allang-Ngu apan matuŋrutta udde mawukku'a sulaŋummu laŋabinganna.'

³⁶Daud natete wurru nilabingnga lai suadio'a ringannu iupungngu aŋamonane, napawe itou suete nammanara apa apan nirolokku Mawu Ruata sitou. Winalunanni Daud narrenessa wurru sarangkanambone nasuete. ³⁷Arawe Mawu Yesus apan suete niapaawiakku Mawu Ruata wuassu papate-Ne udde tawe narrenessa aroddi. ³⁸⁻³⁹Ana waugu udde manga tuŋrangnga, iamiu ŋinone maasingkata manungku sulaŋummu Mawu Yesus indi, wattu'a su ola'u pangangampungnga rosa niapaasingkatta siamiu; iamiu ŋinone masingkatta manungku suapa n taumata apan mangngimanna Sitou, iapaaliu wuassu aŋawo'u rosa apan tawe iapappa-sa sulaŋummu manga parenta Mawu Ruata apan niapaasingkatti Musa.

⁴⁰Ana waugu udde ŋinone iamiu manutukka mapia-pia, arie ma'oma n sara mariaddi siamiu apa apan iwabbisara manga nabi indi,

⁴¹Panutukka paapia-pia, ei iamiu manga taumata apan maapulu mangaŋuandaga!

Iamiu sarun maherangnga see mate!

Ana waugu su tempo indi ia'u tantaŋanna ma'ola'a manga

apa apan tawe pangimananni amiu sassane
salaiwe pia taumata mannaḷa'a siamiu.'"

⁴²Napawe Paulus wuḷḷu Barnabas nanantangngu waḷe m pattataḷḷamawuanna udde, manga taumata su waḷe m pattataḷḷamawuanna udde madorongga sitarua mabelengga apia su allo n Sabatta manansunna, tadea'u manaḷa'a sansune su ola'u manga hatto udde. ⁴³Napawe manga taumata sinumabangke wuassu waḷe m pattataḷḷamawuanna udde, Paulus wuḷḷu Barnabas nitantalongannu manambo taumata n Yahudi wuḷḷu taumata m pabbawalaga waine apan suete sinumutta agama n Yahudi. Ne manga rasul udde nangaḷḷa'a simangitou tadea'u imangitou sidutu uantimma aḷamattu Mawu Ruata.

⁴⁴Su allo n Sabatta manansunna, marani n anambo n taumata su soa udde nirumanta madaringikka wisara Mawu. ⁴⁵Napawe manga taumata n Yahudi naasilo taumata manambo udde, imangitou mannihikka atonna. Imangitou manggaḷḷandaga si Paulus wuḷḷu mannompola anambo n wisarane. ⁴⁶Arawe ringannu lembo n waḷḷani lai Paulus wuḷḷu Barnabas nabbisara uahahati. Imangitou nabbisara, "Wisara Mawu Ruata atonna ḷinone iwaḷo siamiu rorone. Arawe ana waugu iamiu maddiri madaringikka, iamiu suete namile sassane manungku iamiu tawe ḷinone manengkamma wiakka tutune wuḷḷu saran maḷḷannu-ḷḷannu. Wuḷḷu orassa indi iamii manantangngi amiu wuḷḷu inaite ringannu pabbawalaga waine. ⁴⁷Ana waugu indi parenta Mawu siami: Mawu nabbisara,

'Ia'u suete namile siamiu maola'a semakka su manga taumata waine apan waḷine Yahudi,

tadea'u iamiu mangapiddu asasaḷamatta su ahewallu runia.'"

⁴⁸Su tempo manga pabbawalaga waine apan waḷine Yahudi naaringikka udde, imangitou lembo n lulluassa, see mangke maddalo wisara Mawu. Wuḷḷu manga taumata apan suete nitantunnu Mawu Ruata maa-somba wiakka tutune wuḷḷu saran maḷḷannu-ḷḷannu, manga taumata udde mangngimanna.

⁴⁹Ne wisara Mawu nassaliawukke su ahewallu leta'a udde. ⁵⁰Arawe manga tembonannu soa udde wuḷḷu manga wawine wuassu wageangngu taumata papunna apan matta'uttu Mawu Ruata, niwaḷoannu manga taumata n Yahudi. Imangitou na'ola'a pabbawawuḷo su saruanni Paulus wuḷḷu Barnabas, wuḷḷu nallimbuakka sitarua wuassu leta'a udde. ⁵¹Ne manga rasul udde nangesoge n awu ledda mangitou su saruannu manga taumata udde, maola'a sambau pananaunganna, see itarua inaite watukku Ikonium. ⁵²Manga mallalaḷḷenggenna su Antiokhia lembo n lulluassa wuḷḷu niintaḷḷoannu Ghaḷḷaho Mawu Ruata.

Su Ikonium

14 Paulus wuṛṛu Barnabas naapendamma olangnge uasuḷungnga ereudde su Ikonium. Imangitou inainte lai su waḷe m patta-taṛṛamawuannu Yahudi wuṛṛu nabbisara isudde aroddi lai olangnge na'oma n sara manambo taumata n Yahudi wuṛṛu waḷine Yahudi mangngimanna Mawu Yesus. ²Arawe manga taumata n Yahudi apan maddiri mangngimanna, mammono'a manga taumata waḷine Yahudi, na'oma n sara imangitou mannaungnga laḷeo su manga taumata apan mangngimanna Mawu Yesus. ³Ana waugu udde Paulus wuṛṛu Barnabas natana'a maḷannu isudde. Wuṛṛu ringannu waṛṛani imangitou mabatti'u wisara Mawu. Ne Mawu lai napaaliatta'a manungku watti'i mangitou su ola'u daranggu-Ne udde atonna; Itou nangonggolu taṛṛino simangitou ma'ola'a aḷaṛṛindu'a wuṛṛu inolaanna waine. ⁴Arawe tumana'u soa udde uatatiakka sangkatou ringannu sangkatou; piaddu mannamba'a taumata n Yahudi wuṛṛu piaddu lai mannamba'a manga rasul udde.

⁵See manga taumata n Yahudi wuṛṛu manga piarṛangnge su sam-punna ringannu manga taumata waḷine Yahudi na'ire manansara wuṛṛu manuntunggu watu su manga rasul udde. ⁶Arawe manga rasul udde naasingkattu olangnge udde, see nangingkate watukku Litra wuṛṛu Derbe, eteudde manga soa su Likaonia, wuṛṛu watukku leta'a maranine. ⁷Poiaroddi imangitou mabatti'u lai Watti'u Aḷaḷuassa udde.

Su Litra wuṛṛu Derbe

⁸Su Litra pia sangkatou esakka leddane lome ro'e n niariaddine, na'oma n sara itou tawe maamatta, ana waugu leddane tumanite n lome. ⁹Taumata uddē ua'ianna poiaroddi uararingikka si Paulus mabbisara. Paulus naasilo manungku taumata udde mangngimanna wuṛṛu ana waugu udde itou wotongge iapaapia. Ne Paulus nanutuda si-tou, ¹⁰wuṛṛu ringannu tingikka ma'ikkatta Paulus nabbisara, "Darisikka paatuḷidda!" Taumata udde sinumolo'a dirumarisikka see inumamatta. ¹¹Napawe taumata nambo udde naasilo apa apan suete niola'i Paulus, imangitou mangngintuḷi sulaḷummu wisara n Likaonia, "Manga monganna sinumossokke su runia ringannu awa'u taumata." ¹²See Barnabas nisaggio mangitou Zeus, wuṛṛu Paulus nisaggio mangitou Hermes, ana waugu ete itou nabbisara. ¹³Imam Monganna Zeus apan tampa pattataṛṛamawuanne su saruannu soa, nirumanta uaapiddu manga sapi esakka wuṛṛu manga wunga ng kalu su ngara wahewa n:soa udde. Itou

maapulu tumantalongnga taumata nambo udde manguntudu sasamba su manga rasul udde.

¹⁴Napawe Barnabas wuṛṛu Paulus naaringikka apa apan niola'u taumata nambo udde, imangitou nanggesa'a manga laungnge lapiddu tutalångnga su pattangngannu awadaalla udde see u'ajata, ¹⁵"Ei, anio iamiu ma'ola'a arendi? Iami indi taumata ere lai iamiu! Iami rudanta mamasingkattu Watti'u Aļaluassa siamiu tadea'u iamiu manantangngu inolaanna laļeo indi wuṛṛu rumanta ringannu Mawu Ruata apan wiakka, nandiadi langitta wuṛṛu runia wuṛṛu tahaļoangnga wuṛṛu anambo n laļorņone. ¹⁶Su tempo naļiu Mawu namala manga pabbawalaga tuttuṛṛutta apulune sassane. ¹⁷Arawe Itou tawe maabuļi mangonggolu tatiala-Ne, eteudde ringannu ma'ola'a apapia. Itou mangngonggolu uranna wuassu langitta wuṛṛu hessi n leta'a su tempone. Itou mangngonggolu anna siamiu wuṛṛu malluassa naungngu." ¹⁸Arawe ringannu wisara udde lai ta'e masahadda manga rasul udde maningaddu manga taumata mangonggolu sasamba simangitou.

¹⁹Manga pira taumata n Yahudi apan nirumanta su Listra wuassu Antiokhia su Pisidia wuṛṛu Ikonium mammono'a awadaalla, na'oma n sara taumata nambo udde nanamba'a simangitou. Imangitou nanuntungngu watu si Paulus, wuṛṛu namoļengnga sitou watukku liuddu soa. Imangitou massunna nauddē itou natete, ²⁰arawe napawe manga taumata apan mangngimanna isudde uarisikka uapaļiwutta sitou, itou dirumarisikka wuṛṛu nabelengnga apia watukku soa. Tiṛṛabbine itou inaite watukku Derbe su sampunna ringanni Barnabas.

Paulus wuṛṛu Barnabas nabelengnga watukku Antiokhia

²¹Su Derbe, Paulus wuṛṛu Barnabas mabatti'u Watti'u Aļaluassa udde wuṛṛu manambo taumata apan nangngimanna Mawu Yesus. Wua udde imangitou nabelengke su Listra, wua udde su Ikonium, see su Antiokhia su Pisidia. ²²Su manga soa udde imangitou mannohassa naungngu mallalaṛṛenggennu Mawu Yesus wuṛṛu mannantiro mallalaṛṛenggenna udde tadea'u sidutu mangngimanna Mawu Yesus. "Iite riņone matataṛṛangnga rorone, wakkute udde iite wotongnge mamendamma aļaluassa su Runia Waku Mawu Ruata," aroddi manga rasul udde mangngaṛṛa'a manga mallalaṛṛenggennu Mawu Yesus su soa udde. ²³Wuṛṛu su aļawo'u jamaatta, Paulus wuṛṛu Barnabas nanenegu manga piaṛṛangge su jamaatta udde. See ringannu u'aliomanna wuṛṛu mappuasa, imangitou nanantillu manga piaṛṛangge udde su Mawu apan pangngimananni mangitou.

²⁴Wua udde Paulus wuṛṛu Barnabas nanassute amatanni mangitou sinumabbi leta'u Pisidia wuṛṛu na'omate su Pamfilia. ²⁵Wuṛṛu napawe imangitou suete namasingkattu watti'u Mawu Ruata su Perga, imangitou inaita watukku Atalia. ²⁶Wua isudde imangitou nassenggotte apia watukku Antiokhia. Eteudde soa tampa mangitou rorone tinantilla su darangngu Mawu Ruata, tadea'u imangitou mammanara manara apan orassa indi suete niinsue mangitou.

²⁷Napawe na'omate su Antiokhia, imangitou nangammullu manga taumata wuassu jamaatta udde, see nabatti'u sarangkanambone apan suete niola'u Mawu Ruata sulaḷummi mangitou. Imangitou nabbati'a lai su ola'u ereapa Mawu Ruata suete namantingidu laḷanna tadea'u manga taumata apan waḷine Yahudi mangngimanna Mawu Yesus. ²⁸Su soa udde Paulus wuṛṛu Barnabas natana'a maḷannu ringannu manga taumata apan mangngimanna.

Ra'iana su Yerusalem

15 Manga pira taumata wuassu Yudea nirumanta su Antiokhia wuṛṛu mangngaṛṛa'a manga taumata mangngimanna su Antiokhia udde manungku amungkangngu imangitou tawe sunatanna tumuṛṛuttu Tita Musa, imangitou tawe masaḷamatta. ¹Paulus wuṛṛu Barnabas mangke mannompola addapattu manga taumata udde. Panginsueanne tinantunna tadea'u Paulus wuṛṛu Barnabas wuṛṛu manga pira taumata waine wuassu Antiokhia inai watukku Yerusalem suadio'a ringannu manga rasul wuṛṛu manga piaṛrangnge poiaronddi.

³Jamaatta su Antiokhia nanguntudi mangitou na'oma n sara su liuddu soa, wua udde imangitou inaita nabatukku Fenesia wuṛṛu Samaria. Poiaronddi imangitou nabbati'u ereapa manga taumata apan waḷine Yahudi suete nanantillu watanganne su Mawu Ruata. Watti'a udde naaḷuassa manga taumata mangngimanna isudde. ⁴Napawe imangitou na'omate su Yerusalem, imangitou sinaḷohoannu jamaatta ringannu mapia, wuṛṛu manga rasul see manga piaṛrangnge. See imangitou nabbati'a su manga taumata isudde su ola'u anambo n inolaannu Mawu Ruata sulaḷummi mangitou. ⁵Arawe sire pira wuassu wageangngu Farisi apan suete nangngimanna, dirumarisikka wuṛṛu nabbisara, "Manga taumata pabbawalaga waine apan nangngimante udde ḷinone sunatanna wuṛṛu ḷinone tumuṛṛutta Tita Musa."

⁶See manga rasul wuṛṛu manga piaṛrangnge naammulla magahatto n olangnge udde. ⁷Maḷannu atonna imangitou uaraṛringidda su sambau. Panginsueanne Petrus dirumarisikka wuṛṛu nabbisara, "Manga tuṛrangnga! Iamiu sassane masingkatta manungku tempo naḷiu Mawu

Ruata namile sia'u wuassu wallatti amiu mamasingkattu Watti'u Aļaļuassa udde su manga taumata apan waļine Yahudi, tadea'u imangitou madaringikka wuŗru mangngimanna. ⁸ Wuŗru Mawu Ruata apan masingkattu naungngu taumata suete napaaliatta'a manungku Itou manengkamma simangitou; Itou napaaliatta'u olangnge udde ringannu nangonggolu Gharraho Mawu Ruata simangitou ere lai suete nionggolla siite. ⁹ Mawu Ruata tawe mapaparala ng kite wuŗru imangitou. Itou nangukkassa naungngi mangitou ana waugu imangitou mangngimanna. ¹⁰ E, anio iamiu lullawangnga Mawu Ruata orassa indi ringannu nangonggolu winabbawa apan mawakkata su mallaļarřenggenna indi, sumbaļi iupungngu aļamona ng kite wuŗru iite sassane lai tawe maaturrutta manara udde? ¹¹ Arawe, iite mangngimanna wuŗru iite naasomba asasalamatta ana waugu darangngu Mawu Yesus; aroddi lai imangitou."

¹² Ne nallannabe manga taumata apan uaammulla isudde. Wua udde imangitou nadaringikka si Barnabas wuŗru si Paulus nabbatti'a apia su ola'u anambo n aļarřindu'a wuŗru manga inolaanna apan wahewalla apan suete niola'u Mawu Ruata sulaļummi mangitou su wallattu manga taumata m pabbawalaga waine apan waļine Yahudi. ¹³ Napawe imangitou suete nabbisara, Yakobus nabbisara, "Manga tuŗrangnga! Padaringikka sia'u. ¹⁴ Simon wakkute lai nanaļa'a ereapa Mawu Ruata paarorone napaaliatta'u naung-Nge su manga taumata waļine Yahudi ringannu pandumma mamile wuassi mangitou manga taumata waine apan sarun olaanna pabbawala-Ge. ¹⁵ Udde nassuļungngu apa apan suete niapaasingkattu manga nabi. Ana waugu pia uaworřetta arendi,

¹⁶ Napawe wua udde Ia'u sarun rumanta apia, unnu Mawu,
 'Ia'u sarun mapararisikka apia waļe n Daud apan narřaate
 wuŗru manuļe n aolangnge nahohakka,
 see iapararisikka apia;

¹⁷ tadea'u taumata apan lambene udde maddea'a Mawu,
 su sampunna ringannu pabbawalaga waine apan waļine Yahudi
 apan suete niwagoang-Ku maola'a pussaa-U.'

Ete aroddi wisara Mawu,

¹⁸ apan suete namasingkattu olangnge udde ro'e m paarorone."

¹⁹ "Nariaddi tumuŗruttu addapa'u," unni Yakobus, "Iite tawe wotongnge mapaasusa n taumata waļine Yahudi udde apan suete nanantillu wadangnge su Mawu Ruata. ²⁰ Arawe iite řinone mamorřettu suratta simangitou tadea'u imangitou tawe umanna anna laļeo apan suete pinaşsubba paaļuanna, ara'e inassa wuassu řemessu winatangnga apan nate niatongnga, ara'e ma'inumma řarřa. Wuŗru lai tadea'u imangitou maparau watanganne wuassu manga inolaanna apan laļeo. ²¹ Ana waugu Tita Musa ro'e n paarorone iwabbasa suapa n allo n Sabatta su manga waļe m pattatarřamawuanna wuŗru iapaasingkatta su anambo n soa."



Manga monganna (15:20)

Suratta su manga taumata pabbawalaga waine apan suete nangngimanna

²²Manga rasul wuŕŕu manga piaŕrangnge, su sampunna ringannu jamaatta udde naŕrawessa mamile manga pira ng katou taumata wuassu wallatti mangitou apan sarun irolokka watukku Antiokhia suadio'a ringanni Paulus wuŕŕu Barnabas. Imangitou namile si Silas wuŕŕu si Yudas apan isassago lai Barsabas. Taumata darua indi paarorone su wallattu manga taumata mangngimanna su Yerusalem. ²³Suadio'a ringannu manga daroloŕŕanna udde, imangitou napaapiddu suratta lai apan tingikke arendi,

²⁴Iwuna'a su anambo n tuŕrangnga wuassu manga pabbawalaga waine apan waŕine Yahudi, wuŕŕu uatana'a su Antiokhia, Siria, wuŕŕu Kili-kia. Tabea wuassi ami, manga rasul wuŕŕu manga piaŕrangnge, eteudde manga tuŕrangngu. ²⁵Iami naaringikka pia sire pira taumata wuassu wallatti ami apan suete nirumanta ringanni amiu nanongkakka wuŕŕu naapatiangnga ng kamiu ringannu aŕaŕa'i mangitou. Sumbaŕi iami tawe nandolokki mangitou ma'ola'a manara udde. ²⁶Ana waugu udde iami suete na'ire wuŕŕu sarangkanambone inumire mamile sire pira taumata wuŕŕu mandolokki mangitou ringanni amiu. Imangitou sarun inai suadio'a ringannu tuŕrangnga Barnabas wuŕŕu Paulus apan arangnguanni ami. ²⁷Itarua indi eteudde manga taumata apan suete nanantillu niawane ana waugu Mawu ng kite Yesus Kristus. ²⁸Nariaddi iami nandolokki Yudas wuŕŕu Silas ringannu manga tuŕrangnga. Ete imangi-

tou sassane mamasingkatta uahahati siamiu watti'a apan uaworretta sulalummu suratta indi lai. ²⁸Gharraho Mawu Ruata suete namala – wuŕru iami maapulu tadea'u iamiu tawe onngolannu manara apan awakatanne wuassu manga manara apan apianne indi: ²⁹imbarrangnga umanna anna apan suete pinassubba paaŕuanna; imbarrangnga ma'inumma rarra, imbarrangnga uminassa remessu winatangnga nate niatongnga, wuŕru paarau n inolaanna apan laleo. Amungkangngu iamiu mangindau watanganni amiu wuassu manga inolaanna udde, iamiu suete na'ola'a apapia. Na'omate isindi, tabea!"

³⁰Napawe suete nabaŕo inaitte, imangitou apan nirolokka udde, nabatukke n Antiokhia. Poiaroddi imangitou namaggo anambo n jamaatta maammula see namasingkattu laŕoŕo n suratta udde. ³¹Napawe manga jamaatta naawasa n suratta udde, imangitou mangke lulluassa ana waugu laŕoŕo n suratta udde maaluassa naunggi mangitou. ³²Yudas wuŕru Silas, apan nabi lai, maŕannu uahahatto manga tuŕrangnga apan mangngimanna su Antiokhia udde wuŕru nangogolu sasasa wuŕru awawaŕrani simangitou. ³³Napawe Yudas wuŕru Silas natana'a manga pira allo aŕannune, manga taumata mangngimanna su Antiokhia udde nandolokki mangitou mabelengnga wuŕru nananata n tabea mangitou su manga taumata apan nandolokki mangitou. [³⁴Arawe Silas narrawessa see sidutu matana'a su Antiokhia.]

³⁵Paulus wuŕru Barnabas natana'a lai manga pira allo aŕannune su Antiokhia. Poiaroddi imangitou mangngarŕa'a wuŕru mabatti'u wisara Mawu suadio'a ringannu taumata nambo waine.

Paulus wuŕru Barnabas nattaŕei

³⁶Tawe naŕannu wua udde Paulus nabbisara si Barnabas, "Wette iite mabelengke apia mattembo manga tuŕrangnga apan mangngimanna Mawu Yesu su anambo n soa apan suete niwatti'i anni ite wisara Mawu; tadea'u iite maasilo ereapa ola'i mangitou." ³⁷Barnabas maapulu mangapiddi Yohanes Markus, ³⁸arawe Paulus mammendamma laleo mangapiddi Markus apan maddiri mammanara su sampunna ringanni mangitou wuŕru nanantangngi mangitou su Pamfilia. ³⁹Ne Paulus wuŕru Barnabas natatiakka na'oma n sara panginsueanne itarua nattaŕei: Barnabas nangahete si Markus wuŕru nassenggotte itarua watukku Siprus. ⁴⁰Paulus namile si Silas see inaitte itarua napawe manga tuŕrangnge su Antiokhia nanantilli tarua su aŕamattu Mawu. ⁴¹Itarua namaŕiwutta Siria wuŕru Kilikia; poiaroddi itarua mannohassa manga jamaatta.

Timotius tinumantalongnga si Paulus wurru si Silas

16 Paulus nanassute amatanne watukku Derbe, wua udde watukku Listra. Isudde pia sangkatou mallaḥarḥenggennu Mawu Yesus aranne Timotius. Inangngene sangkatou Yahudi, apan mangngimante Mawu Yesus; arawe iamangnge taumata n Yunani. ²Su wallattu manga taumata mangngimanna apan uatana'a su Listra wurru Ikonium, Timotius niasingkatanna sangkatou taumata apan mapia. ³Paulus maapulu tadea'u Timotius tumantalongnga sitou; ana waugu udde itou nanunatte si Timotius. Itou na'ola'a aroddi ana waugu manga taumata n Yahudi su wanua udde manambo masingkatta manungku iamangngi Timotius sangkatou taumata n Yunani. ⁴Su aḥawo'u soa apan tattemboanni mangitou, imangitou mammasingkatta su manga taumata apan mangngimanna manga atoranna apan suete tinantunnu manga rasul wurru manga piaḥrangge su Yerusalem. Imangitou mannantiro manga tuḥrangnga apan suete nangngimanna udde tadea'u tumuḥrutta manga atoranna udde. ⁵Ne manga jamaatta udde niatambante atatohassu pangangimanne, wurru miallo-miallo aatambanna n anambone.

Su Troas: Paulus nisondapanna

⁶Gharḥaho Mawu Ruata tawe namala m Paulus wurru Silas mabatti'u wisara Mawu Ruata su leta'u Asia. Nariaddi amamatti tarua nisassute watukku wageangngu Frigia wurru Galatia. ⁷Napawe na'omate su passarannu Misia, itarua naannamma sinumutta su leta'u Bitinia, arawe Gharḥaho Mawu Yesus naningaddi tarua inai isudde. ⁸Nariaddi itarua inumamatta nanassute su Misia wurru lapiddu nasaḥa watukku Troas. ⁹Rabbine su Troas, Paulus nisondapanna. Sulalummu sondapa udde itou naasilo taumata Makedonia uarisikka su saruanne lapiddu susaḥande tadea'u itou lai inai watukku Makedonia mantuḥlungngi mangitou. ¹⁰Napawe Paulus wua nisondapanna udde, iami lapiddu nasasaddia inai watukku Makedonia. Ana waugu ringannu antimma iami makkawessa manungku Mawu Ruata nandolokki ami mabatti'u Watti'u Aḥaḥuassa udde su manga taumata poiarddi.

Su Filipi: Lidia nangngimanna Mawu Ruata

¹¹Iami nanantange n Troas wurru nassenggote watukku Samotrake, wurru tiḥrabbine watukku Neapolis. ¹²Wua isudde iami watukku Filipi,



Soa Filipi (16:12)

sambau soa paarorone su leta'u Makedonia. Filipi udde paparentannu araratuannu Roma. Poiaroddi iami natana'a manga pira allo. ¹³Su allo n Sabatta iami inai su winggi n saɽukka su liuddu ngara wahewa n soa, ana waugu iami mammendamma isudde pia tampa pangngaɽiomannu taumata n Yahudi. See iami inuma'iante wurru nagahatote manga wawine apan uaammulla su tampa udde. ¹⁴Sangkatou su wallatti mangitou eteudde mabbawaɽu'u maɽaɽrenessa ungu, aranne Lidia taumata wuassu Tiatira. Itou marangngu Mawu Ruata, ne Mawu nangaɽore naungnge tadea'u itou manengkamma apa apan iaaɽra'i Paulus sitou. ¹⁵Lidia wurru laɽoɽro n waɽene nisarraɽite. Napawe suete n sarraɽine itou nabaɽo siami. Itou nabbisara, "Amungkangngu manga tuɽrangnga mammendamma ia'u atonna-tonna suete nangngimanna Mawu Yesus, wette pangintaɽate su waɽe'u." See itou mammata'a tadea'u iami tumurɽutta daroronggi tou.

Paulus niɽruumanna su Filipi

¹⁶Su sambau allo tantaɽanna iami u'aɽiomanna, iami nassomba n sangkatou wawine; itou allangnga. Wawine udde aintaɽroannu ghaɽraho laɽeo apan wotongnge mani'attu arariadianna apan sarun rumanta. Ringannu manni'attu inolaannu taumata, wawine udde mangngonggolu auntunganna apan wahewa su mawune. ¹⁷Wawine udde sidutu uatantalongnga si Paulus wurru siami lapiddu u'aɽiata, "Manga taumata indi allangngu Mawu Ruata apan ahewaɽanne! Imangitou nirumanta mapaasingkatta su manga tuɽrangnga ereapa laɽanne iamiu ma-saɽamatta!" ¹⁸Manga pira allo aɽannune wawine udde sidutu u'aɽiata aroddi. Paulus niasueannu asasabarene, na'oma n sara itou nanaile see nabbisara ghaɽraho laɽeo udde, "Ringannu arannu Mawu Yesus

Kristus, ia'u mamarenta si'o sabbangnga wuassu wawine udde." Ora-ssa udde lai gharraho udde nanantangngu wawine udde. ¹⁹Napawe manga mawune naatutukka manungku tempo mangitou maasomba roitta udde nawulite, imangitou nanametta si Paulus wuṛṛu si Silas, see itarua niwoḷengnga watukku tampa m pangilloḷoanna iapaasaruanna pamarenta. ²⁰Imangitou napaasaruanni Paulus wuṛṛu Silas su manga tembonannu Roma, wua udde nabbisara, "Manga taumata indi taumata n Yahudi. Imangitou mangngaliba'ukku soa ng kite. ²¹Imangitou nandolokku taumata mallagu n addatta inanaramanna apan uapapaṛṛala manga tita ng kite taumata n Roma. Iite tawe wotongnge manengkamma ara'e tumuṛṛutta addatta inanaramanna udde!" ²²Awadaalla udde lapiddu namuulla si Paulus wuṛṛu si Silas; wuṛṛu manga piaṛṛa'u pamarenta nanggesa'a laubbu rasul darua udde see nandolokku taumata niapapuulla sitarua. ²³Napawe itarua nipuulla ma'ikkatta, itarua nitarṛo sulaḷummu tuttuṛṛanna. Tembonannu tuttuṛṛanna nirolokka mandiaga sitarua ringannu matohassa. ²⁴Ana waugu parenta udde, tembonannu tuttuṛṛanna nantarṛo n tarua su wabo'a n tuttuṛṛanna apan alaḷumanne, wuṛṛu ledda n tarua nimantungnga su saḷabba'u.

²⁵Iraṛṛanggo alloaranete, i Paulus wuṛṛu i Silas u'aliomanna wuṛṛu manggantari n daralo su Mawu Ruata. Manga taumata tataṛṛanganna waine lai tantaḷanna uararingikka sitarua manggantari. ²⁶Inaṛṛombanganne nallinukka wahewa na'oma n sara rapappaku tuttuṛṛanna udde inumio'a. Anambo ngara n tuttuṛṛanna udde nawu'a wuṛṛu manga ṛate apan uamantunggu taumata n tuttuṛṛanna udde napallosa. ²⁷Tembonannu tuttuṛṛanna udde niṛṛumindu'a napu'o. Napawe itou naasilo manga ngara n tuttuṛṛanna udde nawu'a, itou nanawutta haḷele ipamate ririne, ana waugu itou massunna manungku manga taumata apan tataṛṛanganna tinumaḷangke abbi. ²⁸Arawe Paulus inumui ma'ikkaikkatta, "Arie pamate ririnu! Iami sarangkanambone ta'e isindi!"

²⁹Tembonannu tuttuṛṛanna udde nadorongnga soḷo see tinumaḷangnga watukku laḷumme, wuṛṛu ringannu mangngindo itou inumaḷintuda su saruanni Paulus wuṛṛu Silas. ³⁰Wua udde itou nangapiddi tarua sinumabangnga wuṛṛu nabbisara, "Manga mawu, apa ṛinone ta'u olaanna tadea'u ia'u masaḷamatta?"

³¹Paulus wuṛṛu Silas sinumimbakka, "Pangngimante Mawu Yesus! I'o saru masaḷamatta - i'o wuṛṛu anambo n taumata sulaḷummu waḷenu!" ³²See Paulus wuṛṛu Silas nanaḷaate wisara Mawu su tembonannu tuttuṛṛanna udde wuṛṛu anambo n taumata sulaḷummu waḷene. ³³Su ṛabbi mattangnga udde lai, tembonannu tuttuṛṛanna udde nangapiddi tarua see namaresi manga lessa n tarua. Ne itou wuṛṛu anambo n laḷoṛṛo n waḷene lapiddu naisaṛṛani. ³⁴Wua udde itou nangapiddi Paulus wuṛṛu Silas su waḷene wuṛṛu itarua niapaante. Itou wuṛṛu laḷoṛṛo

n wałene mangke lulluassa ana waugu imangitou orassa udde nangngimante Mawu Ruata.

³⁵Tirabbine ruaallo, manga piařra'u pamarenta n Roma nandolokku Polisi watukku tuttupanna iapawało, tadea'u Paulus wuřru Silas iapapallosa.

³⁶Tembonannu tuttupanna udde nabało m batti'a udde si Paulus. Itou nabbisara, "Manga mawu, manga piařra'u pamarenta suete nandolokka tadea'u manga mawu iapapallosa. Orassa indi manga mawu wotonggete mapułe. Sałamatte umamatta!"

³⁷Arawe Paulus nabbisara su manga polisi udde, "Iami tumana'u Roma. Taambe niparikisanna iami suete nipuulla su saruannu awadaalla wuřru tinařro sulałummu tuttupanna. Wuřru orassa indi imangitou mandolokki ami mapułe ringannu małanna-łannaba? Iami maddiri! Dołorřa'a manga piařra'u pamarenta udde rumanta sassane isindi mamillosi ami."

³⁸Manga polisi udde nabało n hatto udde su manga piařra'u pamarenta n Roma. Napawe manga piařrangnge udde naaringikka manungku Paulus wuřru Silas tumana'u araratuannu Roma, imangitou nata'utta.

³⁹See imangitou inaita nadorongnga ampungnga si Paulus wuřru si Silas, wua udde nanguntudi tarua sinumabangnga wuassu tuttupanna, lapiddu nadorongnga tadea'u imangitou mangingkatta wuassu soa udde.

⁴⁰Paulus wuřru Silas nanantanggu tuttupanna udde see inaita su wałe n Lidia. Napawe suete nassomba manga taumata mangngimanna poiaroddi, wuřru nangonggolu sasasa simangitou, Paulus wuřru Silas inumamatte.

Su Tesalonika

17 Paulus wuřru Silas nanassute n amatanni tarua sinumabbi Amfi-polis wuřru Apolonia see na'omate su Tesalonika. Poiaroddi pia wałe m pattatařramawuannu taumata n Yahudi. ²Ne Paulus inaita watukku wałe m pattatařramawuanna udde – ere su anaramme amungkangngu pia wałe m pattatařramawuannu taumata n Yahudi – see mařringidda su sambau ringannu manga taumata isudde su ola'u tatiala n Wuke Susi. Itou na'ola'a udde paatallu allo n Sabatta ualałintuřrutta. ³Tumuřruttu pinangianannu manga tatiala Wuke Susi itou mannała'a wuřru mammasingkatta manungku Ratu m Punnu Sałamatta apan pina'ire Mawu Ruata, řinone matatařrangnga wuřru mabbiakka apia wuassu papate. "Mawu Yesus apan ta'u iapaasingkatta siamiu udde, ete Itou Ratu m Punnu Sałamatta apan pina'ire," unni Paulus. ⁴Manga pira taumata mangngimanna see tinumantalongnga si Paulus wuřru si Silas;

aroddi lai anambo n taumata n Yunani apan matta'uttu Mawu Ruata wuṛṛu manambo lai manga wawine piarṛangge.

⁵Arawe manga taumata n Yahudi mannikka. Imangitou namago manga taumata uḷallele su manga laḷanna wuṛṛu na'ola'a ammuḷanna mangaliba'ukka. See imangitou nangaliba'ukke su ahewallu soa udde wuṛṛu nattuda m baḷe n sangkatou apan mangngimanna aranne Yason maddea'a si Paulus wuṛṛu si Silas, ana waugu imangitou maapulu mangapiddi Paulus wuṛṛu Silas sumabangnga iapasaruanna awadaalla. ⁶Arawe su tempo imangitou tawe naasomba si Paulus wuṛṛu si Silas, imangitou namoḷengnga si Yason wuṛṛu manga pira taumata mangngimanna waine, sinumaruanna manga tembonanne apan uaparenta su soa udde. Imangitou u'ui, "Manga taumata indi manggaliba'ukka su aḷawo'u tampa! Orassa indi soa ng kite lai nirantanni mangitou, ⁷wuṛṛu Yason suete napaintaḷa mangitou su waḷene. Imangitou saranganambone nilumawangnga manga atorannu Kaisar Roma, ana waugu imangitou mabbisara manungku pia lai ratu waine aranne Mawu Yesus." ⁸Ringannu manga wisara udde imangitou na'ola'a manga taumata nambo wuṛṛu manga tembonanne su soa udde hinumio. ⁹See manga tembonanne udde nandolokki Yason wuṛṛu manga taumata mangngimanna apan waine udde mamaekka roittu pasasaḷa. Wakkute udde imangitou ipallossa.

Su Berea

¹⁰Rabbi udde lai manga taumata mangngimanna su soa udde lai nandolokki Paulus wuṛṛu Silas inai watukku Berea. Napawe na'omate isudde, Paulus wuṛṛu Silas inaita su waḷe m pattataṛramawuannu Yahudi. ¹¹Manga taumata su Berea masaṛṛionto'a naungnge wuassu manga taumata su Tesalonika. Ringannu naungnga maḷuassa imangitou madaringikka watti'u Mawu Yesus, wuṛṛu miallo-miallo imangitou mannaṛṛassida laḷoṛṛo n Wuke Susi tadea'u maasingkatta tanne aḷaṛṛa'i Paulus udde atonna. ¹²Manambo su wallatti mangitou mangngimanna Mawu Yesus, wuṛṛu tawe matuḷu lai papunna manga taumata n Yunani mangngimanna; mapia wawine ara'e lai esakka. ¹³Napawe manga taumata n Yahudi su Tesalonika naaringikka manungku Paulus mabatti'u wisara Mawu su Berea, imangitou nirumanta lai su Berea wuṛṛu mammono'a see na'ola'a taumata isudde tawe matammuda. ¹⁴Maḷiha-ḷihakka manga tuṛṛangnga su Berea nanguntuddi Paulus watukku apanne, arawe Silas wuṛṛu Timotius natantangnga su soa udde. ¹⁵Napawe suete nanguntuddi Paulus na'oma n sara Atena, manga tuṛṛangnga udde nabelengnga su

Berea ringannu uaapiddu tanata wuassi Paulus tadea'u Silas wuṛṛu Timotius manantuṛṛutta sitou ringannu maḷihakka.

Su Atena

¹⁶Tantaḷanna i Paulus uaraṛṛaddo si Silas wuṛṛu si Timotius su Atena, naungge massusa naasilo soa udde napene manga paaluanna. ¹⁷Ana waugu udde su waḷe m pattataṛṛamawuanna, Paulus uaa'aliu n ringidda ringannu manga taumata n Yahudi wuṛṛu manga taumata waine apan massubba Mawu Ruata isudde. Aroddi lai su manga pasakka, miallo-miallo itou uaa'aliu n ringidda ringannu manga taumata isudde. ¹⁸Manga huru mallaṛṛengenni Epikuros wuṛṛu Stoa uasasimbakki tou lai. Sire pira wuassi mangitou nabbisara, "Taumata indi masingkattu apa? Asingkanne tumba'u adio'a, arawe itou taḷimoṛṛonganna!" Sire pira ng katou waine nabbisara, "Lihidde itou mabatti'u manga mongannu pabbawalaga waine." Imangitou nabbisara aroddi ana waugu Paulus nabatti'u Mawu Yesus wuṛṛu su ola'u mabbiakka apia wuassu papate. ¹⁹See imangitou nangapiddi Paulus watukku tampa pasasombanna su Wuiddu Areopagus. Poiaroddi imangitou nabbisara sitou, "Iami maapulu maasingkata aḷaṛṛa'a wakku apan iaṛṛangngu udde. ²⁰Ana waugu i'o mammasingkatu manga inolaanna apan daringiṛṛanna paṛṛalane su aringikki ami. Ana waugu udde iami maapulu maasingkatta atapasanne." (²¹Ana waugu taumata n Atena wuṛṛu manga taumata raho apan uatana'a isudde maapulu manginsue allo mangitou madaringikka wuṛṛu uahahatto manga hatto apan wakku.)

²²Su tempo i Paulus dirumarisikka su saruannu manga taumata apan uaammulla su Areopagus udde, Paulus nabbisara, "Ei, manga taumata n Atena! Ia'u ma'ellega manungku su alawo'u inolaanna iamiu lembo n taṛṛa agama. ²³Ana waugu su tempo ia'u u'amatta mammaḷiwutta soa atatanaannu wuṛṛu mannutukka manga tampa m pangaliomanannu, ia'u naasilo lai sambau tampa pangangadoannu sasamba; su tampa udde uawoṛṛetta, 'Ionggola su Mawu apan awagananna.' E, Mawu Ruata apan sassubbanni amiu udde awagananna, ete Itou apan iwabatti'u siamiu. ²⁴Mawu Ruata apan nandiaddi runia indi wuṛṛu aḷawo'u laḷoṛṛone, ete Itou Mawu su langitta wuṛṛu runia. Itou tawe uatana'a su manga waḷe m paaluanna apan niola'u taumata. ²⁵Itou lai tawe madorongnga tuḷunganna su taumata, ana waugu ete Itou apan mangngonggolu wiakka wuṛṛu sasangngo wuṛṛu manga aḷawo'a su taumata. ²⁶Wuassu sangkatou taumata Itou nandiaddi anambo n pabbawalaga wuṛṛu nandolokki mangitou matana'a su ahewallu runia. Ete Itou lai apan nanantunna ro'e n paarorone, tinggera wuṛṛu suapa imangitou wotongge mabbiakka.

²⁷Mawu Ruata na'ola'a udde tadea'u imangitou maddea'a Sitou. Antimanna imangitou maasomba Sitou su tempo imangitou maddea'a Sitou. Arawe surrinone Mawu Ruata tawe marau wuassi ite sangkatou-sangkatou. ²⁸Ere lai su wisara n taumata, 'Iite wiakka wuṛṛu u'alore wuṛṛu uatana'a su runia indi ana waugu taṛṛino n Tou.' Ere lai iwabaḷo manga taṛṛa sasanato'i amiu, imangitou mabbisara,

'Ete iite sarangkanambone udde aḷaṛṛanang-Nge.' ²⁹Ne, ana waugu ete iite udde aḷaṛṛana'u Mawu Ruata, iite tawe wotongnge massunna manungku Mawu Ruata udde naaḷihida ere paaḷuanna apan niola'a wuassu wuḷawanna ara'e saḷa'a ara'e watu apan niola'a tumuṛṛuttu apande n taumata. ³⁰Tempo n awawodo ng kite suete tinimbuḷianannu Mawu Ruata, arawe orassa indi Itou nandolokku taumata su ahewallu runia tadea'u mawaḷu wuassu manga rosa mangitou. ³¹Ana waugu Itou suete nanantunnu sambau tempo ipamarikissa ahewallu runia indi ringannu atatuḷidda. Manara udde sarun olaannu sangkatou apan suete nipile Mawu Ruata su ipa'ola'a manara udde. Wuṛṛu tadea'u anambo n taumata maasunna olangnge udde, Mawu Ruata suete napaawiakku taumata apia udde wuassu papate!"

³²Napawe manga taumata udde naaringikka hatto mabbiakka apia wuassu papate, su wallatti mangitou piaddu nilumage m Paulus. Piaddu nabbisara, "Iami maapulu madaringikka tuṛṛangnga mabbisara apia su ola'u hatto indi." ³³See Paulus nanantangngu ammuḷanna udde. ³⁴Arawe piaddu lai su wallatti mangitou mannamba'a si Paulus wuṛṛu mangngimanna Mawu Yesus, eteudde: Dionisius wuassu mammamanara n Areopagus, wuṛṛu sangkatou wawine aranne Damaris, wuṛṛu pira ng katou lai.

Su Korintus

18 Wua udde Paulus nanantangke n Atena wuṛṛu inaitte watukku Korintus. ²Isudde itou nassomba n sangkatou Yahudi aranne Akwila, darantane wuassu leta'u Pontus. Akwila wakkute nirumanta wuassu Italia ringannu awingnge Priskila. Imangitou nirumanta su Korintus ana waugu Kaisar Klaudius suete nandolokku anambo n taumata n Yahudi iapaasaḷu wuassu Roma. Ne Paulus inaitte nattembo sitarua, ³see natana'a isudde ringanni tarua wuṛṛu mammanara suadio'a ringanni tarua, ana waugu manara n tarua uasuḷungngi Paulus, eteudde ma'ola'a rasanna. ⁴Arawe suapa n allo n Sabatta, Paulus inaitte uahahatto su waḷe m pattataṛṛamawuanna tadea'u manga taumata n Yahudi aroddi lai manga taumata n Yunani mangngimanna Mawu Yesus.

⁵Napawe Silas wuṛṛu Timotius naranta wuassu Makedonia, Paulus nappaattu anambo n allone mammasingkattu Watti'a wuassu Mawu Ruata su manga taumata n Yahudi manungku Mawu Yesus. udde Ratu m Punnu Saḷamatta apan suete pina'ire Mawu Ruata. ⁶Arawe ana waugu manga taumata sidutu mannoppolla wuṛṛu mangngaḷuandaga sitou, ne Paulus nangesoge n awu wuassu laungge, maola'a sambau pananaunganna simangitou su pasasaḷa mangitou. Itou nabbisara, "Amungkangngu iamiu nasilaka, saḷanu sassane! Ia'u waggate! Manattakka orassa indi ia'u inaitte ringannu manga taumata apan waḷine Yahudi." ⁷See Paulus nanantangke mangitou wuṛṛu inaitte natana'a su waḷe su samba'a waḷe m pattataṛramawuanna udde. Waḷe udde waḷe n sangkatou apan waḷine Yahudi, arawe itou massubba Mawu Ruata. Arannu taumata udde Titius Yustus. ⁸Arawe Krispus, tembonannu waḷe m pattataṛramawuanna udde wuṛṛu manga laḷoṛṛo n waḷene nangngimante Mawu Yesus. Wuṛṛu manambo lai manga taumata n Korintus waine naaringikka watti'a apan niapaasingkatti Paulus, nangngimante Mawu Yesus see nissarṛani.

⁹Su sambau ṛabbi sulaḷummu sambau sondappa, Mawu nabbisara si Paulus, "Imbaṛrangnga matta'utta! Sidutu pangngaṛṛa'a wuṛṛu arie pangilloḷo. ¹⁰Ana waugu Ia'u uarṛundinganna si'o. Tawe saran sangkatou apan mandaḷeo si'o ana waugu manambo taumata su soa indi taumata-U." ¹¹Ana waugu udde Paulus natana'a su Korintus santonna annumu wuḷanna aḷannune wuṛṛu mangngaṛṛa'u wisara Mawu Ruata simangitou.

¹²Napawe Galio naola'a gubernure n Akhaya, manga taumata n Yahudi naammulla mannaḷare si Paulus wuṛṛu mangapiddi tou watumku mallarṛuungnga. ¹³Imangitou nangapiddu alae indi, "Taumata indi mammono'a awadaalla, tadea'u massubba Mawu Ruata ringannu sarṛene uapaparṛala n Tita Musa!"

¹⁴Aroddi Paulus sinumimbakka, Galio nabbisarate rorone manga taumata n Yahudi, "Ei, manga taumata n Yahudi! Amungkangngu iaalaenu indi sambau pasasaḷa ara'e sambau aḷaḷeo, ia'u ṛinone manabare n alaenu indi. ¹⁵Arawe indi sambau patatatiakka su ola'u manga wisara wuṛṛu manga aranna see manga titanu sassane! Nariaddi iamiu ṛinone manginsue hatto indi. Ia'u maddiri mamarikissa hatto ereudde!" ¹⁶See Galio nallimbuakka simangitou watukku liudde. ¹⁷Ne imangitou nanametta si Sostenes, tembonannu waḷe m pattataṛramawuanna udde, wuṛṛu namuulla sitou su saruannu medda m pamamarikisanna. Arawe Galio ma'iele m wagga su ola'u hatto udde.

Paulus nabelengga su Antiokhia

¹⁸Wua udde Paulus ta'e natana'a maḷannu su Korintus. Wua udde itou nabbisarate addattu patatalei su manga taumata apan mangngimanna isudde, see itou nassenggotte ringanni Priskila wuṛru Akwila watukku Siria. Su Kengkrea, Paulus namoḷo utangnge apan niwala n tou maḷo'engnga ana waugu riandine su Mawu. ¹⁹Napawe na'omate su Efesus, Paulus nanantangngi Priskila wuṛru Akwila, see sinumutta su waḷe m pattataṛramawuanna wuṛru uararṛingida su sambau ringannu manga taumata n Yahudi isudde. ²⁰Imangitou nadorongnga tadea'u itou matana'a maḷannu ringanni mangitou arawe itou maddiri. ²¹Salaiwe aroddi, su tempo inaita, itou nabbisara, "Amungkanggu Mawu Ruata mamala, ia'u sarun mabelengnga apia isindi." Nasue nabbisara aroddi, itou inumamate nanantangngu Efesus.

²²Napawe sinumossokke su Kaisarea, itou inaita watukku Yerusalem mattabea manga jamaatta isudde, see nanassute amatanne watukku Antiokhia. ²³Napawe natana'a isudde pira allo aḷannune, itou inaita inumamatta lai nattembo leta'u Galatia wuṛru Frigia inai manohassa pangangimannu taumata apan mangngimanna.

Apolos su Efesus wuṛru Korintus

²⁴Tantaḷanna udde, nirumantate su Efesus sangkatou Yahudi wua-ssu Aleksandria, aranne Apolos. Itou pande massinaukka wuṛru masingkattu laḷorṛo n Wuke Susi, ²⁵see suete lai niaṛraanna manarṛassida aḷarṛa'u Mawu Yesus. Ne ringannu apulu apan wahewalla itou mangngarṛa'a ringannu ma'uddupa su ola'u Mawu Yesus, salaiwe wakute sasarṛani n Yohanes niasingkatanne. ²⁶Ringannu warṛani Apolos nanattakke massinaukka su waḷe m pattataṛramawuanna wuṛru su tempo Priskila wuṛru Akwila naaringikka aḷarṛangnge, imangitou nangapiddi tou su waḷe. Poiaroddi imangitou mannaḷa'a ringannu mapia sitou su ola'u pandumannu Mawu Ruata manaḷamatta taumata sulaḷummu Mawu Yesus. ²⁷Wua udde Apolos pia pandumma inai su Akhaya. Ne manga taumata apan mangngimanna Mawu Yesus su Efesus namorṛetu suratta su manga tuṛrangnga apan mangngimanna su Akhaya tadea'u imangitou wotongnge manarimmatti Apolos. Wuṛru su tempo Apolos na'omate su Akhaya, sasumbalane mangke mahuna su manga taumata apan ana waugu aḷamattu Mawu Ruata nangngimante Mawu Yesus. ²⁸Ana waugu ringannu masarṛaungnga, Apolos napaḷannabu manga taumata n Yahudi sulaḷummu patatatiakka su saruannu awadaalla.

Wurru itou nattiala ringannu tatiala Wuke Susi manungku tumba'u Mawu Yesus Ratu m Punnu Sałamatta apan suete pina'ire.

Paulus su Efesus

19 Tantalanna Apolos su Korintus, Paulus tantalanna u'amatta su ulu n wanua udde, see na'omate su Efesus. Poiaroddi itou nassomba manga pira taumata apan suete nangngimanna Mawu Yesus. ²Itou naiwało simangitou, "Manga turrangnga suete naasengkamma Gharraho Mawu Ruata, su tempo iamiu nangngimanna Mawu Yesus?"

Imangitou sinumimbakka, "Taambe, Ewe'e iami taambe naaringikka manungku pia Gharraho Mawu Ruata."

³"Amungkangngu aroddi, ringannu sasarrani n sai iamiu nissarrani?" aiwało m Paulus.

"Ringannu sasarrani n Yohanes," sasimbakki mangitou. ⁴See Paulus nabbisara, "Yohanes manarrani taumata tadea'u mapaalatta'a manungku manga taumata udde nawałute wuassu manga rosa mangitou. Arawe tantalanna udde lai Yohanes mammasingkatta su manga taumata n Israel manungku rinone imangitou mangngimanna taumata apan ru-manta manałimmuri wuassi tou, eteudde Mawu Yesus."

⁵Napawe imangitou naaringikka udde, imangitou nissarranite ringannu arannu Mawu Yesus. ⁶Wurru su tempo Paulus nangado n lima simangitou, Gharraho Mawu Ruata nangintarro simangitou, see imangitou mannattakke uahahatto sulałummu aławo'u wisara apan maatiangnga lapiddu mammasingkattu watti'u Mawu Ruata. ⁷Reenganni mangitou sarangkanambone irarrangngo sire mapuło dua su atoune.

⁸Tallu wułanna ałannune, Paulus sidutu mabbisara ringannu warrani su manga taumata su wałe m pattatarramawuanna wurru uasasimbakki mangitou tadea'u imangitou mangngimanna su ola'u ereapa Mawu Ruata mamarenta ere sangkatou Ratu. ⁹Arawe su wallattu manga taumata udde pia sire pira apan puane maatika wurru maddiri mangngimanna. Su saruannu awadaalla apan uasemodda isudde imangitou mapaasała n ałarra'a su ola'u Mawu Ruata manałamatta taumata sulałummu Mawu Yesus. Ana waugu udde Paulus nanantangngi mangitou, see inaitte ringannu manga mallałarreggennu Mawu Yesus su tampa m pananantiroannu Tiranus. Isudde miallo-miallo itou uaiwało manga taumata. ¹⁰Itou sidutu ma'ola'a inolaanna udde rua tonna ałannune na'oma n sara anambo n taumata wuassu pabbawalaga waine, sarangka-nambone nadaringikka wisara Mawu.

Aļarřana'i Skewa

¹¹Mawu Ruata na'ola'a manga aļarřindu'a apan wahewalla si Paulus. ¹²Amungkangngu leso, ara'e wawa'issa lawassa apan suete nipaatti Paulus iapidda su manga taumata marada'a, rada'i mangitou mawuļi wuřru gharřaho n setanna lai sumabangnga wuassi mangitou. ¹³Pia sire pira tonaassu Yahudi apan u'aamatta su aļawo'u tampa, mallimbuakka gharřaho laļeo wuassu manga taumata. Manga tonaassa udde maan-nama lai mappaattu arannu Mawu Yesus ipallimbuakka manga gharřaho n setanna udde. Imangitou mabbisara su manga gharřaho n setanna udde, "Ringannu arannu Mawu Yesus apan iwabatti'i Paulus udde, ia'u mallimbuakka siamiu!" ¹⁴Pia sire pitu aļarřana'a esakka ana'u sangka-tou imam tembonanne, aranne Skewa, pia inolaanne ereudde.

¹⁵Arawe gharřaho n setanna udde nabbisara simangitou, "Ia'u ma-singkattu Mawu Yesus wuřru Paulus asingkatangu lai, arawe iamiu indi isai?"

¹⁶See taumata apan niasuttannu setanna udde sinumolo'a wuřru ti-numambo simangitou ringannu marřagissa, na'oma n sara imangitou ti-numaļangnga wuassu waļe udde naļaļessa wuřru natantolę, ana waugu laubbi mangitou nihesa'a wuassu wadangngi mangitou. ¹⁷Anambo n taumata n Yahudi wuřru pabbawalaga waine apan uatana'a su Efe-sus naaringikka arariadianna udde, see imangitou nata'utte. Ne arannu Mawu Yesus mangke raddaloanna. ¹⁸Manga taumata apan nangngi-mante Mawu Yesus, nirumanta mangnga'u su tangnga n awadaalla manga inolaanni mangitou su tempo nangkaļiu. ¹⁹Wuřru imangitou apan ninumarampe mappaattu larřopa, nangammullu manga wuke mangitou wuřru tinutungnga su saruannu awadaalla. Aregga manga wuke udde amungkangngu ireengnga sarangkanambone, irarřangngo lima m puļo su řiwune roitta saļa'a. ²⁰Ete aroddi, ringannu sarřene apan wahewalla udde wisara Mawu mangke inasingkatanna wuřru aatambanna taumata apan mangngimanna.

Pattatiakka su Efesus

²¹Wuassu arariadianna udde, Paulus narřawessa inaite watukku Makedonia wuřru Akhaya, see masaļate watukku Yerusalem. "Wua isudde," unni Paulus, "Ia'u inaite watukku Roma apia." ²²Ne itou nandolokku rua ng katou wuassu mallaļaļimane eteudde Timotius wuřru Erastus inai watukku Makedonia, wuřru itou matana'a manga pira tempo aļannune su leta'u Asia.

²³Irar̄ranggo ete su tempo udde lai nariaddi patatatiakka apan wahewa su Efesus ana waugu su ola'u aḷar̄ra'u Mawu Yesus. ²⁴Ana waugu su soa udde pia sangkatou tar̄ra ola'a sarannapa wuassu saḷa'a aranne Demetrius, apan ma'ola'a manga waḷe monganni Monganna Artemis. Manara n taumata udde mandanta n auntunganna apan wahewa su manga mammamanarane. ²⁵Ana waugu udde itou nangammullu manga mammamanarane su sampunna ringannu mamanara tar̄ra ola'a saḷa'a waine, see nabbisara, "Manga tur̄rangnga! Tur̄rangnga masingkatta manungku iite naasomba auntunganna wuassu manara indi. ²⁶Orassa indi manga tur̄rangnga naasilote wuḷru naaringikke sassane apa apan niola'i Paulus udde. Itou nabbisara manungku manga monganna apan niola'u taumata, waḷinewe monganna atonna. Wuḷru itou namohete manambo taumata mangngimanna aḷar̄rangnge, waḷine tumba'u isindi su Efesus, ewe'e marani n su ahewallu leta'u Asia. ²⁷Maata'utta manungku manara ng kite indi sarun maasomba aranna laḷeo. Wuḷru waḷine tumba'u udde, ewe'e waḷe n Monganna Artemis lai sarun tawe saileanna see aḷar̄rangnge mangke lar̄rindanna; sumbaḷi itou monganna apan sasubbannu anambo n taumata su leta'u Asia wuḷru su ahewallu runia!"

²⁸Aroddi manga taumata udde naaringikka udde, naungngi mangitou naḷaḷeo, see imangitou u'ui, "Wiakke Artemis, mongannu taumata n Efesus!" ²⁹Ne patatatiakka udde nilumewesse su ahewallu soa. Wua udde ammuḷannu aḷiba'ukka udde nanamette si Gayus wuḷru si Aristarkus, eteudde manga taumata Makedonia apan uaammungnga si Paulus sulaḷummu amatanne, see namoḷengnga simangitou su waḷe m pananalanganna su soa udde. ³⁰Paulus maapulu sumutta tumantalongnga simangitou, arawe manga taumata apan mangngimanna Mawu Yesus naningaddi tou. ³¹Manga pira tembonannu leta'u Asia udde, apan uahahawe m Paulus, nandolokku taumata namasingkatta si Paulus tadea'u itou tawe mattingkapisilo su tampa udde. ³²Tantaḷanna udde manga taumata apan uaammulla su waḷe m pananalanganna udde nassongkaka. Piaddu u'ui arendi, piaddu lai u'ui aroddi, ana waugu manambo wuassi mangitou wagga pandumanne maammula isudde. ³³Sambageanganna wuassu manga taumata udde massunna manungku Aleksander mar̄raḷingidde, ana waugu ete itou sinuḷrudu manga taumata n Yahudi su saruane. Ne Aleksander namatte n limane madorongnga onngoḷannu tempo itou sumimbakka su saruannu manga taumata udde. ³⁴Arawe aroddi imangitou naasilo manungku itou taumata n Yahudi, sangkarindo'a imangitou inumui ma'ikka-ikkatta, "Wiakka Monganna Artemis, mongannu taumata n Efesus!"

³⁵Panginsueanne mamamoḷretu soa udde napaaḷannabu awadaalla udde. Itou nabbisara, "Tumana'u Efesus! Aḷawo'u taumata masingkatta manungku ete su Efesus soa apan mammaduḷi waḷe n Mo-

nganna Artemis wuṛṛu watu susi apan nanawo wuassu langitta. ³⁶Tawe saran sangkatou wotongnge maaḷawangnga olangnge udde. Ana waugu udde paaḷannabe, wuṛṛu arie ma'ola'a sambau manara ringannu tawe marṛingidda asuene. ³⁷Manga taumata indi suete niapiddi amiu isindi, waḷine ana waugu imangitou suete nangarṛo waḷe n monganna ara'e ana waugu imangitou suete nangadio'a monganni ite. ³⁸Amungkanngu Demetrius wuṛṛu manga mammamanarane udde pia alaene su ola'u su sangkatou taumata, wala'e imangitou mangapiddu hattone udde su mallarṛuungnga. Mallarṛuungnga manengkamma aḷawo'u hatto udde wuṛṛu manga piaṛṛa'u pamarenta lai sidutu isudde. ³⁹Arawe amungkanngu ta'e pia lai waine apan ipaapulu ng kamiu, udde ṛinone insueanna sulaḷummu ammulu awadaalla apan matohassa. ⁴⁰Ana waugu aradianna allo indi wotongnge maaḷaḷeo siite. Iite wotongnge ansiḷanna na'ola'a pagahahio, ana waugu iite tawe sambau pinangiananne mapaṛṛino n patatatiakka indi." ⁴¹Napawe suete nabbisara n sarangkambone udde, mamamoṛṛettu soa udde nandolokke n taumata nambo udde niapaapule.

Paulus inaite watukku Makedonia wuṛṛu Yunani

20 Napawe patatatiakka su Efesus nallannabe, Paulus nangammullu jamaatta wuṛṛu nangonggolu sasasa simangitou. Wua udde itou nabaḷote wisara n patataḷei, see nanassute amatanne watukku Makedonia. ²Itou nattembo manga jamaatta su wageangngu leta'u Makedonia wuṛṛu itou manambo mangagilu tatantiro su manga taumata apan mangimanna Mawu Yesus poiaronddi wuṛṛu mangngonggolu sasasa simangitou. Wua udde itou inaite watukku Yunani. ³Tallu wuḷanna aḷannune itou uatana'a poiaronddi. See napawe itou uasasaddiate massenggote watukku Siria, pia batti'a manungku manga taumata n Yahudi tantaḷanna ma'ire mamate sitou. Ana waugu udde itou narṛawessa mabelengnga malliu Makedonia. ⁴Sopater ana'i Pirus wuassu Berea, inai suadio'a ringanni tou; aroddi lai Aristarkus wuṛṛu Sekundus taumata n Tesalonika, wuṛṛu Gayus taumata n Derbe. Wuṛṛu lai Timotius, Tikhikus wuṛṛu Trofimius manga taumata wuassu leta'u Asia. ⁵Imangitou nalliu ṛoro siami see narṛado su Troas. ⁶Napawe Ramea n Roti Tawe Ragine, naḷiudde, iami nassenggote nanantangngu Filipi. Lima allo wua udde iami naammulle apia ringanni mangitou su Troas. Poiaronddi iami natana'a sangkamisa.

Patatempo m Paulus panginsueanne su Troas

⁷Rabbi ng kallo misa iami naammulla umanna suadio'a naola'a ere sangkatuṙranganna. Paulus uahahatto manga taumata, ana tiṙṙabbine itou marṙingidda inaita umamatta. Na'oma n sara allorane Paulus uahahatto. ⁸Sulaḷummu wabbo'a su ṙengkenne aḷiu rosone, su tampa nipaam-muḷanni ami udde, pia manambo soḷo. ⁹Sangkatou umbasanna aranne Eutikhus uaianna su sungketta. Ana waugu Paulus tate mangilloḷo mag-gahatto, umbasanna udde niamatiilante atonna, na'oma n sara itou niamatiilanna su sungketta udde, see nanawo wuassu ṙengkenne atallune. Su tempo imangitou nanaḷuru sitou, itou natete. ¹⁰Arawe Paulus sinu-mossokka, see nattingkaṙṙa'a su awa'u taumata udde wuṙṙu naṙṙa'uppa sitou. Paulus nabbisara, "Arie paassingawangnga, itou ta'e wiakka!" ¹¹Wua udde Paulus nirumanganna apia su ṙengkenne aḷiu rosone, see nattiahi roti wuṙṙu inumante su adio'a. Napawe maḷannute uahahatto manga taumata na'oma n sara ruaallo, Paulus inaita inumamatta. ¹²Manga taumata nangapiddu umbasanna udde napuḷe watukku waḷene ringannu ta'e wiakka. Imangitou naappendamma aḷaḷuassa wuṙṙu naungnga mangke natuno.

Wuassu Troas watukku Miletus

¹³Iami nassenggotte nalliu ṙoro sinuma'e apalla wuṙṙu nabatukku Asos, ana mangotongnga si Paulus isudde. Itou suete nangatokka aroddi, ana waugu itou inumamattu ammaranne watukku Asos. ¹⁴Napawe nassombate su Asos, Paulus nasasaṙṙawutta sinuma'e su apalla see iami nassenggotte watukku Metilene. ¹⁵Wua poiaroddi iami nassenggotte apia, wuṙṙu tiṙṙabbine na'omate su tampa apan uasaruanna Khios. Tillorege iami na'omate su Samos wuṙṙu massallo wua udde su Miletus. ¹⁶Paulus suete nangatokka manungku tate umotongnga su Efesus, tadea'u allo tawe maramme su leta'u Asia. Wuṙṙu amungkannggu wotongnge itou maapulu maḷiha-ḷihakka ma'omate su Yerusalem su Allo Wahewa m Pentakosta.

Paulus nabbisara wisara m patataḷei su Efesus

¹⁷Wuassu Miletus Paulus napaapiddu watti'a watukku Efesus, madorongnga manga piaṙṙa'u jamaatta su Efesus rumanta maisasomba n tou. ¹⁸Napawe imangitou na'omate, Paulus nabbisara simangitou,

"Manga tuḥrangnga masingkatta ereapa ia'u mabbiakka aḥannune indi su wallatti amiu ro'e n allo paarorone ia'u na'oma su Asia. ¹⁹Ringannu awawawo n daḥummu naungnga wuḥru ringannu allo mata, ia'u mammanara manara Mawu su pattangngannu asasusa apan niapendamangku ana waugu pandumma laḥeo wuassu taumata n Yahudi. ²⁰Tuḥrangnga masingkatta manungku ia'u tawe illoḥone mammasingkatta siamiu apa apan mahuna siamiu. Ia'u mangngaḥḥa'a siamiu su tampa pasasombannu awadaalla wuḥru su manga waḥe. ²¹Mapia udde su manga taumata n Yahudi aroddi lai su manga pabbawalaga waine ia'u sidutu mananata tadea'u imangitou mawaḥu wuassu manga rosa mangitou wuḥru rumanta ringannu Mawu Ruata, see lai mangngimanna Mawu Yesus. ²²Orassa indi tadea'u maatuḥrutta parenta Ghaḥḥaho Mawu Ruata, ia'u inaitte watukku Yerusalem. Wuḥru ia'u waggate apa apan sarun mariaddi sia'u poiaroddi. ²³Ia'u tumba'u masingkatta manungku su aḥawo'u soa, Ghaḥḥaho Mawu Ruata ringannu atonna mamasingskatta sia'u manungku ia'u sarun itaḥro su tuttupanna wuḥru sarun matataḥrangnga. ²⁴Arawe ia'u ma'iele m bagga ringannu wia'u indi, sambaḥiate ia'u napanginsue manara apan tinantillu Mawu Yesus sia'u wuḥru sambaḥiate ia'u maatuḥrutta na'oma n sara pangudusannu wia'u ipammasingskattu Watti'u Aḥaḥuassa udde su ola'u darangngu Mawu Ruata.

²⁵Ia'u suete nattembo manga tuḥrangnga sarangkanambone wuḥru suete namasingkatta lai su ola'u ereapa Mawu Ruata mamarenta ere sangkatou Ratu. Orassa indi ia'u mammendamma tate lai massomba manga tuḥrangnga. ²⁶Ana waugu udde ringannu atonna ia'u mabbisara siamiu allo indi manungku amungkanngu su wallatti amiu apan piaddu mate, udde waḥine saḥa'u. ²⁷Tawe saran paassa ia'u tinumaḥangnga wuassu manara'u mannaḥa'a siamiu anambo n pandumannu Mawu Ruata. ²⁸Rinone iamiu uariaga watangannu wuḥru riagai lai anambo n jamaatta apan suete tinantillu Ghaḥḥaho Mawu Ruata siamiu iapariaga; ana waugu iamiu suete niteneḥa maola'a mandariaga jamaatta udde. Rinone iamiu uariaga jamaattu Mawu Ruata udde naaḥihidda ere malaḥu'adda uariaga dombane, ana waugu Mawu Ruata suete na'ola'a jamaatta udde pussaa-Ne sassane sulaḥummu papate n Anang-Nge sassane. ²⁹Su aḥaḥiu'u, sarun rumanta manga serigala apan waḥrani su pattangngani amiu. Wuḥru manga taumata apan rariaganni amiu udde maola'a inassu manga serigala udde. ³⁰Ewe'e wuassu wallattu manga tuḥrangnga sassane lai sarun lumapputa manga taumata apan sarun mabatti'u watti'a awusu. Imangitou ma'ola'a aroddi, tadea'u manga taumata apan nangngimante Mawu Yesus umaḥiwu wuḥru tumantalongke simangitou. ³¹Ana waugu udde paariagga! Paanaunge manungku tallu tonna aḥannune ringannu anambo n allommata, allo ḥabbi, ia'u tawe illoḥone mangngaḥḥa'a awadaalla wuḥru siamiu.

³²Orassa indi ia'u manantilli amiu su Mawu Ruata, tadea'u Itou mammaduli siamiu wufru tadea'u iamiu sidutu ua'umbele watti'u darangngu Mawu Ruata. Mawu Ruata uatahuanna tarfino ipanohassa siamiu wufru nangonggolu manga alamatta apan suete n saddiane ionggolla su alarfanang-Nge. ³³Taambe saran paassa ia'u ninumemma n roitta ara'e laubbu taumata waine. ³⁴Turrangnga sassane masingkatta, manungku ringannu auatangku sassane ia'u mammanara manipussa hausangku wufru manga hawe'u apan uatantalongnga sia'u. ³⁵Sulalammu alawo'u hatto, ia'u suete nanuladda siamiu manungku ringannu mammanara marimadda ereindi, iite rinone mantulungngu manga taumata lome. Ana waugu iite rinone mannaungnga apa apan suete niwalo Mawu Yesus, 'Lembo n su lalumanna'a iite mangonggolla, wuassu iite manengkamma.'"

³⁶Napawe Paulus suete nabbisara, itou inumalintuda ringanni mangitou sarangkanambone see inumalomanna. ³⁷Imangitou sarangkanambone nilumuai lapiddu narra'uppa si Paulus wufru nabbisara, salamatte umamatta. ³⁸Imangitou massusa ana waugu Paulus nabbisara manungku imangitou tate maasilo sitou apia. See imangitou nanguntudi Paulus sara su apalla.

Paulus inaita watukku Yerusalem

21 Iami nabalō mapulete su manga piarra'u jamaatta wuassu Efesus udde see nanantangngi mangitou. Wua udde iami nassenggotte watukku tarfanusa n Kos; wufru tirabbine iami na'omate su tarfanusa n Rodos. Wua isudde iami nassenggotte watukku tatulianu Patara. ²Su Patara iami naasomba apalla apan mabatukku Fenesia. Ne iami sinuma'ete apalla udde, ³wufru nassenggotte na'oma n sara naasilo tarfanusa n Siprus su samba'a aifri ng kami; arawe iami lapiddu nassenggotta mattuda n Siria. Iami nabbalango su Tirus, ana waugu isudde apalla sasa'eanni ami mangonna luranne. ⁴Su tampa udde iami inai nattembo manga taumata apan mangngimanna Mawu Yesus, see natana'a ringanni mangitou sangkamisa alannune. Wuassu tatantiro n Gharraho Mawu Ruata, imangitou mangngarra'a si Paulus tadea'u arie inai su Yerusalem. ⁵Arawe napawe nasuete tempone iami uatana'a isudde, iami nanantangngi mangitou, wufru iami nanassute amatanni ami. Imangitou sarangkanambone ringannu anangnge wufru awingnge nanguntudi ami sara liuddu soa. Poiaroddi su winggi n apanne, iami sarangkanambone inumalintuda see inumalomanna. ⁶Wua udde iami natatabeate, see iami sinuma'ete apalla wufru imangitou napulete watukku waje.



Soa Tirus (21:3)

⁷Iami sidutu nassenggotte wuassu Tirus watukku Ptolemais. Poiaroddi iami inaitte nattembo manga tuṙrangnga apan mangngimanna, ana waugu mangonggolu tabea simangitou, wua udde natana'e allo massallo ringanni mangitou. ⁸Tiṙrabbine iami nassenggotte apia, see na'omate su Kaisarea. Isudde iami inaitte ringannu mabawatti'u ṙnggetannu Mawu, aranne Filipus, see natana'e su waḗene. Itou sangkatou wuassu wallattu sire pitu apan napile su Yerusalem. ⁹Sire appata anangnge maṙṙuala suete inonggoḗannu Mawu Ruata asingkata tadea'u wotongnge mama-singkattu Watti'u Aḗaḗuassa wuassu Mawu Ruata. ¹⁰Napawe manga pira allo aḗannune poiaronddi, nirumantate sangkatou nabi wuassu Yudea aranne Agabus. ¹¹Itou nirumanta ringanni ami ana see nanganu papeṙṙetti Paulus. Ringannu papeṙṙetta udde itou nama'issa ledda wuṙṙu limane sassane ana see nabbisara, "Ete indi apan niapaasingkattu Ghaṙṙaho Mawu Ruata: Tatahuannu papeṙṙetta indi sarun ṙapusannu manga taumata n Yahudi ereindi su Yerusalem, wuṙṙu itantilla su manga taumata waḗine Yahudi."

¹²Napawe iami naaringikka udde, iami wuṙṙu manga tuṙrangnga apan uatana'a su Kaisarea sinumaḗande si Paulus tadea'u itou tawe inai watukku Yerusalem. ¹³Arawe itou sinumimbakka, "Apa hunane tuṙrangnga lulluai ereindi na'oma n sara naungku nasusa? Ia'u nasaddiate waḗine tumba'u sametanna poiaronddi, arawe nasaddiate lai mate ana waugu Mawu Yesus." ¹⁴Paulus maddiru madaringikka siami, ne iami tate naningaddi tou. "Walatte apulu Mawu sassane mariaddi," unni ami.

¹⁵Napawe uatana'e isudde manga pira allo aḗannune, iami nanahimpunte sarannapa ng kami see inaitte watukku Yerusalem. ¹⁶Sire pira tuṙrangnga wuassu Kaisarea inai lai tumantalongnga su adio'a ringanni ami, manguntuddi ami su waḗe Manason ana waugu ete su waḗe

n tou iami mangintaḷa. (Manason sangkatou taumata n Siprus apan maḷannute naola'a mallaḷarḷrenggenu Mawu Yesus.)

Paulus nattembo si Yakobus

¹⁷Su tempo iami na'omate su Yerusalem, manga tuḷrangnga isudde nanaḷoho siami ringannu naungnga apan maḷuassa. ¹⁸Tiḷrabbine Paulus inaitte su adio'a ringanni ami mattembo si Yakobus; Manga piaḷra'u jamaatta uasemodda lai isudde. ¹⁹Napawe suete nattabea simangitou, Paulus nabbati'a simangitou aḷawo'u inolaanna apan suete niola'u Mawu Ruata sulaḷummi tou su wallattu manga taumata apan waḷine Yahudi. ²⁰Napawe suete nadaringikka watti'i Paulus udde, imangitou sarangkanambone nadalote Mawu Ruata. Wua udde imangitou nabbisara si Paulus, "Tuḷrangnga Paulus! Tuḷrangnga ḷinone maasingkatta manungku su ḷiwunete taumata n Yahudi mangngimanna Mawu Yesus. Ete imangitou sarangkanambone udde taumata apan sidutu tuttuḷrutta mappaamattu Tita n Musa. ²¹Wuḷru orassa indi imangitou naaringikke manungku tuḷrangnga mangngaḷra'a anambo n taumata n Yahudi apan uatana'a su wallattu pabbawalaga waine, tadea'u mamallossu Tita n Musa. Tuḷrangnga manantiro simangitou tadea'u imangitou tawe mapassunattu aḷarḷana'i mangitou, ara'e tumuḷrutta inanamannu Yahudi. ²²Orassa indi manga taumata n Yahudi apan nangngimante udde sarun maaringikka manungku tuḷrangnga isindi. Nariaddi ereapa orassa indi? ²³Mappianne tuḷrutte tatantiro ng kami. Pia sire appatta isindi apan suete na'ire Mawu. ²⁴Ne ḷinone tuḷrangnga inai mallaghu pangangukkassa wadangnga su adio'a ringanni mangitou wuḷru waerḷrete sasannane tadea'u imangitou wotongngete lungguḷrana. Ringannu aroddi sarun lumiatta'a su anambo n taumata manungku apa apan niaringiḷranni mangitou su ola'u tuḷrangnga udde awusu, ana waugu tuḷrangnga sassane lai mappaamattu Tita n Musa. ²⁵Arawe su ola'u taumata apan waḷine taumata n Yahudi apan nangngimante Mawu Yesus, iami suete napaapiddu suratta simangitou su ola'u ḷarḷawessu hatto ng kami, manungku imbaḷrangnga umanna anna apan suete pinasubba paaḷuanna, tawe wotongnge ma'inumma ḷarḷra, ara'e uminassa winatangnga apan nate niatongnga; wuḷru tawe wotongnge ma'ola'a inolaanna apan laḷeo."

²⁶Ne Paulus inaitte ringannu sire appata taumata udde see nallaguhute m pangangukkassa wadangnga su adio'a ringanni mangitou su allo tiḷrabbine. Wua udde imangitou sinumutta su Waḷe Mawu namasingkatta manungku ete pira allo lai laḷaghu m pangangukkassa udde masue wuḷru sasamba n sangkatou-sangkatou ionggole.

Paulus sinametta su Waļe Mawu

²⁷Napawe tempo pitu allo udde masuete, manga pira taumata n Yahudi wuassu Asia naasilo si Paulus sulaļummu Waļe Mawu. See imangitou nangahe taumata nambo, wua udde nanametta si Paulus, ²⁸lapiddu u'ui, "Ei, manga taumata n Israel, ontoļe! Ete indi taumatane apan mammalintadu aļawo'u wanua manggarra'a anambo n taumata manga aļarra'a apan ipannompolla pabbawalagu Israel, wuŗru mannompola Tita Musa wuŗru mannompolla Waļe Mawu indi. Wuŗru orassa indi ewe'e itou lai mangapiddu manga taumata apan waļine Yahudi su mutta sulaļummu Waļe Mawu wuŗru mandaleo tampa na'ukkassa indi!" (²⁹Imangitou nabbisara aroddi ana waugu imangitou suete naasilo si Trofimus taumata n Efesus udde su soa su adio'a ringanni Paulus; wuŗru imangitou massunna manungku Paulus suete nangapiddi tou sinumutta sulaļummu Waļe Mawu.)

³⁰Laļorŗo n soa nassongkakka, wuŗru manambo taumata tinu-maļangga maddulu. Imangitou nanametta si Paulus wuŗru namoļengnga sitou sinumabangnga wuassu Waļe Mawu. Orassa udde lai ngara Waļe Mawu niŗruuda. ³¹Tantaļanna mangangaļiba'ukka udde maddea'a mamate si Paulus, pia taumata namasingkatta su tembonannu tantara n Roma manungku laļorŗo n soa n Yerusalem nassongkakke. ³²Tembonannu tantara n Roma udde lapiddu nangahe sire pira tantara tepelle wuŗru tantara waine see maļiha-ļihakka inai ringanni mangitou su tampa m pabbawuļoanna udde. Napawe taumata nambo udde naasilo piarŗangge wuŗru tantarane, imangitou naddote mamuulla si Paulus. ³³Piarŗangge udde inaita ringanni Paulus see nanametta sitou, wuŗru nandolokku taumata niaparŗapussa sitou. Wua udde piarŗangge naiwaļo su ola'u isai Paulus wuŗru apa apan suete niolangge. ³⁴Sangkawageanganna wuassu taumata nambo udde sinumimbakka arendi, wuŗru sangkawageanganna lai sinumimbakka aroddi. Saŗrene naaļiba'ukke aroddi olangge, na'oma n sara piarŗa'u tantara udde tawe naasingkatta apa apan suete nariaddi. Ana waugu udde itou nandolokka tadea'u Paulus iapidda su tampa mangitou. ³⁵Su tempo imangitou nangapiddi tou sara tuadda, mangangaļiba'ukka udde narŗimpulunna aroddi arŗaginne na'oma n sara Paulus sarun ehetannu manga tantara. ³⁶Imangitou tatantalongannu mangangaļiba'ukka wuassu liudde apan u'ui, "Patete itou!"

Paulus mannahekku watanganne

³⁷Aroddi sumuttate su tampa n tantara, Paulus nabbisara su tembonanne udde, "Wotongge ia'u massinaukka tała ng kadio'a ringanni Tuangnga?"

"I'o wotongge massinaukku Yunani?" aiwało n tembonanne udde. ³⁸"Amungkangngu aroddi i'o wałine taumata n Mesir apan allo naliu ma'ola'a hio see nantalangngu appatu řiwu su atoune mangangaliba'ukka pia ahidde sinumutta su wadda'a?"

³⁹Paulus sinumimbakka, "Ia'u taumata n Yahudi; ia'u tumana'u soa n Tarsus soa ahewałanne su Kilikia. Tułunga'o ia'u pahahattoa'u manga taumata udde."

⁴⁰Ne napawe Paulus niwala mabbisara, Paulus dirumarisikke su tuadda, see namate n limane. Taumata nambo nallannaba. Wua udde Paulus nabbisara simangitou sulałummu wisara n Ibrani. Paulus nabbisara,

22 "Manga iamangnga wuřru manga tuřrangnga sarangkanambone! Ia'u sarun manapputu atatułi'u siamiu. Daringiře'ol!" ²Napawe imangitou naaringikka Paulus nabbisara sulałummu wisara n Ibrani, imangitou lembo nallannaba lai. Ne Paulus nanassute tałaane. ³"Ia'u taumata n Yahudi," unni Paulus, "ia'u niasungkangnga su Tarsus su leta'u Kilikia arawe ia'u niwuwunna isindi su Yerusalem, wuřru niařraanna ringannu ma'uduppa wuassu huru wahewa Gamaliel sulałummu Tita apan nionggolli Musa su iupungngu ałamona ng kite. Ere lai manga tuřrangnga sarangkanambone isindi, allo indi, ia'u lai mařrimadda su manara Mawu Ruata. ⁴Ia'u mammate ma'oma n sara mallałarřrenggennu ałarřra'a wakku udde nate. Imangitou sarangkanambone mapia esakka ara'e lai wawine, ta'u sinametta wuřru tinařro sulałummu tuttupanna. ⁵Imam wahewa sassane wuřru anambo Mallařruungngu Agama wotongge mattiala manungku ia'u tawe mangawusu. Ana wangu ete imangitou udde suete nangonggolu suratta wawało su manga taumata n Yahudi su Damsyik. Ringannu suratta udde ia'u wotongge manametta poiaroddi manga taumata apan mangngimanna ałarřra'a udde wuřru mangapiddi mangitou su Yerusalem iřruumanna."

Paulus nabbatti'u apa apan suete nariaddi sitou

(WMR. 9:1-19, 26:12-18)

⁶"Su tempo ia'u tantałanna su amatanna wuřru maranite n Damsyik, su tempo allattune, sambau semakka apan tumanite masemakka atonna inařrombanganne natuakka wuassu langitta namałiwutta sia'u.

⁷Ia'u narra'a su leta'a see ia'u naaringikka sambau tingikka nabbi-sara sia'u, 'Saulus, Saulus! Anio i'o mandaleo Sia'u?' ⁸See ia'u nai-walo, 'Isai I'o Mawu?' 'Ia'u eteudde Mawu Yesus taumata Nazaret udde apan raddaleoannu,' sasimbakke. ⁹Manga taumata isudde sua-dio'a ringanku naasilo semakka udde arawe imangitou tawe naaring-ikka tingikka apan nabbisara sia'u. ¹⁰See ia'u naiwalo apia, 'Apa rinone ta'u olaanna Mawu?' Mawu sinumimbakka, 'Darisikke wufru roote su Damsyik. Poiaroddi i'o sarun pasingkatanna su ola'u apa apan ipaapulu Mawu Ruata sarun olaannu.' ¹¹Ia'u nawuta ana waugu semakka apan ma'angitta udde. Nariaddi manga hawe'u nangehetta sia'u sinumutta su Damsyik.

¹²Isudde pia sangkatou aranne Ananias. Itou sangkatou apan susi wufru matufru'tta mappaamattu Tita n Musa. Anambo n taumata n Yahudi apan uatana'a su Damsyik mangngaddatta sitou. ¹³Itou nirumanta nattembo sia'u, see nirumarisikka su sandirrangku wufru nabbisara, 'Tufrangku Saulus, rinone i'o maasilo apia!' Orassa udde lai ia'u tinumagekka see naasilo sitou. ¹⁴Wua udde itou nabbisara sia'u, 'Mawu Ruata iupungngu alamona ng kite suete namile si'o, tadea'u i'o maasingkatta pandumme wufru maasilo Mawu Yesus, Allangngu Mawu Ruata apan nanipussa apulu Mawu Ruata see madaringikka tingikku Mawu Yesus sassane. ¹⁵I'o sarun maola'a darolo'franna mammasingkatta su anambo n taumata apa apan suete niasiloannu wufru niaringifranu. ¹⁶Orassa indi ariete i'o marrado ma'annu. Darisikke wufru paisarfanite. Sa'landete su Mawu tadea'u i'o iapaalju wuassu manga rosanu.'"

Mawu Ruata nandolokki Paulus massinaukka su saruannu pabbawalaga waine apan waline Yahudi

¹⁷"Ia'u nabelengnga watukku Yerusalem, wufru napawe ia'u u'aliomanna su Wale Mawu, ia'u niintarfoannu Gharraho Mawu Ruata. ¹⁸Ia'u naasilo Mawu; Itou nabbisara sia'u, 'Paalihakke manantangngu Yerusalem, ana waugu manga taumata isindi tawe madaring-ikka tatialanu su ola'u riri-U.' ¹⁹Ia'u nabbisara, 'Mawu, imangitou ma-singkatta atonna manungku ia'u suete sinumutta su manga wale m pattatarramawuanna maddea'a manametta simangitou wufru mamuulla manga taumata apan mangngimanna Si'o. ²⁰Aroddi lai napawe matatia-lanu Stefanus nipate, ia'u sassane isudde, wufru ia'u lai inumire su ola'u pamamate udde. Ewe'e ete ia'u lai uariaga laubbu manga taumata apan namate sitou.' ²¹Arawe Mawu nabbisara apia lai sia'u, 'Roote, ana waugu Ia'u sarun mandolokku inai su tampa apan marau ringannu manga taumata apan waline Yahudi.'"

²²Manga taumata ta'e sidutu uararingikka si Paulus mabbisara, arawe su wisara apan pangudusanne imangitou inumui ma'ikkatta, "Pate taumata ereudde. Tawe rinone itou mabbiakka!" ²³Lapiddu u'ui imangitou mangngalabbu paliwungngi mangitou wuṛṛu mannongkakku awu waturukku winalanganna. ²⁴Ne tembonannu tantara n Roma namarenta, tadea'u Paulus iapidda su tampa mangitou, tadea'u itou parikisanna isudde ringannu araragissa see asingkatanna anio manga taumata n Yahudi u'ui aroddi sitou. ²⁵Arawe su tempo Paulus rarapusanante wuṛṛu suete nipuulla, Paulus nabbisara su tembonannu tantara apan uarisikka isudde, "Apa wotongnge mamuulla sangkatou tumana'u araratuannu Roma, tantala'anna itou taambe niparikisanna?"

²⁶Naaringikka udde, piarra'u tantara udde inaite ringannu tembonannu tantara wuṛṛu nabbisara, "Apa sarun olaanni ite lamangnga? Taumata indi tumana'u araratuannu Roma!"

²⁷Ne tembonannu tantara udde inaite ringanni Paulus wuṛṛu naiwaḷo, "Waḷoa'e siami, atonna i'o tumana'u araratuannu Roma!"

"Ore," sasimbakki Paulus, ia'u tumana'u araratuannu Roma. ²⁸Tembonanne udde nabbisara apia, "Ia'u naola'a tumana'u Roma ringannu namaekka tumanite manambo!"

Paulus sinumimbakka, "Arawe ia'u niasungkangnga naola'a sangkatou tumana'u araratuannu Roma." ²⁹Orassa udde lai manga tantara apan mamarikissa si Paulus udde, sinumorrota, wuṛṛu tembonanne udde nata'utta ana waugu itou suete narapussa si Paulus, sumbaḷi Paulus tumana'u araratuannu Roma.

Paulus su saruannu Mallaṛṛuungngu Agama

³⁰Tembonannu tantara n Roma udde mangke maapulu maasingkatta anio taumata n Yahudi mapaasaḷa m Paulus. Ana waugu udde tirabbine itou namaggo manga imam tembonanne, wuṛṛu Mallaṛṛuungngu Agama maammula. See Paulus nipallose wuassu mantungge, wua udde niapidda sinumaruanna simangitou sarangkanambone.

23 Paulus nanutudda manga mallaṛṛuungnga udde see nabbisara, "Manga tuṛṛangku! Na'oma n sara allo indi ia'u tawe naependamma saḷa su saruannu Mawu Ruata sulalummu naungku su ola'u ia'u mabbiakka." ²Su tempo Paulus nabbisara aroddi, Imam Wahewa Ananias nandolokku taumata apan uarisikka su sandiranni Paulus niapapero morrongngi Paulus. ³Ne Paulus nabbisara imam wahewa udde, "Mawu Ruata sarun mamero si'o, taumata lilangkamaḷe'a apan ma'iellega na'ukkassa! I'o uaianna isudde mamarikissa sia'u

tumuṛṛuttu Tita n Musa, wutte'e i'o sassane nilumawangnga Tita udde ringannu nandolokku taumata niapapero sia'u!"

⁴Manga taumata su sandiṛṛanni Paulus nabbisara si Paulus, "I'o mangngadio'a imam wahewa Mawu Ruata!" ⁵Paulus sinumimbakka, "Oh, ia'u wagga, manga tuṛrangnga, manungku itou imam wahewa. Atonna sulaḷummu Wuke Susi pia uawoṛṛetta, 'Imbaṛrangnga i'o mangngadio'a piaṛṛa'u pabbawalagu."

⁶Paulus naasilo manungku sambageanganna wuassu mallarṛuungnga udde taumata n Saduki, wuṛṛu sambageanganna lai taumata n Farisi. Ana waugu udde itou nabbisara su manga mallarṛuungnga udde, "Manga tuṛrangnga! Ia'u sangkatou taumata pabbawalagu taumata n Farisi. Ia'u niparikisanna isindi ana waugu ia'u mangngimanna manungku manga taumata nate sarun mabbiakka apia." ⁷Napawe itou nabbisara aroddi, manga taumata n Farisi wuṛṛu manga taumata n Saduki nanattakke uatatiakka, na'oma n sara ṛa'iana udde napesangnga natahia rua ng kawageanganna. (⁸Ana waugu manga taumata n Saduki pia addapanne manungku taumata nate tate mabbiakka apia, manungku tawe mala'ekatta, wuṛṛu tawe lai manga ghaṛṛaho, arawe manga taumata n Farisi mangngimanna sarangkanambone udde.) ⁹Ne nariaddite hio wahewa. Manga pira taumata n Farisi apan naola'a huru n agama dirumarisikka wuṛṛu nanompolla. Imangitou nabbisara, "Tumuṛṛutta siami, taumata indi tawe saḷane saran adio'a! Asinungka pia ghaṛṛaho ara'e mala'ekatta apan mabbisara sitou!"

¹⁰Patatatiakka udde naola'a aroddi ahewalle na'oma n sara piaṛrangnge udde nata'utta, aṛṛengenne Paulus ṛimpulananni mangitou. Nariaddi itou nandolokku tantarane inai mangalappa si Paulus wuassu pattangngannu manga taumata udde see niapidda su tampa mangitou.

¹¹Rabbi nanansunna, Mawu Yesus nirumarisikka su sandiṛṛanni Paulus wuṛṛu nabbisara, "Paatohassa naunggu! I'o suete nattiala su ola'u riri-U su Yerusalem. I'o ṛinone lai mabatti'u udde su Roma."

Ammuḷannu taumata mamate si Paulus

¹²Tiṛṛabbine ruaallo atonna, manga taumata n Yahudi, nanattakke maammula. Imangitou nassalu tawe umanna ara'e ma'inumma amungkangngu imangitou taambe naapate si Paulus. ¹³Appatu puḷo pia lebbene taumata apan uaammulla isudde. ¹⁴Imangitou inaitte ringannu manga imam tembonanne wuṛṛu manga piaṛṛa'u Yahudi lapiddu nabbisara, "Iami suete nassalu suadio'a, tawe umanna wuṛṛu ma'inumma saran adio'a amungkangngu iami taambe naapate si Paulus. ¹⁵Ne orassa indi manga tuṛrangnga ringannu manga Mallarṛuungngu Agama ṛinone

mapaapiddu suratta su tembonannu tantara n Roma udde ipadorongnga itou mangapiddi Paulus mabelengnga sumaruanna siamiu, paṛṛimau napa iamiu mamarikissa apia hattone ringannu ma'uduppa. Wuṛṛu iamiasasadiate mamate sitou tantaḷanna itou taambe na'oma isindi."

¹⁶Arawe ana'u wawine m Paulus naaringikka pandumanni mangitou udde. Ne itou inaitte su tampa n tantara wuṛṛu namasingkattu watti'a udde si Paulus. ¹⁷See Paulus namaggo sangkatou piaṛṛangge wuṛṛu nabbisara sitou. "Apira'a ana'a umbasanna indi su tembonanne; itou pia apa iwaḷo sitou." ¹⁸Piaṛṛa'u tantara udde nangapiddu ana'a umbasanna udde su tembonanne wuṛṛu nabbisara sitou, "Paulus taumata tataṛṛanganna udde, namaggo sia'u wuṛṛu nudorongnga tadea'u ia'u mangapiddu ana'a umbasanna indi si Tuangnga; itou piaddu iwaḷo."

¹⁹Tembonanne udde nangagassa lima ng kana'a umbasanna udde, see nangapiddi tou sassane su sandiṛṛanne wuṛṛu naiwaḷo, "I'o mabatti'u apa sia'u?"

²⁰Ana'a umbasanna udde sinumimbakka, "Manga taumata n Yahudi suete na'ire madorongnga si Tuangnga mangapiddi Paulus sumaruanna Mallarṛuungngu Agama tiṛṛabbi, paṛṛimau napa imangitou mamarikissa apia hattone ringannu ma'uduppa. ²¹Arawe arie Tuangnga madaringikka darorongngi mangitou udde, ana waugu appatu puḷo pia lebene taumata apan tantaḷanna uaimbuni mangampangnga sitou su laḷanna. Imangitou sarangkanambone suete nassalu tawe umanna wuṛṛu ma'inumma amungkangngu imangitou taambe naapate si Paulus. Orassa indi imangitou nasaddiate; ete uaraṛṛaddo sasimbakki Tuangnga." ²²Tembonannu tantara udde nabbisara, "Arie pabbaḷoa'a sisai-sai manungku i'o suete nangalae sia'u." See itou nandolokku ana'a umbasanna udde niapaapuḷe.

Paulus niuntudda si Feliks

²³Wua udde tembonannu tantara udde namago rua ng katou piaṛṛa'u tantara, ana see itou nabbisara sitarua, "Saddiaite rua ṛasutta tantara suadio'a ringannu pitu m puḷo tantara uasa'e awaḷo wuṛṛu rua ṛasutta tantara pia sambeangge ana see inaitte amatta puulla sio ṛabbi indi lai watukku Kaisarea. ²⁴Saddiaite lai awaḷo sa'eanni Paulus wuṛṛu apira'e itou ringannu saḷamatta ma'oma su waḷe Gubernure Feliks." ²⁵See tembonannu tantara udde namoṛṛetu suratta tingikke ereindi,

²⁶"Apan awantuhanne Gubernure Feliks. Tabea wuassi Klaudius Lisias! ²⁷Taumata indi suete sinamettu manga taumata n Yahudi wuṛṛu ete adio'a pateanni mangitou, amungkangngu ia'u tawe nirumanta ringannu tantara'u wuṛṛu nanaḷamatta sitou; ana waugu ia'u naaringikka

manungku itou tumana'u araratuannu Roma. ²⁸Ana waugu ia'u maapulu maasingkata apa pasasałane apan iaansili mangitou sitou, ne ia'u nangapiddi tou su Mallařruungngu Agama mangitou. ²⁹Ne nasemakke itou tawe pasasał apan wotongnge maarřuumanna sitou ringannu řuumanna pateanna ara'e itarřo su tuttuřanna. Alae mangitou tumba'u ana waugu tita n agama mangitou sassane. ³⁰Wua udde ia'u niwałoanna manungku pia ire lałeo wuassu manga taumata n Yahudi sitou. Ana waugu udde ia'u napa'untudi tou ringanni Tuangnga Gubernure. Wuřru ia'u suete nandolokku mangangalaene mangapiddu alae mangitou si Tuangnga."

³¹Ne manga tantara udde napaamate manara mangitou. Imangitou nangałappa si Paulus see nangapiddi tou řabbi udde lai na'oma n sara su Antiparis. ³²Tiřrabbine imangitou namalate n tantara apan uasa'e awało manassu amatanne ringanni Paulus, wuřru imangitou nabelengke su tampa mangitou. ³³Napawe tantara uasa'e awało udde na'omate su Kaisarea, imangitou nangonggolu suratta udde su gubernure, see Paulus tinantilla sitou. ³⁴Napawe gubernure suete nabbasa n suratta udde, itou naiwało si Paulus wuassu apa darantane. Napawe itou naasingkatta manungku Paulus wuassu Kilikia, ³⁵itou nabbisara, "Aplane! Ia'ute mamarikissa hattonu, amungkangngu manga taumata apan nangalaenu na'omate isindi." See itou namarenta tadea'u Paulus tarřanganna su-lałummu wałe n araratuanni Herodes.

Paulus nialae manga taumata n Yahudi

24 Lima allo wua udde, Imam Wahewa Ananias wuřru manga piařra'u Yahudi inaite watukku Kaisarea uaapiddu sangkatou mangangatokku hatto aranne Tertulus. Imangitou sinumaruanna si Gubernure Feliks wuřru nangalae m Paulus. ²Napawe Tertulus niwagoanna su saruanna, itou mangngansilla si Paulus arendi,

"Tuangnga Gubernure Apan Mawantuga! Sulałummu piařra'i Tuangnga wanua ng kami tawe gione. Wuřru ana waugu apapande n Tuangnga lai manambo apapia apan suete niola'i Tuangnga su pabbawalagi ami. ³Sarangkanambone udde mangke sassałohoanni ami ringannu aadiangkamanna wuřru aaddatta apan nangillembu su aławo'u tampa. ⁴Arawe tadea'u tawe manggolo'a tempo n Tuangnga manambo, ia'u madorongnga amungkangngu wotongnge Tuangnga madingikka aalae ng kami apan maautta indi. ⁵Niasombanganni ami taumata indi mangangaliba'ukka apan maasilaka. Su aławo'u tampa itou ma'ola'a hio su wallattu manga taumata n Yahudi wuřru itou naola'a piařra'u pandumannu manga taumata Nazaret. ⁶Ewe'e itou lai suete naannamma

nandaŕeo arannu Waŕe Mawu, arawe iami nanametta sitou. [Iami mapandumma mamarikissa sitou tumuŕuttu tita n agama ng kami sassane. ⁷Arawe tembonannu tantara Lisias nangaŕro sitou wuassi ami, ⁸wuŕru namarenta tadea'u mangangalaene sumaruanna si Tuangnga.] Amungkangngu Tuangnga mamarikissa taumata indi, Tuangnga sassane sarun madaringikka wuassi tou manungku atonna sarangkanambone apan ipangngalae ng kami sitou." ⁹Manga taumata n Yahudi tinumantalongnga lai nangalae m Paulus wuŕru nangngimante aŕawo'u wisara apan niwisara n Tertulus.

Paulus nanahekku watanganne su saruanni Feliks

¹⁰see gubernure udde nangonggolu tempo si Paulus, manungku itou wotongnge massinaukka. Ne Paulus nabbisarate, "Ia'u masingkatta Tuangnga naola'a mallaruungnga su wanua indi pirate tonna aŕannune. Ana wangu udde ia'u lulluassa mamasingkattu watti'a indi su saruanni Tuangnga. ¹¹Tuangnga wotongnge manarassida sassane manungku tawe nilumebbe wuassu mapuŕo. dua su allone naŕiu ia'u nirumanta su Yerusalem umaŕiomanna. ¹²Wuŕru tawe saran paassa manga taumata n Yahudi udde naaratingnga sia'u uatatiakka ringannu sangkatou, ara'e nangammullu taumata ana mangaliba'ukka, mapia su Waŕe Mawu, ara'e su waŕe m pattataŕramawuanna ara'e su aŕawo'u tanpa sulaŕummu soa. ¹³Imangitou lai tawe maasemakka manga alae mangitou si Tuangnga su ala'u watanganku. ¹⁴Atonna ŕinone ia'u manga'u si Tuangnga manungku ia'u massubba Mawu Ruata n iupungngu aŕamona ng kami tumuŕuttu aŕaŕra'u Mawu Yesus apan sassunnanni mangitou nassaŕa. Arawe ia'u ta'e mangngimanna sarangkanambone apan uawoŕretta sulaŕummu Wuke Musa wuŕru Wuke Manga Nabi. ¹⁵Ere lai imangitou, ia'u lai pia antimma su Mawu Ruata manungku anambo n taumata sarun mabbiakka apia wuassu papate – taumata mapia, ara'e lai taumata laŕeo! ¹⁶Ana wangu udde ia'u sidutu ma'ola'a apapia, tadea'u naungku waresi su saruannu Mawu Ruata wuŕru waresi su saruannu taumata.

¹⁷Napawe pirate tonna tawe uatana'a su Yerusalem, ia'u nabelengke apia su Yerusalem nangapiddu sasumbala roitta su pabbawala'u wuŕru nangapiddu aonggolla sasamba su Mawu Ruata. ¹⁸Su tempo ia'u tantaŕanna mammanara udde, imangitou naaratingnga sia'u su Waŕe Mawu, napawe ia'u suete nallaghu m pangangukasa wadangnga. Tawe taumata nambo isudde ringanku, wuŕru tawe pagahahio lai su tempo udde. ¹⁹Tumba'u pia sire pira taumata n Yahudi wuassu leta'u Asia. Ete imangitou ŕinone mangapiddu alae mangitou si Tuangnga isindi, amungkangngu imangitou piaddu ipangalae'u. ²⁰Ara'e wala'e manga taumata

indi sassane mangalae n ałaleo apa apan niasombanganni mangitou sia'u su tempo ia'u niapaasaruanna Mallarungu Agama. ²¹Niaringiranni mangitou tumba'u wisara sampaddi indi apan niwisara'u su saruanni mangitou eteudde: Ia'u niparikisanna allo indi ana waugu ia'u mangngimanna manungku manga taumata nate sarun iapaawiakka apia."

²²See Feliks apan naasingkate manambo ałarra'u Mawu Yesus, nanguddussu ammulanna udde. "Ia'u sarun manguddussu hatto indi," unni tou, "amungkanggu tembonanu tantara Lisias nirumantate." ²³See itou nandolokku piarra'u tantara apan uariaga si Paulus udde, tadea'u sidutu uatarangnga si Paulus, arawe ringannu nangonggolu loakke adio'a sitou wurru namala manga hawene mangonggolu hausanna apan ipaapulune.

Paulus su saruanni Feliks wurru Drusila

²⁴Manga pira allo wua udde, Feliks nirumanta raringanannu awingenge aranne Drusila; itou sangkatou taumata n Yahudi. See Feliks nandolokku taumata niapaalappa si Paulus, wua udde Feliks nadaringikka si Paulus nassinaukka su ola'u pangangimanna si Kristus Yesus. ²⁵Arawe napawe Paulus nanassute wisarane su ola'u atatuidda wurru asasabare wurru su ola'u pallaaruumanna su allo ng kiamatta, Feliks nata'utta see nabbisara, "I'o wotonggete mapule orassa indi. Ia'u sarun mamago si'o apia amungkanggu pia tempone." ²⁶Tantalanna udde Feliks pia antimma sarun maasomba roitta wuassi Paulus. Ana waugu udde itou masokka mandolokku taumata mangaalappa si Paulus magahahatto n tou.

²⁷Napawe daruate tonna, Perkius Festus nallosa si Feliks naola'a gubernure. Wurru ana waugu Feliks maapulu massa'o'u naungngu manga taumata n Yahudi, itou namala m Paulus sula'ummu tuttupanna.

Paulus maapulu maggatto apia su tembonanne atanggaranne

25 Tallu allo napawe Festus na'omate su wanua udde, itou inaito wuassu Kaisarea watukku Yerusalem. ²Poiaroddi manga imam tembonanne wurru manga piarra'u Yahudi nangalae si Festus alae mangitou su ola'i Paulus. Imangitou sidutu massa'oi Festus ³tadea'u wuassu apapia naungnge simangitou, itou mandolokku taumata mangapididi Paulus watukku Yerusalem; ana waugu imangitou suete na'ire mamate sitou su tangnga n dalanna. ⁴Arawe Festus sinumimbakka, "Paulus tantalanna tataranganna su Kaisarea; wurru ia'u sa-

ssane lai tate maļannu mabelengnga poiaronddi. ⁵Nariaddi wala'e manga taumata papunnane su wallatti amiu inai suadio'a ringangku watukku Kaisarea wuŗŗu magahatto poiaronddi, amungkangngu itou suete na'ola'a sambau pasasaļa."'

⁶Napawe suete natana'a su Yerusalem irarŗangngo ualūte ara'e mapuļo allo lai, Festus nabelengke watukku Kaisarea. Tiŗŗabbine itou na'ola'a ammulu mamamarikissa wuŗŗu nandolokka tadea'u Paulus aļapanna iapaasaruanna sitou. ⁷Napawe Paulus na'omate, manga taumata n Yahudi apan nirumantate su Yerusalem dirumarisikka namalūiwutta sitou, wuŗŗu nanattakke mangngalae alae apan mawakkata su ola'i tou. Arawe imangitou tawe maasemakka manga alae udde. ⁸Sulaļummu sasinaukke, Paulus nabbisara, "Ia'u tawe inolaanna apan nassaļa su saruannu Tita Musa ara'e su saruannu Waļe Mawu ara'e su saruannu Kaisar Roma."

⁹Arawe Festus maapulu massaļo'u taumata n Yahudi. Ne itou naiwaļo si Paulus, "To maapulu inai watukku Yerusalem parikisanna poiaronddi su saruangu su ola'u manga alae indi?"

¹⁰Paulus sinumimbakka, "Ia'u tantaļanna uarisikka su saruannu mallaŗŗuungngu Kaisar Roma; wuŗŗu ete su tampa udde ia'u sarun parikisanna. Tuangnga sassane masingkatta manungku ia'u tawe saļa su saruannu mąnga taumata n Yahudi. ¹¹Amungkangngu ia'u suete nilumawangnga tita wuŗŗu ma'ola'a inolaanna apan maarŗuumanna ma'oma n sara pateanna, ia'u maļuassa pateanna. Arawe amungkangngu alae mangitou udde awusu, tawe saran sangkatou wotongnge manantillu riri'u simangitou. Ia'u madorongnga parikisanna su saruannu mallaŗŗuungngu Kaisar!"

¹²Napawe suete na'ire ringannu manga mananantirone, Festus nabbisara, "To madorongnga parikisanna su saruannu mallaŗŗuungngu Kaisar, nariaddi i'o řinone inai sumaruanna Kaisar."

Paulus su saruanni Agripa wuŗŗu Bernike

¹³Tawe naļannu wua udde, Ratu Agripa wuŗŗu Bernike nirumanta su Kaisarea mabaļo n tabea si Festus. ¹⁴Napawe imangitou uatana'e isudde manga pira allo, i Festus nanaļa'a n hatto m Paulus si Agripa. Festus nabbisara, "Isindi pia sangkatou taumata tataŗŗanganna apan tinantanggi Feliks. ¹⁵Su tempo ia'u su Yerusalem, manga imam tembonanne wuŗŗu manga piaŗŗa'u Yahudi nangalae n taumata udde wuŗŗu madorongnga tadea'u ia'u marŗuumanni tou. ¹⁶Arawe ia'u sinumimbakka manungku taumata n Roma tawe wotongnge manantillu taumata iwala aroddi iapaŗŗuumanna, amungkangngu isai nialae taambe

nasasaruanu mangangalaene wuṛṛu massinaukka manahekku ririne. ¹⁷Nariaddi su tempo imangitou nirumanta isindi, ia'u tawe naṛṛado maḷannu lai. Tiṛṛabbine ia'u lapiddu na'ola'a ammuḷannu mamamari-kissa wuṛṛu nandolokka tadea'u taumata udde iapidda su maruanna sia'u. ¹⁸Napawe mangangalae udde dirumarisikka mangngapiddu aalae mangitou, imangitou tawe napaasingkattu saran sambau aḷaḷeone ere ta'u sassunnanna apan iaalae mangitou. ¹⁹Imangitou tumba'u nassaḷa sunna ringanni tou su ola'u agama mangitou sassane wuṛṛu su ola'u sangkatou apan aranne Mawu Yesus. Taumata udde natete, arawe Paulus mangke mannohassu pangangimanne manungku taumata udde wiakka. ²⁰Ana waugu ia'u nialiḷuwane su ola'u ereapa ia'u wotongnge maasomba sasimbakku manga hatto udde, ia'u naiwaḷo si Paulus, apa itou inai lai watukku Yerusalem wuṛṛu hattone parikisanna poiaronddi. ²¹Arawe Paulus nadorongnga tadea'u hattone parikisannu mamamarikissa atangaṛṛanne, itou madorongnga tadea'u itou sidutu tataṛṛanganna, ma'oma n sara hattone iṛṛawessu Kaisar. Ana waugu udde ia'u namarenta tadea'u itou sidutu tataṛṛanganna, ma'oma n sara ia'u pia tempone manguntudi tou ringannu Kaisar." ²²See Agripa nabbi-sara si Festus, "Ia'u sassane lai maapulu madaringikka taumata uddē." "Tiṛṛabbi Tuangnga wotongnge madaringikka sitou," sasimbakki Festus.

²³Tiṛṛabbine Agripa wuṛṛu Bernike nirumanta ringannu laḷaghu n awawantuga. Imangitou sinumutta su tampa m pamarikisanna suadio'a ringannu manga ahewaḷannu tantara wuṛṛu manga papunna su soa udde. Wuassu parenta m Festus, Paulus niapasuttate. ²⁴See Festus nabbisara, "Tuangnga Agripa wuṛṛu sarangkanambone apan uaammulla! Taumata indi suete nialae manga taumata n Yahudi sia'u, mapia su Yerusalem ara'e lai isindi. Imangitou nadorongnga ringannu u'ui manungku itou tawe wotongnge iwala wiakka. ²⁵Arawe ia'u tawe naasomba saran sambau inolaanne apan wotongnge maṛṛuumanna sitou ma'oma n sara pateanna. Wuṛṛu ana waugu itou sassane nadorongnga hattone parikisanna ringannu Kaisar, ia'u naṛṛawessa mangipiddi tou ringannu Kaisar. ²⁶Arawe ia'u taambe naasomba sasimbakka apan masemakka su ririne see ia'u maapamoṛṛettu suratta si Kaisar. Ana waugu udde ia'u napaasaruanni tou si Tuangnga sarangkanambone, nangillembo apan awantuhanne Tuangnga Agripa! Pandumangu eteudde tadea'u napawe nasuete pamamarikissa indi, ia'u piaddu iwoṛṛeta. ²⁷Ana waugu tumuṛṛuttu apulu'u, tawe ṛinone mapaapiddu sangkatou taumata n ruumanna ringannu tawe asingkatanna pasasaḷane apan niola'i tou."

Paulus nanahekku watanganne su saruanni Agripa

26 Agripa nabbisara si Paulus, "I'o iwala massinaukka manahekku watanganu." Ne Paulus namatte n limane see nassinaukka ereindi,

²"Wabbantuhanna Tuangnga Agripa! Ia'u mangke lulluassa ana waugu ia'u wotongnge maasinaukka su saruanni Tuangnga su ola'u aławo'u alae manga taumata n Yahudi marria'a su riri'u, ³nipangillembo lai ana waugu Tuangnga masingkatta atonna addatta inanaramanna wuŗru manga hatto n taumata n Yahudi. Ana waugu udde ia'u sumalande tadea'u Tuangnga madaringikka ringannu sabare ia'u manaļa'a.

⁴Anambo n taumata n Yahudi masingkatta ereapa ia'u mabbiakka ro'e n ia'u ta'e umbasanna. Imangitou masingkatta manungku ro'e n ia'u umbasanna, ia'u mabbiakka su wallattu manga pabbawala'u sassane su Yerusalem. ⁵Maļannute imangitou masingka'u. Wuŗru imangitou maapulu, imangitou wotongnge mabatti'a manungku ro'e n paarorone ia'u mabbiakka ere sangkatou taumata m Farisi ringannu tuttuŗrutta aławo'u atoranna apan tawe aļiuanna sulaļummu agama ng kami. ⁶Wuŗru orassa indi ia'u uarisikka isindi parikisanna ana waugu ia'u mangngimanna paaire apan niola'u Mawu Ruata su ipunggu aļamona ng kami. ⁷Ete paaire udde lai apan aantimannu sire mapuļo dua pabbawalagu Israel, na'oma n sara imangitou mangke mattarŗa mawu Mawu Ruata allo wuŗru rabbi. Wuŗru ana waugu ia'u mangngimanna paaire udde, Tuangnga apan mawantuga, ia'u niapaasaļa manga taumata n Yahudi. ⁸Anio manga tuŗrangnga manga taumata n Yahudi tawe mangngimanna manungku Mawu Ruata mapaawiakku taumata nate apia?

⁹Dorone ia'u sassane lai pia addapatta manungku ia'u řinone ma'ola'a manga aławo'a ipanaļare Mawu Yesus wuassu Nazaret udde. ¹⁰Wuŗru atonna inolaanna udde suete ta'u niola'a su Yerusalem. Ringannu suratta tarřino wuassu manga imam tembonanne, ia'u suete nantarŗo manambo taumata apan matuŗrutta Mawu Ruata su tuttuŗrutta. Ewe'e ia'u lai inumire manungku imangitou řinone pateanna. ¹¹Masokka ia'u manansara simangitou su waļe m pattatarŗamawuanna, tadea'u mamata'i mangitou massinaaddu apa apan pangngimananni mangitou. Aroddi aļosone naungku simangitou, na'oma n sara watukku manga soa waine lai, ia'u sarun inai mangenggenna simangitou poiardo.

Paulus nabbatti'u apa apan suete nariaddi sitou

(WMR. 9:1-19, 22:6-16)

¹²"Ringannu pandumma udde lai ia'u nangapiddu surattu tarrino wuassu manga imam tembonanne wuṛṛu inaite watukku Damsyik. ¹³Wuṛṛu su tempo ia'u su tangnga n daḷanna, su tempo allattune, Tuangnga apan mawantuga, ia'u naasilo sambau semakka wuassu langitta, apan semakke massemaṛṛanna wuassu matannallo. Semakka udde natuakka namaliwutta sia'u wuṛṛu manga taumata apan u'amatta suadio'a ringanku. ¹⁴Iami sarangkanambone narra'a su leta'a. See ia'u naaringikka tingikka nabbisara sia'u sulaḷummu wisara n Ibrani, 'Saulus, Saulus! Anio i'o mangke mandaḷeo Sia'u! I'o sarun maapendamma sassane raddanggu, amungkanggu i'o sidutu lullawanga piaṛṛa'i Tou apan naola'a Mawunu.' ¹⁵Ne ia'u nabbisara, 'Isai I'o Mawu?' Wuṛṛu Mawu sinumimbakka, 'Ete Ia'u Mawu Yesu apan raddaḷeoannu udde. ¹⁶Pabbangunte wuṛṛu darisikke! Ia'u nattingkapasilo m batangang-Ku si'o pandumanne i'o Ta'u itenega maola'a mangangimbe-U. I'o rinone mamasingkatta su taumata waine apa apan niasiloannu allo indi su ola'u riri-U wuṛṛu apa apan sarun ipantingidda si'o su tempo apan sarun rumananta. ¹⁷Ia'u sarun mapaaljunu wuassu pabbawalagu Israel wuṛṛu wuassu pabbawalaga waine apan waḷine Yahudi. Ia'u sarun mandolokku inai ringanni mangitou iapawu'a mata mangitou, ¹⁸tadea'u imangitou sumabangnga wuassu ararandumma wuṛṛu sumutta su asasamakka; tadea'u imangitou maḷiu wuassu wawono'u Setanna, see mangngimante Mawu Ruata. Ne ringannu mangngimanna sia'u, manga rosa mangitou sarun ampunganna wuṛṛu imangitou sarun mareengnga su pabbawalagu Mawu Ruata apan suete nipile.'"

Paulus nanaḷa'a manarane

¹⁹"Ana waugu udde, Tuangnga Agripa, ia'u sidutu mattinsahadda tuttuṛṛutta sondappa apan suete ta'u nisengkamma wuassu Mawu Ruata udde. ²⁰Ringannu uahahatti ia'u namasingkatta su manga taumata manungku imangitou rinone mawaḷu wuassu manga rosa mangitou, wuṛṛu manantillu wadangngi mangitou su Mawu Ruata see lumiatta'a sulaḷummu wiakki mangitou manungku imangitou nawaḷute wuassu manga rosa mangitou. Ia'u namasingkattu watti'a udde paarorone su Damsyik, wua udde su Yerusalem wuṛṛu su ahewallu Yudea wuṛṛu su wallattu manga taumata apan waḷine Yahudi. ²¹Ne ana waugu udde manga taumata n Yahudi nanametta sia'u su Waḷe Mawu wuṛṛu madda'a mamate sia'u. ²²Arawe na'oma n sara orassa indi ia'u mangke

su lu'addu Mawu Ruata, na'oma n sara lai ia'u wotongnge dirumarisikka isindi mangonggolu tiala'u su anambo n taumata - timmade ara'e dario'a. Apa apan iwabatti'u indi tawe paŕŕalane wuassu apa apan suete niapasingkattu manga nabi wuŕŕu Musa; ²³eteudde manungku Ratu m Punnu Saŕamatta apan pina'ire Mawu Ruata udde ŕinone matataŕrangnga, wuŕŕu maola'a taumata paarorone apan mabbiaikka apia wuassu papate, tadea'u ringannu udde Itou wotongnge mamasingkattu asasemakka - eteudde asasaŕamatta - mapia su manga taumata n Yahudi aroddi lai su manga taumata apan waŕine Yahudi."

²⁴Tantaŕanna Paulus massinaukka, Festus niuumi, "I'o nabewate Paulus! Apapandenu apan manambo udde naawewate si'o!" ²⁵Arawe Paulus sinumimbakka, "Ia'u tawe wewa, Awantuhanne. Manga wisara apan iwabbisara'u udde atonna wuŕŕu sinumabangnga wuassu ringiŕŕanna apan masemakka. ²⁶Tuangnga Agripa sassane lai masingkattu manga hatto udde. Ana waugu udde ia'u waŕŕani mabbisara su saruanni Tuangnga ringannu masema-semakka. Ia'u mangngimanna manungku tawe saran sangkapaddi wuassu hatto udde apan awagananni Tuangnga, ana waugu sarangkanambone udde tawe nariaddi su manga tampa apan uawuni. ²⁷Wabantuhanna Tuangnga Agripa, apa Tuangnga mangngimanna wisara apan niapaasingkattu manga nabi? Ia'u mamendamma Tuangnga lai mangngimanna!"

²⁸See Agripa nabbisara si Paulus, "Sunnanu maŕuassa mamoleŕngnga sia'u maola'a taumata n Saŕŕani sulaŕummu tempo adio'a indi?" ²⁹"Sulaŕummu tempo adio'a ara'e sulaŕummu tempo maŕo'engnga," samsimbakki Paulus, "Ia'u umaliomanna su Mawu Ruata tadea'u Tuangnga Agripa wuŕŕu manga mawu sarangkanambone apan uararingikka sia'u allo indi wotongnge maola'a ere ia'u - tabene'e tumba'u ŕaŕrapussa indi!"

³⁰Panginsueanne tuangnga ratu, gubernure wuŕŕu Bernike, see anambo n taumata waine dirumarisikka. ³¹Napawe su liuddete, imangitou uahahatto sangkatou ringannu waine, "Taumata indi tawe inolaanne saran sambau apan wotongnge maarŕuumanna sitou pateanna ara'e itaŕŕo su tuttuŕanna." ³²See Agripa nabbisara si Festus, "Taumata indi wotongnete ipallōsa, amungkangngu itou tate manassu hattone parisanna su mallarŕuungngu Kaiser."

Paulus nassenggotta watukku Roma

27 Napawe narŕawesse manungku iami inaitte massenggotta watukku Italia, Paulus wuŕŕu manga pira taumata apan tataŕranganna waine tinantilla si Yulius, piaŕŕa'u tantara n Roma apan isassago lai "Tantara n Kaiser". ²Iami sinuma'ete su apalla apan nirumanta wua-

ssu Adramitium, wua udde sinuma'ete apalla udde apan nasaddiate massenggota watukku manga tatuļianna su leta'u Asia. Aristarkhus, sangkatou taumata n Makedonia apan nirumanta wuassu Tesalonika nassenggote lai suadio'a ringanni ami. ³Tiřřabbine iami na'omate su Sidon. Paulus papaduļiananni Yulius ringannu mapia. Itou niwala mattembo manga hawene tadea'u imangitou wotongnge mangonggolu sarannapa apan pappandumanne. ⁴Wua isudde iami nanassute pasasenggotti ami. Ana waugu uasomakka anginna, iami nassenggotta rudurukka apannu tařřanusa n Siprus apan tawe ařřinoannu anginna. ⁵Wua udde iami namarete tahaļoangnga apan uasaruanna Kilikia wuřřu Pamfilia see na'omate su Mira su wanua Likia. ⁶Isudde piařřa'u tantara udde naasomba sambau apalla wuassu Aleksandria apan inai watukku Italia. Ne iami nangingkatte su apalla udde.

⁷Manga pira allo aļannune iami massenggota tumanite maļiwue atonna, wuřřu ringannu masahadda atonna panginsueanne iami na'omate araune sara soa n Knidus. Wua udde ana waugu hati m banua ta'e laļeo, iami tawe nanassu pasasenggotti ami su mona paarorone. Ne iami nassenggote watukku timukka su tařřanusa n Kreta su mabbi tongokku Salmone tadea'u iami tawe ařřinoannu anginna. ⁸Ringannu nallome iami nassenggotta rudurukka apannu tařřanusa udde, wuřřu panginsueanne iami na'omate su sambau tampa aranne Tatuļianna Mařřamaga tawe marau wuassu soa n Lasea.



Pabbaļangoanna mařřansanga (27:8)

⁹Su tempo udde Allo Wahewa m Paddarame n taumata n Yahudi naļiute. Manambo tempo naholo'a siami, na'oma n sara tate tempone lai iami massenggota lenakka. Ana waugu udde Paulus nanantiro arendi simangitou, ¹⁰"Manga tuřřangnga, tumuřřuttu adapa'u tumanite maasilaka amungkangngu iite manassu amatanni ite. Iite sarun maasomba asasilaka waļine tumba'u luranni ite wuřřu apalla sasa'eanni ite, arawe niawa ng kite lai wotongnge mawuļi." ¹¹Arawe piařřa'u tantara udde

tumanite mangngimanna manganguinna wuŕru apitennu apalla wuassu mangngimanna manga wisara m Paulus. ¹²Tatuŕianna isudde tumanite n daŕeo su manga apalla apan mabaŕango su tempo masunge. Ana waugu udde anamboanne mamananara ng kapalla mappulute massenggota apia manantangngu tatuŕianna udde, ana waugu imangitou maapulu madda'a ma'omate su Feniks wuŕru matana'a poiaronodi aŕannune napawe tempo n runia masunge naŕiudde. Feniks eteudde tatuŕianna su Kreta apan uasaruanna anginna taŕranganna wuŕru anginna paŕonna.

Tandia'a su tahaŕoangnga

¹³Su tempo udde anginna timukka tuttiuppe masi'ome. Ne mamananara ng kapalla maŕrangngo manungku imangitou wotongngete massenggota apia. Ne imangitou nabatunte waŕango see nassenggotte rudurukka apannu taŕranusa n Kreta. ¹⁴Arawe tawe naŕannu wua udde, anginna ma'ikkatta tinumiuppa – eteudde anginna apan isassago lawassiitta – tinumiuppa wuassu ammaranne, ¹⁵wuŕru namappa'u apalli ami. Ana waugu apalli ami tawe maapasenggota ana waugu massomakka anginna, ne iami nangilloŕote wuŕru namalate ng kapalla ia'elekku anginna. ¹⁶Iami niaŕindumanna adio'a, su tempo sinumabbi samba'a n timukku taŕranusa n Kauda apan adio'a udde. Isudde ringannu nallome lai iami mannaŕrangnga peŕo ng apalli ami. ¹⁷Napawe pelo udde naŕureante su apalla apia, apalla udde ete nitohassa niwa'isannu taŕi nipamaŕiwutta apalla udde. Ana waugu matta'utta isiladde su ranassu anne n Sirtis apan mawawo, senggota nioŕote see apalla niwalate iappaapiddu anginna. ¹⁸Anginna sidutu mandi'urru, na'oma n sara tiŕrabbine lurannu apalla iradammete su tahaŕoangnga. ¹⁹Allo manansunna lai mamananara ng apalla udde nandamme aŕawo'u lurannu apalla su tahaŕoangnga ringannu lima mangitou sassane: ²⁰Maŕannu iami tawe naasilo matannallo wuŕru anumpitanna, wuŕru anginna mangke sidutu tuttiuppa. Panginsueanne iami inawuŕianu antimma mabbiakka.

²¹Manga pira allo aŕannune manga taumata tawe umanna. Ne Paulus inaite dirumarisikka su wallatti mangitou see nabbisara, "Manga tuŕrangnga! Amungkangngu iamiu nadaringikka tantiro'u wuŕru iite tawe nassenggotta wuassu Kreta, iite tawe niahoharannu sarannapa wuŕru narugi ereindi. ²²Arawe orassa indi lai ia'u madorongnga tadea'u naungngi amiu paahewalla. Tawe saran sangkatou wuassu manga tuŕrangnga apan uasa'e apalla indi mate; iite tumba'u awuŕiannu apalla indi. ²³Ana waugu naallowanna mala'ekattu Mawu Ruata apan sassubbangku, eteudde Mawu Ruata apan uatahuanna sia'u nirumanta ringangu. ²⁴Mala'ekatta udde nabbisara, 'Arie paata'utta, Paulus! Ana waugu i'o sarun sumaruanna si Kaisar. Wuŕru ana waugu wuassu apapia

naungngu Mawu Ruata si'o, anambo n taumata apan uasa'e apalla sua-dio'a ringannu sarun masałamatta ana waugu i'o lai isudde.' ²⁵Ana waugu udde manga tuřrangnga, řinone manga tuřrangnga pia antimma! Ana waugu ia'u mangngimanna Mawu Ruata manungku sarangkanam-bone sarun matipussa ere niwařo n Tou sia'u. ²⁶Arawe iite sarun irang-kalle su sambau apannu tařřanusa."

²⁷Su řabbi appuřone appatta, iami tantařanna uařallatto su Ta-hařoangngu Adria. Irařrangngo řabbi mattangnga mamamanara ng apalla naependamma apalla maranite ammaranne. ²⁸Nariaddi imangi-tou nanguřukku taři aiitannu watu ipanguukka alařummu tahařoangnga. Inauuřřanna tampa udde alařumme marani n appatu puřo su meteřřene. Tawe nařannu wua udde imangitou nanguukka apia, see niauuranna tahařoangnga isudde tumba'u tallu m puřo su meteřřene. ²⁹Imangitou matta'uttu apalla isiladde su watu n sahatta ne imangitou namontollu wařango appata su petone, wuřřu uaantimma amungkangngu wotongge paařihakke maallo. ³⁰Mařanna-řannaba manga mamamanara ng apalla maannamma tumařangnga manantangngu apalla. Imangitou nanossokku pelo wuřřu mangngawusu manungku imangitou manossokku wařango wuassu mona ng apalla. ³¹Arawe Paulus nabařo su piařřa'u tantara wuřřu manga tantara su apalla udde, "Amungkangngu mamamanara ng apalla indi tawe matana'a su apalla, manga tuřrangnga sarangkanam-bone tawe masałamatta." ³²Ana waugu udde manga tantara nařřassatta taři m pelo udde na'oma n sara pelo udde nieleкке.

³³Napawe maranite n allo, Paulus nandolokki mangitou sarangka-nambone niapaanna. Paulus nabbisara, "Mapuřote appata su allone manga tuřrangnga sarangkanambone uarařřaddo ringannu atata'utta, wuřřu tawe umanna sara ng kadio'a. ³⁴Ia'u madorongnga tadea'u iamiu umanna adio'a. Udde mapia siamiu tadea'u iamiu matohassa apia. Ana waugu tuřrangnga sarangkanambone sarun masałamatta ma'oma su am-maranne ringannu tawe auranganne." ³⁵Wua nabbisara aroddi i Paulus nanganu roti see naadiangkamanna su Mawu Ruata su saruanni mangi-tou sarangkanambone. Wua udde itou nattahia roti udde see niumante. ³⁶Ne imangitou sarangkanambone natohasse apia, wuřřu inumante su sampunna apia. ³⁷Sulařummu apalla udde lařořřone sarangkanambone rua řasutta pitu m puřo annuma su atoune. ³⁸Napawe suete niumannu imangitou namontollu luranna manga gandumma su tahařoangnga ta-dea'u apalla mařřanna.

Apalla nisiladde

³⁹Napawe allote, mamamanaranna apalla naasilote ammaranne, arawe imangitou wagga ammarannu apa udde. Imangitou naasilo sam-

bau tongokke ringannu apanne. Nariaddi imangitou mappandumma amungkangngu wotongge imangitou mabaḷango isudde. ⁴⁰Ne manga taḷi m baḷango niḫassatta see manga waḷango udde niwalate nilumak-kuba su tahaḷoangnga. Naḫrindo'u udde lai imangitou namu'a manga taḷi apan ua'iitta a'uḷinna. Wua udde imangitou nanduittu senggota su mona ng apalla tadea'u anginna mangapiddu apalla udde watukku ammaranne. ⁴¹Arawe apalla udde nattu'a su ranassa. Monane nisiladde wuḫḫu tate umaḷore, arawe wageangngu petone naḫrimunsa'a nirapannu lua'a wahewalla.

⁴²Manga tantara su apalla udde pia pandumma mamate anambo n taumata n ḫuumanna, ana waugu imangitou matta'utta aḫḫengenne piaddu umalangnga watukku ammaranne see tumalaḅangnga. ⁴³Arawe piaḫḫa'u tantara udde naningaddu pandumanni mangitou udde ana waugu itou maapulu manaḷamatta si Paulus. Itou nandolokku anambo n taumata apan masingkatta umalangnga tumumpa rorone wuḫḫu umalangnga watukku apanne; ⁴⁴wuḫḫu ingana'a waine manantuḫḫutta ringannu uaagassa manga pappala ara'e pesangngu apalla udde. Ringannu laḷanne aroddi, iami na'omate su ammaranne ringannu saḷamatta.

Su Malta

28 Napawe na'omate su ammaranne ringannu saḷamatta, iami naa-singkate manungku taḫḫanusu udde aranne Malta. ²Tumana'u taḫḫanusu udde masaḫḫionto'a atonna siami. Imangitou nanaḷoho siami sarangkanambone ringannu mapia wuḫḫu nakkunuttu putungnga huna ng kami ana waugu mangguḫḫuringke wuḫḫu runia lai masunge. ³Paulus nangammullu alu, see nironsona su putungnga. Tantaḷanna itou mandonsolu putungnga, atoanna sambua sinumabangnga, ana waugu naa-pendamma saḷihangngu putungnga udde, see nangi'i lima m Paulus. ⁴Napawe tumana'u taḫḫanusu udde naasilo atoanna udde ua'ele su ta'iakki Paulus, imangitou uahahatto sangkatou ringannu waine, "Taufmata indi asinungka taḫḫa pate, ana waugu salaiwe itou naḷiute wua-ssu papate su tahaḷoangnga, Mongannu Atatuḷidda tawe mamala n tou wiakka." ⁵Arawe Paulus namappa'u atoanna udde su putungnga ringannu tawe naependamma taddu'a sara ng kadio'a. ⁶Imangitou massunna manungku tate maḷannu lai ta'iakki Paulus humanne ara'e aḫḫengenne itou mate. Arawe napawe naḫḫado allannune tawedu nariaddi sitou, ḫingihḫanni mangitou nawaḷu see imangitou nabbisara manungku Paulus sangkatou monganna.

⁷Tawe marau wuassu tampa udde pia leta'a pussa'a m Publius, tembonanne atanggarranne su taranusu udde. Ringannu afafluassu naungnge itou nanafoho siami maola'a rahone tallu allo apannune. ⁸Tempo udde iamangnge marada'a, masunge wuflu ma'uru. Paulus inainte na'ellega timmade marada'a udde, see inumafiomanna wuflu namita sitou na'oma n sara itou napia. ⁹Ana waugu inolaanna udde, anambo n taumata apan marada'a su taranusu nirumanta ringanni Paulus, see imangitou niapaapiate. ¹⁰Manambo aonggoli mangitou siami, wuflu napawe iami inainte nassenggotta apia, imangitou nanguntudu wafunni ami su apalla.

Wuassu Malta watukku Roma

¹¹Napawe tallute wufanna poiaroddi iami nassenggotte wuassu wanua taranusu udde wuflu sinuma'ete apalla wuassu Aleksandria apan uawafango su taranusu udde su tempo n runia masunge. Apalla udde uapaattu waneffa "Monganna Rindua Kastor wuflu Poluks." ¹²Iami nabbalango su soa Sirakusa wuflu natana'a isudde tallu allo apannune. ¹³Wua isudde iami nassenggotte apia rudurukka apanne na'omate su soa n Regium. Tirabbine anginna mannattake tuttiuppa wuassu timukka, na'oma n sara tumba'u sulafummu rua allo iami na'omate su soa m Putioli. ¹⁴Isudde iami nassomba n sire pira taumata apan mangngimanna Mawu Yesus, wuflu ana waugu aahe mangitou iami natana'a ringanni mangitou sangkamisa apannune. See iami nassenggotte watukku Roma. ¹⁵Manga turangnga su Roma apan mangngimanna Mawu Yesus naaringikka watti'a su ola'i ami, na'oma n sara imangitou nirumanta sara Pasakku Apilus wuflu Pangangillofonna Tatallu see nanafoho siami. Napawe i Paulus nassomba mangitou, itou namantugga Mawu Ruata wuflu naungnge nabali matohassa.

Su Roma

¹⁶Napawe na'omate su Roma, Paulus niwala matana'a sassane wuflu rariagannu sangkatou tantara.

¹⁷Napawe tallute allo, Paulus namaggo manga piaffa'u taumata n Yahudi su tampa udde. Wuflu napawe imangitou suete naammulla, itou nabbisara simangitou, "Manga turangnga! Ia'u tawe pasasala su saruannu pabbawalagi ite, ara'e nilumawangnga addatta inanaramanna apan sinengkammi ite wuassu iupunggu afamona ng kite. Salaiwe aroddi ia'u sinametta su Yerusalem wuflu tinantilla su manga taumata

n Roma. ¹⁸Napawe hatto'u niparikisante, imangitou namallo'u, ana waugu ia'u niasingkatanna tawe passasaḷa'u saran sambau, apan wotongge maarḷuumangku ringannu ḷuumanna pateanna. ¹⁹Arawe ana waugu manga taumata n Yahudi mannaḷare, ia'u nangapiddu hatto'u parikisanna su mallarḷuumnggu Kaisar Roma. Ia'u na'ola'a udde waḷine ana waugu ia'u pia sambau alae su saruannu pabbawala'u sassane. ²⁰Wuḷḷu ana waugu udde ia'u madorongnga maisasomma ng kamiu, maggahatto ng kamiu; ana waugu ia'u ḷarḷapusanna, ana waugu Punnu Saḷamatta apan aantimannu pabbawalagu Israel."

²¹See imangitou nabbisara sitou, "Iami taambe naasengkamma saran paassa suratta wuassu Yudea su ola'u tuḷrangnga. Wuḷḷu tawe sangkatou tuḷrangnga wua poiaroddi apan nangapiddu watti'a su ola'u tuḷrangnga ara'e nabatti'u aḷaḷeo n tuḷrangnga. ²²Arawe iami maapulu lai madaringikka watti'u pangangimannu, ana waugu iami sarangkanambone suete naaringikka taumata manggaḷusa'a aḷarḷa'a apan pangngimanannu udde."

²³Ne imangitou wuḷḷu Paulus nanantunnu sambau allo pasasombanna. Su allo udde manambo taumata nirumanta su tampa atatanaanni Paulus. Wuassu ruaallo madatingngu bawallo Paulus mannaḷa'a wuḷḷu mabatti'a simangitou watti'a su ola'u ereapa Mawu Ruata mamarenta ere sangkatou Ratu. Ringanni nappaattu manga tatialane sulaḷummu Wuke Musa wuḷḷu Wuke Manga Nabi, Paulus mangke maddea'a tadea'u imangitou mangngimanna Mawu Yesus. ²⁴Piaddu mangngimanna watti'i Paulus, arawe piaddu lai apan tawe mangngimanna. ²⁵Ringannu ḷingidda uata'ae imangitou nanantangngu tampa udde, napawe Paulus nabbisara arendi simangitou, "Mangke atonna papasingkattu Gharḷaho Mawu Ruata si Nabi Yesaya su iupungngu aḷamona ng kamiu! ²⁶Mawu Ruata nabbisara,

'Roote waḷoa'a su pabbawalaga indi:

Iamiu sidutu maaringikka, arawe tawe maasunna;

iamiu sidutu mannutukka

arawe wagga apa apan sarun mariaddi.

²⁷Ana waugu ḷingirḷannu pabbawalaga indi maḷumute

taḷinga mangitou nabengelle

wuḷḷu mata mangitou suete niarḷrimbuta.

Indi mariaddi tadea'u mata mangitou tawe maasilo,

taḷinga mangitou tawe maaringikka,

ḷingirḷanni mangitou tawe maasunna,

wuḷḷu arie mabelengnga ringang-Ku,

see Ia'u mapaapia mangitou.'"

²⁸Panginsueanne Paulus nabbisara, "Manga tuḷrangnga ḷinone maasingkata manungku su ola'u watti'u asasaḷamatta wuassu Mawu Ruata ora-

ssa indi suete niapaasingkatta su manga pabbawalaga waine apan waḷine Yahudi. Imangitou sarun tumuḷḷutta!" [29Napawe Paulus suete nabbisara aroddi, manga taumata n Yahudi nanantangngu tampa udde lapiddu nattatiakka sangkatou ringannu waine.]

³⁰Rua tonna aḷannune Paulus uatana'a su Roma, su waḷe apan sasewanne sassane. Itou maḷuassa manarimmattu anambo n taumata apan rudanta mattembo sitou. ³¹Wuḷḷu ringannu warḷani itou mabatti'a simangitou su ola'u ereapa Mawu Ruata mamarenta ere sangkatou Ratu wuḷḷu su ola'u Mawu Yesus Kristus. Paulus nabbatti'u udde ringannu tawe gaḷahene wuḷḷu tawe mangnganḷa'ukke.

SURATTI PAULUS SU JAMAATTU ROMA

WISARA TAŁAANE

Suratti Paulus Su Jamaattu Roma, niwořretta mapaasaddia mangitou su patatembone simangitou. Tumurřuttu waidde, Paulus sarun mammanara tała ng kadio'a su wallattu manga taumata n Sařrani poiारoddi, wua udde ringannu sasumbala mangitou, itou inai watukku Spanyol. Paulus namořrettu suratta indi ipanała'a n atapasannu agama n Sařrani wuřru manga atoranne apan matatařrino su ipabbiakku manga taumata n Sařrani.

Napawe suete nattabea su manga taumata n Jamaattu Roma, wuřru namasingkatta simangitou aalıomanne simangitou, Paulus namasingkattu lałořro n suratti tou indi: "Ringannu Watti'u Ałałuassa udde Mawu Ruata mannantiro ereapa lałanne paa'aukku taumata ringannu Mawu Ruata maola'a mapia apia; lałanne eteudde ringannu mangngimanna Mawu Ruata, wuassu paarorone saran pangudusanne" (1:17).

Wua udde Paulus nanała'a n lałořrone udde. Anambo n taumata – mapia Yahudi ara'e lai wałine Yahudi – limbakkuanna apia paa'aukke ringannu Mawu Ruata, ana wagu sarangkanambone suadio'a sulalułummu tařrino n rosa. Paa'aukku taumata ringannu Mawu Ruata masułe apia amungkangngu taumata mangngimanna Mawu Yesus Kristus. Wua udde Paulus nanała'a su ola'u pabbawiakka wakku apan aapendamannu taumata amungkangngu su sambau ringanni Kristus. Wiakka wakku udde maola'a ana wagu paa'aukka apan wakku ringannu Mawu Ruata. Taumata apan suete nangimanna Mawu Yesus, mabbiakka su paddarame ringannu Mawu Ruata, wuřru Ghařraho Mawu Ruata mapaalıu n tou wuassu tařrino n rosa wuřru papate. Sulalułummu tatialane 5-8 Paulus nanała'a lai pandumannu manga tita Mawu Ruata wuřru tařrino Ghařraho Mawu Ruata sulalułummu pabbiařrannu taumata mangngimanna. Wua udde Paulus nanała'a lai manungku taumata n Yahudi wuřru wałine Yahudi nawałi lai sulalułummu pandumannu Mawu Ruata su anambo n taumata. Paulus narřawessa manungku panano'e Mawu Yesus wuassu taumata n Yahudi nasuttate lai su pandumannu

Mawu Ruata ipantulungngu taumata pangiananne wuassu darangngu-Ne sulaŕummu Mawu Yesus Kristus. Paulus mangngimanna manungku taumata n Yahudi tawe sidutu manno'e Mawu Yesus. Panginsueanne Paulus namoŕretta su ola'u ereapa taumata řinone mabbiakka maola'a taumata n Sařrani, nangillembote su ola'u ereapa olangnge mappaa-mattu darangngu sulaŕummu paa'aukka ringannu manga taumata waine. Ana waugu udde Paulus namile manga alařra'a ereindi: mangngimbe Mawu Ruata, udde manara n taumata n Sařrani su araratuanna wuřru su sansulungnga taumata n Sařrani, wuřru alaŕo'u manga hatto n daŕummu naungnga. Paulus nangudussu suratta indi ringannu manga tanatane sassane wuřru manga daralo su Mawu Ruata.

Lalořrone

Panattařanne wuřru punnu řingidda	1:1-17
Hausannu taumata su ola'u asasaŕamatta	1:18-3:20
Laŕannu asasaŕamatta wuassu Mawu Ruata	3:21-4:25
Wiakka wakku ana waugu uaaukka ringanni Kristus	5:1-8:39
Israel sulaŕummu pandumannu Mawu Ruata	9:1-11:36
Pallaŕagu n Sařrani	12:1-15:13
Panginsueanne wuřru tabea m Paulus	15:14-16:27

1 Manga tuṙrangnga sarangkanambone su Roma apan arangnguannu **1** Mawu Ruata wuṙṙu apan suete niwagoannu Mawu Ruata maola'a aḷaṙrang-Nge.

Mawu Ruata suete namile wuṙṙu ia'u sassane niapaatenega mam-masingkattu Watti'u Aḷaḷuassa wuassu Mawu Ruata. ²Watti'u Aḷaḷuassa udde suete nipa'ire Mawu Ruata su tempo rorone sulaḷummu manga nabi-Ne wuṙṙu nawoṙṙette sulaḷummu Wuke Susi. ³Watti'u Aḷaḷuassa udde mabbatti'u Ana'u Mawu Ruata, eteudde Mawu ng kite Yesus Kristus. Su ola'u saṙṙene ere taumata, Itou pabbawalagi Daud, ⁴arawe su ola'u saṙṙe m pangangimanna Itou udde Ana'u Mawu Ruata. Udde nilumiatta'a sulaḷummu taṙṙino apan wahewalla sulaḷummu pabbawangun-Ne wuassu papate. ⁵Sulaḷummi Tou lai Mawu Ruata nangonggolu aḷamatta sia'u maola'a rasul, tadea'u ia'u - mangadatta Mawu Yesus - mangngehetta manga taumata wuassu aḷawo'u pabbawalaga tadea'u mangngimanna wuṙṙu tumuṙṙutta. ⁶Pandumannu wisara aḷawo'u pabbawalaga eteudde iamiu lai apan uatana'a su Roma; iamiu lai suete niwagoanna maola'a taumata n Mawu Yesus Kristus. ⁷Ana waugu udde ia'u namoṙṙettu suratta indi siamiu.

Antimanna Mawu Ruata Iamangngi ite wuṙṙu Mawu Yesus Kristus mangonggolu aḷamatta wuṙṙu aḷaḷuassa siamiu.



Lalanna maloangnga su soa n Roma (1:6)

Aaḷiomanna aadiangkamanna

⁸Paarorone sulaḷummi Yesus Kristus, ia'u maadiangkamanna su Mawu Ruata ana waugu manga tuṙrangnga sarangkanambone; ana waugu ahewallu runia naaringikke manungku iamiu mangngimanna

atonna su Mawu Yesus Kristus. ⁹Ia'u sidutu uanaungnga siamiu amungkangngu ia'u umajiomanna. Mawu Ruata matatiale manungku apa apan iwabbatti'u udde atonna. Tumba'u Itou Mawu Ruata apan sasubbangu ringannu ahewallu naungku ringannu namasingkattu Watti'u Aļaļuassa su ola'u Anang-Nge. ¹⁰Ia'u sussaļande ringannu atonna su Mawu Ruata, antimanna Itou mamala'u orassa indi inai mattembo siamiu. ¹¹Ana waugu ia'u mangke maapulu atonna maisasomba ng kamiu tadea'u ia'u wotongnge mattahia darangngu wuassu Gharraho Mawu Ruata ipannohassa siamiu. ¹²Pandumangu eteudde ana waugu iite su sambau suete nangimanna Mawu Yesus Kristus, ne iite wotongnge lai uatathassa sangkatou ringannu sangkatou.

¹³Manga turřangnga! Ia'u maapulu tadea'u iamiu maasingkata manungku masokkate ia'u pia pandumma mattembo siamiu arawe sidutu mangke pia haļahene. Ia'u maapulu tadea'u su wallatti amiu lai, manara'u pia gessine ere lai manara'u apan suete nabbua su wallattu manga taumata apan waļine Yahudi su manga tampa waine. ¹⁴Ana waugu ia'u pia manara'u su saruannu aļawo'u pabbawalaga; apan pia addanne wuřru ta'e luļu, apan pia asingkanne ara'e lai apan taambe asingkanne. ¹⁵Ana waugu udde ia'u maapulu atonna mamasingkattu Watti'u Aļaļuassa udde siamiu apan uatana'a su Roma lai.

Tarřino n Watti'u Aļaļuassa udde

¹⁶Ia'u mangngimanna atonna Watti'u Aļaļuassa udde, ana waugu Watti'a udde atathassu Mawu Ruata ipanaļamatta anambo n taumata apan mangngimanna; paarorone taumata n Yahudi, wuřru pabbawalaga waine lai. ¹⁷Ana waugu ringannu Watti'u Aļaļuassa udde Mawu Ruata napaalįatta'a ereapa laļanne paa'aukka taumata ringannu Mawu Ruata maola'a apia; laļanne eteudde ringannu mangngimanna Mawu Ruata, wuassu panattarřanne saran pangudusanne. Udde ere lai uaworřetta sulaļummu Wuke Susi, "Taumata apan mangngimanna Mawu Ruata ma'oma n sara paa'aukka ringannu Mawu Ruata maola'a apia, taumata udde sarun masaļamatta!"

Pasasaļa n taumata

¹⁸Wuassu surga Mawu Ruata napaalįatta'u asasa'u-Ne su anambo n rosa wuřru aļaleo n taumata, ana waugu aļaleo mannaļare taumata ma'illaļa aļarřa'u Mawu Ruata apan atonna. ¹⁹Apa apan wotongnge asingkatannu taumata su ola'u Mawu Ruata natualage sulaļummu

naungngu taumata, ana waugu Mawu Ruata sassane suete napaalɔatta'a su taumata. ²⁰Ro'e n Mawu Ruata nandiaddi runia, pallalagu Mawu Ruata apan tawe asiloanna, eteudde olangnge ere Mawu Ruata wuɽɽu taɽɽino-Ne apan uatialu, wotongnge asunnannu taumata wuassu aɽawo'u niriaddianne. Nariaddi taumata tawe pangaiannanne mapaarɽino m batanganne. ²¹Taumata maailala Mawu Ruata, arawe taumata maddiri mangadata Sitou ere sangkatou Mawu Ruata wuɽɽu tawe lai maadiangkamanna Sitou. Arawe taumata sidutu maɽringiddu aɽawo'a apan tawe gunane; naungngi mangitou nadandumpe. ²²Imangitou mammendammanungku imangitou pandete, wutte'e imangitou woddo. ²³Waɽline Mawu Ruata apan uata'a sassubanni mangitou, ewe'e manga paaɽuanna apan naalɔhida riadianna apan wotongnge mate; eteudde taumata, manu'u winalanganna, winatangnga leddane appata wuɽɽu winatangnga apan tuttondo n roone.

²⁴Ana waugu udde Mawu Ruata namala mangitou tuttuɽɽutta apulu naungngi mangitou ma'ola'a aɽalɛo na'oma n sara imangitou lai ma'ola'a aɽalɛo su sansuɽungngu taumata. ²⁵Mawu Ruata apan naɽɽino, nihantianni mangitou ringannu sarannapa awusu. Waɽline mandariaddi ewe'e apan niriaddine udde sassubanna wuɽɽu a'imbeanni mangitou. Sumbaɽi iapa nandiaddi udde apan ɽinone raloanna sarangkaɽo'engnge! Amin.

²⁶Ana waugu taumata inolaanne aroddi, ne Mawu Ruata namala mangitou tuttuɽɽutta apulu mangitou apan laɽeo. Manga wawine mangitou maddirite manga esakka ere lai inanaramannu taumata ewe'e uaa'apulute wawine rundussa wawine. ²⁷Aroddi lai esakka, imangitou tate lai uaa'apulu m wawine, ewe'e apulu mangitou tumba'u su esakka rundussa esakka. Esakka ma'ola'a inolaanna apan maasili su saruannu rundussa esakka, na'oma n sara imangitou manengkamma wawaɽline uasuɽungngu inolaanne apan laɽeo udde.

²⁸Ana waugu taumata maddirite lai ma'illala Mawu Ruata, ne Mawu Ruata namalate n ɽingiddu mangitou malaɽeo, na'oma n sara imangitou ma'ola'a manga inolaanna apan ɽinone tawe wotongnge olaanna. ²⁹Naungngi mangitou napene n aɽawo'u aɽalɛo, aɽawo'u awusu; napene n awawaɽiu, awawukku'a, wuɽɽu mannihikka taumata waine, napene n apulu mamate, uawawuɽo, mallinga wuɽɽu mangngune. Imangitou apulune ma'umbilangnga taumata waine, ³⁰apulune mandalɛo arannu taumata waine; imangitou mawunga wuɽɽu tawe atoranne, apan maddantinnu Mawu Ruata wuɽɽu mataɽɽupassi. Imangitou pande madaea'a laɽanne wakku ipadea'a aɽalɛo. Imangitou lullawanna timmadde; ³¹imangitou maddiri massunna taumata waine; imangitou maɽawangnga wuɽɽu tawe apedamma mantuɽungngu taumata. ³²Imangitou masingkata manungku tumuɽɽuttu tita Mawu Ruata, taumata apan ma'ola'a sarangkanambone udde ɽinone iɽruumanna pateanna. Salaiwe aroddi, imangi-

tou ta'e lai ma'ola'a inolaanna udde; wuɽɽu ewe'e inumire lai amung-kangngu taumata waine ma'ola'a udde.

Ruumannu Mawu Ruata

2 Ana waugu udde, manga tuɽɽrangnga, isai i'o tuɽɽrangnga, na'oma n sara i'o tuɽɽrangnga maapulu mapaasala n taumata waine? Tuɽɽrangnga tawe ahidda ipallindumma ririnu. Ana waugu amung-kangngu i'o mapaasala n taumata waine, sumbaɽi tuɽɽrangnga sassane ma'ola'a ere inolaanni mangitou, ne tuɽɽrangnga naɽɽuumannu watangannu sassane lai. ²Iite masingkata manungku amung-kangngu Mawu Ruata maɽɽuumannu manga taumata apan inolaanne ereudde, apan niola'u Mawu Ruata udde tawe saɽane. ³Arawe iamiu, manga tuɽɽrangnga, ma'ola'a sassane lai manga inolaanna apan ipangngansilli amiu su manga taumata waine! Wuɽɽu su ɽingiddi amiu, iamiu wotong-nge maɽɽiudda wuassu ɽuumannu Mawu Ruata? ⁴Ara'e iamiu mangngadio'a darangngu Mawu Ruata wuɽɽu ahewallu naung-Nge see asasabare-Ne apan aroddi ahewalle? Iamiu masingkatta manungku Mawu Ruata mapaaliatta'u apapia naung-Nge ana waugu Itou maapulu tadea'u iamiu mawaɽu wuassu manga rosanu. ⁵Arawe pua ng kamiu maattika wuɽɽu maddiri mawaɽu. Ana waugu udde ete iamiu sassane apan ma'ola'a ɽuumannu aatambanna awakkane su Allo ng Kiamatta, napawe Mawu Ruata mapaaliatta'u asasa'u-Ne ringannu ɽuumanna apan su ɽinone. ⁶Ana waugu Mawu Ruata sarun mabaɽissa anambo n taumata uas-suɽungngu inolaanne. ⁷Mawu Ruata mangonggolu wiakka tutune wuɽɽu saran maɽannu-lannu simangitou apan sidutu ma'ola'a apapia tadea'u maasomba apan awantuhanne, wuɽɽu apan aaddatanna wuɽɽu apan sarun uatialu. ⁸Arawe manga taumata apan tumba'u maɽɽingiddu ririne sassane wuɽɽu maddiri tumuɽɽutta Mawu Ruata, ewe'e tuttuɽɽutta aɽaɽeo, manga taumata udde lembo n aasa'uannu Mawu Ruata. ⁹Suapa n taumata apan maapulu ma'ola'a aɽaɽeo sarun masansara wuɽɽu matataɽrangnga; paarorone taumata n Yahudi, wuɽɽu lai manga pabbawalaga waine. ¹⁰Arawe anambo n taumata apan maapulu ma'ola'a apapia sarun onggolaɽannu Mawu Ruata awawantuga wuɽɽu aaddata see aɽaɽuassa; paarorone su taumata n Yahudi, aroddi lai manga pabbawalaga waine. ¹¹Ana waugu Mawu Ruata ma'ellega anambo n taumata udde nassuɽungnga.

¹²Manga taumata m pabbawalaga waine marosa ana waugu wagga n tita n agama n taumata n Yahudi. Nariaddi imangitou iɽɽuumanna su liuddu atoranna udde. Arawe manga taumata n Yahudi apan marosa suete naasingkatta udde; ana waugu udde imangitou sarun parikisanna

tumuṛṛuttu tita udde. ¹³Ana waugu taumata mabelengnga apia ringannu Mawu Ruata, waḷine ana waugu taumata udde suete naasingkata tita n agama Yahudi, ewe'e ana waugu itou tuttuṛṛutta apa apan uawoṛṛetta sulaḷummu tita udde. ¹⁴Manga taumata m pabbawalaga waine wagga n tita n agama Yahudi. Arawe amungkanngu imangitou wuassu apulu mangitou sassane tuttuṛṛutta parenta n tita udde, ete naungngi mangitou sassane mangngatokki mangitou, salaiwe imangitou tawe maaillaḷa tita n agama Yahudi. ¹⁵Pallaḷagu mangitou napaalḷatta'a manungku apa apan suete nirolokku tita udde uawoṛṛetta su naungngi mangitou. Laḷummu naungngi mangitou lai mapaalḷatta'u olangnge udde, ana waugu imangitou sassane taṛṛa assa iapaasaḷa wuṛṛu iapaarṛino n ṛingiddi mangitou. ¹⁶Ete aroddi sarun mariaddi su allo apan suete tinantunna udde. Su allo udde – tumuṛṛuttu Watti'u Aḷaḷuassa apan ta'u niwatti'a – Mawu Ruata sulaḷummi Yesus Kristus, sarun mamarikissa aḷawo'u addapingngu naungnga wuṛṛu ṛingiddu anambo n taumata.

Taumata n Yahudi wuṛṛu tita n taumata n Yahudi

¹⁷Arawe orassa indi ereapa su manga tuṛṛangnga sassane? Tuṛṛangnga mangnga'u ririnu taumata n Yahudi. Tuṛṛangnga mangke tuttuṛṛutta tita n agama Yahudi wuṛṛu tuṛṛangnga lulluassa ana waugu paa'aukku tuṛṛangnga ringannu Mawu Ruata. ¹⁸Tuṛṛangnga naasomba manga tatantiro wuassu tita udde, na'oma n sara i'o masingkatu pandummu Mawu Ruata wuṛṛu masingkata mamile suapa apianne. ¹⁹I'o mangngimanna manungku ete i'o tuṛṛangnga piaṛṛa'u taumata wuta wuṛṛu asasemakki mangitou apan uatana'a sulaḷummu ararandumma; ²⁰tuṛṛangnga mangngaṛṛa'a taumata apan tawe addane, wuṛṛu manantiro manga taumata woddo. Iamiu mangngantimma manungku sulaḷummu tita n agama Yahudi tuṛṛangnga maasomba aḷawo'u asingkata wuṛṛu aḷaṛṛa'a apan atonna. ²¹Tuṛṛangnga mangngaṛṛa'a taumata waine; ei anio tuṛṛangnga tawe maa'aṛṛa'a watangannu sassane? I'o mangngaṛṛa'a taumata tadea'u arie panna'o, arawe i'o sassane manna'o! ²²I'o mangngaṛṛa'a taumata tadea'u arie sumandaga, arawe i'o sassane sussandaga! I'o maddantinnu pasasubba paaḷuanna, arawe i'o sassane mangngaḷappa sarannapa wuassu waḷe m paaḷuanna. ²³I'o mammunga manungku i'o uatahuanna tita Musa, arawe i'o sassane mangngadio'a Mawu Ruata ringannu tawe tumuṛṛutta tita-Ne. ²⁴Sulaḷummu Wuke Susi uawoṛṛetta arendi, "Ana waugu iamiu, manga taumata n Yahudi, arannu Mawu Ruata niaḷuandahanna su wallattu pabbawalaga waine."

²⁵Amungkanngu i'o matuṛṛutta tita n agama Yahudi, ne i'o apan suete nissunatta udde pia gunane lai. Arawe amungkanngu i'o tawe

ninumaramma tuttuřrutta manga inolaanna apan iradolokka sulařummu tita udde ne sunatta udde tawe gunane sara ng kadio'a. ²⁶Arawe amungkangngu sangkatou wařine Yahudi tawe nissunatta, tuttuřrutta tita n agama Yahudi, wařinewe Mawu Ruata suete namaři n tou maola'a taumata apan suete nissunatta? ²⁷Wuřru manga taumata apan tawe nissunatta udde sarun mappasařa ng kamiu taumata n Yahudi, ana waugu i'o uatahuanna tita n agama Yahudi wuřru i'o nissunatta, arawe i'o lullawanna tita udde. Imangitou tawe nissunatta, arawe ete imangitou apan tuttuřrutta tita n agama Yahudi. ²⁸Ana waugu taumata n Yahudi tutune wařinewe taumata tumba'u aranne taumata n Yahudi; wuřru taumata apan atonna-tonna nissunatta, wařinewe taumata apan nissunatta tumba'u su wadangnga. ²⁹Arawe sangkatou Yahudi apan tutune eteudde taumata apan naungnge naungngu Yahudi; wuřru sunatta apan tutune eteudde sunatta su naungnga apan mammanarannu Ghařraho Mawu Ruata, wařinewe niwořretta sulařummu wuke. Taumata ereudde, manengkamma daralo wuassu Mawu Ruata, wařine wuassu taumata.

3 Amungkangngu aroddi, apa auntunganne maola'a taumata n Yahudi? Wuřru apa lai auntunganne tuttuřrutta atorannu sunatta? ²Natantunna manambo auntunganne! Paarorone, ana waugu ete su taumata n Yahudi Mawu Ruata nanantillu manga wisara Mawu Ruata. ³Arawe ereapa amungkangngu sambageanganna taumata n Yahudi tawe tumuřrutta? Apa ana waugu Mawu Ruata tawe umakkanna? ⁴Natantuna tawe! Ana waugu nasemakke manungku Mawu Ruata sidutu atonna, salaiwe ařawo'u taumata mammahia. Sulařummu Wuke Susi uawořretta,

"Řinone i'o aatialanna atonna sulařummu apa apan iwabbisaranu, wuřru i'o maauntungnga su tempo i'o parikisanna."

⁵Arawe amungkangngu tařřino Mawu Ruata lembo nilumiatta'e, ana waugu iite ma'ola'a pasasařa, apa sarun iwisara ng kite? Manungku Mawu Ruata wengkolla amungkangngu itou mařřuumanni ite? (Atonna aiwařo indi mařřia'a su taumata.) ⁶Atonna-tonna tawe! Ana waugu amungkangngu Mawu Ruata tawe atatuřida, ereapa Itou wotongnge mamarikissa runia indi?

⁷Arawe amungkangngu manga inolaanna apan nassařa, apa apan nařřino su ola'u Mawu Ruata lembo n lumiatta'a ma'oma n sara Itou raloanna, anio taumata apan ma'ola'a ařařeo udde ta'e iapaasařa ere taumata marosa? ⁸Wuřru anio iite tawe wotongnge niabbisara, "Mappianne iite ma'ola'e ařařeo tadea'u lumiatta'e apapia?" Atonna pia manga taumata apan mangngadio'a sia'u ringannu mabbisara manungku ia'u suete nabbisara aroddi. Manga taumata ereudde řinone iřřuumannu Mawu Ruata.

Tawedu saran sangkatou apan tinumurrutta apulu Mawu Ruata

⁹Ei, apa iite taumata n Yahudi mappianne wuassu taumata m pabbawalaga waine? Mangke tawe! Ere suete ta'u niwisara manungku mawae taumata n Yahudi ara'e pabbawalaga waine, sarangkanambone udde tatahuanannu rosa. ¹⁰Ere uaworretta sula'ummu Wuke Susi,

"Tawe saran sangkatou apan nurrino,

¹¹ tawe saran sangkatou apan maasunna wurru tawe saran sangkatou apan massubba Mawu Ruata.

¹²Anambo n taumata nangindaute m watanganne wuassu Mawu Ruata;

sarangkanambone nialiwunete.

Tawe saran sangkatou apan ma'ola'a apapia; saran sangkatou tawe!

¹³Tonggolanni mangitou naalihida ere la'abinganna apan wawu'anna. Manga awusu wurru wahia manggelekka wuassu lila mangitou, wurru wiwikki mangitou mapasabanggu aaluandaga, ere wisa ng atoanna.

¹⁴ Morrongngi mangitou napene n wawontoga wurru wawansaga.

¹⁵Lempangngi mangitou malihakka amungkanggu inai mannansara wurru mamate taumata.

¹⁶ Ananawo wurru اساسا, iaasi'i mangitou su alawo'u tampa.

¹⁷Imangitou wuta su ola'u la'annu alaluassa,

¹⁸ wurru tawe massubba Mawu Ruata."

¹⁹Orassa indi iite masingkata manungku sarangkanambone apan uaworretta sula'ummu tita n agama Yahudi, udde hunane su manga taumata apan paparentannu tita udde. Ringannu aroddi tawe saran sangkatou wotongnge maasimbakka wurru ahewallu runia indi wotongnge iapaasala Mawu Ruata. ²⁰Ana waugu tawe saran sangkatou apan wotongnge maaukka apia ringannu Mawu Ruata ana waugu taumata udde tutturutta manga inolaanna sula'ummu tita n agama. Arawe tita udde tumba'u mammasingkata su taumata manungku taumata udde marosa.

Ereapa Mawu Ruata mamala n taumata maauka apia ringanni Tou

²¹Arawe orassa indi Mawu Ruata suete namantingiddu la'anne ere-apa taumata maaukka ringanni Tou; wurru la'anne udde tawe sulungnge ringannu tita n agama Yahudi. Manga Wuke Musa wurru Wuke Manga Nabi maba'lo lai olangnge udde, ²²manungku Mawu Ruata ta'e mang-

ngonggolu tempone su taumata maaukka ringanni Tou, tumba'u amungkangngu taumata mangngimanna Mawu Yesus Kristus. Mawu Ruata na'ola'a indi hunane su anambo n taumata apan mangngimanna si Kristus, ana waugu tawe paŕŕalanne: ²³Anambo n taumata narosate wuŕŕu maraute Mawu Ruata apan sarun manaŕamatta simangitou. ²⁴Tumba'u ana waugu darangngu Mawu Ruata nionggola ringannu tawe bawalinne, paa'aukku taumata ringannu Mawu Ruata maola'a mapia lai; laŕanne eteudde; taumata niapaaliu Mawu Yesus Kristus wuassu rosa. ²⁵Mawu Ruata nanantillu Mawu Yesus tadea'u ringannu papate-Ne udde taumata iapaaliatta'a mapallosa wuassu pasasaŕa amungkangngu imangitou mangngimanna Sitou. Mawu Ruata na'ola'a aroddi ana mapaaŕiatta'u atatuŕide. Ana waugu su tempo naŕiu Mawu Ruata suete nanabare manga rosa n taumata, na'oma n sara Itou tate naŕŕuumanni mangitou. ²⁶Arawe orassa indi Itou mammangalo rosa ana mapaaŕiatta'u atatuŕidde. Ringannu olangnge aroddi Itou mapaaŕiatta'a manungku watangan-Ne tawe bahiane; wuŕŕu anambo n taumata mangngimanna Mawu Yesus, nareengnga taumata apan naukke apia ringannu Mawu Ruata.

²⁷Ana waugu udde tate lai pangaiyananne iite mamunga. Anio aroddi? Ana waugu iite tuttuŕrutta apa apan uawoŕretta sulaŕummu tita n agama Yahudi? Waŕine, Arawe ana waugu iite mangngimanna. ²⁸Ana waugu pangudusanne arendi: Taumata isaggo uaukka apia ringannu Mawu Ruata, waŕinewe ana waugu itou tuttuŕrutta apa apan uawoŕretta sulaŕummu tita n agama Yahudi, ewe'e ana waugu itou mangngimanna Mawu Yesus Kristus.

²⁹Ara'e Mawu Ruata udde, tumba'u Mawu Ruata n taumata n Yahudi. Waŕinewe Itou Mawu Ruata m pabbawalaga waine lai? Ore atonna Itou Mawu Ruata m pabbawalaga waine lai! ³⁰Ana waugu Mawu Ruata tumba'u sambau. Ete Itou apan namala n taumata n Yahudi maaukka apia ringannu Mawu Ruata ana waugu imangitou mangngimanna. Wuŕŕu ete Itou lai apan namala manga taumata n pabbawalaga waine maaukka apia ringannu Mawu Ruata, udde lai ana waugu imangitou mangngimanna. ³¹Apa indi atappasanne manungku amungkangngu iite mangngimanna Mawu Yesus, iite tumaŕudde tita n agama Yahudi? Atonna-tonna tawe! Ewe'e ringannu pangangimanni ite udde, iite mangngarega n tita udde.

Abraham maola'a tuŕadda

4 Amungkangngu aroddi, apa apan wotongnge iwisara su ola'i Abraham iupungngu alaŕona m pabbawalagi ite? Ereapa watti'u pabbiaŕanne? ²Amungkangngu manga inolaanne nisengkammu Mawu

Ruata, na'oma n sara itou nareengnga taumata apan maaļuassa naungngu Mawu Ruata, ne itou lai pia pangaiananne lumuassa. Arawe itou tawe mamunga su saruannu Mawu Ruata. ³Sulaļummu Wuke Susi uawořetta, "Abraham mangngimanna Mawu Ruata, wuřru ana waugu pangangimanne indi itou tinarimmattu Mawu Ruata maola'a sangkatou taumata apan maaļuassa naungngu Mawu Ruata." ⁴Taumata apan mammanara, manarimmattu laļantakke wuřru laļantake udde waļine maola'a sambau aonggola ana waugu eteudde pussaane. ⁵Arawe pia taumata tawe mangantimma su manarane sassane; itou mannantillu watanganne su Mawu Ruata apan napaalįatta'a manungku taumata marosa sarun maalįu wuassu passasaļane. Pinangianannu pangangimanne udde Mawu Ruata nanarimmatta sitou maola'a taumata apan maaļuassa naungngu Mawu Ruata. ⁶Aroddi lai su addapatti Daud; ana waugu itou nabbisara saļamatte lumala'a su taumata apan suete tinarimmattu Mawu Ruata ere taumata apan maaļuassa naung-Nge, wuřru Mawu tawe mandeengngu manga inolaannu taumata udde. Daud nabbisara arendi,

⁷"Laļumanna'a su taumata apan pasasaļane niampunganna wuřru manga rosane suete nilabingngu Mawu Ruata!

⁸Laļumanna'a su taumata apan manga rosane tawe nireenggu Mawu Ruata!"

⁹Tanne wisara laļumanna'a indi tumba'u wisara su taumata apan tuttuřrutta atorannu sunatta? Ara'e lai iwabbisara su taumata apan tawe tumuřrutta atorannu sunatta? Suete nisaggo ng kami paarorone, manungku Abraham tinarimmattu Mawu Ruata maola'a sangkatou taumata apan maaļuassa naung-Nge, ana waugu Abraham mangngimanna Mawu Ruata. ¹⁰E, angngerate Mawu Ruata mapaalįatta'u olangnge udde? Su tempo Abraham taambe nisunatta ara'e suete nisunatta? Atonna tantaļanna itou taambe nisunatta, waļine napawe itou suete nisunatta. ¹¹Itou nisunatta murine, wuřru sunatti tou tumba'u maola'a sambau tatiala manungku Mawu Ruata suete nanengkamma sitou maola'a taumata apan maaļuassa naungngu Mawu Ruata. Itou tinarimmattu Mawu Ruata su tempo itou taambe tinumuřrutta atorannu sunatta. Wuřru Abraham naola'a iamangngu manga taumata apan mangngimanna Mawu Ruata, wuřru ana waugu itou suete tinarimmattu Mawu Ruata maola'a sangkatou taumata apan maaļuassa naung-Nge, salaiwe imangitou tawe tumuřrutta atorannu sunatta. ¹²Abraham lai iamangngu manga taumata mangngimanna apan tuttuřrutta atorannu sunatta. Itou lai iamangngu manga taumata mangngimanna waļine tumba'u ana waugu imangitou tuttuřrutta atorannu sunatta, arawe imangitou lai apan mabbiakka ringannu mangngimanna Mawu Ruata, ere lai Abraham su tempo itou taambe tinumuřrutta atorannu sunatta.

Paaire Mawu Ruata nisengkamma ana waugu mangngimanna Mawu Ruata

¹³Mawu Ruata na'ire si Abraham wuḥḥu pabbawalage manungku runia indi sarun maola'a pussa'a n Abraham. Mawu Ruata na'ire aroddi waḥine ana waugu Abraham matuḥḥutta tita n agama Yahudi, arawe ana waugu itou mangngimanna Mawu Ruata na'oma n sara itou tinarimmattu Mawu Ruata maola'a sangkatou taumata apan maaluassa naung-Nge. ¹⁴Ana waugu amungkangngu tumba'u manga taumata apan tuttuḥḥutta su manga tita n agama Yahudi apan sarun manengkamma paaire Mawu Ruata, ne pangangimanne su Mawu Ruata tawe gunane saran adio'a, wuḥḥu paaire Mawu Ruata lai wahia atonna. ¹⁵Tita n agama Yahudi mandanta n ruumannu Mawu Ruata. Arawe amungkangngu tawe tita, ne tawe laḥawangnga lai.

¹⁶Nariaddi paaire Mawu Ruata udde pinangaiananne wuassu pangangimannu taumata su Mawu Ruata. Udde maola'a sambau paaire su anambo n pabbawalagi Abraham manungku paaire udde nioggola simangitou maola'a sambau aonggola apan tawe bawalinne wuassu Mawu Ruata; waḥine tumba'u simangitou apan matuḥḥutta tita n agama Yahudi, arawe simangitou lai apan mangngimanna Mawu Ruata ere Abraham mangngimanna Sitou. Ana waugu ete Abraham udde iamangngi ite sarangkanambone, su ola'u pangangimanna. ¹⁷Ana waugu Mawu Ruata nabbisara arendi si Abraham, "Ia'u suete nandiaddi si'o iamangngu aḥawo'u pabbawalaga." Aroddite Mawu Ruata nangonggolu paaire udde si Abraham. Wuḥḥu Abraham mangngimanna Sitou. Ete Itou Mawu Ruata apan mapaawiakku taumata nate; ete Itou lai Mawu Ruata apan ringannu tumba'u mabbisara ma'ola'a apa apan taambe naola'a su runia, mariaddi su runia. ¹⁸Abraham sidutu mangngantimma wuḥḥu mangngimanna salaiwe tate antimma lai. Ana waugu udde itou naola'a iamangngu aḥawo'u pabbawalaga. Ere uawoḥḥetta sulalummu Wuke Susi, "Pabbawalagu sarun mariaddi manambo atonna." ¹⁹Abraham tempo udde masingkata manungku itou tate lai maasomba pabbawalaga, ana waugu itou tumanite n timmadde, wuḥḥu uukke maranite maffasutta su tonane; see lai Sara awingnge udde tinna. Arawe pangangimanni Abraham tawe naurangnga. ²⁰Itou sidutu mangngimanna wuḥḥu tawe mappapadua su paaire Mawu Ruata. Ewe'e naatohassa lai pangangimanni tou, na'oma n sara sidutu itou mangke maddalo Mawu Ruata. ²¹Itou mangngimanna atonna manungku Mawu Ruata wotongnge manipussa paaire-Ne. ²²Ana waugu udde Abraham nitarimmatu Mawu Ruata maola'a taumata apan maaluassa naungngu Mawu Ruata. ²³Wisara "tinarimmatta maola'a sangkatou taumata apan maaluassa naungngu Mawu Ruata"

uawořretta wařine tumba'u si Abraham sassane, ²⁴arawe siite lai. Iite sarun itarimmata ere sangkatou taumata apan maaluassa naunggu Mawu Ruata, ana waugu iite mangngimanna Mawu Ruata apan suete napaa-wiakku Mawu Yesus, Mawu ng kite wuassu papate. ²⁵Mawu Yesus udde suete tinantilla iapapate ana waugu manga rosa ng kite, see Itou nia-paawiakku Mawu Ruata apia, tadea'u iite maaukka apia ringannu Mawu Ruata.

Maaukka apia ringannu Mawu Ruata

5 Orassa indi iite suete naaukka apia ringannu Mawu Ruata, ana waugu iite mangngimanna. Wuřru ana waugu udde iite mabbiakka sulařummu paddarame ringannu Mawu Ruata sulařummu Mawu ng kite Yesus Kristus. ²Ana waugu iite mangngimanna Mawu Yesus, ne Itou namala ng kite mamendamma darangngu Mawu Ruata, wuřru ringannu darangngu udde, iite lulluassa ana waugu iite pia antimma manungku iite sarun maapendamma alařuassa apan ionggolu Mawu Ruata! ³Wuřru nangillembo wua isudde, iite lai lulluassa sulařummu asasusa, ana waugu iite masingkata manungku asasusa ma'aola'a taumata mařrimadda, ⁴wuřru ařarimadda ma'aola'a taumata tawe awono'anna; ete indi apan mapaaliatta'u pangangantimma. ⁵Pangangantimma ereindi tawe mapaaddio'u naungngi ite, ana waugu naungngi ite suete nillořroannu Mawu Ruata ringannu darangngu-Ne. Mawu Ruata nammanara udde ringannu Ghařraho-Ne, apan suete nionggola siite.

⁶Su tempo iite sulařummu alařlome, Kristus nate ana waugu iite, su tempo apan suete nitantunu Mawu Ruata; sumbaři iite manga taumata marau Mawu Ruata. ⁷Su sangkatou taumata apan matuřida lai taumata maddiri mate. Asinungka hunane tumba'u su sangkatou apan mapia, piaddu lai maapulu mate. ⁸Arawe Mawu Ruata napaaaliatta'u darangngu-Ne siite su tempo Mawu Yesus nate ana waugu iite, su tempo iite ta'e sulařummu rosa. ⁹Orassa indi iite naaukke apia ringannu Mawu Ruata sulařummu papate n Kristus; ana waugu udde sulařummete iite masařamatta lai wuassu asasa'u Mawu Ruata ana waugu Kristus. ¹⁰Amungkangngu su tempo iite uasaseettu Mawu Ruata, naasomba paddarame ringanni Tou sulařummu papate n Anang-Nge, lembonete orassa indi paa'aukka iite ringannu Mawu Ruata mapiate apia, natan-tunte iite sarun masařamatta lai sulařummu wiakki Kristus. ¹¹Wuřru nangillembo wua isudde, iite lai lullala'a ana waugu apapia Mawu Ruata sulařummu Mawu ng kite Yesus Kristus. Ana waugu sulařummu Mawu Yesus, iite orassa indi naapendampe paa'aukka iite apan mapia udde ringannu Mawu Ruata.

Adam wuṛru Kristus

¹²Rosa sinumutta sulaḷummu runia wuassu sangkatou taumata, wuṛru wuassu rosa udde nilumappute papate. Sombangge, papate udde nangeṛrote n anambo n taumata, ana waugu sarangkanambone marosate. ¹³Tantaḷanna tita n agama Yahudi taambe nionggola, rosa sulaḷumpe n runia. Arawe rosa taambe niapaasaḷa ana waugu taambe tita apan lallawanganna. ¹⁴Arawe ro'e n su tempo n Adam na'oma n sara tempo n Musa, papate uataṛṛino anambo n taumata. Ewe'e lai manga taumata apan tawe na'ola'a pasasaḷa ere niola'i Adam, manga taumata udde lai sulaḷummu taṛṛino m papate.

Eteudde Adam tuḷada n Tou apan sarun rumanta saḷimmurine. ¹⁵Arawe itarua udde uapapaṛṛala; ana waugu aonggololu Mawu Ruata mannamboanna marau amungkangngu isuḷungngu pasasaḷa apan niola'i Adam. Pasasaḷa n sangkatou naaola'a taumata nambo nate. Lembo n ahewaḷanne lai bawaḷissu darangngu Mawu Ruata wuṛru asasaḷamatta apan nionggola su anambo n taumata, sulaḷummu apapia naungngu sangkatou taumata, eteudde Mawu Yesus Kristus. ¹⁶Aonggololu Mawu Ruata lai lembo n anamboanne wuassu rosa n taumata sangkatou udde. Ana waugu napawe sangkatou taumata na'ola'a pasasaḷa, sinumabbangke wisara laṛṛawessa, "Nassaḷa". Arawe napawe manambote taumata na'ola'a rosa, dirumantate aonggololu Mawu Ruata apan namasingkata manungku, "Tawe nassaḷa". ¹⁷Ana waugu pasasaḷa n sangkatou, papate nangeṛro n taumata nambo wuassu taumata sangkatou udde. Lembo n ahewaḷanne lai wawaḷissu apa apan niola'u sangkatou taumata waine lai, eteudde Yesus Kristus. Sulaḷummu Mawu Yesus Kristus, Mawu Ruata suete nangaḷamatta anambo n taumata, wuṛru ringannu tawe bawaḷinne madea'a imangitou masasangkapia apia ringannu Mawu Ruata; imangitou sarun mamarenta su runia indi sulaḷummi Kristus.

¹⁸Nariaddi, su ereapa laḷawangngu sangkatou taumata nangeṛro n anambo n taumata iṛruumanna, aroddi lai inolaannu sangkatou taumata apan tuttuṛṛutta apulu Mawu Ruata, na'ola'a anambo n taumata naḷiu wuassu pasasaḷa wuṛru nionggolaṅnu wiakka. ¹⁹Wuṛru su ereapa anambo n taumata naola'a taumata marosa ana waugu sangkatou taumata apan maḷawangnga, aroddi lai manambo taumata iwala masasangkapia apia ringannu Mawu Ruata ana waugu pia sangkatou apan matuṛṛutta Mawu Ruata.

²⁰Apan nangagillu tita n agama Yahudi eteudde Mawu Ruata sassane. Arawe napawe taumata lembo n tuttuṛṛutta tita udde, imangitou lembo n lullawangnga wuṛru ma'ola'a rosa su saruannu Mawu Ruata. Arawe salaiwe taumata lembo ma'ola'a rosa, Mawu Ruata lembo ma-


ranggu lai simangitou. ²¹Ne, iite řinone mate ana waugu iite ma'ola'a rosa. Arawe Mawu Ruata mandangngu siite wuřru nangagilu lařanne siite mabelengnga apia ringanni Tou. Wuřru ana waugu paa'aukka iite ringannu Mawu Ruata naola'e mapia, Itou nangonggola apia wiakka tutune wuřru sara mařannu-řannu siite sulařummu Yesus Kristus Mawu ng kite.

Nanantangngu rosa wuřru mabbiakka uaaukka ringanni Kristus

6 Amungkangngu aroddi, apa apan sarun iwisara ng kite? Řinowe iite sidutu ma'ola'a rosa, tadea'u Mawu Ruata lembo mandangngu siite? ²Tawe! Rosa tate lai uatařřino siite, nariaddi, řatadde iite sidutu mabbiakka ringannu ma'ola'a rosa? ³Manga tuřrangnga masingkata manungku su tempo iite nissařřani, iite ni'aukka ringannu Mawu Yesus Kristus? Indi pandumanne iite iapaaukka ringannu papate-Ne. ⁴Ringannu sasarařřani udde iite nilabingnga su sambau ringanni Kristus wuřru nate suadio'a ringanni Tou, tadea'u su ereapa Kristus niapaawiakka wuassu papate, wuassu tařřino n Iamangnga apan mawantuga, aroddi lai iite wotongnge maapendama wiakka apan wakku.

⁵Amungkangngu iite naaukke ringannu Mawu Yesus, ana waugu iite nate su sambau ringanni Tou, iite maola'a sambau ringanni Tou lai, ana waugu iite suete niapaawiakka apia ere lai Itou. ⁶Iite masingkata manungku pallařagu ng kite apan tabbe suete nipate su adio'a ringanni Kristus su alu arussa tadea'u tařřino m pallařagu ng kite apan marosa udde niramme; ringannu aroddi iite tate lai allangngu rosa. ⁷Ana waugu amungkangngu sangkatou mate, taumata udde mařiu wuassu tařřino n rosa. ⁸Amungkangngu iite suete nate suadio'a ringanni Kristus, iite mangngimanna manungku iite lai sarun mabbiakka su adio'a ringanni Tou. ⁹Ana waugu iite masingkatta manungku Kristus suete niapaawiakka apia wuassu papate wuřru Itou tate mate apia; papate tate lai uatařřino watangan-Ne. ¹⁰Papate apan nařřia'a si Kristus ete-udde papate ana waugu rosa. Udde nariaddi tumba'u paassa ma'oma n sarangkařo'engnge. Wuřru pabbiarařřanne apan suete niamatan-Ne orassa indi eteudde mabbiakka hunane su Mawu Ruata. ¹¹Iamiu řinone mařrangngo n ririnu lai mate ana waugu rosa, arawe mabbiakka sulařummu paa'aukka apan matohassa ringannu Mawu Ruata sulařummu Yesus Kristus.

¹²Ariete lai mapaawala n rosa mamarenta pabbiarařřanna su runia tadea'u i'o tate tumuřrutta apulu apan lařeo. ¹³Arie lai i'o manantillu wageangngu wadangngu su tařřino n rosa ana waugu ipaatta su manga



Alu arussa su wowo n wuidda (6:6)

pandumanna apan laleo. Arawe tantila'e ririnu su Mawu Ruata ere taumata apan suete niingkata wuassu papate watukku pabbiaranna. Tantila'e ahewallu ririnu su Mawu Ruata tadea'u ipaatta ma'ola'a apulu Mawu Ruata. ¹⁴Rosa tate wotongnge mamarenta siamiu, ana waugu iamiu tate mabbiakka su parenta tita n agama Yahudi arawe su alungngu alamattu Mawu Ruata.

Allangnga su apulu Mawu Ruata

¹⁵Orassa indi apa panginsueanne? Wotongnge iite ma'ola'a rosa ana waugu iite tate su parenta tita n agama Yahudi, ewe'e su alungngu tarriino n alamattu Mawu Ruata? Atonna-tonna tawe! ¹⁶Iamiu masingkate manungku amungkangngu iamiu manantillu watangannu su sangkatou ipa'ola'a apulune, ne ete iamiu udde allangngu taumata apan taturrutanni amiu – tanne allangngu rosa apan nangapiddi amiu su papate, ara'e allangnga apan taturrutta Mawu Ruata, wurru ringannu aroddi sarun maaukka apia ringannu Mawu Ruata. ¹⁷Arawe adiangkamanna su Mawu Ruata! Ana waugu paarorone iamiu naola'a allangngu rosa, arawe orassa indi iamiu ringannu ahewallu naungngu taturrutta alarra'a narriino apan suete nionggola siamiu. ¹⁸Iamiu suete nipallosa wuassu rosa, wurru orassa indi naola'e allangngu apulu Mawu Ruata. ¹⁹Ana waugu pasasunnanu aroddi alomene, ia'u mappattu manga ola'u patataruallangnga tadea'u iamiu wotongnge maasunna. Dorone iamiu mannantillu ririnu maola'a allangngu manga inolaanna

apan maarantina wuṛṛu apan laḷeo su pandumanna apan laḷeo. Arod-di lai orassa indi, ṛinone iamiu manantillu ahewallu watanganni amiu maola'a allangngu apulu Mawu Ruata su pandumannu Mawu Ruata sas-sane.

²⁰Su tempo iamiu paparentannu rosa, iamiu tawe paparentannu apulu Mawu Ruata. ²¹Su tempo udde auntunganna apa apan niseng-kammi amiu wuassu manga inolaanna apan orassa indi maasili siamiu amungkangngu olaanna? Manga inolaanna udde tumba'u mangapidda su papate! ²²Arawe orassa indi iamiu suete niapaaliu wuassu rosa, wuṛṛu naola'e allangngu Mawu Ruata. Auntungannu eteudde manungku i'o mabbiakka tumba'u hunane su Mawu Ruata wuṛṛu su olangnge udde sarun mandanta n wiakka tutune wuṛṛu saran maḷannu-ḷannu. ²³Ana waugu papate udde sombangngu paddarosa; arawe wiakka tutune wuṛṛu saran maḷannu-ḷannu su sambau ringanni Kristus Yesus Mawu ng kite eteudde aonggolu Mawu Ruata siite ringannu tawe bawalinne.

Tita m paa'awingnga maola'a tuḷada

7 Manga tuṛrangku! Tuṛrangnga sarangkanambone naasingkatte tita udde. Nariaddi iamiu masingkata manungku taṛṛino n tita su sangkatou taumata tumba'u mariaddi amungkangngu taumata udde ta'e wiakka. ²Sangkatou wawine apan piate awingnge, tuḷaddane, tuttuṛrutta tita n awingnge amungkangngu awingnge ta'e wiakka. Amungkangngu awingnge natete, itou naḷiute wuassu tita n awingnge udde. ³Amungkangngu wawine udde mabbiakka ringannu sangkatou esakka waine su tempo awingnge ta'e wiakka, ne wawine udde isassago sinumandaga. Arawe amungkangngu awingnge natete, ne sulaḷummu tita, wawine udde naḷiute. Wuṛṛu amungkangngu itou naawingnga apia ringannu sangkatou esakka waine, ne itou tawe sinumandaga. ⁴Arod-di lai iamiu, manga tuṛrangku. Su tita n agama Yahudi iamiu natete, ana waugu iamiu suete niapaaukka ringannu wadangngi Kristus wuṛṛu naola'a pussa'a-Ne apan suete niapaawiakka apia wuassu papate. Itou niapaawiakka wuassu papate tadea'u iite maola'a pia gunane su lantakku hati Mawu Ruata su aḷo'engngu pabbiaṛrani ite. ⁵Ana waugu dorone, iite mabbiakka tuttuṛrutta pallaḷagu n taumata. Su tempo udde manga apulu apan ma'aola'a rosa, apan nilumapputa ana waugu tita n agama, uataṛṛino su wadangngi ite. Ana waugu udde iite ma'ola'a inolaanna apan maapate. ⁶Arawe orassa indi iite tate lai aiitannu tita n agama Yahudi. Iite natete wuassu tita apan dorone uaparenta siite. Iite tate lai tumuṛrutta ere tatuṛrutta apan dorone, tuttuṛrutta tita apan uawoṛṛetta.

Orasa indi iite tumuřřutte ringannu ta tuřřutta wakku apan nipanti-ngiddu Gharřaho Mawu Ruata siite.

Tita wuřřu rosa

⁷Amungkangngu aroddi, apa ipabbisara ng kite? Manungku tita n agama Yahudi lařeo? Asinungka tawe. Arawe ete tita udde apan nangařřa'a sia'u su ola'u rosa. Ia'u sarun tawe maasingkatta awa-wařiu udde apa, amungkangngu tawe tita n agama namasingkatta. "Imbařřangnga wařiu." ⁸Sulařummu tita n agama, rosa pia tempone mappalaputu ařawo'u apulu apan wařiu sulařummu naungku, ana waugu amungkangngu tawe tita n agama, ne rosa lai mate. ⁹Ia'u dorone mabbiakka tawe tita n agama. Arawe napawe tita n agama nirumanta, rosa mannattake mabbiakka wuřřu ia'u natete. ¹⁰Ne tita n agama udde, apan paarorone tuaddane mangngonggolu wiakka, ewe'e sařimmurine nandanta m papate sia'u. ¹¹Ana waugu wuassu lařummu tita n agama udde, rosa naasomba tempone namahia wuřřu namate sia'u.

¹²Tita n agama udde wuassu Mawu Ruata, wuřřu ařawo'u parenta sulařummu tita udde nirumanta wuassu Mawu Ruata, aroddi atuřide wuřřu apiane. ¹³Ei, apa indi atappasanne manungku apapia udde mandanta m papate sia'u? Asinungka tawe! Tumba'u rosa apan mandanta m papate udde. Ringannu mappaattu apapia, rosa mandanta m papate sia'u, tadea'u pallařagu n rosa aasiloanna ringannu masemakka. Wuassu lařummu manga parenta Mawu Ruata, niatialanna manungku lařeo atonna rosa udde.

Pattatiakka sulařummu wadangngu taumata

¹⁴Iite masingkata manungku tita n agama Yahudi inasaputanne wuassu Gharřaho Mawu Ruata; arawe ia'u indi taumata lome. Ia'u suete niwařu'a naola'a allangngu rosa. ¹⁵Ana waugu ia'u sassane tawe maasunna pallařagu'u. Manga inolaanna apan ipaapulu'u, tawe ta'u olaanna, arawe manga inolaanna ipaadiri'u, udde a'olaangku. ¹⁶Ne, amungkangngu ia'u ma'ola'a manga inolaanna apan tawe ipaapulu'u udde, atappasanne manungku tita n agama Yahudi udde mapia. ¹⁷Nariaddi, wařinewe ia'u pia inolaanna udde, ewe'e rosa apan uaparenta sia'u. ¹⁸Ia'u masingkata manungku tawe saran sambau apan mapia sulařummu riri'u, eteudde su pallařagu'u ere sangkatou taumata. Ana waugu ia'u lai pia apulu ma'ola'a apapia, arawe ia'u tawe maatuřřutta. ¹⁹Ia'u tawe ma'ola'a apapia apan ipaapulu'u; arawe ia'u ma'ola'a inolaanna apan

laḷeo, apan ipaaddiru. ²⁰Amungkanngu ia'u ma'ola'a manga inolaanna apan tawe ipaapulu'u, udde atappasanne waḷinewe ia'u apan ma'ola'a manga inolaanna udde, ewe'e rosa apan uaparenta sia'u.

²¹Nariaddi, ia'u nakkawessa manungku tita indi ḷinone pangimananni ite: eteudde manungku amungkanngu ia'u maddiru ma'ola'a apapia, ne tumba'u aḷaḷeo apan lumatto su riru'u. ²²Naungku maapulu n tita Mawu Ruata, ²³arawe ia'u naatutukka manungku sulaḷummu riru'u pia lai tita waine apan uaagassa parenta – eteudde tita apan uapapaḷḷala n tita apan suete nia'u naungku. Ana waugu udde ia'u mangke paparentannu tita n rosa apan uaparenta sulaḷummu riru'u. ²⁴⁻²⁶Ne, aroddite ola'u riru'u; ia'u tuttuḷḷrutta tita Mawu Ruata ringannu ḷingirḷḷrangku, arawe ringannu pallaḷagu'u ere sangkatou taumata, ia'u uasuffubawa su rosa. Tumanite naḷongonna ia'u indi! Isai maapulu manaḷamatta sia'u wuassu wadangnga indi apan mangngapi'u su papate? Adiangkamanna su Mawu Ruata! Itou maapulu manaḷamatta sia'u sulaḷummu Mawu Yesus Kristus.

Mabbiakka tumuḷḷruttu Ghaḷḷraho Mawu Ruata

8 Orassa indi tate lai ḷuumanna simangitou apan mabbiakka su sambau ringannu Mawu Yesus. ²Ana waugu tita n Ghaḷḷraho Mawu Ruata apan na'ola'a siite mabbiakka su sambau ringannu Mawu Yesus Kristus apan suete napaaliu'u wuassu tita apan maarosa wuḷḷru maa'ate. ³Apa apan tawe ia'ola'u tita n agama, ana waugu iite taumata lome, udde suete niola'u Mawu Ruata. Mawu Ruata napaarau n rosa wuassu pallaḷagu n taumata ringannu nandolokku anang-Nge sassane, apan nirumanta ere sangkatou taumata apan marosa, ana waugu manubussa rosa. ⁴Mawu Ruata na'ola'a udde tadea'u apulu-Ne apan niapaaliatta'a sulaḷummu tita n agama Yahudi udde wotongnge olaanna sulaḷummu wadangnga ite apan mabbiakka tuttuḷḷrutta Ghaḷḷraho Mawu Ruata wuḷḷru waḷine tuttuḷḷrutta pallaḷagu n taumata. ⁵Manga taumata apan mabbiakka tuttuḷḷrutta pallaḷagu n taumata, sidutu maḷḷringidda apa apan ipaapulu m pallaḷagu n taumata. Arawe manga taumata apan mabbiakka tuttuḷḷrutta Ghaḷḷraho Mawu Ruata sidutu maḷḷringiddu apa apan ipaapulu Mawu Ruata. ⁶Amungkanngu ḷingirannu paparentannu pallaḷagu n taumata, ne sombangnge udde papate. Arawe amungkanngu ḷingirannu paparentannu Ghaḷḷraho Mawu Ruata, ne sombangnge eteudde mabbiakka su paddarame ringannu Mawu Ruata. ⁷Taumata apan ḷingiranne paparentannu pallaḷagu n taumata, taumata udde uasasettu Mawu Ruata, ana waugu taumata udde maddiru tumuḷḷrutta tita

Mawu Ruata; wuṛru atonna itou tawe maatuṛrutta apulu Mawu Ruata. ⁸Manga taumata apan mabbiakka tuttuṛrutta pallaḷagu n taumata, tawe maaḷuassa naungngu Mawu Ruata.

⁹Arawe iamiu tawe mabbiakka tuttuṛrutta apulu n taumata. Iamiu mabbiakka tuttuṛrutta Ghaṛṛaho Mawu Ruata – amungkangngu atonna-tonna Ghaṛṛaho Mawu Ruata uaparenta sulaḷummu watanganni amiu. Taumata apan tawe uatahuanna Ghaṛṛaho n Kristus, taumata udde waḷine tatahuananni Kristus. ¹⁰Arawe amungkangngu Kristus mabbiakka sulaḷummu ririnu, ne salaiwe wadangngu mate ana waugu rosa, arawe Ghaṛṛaho Mawu Ruata sidutu mangngonggolu wiakka siamiu, ana waugu paa'aukki iamiu ringannu Mawu Ruata mapiate. ¹¹Amungkangngu Ghaṛṛaho Mawu Ruata apan napaawiakki Kristus wuassu papate, mabbiakka sulaḷummu ririnu, ne Itou apan napaawiakki Kristus wuassu papate udde, mapaawiakku ririnu lai apan wotongnge mate udde. Itou na'ola'a udde ringannu Ghaṛṛaho-Ne apan mabbiakka sulaḷummu ririnu.

¹²Ana waugu udde, manga tuṛrangnga, iite pia manara mandiaga; arawe waḷine manara su paa'apulu m pallaḷagu n taumata; iite tawe wotongnge mabbiakka tumuṛruttu apulune. ¹³Amungkangngu iamiu mabbiakka tuttuṛrutta apulu n taumata, iamiu sarun mate; arawe amungkangngu ringannu taṛrino n Ghaṛṛaho Mawu Ruata, iamiu lapiddu mamallossu manga pallaḷagunu apan marosa, ne iamiu sarun mabbiakka. ¹⁴Manga taumata apan aebetannu Ghaṛṛaho Mawu Ruata, imangitou udde aḷaṛṛana'u Mawu Ruata. ¹⁵Ana waugu Ghaṛṛaho apan suete nionggolu Mawu Ruata siamiu, tawe ma'ola'a siamiu allangnga, ma'oma n sara iamiu mabbiakka sulaḷummu atata'utta. Arawe Ghaṛṛaho Mawu Ruata udde nandiaddi siamiu maola'a aḷaṛṛana'u Mawu Ruata. Wuṛru ringannu taṛrino n Ghaṛṛaho Mawu Ruata udde, iite mammago Mawu Ruata "Iamangnga, o Iamanku!" ¹⁶Ghaṛṛaho Mawu Ruata suadio'a ringannu ghaṛṛaho ng kite napaaliatta'a ete iite udde aḷaṛṛana'u Mawu Ruata. ¹⁷Ne, amungkangngu ete iite aḷaṛṛana'u Mawu Ruata, ne iite lai mananahuanna apan sarun manengkamma manga aḷamatta apan suete nissaddia Mawu Ruata su manga aḷaṛṛanang-Nge. Iite sarun manengkamma suadio'a ringanni Kristus apa apan suete nissaddia Mawu Ruata Sitou; ana waugu amungkangngu iite uatataṛrangnga su sambau ringanni Kristus, iite sarun wantuhanna lai su sambau ringanni Kristus.

Awawantuga sarangkaḷo'engnge

¹⁸Anambo n asasusa apan aapendamanni ite orassa indi, tumuṛruttu addapa'u, tawe iasulungnga sara ng kadio'a ringannu awawantuga apan

sarun iapaaljatta'a siite. ¹⁹Ahewallu pati'uppu runia uararado ringannu rintulu tempone Mawu Ruata mapaaljatta'u alararang-Nge. ²⁰Ana waugu pati'uppu runia niwalate mawinasa, waline ana waugu apulune sassane, arawe ana waugu Mawu Ruata namalate n tou aroddi. Salaiwe aroddi pia lai antimma arendi: ²¹manungku su sambau tempo pati'uppu runia sarun iapaalju wuassu tarfino apan maawinasa wurru sarun mawali sumutta su alaluassa wurru wantuhanna su sambau ringannu alararana'u Mawu Ruata.

²²Iite masingkata manungku sara orassa indi ahewallu pati'uppu runia sussaande ana waugu asasusa, naalihida ere sangkatou inangnga uatataranga su tempo mangunsiwe. ²³Wurru waline tumba'u pati'uppu runia sassane sussaande; iite sassane lai sussaande sulaummu naungngi ite. Iite suete nanengkamma Gharraho Mawu Ruata, aonggolu Mawu Ruata apan paarorone, arawe iite lai ta'e uararado Mawu Ruata mapaalju ng kite wuassu sarangkanambone, wurru manga'u siite maola'a alararang-Nge. ²⁴Ana waugu ringannu mangngantimma, iite sarun masalamatta. Arawe amungkangngu apa apan aantimanni ite suete niasiloanni ite, ne udde waline lai antimma. Ana waugu isai lai mangantimma apa apan suete niasiloanne? ²⁵Arawe amungkangngu iite mangngantimma apa apan taambe niasiloanni ite, ne iite rinone uararado ringannu asasabare.

²⁶Aroddi lai Gharraho Mawu Ruata nirumanta mantulungngi ite amungkangngu iite lome. Ana waugu iite wagga ereapa rinone iite umaljomanna; Gharraho udde sassane sumaruanna Mawu Ruata sumalande huna ng kite ringannu ahewallu rintulu, na'oma n sara tawe iawisara. ²⁷Ne Mawu Ruata, apan masingkatu lalorro naungngu tau-mata, maasunna apulu n Gharraho udde; ana waugu Gharraho udde sussaande Mawu Ruata huna ng kalararana'u Mawu Ruata wurru nasulungngu apulu Mawu Ruata.

²⁸Iite masingkata manungku Mawu Ruata mangngatokku alawo'u inolaanna indi, na'oma n sara mabbua mapia hunane su manga tau-mata apan marangngu Sitou wurru apan niwagoan-Ne ringannu apulu-Ne sassane. ²⁹Imangitou lai suete nipile Mawu Ruata, wurru suete nitantuna lai wuassu paarorone maola'a massulungngu Anang-Nge, eteudde Yesus Kristus. Ringannu aroddi Anang-Nge naola'a paarorone su wallattu anambo n manga turrangnga. ³⁰Ete aroddi Mawu Ruata namaggo simangitou apan suete nipile paarorone; wurru imangitou apan niwagoanne udde, niwala maaukka apia ringanni Tou. Wurru imangitou apan niwala apia maaukka ringannu Mawu Ruata, nanganu wageangnge sulaummu awawantugu Mawu Ruata sassane.

Daranggu Mawu Ruata sulaŕummu Mawu Yesus Kristus

³¹Apa apan wotongnge iwisara orassa indi su ola'u sarangkanambone udde? Amungkanngu Mawu Ruata uasamba'a siite, isai wotongnge lumawangnga siite? ³²Anang-Nge sassane tawe niakkan-Ne, ewe'e tinantilli Tou hunane siite sarangkanambone, řatade Itou tawe mangonggolu aŕawo'u hausanna waine siite? ³³Isai wotongnge mapaasaŕa ng kite taumata apan suete nipile Mawu Ruata, amungkanngu Mawu Ruata sassane napaalĭatta'a manungku iite tawe saŕane? ³⁴Apa pia taumata apan mapaasaŕa ng kite? Kristus Yesus sarun manamba'a siite. Ete Itou apan suete nate, ara'e ete Itou apan suete nabbiakka apia wuassu papate wuřru tampane ringannu Mawu Ruata, isudde Itou mammarenta. ³⁵Apa pia taumata apan wotongnge maningaddi Kristus umakkanni ite? Wotonggewe asasusa maasingaddi Tou, ara'e asahadda, ara'e pananasara, ara'e arařrutumma, ara'e paa'asiangnga, ara'e asasilaka, ara'e papate? ³⁶Sulaŕummu Wuke Susi uawořretta arendi,

"Su aŕo'engngu allo iami mabbiakka uasaruanna papate ana waugu
To Mawu.

Iami niola'a naalĭhida ere domba apan řatante."

³⁷Tawe! Ewe'e sulaŕummu sarangkanambone udde iite naasomba auntinganna apan nasuungnga ana waugu Itou apan niuukkani ite! ³⁸Ana waugu ia'u mangngimanna atonna, manungku su ahewallu runia, mapia ete papate aroddi lai sulaŕummu mabbiakka, mapia ete mala'ekatta aroddi lai tembonannu runia, mapia ete papata'utta tempo indi aroddi lai su tempo addantane, ara'e manga tařřino apan waine; ³⁹mapia ete manga inolaanna su langitta, ara'e su wowo n runia ara'e sarannapa lai waine, sarangkanambone udde tawe wotongnge maasingaddu aakkannu Mawu Ruata siite, ere suete niapaasingkati Tou su pabbiařřani Kristus Yesus Mawu ng kite.

Mawu Ruata wuřru aŕařřanang-Nge apan napile

9 Apa apan sarun iwisara'u indi atonna ana waugu ia'u tatahuananni Kristus. Ia'u tawe mamahia. Naungku apan aehetannu Ghařřaho Mawu Ruata mannohassa sia'u lai manungku wisara'u indi atonna. ²Ia'u tumanite massusa wuřru naungku uatatařřanga sansara ³ana waugu manga tuřřangnga sambalahangku. Ana waugu ete simangitou, ia'u sassane maŕuassa wontohannu Mawu Ruata wuřru iapaataŕei wuassi

Kristus. ⁴Ete imangitou udde pabbawalaga apan nipile wuṛru Mawu Ruata nanga'u simangitou maola'a aḷaṛṛanang-Nge sassane, lapiddu na-paḷiatta'u taṛṛino-Ne simangitou. Itou na'ola'a paaire simangitou wuṛru nangonggolu tita n agama simangitou. Mawu Ruata namasingkata simangitou ereapa imangitou ṛinone mattaṛramawu wuṛru imangitou suete nanengkamma lai manga paaire-Ne. ⁵Ete imangitou udde papapulunna wuassu iupungngu aḷamona ng kite. Kristus su olangnge ere sangkatou taumata wuassu pabbawalagi mangitou. Itou lembo n atangaṛṛanne wuassu sarangkanambone. Paddalote Mawu Ruata sarangkaḷo'engnge! Amin.

⁶Ia'u tawe pandumma mamasingkata manungku paaire Mawu Ruata tate ipaatta lai; arawe waḷine anambo n taumata n Israel udde pabbawalaga apan nipile Mawu Ruata. ⁷Waḷine anambo r. papapulunni Abraham udde maola'a aḷaṛṛana'u Mawu Ruata. Ana waugu Mawu Ruata nabbisara si Abraham, "Tumba'u papapulunni Ishak apan isaggo papapulunnu." ⁸Udde atappasanne manungku papapulunni Abraham apan maola'a aḷaṛṛana'u Mawu Ruata, tumba'u papapulunne apan niasungkangnga ana waugu paaire Mawu Ruata; wuṛru waḷine anambo n papapulunne. ⁹Ana waugu paaire Mawu Ruata ereindi, "Su tempo apan suete tinantunna, Ia'u sarun mabelengnga, wuṛru Sara sarun maasomba sangkatou ana'a esakka."

¹⁰Wuṛru indi lai: Ribka mangunsiwe n rua ng katou ana'a esakka wuassu iamangnga sambau; eteudde Ishak iupungngu aḷamona ng kite. ¹¹Tantaḷanna ana'a darua udde taambe niasungkangnga, Mawu Ruata suete nanantunnu aḷaṛṛanang-Nge apan nipile manansunna. Pamamile Mawu Ruata udde tawe uaantimma apa apan wotongnge olaannu taumata, arawe uaantimma wawaggo Mawu Ruata sassane. Ana waugu su tempo ana'i Ribka rua ng katou esakka udde taambe maaola'a manara mapia ara'e laḷeo, ¹²Mawu Ruata suete namasingkata si Ribka, "Iaangnge sarun mangimbe tuarine." ¹³Sulaḷummu Wuke Susi uawoṛṛetta manungku Mawu Ruata namasingkata ereindi, "Yakub arangnguang-Ku, arawe Esau ipaadi-U."

¹⁴Apa panginsueannu ṛingirṛanni ite orassa indi? Manungku Mawu Ruata udde tawe matuḷida? Atonna Mawu Ruata udde matuḷida! ¹⁵Ana waugu Mawu Ruata nabbisara si Musa, "Ia'u sarun mapaḷiatta'u aḷamatta su taumata apan Ia'u maapulu mangaḷamatta, Ia'u sarun mapaḷiatta'u darangngu-U su taumata arangnguang-Ku." ¹⁶Nariaddi, Mawu Ruata nakkawessa udde waḷinewe ana waugu su apulu n taumata ara'e su pamamanara n taumata, ewe'e su apapia naungngu Mawu Ruata su taumata apan suete nipile-Ne udde. ¹⁷Ana waugu sulaḷummu Wuke Susi uawoṛṛetta, "Mawu Ruata nabbisara su Ratu Mesir, 'Ia'u ma'ola'a si'o ratu ana waugu sambau pandumanna indi, eteudde tadea'u

ringannu ririnu Ia'u mapaaliatta'u araratuang-Ku wuɽɽu ma'ola'a arang-Ku asingkatannu laɽoɽo n runia." ¹⁸Nariaddi Mawu Ruata mandangu sangkatou, amungkanngu Mawu Ruata maapulu aroddi. Mawu Ruata mammala n sangkatou taumata maɽawangnga, amungkanngu Mawu Ruata maapulu aroddi lai.

Asasa'u Mawu Ruata wuɽɽu apapia naungngu Mawu Ruata

¹⁹Ne, tuɽrangnga sarun mabbisara sia'u, "Amungkanngu aroddi anio Mawu Ruata ta'e mapaasala n taumata? Waɽine tawe saran sangkatou wotongnge maapaningadu apulu Mawu Ruata?" ²⁰Arawe, tuɽrangnga! Tuɽrangnga tumba'u sangkatou taumata. Wuɽɽu tuɽrangnga tawe waɽrani sumimbakka Mawu Ruata! Wotonggewe tampa m bunga maiwaɽo, isai taumata na'ola'a sitou, "Anio i'o na'ola'a sia'u arendi?" ²¹Waɽinewe taumata apan na'ola'a tampa m bunga udde na'ola'a leta'a udde walate apulu naungni tou? Wuassu sangkompenga leta'a taumata udde nallanginnu tampa m bunga udde darua hatine; sambau mapia wuɽɽu sambau lai tawe tumanite n mapia.

²²Aroddi lai apa apan suete niola'u Mawu Ruata. Itou maapulu ma-paasabangngu naung-Nge laɽeo wuɽɽu mapaaliatta'u taɽrino-Ne. Arawe Itou masabbare su saruanni mangitou apan sarun iɽɽuumanna ana waugu napaasa'u n Tou. ²³Mawu Ruata lai maapulu mapaaliatta'a siite aɽaɽuassa apan nasuungnga apan nionggola siite taumata arangnguan-Ne. Iite suete nisaddianni Tou manengkamma aɽaɽuassa udde. ²⁴Ete iite apan suete niwaggoan-Ne, waɽine tumba'u wuassu pabbawalagu Yahudi, arawe lai wuassu manga pabbawalaga waine. ²⁵Ana waugu sulaɽummu wuke Nabi Hosea, Mawu Ruata nabbisara,

"Manga taumata apan waɽine pabbawala-U,
sarun isaggo 'Pabbawala-U'.

Pabbawalaga apan ipaadiri-U,
sarun isaggo-U 'Arangnguang-Ku'.

²⁶Wuɽɽu su tampa udde iapaasingkata su taumata 'Iamiu waɽine aɽaɽrana-U,'

isudde manga taumata sarun isaggo aɽaɽrana'u Mawu Ruata apan wiakka."

²⁷Nabi Yesaya nabbisara ringannu maɽragissa su ola'u pabbawalagu Israel, "Salaiwe reengannu pabbawalagu Israel anambone ere anne su tahaɽoangnga, tumba'u matuɽungnga apan masaɽamatta; ²⁸ana waugu Mawu tate maɽannu lai mandanta n ɽuumanna su laɽoɽo n runia."

²⁹Yesaya nabbisara arendi lai, "Unnu wisara Mawu Ruata Lembo

Matarrino tawe nanantangngu papapulunna siite, iite naola'e ere Sodom wuřru Gomora."

Paa'aukka alarrana'u Mawu Ruata ringannu Watti'u Alaluassa wuassu Mawu Ruata

³⁰Nariaddi, audusanne iwisara arendi: Manga pabbawalaga waine apan waline Yahudi tawe madea'a tadea'u paa'aukka mangitou ringannu Mawu Ruata maola'a apia. Arawe ana waugu imangitou mangngimanna, ne Mawu Ruata na'ola'a paa'aukka mangitou ringanni Tou naola'a apia. ³¹Arawe manga taumata n Yahudi sidutu madea'a tumurřutta tita, tadea'u paa'aukka mangitou ringannu Mawu Ruata masasangkapia apia. Arawe imangitou tawe naasomba hessine. ³²Anio imangitou tawe naasomba hessine? Ana waugu imangitou na'ola'a udde ringannu tawe mangngimanna Mawu Ruata, ewe'e su lařanni mangitou sassane. Ne imangitou nema'a natara su "Watu Atataranna". ³³Su ola'u watu udde sulařummu Wuke Susi uaworřetta arendi,

"Paanaunge indi: Su Sion suete Ta'u niaddo sambau watu

apan sarun atarannu taumata;

eteudde sambau watu wahewa apan sarun mangema'u taumata.

Arawe taumata apan mangngimanna Sitou

tawe sumassilla."

10 Manga turřangnga! Ia'u maapulu atonna tadea'u pabbawala'u masalamatta. Wuřru ia'u atonna-tonna u'aljomanna su Mawu Ruata huna mangitou. ²Ia'u wařrani mabbisara manungku imangitou mařutu atonna mattarřamawu Mawu Ruata. Arawe apulu mangitou udde tawe pinangiananne wuassu asingkattu Mawu Ruata. ³Imangitou wagga olangnge Mawu Ruata ma'ola'a paa'aukka taumata ringanni Tou maola'a apia. Wuřru ana waugu imangitou maapulu tumurřutta apulu mangitou sassane, ne imangitou maddiri tumurřutta su lařanna apan niařra'u Mawu Ruata. ⁴Tita n agama suete nitipussi Kristus. Nariaddi suapa n taumata apan mangngimanna si Kristus, paa'aukka mangitou ringannu Mawu Ruata maola'a apia.

Asalamatta udde hunane su anambo n taumata

⁵Musa namorřetta manungku taumata apan uasasangkapia Mawu Ruata pinangiananne wuassu tita n agama, taumata udde sarun mabbiakka ana waugu tuturřutta tita n agama udde. ⁶Arawe su ola'u

laḷannu taumata masasangkapia Mawu Ruata pinangiananne mangngimanna Mawu Ruata, Wuke Susi namasingkata arendi, "Ariete i'o mabbisara sulaḷummu naungngu, 'Isai apan sarun masengkengnga su surga?' (atappasanne mangapiddu Kristus sumossokka), 'ara'e, 'Isai apan sarun sumossokka su runia n taumata nate?' (atappasanne mappaa-wiakki Kristus wuassu papate)." ⁸Pandumanne arendi, "Watti'a wuassu Mawu Ruata udde marani atonna ringanni amiu; su moḗrongngu wuḗru sulaḷummu naungngu." Eteudde watti'a apan iapaasingkati ami, watti'a manungku taumata ḗnone mangngimanna. ⁹Ana waugu amungkangngu tuḗrangnga mangnga'u ringannu moḗrongngu manungku "Yesu udde Mawu", wuḗru i'o mangngimanna sulaḷummu naungngu manungku Mawu Ruata suete napaawiakku Mawu Yesu wuassu papate, i'o sarun masaḷamatta. ¹⁰Ana waugu ringannu naungnge taumata mangngimanna, na'oma n sara Mawu Ruata nanengkamma sitou naola'a sangkatou taumata apan uasasangkapia Mawu Ruata. Wuḗru ringannu moḗrongnge taumata mangnga'u, na'oma n sara itou naasomba asaḷamatta. ¹¹Sulaḷummu Wuke Susi uawoḗretta, "Taumata apan mangngimanna tawe iapaasusa." ¹²Udde mariaddi su anambo n taumata, ana waugu tawe paḗralane taumata n Yahudi wuḗru taumata m pabbawalaga waine. Mawu Ruata apan sambau eteudde Mawu Ruata n anambo n taumata. Itou mangngonggolu aḷamatta manambo-nambo su anambo n taumata apan ma'ituḷungnga Sitou. ¹³Sulaḷummu Wuke Susi uawoḗretta, "Anambo n taumata apan madorongnga su Mawu, sarun masaḷamatta."

¹⁴Arawe ereapa laḷanne taumata wotongnge maituḷungnga su Mawu amungkangngu imangitou taambe nangimanna? Wuḗru ereapa imangitou wotongnge mangngimanna Mawu amungkangngu imangitou taambe naaringikka su ola'i Tou? Wuḗru ereapa lai imangitou wotongnge maaringikka Watti'u Mawu amungkangngu tawedu mamasingkata? ¹⁵Wuḗru ereapa taumata wotongnge mangapiddu watti'a udde amungkangngu imangitou tawe nirolokka? Sulaḷummu Wuke Susi uawoḗretta arendi, "Apiawe eteapa daranta manga taumata apan uaapiddu Watti'u Aḷaḷuassa wuassu Mawu Ruata!" ¹⁶Arawe tawe anambo n taumata mannengkamma Watti'u Aḷaḷuassa udde. Ana waugu Yesaya nabbi-sara, "Mawu, isaite apan mangngimanna watti'i ami?" ¹⁷Ana waugu udde manga taumata mangngimante ana waugu imangitou naaringikka watti'a, wuḗru watti'a niaringiḗrana ana waugu pia taumata apan namasingkata su ola'i Kristus.

¹⁸Arawe ia'u maiwaḷo: Atonnawe imangitou taambe naaringikka watti'a udde? Atonna suete! Ana waugu sulaḷummu Wuke Susi uawoḗretta arendi,

"Tingikki mangitou niaringiḗrante su ahewallu runia,
manga wisara mangitou na'omate sara petakku runia."

¹⁹Ia'u maiwało apia: Apa pabbawalagu Israel taambe naasingkata? Wala'e aiwało udde paarorone simbarrani Musa. Musa nabbisara, "Arendi lai unnu Mawu Ruata,

'Ia'u sarun ma'ola'a siamiu tawe maluassa su saruannu sambau pabbawalaga apan wałine ałarřana-U
wuřru Ia'u sarun ma'ola'a siamiu masa'u su pabbawalaga apan longonna.'"

²⁰Yesaya lembo n wařrani lai. Itou nabbisara,

"Arendi lai unnu Mawu Ruata,

'Manga taumata tawe madea'a sia-U, suete nassomba-U;
wuřru Ia'u nattingkapsilo n riri-U simangitou apan tawe maiwało-U.'"

²¹Arawe su ola'u pabbawalagu Israel Yesaya nabbisara, "Arendite unnu Mawu Ruata, 'Su ało'engngu allo Ia'u mangnguľukku lima-U su sambau pabbawalaga apan maławangnga wuřru tawe tumuřrutta.'"

Apapia naungngu Mawu Ruata su pabbawalagu Israel

11 Ia'u maiwało: Apa Mawu Ruata suete nandamme m pabbawala-Ge sassane? Atonna tawe! Ia'u sassane sangkatou taumata n Israel papapulunni Abraham, wuřru wuassu řuanganni Benyamin. ²Tawe! Mawu Ruata tawe nandamme m pabbawala-Ge apan suete nipile-Ne ro'e n paarorone. Manga tuřrangnga masingkata apa apan uawořretta sulaľummu Wuke Susi su ola'i Elia, su tempo itou nangalae n hatto n taumata n Israel su Mawu Ruata, Elia nabbisara, ³"Mawu, manga taumata suete namate manga nabi-Nu wuřru narřimunsa'a manga tampa m pangangadoannu sasambanu Mawu. Ete ia'u sassane nallambe wuřru imangitou lai maapulu mamate sia'u." ⁴Apa sasimbakku Mawu Ruata si Elia? Mawu Ruata sinumimbakka, "Ia'u suete nanantangngu pitu řiwu su atoune hunane su riri-U sassane. Taambe saran paassa imangitou nassubba paaluanna Baal." ⁵Aroddi lai orassa indi: Pia sire pira manga taumata apan suete nipile Mawu Ruata ana waugu ałaman-Ne. ⁶Itou namile simangitou ana waugu pinangianannu ałaman-Ne wuřru wałine ana waugu pinangiananne pallaľagu mangitou. Ana waugu amungkangngu pamamile Mawu Ruata udde pinangiananne wuassu pallaľagu n taumata, ne ałamattu Mawu Ruata udde wałinewe ałamatta apan tutune.

⁷Nariaddi, ereapate? Pabbawalagu Israel tawe naasomba apa apan radeaanni mangitou. Naasomba udde tumba'u sire pira taumata wuassu ammuľanna adio'a apan suete nipile Mawu Ruata. Ingana'a waine sarangkanambone nabbali maławangnga su wawaggo Mawu Ruata.

⁸Ana waugu sulaḷummu Wuke Susi uawoḥḥetta arendi, "Mawu Ruata na'ola'a naungnga wuḥḥu ḥingiddi mangitou nabbali maattika; wuḥḥu na'oma n sara orassa indi mata mangitou tawe maasilo wuḥḥu taḥinga mangitou tawe maaringikka." ⁹Daud nabbisara lai,

"Wala'e manga andeangngi mangitou maola'a waḥati'a simangitou sassane,

wuḥḥu maola'a loḥrangnga, tampa mangitou manawo wuḥḥu maḥḥimunsa'a!

¹⁰Wala'e mata mangitou maddanduma tadea'u imangitou tawe maasilo;

wuḥḥu wala'e imangitou maola'a aḥudungnga sarangkaḥo'engnge."

¹¹Ia'u maiwaḥo apia; Su tempo n taumata n Yahudi nanawo, apa udde mariaddi tadea'u imangitou maḥḥimunsa'a? Atonna-tonna tawe! Arawe ana waugu imangitou marosa, ne pabbawalaga waine naasomba asasaḥamatta, na'oma n sara taumata n Yahudi tawe maḥuassa su pabbawalaga waine udde. ¹²Ana waugu pabbawalagu Yahudi nassaḥa wuḥḥu maddiri tumuḥḥrutta apulu Mawu Ruata, ne manga pabbawalaga waine niaḥamatannu Mawu Ruata. Nangillembu lai amungkannggu paa'aukku pabbawalagu Yahudi ringannu Mawu Ruata maola'a mapia; ne maggewaḥanna lai aḥamatta apan sarun ionggolu Mawu Ruata!

Asasaḥamattu pabbawalaga waine apan waḥine Yahudi

¹³Arawe orassa indi mappianne ia'u mabbisara su manga tuḥrangnga apan waḥine Yahudi! Aḥannune indi, naola'a rasul su pabbawalaga waḥine Yahudi, ia'u lembo mangngarega manara'u. ¹⁴Ia'u mangngantimma, ia'u wotongnge mapaḥapputu naungnga laḥe su pabbawala'u sassane, tadea'u ringannu laḥanne udde ia'u wotongnge manaḥamatta sambageanganna wuassi mangitou. ¹⁵Ana waugu imangitou tawe tinarimmattu Mawu Ruata, ne paa'aukku runia ringannu Mawu Ruata naola'e apia; nangillembu lai amungkannggu imangitou tinarimmattu Mawu Ruata! Udde nassuḥnggu ere taumata nate nabbiakka apia!

¹⁶Amungkannggu roti sampaddi apan paarorone suete nionggola su Mawu Ruata, udde atappasanne rotine sarangkanambone udde nionggola su Mawu Ruata lai. Wuḥḥu amungkannggu ḥamuttu alu udde lai pussa'a Mawu Ruata udde atappasanne manga rannane lai pussaa-Ne. ¹⁷Sangkawageanganna wuassu manga ranna ng kalu zaitun - eteudde manga taumata n Yahudi - niattibba. Wuḥḥu su lanna'u attibba udde nireeta ranna ng kalu zaitunna luḥu, eteudde manga tuḥrangnga apan waḥine Yahudi. Tuḥrangnga nireeta isudde tadea'u tuḥrangnga maattemma aḥawo'a apan mapia wuassu pabbawiakku ḥimuudu manga

taumata n Yahudi. ¹⁸Ana waugu udde ariete iamiu mangngadio'a simangitou apan suete nitonto ere ranna udde. Iamiu řinone mannaungnga manungku iamiu tumba'u rannane. Wuřru wařine ranna apan mangngonggolu anna su řamunne, ewe'e řamutta apan mangngonggolu anna su rannane.

¹⁹Arawe i'o sarun mabbisara, "Ore, arawe manga ranna udde nitonto tadea'u ia'u wotongnge ireeta su alune!" ²⁰Udde mangke atonna. Arawe imangitou niramme ana waugu imangitou tawe mangngimanna, arawe tuřrangnga tinarimmatta ana waugu tuřrangnga mangngimanna. Nariaddi imbarřangnga tuřrangnga mamunga ana waugu udde; arawe řinone i'o pia apendamma mata'utta. ²¹Ana waugu amungkangngu Mawu Ruata tawe umakkannu taumata n Yahudi iramme ere manga ranna tutune udde, arie passunna manungku Itou mappau mandam-menu! ²²Nariaddi isindi iite naasilo aroddi apiane Mawu Ruata wuřru aroddi aattike lai Itou. Itou mařragissa su saruanni mangitou apan marosa, arawe naunggi Tou masarřionto'a si'o - sambařiate i'o sidutu mabbiakka wuassu darangngu-Ne. Amungkangngu tawe, i'o lai sarun iramme. ²³Wuřru su ola'u manga taumata n Yahudi udde, amungkangngu imangitou mawařu wuassu pallařagu tawe mangngimanna, imangitou sarun itarimmatta apia; ana waugu Mawu Ruata pia tařřino manarimmatti mangitou apia. ²⁴Tuřrangnga apan wařine wuassu pabbawalagu Yahudi udde, naařihida ranna ng kalu zaitun apan luřu. Ei, amungkangngu i'o uatata'ae sulařummu pallařagunu, wotongnge ireeta si; alu zaitun tutune, lembonete manga taumata n Yahudi apan nisumandingnga su manga ranna ng kalu zaitun tutune udde. Natantunna malluasanne Mawu Ruata mamelenggi mangitou su punnu alu n zaitunni mangitou sassane.

Darangngu Mawu Ruata su anambo n taumata

²⁵Manga tuřrangnga! Ia'u mangantimma iamiu arie mamendamma manungku iamiu masingkate n sarangkanambone. Ana waugu pia sambau apan ipaapulu Mawu Ruata, arawe taambe niasingkatannu taumata. Wuřru ia'u maapulu iamiu maasingkata; eteudde indi: Sangkawageanganna wuassu taumata n Yahudi apan mařawangnga, arawe pallařagu mangitou udde tumba'u ma'oma su tempone, napawe anambo n taumata apan wařine Yahudi apan rudanta ringannu Mawu Ruata udde natimute. ²⁶Ete aroddi anambo n taumata n Yahudi sarun masařamatta. Ana waugu sulařummu Wuke Susi uaworřetta arendi,

"Ratu m Punnu Sařamatta sarun rumanta wuassu Sion;

Itou sarun manubbussa anambo n ařařleo m papapulunni Yakub.

²⁷Ia'u sarun mangagilu paaire indi simangitou
su tempo Ia'u mangampungnga manga rosa mangitou.”

²⁸Ana waugu taumata n Yahudi maddiri manengkamma Watti'u Aļaļuassa wuassu Mawu Ruata, ne imangitou naola'a seettu Mawu Ruata; wuřru udde maola'a auntungannu manga turrangnga apan waļine Yahudi. Arawe ana waugu suete nipile Mawu Ruata, ne manga taumata n Yahudi sidutu raddanguannu Mawu Ruata ana waugu iupungngu aļamona mangitou. ²⁹Ana waugu amungkangngu Mawu Ruata mamile taumata wuřru mangala mata taumata udde, Mawu Ruata tawe mangule apia apa apan suete niolang-Nge. ³⁰Dorone iamiu maddiri tumuřrutta Mawu Ruata. Arawe orassa indi Mawu Ruata suete napaalјatta'a manungku iamiu naļiute wuassu pasasaļa, ana waugu taumata n Yahudi maddiri tumuřrutta. ³¹Aroddi lai su manga taumata n Yahudi udde. Orassa indi imangitou maddiri tumuřrutta Mawu Ruata, tadea'u iamiu iapaalјatta'a manungku iamiu naļiute wuassu passasaļa. Arawe imangitou lai sarun iapaalјu wuassu passasaļa. ³²Ana waugu Mawu Ruata suete namala n taumata paparentannu laļawangnga, tadea'u Itou wotongnge mapaalјatta'u darangngu-Ne simangitou sarangkanambone.

Daralo su Mawu Ruata

³³Ala atonna Mawu Ruata! Wahewalla atonna apapande-Ne wuřru asingka-Ne! Isai wotongnge maasingkata aļawo'u manga lařrawen-Ne? Isai wotongnge maasunna manga olangnge Itou mammanara?

³⁴Sulaļummu Wuke Susi uawořretta arendi,
”Isai wotongnge maasingkata řingirřannu Mawu?
Isai wotongnge manantiro Sitou

³⁵Isai suete nangonggolu sarannapa su Mawu
na'oma n sara itou wotongnge madorongnga wawaļinne?”

³⁶Mawu Ruata apan nandiaddi sarangkanambone. Sarangkanambone udde wuassu Mawu Ruata wuřru udde lai hunane su Mawu Ruata. Paddalote Mawu Ruata ma'oma n sarangkaļo'engnge! Amin.

Mabbiakka huna Mawu Ruata

12 Manga turrangnga! Mawu Ruata tumanite mapia siite. Ana waugu udde ia'u sumaļande siamiu ringannu ahewallu naungnga tadea'u iamiu manantillu wadangngi amiu maola'a sambau sasamba apan wiakka su Mawu Ruata sassane wuřru maaļuassa naung-Nge. Patatařramawunu su Mawu Ruata řinone lai aroddi. ²Imbařrangnga

mattanno apulu n runia indi. Wala'e Mawu Ruata mandiaddi ririnu maola'a wakku, tadea'u iamiu pia awawaļu. Ringannu aroddi iamiu wotongne maasingkata apulu Mawu Ruata - eteudde apa apan mapia wuřru apan maļuassa naung-Nge wuřru apan nasuungnga.

³Mawu Ruata suete nangonggolu aļamatta sia'u. Ana waugu udde ia'u manantiro su tuřrangnga sarangkanambone; imbařrangnga mamendama ririnu mattanggařrana wuassu apan řinone. Řinone iamiu mattiala watanganni amiu ringannu awawawo naungnga; sangkatou-sangkatou mattiala watanganne tumuřruttu asingkata apan suete nionggolu Mawu Ruata sitou ana waugu mangngimanna Mawu Yesus. ⁴Wadanggi ite manambo wageangnge. Manga wageangnge udde pia manarane sambau-sambau. ⁵Aroddi lai matatařrino siite. Salaiwe iite sarangkanambone manambo, arawe iite naola'a wadangnga sambau ana waugu iite su sambau ringanni Kristus. Wuřru iite sambau-sambau uauukka su sambau ringannu waine maola'a wageangnga wuassu wadangnga sambau. ⁶Iite sambau-sambau pia aļamattu manara apan uapapařrala. Manga aļamatta udde nionggolu Mawu Ruata siite tumuřruttu darangngu-Ne. Ana waugu udde iite sarun mappaaattu aļamatta udde. Taumata apan pia aļamatta mamasingkatu Watti'a wuassu Mawu Ruata sarun mabbatti'u watti'a wuassu Mawu Ruata udde, tumuřruttu atatohassi tou sassane. ⁷Taumata apan pia aļamatta ipantuļungngu taumata waine, řinone atonna-tonna mantuļungngu taumata waine. Taumata apan pia aļamatta manantiro, řinone itou atonna-tonna manantiro. ⁸Taumata apan pia aļamatta mangngonggolu sasasa su taumata waine, řinone atonna-tonna mangonggolu sasasa su taumata waine, taumata apan pia aļamatta mantuļungngu taumata waine ringannu darotongnge, řinone ma'ola'a udde ringannu naungnga mawawo wuřru maļuassa. Taumata apan pia aļamatta mammaiřra'a, řinone atonna-tonna mammaiřra'a. Taumata apan pia aļamatta mamasilo n darangngune su taumata waine, řinone ma'ola'a ringannu naungnga maļuassa.

⁹Pandangngute ringannu ahewallu naungngu. Paaraua'a aļaļeo, wuřru pa'ola'e apapia. ¹⁰Řinone manga tuřrangnga uararangngu sangkatou ringannu waine wuřru uaa'akkanna ere manga taumata apan uasangkatuřrangnga sulaļummu amonanna sambau, wuřru řinone iamiu uaļaļiu řoro mangonggolu addatta. ¹¹Pammanarate ringannu mařrimadda. Arie mangkete wolo'a. Pammanara su Mawu ringannu atatohassa wuassu Ghařraho Mawu Ruata. ¹²Řinone iamiu mangngantimma Mawu ringannu maļuassa, paasabare sulaļummu asasusa, wuřru paařrimadda umaļiomanna. ¹³Patatuļungnga mapaasuungngu hausannu manga taumata n Sařrani waine wuřru saļohoiwe manga tuřrangnga su pangangimanna sambau apan ta'e awaganannu, ringannu naungnga maļuassa sulaļummu waļenu.

¹⁴Paddorongke su Mawu Ruata tadea'u Itou mangalamatta manga taumata apan maffragissa siamiu. Ore, paddorongke Mawu Ruata mangalamatta simangitou, arie pangane. ¹⁵Lalluasse su sambau ringannu manga taumata apan lulluassa, wuṛṛu luaite ringanni mangitou apan lulluai. ¹⁶Pabbiakke su paddarame sangkatou ringannu waine. Imbaṛṛangnga mamunga, arawe sulunga'a ririnu ere taumata apan manarane mawawo su aellegu awadaalla. Arie mamendamma ririnu apan-deanne wuassu ṛinone.

¹⁷Amungkanngu taumata mandaleo si'o, arie walissannu alaḷeo. Ola'e apa apan mapia su aellegu awadaalla. ¹⁸Wuassu sambaanu padea'a mabbiakka su paddarame ringannu taumata nambo. ¹⁹Manga tuṛṛangku! Arie saran paassa i'o mangune, wala'e Mawu Ruata maṛṛuumanna. Ana waugu sulalummu Wuke Susi uawoṛretta, "Ete Ia'u apan mabbaḷissa, Ia'u sarun maṛṛuumanna, unnu wisara n Mawu." ²⁰Arawe amungkanngu seenu maḷunussa, itou onngoḷe n anna, wuṛṛu amungkanngu itou marou, painuma'a itou. Ana waugu ringannu na'ola'a aroddi, tuṛṛangnga namansili sitou. ²¹Arie mapaawala n ririnu iapiddu alaḷeo, arawe ṛinone iamiu mapaanawo ng kaḷaḷeo ringannu apapia.

Tatuṛṛuta su tembonannu runia

13 Suapa n taumata ṛinone matuṛṛutta su tembonanne, ana waugu tawe tembonanne apan tawe naasomba taṛṛino wuassu Mawu Ruata. Wuṛṛu tembonanne apan uaparenta orassa indi, mappaamattu manarane wuassu darolokku Mawu Ruata. ²Ana waugu udde taumata apan mannompoḷa tembonanne udde, nassulungngu lai mannompoḷa apa apan suete tinantunnu Mawu Ruata. Wuṛṛu taumata apan ma'ola'a aroddi sarun iṛṛuumanna. ³Ana waugu taumata apan ma'ola'a apapia arie mata'uttu tembonanne. Tumba'u taumata apan ma'ola'a alaḷeo apan ṛinone mata'utta. Amungkanngu i'o maapulu tadea'u i'o tawe mata'uttu tembonanne, i'o ṛinone ma'ola'a apapia, ne i'o sarun raloanna. ⁴Ana waugu tembonanne udde, allangngu Mawu Ruata apan mammanara hunane ipadde'a apapianu. Arawe amungkanngu i'o ma'ola'a alaḷeo, i'o ṛinone mata'utti tou, ana waugu walineuwe tawe mangalene itou maṛṛuumannu taumata. Ete itou allangngu Mawu Ruata, apan mangngonggolu ṛuumannu Mawu Ruata su manga taumata apan ma'ola'a alaḷeo. ⁵Ana waugu udde ṛinone i'o matuṛṛutta tembonanne – waline tumba'u ana waugu i'o maddiri iṛṛuumanna, arawe ana waugu ahewallu apulu naungngu.

⁶Eteudde lai pinangananne anio tuṛṛangnga mammaekka wose, ana waugu tembonanne udde mamamanara Mawu Ruata apan mappaa-

mattu manara Mawu indi. ⁷Nariaddi waerrete su tembonanne apa apan řinone turřangnga mamaekka sitou. Waerrete wose, amungkangngu turřangnga řinone mamaekka wose, wuřru waerrete beane amungkangngu turřangnga řinone mamaekka bea. Imbei imangitou apan řinone imbeanna wuřru aaddatewe imangitou apan řinone addatanna.

Manara su sandingananna

⁸Imbařrangnga pia awallasa sisai-sai, tabene'e uawawallasa darangngu sangkatou ringannu waine. Ana waugu taumata apan marangngu su sansuľungnge taumata, suete nanuungngu anambo n tita Musa. ⁹Ana waugu tita n agama Yahudi eteudde: Imbařrangnga sumandaga, imbařrangnga mamate, imbařrangnga manna'o, imbařrangnga numemma n sarannapa n taumata waine; sarangkanambone udde niamulle ringannu tita waine, suete nisari tumbau naola'a tita sambau eteudde, "Pandangngu sansuľungngu taumata ere lai i'o mandangngu ririnu sassane." ¹⁰Taumata apan mandangngu taumata waine tawe ma'ola'a aľaľeo su taumata udde. Nariaddi taumata apan mandangngu sansuľungnge eteudde taumata apan suete tinumuřrutta anambo n tita n agama.

¹¹Su liuddu sarangkanambone udde iamiu maasingkata manungku tempo indi eteudde temponu mapu'o wuassu atatiilla. Ana waugu tempone iite iapaasaľamatta maranite orassa indi, wuassu iite wakute mannattaka mangngimanna. ¹²Řabbi maranite maľiudda; wuřru ete lai adio'a allote. Nariaddi mappianne iite mangilloľo ma'ola'a inolaanna apan marandumma. Iite řinone mapaasuungngu watanganni ite ringannu ahidda asemakka. ¹³Iite řinone ma'ola'a inolaanna apan aaddatanna ere su inanaramanne a'olaannu taumata su tempo allo; imbařrangnga maddamea tumanite manampaľiu, ara'e mabbu'anna. Imbařrangnga sumandaga, ara'e pia pallaľagu tawe addane. Imbařrangnga mabbawuľo, ara'e mangune. ¹⁴Wala'e Mawu Yesus Kristus mangatokku apa apan sarun olaanna. Wuřru imbařrangnga tumuřrutta pallaľagu n taumata marosa ipamatu'a apulu naungnga.

Imbařrangnga mapaasaľa n turřangngu

14 Taumata apan pangangimanne ta'e mattuľungnga řinone sengkamanna ringannu mapia su wallattu manga turřangngu. Arie pattatiakka ringanni tou su ola'u pangangimanne. ²Pia taumata mangngimanna manungku itou wotongnge umanna aľawo'u anna. Arawe pia lai taumata waine apan lome pangangimanne; itou mammendama

manungku itou tumba'u wotongnge mabbiakku sayore. ³Taumata apan u'anna tawe mamile, arie mangadio'a taumata apan u'anna tumba'u anna suete tinantunne; wuꞑꞑu taumata apan tumba'u u'anna anna suete tinantunne, arie lai mapaasaꞑa n taumata apan u'anna alawo'u anna, ana waugu Mawu Ruata suete nanarimmatti tou. ⁴Isai tuꞑꞑangnga, na'oma n sara tuꞑꞑangnga mamarikissa allangngu taumata waine? Mapia ete allangnga udde nema'a ara'e dirumarisikka, udde singkate mawune. Wuꞑꞑu atonna allangnga udde sarun dumarisikka matuꞑꞑida, ana waugu Mawu wotongnge mapararisikki tou matuꞑꞑida.

⁵Pia taumata mammendama sambau allo apan apianne wuas-su manga allo waine, arawe pia lai taumata waine mammendama manungku manga allo udde uasuꞑꞑungnga. Wala'e sambau-sambau manantunu apulu naungnge sassane. ⁶Taumata apan tumba'u mappaattu manga allo apianne, taumata udde ma'ola'a aroddi ana waugu ipangaddata Mawu. Taumata apan u'anna aꞑawo'u anna, ma'ola'a aroddi ana waugu ipangaddata Mawu, ana waugu itou maadiangkamanna Mawu Ruata ana waugu pabbawiakka udde. Aroddi lai taumata apan tumba'u u'anna anna suete nipilene, taumata udde lai mangadatta Mawu wuꞑꞑu u'aꞑiomanna su Mawu Ruata. ⁷Tawe saran sangkatou wuassi ite apan mabbiakka hunane su watanganni ite sassane, wuꞑꞑu tawe saran sangkatou apan mate hunane su watanganne sassane. ⁸Amungkangngu iite mabbiakka, iite mabbiakka hunane su Mawu. Wuꞑꞑu amungkangngu iite mate, iite lai mate hunane su Mawu. Nariaddi wiakka ara'e nate, iite udde tatahuanannu Mawu. ⁹Kristus natete wuꞑꞑu nabbiakke apia. Ana waugu udde Itou naola'a Mawu manga taumata wiakka wuꞑꞑu lai manga taumata apan natete. ¹⁰Nariaddi, manga tuꞑꞑangnga! Apa hunane mapaasaꞑa n tuꞑꞑangngu apan su pangangimanna sambau? Wuꞑꞑu apa hunane tuꞑꞑangnga mangngadio'a sitou? Iite sarangkanambone sarun sumaruanna Mawu Ruata tadea'u parikisanna. ¹¹Sulaꞑummu Wuke Susi uawoꞑꞑetta,

"Mangke atonna," wisara Mawu,

"sangkatou-sangkatou sarun massubba su saruang-Ku;

wuꞑꞑu sangkatou-sangkatou sarun manga'u manungku ete Ia'u
Mawu Ruata."

¹²Nariaddi iite sambau-sambau ꞑinone pia sasimbakka su ola'u aꞑawo'u inolaanni ite su Mawu Ruata.

Imbaꞑꞑangnga mangaꞑiwu n tuꞑꞑangngu

¹³Ana waugu udde arie iite mapaasaꞑa n sangkatou ringannu sangkatou. Arawe padea'e tadea'u iamiu tawe ma'ola'a inolaanna apan

ma'ola'a tuṙrangngu su pangangimanna sambau awono'anna wuṙṙu marosa. ¹⁴Ana waugu ia'u uaukke ringannu Mawu Yesus, ne ia'u mangke mangngimanna manungku tawe saran sambau anna apan maarosa; arawe olangnge udde maarosa sangkatou taumata, amungkangngu taumata udde massunna manungku udde maarosa. ¹⁵Arawe amungkangngu ringannu apa apan aannanannu, sangkatou tuṙrangnga su pangangimanna sambau niapaasusa naungnge, ne tuṙrangnga tawe nappaamattu paddarame. Amungkangngu Kristus suete nate ana waugu sangkatou taumata, arie mamala n taumata udde maḷaḷeo ringannu apa iwabboonu. ¹⁶Ana waugu udde arie mamala n sarannapa apan mapia siamiu, sunnannu taumata waine laḷeo. ¹⁷Ana waugu amungkangngu Mawu Ruata mangatokku pabbawiakku sangkatou, apa apan wotongnge annananni tou ara'e inumanne, tawe tumani mahuuu. Ahunanne eteudde manungku taumata udde tuttuṙrutta apulu Mawu Ruata, maependamma aḷaḷuassu naungnga wuṙṙu mannengkamma aḷaḷuassa apan nionggolu Ghaṙṙaho Mawu Ruata. ¹⁸Taumata apan mangngimbe Kristus olangnge aroddi, taumata udde maḷuassa naungngu Mawu Ruata, wuṙṙu aadatannu taumata waine.

¹⁹Ana waugu udde pandumanni ite ṙinone sidutu su manga inolaanna apan mandanta m paddarame wuṙṙu uatatuḷungnga. ²⁰Ariewe, ana waugu hatto n anna, i'o manggohakku apa apan suete nimmanara Mawu Ruata. Aḷawo'u anna udde wotongnge iwo'o; arawe amungkangngu anna iwabboonu udde maarosa taumata waine, i'o nassaḷate. ²¹Mappianne ariete pa'inassa ṙemessa ara'e ma'inumma anggore ara'e ma'ola'a manga inolaanna, amungkangngu inolaanna udde maarosa tuṙrangngu apan su pangangimanna sambau. ²²Wala'e apa apan pangimanannu udde, olaanna su saruannu Mawu Ruata huṙṙanu sassane. Taumata apan tawe pinangiananne ipamendama pasasaḷa, su apa apan sassunnane naṙṙino taumata udde su laḷumanna'a. ²³Arawe taumata apan uapapaddua umanna, wua udde umanna anna udde, taumata udde iapaasaḷa Mawu Ruata; ana waugu taumata udde tawe tinumuṙrutta apulu naungnge su ola'u apa apan naṙṙino wuṙṙu apan nassaḷa. Wuṙṙu manga aḷawo'u inolaanna apan niola'a tawe ringannu pangangimanna eteudde rosa.

Paaḷuassa'a taumata waine, arie tumba'u ririnu sassane

15 Iite apan atonna-tonna pia antimma su pangangimanni ite, ṙinone masabare su aḷawo'u wisara n taumata apan lome pangangimanne. Ariewe iite tumba'u maapulu malluassa watanganni ite sassane.

²Arawe iite sambau-sambau řinone malluassa naungngu tuřrangngi iite su apapiane, tadea'u pangngimanne aatambanna atohanne. ³Ana waugu Kristus lai tawe marřingiddu ařařuassu riri-Ne sassane. Sulalummu Wuke Susi uawořretta arendi, "Ařawo'u ařuandaga apan ni-pangařuandaga si'o, narřia'e Sia'u." ⁴Sarangkanambone apan nawořrette sulalummu Wuke Susi udde ipannantiro siite. Ana waugu ařařa'a apan nisengkammi iite wuassu Wuke Susi mammařu siite maola'a masabare wuřru matohassa na'oma n sara iite wotongnge mangngantimma Mawu Ruata. ⁵Sařandeanna su Mawu Ruata apan mangonggolu asa-sabare wuřru lařimbata su taumata, mantuřungngi amiu mabbiakka su paa'aukka tumuřruttu tuřada n Kristus Yesus. ⁶Ringannu naungnga sambau tuřrangnga sarangkanambone wotongnge maddalo Mawu Ruata, Ia-mangngu Mawu ng kite Yesus Kristus.

Watti'u Ařařuassa su manga pabbawalaga apan wařine Yahudi

⁷Ana waugu udde řinone manga tuřrangnga uararingikka sangkatou ringannu waine ringannu naungnga mařuassa, ere lai Kristus nanařoho siamiu ipaddalo Mawu Ruata. ⁸Ana waugu, paanaunge, manungku Kristus suete nangimbe taumata n Yahudi tadea'u mapaařiatta'a manungku Mawu Ruata atonna mannuungngu paaire-Ne su iupungngu ařamona ng kite. ⁹Mawu Yesus lai na'ola'a manga pabbawalaga waine mammantuga Mawu Ruata ana waugu apapia naungnge simangitou. Sulalummu Wuke Susi uawořretta arendi,

"Ana waugu udde ia'u maddalo Si'o su wallattu manga pabbawalaga, ia'u sarun mangantari aantari n daralo ipaddalo aran-Nu."

¹⁰Pia lai uawořretta arendi,

"Lalluasse suadio'a ringannu ařařana'u Mawu Ruata apan napile, ei manga pabbawalaga!"

¹¹Wuřru indi lai,

"Paddalote Mawu Ruata, ei anambo n pabbawalaga, řinone anambo n taumata maddalo Sitou!"

¹²Wuřru indi lai apan niwařo n Yesaya,

"Wuassu papapulunni Isai sarun rumanta sangkatou taumata apan sarun mamarenta manga pabbawalaga; wuřru ete Sitou manga pabbawalaga udde sarun mangantimma."

¹³Ete Mawu Ruata apan pangngantimanni amiu. Sařandeanna Itou mallořro naungngu ringannu ařařuassa wuřru paddarame ana waugu iamiu mangngimanna Sitou, tadea'u ringannu tařřino n Ghařřaho Mawu Ruata iamiu lembo mangngantimma Mawu Ruata.

Anio Paulus namoꝛrettu suratta ringannu maꝛragissa

¹⁴Manga tuꝛꝛangu! Ia'u mangngimanna manungku manambo atonna apapia siamiu. Iamiu lai masingkatu sarangkanambone wuꝛꝛu wotongnge lai mangarꝛa'a sandingananna. ¹⁵Arawe su ola'u manga inolaanna apan suete nitantunna, ia'u mapaanaungnga siamiu ringannu atonna sulaꝛummu suratta indi, ana waugu Mawu Ruata suete nangonggolu manara udde sia'u. ¹⁶Itou suete na'ola'a sia'u mangangimbe n Kristus Yesus tadea'u irolokka su manga pabbawalaga apan waꝛine Yahudi. Wuꝛꝛu ia'u naola'a sangkatou imam, apan mammasingkattu Watti'u Aꝛaꝛuassa wuassu Mawu Ruata, tadea'u manga taumata apan waꝛine Yahudi maola'a sambau sasamba su Mawu Ruata apan wotongnge sengkamanni Tou. Doronganna Gharꝛaho Mawu Ruata ma'ola'a simangitou sambau sasamba apan apianne su Mawu Ruata sassane. ¹⁷Nariaddi, ana waugu ia'u suete naaukka ringanni Kristus Yesus, ne ia'u wotonggete lumuassu manara'u indi su Mawu Ruata. ¹⁸Ia'u waꝛrani mabbisara aroddi tumba'u su ola'u apa apan suete niola'i Kristus sia'u ipa'ola'a manga taumata waꝛine Yahudi tuttuꝛꝛutta Mawu Ruata. Ia'u mammanara udde ringannu manga wisara ara'e lai ringannu manga inolaanna see lai palalaju, ¹⁹wuꝛꝛu manga aꝛaꝛindu'a wuꝛꝛu manga inolaanna apan wahe-walla; sarangkanambone udde wuassu taꝛrino n Gharꝛaho Mawu Ruata. Watti'u Aꝛaꝛuassa su ola'u Mawu Yesus suete ta'u niapaasingkatta su anambo n taumata, nanattaka wuassu Yerusalem na'oma n sara watukku Ilirikum. ²⁰Apulu'u eteudde mamasinkatu Watti'u Aꝛaꝛuassa wuassu Mawu Ruata su manga tampa suapa n taumata taambe naaringikka si Kristus. Ana waugu ia'u maddiri mapararisikku manara su rapappake apan niaddo n taumata waine. ²¹Sulaꝛummu Wuke Susi uawoꝛretta,

"Manga taumata apan taambe naaringikka watti'a su ola'i Tou, sarun maasilo;

wuꝛꝛu imangitou apan taambe naaringikka, sarun maasunna."

Pandumanni Paulus inai watukku Roma

²²Ana waugu udde, ia'u masokkate aꝛimbatanna inai mattembo siamiu. ²³Arawe orassa indi manara'u su wageangngu manga wageangu leta'a udde nasuete. Pirate tonna nangkaliu ia'u maapulu mattembo siamiu. ²⁴Paꝛꝛangatte amungkangngu ia'u sumabbi soa atata-naannu sulaꝛummu amatanku watukku Spanyol, ia'u mangantimma wotongnge maissomba ng kamiu wuꝛꝛu lumuassa taꝛa ng kadio'a ringanni amiu. Wua udde ia'u mangantimma iamiu wotongnge mal-

Ialima sia'u su amatanku watukku Spanyol udde. ²⁵Arawe orassa indi ia'u maapulu inai watukku Yerusalem mangapiddu sasumbala su jamaattu Mawu Ruata poiaroddi. ²⁶Ana waugu manga jamaatta su Makedonia wurru Akhaya maapulute mangonggolu sasumbala su manga turrangnga apan asiangnga su wallattu jamaattu Mawu Ruata su Yerusalem. ²⁷Ringannu naungnga maļuassa imangitou nakkawessa ma'ola'a udde. Atonna rinone imangitou mantulunggu manga turrangnga apan asiangnga su Yerusalem; ana waugu wuassu manga taumata n Yahudi udde, manga taumata waline Yahudi suete nanengkamma alamatta wuassu Mawu Ruata. Nariaddi manga taumata waline Yahudi rinone lai mantulunggu taumata n Yahudi ringannu manga alamatta ere manga darotongnga. ²⁸Amungkanngu ia'u suete nanginsue manara'u indi, wurru manantilla simangitou apan uatana'a su Yerusalem sasumbala apan suete niammulla udde, ne ia'u inaita watukku Spanyol sumabbi soa atatanaanu. ²⁹Amungkanngu ia'u rumanta ringannu, sulalummete ia'u rumanta mangapiddu manambo alamatta wuassi Kristus siamiu.

³⁰Ringannu arannu Mawu ng kite Yesus Kristus, wurru ringannu daranggu apan nionggolu Gharraho Mawu Ruata, ia'u sumaļande siamiu, doronganna iamiu suadio'a u'aliomanna su Mawu Ruata huna manara'u. ³¹Aaliomante tadea'u Mawu Ruata mamallossu riri'u wuassu lima manga taumata apan tawe mangngimanna su Yudea, wurru tadea'u manara'u ipangapiddu sasumbala watukku Yerusalem itarimmatu aļarrana'u Mawu Ruata ringannu naungnga maļuassa poiaroddi. ³²Ringannu aroddi, amungkanngu Mawu Ruata maapulu, ia'u wotongnge rumanta ringanni amiu, ringannu naungnga maļuassa. Wurru ia'u wotongge maapendama aļaluassu naungnga su pattangnganni amiu. ³³Antimanna Mawu Ruata, apan nangonggolu paddarame su taumata, uatana'a ringanni amiu sarangkanambone. Amin.

Tabea wuassia'u sassane

16 Ia'u maapulu mamasingkatta siamiu su ola'u turrangngi ite, Febe. Itou massumbala jamaatta su Kengkrea. ²Tarimmata'e itou ere sangkatou wuassu jamaattu Mawu. Ne aroddite manga taumata apan mangngimanna Mawu Ruata rinone uatatarimmata sangkatou ringannu sangkatou. Tulungaawe itou, amungkanngu itou mappandumma sasumbala wuassi amiu, ana waugu itou sassane suete nangonggolu sumbala su taumata nambo - nareengnga lai ia'u.

³Waļoa'a tabea'u si Priskila wurru si Akwila, manga hawe'u apan suadio'a mammanara manara n Kristus Yesus. ⁴Imangitou maranite mate, ana waugu maapulu manaļamatta sia'u. Ia'u maadiangkamanna

simangitou – wuṛṛu waḷine tumba'u ia'u, arawe anambo n jamaatta wuassu pabbawalaga waine apan waḷine Yahudi lai maadiangkamanna simangitou. ⁵Waḷoa'a lai tabea'u su jamaatta apan uasemodda su waḷe mangitou.

Tabea si Epenetus apan aranguanguku. Ete itou taumata apan paarorone nangimanna si Kristus su leta'u Asia. ⁶Tabea'u lai si Maria. Itou suete nammanara maṛṛimada ana waugu iamiu. ⁷Waḷoa'a lai tabea'u si Andronikus wuṛṛu si Yunias. Itarua wuṛṛu ia'u papapulunnu sangkatou wuṛṛu iamii suete niṛṛuumanna su sampunna. Tantaḷanna ia'u taambe nangimanna si Kristus, imangitou doronete nangimanna. Imangitou tinumelengnga su wallattu manga rasul.

⁸Tabea si Ampliatus, aranguanguku, ana waugu itou susampunna ringanguku su sambau ringannu Mawu Ruata. ⁹Waḷoa'a tabea'u si Urbanus, hawe ng kite apan mammanara su sampunna ringanni ite ana waugu Kristus. Wuṛṛu tabea'u lai si Stakhis apan aranguanguku. ¹⁰Tabea'u si Apeles, Tatuṛṛunne si Kristus niatialante. Tabea lai su laḷoṛṛo m baḷe Aristobulus, ¹¹wuṛṛu si Herodion. Iambua pabbawalaga sambau. Aroddi lai tabea'u su manga tuṛṛangnga pangangimanna sambau su waḷe Narkisus.

¹²Tabea'u si Trifena wuṛṛu si Trifosa apan mammanara maṛṛimada mangngimbe Mawu, wuṛṛu si Persis apan aranguanguku. Itou lai suete nammanara maṛṛimada manara Mawu. ¹³Tabea si Rufus wuṛṛu inangngene, apan iwaratta sia'u ere inangku sassane. Eteudde Rufus taumata nipile Mawu wuṛṛu raddaloanna. ¹⁴Waḷoa'a lai tabea'u si Asinkritus, Flegon, Hermes, Patrobas, Hermas wuṛṛu tuṛṛangnga sarangkanambone apan pangangimanna sambau ringanni mangitou. ¹⁵Tabea si Filologus wuṛṛu Yulia; si Nereus wuṛṛu tuṛṛangnge wawine; si Olimpasi wuṛṛu anambo n taumata mangngimanna suadio'a ringanni mangitou.

¹⁶Patatabeate ringannu uararangngu su pasasangkatutuṛṛangannu taumata n Saṛṛani. Anambo n jamaatti Kristus nananata n tabea mangitou su manga tuṛṛangnga.

Tatantiro panginsueanne

¹⁷Manga tuṛṛangnga! Ia'u sumaḷande ringannu lembone: Paatehamma su saruannu manga taumata apan ma'ola'a patatatiakka wuṛṛu mannongkakku pangangimannu taumata su Mawu. Olangnge udde uapapaṛṛala apa apan suete niaṛṛa'a siamiu. Arie paggawei taumata ereudde. ¹⁸Ana waugu manga taumata inolaanne aroddi, waḷinewe mammanara manara n Kristus Mawu ng kite, ewe'e tumba'u map-paaluassu apulu naungngi mangitou sassane. Ringannu sasaḷo'a wuṛṛu

manga wisara apan mapia, imangitou mammahia manga taumata apan wagga ng apa-apa. ¹⁹Anambo n taumata naasingkate manungku iamiu maturruta su alaŕra'u Watti'u Aŕaŕuassa wuassu Mawu Ruata. Wuŕru ia'u maŕuassa su inolaanni amiu udde. Ia'u maapulu tadea'u iamiu pande su inolaanna apan mapia, wuŕru longonna su inolaanna apan laŕeo. ²⁰Mawu Ruata apan nangonggolu paddarame su taumata, maŕihakke mandolokku Setanna massuŕrubawa su taŕrinonu wuŕru maŕrimunsa'a sitou.

Antimanna manga tuŕrangnga sidutu aalamatanni Yesus Kristus Mawu ng kite!

²¹Timotius, hawe'u nabbaŕo n tabeane siamiu. Aroddi lai Lukius, Yason wuŕru Sosipater, iami indi pabbawalaga sambau.

²²Namoŕrettu suratta indi eteudde ia'u, Tertius. Ia'u nabbaŕo n tabea m pasasangkatuŕrangnga siamiu.

²³Gayus napaapiddu n tabea lai siamiu. Ia'u uatana'a su waŕene wuŕru jamaatti ami lai mattaŕramawu isudde. Erastus, tembonannu mananahipunna roittu soa, napaapiddu tabeane lai siamiu. Aroddi lai tuŕrangngi ite Kwartus.

[²⁴Antimanna Mawu ng kite Yesus Kristus mangaŕamatta tuŕrangnga sarangkanambone. Amin.]

Pangudusannu suratta

²⁵Daralo su Mawu Ruata! Itou uataŕrino mannohassa pangangimannu tuŕrangnga nassuŕunggu Watti'u Aŕaŕuassa wuassu Mawu Ruata apan ta'u iapaasingkatta su ola'u Yesus Kristus. Ia'u namasingkata watti'a udde nassuŕunggu ere apa apan niapaaliatta'u Mawu Ruata; eteudde su ola'u paa'apulu Mawu Ruata apan maŕannute awaganannu taumata. ²⁶Arawe orassa indi, wuassu darolokku Mawu Ruata sassane, pandumanne udde suete niapaaliatta'a wuŕru niapasingkata su anambo n pabbawalaga ere suete niwoŕrettu manga nabi, tadea'u imangitou sarangkanambone mangngimanna wuŕru tumuŕrutta Mawu Ruata. ²⁷Ete Itou Mawu Ruata tinggassa, Itou lembo n apandeanne.

Antimanna Itou wantuhanna sarangkaŕo'engnge sulaŕummu Mawu Yesus Kristus! Amin.

Tabea ng kami,
Paulus, allangngi Kristus Yesus

SURATTI PAULUS PAARORONE SU JAMAATTU KORINTUS

WISARA TALAANE

Suratti Paulus Paarorone Su Jamaattu Korintus indi niwořetta ipanała'a manga hatto apan nariaddi sulałummu jamaatta apan suete niapararisikki Paulus su Korintus. Eteudde manga hatto su ola'u pabbiařanna wuřru pangangimannu taumata n Sařrani. Tempo udde Korintus naola'a sambau soa su Yunani, soa niapangadoannu pamamarentannu Akhaya nasutta su wageangu araratuannu Roma. Soa indi, manga tumanangnge niappaammulañnu ala'wo'u pabbawalaga, tinumelengnga ana waugu mapia pabbawalu'annu sarannapa, addanne apan matanggakke, arawe lai pallałagune ta'e laleo wuřru ana waugu isudde tumanite n manambo hati n agama.

Apan lembo n irarřingiddi Rasul Paulus eteudde hatto su ola'u pattatalei wuřru alaleo sulałummu jamaatta, wuřru su ola'u manga hatto apulu naungnga su wawine wuřru paa'awingnga, hatto apendammu lałorřo naungnga, atoranna su jamaatta, manga aonggololu Ghařraho Mawu Ruata, wuřru su ola'u pabbawangunnu taumata nate. Ringannu aellega apan malałumma, Paulus napaaljatta'a ereapa Watti'u Alałuassa wuassu Mawu Ruata udde mannekka manga hatto.

Tatialane 13 namasingkattu manga hatti n darangu apan tutune. Tatialane indi asinungka maola'a tatialane lembo n apianne wuassu wallattu anambo n tatialane waine su wuke indi.

Lalorřone

Paarorone	1:1-9
Aula'ukka sulałummu ghařreda	1:10-4:21
Hatto apulu naungnga su wawine wuřru mabbiakka sulałummu amonanna	5:1-7:40
Taumata n Sařrani wuřru taumata apan maddiri massubba Mawu Ruata	8:1-11:1

Pabbiarṛannu jamaatta wuṛṛu pattatarṛamawu	11:2-14:40
Ola'u pabbawangunni Kristus wuṛṛu manga taumata n	
Saṛṛani wuassu papate	15:1-58
Sasumbala su manga taumata n Saṛṛani su Yudea	16:1-4
Manga hatto su wadangnga sassane wuṛṛu	
pangudusanne	16:5-24

1¹³Manga tuṙrangnga jamaattu Mawu Ruata su Korintus! Tuṙrangnga suete niwaggoannu Mawu Ruata maola'a aḷarṙanang-Nge ana waugu tuṙrangnga tatahuananni Kristus Yesus, su sampunna ringannu anambo n taumata su aḷawo'u tampa apan massubba Mawu ng kite Yesus Kristus, eteudde Mawu mangitou wuṙṙu Mawu ng kite lai. Ia'u, Paulus, wuṙṙu tuṙrangngi ite Sostenes, mangngantimma doronganna Mawu Ruata Iamangngi ite wuṙṙu Mawu Yesus Kristus mangonggolu aḷamatta wuṙṙu paddarame siamiu. Ia'u namoṙṙettu suratta indi ana waugu ia'u rasulli Kristus Yesus, apan suete niteneḡu Mawu Ruata sassane wuṙṙu wuassu apulu-Ne sassane lai.

Manga aḷamattu Mawu Ruata sulaḷummi Yesus Kristus

⁴Ia'u sidutu maadiangkamanna su Mawu Ruata su ola'i amiu, ana waugu iamiu suete nanengkamma aḷamattu Mawu Ruata sulaḷummi Kristus Yesus. ⁵Ana waugu iamiu tatahuanante n Kristus, ne pabbiaṙṙanu naalate su aḷawo'u inolaanna. Asingkannu su ola'u aḷawo'u inolaanna udde tumanite malaḷumma, wuṙṙu iamiu masingkata mangarṙa'u apapandenu udde. ⁶Udde mapaaliatta'a manungku watti'a su ola'i Kristus aroddite naḷinna sulaḷummu naunggu, ⁷na'oma n sara iamiu tawe atalannu aḷamatta, tantaḷanna iamiu uaraṙṙado Mawu ng kite Yesus Kristus rumanta wuṙṙu ellehannu anambo n taumata. ⁸Kristus sassane sarun mandiaga siamiu ma'oma n sara pangudusanne; tadea'u su tempo Itou rumanta apia, iamiu aratinganna tawe sangkule. ⁹Mawu Ruata mangke apangimananna atonna-tonna. Ete Itou Mawu Ruata apan namaggo siamiu maola'a sambau ringannu Anang-Nge, eteudde Yesus Kristus Mawu ng kite.

Paauḷa'ukka sulaḷummu jamaatta

¹⁰Manga tuṙrangnga! Sulaḷummu arannu Mawu ng kite Yesus Kristus, ia'u sumaḷande tadea'u iamiu sarangkanambone massampinunutanna; tadea'u arie pia paauḷa'ukka su wallatti amiu. ¹¹Ana waugu, manga taumata wuassu amonanni Kloē nangalae sia'u manungku pia pattatiakka su wallatti amiu. ¹²Pandumangku eteudde manungku su wallatti amiu piaddu mabbisara, "Ia'u tumantalongnga si Paulus," piaddu lai mabbisara, "Ia'u tumantalongnga si Apolos," waine lai mabbisara, "Ia'u tumantalongnga si Petrus," waine lai mabbisara, "Ia'u tumantalongnga Kristus." ¹³Mangaḷene Kristus natahia! Paulus tawe nate nia-

rusa ana waugu amiu! Iamiu lai tawe nissarrani tadea'u maola'a mal-lalafarngenni Paulus. Walineuwe aroddi?

¹⁴Aadiangkamanna ia'u tawe nanafrani saran sangkatou wuassu wallatti amiu, tumba'u Krispus wurru Gayus. ¹⁵Arie pia sangkatou mabbisara manungku ia'u suete nanafrani sitou see maola'a mallalafarngengku. (¹⁶Ore, Stefanus wurru amonanne, atonna ia'u nanafrani simangitou. Arawe su liuddu udde, su anaungku tate lai taumata waine apan nissarrani'u.) ¹⁷Kristus nandolo'u waline iapasarrani taumata, ewe'e iapapasingkatu Watti'u Alaluassa wuassu Mawu Ruata; wurru udde lai sarun ta'u olaanna ringannu tawe mappattu apande mabbisara ere ola'u taumata, tadea'u tarfino wuassu papate ng Kristus su alu arussa maola'a pia gunane.

Tarfino wurru apande Mawu Ruata uarandangna si Kristus

¹⁸Ana waugu su taumata apan mattuda m papate, watti'a su ola'u papate ng Kristus su alu arussa naudd watti'a wahia. Arawe siite apan suete niapaasalamattu Mawu Ruata, watti'a udde maola'a lalannu Mawu Ruata mapaaljatta'u tarfino-Ne. ¹⁹Ana waugu sulalummu Wuke Susi, Mawu Ruata nabbisara,

"Apapande n taumata pia asingkanne sarun Ta'u isongkakka,
wurru pasasunna manga taumata pia si'olane Ta'u iapaawuli."

²⁰Ne, apa hunane manga taumata pia asingkane udde? Apa hunane imangitou pia si'olane udde? Apa hunane marfarngiddu runia indi? Mawu Ruata suete napaaljatta'a manungku apapande n runia indi mangke wahia wurru awusu atonna!

²¹Ana waugu salaiwe ereapa apande n taumata, itou tawe maailala Mawu Ruata wuassu apandene sassane. Arawe ana waugu Mawu Ruata lembo n pande, Itou wotongnge manalamatta manga taumata apan mangngimanna Sitou wuassu Watti'a apan suete niapaasingkati ami apan sassunannu runia indi awusu. ²²Taumata n Yahudi madorongnga alarfindu'a maola'a sambau tatiala, wurru taumata n Yunani tumba'u mappandumma apapande n runia indi. ²³Arawe iite tumba'u mabbatti'i Kristus apan nate niarussa. Watti'a udde lai mammasendeka naungngu taumata n Yahudi, wurru sassunannu manga taumata waline Yahudi udde awusu. Wurru taumata apan waline Yahudi massunna udde sambau awawoddo. ²⁴Arawe su taumata apan suete niwagoannu Mawu Ruata - mapia ete taumata n Yahudi ara'e waline Yahudi - watti'a udde maola'a lalannu Mawu Ruata mapaaljatta'u tarfino wurru apande-Ne. ²⁵Ana waugu aellehanna awawoddo su Mawu Ruata, arawe eteudde

manampaļu wuassu apapande n taumata; wuṛṛu aellehanna lome su Mawu Ruata, eteudde matohasanna wuassu atatohassu taumata.

Taṛṛino Mawu Ruata wuṛṛu aḷallome n taumata

²⁶Manga tuṛṛangnga! Naunge'o ereapa ola'i amiu su tempo Mawu Ruata namaggo siamiu. Tumba'u adio'a wuassu wallatti amiu apan pande, ara'e pia taṛṛinone, ara'e pia manarane matanggakka tumuṛṛuttu aellegu taumata. ²⁷Ana waugu atonna Mawu Ruata namile taumata apan sassunnannu runia indi woddo, tadea'u manga taumata pande māsili. Wuṛṛu Mawu Ruata lai namile taumata apan sassunnannu runia indi lome, tadea'u manga taumata apan matohassa wuṛṛu waṛṛani, māsili. ²⁸Mawu Ruata namile apa apan aellehanna mawawo, asiangnga, wuṛṛu lai sassunnannu runia indi tawe gunane, tadea'u Mawu Ruata maṛṛimunsa'a apa apan aellehannu runia indi apianne. ²⁹Ringannu aroddi tawe saran sangkatou mamunga m watanganne su saruannu Mawu Ruata. ³⁰Ete Mawu Ruata sassane apan ma'ola'a si'o naaukka ringanni Kristus Yesus. Sulaḷummi Kristus iite niola'a pande. Wuṛṛu sulaḷummi Tou lai Mawu Ruata na'ola'a siite nassangkapia apia ringanni Tou, iite niola'a aḷaṛṛanang-Nge apan apianne, wuṛṛu napaḷiu ng kite wuassu alaḷeo. ³¹Nariaddi ere uawoṛṛetta sulaḷummi Wuke Susi, "Taumata apan maapulu mamarabunga, ṛinone mammunga su inolaannu Mawu."

Watti'u papate Mawu Yesus su alu arussa

2 Manga tuṛṛangnga! Su tempo ia'u nirumanta ringanni amiu wuṛṛu namasingkata siamiu su ola'u pandumannu Mawu Ruata apan taambe niasingkatannu runia, ia'u tawe mappaaattu asingkattu runia indi ara'e nabbisara ringannu wisara sasaḷo'a. ²Ana waugu ia'u suete naddiandi, manungku su aḷo'engngu allo ia'u ta'e ringanni amiu, ia'u tawe bisarane apa-apa, tumba'u su ola'i Yesus Kristus; ahewaḷanne manungku Itou suete nate su alu arussa. ³Su tempo ia'u suadio'a ringanni amiu, ia'u lome wuṛṛu mangngindo n atata'utta. ⁴Watti'a apan ta'u niapaasingkata siamiu tawe ta'u niwatti'a ringannu aḷawo'u wisara apan ipammono'a tumuṛṛutta apande n taumata. Ia'u mabbatti'a udde ringannu laḷanna apan mappatiala manungku Ghaṛṛaho Mawu Ruata uataṛṛino. ⁵Ia'u na'ola'a aroddi, tadea'u pangangimannu si Kristus tawe pinangiananne wuassu apande n taumata, ewe'e pinangiananne wuassu taṛṛino Mawu Ruata.

Apapande Mawu Ruata

⁶Salaiwe aroddi, su wallattu manga taumata apan wiakku pangangimanne nalinte, atonna, ia'u nabbisara su ola'u apapande. Arawe apapande indi walineuwe apapande n runia, ara'e apapande manga tembonanne tempo indi, apan tarrinone sarun mawuli. ⁷Apapande apan ta'u iwafo udde eteudde apapande wuassu Mawu Ruata. Apapande udde awaganannu runia, arawe Mawu Ruata suete nanaddia lafumanna'i ite ro'e n runia indi taambe niriaddi. ⁸Tawe saran sangkatou wuassu manga tembonannu tempo indi apan masingkatu apapande udde. Ana waugu amungkangngu imangitou masingkate, imangitou tawe nangarussa Mawu apan mawantuga udde. ⁹Arawe olangnge udde ere uaworretta sulafummu Wuke Susi,

"Apa apan taambe saran paassa niasiloanna ara'e niaringirannu taumata,

wurru tawe lai saran paassa nilumatto sulafummu ringirannu taumata,

eteudde apan nisaddia Mawu Ruata

su manga taumata apan mandangngu Sitou."

¹⁰Arawe Mawu Ruata suete napaaliatta'a siite sulafummu Gharraho-Ne. Gharraho Mawu Ruata udde mammarikissa sarangkanambone, na'oma n sara manga pandumannu Mawu Ruata apan uawuni. ¹¹Ana waugu masingkatu laforro naungngu sangkatou eteudde gharraho n taumata udde sassane, are? Aroddi lai ola'u Mawu Ruata. Apan masingkattu laforro naungngu Mawu Ruata tumba'u Gharraho Mawu Ruata sassane! ¹²Wurru iite tawe nionggolannu gharraho n runia indi, ewe'e Gharraho wuassu Mawu Ruata, tadea'u iite masingkattu sarangkanambone apan suete nionggolu Mawu Ruata siite.

¹³Ana waugu udde amungkangngu iami manna'a'a manga inolaannu Mawu Ruata su manga taumata apan pia Gharraho Mawu Ruata, iami maddiri mamasingkata tumurruttu apapande n taumata, ewe'e tumurruttu alarra'u Gharraho Mawu Ruata. ¹⁴Taumata apan tawe uatahuanna Gharraho Mawu Ruata, tawe maasengkama apa apan niapaaliatta'u Gharraho udde. Ana waugu su taumata udde inolaanne naola'a sambau awawoddo. Taumata udde tawe maasunna, ana waugu inolaanne udde tumba'u wotongnge ellehannu pangangimanna. ¹⁵Taumata apan uatahuanna Gharraho Mawu Ruata wotongnge maatiala alawo'u inolaanna, arawe tawe saran sangkatou wotongnge maatiala Sitou. ¹⁶Sulafummu Wuke Susi uaworretta,

"Isai massingkatu řingirřannu Mawu?

wuřřu isai wotongge mangalařra'a Sitou?"

Ete iite apan uatahuanna řingirřanna apan uasulunggi Kristus!

Manga mangangimbe Mawu Ruata

3 Manga tuřrangnga, ia'u tawe su řinone maggahatto ng kamiu ere taumata uatahuanna Ghařraho Mawu Ruata. Ia'u tumba'u wotongge maggahatto ng kamiu ere taumata apan ta'e mabbiakka tumuřřuttu apulu n dunia; ere manga taumata apan ta'e ere ana'a maraddio'a sulařummu pangangimanne si Kristus. ²Dorone ia'u tumba'u wotongge mangonggola siamiu pabbawiakku ana'a maradio'a, wařine pabbawiakku taumata timmaddete; ana waugu iamiu ta'e lome su pangangimanna. Arawe orassa indi lai iamiu ta'e lome su olangge udde, ³ana waugu iamiu ta'e mabbiakka tumuřřuttu pallařagu n taumata. Ana waugu amungkangngu iamiu ta'e uasasihikka wuřřu uawawuřo sangkatou ringannu waine, wařinewe udde mapaaliatta'a manungku iamiu ta'e pia pallařagu manga taumata apan tawe maillařa Mawu Ruata? ⁴Amungkangngu piaddu mabbisara, "Iami tumantalongnga si Paulus," wuřřu waine lai mabbisara, "Ia'u tumantalongnga si Apolos," wařinewe udde mapaaliatta'a manungku iamiu ta'e pia pallařagu n taumata n dunia?

⁵Su řinone isai Apolos udde? Wuřřu isai Paulus? Iami tumba'u mangangimbe Mawu Ruata, apan suete nangehetta siamiu see mangangimanna si Kristus. Iami tumba'u mappaamattu manara apan nirolokku Mawu siami sangkatou-sangkatou. ⁶Ia'u massuanna wuřřu Apolos mamamokkane, arawe Mawu Ruata sassane apan mamaduři sasanna udde. ⁷Nariaddi ahunanne eteudde Mawu Ruata, ana waugu ete Itou mamaduřine. Iapa massuanna wuřřu mamamokkane tawe tumanite n mahuna; ⁸itarua uassulungnga. Sangkatou-sangkatou sarun manengkamma lařantake tumuřřuttu inasaharanne. ⁹Ete iami udde manga taumata apan mammanara suadio'a manara Mawu Ruata; wuřřu eteudde iamiu waillu Mawu Ruata.

Manga tuřrangnga naola'a lai Waře Mawu Ruata. ¹⁰Ringannu apapande apan nioggolu Mawu Ruata, ia'u ere sangkatou tařra ola'a waře suete nangaddo n rapappaku waře udde, wuřřu taumata waine mapararisikku waře so wowo n rapappake udde. Suapa n taumata řinone manutukka mapia-pia ereapa itou mapararisikka su rapappake udde. ¹¹Ana waugu Mawu Ruata sassane suete nangaddo n Yesu Kristus maola'a ere rapappaku waře udde; tawe rapappake apan waine. ¹²Piaddu mappararisikka su rapappake udde ringannu map-

paattu wuławanna, piaddu mappaattu sała'a, piaddu mappaattu permata, piaddu mappaattu alu, radduutta mamara ara'e lařrami. ¹³Manara n sangkatou-sangkatou sarun asiloanna su tempo Kristus rumanta apia. Ana waugu su allo udde putungnga sarun manemakka manara n sangkatou-sangkatou see asiloanna. Putungnga sarun manaļu'atta wuřru manantunnu apapia n manara udde. ¹⁴Amungkangngu waļe apan nia-pararisikku taumata su wowo n rapappake udde maļannu matutungnga, taumata udde sarun manengkamma laļantake. ¹⁵Arawe amungkangngu manara n taumata udde matutungnga, itou sarun marugi; itou sassane sarun masaļamatta, arawe naaļihida ere taumata apan naļiu wuassu řenggamu putungnga.

¹⁶Masingkatawe tuřrangnga manungku eteudde iamiu Waļe Mawu Ruata? Wuřru manungku Ghařraho Mawu Ruata uatana'a sulaļummi amiu? ¹⁷Amungkangngu pia taumata manggohakku Waļe Mawu Ruata, Mawu Ruata lai sarun manggohakku taumata udde. Ana waugu Waļe Mawu Ruata udde tumba'u hunane su Mawu Ruata sassane, wuřru ete-udde iamiu Waļe-Ne.

¹⁸Imbařrangnga piaddu sangkatou mamahia watanganne sassane. Amungkangngu pia taumata su wallatti amiu mammendama watanganne pande tumuřruttu auļaannu runia indi, taumata udde mabbaļi woddo, tadea'u itou atonna-tonna mabbaļi pande. ¹⁹Ana waugu apan sassunnannu runia pande, udde awawoddo su aelleggu Mawu Ruata. Sulaļummu Wuke Susi uawořretta, "Mawu Ruata mapaasaļa manga taumata pande sulaļummu asingkati mangitou sassane." ²⁰Pia lai uawořretta arendi, "Mawu masingkata manungku řingirannu manga taumata pande uddewe řingiranna apan tawe gunane." ²¹Ana waugu udde, imbařrangnga piaddu sangkatou maddalo taumata, ana waugu sarangkanambone suete nionggola maola'a pussaanu; ²²Paulus, Apolos, Petrus, runia indi, mabbiakka wuřru mate, tempo indi ara'e tempo apan sarun rumanta, sarangkanambone udde tatahuanannu. ²³Wuřru iamiu udde tatahuanni Kristus, wuřru Kristus tatahuannannu Mawu Ruata.

Manga rasulli Kristus

4 Ellehete iamii indi mangangimbe n Kristus, apan uapasanna manara mabbatti'u manga pandumannu Mawu Ruata apan taambe niasingkatannu runia. ²Paarorone apan řaddeanna wuassu mangangimbe aroddi, eteudde manungku itou matuřruta mawune. ³Mawala sia'u tawe maola'a hatto siamii – ara'e isai lai – apan mařringidda su ola'u watangangu sassane. Ewe'e apa apan ta'u irarřingidda su ola'u watangangu sassane tawe maola'a hatto. ⁴Ia'u tawe maapendama nassaļa

sulaḷummu manga hatto, arawe udde waḷine tatialane manungku ia'ū narḷinote. Mawu sassane manantungku ia'ū nassaḷa ara'e tawe. ⁵Ana waugu udde, amungkangu taambe tempone, arie iamiu maḷiha-ḷihakka manantunna manungku sangkatou nassaḷa ara'e tawe. Paḷḷadote Mawu Ruata rumanta. Ete Itou sarun mamu'a aḷawo'ū addapingnga apan uawuni sulaḷummu ararandumma. Ete Itou apan mamongkakku anambo n pandumanna apan uawuni sulaḷummu naungngu taumata. Su tempo udde suapa n taumata wakkute udde maasengkamma daralo wuassu Mawu Ruata apan wotongnge sengkamanni tou.

⁶Manga tuḷḷrangnga! Tadea'ū mahuna manaranu, ia'ū suete nap-paattu saranganambone udde si Apolos wuḷḷu su riri'ū sassane. Pandumanne tadea'ū wuassu tatuḷada ng kami udde iamiu wotongnge mangurumma apa atappasannu sasanato'a, "Pangagase su atoranna apan piate." Ringannu aroddi tawe saran sangkatou wuassi amiu wotongnge mapaatelengngu sangkatou taumata, see mangngadio'a taumata waine. ⁷Isai apan na'ola'a si'o nangillembu wuassu taumata waine? Waḷinewe saranganambone sinengkammu wuassu Mawu Ruata? Nariaddi, anio i'o mapaatelengngu watangannu, paḷḷimaunnapa apa apan tatahuanannu udde waḷine sambau apan nionggola? ⁸Atonna iamiu maddirite mapandumma manga sarannapa lai! Iamiu naalate! Iamiu naola'e ratu, wuḷḷu iami tawe. Apiawe eteapa amungkangngu iamiu atonna-tonna naola'e ratu, tadea'ū iami wotongnge mamarenta su sambau ringanni amiu. ⁹Ana waugu tumuḷḷuttu addapa'ū, iami manga rasul, suete niola'ū Mawu Ruata ere apa wabbialanna su saruannu taumata wuḷḷu manga mala'ekatta. Iami naaḷihida ere taumata laḷeo apan niḷḷuumanna na'oma n sara mate su saruannu awadaalla wuḷḷu aḷuandahannu runia. ¹⁰Ana waugu Kristus, ete iami indi taumata woddo, wuḷḷu iamiu taumata n Saḷḷani apan pande! Iami lome, iamiu matohassa, iami aḷuandahanna, wuḷḷu iamiu raddaloanna! ¹¹Na'oma n sara orassa indi iami uatataḷḷanga lunussa, wuḷḷu ararou; laubbi ami ete indi uaḷuḷḷe; taumata mangke mannansara siami; iami tawe tampa atanaanna, ¹²iami mammanara maḷḷimadda tadea'ū maasomba anna. Amungkangngu iami wontohanna, iami mabbalḷissu aḷamatta; amungkangngu iami pateanna, iami masabbare; ¹³amungkangngu taumata ma'umbilangngi ami, iami mabbalḷissu wisara apan maaluassa. Iami tawe nangillembu wuassu sappadu runia indi; na'oma n sara orassa indi iami ta'e aellehanna ere sappadu runia.

¹⁴Ia'ū namoḷḷettu indi siamiu, waḷinewe pandumanne ipammansili siamiu, ewe'e ipannantiro siamiu ere aḷaḷḷana'ū sassane. ¹⁵Ana waugu ete ia'ū naola'a iamangngi amiu, salaiwe asinungka ere taumata n Saḷḷani, iamiu uatahuante mapuḷo ḷiwu su atoune huru. Sulaḷummu wiakku ere manga taumata apan uauukka ringanni Kristus, ia'ū naola'a

iamangngi amiu, ana waugu ete ia'u nangapiddu Watti'u Aļaluassa siamiu su ola'i Kristus. ¹⁶Ana waugu udde ia'u sumaļande siamiu tadea'u iamiu mattanno tulada'u. ¹⁷Ana waugu udde ia'u suete nandolokki Timotius ringanni amiu. Sangkatou mallaļarřenggenni Kristus, itou naalīhida ere ana'u sassane apan aranguanna. Itou ana'a apan wotongge apangimananna. Itou sarun mapaanaungga siamiu su ola'u laļannu pabbiarřanna apan a'olaanku, napawe ia'u mangngimante si Kristus, eteudde laļannu pabbiarřanna apan iaarřa'a su jamaatta su anambo n tampa.

¹⁸Sire pira taumata wuassu wallatti amiu namungate, ana waugu imangitou massunna ia'u tate rumanta ringanni amiu. ¹⁹Arawe amungkanggu Mawu mamala'u, tate maļannu lai ia'u rumanta ringanni amiu. Su tempo udde lai ia'u sarun maasilo apa apan a'olaannu taumata mawunga udde; waļine tumba'u wisara mangitou sassane. ²⁰Ana waugu amungkanggu Mawu Ruata mamarenta pabbiarřannu sangkatou taumata, olangge udde aatialanna wuassu atatohassu pabbiarřannu taumata udde, waļine ana waugu manga wisarane. ²¹Nariaddi pamilete apa ipaapulu ng kamiu! Apa iamiu maapulu ia'u rumanta mangarřa'a ringannu marřagissa ara'e ia'u rumanta mangarřa'a ringannu masi'ome wuřru maranggu?

Sandaga sulaļummu jamaatta

5 Ia'u atonna suete naaringikka alae manungku su wallatti amiu pia pallaļagu sussandaga apan nipangillembu; Piaddu su wallatti amiu apan sinumandaga ringannu uatangge. Manga taumata apan wagga ma'illaļa Mawu lai maddiri ma'ola'a pallaļagu udde! ²Salaiwe aroddi, i'ota'e matanggakka. Arawe řinone iamiu masusa wuřru mapaasabanggu taumata ma'ola'a inolaanna ereudde wua dinganni amiu. ³⁻⁴Ere su wadangnga, ia'u marau wuassi amiu, arawe sulaļummu naungnga ia'u uatana'a su wallatti amiu. Nariaddi ia'u ma'ola'a udde ere lai ia'u su wallatti amiu, "Sulaļummu arannu Mawu Yesus Kristus, ia'u mabbaļo manungku taumata apan suete na'ola'a inolaanna apan laļeo udde, řinone iřřuumanna!" Amungkanggu iamiu maammula olaawe ere ia'u lai suadio'a ringanni amiu, wuřru ringannu tarřino Mawu ng kite Yesus, ⁵iamiu řinone manantillu taumata udde su Setanna, tadea'u wadangngu taumata udde mawinasa wuřru ringannu aroddi gharřahone iapaasaļamatta su tempo Mawu rumanta apia.

⁶Tawe su řinone iamiu mamunga. Asinungka iamiu naasingkate sanato'a indi, "Ragi apan adio'a ma'ola'a aompengu taponna tumuwo!" ⁷Rammea'a asuene ragi tabbe udde, eteudde ragi m paddarosa, tadea'u

iamiu maola'a ere ompengu taponna apan wakku, waresi wuassu ragi m paddarosa apan tabbe, wuṛṛu ia'u masingkata manungku iamiu atonna aroddi. Ana waugu, ramea m Paskah ng kite nasaddiate, ana waugu Kristus apan naola'a ere domba m Paskah ng kite suete niola'a sasamba. ⁸Nariaddi, wette iite mapaawantugu andeangngi ite udde ringannu roti apan tawe ragine, eteudde roti apan naola'a sasumandingngu awawaresi, wuṛṛu aḷawo'u apulu Mawu Ruata. Arie iite mallaghu andeangngu Paskah udde ringannu roti apan pia ragine tabbe, eteudde ragi m paddarosa wuṛṛu aḷaḷeo.

⁹Sulaḷummu sura'u apan naḷiu, ia'u namasingkatta siamiu tadea'u iamiu tawe maggawe n taumata masandaga. ¹⁰Pandumangku waḷinewe taumata masandaga ara'e waḷiu, ara'e taṛṛa wahia ara'e masasubba paaḷuanna apan tawe maailaḷa Mawu Ruata. Waḷine! Pandumangku tawe imangitou; ana waugu amungkanngu iamiu mangindau mangitou, ne ṛinone iamiu sumabangnga atonna-tonna wuassu runia indi. ¹¹Pandumangku eteudde, manungku iamiu arie paggawe n taumata apan mangnga'u watanganne taumata n Saṛṛani, arawe taumata udde masandaga, ara'e waḷiu, ara'e massubba paaḷuanna, ara'e taṛṛa umbilangngu taumata waine, ara'e taṛṛa wu'anna, ara'e taṛṛa ta'o. Uma'ianna umanna ringannu taumata udde arie lai!

¹²⁻¹³Atonna mamarikissa manga taumata waḷine Saṛṛani, waḷinewe manara'u. Mawu Ruata sassane apan mamarikissa simangitou. Arawe su ola'u manga laḷoṛṛo n jamaannu, waḷinewe iamiu sassane apan ṛinone mamarikissa simangitou? Sulaḷummu Wuke Susi uawoṛṛetta, "Limbiaṛṛewe taumata laḷeo wuassu wallatti amiu."

Mangngalae n tuṛṛangnga su mallarṛuungnga

6 Anio su wallatti amiu piaddu waṛṛani inai ringannu mallarṛuungnga apan wagga Mawu Ruata, inai mangalae n tuṛṛangngu apan sambau sulaḷummu pangangimanna, amungkanngu itou uawawuḷo n tuṛṛangge udde? Anio itou tawe madorongnga aḷarṛana'u Mawu Ruata manginsue hatto udde? ²Apa iamiu wagga manungku aḷarṛana'u Mawu Ruata sarun mamarikissa runia indi? Nariaddi, amungkanngu atonna iamiu mamarikissa runia indi, apa iamiu tawe maapanginsue manga hatto mallarṛuungnga apan tawe gunane? ³Apa iamiu wagga manungku iite sarun mamarikissa manga mala'ekatta? Nangillembu lai su ola'u manga hatto m pabbiaṛṛanna su miallo-miallo! ⁴Napawe amungkanngu nilumapputa manga hatto ereudde, apa iamiu mangalae su manga taumata apan tawe manarane sulaḷummu jamaatta? ⁵Tumanite maa-sili! Asinungka su wallatti amiu pia sangkatou pande apan wotong-

nge manginsue pattatiakka su wallattu manga tuṛrangnga apan rundussa Saṛrani! ⁶Arawe anio sangkatou taumata n Saṛrani inai ringannu taumata waḷine Saṛrani mangalae m pabbawawuḷone ringannu tuṛrangnge Saṛrani lai!

⁷Arie inai maggahato n taumata apan waḷine Saṛrani; su ola'u pattatiakka su wallatti amiu udde naola'e sambau aḷallome siamiu. Mappianne iamiu woddoanna, ara'e ruggianna! ⁸Arawe ete iamiu sassane apan na'ola'a taumata waine ringannu tawe su ṛinone. Iamiu sassane lai mandugi taumata waine. Wuṛru udde niola'i amiu su manga tuṛrangnga apan sambau sulaḷummu pangngimanna. ⁹Massingkate iamiu manungku manga taumata apan tawe tumuṛrutta apulu Mawu Ruata, tawe maola'a aḷaṛrana'u Mawu Ruata? Arie aawusuanna! Manga taumata apan sussandaga, manga taumata apan massubba paaḷuanna, apan mannalangnga wawine, apan ma'ola'a inolaanna apan maasili su sansuḷungnge, ¹⁰apan manna'o, apan waḷiu, apan taṛra wu'anna, apan taṛra umbilangngu taumata waine, wuṛru taṛra ḷinga taumata waine – anambo n taumata ereudde, tawe maola'a aḷaṛrana'u Mawu Ruata. ¹¹Sire pira su wallatti amiu dorone pia pallaḷagune ereudde. Arawe orassa indi iamiu niapaḷiatta'a waresi wuassu rosa. Iamiu naola'e pussa'a Mawu Ruata sassane. Iamiu nabelengke apia ringannu Mawu Ruata, ana waugu iamiu mangngimanna Mawu Yesus Kristus, wuṛru ana waugu taṛrino n Gharaḷaho wuassu Mawu Ruata ng kite.

Paata'e watangannu ipamantuga Mawu Ruata

¹²Piaddu mabbisara manungku suapa n taumata wotongnge ma'ola'a aḷawo'u inolaanna. Arawe mawala sia'u tawe sarangkanambone udde pia gunane. Nariaddi salaiwe ia'u wotongnge ma'ola'a aḷawo'u inolaanna, arawe ia'u maddiri mapaawala n watangangu paparentannu aḷawo'u inolaanna. ¹³Piaddu lai mabbisara manungku anna tumba'u hunane su tianna, wuṛru tianna nissaddia pangadoannu anna. Arawe itarua udde tawe ipaattu Mawu Ruata. Wadangngu taumata tawe wotongnge ipaatta ipa'ola'a sandaga, ewe'e tumba'u hunane ipamantuga Mawu Ruata. Wuṛru Mawu sarun mappaduḷi wadangnga udde. ¹⁴Mawu Ruata suete napaawiakku Mawu Yesus wuassu papate, aroddi lai Mawu Ruata sarun mapaawiakki ite ringannu taṛrino-Ne.

¹⁵Manga tuṛrangnga masingkata manungku wadangngu eteudde wageangngu wadangngi Kristus. Nariaddi wotongngewe ia'u manganu sambau wageangngu wadangngi Kristus, see olaanna wageangngu wadangngu sangkatou wawine masandaga? Mangke tawe wotongnge! ¹⁶Ara'e asinungka iamiu ta'e wagga manungku taumata apan uaammulla sua-

dio'a ringannu sangkatou masandaga, maola'a sambau ringannu taumata masandaga udde! Ana waugu sulaḷummu Wuke Susi uawoḥḥetta, "Itarua naola'e sambau." ¹⁷Arawe taumata apan napaa'aukku watanganne ringannu Mawu, Ghaḥḥaho Mawu wuḥḥu Ghaḥḥaho n taumata udde naola'e sambau.

¹⁸Pangindaute manga inolaanna sussandaga. Ana waugu anambo n dosa waine apan niola'u taumata, nariaddi su liuddu wadangngu taumata udde. Arawe taumata apan sussandaga, udde mangalene ma'ola'a rosa lai su wadangnge sassane. ¹⁹Iamiu ḥinone masingkata manungku eteudde wadangngu atatanaannu Ghaḥḥaho Mawu Ruata. Ghaḥḥaho udde uatana'a sulaḷummi amiu. Wuḥḥu Ghaḥḥaho Mawu Ruata sassane apan nangonggolu Ghaḥḥaho udde siamiu. Wadangngu walḥinewe pussaanu. Udde pussa'a Mawu Ruata. ²⁰Mawu Ruata suete namalli siamiu wuḥḥu nasuete m baekke. Ana waugu udde, paata'e wadangngu aroddi olangnge ma'oma n sara Mawu Ruata wantuhanna.

Manga aiwaḷo su ola'u paa'awingnga

7 Orassa indi ia'u maapulu mabbisara su ola'u hatto apan isassago ng kamiu sulaḷummu surannu. Amungkannggu sangkatou esakka tawe naawingnga, udde mapia. ²Arawe tadea'u tawe awono'anna ma'ola'a aḷawo'u aḷaḷeo, mappianne suapa n taumata esakka pia awingnge sassane wuḥḥu suapa n taumata wawine pia awingnge lai sassane. ³Awingnge esakka ḥinone manuungngu sumbalane su awingnge wawine, wuḥḥu awingnge wawine ḥinone manuungngu sumbalane ere awingnge wawine su awingnge esakka; sangkatou-sangkatou manipussa sasumbalane sangkatou ringannu waine. ⁴Awingnge wawine tawe maatahuanna wadangnge sassane; apan uatahuanna sitou eteudde awingnge esakka. Aroddi lai awingnge esakka tawe maatahuanna wadangnge sassane; apan maatahuanna sitou eteudde awingnge wawine. ⁵Arie sangkawinganna udde matataḷei sangkatou ringannu waine. Wotonge ewe'e tumba'u taḷa ng kadio'a, sambaliate udde apulu n tarua. Ringannu aroddi sangkatou-sangkatou wotongnge umalḥiomanna ringannu tawe limbane. Arawe wua udde, ḥinone iamiu mabawelengnga ere sangkawinganna. Amungkannggu tawe aroddi, iamiu wotongnge awono'annu ghaḥḥaho laḷeo, ana waugu iamiu tawe maataḥḥangnga apulu n runia.

⁶Ia'u mabbisara arendi walḥine maola'a sambau darolokka, arawe sambau aḷaḥḥa'a. ⁷Ḥinone ia'u lembo maapulu amungkannggu anambo n taumata maola'a ere ia'u. Arawe sangkatou-sangkatou suete nanengkamma aḷamatta apan uapapaḥḥala wuassu Mawu Ruata. Sangkatou pia aḷamatta indi, waine lai pia aḷamatta udde.

⁸Su manga taumata apan taambe naawingnga, wuŕru su manga wawine apan niawaŕuanna, indete aŕaŕra'u; Mappianne i'o sidutu mabbiakka sassane ere ia'u. ⁹Arawe amungkangngu i'o tawe maaradannu apulunu, mappianne i'o paawingnga. Ana waugu mappianne i'o maawingnga suŕungngu'e apulunu tawe iaradanna. ¹⁰Matatarino simangitou apan suete naawingnga, ete indi parenta'u: (Su rinone waline ia'u apan nangagillu parenta indi, arawe Mawu.) Sangkatou wawine apan suete naawingnga arie manantangngu awingnge. ¹¹Arawe amungkangngu itou suete nanantangnga, itou rinone sidutu tawe maawingnga, ara'e mabelengnga ringannu awingnge. Wuŕru sangkatou awingnge esakka tawe wotongnge manindo awingnge wawine.

¹²Simangitou apan waine lai, aŕaŕra'u ereindi: - indi aŕaŕra'u sassane, waline Mawu - amungkangngu sangkatou Saŕrani maawingngu sangkatou wawine apan tawe mangngimanna si Kristus, wuŕru awingnge wawine maapulu mabbiakka ringanni tou, taumata udde tawe wotongnge manindo awingnge wawine udde. ¹³Wuŕru amungkangngu sangkatou wawine Saŕrani pia awingnge sangkatou apan tawe mangngimanna si Kristus, wuŕru awingnge esakka maapulu mabbiakka su sambau ringanni tou, ne wawine udde tawe wotongnge manindo awingnge esakka udde. ¹⁴Ana waugu awingnge esakka apan tawe mangngimanna iwali maola'a reengannu aŕaŕrana'u Mawu Ruata ana waugu itou naawingngu wawine apan suete naola'a pussa'a Mawu Ruata. Aroddi lai wawine apan tawe mangngimanna, iwali maola'a pussa'a Mawu Ruata ana waugu itou naawingngu wawine apan suete naola'a pussa'a Mawu Ruata. Amungkangngu tawe aroddi, aŕaŕrana'i mangitou uatatana'a aŕaŕrana'u apekka, sumbali manga aŕaŕrana'a udde nireengnga maola'a aŕaŕrana'u Mawu Ruata. ¹⁵Arawe amungkangngu taumata apan tawe mangngimanna udde manantangngu awingnge wawine ara'e esakka apan Saŕrani, arie pama'ungnga sitou. Sulaŕummu olangnge indi wawine ara'e esakka udde naljute, ana waugu Mawu Ruata maapulu tadea'u iamiu mabbiakka ringannu uasampinunutanna. ¹⁶Ana waugu i'o sangkatou awingnge wawine - apan nangimante Mawu - ereapa i'o wotongnge maasingkata ringannu atonna manungku i'o tawe maapanalamatta awingngu esakka? Aroddi lai i'o naola'a awingnga esakka Saŕrani, ereapa i'o naasingkata ringannu atonna manungku i'o tawe maapanalamatta awingngu wawine?

Pabbiakke su ereapa i'o ahetannu Mawu

¹⁷Rinone sangkatou-sangkatou mangngatokku pabbawiakke tumuruttu aehettu Mawu ere suete tinantunnu Mawu Ruata sitou su tempo

Mawu Ruata namaggo sitou see mangngimanna Sitou. Eteudde tita apan ta'u iaarra'a su alawo'u jamaatta. ¹⁸Nassuŋnga ere amungkangngu sangkatou taumata suete nissunatta su tempo itou naasengkamma wawaggo Mawu Ruata, ne imbarangnga taumata udde maddea'a mappassa manga tatiala n sunatta udde. Aroddi lai amungkangngu sangkatou taumata taambe nissunatta su tempo itou nanengkamma wawaggo Mawu Ruata, imbarangnga taumata udde maisunatta. ¹⁹Ana waugu tuttuŋrutta tita n sunatta ara'e tawe tumuŋrutta, sarangkanambone tawe gunane. Ahunanne tumba'u tumuŋrutta manga tita Mawu Ruata. ²⁰Rinone suapa n taumata sidutu mabbiakka sulaŋummu olangnge ere lai su tempo itou naasomba wawaggo Mawu Ruata. ²¹Amungkangngu su tempo i'o waggoanna, i'o udde sangkatou allangnga, ariewe i'o masusa maringgiddu olangnge udde. Arawe amungkangngu su paassa i'o maasomba tempone maŋu wuassu alawo'u manara, paata'e tempo udde. ²²Ana waugu sangkatou allangnga apan suete nangimanna Mawu, naola'e taumata n Mawu. Wuŋru sangkatou apan napallose apan mangngimante Mawu, naola'e allangngi Kristus. ²³Mawu Ruata suete namalli si'o wuŋru nasuete m baekke. Ana waugu udde, imbarangnga i'o manantillu wadangngu maola'a allangngu taumata. ²⁴Nariaddi, manga tuŋrangnga, naunge, ereapa ola'i amiu su tempo niwagoanna, rinone i'o sidutu mabbiakka ereudde suadio'a ringannu Mawu Ruata.

Su ola'u manga taumata apan taambe naawingnga wuŋru manga inawaŋuanna

²⁵Orassa indi su ola'u manga taumata apan taambe naawingnga. Su ola'u hatto udde, ia'u tawe naasengkamma parenta wuassu Mawu. Arawe narŋino su manga taumata apan ana waugu alamattu Mawu wotongnge pangimananna, ia'u maapulu mangonggolu tatantiro'u.

²⁶Mannaungnga alawo'u asasusa apan mammaŋrangnga orassa indi, ia'u mammendama mappianne amungkangngu taumata sidutu mabbiakka olangnge naalihida ere su orassa indi. ²⁷Amungkangngu i'o plate awingnga, arie paŋringidda manindo awingngu. Amungkangngu i'o taambe awingngu, ariete padea'a awingnga. ²⁸Arawe amungkangngu i'o maawingnga, udde waŋine rosa. Aroddi lai amungkangngu sangkatou maŋruala maawingnga, udde tawe manungku itou marosa. Tumba'u imangitou apan maawingnga, udde sumaruanna anambo n asasusa. Wuŋru ia'u maapulu iamiu maŋu wuassu manga asasusa udde.

²⁹Pandumangku arendi, manga tuŋrangnga: Iite tate tempone lai manambo. Manattaka orassa indi, suapa n taumata apan plate awingnge,

řinone itou mabbiakka naalĩhida ere tawe awingnga; ³⁰taumata apan lulluai, pabbiakke pailalĩhidda ere itou tawe asasusa naungnga; taumata apan lullage, pailalĩhidda ere tawe lulluassa; taumata apan suete namalli, pailalĩhidda ere itou tawe uatahuanna apa-apa; ³¹wurřu manga taumata uamanara sulařummu manara n runia, řinone mabbiakka pailalĩhidda ere itou tawe limbatannu manara udde. Ana waugu tate mařannu lai runia indi, sulařummu olangnge ere orassa indi sarun mawuři!

³²Ia'u maapulu tadea'u tuřrangnga mařiu wuassu asasusa. Taumata apan tawe awingnge sarun manidutu n řingidde su inolaannu Mawu, ana waugu itou maapulu malluassa Mawu. ³³Arawe taumata apan piate awingnge sarun mařringidda manambo su ola'u runia indi, ana waugu itou maapulu malluassa naungngu awingnge; ³⁴apanganne řingirřanne natahia. Sangkatou wawine apan tawe awingnge, ara'e sangkatou mařřuala, sarun mařringidda manambo su ola'u Mawu, ana waugu itou maapulu tadea'u wadangnge sarangkanambone maola'a pussa'a Mawu Ruata. Arawe sangkatou wawine apan piate awingnge, manidutu n řingirřanne su ola'u paddarunia indi, ana waugu itou maapulu malluassa naungngu awingnge.

³⁵Ia'u namorřettu sarangkanambone indi hunane su apapianu sassane, wařine ringannu pandumma maningaddu indi wurřu maningaddu udde. Ipaapulu'u tumba'u tadea'u tuřrangnga ma'ola'a apapia wurřu apan su řinone, tadea'u i'o wotongnge manidutu n řingirřannu su Mawu.

³⁶Amungskangngu sangkatou mamendama tawe mapaamattu apa apan su řinone su saruannu tunangane, amungskangngu itou tawe maarřadannu apulu n dunia, wurřu itou mammendama maapulute maawingngu mařřuala udde, wala'e itou ma'ola'a apa apan pappendamane mapia. Itou tawe marosa, amungskangngu itarua maawingnga. ³⁷Arawe amungskangngu sangkatou suete nakkawessa sulařummu naungnge tawe maawingnga ringannu tunangane wurřu apulune udde tawe niwata'a, ne inolaanne udde mapia, sambařiate itou matohassa su apulune udde. ³⁸Apianne eteudde, taumata apan naawingnga, mapia inolaanne, wurřu taumata apan tawe naawingnga, lembo n apianne lai inolaanne.

³⁹Sangkatou wawine apan suete naawingnga tatahuanannu awingnge esakka tumba'u tantařanna awingnge udde wiakka. Arawe amungskangngu awingnge natete, wawine udde wotonggete maawingnga apia ringannu sangkatou esakka apan ipaapulune; sambařiate paa'awingnga udde paa'awingngu taumata n Sařřani. ⁴⁰Arawe itou lembo ma'untunganna amungskangngu tate maawingnga apia. Udde addapa'u sassane, arawe ia'u mammendama manungku wisara'u udde eteudde ringannu tařřino Ghařřaho Mawu Ruata.



Mawu n taumata n Yunani (8:5)

Su ola'u anna apan nionggola maola'a sasamba su paaļuanna

8 Orassa indi su ola'u anna apan nionggola maola'a sasamba su paaļuanna. Atonna ere unnu wisara n taumata, "Iite sarangkanambone pandete." Arawe apapande ma'ola'a taumata mabbali mawunga, arawe paa'akkana mangngapia taumata. ²Taumata apan massunna manungku itou masingkattu sarangkanambone, su rinone itou taambe naasingkata sara aļalumanne. ³Arawe taumata apan atonna-tonna maranggu Mawu Ruata, itou asingkatannu Mawu Ruata.

⁴Su ola'u hatto u'anna anna apan suete nionggola sasamba su paaļuanna, iite masingkata manungku paaļuanna udde ere ola'u sambau apan tawe baddi'a. Wuŗru iite masingkata lai manungku Mawu Ruata tumba'u sambau; tawe baļine. ⁵Atonna manambo lai apa apan isassago monganna, wuŗru mawu, mapia udde ete su langitta, ara'e lai su wowo n runia. ⁶Arawe siite, Mawu Ruata tumba'u tinggassa. Itou Iamangnga apan nandiaddi sarangkanambone. Ete hunane Sitou iite mabbiakka. Wuŗru Mawu tumba'u sambau lai, eteudde Yesus Kristus. Sulaļummi Tou sarangkanambone niriaddi, wuŗru ana waugu ete Itou iite wiakka.

⁷Salaiwe aroddi, tawe anambo n taumata masingkatu olangge udde. Piaddu taumata paarorone wiasane massubba paaļuanna. Nariaddi, ana waugu udde na'oma n sara orassa indi lai imangitou ta'e uapendama manungku anna, apan suete pinasubba paaļuanna, eteudde annu paaļuanna. Ne amungkangngu imangitou umanna anna udde, imangitou


uapendama udde rosa; ana waugu pangangimanni mangitou ta'e lome. ⁸Su rinone anna sassane tawe maaola'a paa'aukki ite ringannu Mawu Ruata maola'a lembo mapia. Amungkanngu iite umanna anna udde, iite tawe maasomba auntunganna apa-apa. Aroddi lai amungkanngu iite tawe umanna anna udde, iite lai tawe marugi sara ng kadio'a.

⁹Arawe paatehamma, arie ma'oma n sara mariaddi manungku taumata waine maola'a marosa - ana waugu pangangimanne ta'e lome - ana waugu i'o walate apulu ma'inolaanna sarangkanambone. ¹⁰Pandumangku arendi: Unnu wisara i'o, pia pangangimanna apan matohassa, tantala'anna u'anna su tampa m paa'uanna. Wua udde pia sangkatou naasilo si'o ua'ianna u'anna isudde. Amungkanngu pangangimannu taumata udde lome, waline udde maawarrani taumata udde umanna anna apan suete pinasubba paa'uanna udde? ¹¹Wurru ana waugu udde, ne pangangimannu naaola'a taumata pangangimanne lome udde umaliwu. Sumbali Kristus nate hunane su taumata udde lai. ¹²Wurru amungkanngu i'o ma'ola'a pasasala ereudde su saruannu manga turrangnga apan Sarrani - eteudde i'o nanggohakku pangangimanni mangitou apan lome - ne i'o narosa su saruanni Kristus. ¹³Ana waugu udde, amungkanngu anna maaola'a si'o marosa, ne ia'u tate uminassa remessa lai. Ana waugu arrenge turrangu marosa ana waugu ia'u.

Alawo'u tarriino wurru manara manga rasul

9 Walinewe ia'u taumata uapallose? Walinewe ia'u sangkatou rasul? Apa ia'u taambe naasilo Mawu Yesus, Mawu ng kite? Apa iamiu walinewe ina'ule n manara'u su Mawu? ²Amungkanngu lai manga taumata waine maddiru manga'u sia'u sangkatou rasul, adiongke iamiu mangnga'u udde! Ana waugu wiakku ere sangkatou taumata n Sarrani maola'a tatiala manungku ia'u sangkatou rasul.

³Amungkanngu pia taumata mapaasala'u, ia'u sarun sumimbakka arendi: ⁴Apa ia'u tawe wotongge manengkamma anna wurru ua'e ana waugu manara'u? ⁵Apa ia'u tawe wotongge mangapiddu sangkatou awingnga taumata n Sarrani ringanku sula'ummu amatanku, ere lai niola'u manga turrangnga Mawu Yesus wurru manga rasul waine, nasutta lai Petrus? ⁶Ara'e tumba'u Barnabas wurru ia'u sassane iradolokka iaparea'a wiakka sassane? ⁷Taweddu sangkatou tantara apan rinone mada'a pabbawiakke sassane sula'ummu amulannu tantara udde! Tawe mabbawaila apan massuannu anggore su waille see tawe umanna wua n anggore wuassu waille udde! Tawe mandariaga apan mappaduli domba, see tawe ma'inumma susu wuassu manga dombane udde!



Sapi tantałanna mařřinda gandumma (9:9)

⁸Ia'u namasingkatu olangge udde wałine tumba'u pinangananne apan ianaramanna su pabbiařřanna miallo-miallo, arawe ana waugu Wuke Susi namasingkata lai su olangge udde. ⁹Sulałummu Wuke Musa uawořřetta, "Sapi apan tantałanna mařřinda gandumma ana see matontonga watune wuassu raene, arie pařřapinge mořřongge." Apa tumba'u sapi apan pappadułjanannu Mawu Ruata? ¹⁰Ara'e udde pandumanne siite? Atonna udde niwořřetta siite. Ana waugu tau-mata apan mammanara waille wuřřu taumata apan mammaresi amene, su řinone mammanara ringannu mangngantimma maasengkama sangkawageanganna wuassu hessi n manarane. ¹¹Iami suete nangasi'u wualannu Ghařřaho sulałummu pabbiařřannu. Ne amungkangngu iami mangitingnga manga ałamattu runia wuassi amiu, apa udde atap-pasanne manungku iami madorongnga tumanite manambo wuassi amiu? ¹²Amungkangngu manga taumata wotongge mangantimma indi wuassi amiu, wałinewe iami lai lembo n pia tařřino wuassi mangitou?

Arawe ia'u taambe nappaattu tařřino udde. Arawe ia'u lembo maa-pulu maningkułu sarangkanambone udde, wuassu ia'u mapaałaputu manga inolaanna apan mannałare manara mamasingskatu Watti'u Ałaluassa su ola'i Kristus. ¹³Tuřřangnga lai masingkate manungku tau-mata apan mammanara su Wałe Mawu Ruata mannengkamma wiakki mangitou wuassu Wałe Mawu Ruata. Wuřřu manga taumata apan mam-madułi tampa n sasamba, maasomba sambageanganna wuassu sasamba apan niola'a sasamba isudde. ¹⁴Aroddi lai Mawu suete nanantunna manungku taumata apan mabbatti'u Watti'u Ałaluassa udde řinone maasomba pabbawiakke wuassu manarane udde.

¹⁵Arawe taambe saran paassa ia'u nappaattu manga tařřino udde. Wuřřu ia'u namořřettu suratta indi wałinewe lai ringannu pandumanna

tadea'u manga tarrino udde olaanna orassa indi sia'u. Mappianne ia'u mate, sulungge'e ia'u awuljannu inolaanna apan ilallala'u udde. ¹⁶Ana waugu amungkangngu udde tumba'u su ola'u mabbatti'u Watti'u Aļaluassa wuassu Mawu Ruata, ne ia'u tawe maapamunga, ana waugu Mawu Ruata suete namarenta sia'u iapamanara. Nasilakate ia'u, amungkangngu ia'u tawe nabbatti'u Watti'u Aļaluassa udde! ¹⁷Unnu wisara ia'u mappamattu manara udde wuassu apulu'u sassane, ne ia'u wotongge mangantima laļantake. Arawe ia'u mamasingkattu Watti'u Aļaluassa udde ana waugu udde manara'u. Ia'u nirolokku Mawu Ruata iapa'ola'a manara udde. ¹⁸Amungkangngu aroddi, apa bawaekke sia'u? Indi bawaekke: manungku ia'u wotongge mamasingkatu Watti'u Aļaluassa udde ringannu tawe mamakkata saran sangkatou iapasumbala sia'u, ana waugu ia'u maddiru madorongnga bawaekke su ola'u ia'u mabbatti'u Watti'u Aļaluassa udde.

¹⁹Ia'u indi walnewe allangngi sai-sai; ia'u uapallosa. Salaiwe aroddi, ia'u suete na'ola'a watangangu indi maola'a allangngu anambo n taumata. Ia'u na'ola'a udde tadea'u ia'u wotongge mapaasalamattu anambo n taumata sulaļummi Kristus. ²⁰Su saruannu taumata n Yahudi, ia'u naola'a ere taumata n Yahudi tadea'u ia'u wotongge mapaasalamattu taumata n Yahudi hunane si Kristus. Su saruannu manga taumata apan mabbiakka tutturputta tita Musa, ia'u naola'a ere ia'u lai tutturputta tita udde, salaiwe ia'u rinone tawe aittannu tita udde. Ia'u na'ola'a udde tadea'u ia'u wotongge mamolengnga simangitou maola'a mallalarrenggenni Kristus. ²¹Su saruannu taumata waline Yahudi, ia'u mattingkaola'a naalihida taumata waline Yahudi, apan mabbiakka su liuddu tita Musa. Ia'u na'ola'a udde tadea'u ia'u wotongge maawolengnga simangitou maola'a mallalarrenggenni Kristus. Arawe udde tawe'e manungku ia'u tawe tumurputta manga parenta Mawu Ruata; arawe ia'u sidutu iappiarra'u manga parenta wuassi Kristus. ²²Su pattangannu manga taumata apan pangangimanne lome, ia'u lai mattingkaola'a ere sangkatou apan pangangimanne lome tadea'u ia'u wotongge maawolengnga simangitou maola'a mallalarrenggenni Kristus. Aunne, ia'u ma'ola'a sarangkanambone hunane su anambo n taumata tadea'u ringannu laļanne salaiwe ereapa lai ia'u wotongge manalamatta sangkawageanganna wuassi mangitou.

²³Sarangkanambone udde ta'u niola'a huna n Watti'u Aļaluassa wuassu Mawu Ruata, tadea'u ia'u lai alamatanna. ²⁴Turrangnga lai masingkatta manungku sulaļummu tandinganna anambo matatalumma tuttalangnga, arawe tumba'u sangkatou manengkamma laļantake. Ana waugu udde talangke aroddi apiane, ma'oma n sara i'o maasengkamma laļantake. ²⁵Suapa n taumata apan sulaļummu latihanna, uatataranga alawo'u apulu. Itou na'ola'a udde ana waugu itou maapulu eleannu

wunga tatiala na'untungnga, eteudde wunga apan maḷihakka tumolangnga. Arawe iite indi uatataḥḥanga sulaḷummu aḷawo'u apulu, ana waugu iite maapulu eleannu wunga apan tawe tumolangnga. ²⁶Ana waugu udde ia'u tuttaḷangnga ringannu tudda apan natantunna. Ere su tandingannu uaa'o'a, ia'u tawe walate ao'ane. ²⁷Ia'u namala m wadanku aḥḥaanna ringannu matohassa ma'oma n sara ia'u wotongnge maasingkatta atonna. Ia'u ma'ola'a aroddi, ana waugu ia'u maddiri ma'oma n sara mariaddi manungku napawe ia'u mangahe taumata waine mattandinganna ia'u sassane tawe niwaḷi ara'e nito'e.

Sasingadda su ola'u paaḷuanna

10 Manga tuḥḥangnga! Rinone tuḥḥangnga mannaungnga apa apan suete nariaddi su iupunggu aḷamona ng kite su tempo imangitou uatantalongnga si Musa. Imangitou sarangkanambone niaḷindumannu winabbawa wuḥḥu ringannu saḷamatta tinumumbe su Tahaḷoangnga Maḥḥamu. ²Tadea'u maola'a mallalaḥḥenggeni Musa, imangitou sarangkanambone nissaḥḥani sulaḷummu winabbawa wuḥḥu sulaḷummu tahaḷoangnga udde. ³Imangitou sarangkanambone u'anna annu Ghaḥḥaho m pangangimanna apan uasuḷungnga, ⁴wuḥḥu ma'inumma ua'e n Ghaḥḥaho m pangangimanna apan uasuḷungnga. Imangitou sarangkanambone ma'inumma wuassu wowo m batu Ghaḥḥaho m pangangimanna apan ualu'adda simangitou; wowo m batu eteudde Kristus sassane. ⁵Salaiwe aroddi, Mawu Ruata tawe maḷuassa wuassu anamboanne su wallatti mangitou, ana waugu udde manga winaḷunanni mangitou uataḷeḥḥongnga su wadda'a.

⁶Sarangkanambone udde maola'a tuḷadda siite, iapaanaungnga siite tadea'u tawe numemma manga inolaanna apan laḷeo ere imangitou. ⁷Wuḥḥu tadea'u iite lai tawe massubba paaḷuanna ere lai a'olaannu sangkawageanganna wuassi mangitou. Sulaḷummu Wuke Susi uawoḥḥetta, "Ne pabbawalaga udde mannattake u'anna wuḥḥu ma'inumma, wuḥḥu massaḷaingnga ipassubba paaḷuanna." ⁸Iite tawe wotongnge ma'ola'a manga inolaanna sussandaga udde ere suete niola'u sangkawageanganna wuassi mangitou. Ana waugu rua m puḷo tallu su riwune taumata wuassi mangitou nate sulaḷummu allo massallo ana waugu ma'inolaanna ere udde. ⁹Iite tawe wotongnge maannamma Mawu ere suete niola'u sangkawageanganna wuassi mangitou rorone, na'oma n sara imangitou nate nipuḷissu atoana mawisa. ¹⁰Iite tawe wotongnge lai sumungkuta, ere suete niola'u sangkawageanganna wuassi mangitou rorone, na'oma n sara imangitou nipate n Mala'ekattu Papate.

¹¹Sarangkanambone udde mariaddi simangitou, maola'a tulada su manga taumata waine. Wuṛru sarangkanambone udde uaworṛetta lai, maola'a pananaunganna siite. Ana waugu iite orassa indi mabbiaikka su tempo panginsueanne.

¹²Taumata apan massunna watanganne uarisikka matohassa, ṛinone paatehamma; arie itou ma'oma n sara maṛṛa'a. ¹³Aḷawo'u wawono'a apan niasombanganni amiu, eteudde wawono'a apan masokkate nia-pondamannu taumata. Arawe Mawu Ruata sidutu uaaggasa paaire-Ne. Itou maddiri mamalanu wono'anna nangillembu wuassu pangangimanni amiu. Su tempo iamiu nia'omannu wawono'a, Itou sarun mamanti-ngiddu laḷanna siamiu tadea'u maola'a matohassa wuṛru iamiu wotong-nge maataṛrangnga.

¹⁴Ana waugu udde, manga tuṛrangnga apan arangnguanna, ṛinone iamiu maddantinu pasassubba paaḷuanna. ¹⁵Ia'u mabbisara siamiu ere su manga taumata pande. Ṛinone iamiu maṛringidda sassane wisara'u indi. ¹⁶Su tempo iite ma'inumma anggore ringannu maadiangkamanna su Mawu Ruata, waḷinewe udde mapaaḷiatta'a manungku iite uauukka ringanni Kristus sulaḷummu papate-Ne? Wuṛru su tempo iite mattahia roti annananna suadio'a, waḷinewe udde mapaaḷiatta'a manungku iite uauukka sulaḷummu wadangngi Kristus? ¹⁷Ana waugu tumba'u pia sambau roti, wuṛru iite sarangkanambone u'anna roti sambau udde lai, ne iite apan manambo indi naaḷihidda wadangnga sambau.

¹⁸Ore panutukka manga taumata n Yahudi. Imangitou apan u'anna anna uarandangnga su tampa m pangadoannu sasamba, eteudde manga taumata apan uauukka ringannu tampa udde. ¹⁹Apa pandumangu su olangnge udde? Paaḷuanna ara'e lai anna apan ipassubba paaḷuanna udde tawe gunane sara ng kadio'a. ²⁰Apa apan niaddo su tampa n sasamba ipasubba paaḷuanna, tawe ipasubba Mawu Ruata, ewe'e ia'onggolla su manga ghaṛraho laḷeo. Wuṛru ia'u maddiri iamiu uauukka ringannu ghaṛraho laḷeo. ²¹Iamiu tawe wotongnge ma'inumma wuassu tampa pa'inumannu Mawu, wuṛru wuassu tampa pa'inumannu ghaṛraho laḷeo lai. Iamiu tawe wotongnge umanna su medda Mawu, wuṛru wu-assu medda ghaṛraho laḷeo lai. ²²Ara'e iite maapulu Mawu naung-Nge maḷaḷeo? Apa iite mattohasanna wuassu Mawu?

²³Unnu taumata, "Iite wotongnge ma'ola'a aḷawo'u apa ipaapulu ng kite." Atonna! Arawe tawe anambo n apa ipaapulu ng kite udde pia gunane. "Iite wotongnge ma'ola'a walate naungngi ite" – arawe tawe sarangkanambone ipaapulu ng kite udde maatamba pabbiaṛrani ite. ²⁴Arie pia sangkatou taumata maddea'a asasuungngu ririne sassane. Suapa n taumata sarun maddea'a hausannu taumata waine.

²⁵Iamiu wotongnge umanna aḷawo'u apa apan iwabaḷu'a su pa-sakku ṛemessa. Ariete panutukka asuene, salaiwe pia manga apen-

damma maddiri sulaḷummu naungngu. ²⁶Ana waugu sulaḷummu Wuke Susi uawoḥḥetta, "Runia indi ringannu anambo n laḷoḥḥone udde tatahuanannu Mawu."

²⁷Amungkangngu iamiu waggoannu sangkatou waḷine taumata n Saḥḥani umanna, wuḥḥu iamiu umitu'a wawaḷo udde, ante apa apan niimbe si'o. Ariete panutukka wuassuapa darantane anna udde, tadea'u tawe manga apendamma maddiri wuassu laḷummu naungngu. ²⁸Arawe amungkangngu piaddu mabbisara siamiu, "Anna indi suete pinasubba paaḷuanna," arie umanna anna udde, ana waugu mapaasuungngu apulu n taumata udde wuḥḥu ana waugu tingikku naungnga. ²⁹Pandumangku waḷine tingikka wuassu laḷummu naungngu, arawe tingikku laḷummu naungngu taumata udde.

Asinungka piaddu maiwaḷo, "Ei anio apulu'u pia taumata mani-ngadda? ³⁰Amungkangngu ia'u sarun umanna anna ringannu maadiangkamanna su Mawu Ruata, anio taumata sarun mapaasaḷa'u wuassu anna udde, salaiwe ia'u suete naadiangkamanna su Mawu Ruata ana waugu anna udde?"

³¹Aḷawo'u apa apan a'olaanni amiu - tuḥḥrangnga umanna ara'e tuḥḥrangnga ma'inumma - ola'e sarangkanambone udde ipamantuga Mawu Ruata. ³²Pabbiakke aroddi olangnge ma'oma n sara tuḥḥrangnga tawe ma'ola'a taumata waine ma'ola'a rosa; apa imangitou taumata n Yahudi ara'e taumata waḷine Yahudi, ara'e lai jamaattu Mawu Ruata. ³³Pabbiakke ere ia'u. Ia'u maddea'a mapaaḷuassu naungngu anambo n taumata wuassu aḷawo'u inolaanna, ringannu tawe pandumanne mapaaḷuassu riri'u sassane. Tudda'u eteudde tumba'u tadea'u imangitou sarangkanambone wotongnge masaḷamatta.

11 Pattannote pallaḷagu'u, ere ia'u lai mattanno pallaḷagu n Kristus.

Su ola'u mappaattu tatindungngu pua su tempo mammisa

²Ia'u maddalo siamiu ana waugu iamiu sidutu mannaungnga sia'u wuḥḥu tuttuḥḥrutta aḷaḥḥa'a apan ta'u nionggola siamiu. ³Arawe ia'u maapulu lai iamiu maasingkata sambau hatto, eteudde manungku apan maola'a tembonannu aḷawo'u taumata esakka eteudde Kristus; apan maola'a tembonannu awingnge wawine eteudde awingnge esakka, wuḥḥu apan maola'a tembonanne wuassu Kristus eteudde Mawu Ruata. ⁴Amungkangngu sangkatou esakka su tempo umaḷiomanna ara'e su tempo mapaasingkatu watti'a wuassu Mawu Ruata su saruannu awadaalla, uapaattu tatindunga su pua, ne taumata udde mangngaḷuandaga Kristus. ⁵Wuḥḥu amungkangngu sang-

katou wawine su tempo umaļiomanna ara'e su tempo mapaasingkatu watti'a wuassu Mawu Ruata su saruannu awadaalla, tawe uapaattu tatindungnga, ne wawine udde mangngadio'a awingnge apan uaparenta sitou. Udde nassuļungngu ere pua m wawine udde suete nilungguka. ⁶Ana waugu amungkangngu sangkatou wawine maddiri manindunga puane, mappianne utangnge poļoanna. Arawe amungkangngu sangkatou wawine poļoanna puane ara'e huntinganna utangnge, ne udde sambau laļobbosa sitou. Ana waugu udde mappianne itou mappaattu tatindunga. ⁷Esakka tawe wotongnge mappaattu tatindunga, ana waugu itou naaļihida hambarannu inolaan-Ne wuŗru awawantugu Mawu Ruata. Arawe wawine maola'a hambarannu awawantugu esakka, ⁸ana waugu esakka tawe niola'a wuassu wawine, ewe'e wawine niola'a wuassu esakka. ⁹Esakka lai tawe niola'a hunane su wawine, ewe'e wawine niola'a ana waugu hunane su esakka. ¹⁰Ana waugu udde tadea'u mapaaļuassu manga mala'ekatta, sangkatou wawine řinone mappaattu tatindunga maola'a tatiala manungku itou su aļungngu parenta ng kawingnge. ¹¹Salaiwe aroddi sulaļummu iite mabbiakka naola'a tautmata n Saŗrani, wawine tawe maawiakka sassane uataļei wuassu esakka, wuŗru esakka lai tawe maawiakka sassane uataļei wuassu wawine. ¹²Ana waugu salaiwe wawine paarorone niola'a wuassu esakka, arawe wua isudde esakka inasungkangnga wuassu wawine; wuŗru aļawo'u sarangkanambone darantane wuassu Mawu Ruata.

¹³Manga tuŗrangnga paannama sassane maŗringiddu hatto indi: Apa mapia sangkatou wawine u'aliomanna su Mawu Ruata su saruannu awadaalla, ringannu tawe uapaattu tatindunga? ¹⁴Wuassu asingkattu awadaalla, iamiu suete niaŗraanna manungku amungkangngu esakka utangnge maļo'e, udde sambau apan tawe su řinone. ¹⁵Arawe su wawine, uta'a nionggola sitou ipanaappa puane, wuŗru uta'a maļo'e udde naola'a awawantuge. ¹⁶Aroddi amungkangngu piaddu maapulu matatiakka su ola'u hatto indi, tumba'u sambau ta'u iwaļo eteudde manungku mapia iite ara'e manga jamaattu Mawu Ruata waine, sarangkanambone tumba'u pia sambau inanaramanna udde sulaļummu jamaatta, waine wua isudde tawe wotongnge.

Andeangngu Mawu

¹⁷Su ola'u manansunna indi; ia'u tawe maddalo siamiu. Pamamisa ng kamiu waļine mapaaļiatta'u apapia, ewe'e aļaļeo. ¹⁸Paarorone ia'u naaringikka, manungku sulaļummu ammuļanni amiu pia manga ammuļanna apan uatatiakka. Wuŗru ia'u maŗrangngo manungku mannamboanna watti'a udde atonna. ¹⁹Naŗrinote amungkangu pia patatiakka su wallatti

amiu, tadea'u sarun asiloanna isai-sai taumata n Sarrani tutune. ²⁰Arawe su tempo iamiu maammula, apa niola'i amiu udde waḷinewe andeangu Mawu. ²¹Ana waugu su tempo u'anna iamiu sambau-sambau uapa-puḷaḷro mangganu anna sassane, na'oma n sara piaddu tawe niattuiranne, arawe ingana'a waine niwu'anne. ²²Anio aroddi? Waḷinewe i'o pia baḷenu? I'o wotongnge umanna wuḷru ma'inumma isudde! Ara'e i'o maapulu mangaḷuandaga jamaattu Mawu Ruata wuḷru mapaasili n taumata asiangnga? Apa ta'u iwisara siamiu? Ḥinone ia'u maddalo siamiu? Tawe! Saran paassa tawe maddalo siamiu.

²³Ana waugu apan ta'u iaḷra'a siamiu, udde ta'u sinengkamma wuassu Mawu sassane; manungku su ḷabbi udde su tempo Mawu Yesus, Mawu ng kite nilaḷeo, itou nanganu roti. ²⁴wuḷru napawe Itou suete naadiangkamma su Mawu Ruata ana waugu roti udde, Itou namesangnga roti ringannu lima-Ne, see nabbisara, "Ete indi wadangu Ku apan tinantilla ana waugu iamiu. Ola'e indi sambau pananaunganna Sia'u." ²⁵Aroddi lai napawe suete inumanna, Itou nanganu mangko n anggore see nabbisara, "Anggore indi eteudde paaire Mawu Ruata apan wakku, nitohassu ḷaḷra-U. Suapa n tempo iamiu ma'inumma indi, olaawe indi ipannaungnga Sia'u." ²⁶Atonna suapa n tempo iamiu umanna roti wuḷru ma'inumma anggore indi, iamiu mapaasingkatu papate Mawu ma'oma n sara Itou rumanta.

²⁷Ana waugu udde, taumata apan u'anna roti Mawu ara'e ma'inumma anggore wuassu Mawu ringannu tawe su ḷinone, taumata udde marosa su saruannu Mawu apan suete nanantillu wadangu Nge wuḷru ḷaḷra-Ne. ²⁸Nariaddi, suapa n taumata ḷinone mamarikissa ririne paarorone, wua udde itou wotongnge umanna roti wuḷru ma'inumma anggore udde. ²⁹Ana waugu amungkangngu taumata umanna roti wuḷru ma'inumma anggore tawe mangngimanna manungku ḷaḷiwangnga udde uasamputu wadangu Mawu, taumata udde u'anna wuḷru ma'inumma tumba'u ipanengkamma ḷuumannu Mawu Ruata su wadangu sassane. ³⁰Ana waugu udde manambo wuassu wallatti amiu apan marada'a wuḷru lome, wuḷru piaddu lai apan nate. ³¹Arawe amungkangngu iite mamarikissa wadangu iite rorone, iite tawe iḷruumannu Mawu Ruata. ³²Arawe amungkangngu iite iḷruumannu Mawu Ruata, Itou sarun mamuulla siite, tadea'u tawe maḷruumanna suadio'a ringannu runia indi.

³³Ana waugu udde, manga tuḷrangku, amungkangngu iamiu maammula see umanna su ḷaḷiwangngu Mawu, iamiu ḷinone uaḷaḷaḷrado. ³⁴Amungkangngu piaddu maḷunussa, itou ḷinone umanna asuene su waḷe. Amungkangngu iamiu maddaringikka aḷaḷra'a indi, ammuḷannu pamamisanu tawe mapaaranta n ḷuumanna wuassu Mawu Ruata su wadangu amiu sassane. Su ola'u manga hatto apan waine, sarun itaḷaa'u siamiu, amungkangngu ia'u rumanta isindi.

Ałamatta wuassu Ghařraho Mawu Ruata

12 Orassa indi su ola'u manga ałamatta apan nionggolu Ghařraho Mawu Ruata. Su olangnge udde, ia'u maapulu iamiu maasingkata apa apan su řinone. ²Paanaunge manungku su tempo iamiu taambe naaillała Mawu, iamiu niawono'anna massubba paałuanna apan mou. ³Iamiu řinone maasingkata, manungku taumata apan aehetannu Ghařraho Mawu Ruata tawe maapabbisara, "Niawontohante Mawu Yesus!" Aroddi lai tawe saran sangkatou wotongnge mabbisara, "Tumba'u Mawu Yesus udde Mawu!" amungkangngu taumata udde tawe aehetannu Ghařraho Mawu Ruata.

⁴Pia manambo hati n ałamatta wuassu Ghařraho Mawu Ruata, arawe sarangkanambone nionggolu Ghařraho apan sambau. ⁵Pia manambo lai hati manara ipangimbe Mawu, arawe Mawu apan a'imbeanna udde, Mawu tinggassa lai! ⁶Piaddu uapapařřala lai su ola'u mammanara manara Mawu, arawe apan nangonggolu atatohassa ipammannara su aławo'u taumata, eteudde Mawu tinggassa lai. ⁷Su apapia ng kite sarangkanambone, Ghařraho Mawu Ruata mammanara su taumata sambau-sambau. ⁸Su sangkatou taumata, Ghařraho udde mangngonggolu apande ipabbisara ringannu sařřaungnga. Su taumata waine Ghařraho apan uasuluungnga udde mangngonggolu apande ipanała'a su ola'u Mawu Ruata. ⁹Ghařraho apan sambau udde lai mangngonggola su sangkatou taumata, apande apan nangillemba ipangimanna si Kristus; arawe su taumata waine Ghařraho udde mangngonggolu tařřino ipangngapia taumata. ¹⁰Su sangkatou nionggolannu tařřino ipa'ola'a ałařřindu'a wuřřu su waine nionggolannu ałamatta ipabbatti'u aławo'u pandumannu Mawu Ruata. Wuřřu su waine lai Ghařraho udde nangonggolu apande ipamile suapa ałamatta wuassu Ghařraho Mawu Ruata wuřřu suapa apan wałine. Piaddu nionggolannu apande ipabbisara ringannu aławo'u sasinaukka apan maařřindu'a, wuřřu piaddu lai nionggolannu apande ipanała'a atappasannu manga sasinaukka udde. ¹¹Sarangkanambone udde mammanarannu Ghařraho apan sambau udde lai; sangkatou-sangkatou nionggolannu ałamatta uapapařřala tumuřřuttu apulu n Ghařraho udde sassane.

Manambo wageangnge arawe wadangnga sambau

¹²Eteudde Kristus naola'a wadangngu taumata; wadangnga udde sambau, arawe naola'a wuassu manambo wageangnge. Anambo n wageangnge udde, salaiwe manambo, naola'a wadangnga sambau. ¹³Aroddi

lai iite sarangkanambone, mapia taumata n Yahudi, see lai taumata wałine Yahudi, manga allangnga, ara'e manga taumata napallose; iite sarangkanambone suete nissarřani n Gharřaho apan uasulungnga udde. Iite lai sarangkanambone sarun maapendama Gharřaho apan sambau udde ringannu tawe urangnge.

¹⁴Ana waugu wadangnga udde sassane tawe tumba'u naola'a wuassu wageangnga sambau arawe wuassu wageangnge manambo. ¹⁵Amungkangu ledda mabbisara, "Ia'u wałine lima, ana waugu udde ia'u wałine wageangngu wadangnga," udde tawe atapasanne manungku ledda udde wałine wageangngu wadangnga. ¹⁶Wurřu amungkangu talınga mabbisara, "Ana waugu ia'u wałine mata, ne ia'u wałine wageangngu wadangnga," udde lai tawe atappasanne manungku talınga udde wałine wuassu wageangngu wadangnga. ¹⁷Unnu wisara ahewallu wadangnga udde tumba'u mata sassane, ereapa wadangnga udde wotongnge maaringikka? Ara'e ahewallu wadangnga udde tumba'u naola'a talınga, ereapa wadangnga udde wotongnge manimbua? ¹⁸Iite naasilo manungku Mawu Ruata apan suete nangaddo manga wageangnge udde su wadangnga. Sambau-sambau niaddo Mawu Ruata su tampane tumurřuttu apulu-Ne. ¹⁹Amungkangu sarangkanambone tumba'u wageangnge sambau, suapa apan isassago wadangnga? ²⁰Nariaddi atonna manambo wageangnge, arawe wadangnga tumba'u sambau.

²¹Ana waugu udde, mata tawe wotongnge mabbisara su lima, "Ia'u maddirinu!" ara'e pua mabbisara ledda, "Ia'u maddirinu!" ²²Ewe'e manga wageangngu wadangnga apan sassunanna lome udde, mangke pappandumanni ite; ²³wurřu manga wageangnge apan sassunnanni ite tawe aregane, eteudde manga wageangnge apan lembo manambo iaarega ng kite. Manga wageangngu wadangnga apan aasiloanna tawe marřamaga udde lembo n iaarega ng kite. ²⁴Manga wageangngu wadangnga apan aasiloanna mapiate maddirite iaarega ng kite. Mawu Ruata suete nangatokku wadangngi ite aroddi olangnge, na'oma n sara wageangnge apan tawe tumanite n maarega, lembo manambo iaarega. ²⁵Ringannu aroddi wadangnga udde tawe natahia; sambau sambau wageangnga, mangngarega wageangnge waine. ²⁶Amungkangu wageangnge sambau uapendama rada'a, anambo n wageangnge waine marada'a lai; amungkangu wageangnge sambau raloanna, anambo n wageangnge waine lulluassa suadio'a.

²⁷Turřangnga sarangkanambone apan suadio'a, eteudde wadangngi Kristus wurřu iamiu sambau-sambau lai eteudde wageangnge wuassu wadangnga udde. ²⁸Aroddi lai sulalummu jamaatta, Mawu Ruata suete nangatokku tampa n alawo'u taumata: Paarorone manga rasul; aruane manga nabi, atallune manga huru, see imangitou apan ma'ola'a alarřindu'a, wua udde imangitou apan nionggolannu alamatta

mapaapia n taumata waine, ara'e ma'ola'a mamamiaffa'a, ara'e lai ia-paawisara ringannu aławo'u sasinaukka apan maaffindu'a. ²⁹Imangitou udde wałine sarangkanambone rasul, ara'e nabi, ara'e lai huru. Tawe sarangkanambone pia tarřino ipa'ola'a aławřindu'a, ³⁰ara'e mapaapia n taumata, ara'e mabbisara ringannu aławo'u sasinaukka apan maaffindu'a, ara'e mannappasu manga sasinaukka udde. ³¹Ana waugu udde, řinone iamiu mammanara atonna-tonna ana see maasomba aławatta apan lembo n apianne.

Arawe manansunna indi ia'u mangarřa'a siamiu lałanna apan apianne.

Darangngu

13 Salaiwe ia'u wotongnge mabbisara ringannu aławo'u wisara n taumata, wuřřu wisara mala'ekatta, arawe ia'u tawe mandangngu taumata waine, ne manga wisara'u udde tumba'u tingikka apan mate-lengnga arawe tawe mangalene. ²Salaiwe ia'u pande mabbatti'u watti'a wuassu Mawu Ruata, wuřřu maassunna anambo n hatto apan malałalumma, wuřřu masingkatu manga aławo'a wuřřu lembo mangngimanna Mawu Ruata na'oma n sara wotongnge maaingkatu wowone, arawe ia'u tawe mandangngu taumata waine, ne ia'u tawe aregane sara ng kadio'a! ³Salaiwe anambo n darotongku, ta'u ionggola su taumata asiangnga, wuřřu ia'u manantillu wadanku tutunganna, arawe ia'u tawe mandangngu taumata waine, ne sarangkanambone udde tawe gunane sara ng kadio'a.

⁴Taumata apan marangngu taumata waine, masabbare wuřřu naungnge mapia. Itou tawe mapaasabangngu naungnga lałeo, tawe talimorřonganna, tawe mamarabunga. ⁵Itou taumata tawe mamara-bunga, taumata tawe marřagissa, itou tawe mamata'u taumata waine tumurřutta apulune sassane, tawe lai małihakka umałudda, wuřřu tawe mangune. ⁶Taumata apan marangngu manga taumata waine, maddiri ng kałaleo, itou tumba'u małuassa su apapia. ⁷Itou marřaddana sumaruanna aławo'u wawono'a wuřřu maapulu mangngimanna apan apianne wuassu aławo'u taumata; sulałummu olangnge apan tumanite n susa, taumata apan mandangngu udde tawe awułiannu antimma wuřřu masabbare marřado sarangkanambone apan sarun mariaddi.

⁸Tawe tempone, manungku taumata udde tawe maddarangngu. Orassa indi pia taumata apan masingkata mabbatti'u Watti'a wuassu Mawu Ruata, arawe itou sarun mangilloło mabbatti'u watti'a udde. Orassa indi piaddu masingkata mabbisara sulałummu aławo'u sasinaukka apan maaffindu'a, arawe itou sarun mangilloło mabbisara su-

laļummu manga sasisaukka udde. Orassa indi pia taumata apan masingkatu anambo n inolaanna, arawe saļimmurine apa apan aasingkatanni mangitou udde sarun abbuļiananna. ⁹Ana waugu asingkatu ite wuŗru apapande ng kite mabbatti'u watti'a wuassu Mawu Ruata, ta'e pia auranganne. ¹⁰Saļimmurine sarun a'omanna tempone Mawu Ruata ma'ola'a sarangkanambone nasuungnga, wuŗru apan tawe nasuungnga udde sarun mawuļi.

¹¹Su tempo ia'u ta'e aļarřana'a, ia'u mabbisara ere wisara n dario'a, apendanku ere apendammu dario'a, wuŗru řingirřanku ere řingirřannu dario'a. Orassa indi ia'u timmaddete, pallaļagu'u ere pallaļagu n dario'a, nirammete. ¹²Apa apan aasiloanni ite orassa indi eteudde nassuļungngu lintau maļabukka su sařřuminanna. Arawe iite sarun maasilo ringannu matilangnga. Orassa indi ia'u ta'e wagga n sarangkanambone, arawe saļimmurine ia'u sarun maasingkata sarangkanambone ere lai Mawu Ruata namasingkatu sarangkanambone su ola'u riri'u.

¹³Nariaddi, su orassa indi pia tatallu inolaanna apan sidutu a'olaanni ite: pangangimanna, pangangantimma wuŗru uararangngu. Ahunanne wuassu tatallu udde eteudde mandangngu taumata waine.

Manga pira tataļa'a su ola'u aļamatta wuassu Ghařřaho Mawu Ruata

14 Rinone iamiu madea'a suapa m botongnge mandangngu manga taumata waine. Wuŗru padea'a lai manengkamma manga aļamatta apan ionggolu Ghařřaho Mawu Ruata, lembonete lai apande ipamasingkatu apulu Mawu Ruata su taumata. ²Taumata apan mabbisara sulaļummu sasinaukka apan maařřindu'a, taumata uddé waļinewe mabbisara su taumata; itou mabbisara su Mawu Ruata. Tawe taumata apan maasunna wisarane, ana waugu Ghařřaho Mawu Ruata apan na'ola'a sitou mabbisara manga inolaanna apan tumba'u asingkatannu Mawu Ruata. ³Mawali'a, taumata apan mammasingkatu watti'a wuassu Mawu Ruata, namasingkattu watti'a udde lai su taumata; ipannohassa pangangimanni mangitou, ipangonggolu sasasa simangitou wuŗru ipallimbata naunggi mangitou. ⁴Taumata apan mabbisara sulaļummu sasinaukka apan maařřindu'a tumba'u mannohassa ririne sassa, arawe taumata apan mammasingkatu watti'a wuassu Mawu Ruata, manuļungngu jamaatta maola'a mapia.

⁵Lembo n apianne amungkangngu iamiu sarangkanambone wotongnge mabbisara ringannu alawo'u sasinaukka apan maařřindu'a. Arawe lembo n apianne eteudde amungkangngu iamiu wotongnge niabbatti'u

manga apulu Mawu Ruata. Ana waugu taumata apan mabbatti'u watti'a wuassu Mawu Ruata, maggewaļanna wuassu taumata apan mabbisara ringannu aļawo'u sasinaukka apan maarřindu'a; waine lai olangnge amungķangngu taumata apan mabbisara sulaļummu aļawo'u sasinaukka apan maarřindu'a udde wotongnge manaļa'a apa apan iwabbisarane udde, tadea'u anambo n jamaatta maasomba hessine, ara'e wuane. ⁶Amungķangngu unnu wisara ia'u rumanta ringanni amiu wurřu ia'u mabbisara sulaļummu sasinaukka apan maarřindu'a, apa hunane udde siamiu? Tawe gunane sara ng kadio'a! Waine lai olangnge amungķangu ia'u mamassingkatu sambau pandumannu Mawu Ruata, ara'e ia'u man-naļa'a su ola'u ereapa Mawu Ruata, ara'e ia'u mapaasingkatu watti'a wuassu Mawu Ruata, ara'e ia'u manggarřa'a.

⁷Manga sarannapa n musikka apan tawe niawane sara ng kadio'a ere libidde wansi wurřu kecapi, amungķangngu aantarine tawe nalanganna ringannu mapia, ereapa taumata maasingkata antari apan nannalanganne udde? ⁸Sambau lai sasumandingnge waine: Amungķangngu trompeta walate atuntingikke, isai masasaddia mapapangalo? ⁹Aroddi lai apapandenu mabbisara ringannu aļawo'u sasinaukka apan maarřindu'a. Amungķangngu i'o ringannu apandenu udde mabbisara wisara apan tawe iasunna, tawe saran sangkatou lai wotongnge maasunna apa iwabbisaranu udde. Wisaranu udde sarun mawuļi tawe tutukke. ¹⁰Su runia indi pia sasinaukka aroddi anambone, arawe tawe saran sambau lai wuassu manga sasinaukka udde apan tawe atappasanne. ¹¹Arawe amungķangngu ia'u tawe maasunna sasinaukka apan iwabbisara n taumata, ne taumata apan nappaattu sasinaukka udde, ere taumata raho sia'u; aroddi lai ia'u su saruanni tou. ¹²Su ola'i amiu sassane, ia'u masingkata manungku iamiu maapulu atonna-tonna maasomba aļamatta wuassu Gharřaho Mawu Ruata. Arawe lembo n apianne, řinone iamiu madea'a mappaattu apandenu mantuļungngu jamaatta ana see aatambanna apiane. ¹³Ana waugu udde taumata apan mabbisara sulaļummu sasinaukka apan maarřindu'a, řinone madorongnga wuassu Mawu Ruata tadea'u itou onngoļannu lai apande ipannaļa'a apa apan iwabbisarane udde. ¹⁴Ana waugu amungķangngu ia'u umaļiomanna ringannu sasinaukka apan maarřindu'a, gharřaho'u atonna u'āļiomanna, arawe řingirřangku tawe mammanara. ¹⁵Nariaddi, řinone ia'u ma'ola'a apa? Indi apan sarun ta'u olaanna: Ia'u sarun umaļiomannu gharřaho'u, arawe ia'u sarun umaļiomanna lai ringannu řingirřangku. Ia'u sarun mangantari ringannu gharřaho'u, arawe ia'u maapulu lai mangantari ringannu řingirřangku. ¹⁶Ana waugu amungķangngu tuřrangnga maadiangkamanna su Mawu Ruata tumba'u ringannu gharřahonu sassane, wurřu pia taumata waine apan tawe maasunna sasinaukka maarřindu'a wuassu Gharřaho Mawu Ruata udde, ne taumata udde tawe maappa-

bbsara, "Ia'u lai maapulu" su aadiangkamannu udde; ana waugu itou wagga apa apan iwabbisaranu udde. ¹⁷Salaiwe aaliomanna aadiangkamanna su Mawu udde lembo mapia, arawe aaliomannu udde mangke tawe gunane sara ng kadio'a su taumata waine.

¹⁸Ia'u maadiangkamanna su Mawu Ruata ana waugu ia'u sassane wotongnge mabbisara sula'ummu alawo'u sasinaukka apan maarfindu'a nangillembu wuassu manga tuffrangnga sarangkanambone. ¹⁹Arawe sula'ummu manga ammulanna ipassubba Mawu, ia'u mappianne mappattu lima ng kapadi wisara apan wotongnge asunnannu taumata wuassu mappattu su riwune wisara sula'ummu sasinaukka apan maarfindu'a. Ia'u mappianne maapulu aroddi, tadea'u ia'u wotongnge mangarra'a taumata.

²⁰Manga tuffrangnga! Arie parringidda ere alarfana'a. Sula'ummu alaleo, rinone iamiu uatatana'a ere ana'a maradio'a. Arawe sula'ummu parringidda, rinone iamiu maola'a taumata apan timmadete. ²¹Sula'ummu Wuke Susi uaworretta arendi,

"Mawu nabbisara, 'Ringannu tataloarannu manga taumata apan mabbisara ringannu sasinaukka tawe iasunna,

Ia'u sarun mabbisara su pabbawalaga indi.

Wurru lai ringannu tataloarannu manga taumata raho, ia'u sarun mabbisara su pabbawala-U;

salaiwe aroddi, imangitou maddiri maddaringikka wisara-U."

²²Nariaddi alamatta ipabbisara ringannu alawo'u sasinaukka apan maarfindu'a eteudde maola'a tatiala su taumata apan tawe mangngimanna, waline su taumata apan mangngimanna. Wurru alamatta ipam-masingkatu pandumannu Mawu Ruata su taumata eteudde tatiala su taumata apan mangngimanna, waline su taumata apan tawe mangngimanna. ²³Ana waugu, amungkanngu unnu wisara sula'ummu ammulanna jamaatta, alawo'u jamaatta mabbisara sula'ummu alawo'u sasinaukka apan maarfindu'a, wua udde nirumanta sire pira taumata raho, ara'e manga taumata waline Sarrani, taumata udde sarun massunna siamiu sarangkanambone nabbewate! ²⁴Arawe amungkanngu iamiu sarangkanambone mabbatti'u watti'a wuassu Mawu Ruata, see nirumanta sangkatou apan waline Sarrani ara'e sangkatou raho, ne manga inolaanna apan niapaasingkati amiu sarangkanambone sarun mappalijatta'u manga rosa n taumata udde wurru mabali maatutukka manga rosane. ²⁵Manga inolaanna apan uawuni sula'ummu naungnge saruu iapaalijatta'a, na'oma n sara itou sumallungu watanganne see massubba Mawu Ruata. Itou sarun manga'u, manungku Mawu Ruata atonna tonna su pattangganni amiu.

Atoranna sulaḷummu jamaatta

²⁶Nariaddi, manga tuḥrangnga, apa atappasanne sarangkanambone udde? Amungkanngu iamiu maammula massubba Mawu piaddu mangngantari, piaddu mangngarra'a, piaddu lai mammasingkatu pandumannu Mawu Ruata, piaddu mabbisara sulaḷummu sasinaukka apan maarindu'a, wuḥru piaddu mannaḷa'a apa apan iwabbisara udde. Arawe sarangkanambone udde ḥinone olaanna ipangarra'a wuḥru ipangngapia sarangkanambone. ²⁷Amungkanngu piaddu mabbisara sulaḷummu sasinaukka apan maarindu'a, ḥinone darua ara'e mattingka nambo sire tallu ualaḷoḷossa mabbisara. Wuḥru ḥinone piaddu mannaḷa'a apa apan iwabbisara n taumata udde. ²⁸Amungkanngu tawedu wotongnge mannaḷa'a, ne manga taumata apan mabbisara sulaḷummu sasinaukka apan maarindu'a udde ḥinone mangilloḷo mabbisara su ammuḷanna udde. Wala'e imangitou mabbisara tumba'u sulaḷummu naungge su Mawu Ruata. ²⁹Darua ara'e sire tallu apan uatahuanna watti'a wuassu Mawu Ruata ḥinone mamasingkatu watti'a udde tantaḷanna waine maringiddu apa apan iwabbisara udde. ³⁰Arawe unnu wisara watti'u Mawu Ruata nirumanta su sangkatou waine apan ua'ianna su ammuḷanna udde, ne taumata apan tantaḷanna mabbisara, ḥinone mangilloḷo. ³¹Ringannu atokke aroddi, manga tuḥrangnga sarangkanambone, sangkatou ringannu sangkatou wotongnge mapaasingkatu Watti'u Mawu Ruata; tadea'u sarangkanambone wotongnge manengkamma alaḥra'a wuḥru maola'a lembo mangngimanna. ³²Aḷamatta wuassu Ghaḥraho ipammasingkatu watti'u Mawu Ruata wotongnge iapiaḥra'u taumata apan mammasingkatu watti'a udde. ³³Mawu Ruata eteudde Mawu apan maapulu uaatokka mapia; itou waḥine Mawu Ruata apan maapulu m patatiakka.

Ere lai nariaddi sulaḷummu anambo n jamaattu Mawu Ruata, ³⁴wawine ḥinone maḷannaba su tempo n ammuḷannu jamaatta. Imangitou tawe iwala mabbisara. Imangitou tawe wotongnge maola'a piaḥrangnge; udde uasulungngu tita n agama. ³⁵Amungkanngu imangitou maapulu maasingkata manga apa, imangitou ḥinone maiwaḷo awingngi mangitou su waḷe. Tumanite n maasili amungkanngu sangkatou wawine massinaukka sulaḷummu ammuḷannu jamaatta.

³⁶Apa wisara Mawu Ruata nirumanta wuassi amiu? Ara'e tumba'u siamiu sassane wisara udde niwaḷo? ³⁷Amungkanngu pia taumata uatahuanna aḷamatta ipammasingkatu watti'u Mawu Ruata, ara'e itou pia aḷamatta waine wuassu Ghaḥraho Mawu Ruata, taumata udde ḥinone manutukka manungku apa apan ta'u niwoḥretta indi eteudde darolokka wuassu Mawu. ³⁸Arawe amungkanngu piaddu maddiri manengkamma indi, imbaḥrangnga mappandumma sitou.

³⁹Ana waugu udde, manga turřangnga, pattinsahadde mamma-singkatu watti'u Mawu Ruata, arawe arie paningaddu taumata apan maapulu mabbisara sulařummu ařawo'u sasinaukka apan maarřindu'a. ⁴⁰Arawe sarangkanambone řinone olaanna ringannu mapia wuřru uaa-tokka.

Su ola'i Kristus niapaawiakka apia wuassu papate

15 Wuřru orassa indi, manga turřangnga, ia'u maapulu iamiu mannaungnga apia Watti'u Ařařuassa wuassu Mawu Ruata apan dorone ta'u niapaasingkata siamiu. Iamiu mannengkamma, wuřru mangngimanna si Kristus ana waugu Watti'u Ařařuassa udde. ²Amungkanngu iamiu uaagassa atonna su watti'a apan iwabbatti'u udde, ne Watti'u Ařařuassa udde manařamatta siamiu; tabene'e amungkanngu iamiu mangngimanna ringannu tawe pasasunna.

³Apa apan suete ta'u niwařo siamiu eteudde apan suete ta'u ni-sengkamma lai. Ahunanne eteudde, ere uawořetta sulařummu Wuke Susi, ia'u mabbatti'a siamiu manungku Mawu Yesus nate ana waugu manga rosa ng kite; ⁴manungku Itou nilabingnga, arawe wua udde nabbiakka apia su allo atallune. Udde lai uawořetta sulařummu Wuke Susi. ⁵Ia'u namasingkata lai siamiu manungku Kristus apan suete niapaawiakka apia udde nattingka pasilo m batangan-Ne lai si Petrus, wua udde su mapuřo dua rasul. ⁶Wua udde Itou naipasilo m batangan-Ne lai su sire lima řasutta mallařřenggen-Ne sangkařřindo'a. Anamboanne wuassu manga taumata udde ta'e wiakka orassa indi, tumba'u sire pira ng katou apan natete. ⁷Wua udde Kristus naipasilo m batangan-Ne lai si Yakobus wuřru wua udde su anambo manga rasul.

⁸Panginsueanne atonna Itou naipasilo m batangan-Ne sia'u lai - ia'u ere ana'a adio'a apan wakku niasungkanga taambe su tempone! ⁹Eteudde ia'u rasullu Mawu apan awawoanne. Ia'u tawe su tampane isaggo rasul, ana waugu ete ia'u apan suete nanansara jamaattu Mawu Ruata. ¹⁰Arawe ana waugu ařamattu Mawu Ruata, ia'u naola'a lai ere olangge ia'u orassa indi. Wuřru talawe tawe gunane Mawu Ruata nangampungna sia'u. Ewe'e ete ia'u mammanara marřimadda wuassu anambo manga rasul waine. Arawe udde řinone wařine ia'u mattinsahadda, udde sahaddu Mawu Ruata apan marangngu sia'u wuřru mammanara suadio'a ringanku. ¹¹Nariaddi, salaiwe wuassi sai iamiu nanengkamma Watti'u Ařařuassa udde - apa udde wuassia'u ara'e wuassu manga rasul waine - udde tawe maola'a hatto. Apianne eteudde iamiu mabbatti'u Watti'u Ařařuassa udde wuřru iamiu mangngimanna.

Su ola'u taumata iapaawiakka apia wuassu papate

¹²Amungkangngu iwabbatti'i ami eteudde manungku Kristus suete niapaawiakka wuassu papate, anio pia wuassu wallatti amiu mabbisara manungku taumata nate tawe iapaawiakka apia? ¹³Amungkangngu atonna taumata nate tawe iapaawiakka apia, udde atappasanne Kristus lai tawe niapaawiakka apia wuassu papate. ¹⁴Wuṛṛu amungkangngu Kristus tawe niapaawiakka apia wuassu papate, ne tawe gunane iami mabbatti'u manga apa apan tawe gunane lai su pangangimanni amiu, ana waugu pangangimanni amiu udde tawe pinangiananne apa-apa. ¹⁵Nangillemo wua isudde, nasemakke manungku iamiu mangngawusu su ola'u Mawu Ruata, ana waugu iami mabbatti'a manungku Mawu Ruata suete napaawiakki Kristus wuassu papate, wutte'e Mawu Ruata tawe napaawiakki tou apia – amungkangngu atonna taumata nate tawe iapaawiakka apia! ¹⁶Ana waugu amungkangngu taumata nate tawe iapaawiakka apia, ne Kristus lai tawe niapaawiakka wuassu papate. ¹⁷Wuṛṛu amungkangngu Kristus tawe niapaawiakka apia, ne pangangimannu tumba'u walaṛṛa tawe gunane; udde atappasanne iamiu ta'e sulaḷummu paddarosa wuṛṛu tawe antimma mapia sara ng kadio'a. ¹⁸Udde atappasanne lai manungku manga taumata n Sarṛani apan natete, udde tawe antimma lai. ¹⁹Amungkangngu antimmi ite si Kristus tumba'u nataalla su wiakki ite sulaḷummu runia indi, ne wuassu anambo n pabba-walagu taumata sulaḷummu runia indi, ete iite araḷeoanne!

²⁰Arawe nasemakke Kristus suete niapaawiakka apia wuassu papate. Indi maola'a wataṛṛune manungku manga taumata apan natete sarun mabbiakka apia. ²¹Ana waugu papate sinumutta sulaḷummu runia wuassu sangkatou taumata, aroddi lai mabbiakka apia wuassu papate nionggola su taumata ana waugu sangkatou taumata lai. ²²Su ereapa anambo n taumata nate ana waugu nareengnga su sambau ringanni Adam, aroddi lai saranganambone sarun iapaawiakka, ana waugu nareengnga su sambau ringanni Kristus. ²³Arawe sangkatou-sangkatou sarun iapaawiakka tumuṛṛuttu wageangnge: Paarorone Kristus, wua udde napawe su tempo Itou rumanta apia, manansunna wageangngu manga taumata apan nareengnga tatahuananni Kristus. ²⁴Wua udde mariaddite Kiamatta. Su tempo udde Kristus sarun mangagassa aḷawo'u araratuanna, aḷawo'u taṛṛino, wuṛṛu aḷawo'u atatohassa; wua udde Itou sarun manantillu taṛṛino-Ne ere sangkatou ratu, su Mawu Ruata lamangngi ite. ²⁵Kristus ṛinone sidutu uaparenta ma'oma n sara Mawu Ruata ma'ola'a seetti Kristus massuṛṛubawa si Kristus. ²⁶Seetta panginsueanne apan sarun iapasuṛṛubawa eteudde papate. ²⁷Sulaḷummu Wuke Susi uawoṛṛetta arendi, "Mawu Ruata suete na'ola'a aḷawo'a su runia

indi massurubawa Sitou." Nasemakke manungku pandumannu wisara "alawo'a" udde tawe nasutta Mawu Ruata sasane, apan na'ola'a alawo'a masurubawa si Kristus. ²⁸Arawe napawe sarangkanambone masurubawa su alunggu parenta n Kristus, ne Itou sassane, ete-udde Ana'u Mawu Ruata, sarun massurubawa m batangan-Ne su Mawu Ruata apan suete na'ola'a ulilimpi'uppa masurubawa Sitou. Ne Mawu Ruata lai sarun mamarenta sarangkanambone.

²⁹Amungkanngu taumata nate tawe iapaawiakka apia, anio pia taumata sassaranianna huna n taumata nate? Apa hunane imangitou ma'ola'a olangnge udde? Amungkanngu atonna taumata nate tate iapaawiakka apia lai, apa hunane imangitou ma'ola'a olangnge udde? ³⁰Wurru apa lai hunane iami sumaruanna silaka su alawo'u tempo? ³¹Manga turangnga! Miallo-miallo ia'u uatataranga اساسا, ana waugu ia'u lulluassu pabbiarani amiu, ana waugu iamiu nangimante si Kristus Yesus, Mawu ng kite. ³²Amungkanngu udde tumba'u wuassu taumata sassane, apa auntunganne sia'u mammanara naalihida ere uasaruanna winatangnga warrani su soa indi, su Efesus? Amungkanngu atonna taumata nate tate iapaawiakka apia, ei, mappianne iite tumurutta sasanato'a indi: "Wette iite umanna wurru ma'inumma wurru lumuassa, ana waugu tirrabi lai iite sarun mate."

³³Arie awahianna! Pagahahawe apan laleo, mandaleo pallaagu mapia. ³⁴Atimpu'ote orassa indi, wurru ariete lai ma'ola'a rosa. Iamiu rinone masili, manungku su wallatti amiu piaddu taambe naailaja Mawu Ruata.

Wadanggu taumata napawe suete niapaawiakka apia wuassu papate

³⁵Asinungka piaddu maiwalo, "Ereapa taumata nate iapaawiakka apia? Wadangnga ereapa apan nionggola simangitou, napawe imangitou niapaawiakka apia?" ³⁶Woddo atonna! Amungkanngu iamiu massuannu wualanna sulaummu leta'a, wualanna udde tawe tumuwo, amungkanngu wualanna udde tawe mate asuene. ³⁷Wurru wualanna apan nisuanu su leta'a udde - asinungka wualannu ganduma ara'e wualanna waine - eteudde tumba'u watu m bualanna udde sassane, wafine alawo'u sasuanne apan sarun tumuwo udde. ³⁸Mawu Ruata sassane sarun mangoggola su wualanna udde sarrene apan tumuruttu aellegi Tou mapiate su sasuanu udde. Su alawo'u wualanna, Mawu Ruata nangoggolu sarre su sasuanu sambau-sambau.

³⁹Wadanggu manga inolaannu Mawu Ruata apan pia niawane, tawe sarangkanambone uasulungga. Taumata uatahuanna wadangnga

uasulungnga, manga winatangnga pia lai wadangnge paṛṛalane; manga manu'u winalanganna lai paṛṛalane ola'u wadangnge, wuṛṛu manga inassa lai paṛṛalane lai ola'u wadangnge.

⁴⁰Aroddi lai manga sarannapa su langitta wuṛṛu manga sarannapa su runia. Sarannapa su langitta sambau-sambau pia araṛṛamagge sassane, wuṛṛu manga sarannapa su runia aroddi lai. ⁴¹Araṛṛamaggu matannallo uapapaṛṛala n araṛṛamaggu wuḷanna. Manga anumpitanna lai pia araṛṛamagge sassane. Ewe'e manga anumpitanna udde lai sambau-sambau uapapaṛṛala araṛṛamagge.

⁴²Aroddi lai olangnge ringannu taumata nate apan sarun iapaa-wiakka apia. Wadangnga apan nilabingnga eteudde wadangnga apan wotongnge maṛṛenessa, arawe wadangnga apan iapaawiakka apia, eteudde wadangnga apan tawe mawukku'a. ⁴³Su tempo wadangnga udde nilabingnga, wadangnga udde laḷeo wuṛṛu lome, arawe su tempo itou iapaawiakka apia, eteudde itou wadangnga apan mapia wuṛṛu matohassa. ⁴⁴Su tempo nilabingnga, wadangnga udde wuassu runia; arawe napawe nabbiakke apia, ne wadangnga udde wadangnga apan nionggolu Ghaṛṛaho Mawu Ruata. Pia wadangnga wuassu runia, pia lai wadangnga wuassu Mawu Ruata. ⁴⁵Sulaḷummu Wuke Susi uawoṛṛetta arendi, "Tau-mata paarorone eteudde Adam, naola'a riadianna apan wiakka," arawe Adam panginsueanne eteudde Ghaṛṛaho apan mangngonggolu wiakka. ⁴⁶Apan nirumanta paarorone eteudde ola'u wadangnga, waḷine ola'u ghaṛṛaho. Ghaṛṛaho nirumanta saḷimmurine. ⁴⁷Adam paarorone niola'a wuassu leta'a, arawe Adam aruane nirumanta wuassu surga. ⁴⁸Manga taumata n runia indi naaḷihida Adam paarorone, apan niola'a wuassu leta'a, arawe manga taumata n surga eteudde ere Itou apan nirumanta wuassu surga. ⁴⁹Su ereapa iite orassa indi eteudde naaḷihida si Adam apan niola'a wuassu leta'a, ne iite sarun mattingkaola'a ere Itou apan nirumanta wuassu surga udde.

⁵⁰Pandumangku, manga tuṛṛangnga, eteudde: wadangnga apan niola'a wuassu ṛaṛṛa wuṛṛu ṛemessa, tawe maasutta su Runia Waku Mawu Ruata; wuṛṛu wadangnga apan wotongnge mate tawe mattatana'a sarangkaḷo'engnge.

⁵¹Paatutuṛṛe addapingnga indi: Tawe sarangkanambone iite sarun mate, arawe iite sarangkanambone sarun waḷuanna. ⁵²Olangnge udde sarun mariaddi mamaṛṛoro sulaḷummu sangkaṛṛondapu mata, su tempo trompeta iapatuntingikka panginsueanne. Ana waugu su tempo nia-ringikka tingikku trompeta udde, manga taumata nate sarun iapaa-wiakka apia ringannu wadangnga apan tate mate, wuṛṛu iite sarangkanambone sarun waḷuanna. ⁵³Wadangngi ite apan wotongnge mate indi ṛinone hantiannu wadangnga apan tawe mate, wuṛṛu wadangnga apan wuassu runia, sarun hantiannu wadangnga apan tawe mate,

wurru wadangnga wuassu runia sarun hantiannu wadangnga wuassu su surga. ⁵⁴Amungkangngu wadangnga apan wotongnge mate suete nihantiannu wadangnga apan tawe mate, wurru wadangnga wuassu runia, suete nihantiannu wadangnga wuassu surga, su tempo udde matipusse apa apan uawoꝛtetta sulaꝛummu Wuke Susi, "Papate suete nialjuanna; auntunganna nia'omante!"

⁵⁵"Ei papate, suapa auntungannu?"

Ei papate, suapa tarꝛinonu?"

⁵⁶Tarꝛino m papate eteudde rosa, wurru rosa mappamattu apulune sulaꝛummu tita n agama. ⁵⁷Arawe aadiangkamanna su Mawu Ruata; Itou nangonggolu auntunganna sulaꝛummi Yesus Kristus Mawu ng kite.

⁵⁸Ana waugu udde, manga turꝛangnga apan arangnguanna, ꝛinone iamiu matohassa wurru sidutu mangngimanna. Pammanarate sidutu su Mawu ringannu atonna-tonna, ana waugu iamiu masingkatta manungku sarangkanambone apan mammanaranni amiu udde su Mawu, tawe maholo'a.

Sasumbala su sansuꝛungngu taumata n Sarꝛani

16 Orassa indi su ola'u roitta apan ipassumbala ng kamiu su sansuꝛungngu taumata n Sarꝛani, ia'u mangarꝛa'a tadea'u iamiu ma'ola'a ere tatantiro apan ta'u nionggola su manga jamaatta su Galatia. ²Su allo paarorone suapa n allo misa, ꝛinone turꝛangnga sarangkanambone marꝛae n roitta, sambau-sambau tumurꝛuttu asombangi tou. Addoa'e roitta udde ma'oma n sara ia'u rumanta, tadea'u orassa udde lai tate madea'a mangammula. ³Napawe ia'u narantate, ia'u sarun mandolokku manga taumata apan ipaapulu ng kamiu. Ia'u sarun mangonggolu surattu papasingkata, tadea'u imangitou mangapiddu roitta sasumbala udde watukku Yerusalem. ⁴Wurru amungkangngu aellehanna mapia manungku ia'u lai inai ringanni mangitou, ne ia'u sarun inai sua-dio'a ringanni mangitou.

Riinni Paulus

⁵Ia'u sarun mattembo siamiu napawe ia'u sumabbi Makedonia, ana waugu ia'u maapulu sumabbi isudde. ⁶Wotongnge lai ia'u matana'a taꝛa ng kadio'a ringanni amiu, asinungka aꝛannune su tempo masunge. Wua udde iamiu wotongnge mantuꝛungku manassu amatangku watukku tampa manansunna. ⁷Ia'u maddirri mattembo siamiu amungkangngu

tumba'u umotongnga taʔa ng kadio'a. Amungkangngu Mawu mamala'u, ia'u maapulu matana'a maʔannu ringanni amiu.

⁸Tantaʔanna udde ia'u sarun matana'a su soa indi, su Efesus, ma'oma n sara allo m Pentakosta. ⁹Manambo allo'u isindi ipammanara maʔara apan pia gunane, salaiwe manambo lai taumata mannaʔare.

¹⁰Amungkangngu Timotius rumanta, saʔohoi itou ringannu mapia tadea'u itou maapendama maʔuassa matana'a ringanni amiu ana waugu itou ere lai ia'u mammanara manara Mawu. ¹¹Arie ma'oma n sara piaddu mangngadio'a sitou. Sumbalaite itou tadea'u itou wotongnge manassu amatanne apia mattudda'u ringannu saʔamatta, ana waugu ia'u uaraʔrado rarantane suadio'a ringannu manga tuʔrangnga waine.

¹²Su ola'u tuʔrangngi ite Apolos, paapirate ia'u mabaʔo sitou tadea'u itou su sambau ringannu tuʔrangnga apan waine inai mattembo siamiu. Arawe itou taambe mangngimanna atonna manungku itou sarun inai orassa indi. Arawe amungkangngu pia tempone, itou sarun rumanta.

Pangudusannu suratta

¹³Rinone iamiu paatehamma wuʔru matohassa sulaʔummu pabbia-ʔrannu ere taumata n Saʔrani. Pammanarate ringannu waʔrani wuʔru paatohassa. ¹⁴Sarangkanambone apan a'olaanni amiu, olaawe ringannu darangngu.

¹⁵Iamiu asinungka massingkatti Stefanus wuʔru amonanne; imangitou apan paarorone naola'a taumata n Saʔrani su Akhaya. Imangitou ringannu ahewallu naungnge mammanara tumba'u mangngimbe pabbawalagu Mawu Ruata. ¹⁶Ia'u madorongnga ringannu atonna-tonna tadea'u iamiu tumuʔrutta papiʔra'u manga taumata ereudde, wuʔru manga taumata waine apan mammanara suadio'a wuʔru mangngimbe suadio'a ringanni mangitou.

¹⁷Ia'u maʔuassa su raranta n Stefanus, Fortunatus wuʔru Akhaikus. Imangitou naola'a hahanti ng kamiu sia'u. ¹⁸Imangitou suete nalluassa naungku, ere imangitou nalluassa naungngu. Manga taumata ere udde rinone aaddatanna.

¹⁹Manga jamaatta su Asia nannanata n tabea mangitou siamiu. Akwila wuʔru Priskila wuʔru jamaatta apan uammulla su waʔe mangitou lai napaapiddu tabea n taumata n Saʔrani apan napene n ʔintulu. ²⁰Anambo n tuʔrangnga isindi nannanata n tabea siamiu.

Patatabeate ringannu mapia su saruannu tuʔrangnga taumata n Saʔrani.

²¹Ia'u manamba lai isindi tabea'u apan niwoʔre'u sassane: *Tabea wuassia'u, Paulus.*

22Taumata apan tawe mandangu Mawu, wala'e itou awontohanna!
Maranatha – Mawu ng kami, rantate!

23Antimanna Mawu Yesus mangalamatta siamiu.

24Napaapiddu lai darangu siamiu sarangkanambone apan naaukka
suadio'a ringanni Kristus Yesus.

Tabea ng kami,
Paulus

SURATTI PAULUS ARUANE SU JAMAATTU KORINTUS

WISARA TAŁAANE

Suratti Paulus Aruane Su Jamaattu Korintus niwořetta su tempo apan masahadda sulałummu paa'aukki Paulus ringannu jamaatta udde. Pia manga wageanggu jamaatta udde apan aellehanna ere ola'u mannałare si Paulus, arawe Paulus napaalıatta'a manungku itou maapulu m paddarame. Itou namasilo n ałaluassu naungge su tempo olangnge udde nariaddi.

Su wageangge paarorone suratti Paulus indi mannała'a su ola'u paa'aukke ringannu jamaatta su Korintus. Itou nanała'a isudde anio itou mannaggu ringannu marřagissa anambo n laławangnga wuřru aałuandaga su ririne apan suete niola'u jamaatta udde. Napawe suete nabatti'u olangnge udde, wua udde itou namasilo n ałaluassa, manungku tatagune apan nangillembo udde suete nandanta n awawału wuřru paddarame. Wua udde itou nangahe tadea'u jamaatta udde mangammulu sasumbala ipantułunggu manga taumata n Sařrani apan mabbiakka susa su Yudea. Su manga addoanne panginsueanne, Paulus nangapiddu sasimbakki tou su ola'u sangkatou rasul su saruannu sire pira taumata su Korintus apan massunna ririne sassane rasul tutune, wuřru mangngansila si Paulus rasul awusu.

Lałorřone

Paarorone	1:1-11
Paulus wuřru jamaatta su Korintus	1:12-7:16
Sasumbala su manga taumata n Sařrani su Yudea	8:1-9:15
Sasimbakki Paulus su ola'u tarřinone ere sangkatou rasul	10:1-13:10
Panginsueanne	13:11-14

1 Manga turřangnga jamaattu Mawu Ruata su Korintus wuřru ałarřana'u Mawu Ruata sarangkanambone su ahewallu leta'u Akhaya.

Ia'u Paulus, rasulli Kristus Yesus, apan nitenega wuassu apulu Mawu Ruata, suadio'a ringannu turřangngi ite Timotius, ²mangngantimma doronganna Mawu Ruata Iamangngi ite wuřru Mawu Yesus Kristus mangonggolu ałamatta wuřru paddarame siamiu.

Paulus naadiangkamanna su Mawu Ruata

³Daralo su Mawu Ruata, Iamangngu Mawu ng kite Yesus Kristus. Itou Iamangnga lembo mapia naung-Nge, wuřru Itou Mawu Ruata apan mangngonggolu atatohassa su naungngu taumata. ⁴Itou mannohassa naungngi ami sulałummu asasusa apan aappendamanni ami, tadea'u ringannu atatohassa apan nisengkammi ami wuassu Mawu Ruata udde, iami lai wotongnge manohassa naungngu taumata nambo sulałummu asasusa. ⁵Manga asasusa apan niappendamanni Kristus manambote lai aappendamanni ami. Wuřru lai sulałummi Kristus naungngi ami lembo natohassa. ⁶Amungkangngu iami uasaruanna asasusa, udde pandumanne ipannohassa naungngu, tadea'u iamiu masałamatta. Amungkangngu naungngi ami tohasanna, ne iamiu lai tattohasanna ma'oma n sara iamiu maola'a masabbare sulałummu manga asasusa ere lai niappendamanni ami. ⁷Iami sidutu mangngimanna wuřru tawe humago'a su ola'i amiu, ana waugu iami masingkata manungku iamiu lai suadio'a uatatarřanga ringanni ami. Wuřru ana waugu udde iamiu lai nitohassa suadio'a ringanni ami.

⁸Manga turřangnga! Iami maapulu iamiu lai maasingkata su ola'u asasusa apan niappendamanni ami su leta'u Asia. Asasusa apan pasannananni ami udde tumanite n mawakkata mannasa'i ami ma'oma n sara iami tate antimma mabbiakka apia; ⁹papendamanna ere ola'u suete nitantuna iřruumanna pateanna. Arawe olangnge udde mariaddi tadea'u iamiu tawe mangngimanna atatohassu wadangngu sassane, ewe'e su Mawu Ruata apan mapaawiakku taumata nate. ¹⁰Ete Itou apan suete nanałamatta siami wuassu silaka wuřru papate apan wahewa udde. Wuřru ete Itou sarun manałamatta siamiu su allo sałimmurine, ana waugu ete Sitou iami mangngantimma. ¹¹Iami mangngimanna manungku ringannu manga aalıomannu huna ng kami, Mawu Ruata sarun manałamatta siami lai wuassu papate. Mawu Ruata mangonggolu ałamatta siami maola'a sambau sasimbakku anambo n aalıomanni amiu siami wuřru ana waugu udde, manambo taumata maadiangkamanna su Mawu Ruata.

Paulus namaļu řiinnu amatanne

¹²Iami lulluassa, ana waugu laļummu naungngi ami mangngonggolu antimma siami manungku wiakki ami su runia indi – nangillembo paa'aukka ami ringanni amiu – suete niapaamatti ami ringannu naungnga matuļidda wuřru waresi. Iami na'ola'a udde, waļine ringannu apande n taumata, arawe ringannu atatoħassa apan nionggolu Mawu Ruata. ¹³⁻¹⁴Apan niwořretti ami udde siamiu tumba'u su ola'u inolaanna apan wotongnge iawasa wuřru asunnanni amiu. Orassa indi iamiu tawe maasunna siami ringannu atonna, arawe ia'u mangngantimma iamiu sarun atonna-tonna maasunna siami. Ringannu aroddi, su tempo Mawu Yesus rumanta apia, iamiu sarun lumuassi ami ere lai iami lulluassa ana waugu iamiu.

¹⁵Ana waugu ete pangangimanna udde ia'u paarorone maapulu mattembo siamiu tadea'u iamiu maasomba aļamatta paarua anambone. ¹⁶Ia'u lai pia ira-ira mattembo siamiu sulaļummu amatangu watukku Makedonia wuřru umotongnga lai apia sulaļummu amatangu mabelengnga, tadea'u iamiu wotongnge massumbala sia'u manassu amatangu watukku Yudea. ¹⁷Arawe ia'u suete namaļu řiinna udde; ei, apa udde mapaaljatta'a manungku naungku tawe matatana'a? Su tempo narřiinna, apa ia'u narřiinna tumuřruttu apulu'u sassane, tanaļanna'a adio'a mabbisara, "Ore", wuřru tanaļanna'a adio'a mabbisara "Tawe"? ¹⁸Ringannu arannu Mawu Ruata apan apangngimananna, paaire'u siamiu waļinewe "Ore" wuřru "Tawe". ¹⁹Ana waugu Yesus Kristus, Ana'u Mawu Ruata, apan nipaasingkati Silas, Timotius; wuřru ia'u sassane lai, waļinewe taumata "Ore" wuřru "Tawe". Arawe udde na ola'a sasimbakka "Ore" wuassu Mawu Ruata. ²⁰Ana waugu sulaļummi Tou Mawu Ruata suete nabbisara "Ore" su aļawo'u paaire-Ne. Ana waugu udde iite mabbisara "Amin" su Mawu Ruata ana waugu Yesus Kristus. Iami na'ola'a aroddi tadea'u Mawu Ruata wantuhanna. ²¹Mawu Ruata sassane apan na'ola'a siami wuřru siamiu uauukka su sambau ringanni Kristus ete Itou lai sassane apan namile siite hunane Sitou. ²²Ana waugu udde Mawu Ruata suete nanga'u siite maola'a pussa'a-Ne wuřru mangonggolu Gharraho-Ne sulaļummu naungngi ite, apan maola'a sambau watarřu manungku Itou sarun mangonggolu siite sarangkanambone apan suete pina'ire n Tou.

²³Mawu Ruata maola'a tiala'u – ana waugu Itou masingkatu laļořo naungku – manungku ia'u tawe nariaddi watukku Korintus, ana waugu ia'u maddiri ma'ola'a naungngi amiu masusa. ²⁴Ia'u tawe mamata'i amiu su ola'u apa apan pangimananni amiu, ana waugu iamiu lembo

mangngimanna si Kristus. Ia'u tumba'u mammanara su sambau ringanni amiu tadea'u iamiu lembo lulluassa.

2 Ana waugu udde ia'u suete nakkawessa tate lai rumanta ringanni amiu ana waugu patatambo'u apan maasusa siamiu. ²Ana waugu amungkangngu ia'u mapaasusa ng kamiu, isai lai apan wotongnge mallimbatta naungku, amungkangngu wałine manga taumata udde lai apan suete niapaasusa'u naungnge? ³Ana waugu udde ia'u namořřettu suratta udde siamiu. Ia'u maddirite mattembo siamiu, see mapaasusa ng kamiu, sumbałi ete iamiu malluassa sia'u. Ana waugu ia'u mangngimanna manungku amungkangngu ia'u lulluassa, ne iamiu sarangkanam-bone lulluassa lai. ⁴Ia'u namořřettu suratta siamiu ringannu naungnga massusa wuřřu ipabbawata'a wuřřu ringannu manambo mapaaturu n allo mata. Pandumangku wałine tadea'u iamiu masusa, arawe tadea'u iamiu maatutukka manungku ia'u lembo mandangngu siamiu.

Pangangampungnga sisai apan nassała

⁵Amungkangngu pia taumata apan nallařřa'u asasusa, ne olangnge udde niola'i tou wałine tuddane sia'u, ewe'e su tuřřangnga sarangkanam-bone ara'e asinungka sangkadoanna wuassu tuřřangnga. Ia'u maddirite tumanite n mařřagissa sitou. ⁶Su taumata apan ereudde, řuumanna apan ionggola sitou wuassu taumata anamboanne su wallatti amiu, wotongngete. ⁷Orassa indi iamiu řinone mangampungna sitou wuřřu mangong-golu sasasa lai sitou tadea'u itou tawe tumanite n masusa naungnge ma'oma n sara tate antimma sara ng kadio'a. ⁸Ana waugu udde ia'u sumałande, tadea'u iamiu mapaalıatta'a apia sitou, manungku iamiu atonna-tonna marangngu sitou. ⁹Ia'u namořřettu suratta udde siamiu ringannu pandumanne maannamma siamiu, tanne iamiu sidutu maa-pulu tumuřřutta manga tatantiro'u. ¹⁰Amungkangngu iamiu mangampungna taumata apan suete nassała siamiu, ne ia'u lai mangampungna taumata udde. Ana waugu apa apan suete niampungangku - amungkangngu atonna ta'e pia apan ta'u ampunganna - udde ampungangku su saruanni Kristus maola'a apapia ng kamiu. ¹¹Ia'u na'ola'a udde tadea'u Setanna tawe maapanganu tempone ipamarenta siite, ana waugu iite masingkatu manga pandumanne.

Asasinggawangngi Paulus su Troas

¹²Su tempo ia'u na'omate su Troas ringannu pandumanna mab-batti'u Watti'u Ałaluassa su ola'i Kristus, Mawu suete namu'a lałanna

sia'u ipammanara su tampa udde. ¹³Arawe ia'u tawe matammuda ana waugu taambe napassomba n turrangngi ite Titus poiaroddi. Ne ia'u nadorongke mapule su manga taumata su tampa udde see inaita watukku Makedonia.

Aauntunga ana waugu Kristus

¹⁴Arawe aadiangkamanna su Mawu Ruata! Itou sidutu manggehetta siami tumantalongnga su amatanni Kristus ana waugu iami mabbia akka su sambau ringanni Tou. Mawu Ruata nappaatti ami tadea'u watti'a su ola'i Kristus massa jawukka naalihida haluru mawangngi su alawo'u tampa. ¹⁵⁻¹⁶Ana waugu iami naalihida haluru n amania apan mawangngi, apan tinutungngu Mawu Yesus hunane su Mawu Ruata. Su saruannu manga taumata apan mattuda m papate, iami indi naalihida haluru m papate apan maapate; arawe su taumata nambo apan tantallanna iapaasalamatta, iami indi naalihida haluru mawangngi apan mandanta m pabbawiakka. Ei, isai wotongnge maasuungngu manara indi? ¹⁷Iami tawe naalihida ere taumata nambo apan ma'ola'a Watti'u Mawu Ruata ere sarannapa walu'anna. Manga pandumanni ami udde waresi, ana waugu iami nirolokku Mawu Ruata. Wufru Mawu Ruata sassane ua'ellega manungku iami mammasingkatu watti'a udde naola'a allangngi Kristus.

Mangangimbe m paaire wakku

3 Apa indi aasiloanna ere ola'u iami maddalo watanganni ami lai? Ara'e wotongnge mariaddi iami mappandumma surattu daralo siamiu, ara'e wuassi amiu, ere lai raddeaannu taumata waine? ²Ete i'o sassane surattu daralo ng kami, apan uaworretta sulaummu naungngi ami apan wotongnge asingkatanna wufru iwasa n taumata nambo. ³Imangitou sassane wotongnge maasilo manungku turrangnga naola'a suratta apan niworretti Kristus, wufru niapaapidda siami. Suratta udde waline niworrettu tinta, arawe ringannu Gharraho Mawu Ruata apan wiakka; waline lai su wowo m batu pamamorretanna, arawe sulaummu naungngu taumata.

⁴Iami mabbisara aroddi ana waugu pangangimanni ami su saruannu Mawu Ruata sulaummi Kristus. ⁵Iami tawe sambau pinangiananne mappalatta'a manungku iami wotongnge mammanara manara indi, arawe Mawu Ruata nangonggolou apande udde siami. ⁶Ete Itou apan na'ola'a siami mappammanara su sambau paaire apan wakku; paaire apan uantimma Gharraho Mawu Ruata, waline su tita apan uaworretta. Ana

waugu apan uaworretta udde mangngapiddu papate, arawe Gharraho Mawu Ruata udde mangngonggolu wiakka.

⁷Su tempo paaire apan mangngapiddu papate udde niola'a wuṛru ni-paangnga su watu, semakku Mawu Ruata lullansiangnga ringannu sus-salendapa su hati Musa. Semakke aroddi atilangnge na'oma n sara walagu Israel tawe maasilo hati Musa, salaiwe lansiangnga su hatine udde maḷabukke su tempo udde. Ne amungkangngu maaola'a paaire apan mangngapiddu papate udde niteneḡa ringannu awawantuga apan aroddi ahewalle, ⁸asinungka paaola'a paaire apan nionggolu Gharraho Mawu Ruata niteneḡa lembo mawantuga lai. ⁹Amungkangngu paaire apan maṛruumannu taumata udde aroddi awantuge, lembo mabbantuhanna lai paaire apan maaola'a taumata masangkapia ringannu Mawu Ruata. ¹⁰Wotongnge iwisara manungku apa apan paarorone mawantuga, tate bantuge lai ana waugu awawantuga apan orassa indi. ¹¹Amungkangngu piaddu maatarangnga tumba'u sangkatempo, aroddi awantuge, sambau apan aḷannuane lembo n awantuhanne.

¹²Ana waugu iami uatahuanna antimma ereudde, ne iami waṛrani mabbisara aroddi. ¹³Iami tawe ere Musa apan mallindumma hatine ringannu tatindunga tadea'u walagu Israel taweddu maasilo semakku Mawu Ruata tantaḷanna mappaddumma wuṛru mawuḷi wu-assu hatine. ¹⁴Ṛingiddi mangitou nawuḷite. Wuṛru na'oma n sara allo indi lai ṛingirṛanni mangitou ta'e laḷindumannu tatindungnga su tempo imangitou mabbasa manga wuke m paaire tabbe udde. Laḷindumma udde mante mawu'a amungkangngu taumata uaukka ringanni Kristus. ¹⁵Orassa indi lai, napawe imangitou mabbasa manga Wuke Musa, laḷindumma udde ta'e ualḷindumma ṛingirṛanni mangitou. ¹⁶Arawe amungkangngu pia sangkatou rumanta sumaruanna Mawu, laḷindumma udde sarun wu'anna wuassu hati n taumata udde. ¹⁷Ne, Mawu apan iwabbatti'a isindi, eteudde Gharraho. Wuṛru suapa n pia Gharraho Mawu, isudde lai pia aḷaḷuassa. ¹⁸Orassa indi hati ng kite tawe laḷindumannu tatindunga wuṛru iite mangngapiddu awawantugu Mawu Yesus. Wuṛru ana waugu udde iite sidutu waḷuanna maola'a ere Itou; mallannu iite maola'a mawantuga. Awawantuga udde wuassu Gharraho, wuṛru Gharraho udde eteudde Mawu.

Darotongnga wuassu surga sulaḷummu tampa apan niola'a wuassu leta'a

4 Iami ma'ola'a manara indi ringannu ahewallu naungngu Mawu Ruata. Ana waugu udde iami tawe mangilloḷo. ²Iami tawe mappaattu inolaanna marandumma apan maasili. Iami maddiri mamma-

nara ringannu mangngapande ara'e mammaḷelongngu wisara Mawu Ruata. Iami mangngimbe Mawu Ruata ringannu naungnga apan matuḷida tumuḷḷuttu apulu-Ne. Ana waugu udde, iami mangngantimma anambo n taumata ma'ellega siami ringannu mapia sulaḷummu naungnge. ³Amungkangngu Watti'u Aḷaḷuassa apan niapaasingkati ami udde taambe niasunnanna, ne tumba'u manga taumata apan mattuda m papate apan tawe maasunna. ⁴Monganna laḷeo apan uaparenta runia indi nakkapingnga ringirannu manga taumata apan tawe mangimanna udde. Monganna apan sidutu mannaḷare simangitou tadea'u imangitou tawe maasilo semakka wuassu Watti'u Aḷaḷuassa udde, su ola'u awawantugi Kristus, apan naola'a lihiddu Mawu Ruata. ⁵Watti'a apan iwabbatti'i ami udde waḷinewe watti'a su ola'i ami sassane. Watti'a uddewe watti'a su ola'i Kristus; manungku eteudde Itou Mawu; wuḷḷu ete iami manga allang-Nge ana waugu Itou. ⁶Mawu Ruata mabbisara, "Rinone wuassu laḷummu araranduma sumabangnga asasemakka," Mawu Ruata lai apan napaasabangngu semakka wuassu laḷummu naungngi ite, tadea'u ringiranni ite masemakka ipassunna awawantugu Mawu Ruata apan lulansiangnga su hati n Kristus.

⁷Arawe darotongngu surga apan maḷḷamaga udde iaapiddi ami su wadangngi ami apan tawe aregane indi apan niola'a wuassu leta'a. Ringannu aroddi nilumiatta'e manungku awawantugu taḷḷino udde su Mawu Ruata waḷine siami. ⁸Iami niapaasala wuassu aḷawo'u tampa, arawe iami tawe nia'uḷuhanni mangitou. Iami tuttiangnga arawe iami tawe awuḷiannu antimma. ⁹Manambo apan uasaseetti ami, arawe tawe saran paassa iami uatana'a sassane. Wuḷḷu salaiwe masokka iami puuḷanna ma'oma n sara manawo, arawe iami tawe mate. ¹⁰Sidutu iami uapendama papate Mawu Yesus su wadangngi ami, tadea'u pabbawiak-Ke lai lumiatta'a su wadangngi ami. ¹¹Su aḷo'engngu allo iami mabbiaḷka, iami sidutu ia'umpangngu papate ana waugu Kristus, tadea'u ringannu aroddi wiakki Kristus lai wotongnge lumiatta'a su wadangngi ami apan marosa indi. ¹²Indi atappasanne manungku sulaḷummu wadangngi ami papate tantaḷanna mappaamattu taḷḷinone, arawe iami lulluassa, manungku ete wiakka apan tantaḷanna mammanara sulaḷummu wadangngu.

¹³Sulaḷummu Wuke Susi pia bisara arendi, "Ia'u mangngimanna ana waugu udde ia'u mabbisara." Ne ringannu atatohassu mangngimanna ereudde lai, iami mabbisara ana waugu iami mangngimanna. ¹⁴Iami pia antimma manungku Mawu Ruata apan suete napaawiakku Mawu Yesus, sarun mapaawiakki ami lai ringannu Mawu Yesus, wuḷḷu mangapiddi amiu wuḷḷu iami su saruan-Ne. ¹⁵Sarangkanambone udde hunanu sassane. Ana waugu lembo n aatambanna taumata uapendama darangngu Mawu Ruata, lembo manambo lai aaliomanna apan

iaaļiomanna su Mawu Ruata; ringannu aroddi Mawu Ruata wanutuhanna.

Mabbiakka ringannu mangngimanna

¹⁶Ana waugu udde iami tawe mangilloḷo. Salaiwe sulaļummu wadangngi ami aļaleo aatambanna, arawe su pangangimanna iami a'olaanna wakku su miallo-miallo. ¹⁷Wuṛṛu asasusa apan tawe tumanite n mawakkata indi, apan tumba'u papendamanni ami taļa ng kadio'a, sarun mangonggolu hessine siami sambau aļaluassa apan wahewalla wuṛṛu tawe pangudusanne. Aļaluassa udde maggewaļanna marau amungkangngu isuļungngu asasusa udde sassane. ¹⁸Ana waugu iami tawe ma'innunu manga inolaanna apan aasiloanna, arawe apa apan tawe aasiloanna. Apan aasiloanna tumba'u taļa ng kadio'a, arawe apa apan tawe aasiloanna udde maļannu-ļannu sarangkaļo'engnge.

5 Ana waugu iami masingkata manungku amungkangngu waļe – ete-udde wadangnga – apan atatanaanni ite su runia indi ihohakka, Mawu Ruata sarun manaddia waļe ng kite su surga, apan niola'u Mawu Ruata sassane wuṛṛu tawe mahohakka sarangkaļo'engnge. ²Sulaļummu waļe su orassa indi, iite sussaļiomanna, ana waugu iite maapulute atonna matana'a su waļe su surga udde. ³Ete waļe udde wadangngi ite apan wakku. ⁴Su aļo'engngu allo iite uatana'a sulaļummu waļe wuassu runia indi, iite sussaļiomanna ana waugu winabbawa ng kite mawakkata. Waļinewe ana waugu iite maapulu mapallosa wuassu wadangngi ite, apan wuassu runia indi, ana waugu iite maapulu mappaattu wadangnga wuassu surga udde, ana see wadangngi ite apan wotongnge mate indi pia taṛṛino apan wiakka. ⁵Apan mannaddia siite su olangnge udde, ete-udde Mawu Ruata sassane, wuṛṛu Itou nangonggolu Ghaṛṛaho-Ne siite maola'a sambau wataṛṛu.

⁶Ana waugu udde naungngi ami sidutu uapendama atatohassa. Iami masingkata manungku tantaļanna iami ta'e uatana'a sulaļummu wadangngi ami indi, iami marau wuassu waļe apan sarun atanaanni ami suadio'a ringannu Mawu. ⁷Ana waugu iami mabbiakka pinaugiananne wuassu mangngimanna si Kristus, waļine pinagiananne wuassu apa apan aasiloanna, ⁸ana waugu udde naungngi ami masabbare. Iami mappianne mapallosa wuassu wadangngi ami indi, tadea'u wotongnge matana'a suadio'a ringannu Mawu. ⁹Ana waugu udde iami sidutu madea'a atonna-tonna ipalluassa naung-Nge, mapia tantaļanna iami ta'e uatana'a su waļe ng kami isindi, ara'e poiarroddi. ¹⁰Ana waugu atonnate iite sarangkanambone sarun iapaasaruanna pamamarikisanni Kristus, wuṛṛu sangkatou-sangkatou sarun maasomba wawaļinne uasuļungngu inolaanne su runia indi – ala'uanna mapia ara'e ala'uanna laļeo.

Uaaukka ringannu Mawu Ruata sulaʔummi Kristus

¹¹Iami masingkata apa atappasanne mata'uttu Mawu; ana waugu iami maapulu mangarʔa'a taumata see mangngimanna ola'u wadangngi ami. Mawu Ruata maailaʔa siami, wuʔru ia'u mangantimma iamiu lai maailaʔa siami sulaʔummu naungngu. ¹²Ringannu indi iami tawe madorongnga tadea'u iamiu maddalo wadangngi ami. Iami tumba'u mangonggolu sambau pinangiananne apan mapia siamiu tadea'u iamiu maʔuassa siami, tadea'u iamiu masingkata ereapa iamiu sumimbakka manga taumata apan tumba'u ma'ellega pahuddu taumata waʔine ma'ellega pallaʔagune. ¹³Amungkangngu iami atonna aasiloanna nabewate, udde ana waugu manara Mawu Ruata. Wuʔru amungkangngu iami aasiloanna ringiʔranna masemakka udde ana waugu hunane siamiu. ¹⁴Ete darangngu n Kristus apan uatʔrino siami; wuʔru iami naatutukke manungku amungkangngu sangkatou suete nate huna n taumata nambo, ne atappasanne manungku taumata sarangkanambone suete nate. ¹⁵Kristus nate ana waugu anambo n taumata, tadea'u manga taumata apan wiakka, tate lai mabbiakka huna m wadange sassane, arawe mabbiakka huna ng Kristus apan suete nate wuʔru niapaawiakka apia ana waugu hunane simangitou.

¹⁶Ana waugu udde, iami tate lai manguukka taumata tumuʔruttu auʔaannu taumata. Atonna iami suete nanguukka Kristus wuassu pahuddu taumata, arawe orassa indi tate. ¹⁷Taumata apan suete naaukka ringanni Kristus, maola'a taumata wakku atonna-tonna. Apan tabbe naʔiute – sarangkanambone naola'e wakku. ¹⁸Sarangkanambone udde nimmanara Mawu Ruata. Sulaʔummi Kristus napaa'aukka ite apia ringanni Tou, see nandolokki ite tadea'u manga taumata waine wotongnge lai pia paa'aukka ringannu Mawu Ruata.

¹⁹Iami namasingkata manungku sulaʔummi Kristus, Mawu Ruata napaaukka taumata apia ringannu watangan-Ne. Mawu Ruata na'ola'a udde ringannu tawe naʔringiddu pasasaʔa apan suete niola'u taumata su saruannu watangan-Ne. Wuʔru iami suete nirolokku Mawu Ruata iapapasinkatu Watti'a udde.

²⁰Nariaddi ete iami udde daroloʔranni Kristus. Sulaʔummi ami Mawu Ruata nabaʔo n tanata-Ne. Sulaʔummu aranni Kristus iami sumaʔande, sengkamawe lima Mawu Ruata apan namala ng kamiu uaaukka apia ringanni Tou. ²¹Kristus tawe pasasaʔane, arawe Mawu Ruata na'ola'a Sitou uapasanna rosa ng kite, tadea'u iite maaukka apia ringannu Mawu Ruata ana waugu susambau ringanni Kristus.

6 Ana waugu iami mammanara suadio'a ringannu Mawu Ruata, ne iami sumaɓande arie iamiu ma'ola'a tawe gunane apapia naungngu Mawu Ruata udde. ²Sulaɓummu Wuke Susi, Mawu Ruata nabbisara, "Su tempo apan ipaapulu, Ia'u suete naddaringikka Si'o, wuɓɓu su allo m pananaɓamatta, Ia'u suete nantuɓungngu." Naunge paapia-pia, ete orassa indi tempo apan ipaapulu-U udde. Ete orassa indi tempone ipanaɓamatta.

³Iami maddiri manara ng kami iapaasaɓa. Ana waugu udde iami tawe mangonggolu pinangiananne su sangkatou ipa'ola'a olangnge udde. ⁴Arawe sulaɓummu aɓawo'u inolaanna iami mapaaɓiatta'a manungku ete iami allangngu Mawu Ruata. Ana waugu aɓawo'u hati n asasusa suete niapendamanni ami ringannu sabare; ⁵iami nisansaranna, niɓruumanna, wuɓɓu niɓrimpulunanna, iami mammanara maɓrimadda, maɓawa matiilla, wuɓɓu masokka lai tawe maasomba anna. ⁶Ringannu pia inolaanna mapia, pande, masabbare, wuɓɓu naungnga mapia, iami mapaaɓiatta'a manungku iami udde allangngu Mawu Ruata. Wuɓɓu lai ringannu uaantimma tatuɓungnga wuassu Gharraho Mawu Ruata, wuɓɓu ringannu darangngu apan su ɓinone, ⁷wuɓɓu ringannu mabbatti'a watti'u Mawu Ruata wuɓɓu ringannu tarɓino Mawu Ruata, iami mapaaɓiatta'a manungku iami indi allangngu Mawu Ruata. Iami uaagassa apulu Mawu Ruata maola'a ahiddi ami ipamangalo ara'e ipannahassa wadangngi ami. ⁸Iami aaddatanna, arawe haggalusaanna lai, raddaloanna, wuɓɓu aaɓuandahanna lai. Salaiwe iami mabbiakka matuɓidda, iami aansilanna tarɓa awusu. ⁹Iami sassunnanna taumata awagananna, arawe iami asingkatannu awadaalla. Iami sassunnanna nate, arawe wutte'e iami ta'e wiakka. Salaiwe iami sassansaranna, iami tawe nate. ¹⁰Salaiwe naungngi ami massusa, arawe iami sidutu lulluassa lai. Iami aellehanna asiangnga, arawe iami suete napaa'ala n taumata nambo. Iami aellehanna tawe darotongnga, arawe su ɓinone iami uatahuanna sarangkanambone.

¹¹Manga tuɓrangnga apan arangnguanna su Korintus! Iami suete nabbisara uahahati siamiu. Anambo n laɓoɓro naungngi ami suete niwaɓo siamiu. ¹²Iami manutuba naungngi ami siamiu, tumba'u iamiu mammuni naungngi amiu siami. ¹³Orassa indi, wala'e ia'u mabbisara ere aɓarɓana'u sassane. Wu'ate lai naungngi amiu siami.

Aɓarɓa'a sumaruanna manga taumata apan tawe pangangimanne

¹⁴Arie maammulu manga taumata apan tawe mangngimanna Mawu Yesus; udde tawe su ɓinone. Tawe mariaddi apapia maammulu aɓaɓe! Tawe mariaddi asasemakka maammulu araranduma. ¹⁵Tawe mariaddi

Kristus maammulu Setanna. Apa sulungnge taumata n Sarrani wuɽu taumata waline Sarrani? ¹⁶Apa sulungnge Waɽe Mawu wuɽu waɽe m paaɽuanna? Iite indi Waɽe Mawu, eteudde Mawu Ruata apan wiakka. Mawu Ruata sassane nabbisara,

”Ia’u sarun matana’a su pattangnganni mangitou, wuɽu mabbiakka suadio’a ringanni mangitou.

Ia’u sarun maola’a Mawu Ruata mangitou wuɽu imangitou sarun maola’a aɽarrana-U.

¹⁷Ana waugu udde,

tantanga’e manga taumata apan tawe maailaɽa Mawu Ruata udde, wuɽu pattingkaɽraete m batangannu wuassi mangitou.

Arie paa’aukka ringannu apa apan maarantina ne ia’u sarun manengkamma siamiu.

¹⁸Ia’u sarun maola’a Iamanggu,

wuɽu iamiu sarun maola’a aɽarrana-U

ete aroddi wisara Mawu Apan Lembo Mataɽrino.”

7 Manga tuɽrangnga apan arangnguanna! Anambo n paaire udde tuddane siite. Ana waugu udde ɽinone iite mamesi watanganni ite. Rinone iite mata’uttu Mawu Ruata, tadea’u iite wotongnge mabbiakka sassane huna Mawu ringannu nasuungnga.

Aɽaɽuassi Paulus

²Saɽohoite iami sulaɽummu naungngu. Iami tawe nassaɽa su sangkatou taumata, tawe taumata apan niwodoanni ami. Iami tawe saran paa-ssa mangngaɽiwu n darotongngu sangkatou taumata lai. ³Ia’u mabbisara aroddi, waline ana see mapasaɽa ng kamiu. Ana waugu ere suete niwisara’u paarorone, iami lembo marangngu siamiu wuɽu ete iite sanggaweanna ma’oma n sara mate. ⁴Ia’u mangngimanna atonna siamiu. Wuɽu lai ia’u maɽuassa atonna siamiu! Salaiwe iami naasomba manambo asasusa, naungku naɽuassa ana waugu iamiu. Naungku lembo n lulluassa!

⁵Napawe iami na’omate su Makedonia lai, iami tawe naailloɽo. Wu- assu aɽawo’u inolaanna iami naasomba asasusa: wuassu inolaanna waine pattatatiakka, wuassu naungnga sassane atata’utta. ⁶Arawe aadiangkamanna, Mawu Ruata sidutu mannohassa naungngu taumata apan nialiwune, Itou nalluassa siami ringannu daranta n Titus. ⁷Naungngi ami naɽuassa waline tumba’u ana waugu Titus nirumanta ewe’e lai ana waugu itou nabbatti’a ereapa naungnge naɽuassa ana waugu iamiu. Itou namasingkata siami manungku iamiu maapulu atonna maisasomba’u;

manungku iamiu sussassilu pallaḷagunu paarorone wuḗru orassa indi maḷuassa manamba'a sia'u. Olangnge udde naaḷuassa sia'u lai.

⁸Salaiwe sura'u naasusa naungngu, ia'u tawe sumassilla namoḗrettu suratta udde. Atonna su tempo ia'u naasilo manungku suratta wuassia'u udde naasusa siamiu – salaiwe اساسانۇ udde tumba'u taḷa ng kadio'a – ia'u sussassilla lai. ⁹Arawe ia'u orassa indi lulluassa – waḷine ana waugu naungngu nasusa, ewe'e ana waugu اساسانۇ udde naawaḷu pallaḷagunu. Atonna اساسانۇ udde su laḷannu apulu Mawu Ruata. Nariaddi, iami tawe namoddo siamiu. ¹⁰Ana waugu اساسا ereudde mawaḷu naungnga apan mandanta n اساساḷamatta. Wuḗru taumata tawe sumassilla su olangnge udde. Arawe اساسا apan su laḷannu apulu n taumata maawawa papate. ¹¹Annama'a iamiu panutukka, apa asombangani amiu wuassu اساسا apan su laḷannu apulu Mawu Ruata! Sombangnge eteudde iamiu atonna-tonna maḗrasahadda manilangnga apan maḷabukka! Iamiu naola'a maddantinu rosa, iamiu mata'utta, iamiu marangngu, iamiu naola'a matohassa, iamiu maapulu maḗruumannu taumata nassaḷa! Sulaḷummu aḷawo'u hatto indi, iamiu suete napaḷiatta'a manungku iamiu tawe nassaḷa.

¹²Nariaddi, salaiwe ia'u suete namoḗrettu suratta udde, ia'u namoḗretta, waḷine ana waugu taumata nassaḷa udde. Waḷine lai ana waugu taumata apan uatataḗranga pasasaḷa udde. Ia'u namoḗrettu suratta udde tadea'u su saruannu Mawu Ruata iamiu maatutukka sassane aroddi ahewalle naungngi ami siamiu. ¹³Ana waugu udde naungngi ami naḷuassa. Ringannu lulluassa, iami lai lullala'a ana waugu naasilo laḷuassi Titus, naungnge lulluassa ana waugu iamiu sarangkanambone. ¹⁴Ia'u atonna suete namarabunga ng kamiu sitou. Aadiangkamanna, iamiu tawe namansili sia'u. Anambo n apa apan suete niwaḷo ng kami siamiu udde atonna. Aroddi lai apa apan ipamarabunga ng kami su ola'i amiu si Titus udde niatialanna atonna. ¹⁵Orassa indi itou lembo marangngu siamiu ana waugu itou mannaungnga ereapa iamiu sarangkanambone tuttuḗrutta piarḗrangnge, wuḗru ereapa iamiu manarimmatti tou ringannu maaddatta wuḗru matuḗruta. ¹⁶Ia'u maḷuassa tassuḷungnge, ana waugu iamiu aapangimananna su aḷawo'u inolaanna.

Roitta sasumbala wuassu manga taumata n Sarḗrani

8 Manga tuḗrangnga, iami maapulu iamiu maasingkata lai su ola'u ereapa apiane Mawu Ruata su manga jamaattu Makedonia. ²Imangitou suete niannamannu manga اساسا apan mawakkata. Arawe su patangngannu manga اساسا udde, imangitou lulluassa, wuḗru naungnge masaḗrionto'a ipangonggolu sumbala ipantuḷungngu taumata waine,

salaiwe imangitou asiangnga. ³Ia'u wotongnge makkawessa manungku imangitou nangonggolu ahewallu asombangi mangitou, ewe'e lai pia lebbene. Ringannu taweddu nandolokka, ⁴imangitou madorongnga siami amungkangngu wotongnge imangitou mantuḷungnga lai mangonggolu sumbala su pabbawalagu Mawu Ruata su Yudea. ⁵Imangitou nangonggolu mannamboanna wuassu apa apan aantimanni ami. Imangitou paarorone nanantillu watanganne su Mawu, wua udde siami lai, ere ipaapulu Mawu Ruata. ⁶Ana waugu udde iami nandolokki Titus – apan nanattaku manara indi – tadea'u itou manassu manara apan mapia indi su wallatti amiu lai. ⁷Iamiu apianne wuassu aḷawo'u taumata; iamiu apianne su ola'u pangangimanna, su ola'u mapaasabangngu ringidda, su ola'u asingkata, sulaḷummu aḷawo'u hati manara, wuḷḷu sulaḷummu darangngu siami. Ana waugu udde, mappianne iamiu lai apianne sulaḷummu manara apan mapia indi.

⁸Ia'u tawe nandolokka udde maola'a sambau parenta. Arawe ringannu namasilo aroddi aḷḷimadde taumata waine mantuḷungngu taumata sansuḷungge, ia'u lai maapulu maasingkata na'oma n sara suapa, darangngunu. ⁹Ana waugu iamiu masingkata atonna manungku iite lembo n aranguanni Yesus Kristus Mawu ng kite. Itou ala, arawe Itou nattingkaola'a asiangnga ana waugu iite, tadea'u ringannu paa'asiangnge udde iamiu maola'a ala.

¹⁰Tumuḷḷuttu addapa'u, su ḷḷinone iamiu manginsue manara apan suete nitattaka tonna naḷiu. Ana waugu ete iamiu apan paarorone naḷḷingidda wuḷḷu nanattaku manara indi. ¹¹Orassa indi ḷḷinone iamiu manassute manara udde tumuḷḷuttu auatannu. ḷḷinone iamiu maḷḷimadda manginsue manara udde, su ereapa iamiu lai rorone maḷḷimadda maḷḷingiddu manara udde. ¹²Amungkangngu iamiu maapulu mangonggola, ne Mawu Ruata sarun manengkamma aonggolu udde pinangiananne wuassu apa apan pia siamiu; waḷḷine pinangiananne wuassu apa apan tawe siamiu.

¹³⁻¹⁴Ia'u atonna-tonna tawe pandumma mamallossu taumata waine wuassu winabbawane, wuḷḷu mammakkata siamiu. Arawe ana waugu iamiu orassa indi sulaḷummu asasuungnga, ne naḷḷinote iamiu mapaa-suungngu auranganni mangitou. Napawe iamiu pia auranganne, wuḷḷu imangitou su asasuungnga, ne imangitou sarun mantuḷungngi amiu. Ringannu aroddi rua ng kawageanganna uatatuḷungnga. ¹⁵Sulaḷummu Wuke Susi uawoḷḷetta,

”Taumata apan pia darotongnge manambo,
tawe lumebbe,
wuḷḷu taumata apan darotongnge mattuḷungnga,
tawe asueanne.”

Titus wuṛṛu manga hawene nirolokka suadio'a

¹⁶Lembo maadiangkamanna iami su Mawu Ruata ana waugu Itou suete na'ola'a si Titus maṛṛimadda ere iami mantuḷungngi amiu. ¹⁷Ana waugu Titus waḷine tumba'u maḷuassa manipussu darorongngi ami, arawe itou lai aroddi aṛṛimadde mantuḷungngi amiu na'oma n sara wuassu apulune sassane itou nakkawessa rumanta ringanni amiu. ¹⁸Suadio'a ringanni tou iami nandolokku sangkatou tuṛṛangnga apan aadatannu anambo n jamaatta ana waugu manarane mammasingkatu Wattu'u Aḷaḷuassa wuassu Mawu Ruata. ¹⁹Wua udde lai, taumata isassago'u udde suete nipile lai wuṛṛu nitantunu manga jamaatta ipandinganna siami su amatanni ami. Ana waugu iami sarun umamatta mamasingkattu sasumbala udde, tadea'u Mawu wantuhanna, wuṛṛu tadea'u iamiu maasilo manungku iamiu maapulu mantuḷungnga.

²⁰Iami mateha-tehamma tadea'u tawe taumata mapaasaḷa ng kami su ola'u padarorongnga sumbala apan wahewa indi. ²¹Iami maddiri mangawusu waḷine tumba'u su lantakku hati Mawu, ewe'e su saruannu taumata lai.

²²Suadio'a ringanni Titus wuṛṛu tuṛṛangnge udde, iami lai nandolokku sangkatou tuṛṛangnge waine. Iami masokkate naannama sitou wuṛṛu inasingkatanna itou sidutu maapulu mantuḷungnga. Wuṛṛu orassa indi, itou maapulu mantuḷungngi amiu, ana waugu itou pia antimma wahewa siamiu. ²³Su ola'i Titus, itou udde hawe'u, apan mammanara ringanku mantuḷungngi amiu. Wuṛṛu su ola'u tuṛṛangnge darua udde, apan inai suadio'a ringanni tou, ete imangitou udde taumata apan nirolokku manga jamaatta wuṛṛu naola'a sambau awawantugi Kristus. ²⁴Iami mangantima iamiu mapaaḷiatta'u darangngunu simangitou, tadea'u anambo n jamaatta masingkata manungku iamiu marangngu simangitou wuṛṛu manungku apa apan ilalluassi ami su ola'i amiu udde atonna.

Sasumbala su taumata labissa Saṛṛani

9 Rinone ia'u lai lasa'e mamorṛettu suratta siamiu su ola'u sasumbala apan tantaḷanna niroho su pabbawalagu Mawu Ruata su Yudea. ²Ia'u masingkata iamiu maapulu mantuḷungnga, wuṛṛu ia'u suete nilumuassi amiu su manga taumata n Makedonia. Ia'u nabbisara simangitou, manungku ro'e n tonna naḷiu manga tuṛṛangnga su Akhaya nasaddiate mangonggolu sumbala. Wuṛṛu apulunu udde naatohassa lai apulu n sangkawageanganna wuassi mangitou. ³Orassa indi ia'u nandolokki Titus wuṛṛu tuṛṛangnge rua ng katou ringanni amiu tadea'u apa

apan ilalluassi ami su ola'i amiu tawe maola'a awusu marasai. Nariaddi iamiu rinone nasaddiate, ana waugu ia'u nabbaŋo simangitou iamiu nasaddiate rumanta su manara udde. ⁴Ia'u sussingawangnga arŋengenne pia taumata n Makedonia apan tumantalongnga sia'u su tempo ia'u rumanta ringanni amiu. Wuŋru amungkangngu imangitou naaratingnga manungku iamiu taambe naasaddia, uare asasili eteapa siami, ana waugu iami suete nabbaŋo simangitou manungku iami lembo mangngimanna siamiu! Wuŋru iamiu sassane lai masili. ⁵Ana waugu udde ia'u mamendama rinone mandolokki mangitou udde ringanni amiu malliu ŋoro ana see mapanaddia sasumbala apan suete pina'ire ng kamiu udde. Udde ta'u niola'a tadea'u amungkangngu ia'u rumanta, aonggoli amiu udde nasaddiate. Ringannu aroddi, nilumiatta'e manungku aonggolu udde nionggola ringannu naungnga maŋuassa wuŋru waŋine ana waugu niwata'a.

⁶Paanaunge! Taumata apan mangngasi'u wualanna mampaadio'a, sarun mangitingnga hessine adio'a lai. Arawe taumata apan mangngasi'u wualanna manambo-nambo sarun mangitingnga lai hessine manambo. ⁷Suapa n taumata rinone mangonggola tumuŋruttu aŋaŋuassu naungnge. Arie itou mangonggola ringannu uapapadua ara'e ipabbawata'a, ana waugu Mawu Ruata mandangngu taumata apan mangonggola ringannu naungnga maŋuassa. ⁸Mawu Ruata uataŋrino mangonggola siamiu aŋamatta apan manambo-nambo, tadea'u iamiu sidutu uatahuanna apa apan ipaapulu ng kamiu; wuŋru iamiu lai sarun pia lebbene ipa'ola'a apapia wuŋru pasasumbala su taumata waine. ⁹Sulaŋummu Wuke Susi uawoŋretta arendi su ola'u Mawu Ruata,

"Itou mannaŋiwukka su taumata asiangnga;
apapia naungnge uata'a saran maŋannu-ŋannu."

¹⁰Mawu Ruata apan nanaddia wualanna su mangangasi'a wuŋru pabbiawikki ite. Itou lai sarun manaddia wuŋru mapaanambo n hessine apan niasi'i amiu tadea'u hessi n apapia naungngu aatambanna lai. ¹¹Ringannu aroddi iamiu sarun maasuungnga sulaŋummu manga hausannu na'oma n sara iamiu sidutu wotongnge mangonggola ringannu naungnga maŋuassa. Wuŋru manga aonggoli amiu apan tattahianni ami, ma'aola'a taumata nambo maadiangkamanna su Mawu Ruata. ¹²Ana waugu inolaanna mapia apan niola'i amiu indi waŋine tumba'u mannuungngu aurangannu pabbawalagu Mawu Ruata, arawe udde ma'aola'a taumata nambo maadiangkamanna su Mawu Ruata. ¹³Wuŋru wuassu apapia ng kamiu udde, manambo taumata n Sarŋani su Yudea sarun maddalo Mawu Ruata ana waugu imangitou naasilo tatuŋruti amiu su Watti'u Aŋaŋuassa su ola'i Kristus apan tatantalonganni amiu udde. Imangitou lai maddalo Mawu Ruata, ana waugu iamiu naungnge mapia mattahia simangitou wuŋru su anambo n taumata waine sarannapa

apan pia siamiu. ¹⁴Ne imangitou sarun umaļiomanni amiu ringannu apendammu darangngu ana waugu Mawu Ruata naung-Nge lembo mapia siamiu. ¹⁵Rinone iite maadiangkamanna su Mawu Ruata ana waugu aonggole apan wahewalla udde!

Paulus napaatohassu manarane

10 Orassa indi ia'u, Paulus, maapulu mabbaļo n sambau hatto siamiu. Ia'u indi, unnu taumata, masaŗrionto'a amungkangngu uasasaruanna ringanni amiu, arawe waŗrani amungkangngu mararau. Ne ana waugu asasarionto'a wuŗru apapia naungngi Kristus, ²ia'u sumaļande arie mamata'u ma'ola'a tumanite n maŗragissa siamiu napawe manga taumata apan mabbisara manungku iami mammanara ana waugu apulu n runia indi. ³Iami atonna ta'e mabbiaikka sulaļummu runia, arawe iami tawe mammanara tumuŗrutta apulu n runia indi. ⁴Manga ahidda apan ipappaatti ami sulaļummu manara ng kami waļinewe ahidda wuassu runia indi, arawe ahidda wuassu Mawu Ruata uataŗrino. Ringannu manga ahidda udde iami maŗrimunsa'a manga tampa mangitou; iami manniko'u manga patatatiakka ⁵wuŗru manggohakku tanda'u atatanggakka apan niola'a ipanompolla asingkattu Mawu Ruata. Iami nanametta řingirŗannu manga taumata wuŗru na'ola'a simangitou massuŗrubawa si Kristus. ⁶Wuŗru amungkangngu iamiu suete tinumuŗrutta ringannu atonna-tonna, iami uasaddiate maŗruumannu anambo n taumata apan maddiri tumuŗrutta.

⁷Rinone iamiu maatutukka inolaanna apan atonna. Amungkangngu sangkatou mangngimanna manungku itou tatahuananni Kristus, řinone itou managu watanganne sassane wuŗru manualaga manungku iami lai tatahuananni Kristus ere lai itou. ⁸Ia'u tawe masili amungkangngu ia'u mannamboanna mamarabunga n taŗrino apan suete nionggolu Mawu siami, ana waugu taŗrino udde nionggola ipangapia siamiu, waļinewe ipandaļeo. ⁹Ia'u maddiri iamiu massunna manungku ia'u mammata'utta siamiu ringannu manga sura'u. ¹⁰Taumata mabbisara, "Manga suratti Paulus udde maŗragissa wuŗru maŗraubba, arawe amungkangngu itou sassane udde su pattangnganni ite, naungnge masaŗrionto'a wuŗru manga wisarane tawe atappasanne sara ng kadio'a!" ¹¹Rinone taumata ereudde manutukka manungku amungkangngu iami su pattangnganni ami, inolaanni ami naŗrino ere niwoŗretti ami sulaļummu manga suratti ami.

¹²Iami tawe lai waŗrani manumandinga ara'e manuļungngu watannganni ami massuļungngu manga taumata apan uapendaina watanganne matanggakka. Tumanite m woddo imangitou! Imangitou ma'ola'a auļaanne sassane wuŗru mannanda watanganni mangitou sa-

ssane ringannu aulʼaanne udde. ¹³Iami tawe aroddi. Amungkangngu iami mamarabunga, iami tawe lumiu passaranne. Iami uatana'a sulalummu passaranu leta'a pammanaranna apan suete tinantunnu Mawu Ruata siami. Wuʼru iamiu nasutta sulalummu wageangngu leta'a udde. ¹⁴Nariaddi, su tempo iami nattembo siamiu wuʼru nangapiddu Watti'u Aʼaluassa su ola'i Kristus siamiu, iami tawe nallinga passaranu leta'a pammanaranni ami. ¹⁵Iami tawe naddalo watanganni ami su manara n taumata waine apan su liuddu passaranu apan suete tinantunnu Mawu Ruata siami. Arawe iami sidutu sulalummu passaranu apan suete tinantunnu Mawu Ruata siami wuʼru mangngantimma manungku iamiu lembo mangngimanna si Kristus, tadea'u iami wotongnge mapp'ola'a manara apan lembo n ahewalanne su wallatti ami. ¹⁶Ringannu aroddi iami wotongnge lai mabbatti'u Watti'u Aʼaluassa udde su manga soa waine ringannu tawe mamarabunga manara ng kami apan suete niola'a su tampa m pamanarannu taumata waine.

¹⁷Sulalummu Wuke Susi uawoʼretta, "Taumata apan sidutu lulluassu sambau sarannapa, ʼinone lai lumuassu apa apan suete niola'u Mawu."

¹⁸Ana wangu taumata apan raddaloanna eteudde taumata apan raddaloannu Mawu, waline taumata maddalo watanganne sassane.

Paulus wuʼru manga rasul awusu

11 Wala'e ia'u mattingka woddo adio'a. Wotongnge are? ²Ia'u luʼrintulunu, ere Mawu Ruata sassane lai luʼrintulu ng kamiu. Iamiu ere sangkatou maʼfualala apan ta'e susi wuʼru suete nipa'ire'u iapaawingngu sangkatou umbasanna, eteudde Kristus. ³Arawe ia'u susingawangnga ringiʼrannu, sarun awono'anna tawe tumuʼfutta si Kristus, ere Hawa paarorone lai inawono'annu atoanna. ⁴Ana wangu ellehanna iamiu maʼluassa manarimmattu taumata apan rumanta ringannu wuʼru mangngaʼra'u Mawu Yesus waine - waline Mawu Yesus apan niapaasingkati ami siamiu. Wuʼru iamiu lai maʼlutu manaʼoho ghaʼraho wuʼru "watti'u aʼaluassa" apan uapapaʼralla n Ghaʼraho Mawu Ruata wuʼru Watti'u Aʼaluassa apan suete nitarimmatti amiu wuassi ami.

⁵Ia'u tawe maapendama sara ng kadio'a manungku ia'u mabba-woanna wuassu "manga rasul" apan pande udde! ⁶Asinungka ia'u tawe tumani masingkata mabbisara, arawe su ola'u asingkata, ia'u waline taumata woddo. Udde suete niapaaliatta'a siamiu su aʼawo'u inolaanna.

⁷Su tempo ia'u mabbatti'u Watti'u Aʼaluassa wuassu Mawu Ruata siamiu, ia'u tawe nadorongnga iamiu mappaduʼi sia'u; wuʼru ringannu aroddi ia'u napaawawo n wadanku. Ia'u na'ola'a udde see iamiu

maola'a matanggakka. Apa udde maola'a sambau pasasaļa su saruannu? ⁸Su tempo ia'u manggarra'a siamiu, ia'u papadulianannu manga jamaatta waine. Wotongnge iwisara ia'u nandugi manga jamaatta udde tadea'u wotongnge mantulunggi amiu. ⁹Amungkangngu su tempo udde ia'u sulaļummu paa'asiangnga, ia'u tawe mapaasusa saran sangkatou wuassu wallatti amiu. Anambo n apa apan pappandumangku suete nissaddia n manga turrangnga apan nirumanta wuassu Makedonia. Ia'u uariaga mapia-pia tadea'u ia'u tawe mapaasusa ng kamiu su aļawo'u inolaanna, wuŗru ia'u sidutu uariaga tadea'u olangnge udde tawe mawaļu. ¹⁰Alaļua'u indi tawe iapappassa suapa n tampa su leta'u Akhaya, ana waugu aļara'i Kristus apan narřino udde sia'u. ¹¹Anio ia'u mabbisara aroddi? Apa ana waugu ia'u tawe mandangngu siamiu? Mawu Ruata masingkata manungku ia'u marangngu!

¹²Apa apan a'olaangku orassa indi sidutu mammanarangku tadea'u "manga rasul" apan waine udde tawe pangiananne mapamarabunga m watanganne wuŗru mabbisara manungku imangitou mammanara ere lai iami. ¹³Manga taumata ere udde, uddewe rasul awusu. Imangitou mamamanara manggawusu taumata wuŗru mattingkaola'a naaļihida ere manga rasul wuassi Kristus. ¹⁴Tawe iaherangnga pallaļagu mangitou aroddi, ana waugu Setanna lai sassane mattingkaola'a naaļihida ere mala'ekattu asasemakka! ¹⁵Nariaddi tawe iaherangnga lai amungkangngu mamamanara n Setanna mattingkaola'a naaļihida ere mangangimbe apan tuttuŗrutta apulu Mawu Ruata. Panginsueanne imangitou lai sarun manengkamma wawaļinne apan uasulungngu inolaanni mangitou.

Asasusa m Paulus ere sangkatou rasul

¹⁶Ta'u isuļe lai apia: Arie piaddu massunna sia'u woddo. Arawe amungkangngu iamiu massunna sia'u aroddi, wala'ewe ia'u apan woddo indi mamarabunga lai adio'a. ¹⁷Manansunna indi sarun ta'u iwaļo aļaļua'u, arawe waļine Mawu apan nandolo'u mabbisara n olangnge udde. Su olangnge indi atonna-tonna ia'u mabbisara naaļihidda taumata woddo. ¹⁸Atonna manambo taumata apan lulluassu manga inolaannu runia, nariaddi ia'u maapulu lumuassa lai ere imangitou. ¹⁹Iamiu ringannu naungnga maļuassa masabbare su saruannu taumata woddo, ana waugu iamiu mammendama ririnu apandeanne! ²⁰Iamiu mangke mammala n taumata mapataŗruallanggi amiu, ara'e manggapande manaranu wuŗru mangnganu auntunganna wuassi amiu, ara'e mammendama ririne mattanggarranna wuassi amiu wuŗru waŗrani mameru siamiu. ²¹Ia'u massili manga'u manungku iamiu tumanite n lome ma'ola'a ereudde.

Arawe apa apan ilalluassu taumata waine ringannu warrani, ia'u lai warrani! (Ia'u mabbisara ere taumata woddo). ²²Imangitou taumata n Ibrani? Ia'u lai taumata n Ibrani. Imangitou taumata n Israel? Ia'u lai taumata n Israel. Papapulunni Abraham imangitou? Ia'u lai aroddi ere imangitou! ²³Imangitou lai daroloŕanni Kristus? Aringiranna naalihida ere ia'u inawuŕiante n apande, arawe atonna ia'u daroloŕanna apan lembo n apianne wuassi mangitou sarangkanambone! Ia'u arimaranne mammanara, ia'u asokkanne itarŕo sulaŕummu tuttupanna, ia'u asokkanne sansaranna wuŕru masokka lai maranite n mate. ²⁴Paalimate ia'u sassansarannu taumata n Yahudi ringannu pappuulanna paatallu m puŕo sio anambone. ²⁵Paatallu ia'u nipuullu manga taumata n Roma; ia'u lai suete niwaretannu watu. Paatallu lai naependama niŕrammo ng kapalla su tahaŕoangnga, wuŕru paassa ia'u uaŕallatto su tahaŕoangnga aŕannune massallo sarŕabbi. ²⁶Masokka ia'u ma'ola'a amamatta apan pia silakane: silakannu manawangnga, silaka mangangarŕo, silaka wuassu taumata n Yahudi ara'e lai wuassu taumata waŕine Yahudi, silaka sulaŕummu soa, silaka su liuddu soa, silaka su tahaŕoangnga, wuŕru silaka wuassu manga turŕangnga apan mangnga'u ririne Sarŕani wutte'e waŕine. ²⁷Ia'u mattingkasahadda wuŕru mammanara marimadda: pattaŕa assa tawe matiilla, tawe umanna, tawe ma'inumma, masokka ia'u umamatta maŕunussa, aamansungeanna, ana waugu tawe laubba wuŕru tawe tampa atatanaanna. ²⁸Su liuddu sarangkanambone udde, mamiallo ia'u susingawangnga lai su ola'u anambo n jamaatta. ²⁹Amungkangngu piaddu lome, ia'u lai mammendama lome su sambau. Amungkangngu piaddu nanawo su rosa, naungku lai massusa.

³⁰Ne, amungkangngu ia'u mamarabunga n sambau inolaanna, ne ia'u mamarabunga manga inolaanna apan mapaaŕiatta'u aŕallome'u. ³¹Mawu Ruata, Iamangngu Mawu Yesus masingkata manungku ia'u tawe mangawusu. Aranne raloanna saran maŕannu-lannu. ³²Su tempo ia'u uatana'a su Damsyik, gubernure apan uaparenta isudde su aŕungngu parenta n Ratu Aretas, nandolokku tantara mandiaga ngara n soa udde see iapasametta sia'u. ³³Arawe ringannu sambau so'anna wahewa ia'u niuŕukka su sambau loŕrangnga su paggala watu udde. Aroddi ia'u naŕiu wuassu lima n gubernure udde.

Sondapa wuŕru aellega apan nionggolu Mawu Ruata si Paulus

12 Atonna tawe auntunganne amungkangngu mamarabunga. Arawe ia'u lai maapulu mamarabunga manga inolaanna apan niapaasilo Mawu Ruata sia'u sulaŕummu sondapa ara'e sulaŕummu aellega. ²Ia'u maailaŕa sangkatou Sarŕani apan mapuŕote appata su tonnane naŕiu

niapaasengkengnga su tampa atanggarranne su surga. (Ia'u wagga tanne wadangge atonna-tonna nasengkengnga ara'e tumba'u sambau aellega – tumba'u Mawu Ruata sassane masingkata.) ³⁻⁴Ta'u isuje paassa apia: Ia'u masingkata manungku taumata indi nasengkengnga niapaasutta su Firdaus. (Ia'u wagga tanne wadange atonna-tonna nasengkengnga, ara'e udde tumba'u sambau aellega – tumba'u Mawu Ruata apan masingkata.) Poiaroddi taumata sarun maaringikka manga inolaanna apan tawe iasi'attu taumata wufru isassingadda su taumata mabbisara n wisara udde. ⁵Ete su ola'u taumata udde apan ta'u ipammunga, wafine su ola'u wadanku sassane. Su ola'u wadanku sassane, tumba'u manga inolaanna apan mapaalatta'u alallome'u eteudde apan ta'u ipammunga. ⁶Unnu wisara ia'u lai maapulu mamarabunga n sambau inolaanna, ia'u maddiri mattalimoronganna apan awusu; ia'u sarun mabbisara ringannu atonna. Arawe ia'u maradannu riri'u, tadea'u tawe taumata massunna ia'u nangillembu wuassu apa suete niasiloanni tou su inolaanku ara'e apa apan suete niaringiranni tou su wisara'u.

⁷Arawe tadea'u ia'u tawe tumanite n mamarabunga ana waugu aellega apan wahewalla udde, ia'u nionggolannu lihiddu radda'a su wadanku apan maola'a ahiddu Setanna. Radda'a udde nionggola ipamuulla sia'u, tadea'u ia'u tawe mamarabunga. ⁸Paatallu ia'u u'aljomanna su Mawu Ruata tadea'u radda'a udde marau wuassia'u. ⁹Arawe Mawu sinumimbakka, "Ia'u mandanggu si'o wufru ete indi wuannu; ana waugu tarfino-U ahewalanne amungkanngu i'o sulalammu alallome'." Ana waugu udde naungku maluassa mamarabunga n alallome'u, ana waugu amungkanngu ia'u lome, ne su tempo udde ia'u maappendama manungku Kristus uariagga sia'u ringannu atotohan-Ne. ¹⁰Nariaddi ia'u lulluassa ringannu alallome'u. Ia'u lai lulluassa amungkanngu ana waugu Kristus ia'u nialuandahanna, ia'u naasomba asasusa, a'enggenanna, wufru ia'u naappendama sahadda. Ana waugu amungkanngu ia'u lome, su tempo udde ia'u naola'a matohassa.

Asasinggawangngi Paulus su inolaannu manga taumata n Korintus

¹¹Atonna ia'u suete nattanno ere taumata woddo – arawe ete iamiu na'ola'a sia'u aroddi. Rinone ete iamiu maddalo sia'u. Ana waugu sailaiwe ia'u tawe aregane sara ng kadio'a, ia'u mangke ere "manga rasul" apan wahewalla udde! ¹²Manga alarrindu'a wufru manga inolaanna apan tumanite m wahewalla wufru manga manara apan wahewalla suete niapaasilo ringannu sabare siamiu, ipattiala manungku ia'u sangkatou rasul. ¹³Sulalammu inolaanna apa iamiu tawe pandumanna, amungkanng-

ngu isumandinga ringannu manga jamaatta waine? Asinungka tumba'u su **ola'u** inolaanna indi: manungku ia'u tawe mapaasusa ng kamiu ana **waugu** massumbala sia'u. Apunge ia'u su pasasa'au udde!

¹⁴Orassa indi paatallute ia'u nasaddiate inai mattembo siamiu. **Wurru** ia'u maddiru mapaasusa ng kamiu, ana waugu apulu'u walinewe **apa** apan tatahuananni amiu, ewe'e ririnu. Ana waugu waline alarrana'a **apan** maddea'a wiakka iapaanna su hagu'rangge, ewe'e ete hagu'rangga udde mappaduli alarranangge. ¹⁵Ana waugu udde ringannu naungnga ma'uassa ia'u manantillu alawo'u darotongku siamiu, ewe'e wadangu sassane lai. Amungkanggu ia'u aroddi arangngune siamiu apa iamiu tawe mandanggu sia'u?

¹⁶Ne, iamiu nattaturrutante manungku ia'u tawe saran paassa na-paasusa ng kamiu. Arawe piaddu mabbisara manungku ia'u indi mangngapande; manungku ia'u naasomba auntunganna wuassi amiu ana **waugu** ia'u mangngapande. ¹⁷Tawe mariaddi! Apa wuassu manga tau-mata apan ta'u nirolokka siamiu udde ia'u mangganu auntunganne **wuassi** amiu? ¹⁸Ia'u suete nandolokki Titus inai mattembo siamiu, **wurru** ia'u nandolokku tur'rangnga waine apan Sar'ani inai su sambau ringanni tou. Apa Titus nanganu auntunganna wuassi amiu? Arawe iambua mammanara ringannu pandumma apan uasulungnga **wurru** ma'ola'a ringannu inolaanna apan uasulungnga!

¹⁹Wotongge mariaddi iamiu massunna, alannunete indi iami tanta'anna mangngambangnga watanganni ami su saruanni amiu? Iamiu niali'uwune atonna! Mawu Ruata masingkata manungku alawo'u wi-sara ng kami udde tumur'uttu apulu ng Kristus. **Wurru** alawo'u inolaanni ami udde niola'a ipannohassa pangangimanni amiu. ²⁰Ia'u susinggawangnga manungku su tempo ia'u mattembo siamiu, ia'u naa-ratingnga tawe ere apa apan aantimangu. Ar'ringenne aratinganna piaddu uawawulo, naungge la'leo, naungge ma'oso, tumba'u madea'a hausannu watanganne, uaaumbilangnga, mappawawulo, mawunga **wurru** ma'ola'a patatatiakka. ²¹Ia'u mata'utta amungkanggu su tempo ia'u ru-manta Mawu Ruata sarun mapaawawo'u su saruanni amiu **wurru** ia'u sarun lumuai ana waugu manambo su wallatti amiu dorone marosa, tawe mawalu, **wurru** tawe mangillo'lo ma'ola'a manga inolaanni mangi-tou apan sussandaga, naga'imutanna **wurru** tawe su rinone.

Manga pira alarra'a panginsueanne wurru tabea

13 Indi atallunete ia'u rumanta mattembo siamiu. Sula'ummu Wuke Susi uaworretta, "Suapa n hatto rinone pia matatiane darua ara'e sire tallu, wakkute udde hatto udde atonna." ²Manga taumata

su tempo naliu suete na'ola'a rosa wuṛṛu anambo n taumata waine, suete niwaḷoḷangu paarorone su tempo ia'u aruane nattembo siamiu. Orassa indi ana waugu ia'u maraute ringanni amiu, ia'u mabaḷo apia amungkangngu ia'u rumanta lai, tawe saran sangkatou wuassi mangitou apan maḷiu wuassu ruumanna. ³Ne iamiu sarun maasomba anambo n tatialane apan ipaapulu ng kamiu manungku Kristus atonna-tonna mabbisara sia'u. Amungkangngu Kristus mamasingkata siamiu, Itou tawe mamasingkata ringannu aḷallome, arawe ṛinone Itou mapaaḷiatta'u taṛṛino-Ne su wallatti amiu. ⁴Atonna su tempo Itou niarussa, Itou lome, arawe orassa indi Itou mabbiakka ringannu taṛṛino Mawu Ruata. Iami lai lome sulaḷummu wiakki ami apan uaukka ringanni Kristus, arawe napawe sumaruanna siamiu, iami lai matohassa su sambau ringanni Kristus ana waugu taṛṛino Mawu Ruata.

⁵Annama'o iamiu maannammu watanganni amiu sassane, apa iamiu atonna-tonna mabbiakka ana waugu mangngimanna si Kristus! Iamiu sarun maatutukka manungku Kristus Yesus udde sulaḷummu naungngi amiu! – waine lai olangnge amungkangngu iamiu tawe mangngimanna atonna-tonna. ⁶Ia'u mangantimma iamiu maatutukka manungku iami waḷinewe taumata maḷihakka awono'anna. ⁷Iami u'aḷiomanna su Mawu Ruata antimanna Itou mantuḷungngi amiu ana see tawe ma'ola'a pasasaḷa. Waḷinewe mapaaḷiatta'a manungku iami indi pande mammanara, arawe tadea'u iamiu tuttuṛṛutta apulu Mawu Ruata – salaiwe aellehanna iami tawe tumuṛṛutta, udde tawe apane! ⁸Ana waugu iami tawe maapa'ola'a sambau inolaanna apan uataae ringannu apan naṛṛino; iamiu sarun tumuṛṛutta apan naṛṛino. ⁹Iami lulluassa amungkangngu iami lome wuṛṛu iamiu matohassa. Iami u'aḷiomanna lai tadea'u iamiu maola'a masuungnga. ¹⁰Ana waugu udde, ia'u namoṛṛettu suratta indi su tempo ia'u taambe uatana'a su pattangnganni amiu. Ringannu aroddi, amungkangngu ia'u rumantate, ia'u tawe mamarenta ringannu maṛṛagissa su saruanni amiu ringannu taṛṛino apan nionggolu Mawu sia'u. Taṛṛino udde nionggola ipannohassa pangangimanni amiu, waḷinewe ipandaḷeo siamiu.

¹¹Panginsueanne, manga tuṛṛangnga, ṛinone iamiu lumuassa, wuṛṛu padea'a, tadea'u iamiu maola'a masuungnga. Sengkamawe aḷawo'u tatantiro'u. Ṛinone iamiu naungnga sambau wuṛṛu mabbiakka su paddarame. Mawu Ruata Lembo Maakkanna wuṛṛu masarṛinto'a udde sarun matana'a ringanni amiu.

¹²Paa'adattawe sangkatou ringannu sangkatou, ringannu aakkanna ere passasangkatuṛṛangannu taumata n Saṛṛani.

Anambo n aḷaṛṛana'u Mawu Ruata napaapiddu tabea siamiu.

13 Mawu Yesus Kristus manganamatta siamiu, Mawu Ruata mandangu siamiu, wurru Gharraho Mawu Ruata uaintarro siamiu sarangkambone!

Tabea ng kami,
Paulus

SURATTI PAULUS SU MANGA JAMAATTU GALATIA

WISARA TAŁAANE

Napawe Watti'u Ałaluassa su ola'u Mawu Yesus nanattakke iapaa-singkatta wuřru nitarimmata su wallatu manga taumata wałine Yahudi, nasappute aiwało, anio amungkangngu maola'a sangkatou taumata n Sařrani apan tutune, taumata řinone tumuřrutta tita n agama Yahudi. Paulus namasingkata manungku olangnge udde tawe gunane – manungku atonna-tonna tumba'u sambau pinangiananne apan mapia su ipabbiakku taumata n Sařrani eteudde mangngimanna si Kristus. Ringannu pangangimanna udde paa'aukku taumata ringannu Mawu Ruata maola'a mapia apia. Arawe manga taumata apan lullawangnga si Paulus suete nirumanta su manga jamaatta su Galatia, eteudde sambau Provinsi n Roma su leta'u Asia Adio'a. Imangitou pia adapatta manungku tadea'u masasangkapia apia ringannu Mawu Ruata, taumata řinone tumuřrutta tita n agama Yahudi.

Suratti Paulus Su Manga Jamaatta su Galatia indi niworřeta ipantułungngu manga taumata apan niałiwu manga ałarřa'a nassała udde, tadea'u imangitou mabelengnga apia tumuřrutta ałarřa'a apan narřino udde. Paulus nanattaku wisara manungku itou wotongnge lai isago rasullu Mawu Yesus Kristus. Ringannu uahahati Paulus nabbi-sara manungku itou niwagoana maola'a rasul apan niarantanne wu-assu Mawu Ruata, wałine wuassu taumata. See lai manarane tudane paarorone eteudde su taumata apan wałine Yahudi (1:2). Wua udde Paulus nabbi'e m pandumanne manungku paa'aukku taumata ringannu Mawu Ruata maola'a mapia apia tumba'u mangngimanna Mawu Ruata (3-4). Sulałummu manga aaddoanne panginsueannu wuke indi (5-6), Paulus mangngarřa'a manungku darangngu wuassu taumata n Sařrani nirumanta ana waugu itou mangngimanna si Kristus, ringannu aroddi naaola'a taumata udde tuttuřruta pallałagu n taumata n Sařrani.

Lalorꞑone

Panattarꞑanne	1:1-10
Tarꞑino m Paulus ere sangkatou rasul	1:11-2:21
Watti'u Alaꞑuassa su ola'u darangngu Mawu Ruata	3:1-4:31
Walate apulu naungngu taumata n Sarꝼani wurꝼu manarane	5:1-6:10
Panginsueanne	6:11-18

1 ¹³Manga tuṛrangnga manga jamaatta su wageangngu Galatia, Ia'u, Paulus, wuṛru anambo n tuṛrangnga taumata n Sarṛani apan suadio'a ringanku, mangngantima doronganna Mawu Ruata Iamangngi ite wuṛru Mawu Yesus Kristus mangonggolu aḷamatta wuṛru paddarame siamiu.

Ia'u naola'a rasul waḷine ana waugu wuassu taumata, ara'e ana waugu niteneḡu taumata, ewe'e ana waugu Yesus Kristus Mawu Ruata Iamangngi ite apan suete napaawiakki Tou apia wuassu papate. ⁴Tuttuṛruta apulu Mawu Ruata Iamangngi ite, Kristus nanantillu watangan-Ne maola'a sasamba ana waugu manga rosa ng kite, tadea'u iite iapaasaḷamatta wuassu tempo apan laḷeo indi. ⁵Daralo su Mawu Ruata ma'oma n sara maḷannu-ḷannu! Amin.

Tumba'u sambau Watti'u Aḷaḷuassa

⁶Ia'u tinumiangnga su ola'u manga tuṛrangnga! Iamiu niwagoannu Mawu Ruata ana waugu darangngu ng Kristus, arawe orassa indi iamiu aroddi aḷihakke tinumaḷiudda Mawu Ruata wuṛru mangngimanna "watti'u aḷaḷuassa" apan uapapaṛralla m Watti'u Aḷaḷuassa wuassu Mawu Ruata. ⁷Tumuṛruttu atonna tate lai "watti'u aḷaḷuassa apan waine". Tumba'u pia manga taumata apan mammasingkata siamiu "watti'u aḷaḷuassa", su ola'i Kristus apan niwaḷelongngi mangitou na'oman sara iamiu niaḷiwune. ⁸Taumata apan mabatti'u "watti'u aḷaḷuassa" apan uapapaṛralla wuassu Watti'u Aḷaḷuassa apan suete niapaasingkati ami, wala'e itou iṛruumannu Mawu Ruata – salaiwe taumata udde, iami sassane ara'e mala'ekatta wuassu surga! ⁹Iami suete nabbisara paarorone, orassa indi ia'u mabbisara paassa lai: Taumata apan mammasingkata siamiu "watti'u aḷaḷuassa" apan uapapaṛralla m Watti'u Aḷaḷuassa apan suete niaringiṛrani ami wuassi ami, taumata udde ṛinone iṛruumannu Mawu Ruata!

¹⁰Apa ringannu olangnge udde pendamanna ere ia'u mangngantima a'uannu taumata? Atonna-tonna tawe! Ia'u tumba'u mangngantima panga'uanna wuassu Mawu Ruata. Apa ia'u sidutu mattinsahadda mammoḷengnga naungngu taumata tadea'u ia'u maaluassa taumata? Amung-kangngu inolaangku sidutu aroddi, ia'u waḷinewe allangngi Kristus.

Ereapa laḷanne Paulus nabbali rasul

¹¹Manga tuṛrangnga ṛinone maasingkata manungku Watti'u Aḷaḷuassa apan iwabbatti'u udde darantane waḷine wuassu taumata. ¹²Ia'u tawe nanengkamma watti'a udde wuassu taumata, wuṛru tawedu sangkatou apan nangarṛa'a sia'u. Mawu Yesus Kristus sassane apan namu'a laḷoṛro n Watti'u Aḷaḷuassa udde sia'u.

¹³Asinungka iamiu suete naaringikka su ola'u ia'u mabbiakka dorone eteudde sangkatou apan mangngimanna agama n Yahudi. Iamiu masingkata ereapa aragine ia'u su jamaatu Mawu wuṛṛu ereapa aragine ia'u mappanduma mamate simangitou. ¹⁴Sulaḷummu mappaamattu agama n Yahudi, ia'u nangillembu wuassu anambo n taumata n Yahudi apan santuwo'u. Ia'u maṛṛimada su ola'u manga inolaannu addatu iupunggu aḷamona ng kami.

¹⁵Arawe ana waugu apapia naungngu Mawu Ruata, Itou namile sia'u tantaḷanna ia'u taambe niasungkanga wuṛṛu namago sia'u iapa'imbe Sitou. ¹⁶Mawu Ruata nanualagu Anang-Nge sia'u tadea'u Watti'u Aḷaḷuassa su ola'u Anang-Nge wotongnge iwatti'u su manga taumata waḷine Yahudi. Su tempo udde ia'u tawe inai ringannu sangkatou madorongnga aḷaṛṛa'a. ¹⁷Ia'u lai tawe inai ringannu manga taumata su Yerusalem apan maddoroneanna wuassia'u naola'a rasul. Arawe ia'u inaita watukku leta'u Arab, see wua isudde nabelengke apia watukku Damsyik. ¹⁸Tallu tonna wua udde, ia'u inaita watukku Yerusalem maisasomba m Petrus. Ia'u uatana'a ringanni tou tumba'u mapuḷo lima su allone aḷannune. ¹⁹Ia'u tawe nassomba manga rasulle waine, tabbene'e Yakobus, tuṛranggu Mawu.

²⁰Apa apan ta'u niwoṛṛeta indi atonna. Mawu Ruata masingkata manungku ia'u tawe mangawusu!

²¹Wua udde ia'u inaita watukku manga wageangngu Siria wuṛṛu Kilikia. ²²Na'oma n sara tempo udde manga jamaattu Saṛrani su Yudea taambe naaillaḷa sia'u ringannu uahahati. ²³Imangitou tumba'u maaringikka taumata mabbisara, "Taumata apan dorone mandaḷeo siami, orassa indi mabatti'u pangangimanna apan dorone ihagohakki tou." ²⁴Ne imangitou nadalote Mawu Ruata ana waugu ia'u.

Paulus wuṛṛu manga rasul apan waine

2 Mapuḷo appata su tonnane wua udde, ia'u nabelengke watukku Yerusalem su sambau ringanni Barnabas, wuṛṛu uaapidi Titus. ²Ia'u inai watukku Yerusalem ana waugu Mawu Ruata suete napaaliatta'a sia'u manungku ia'u rinone inai. Wuṛṛu sulaḷummu sambau ammuḷanna apan tumba'u ringannu manga piaṛrangnge poiarrowdi, ia'u mannaḷa'a m Watti'u Aḷaḷuassa apan iwabatti'u su manga taumata apan waḷine Yahudi. Ana waugu ia'u maddiri manara'u dorone, ara'e manara'u tempo indi maola'a tawe mangalene. ³Titus, apan uaammungnga sia'u, eteudde sangkatou taumata n Yunani, arawe itou tawe niwata'a tumuṛrutta atorannu sunatta, ⁴salaiwe pia manga taumata mammata'u olangnge udde. Imangitou udde manga taumata apan sinumutta awagananna sulaḷummu ammuḷanni ite wuṛṛu mattingkaola'a ere tuṛrangnga. Imangi-

tou sinumutta ringannu maʃanna-ʃannaba mannaʃrassida aʃaʃuassa apa niola'i ite ana waugu iite uaukke ringanni Kristus. Imangitou maapulu mapaawelengngi ite su olangnge paarorone ere sangkatou allangnga, ⁵arawe iami maddiri sumoʃrota sara ng kadio'a wuassi mangitou, ana waugu iami maapulu mandiaga tadea'u Watti'u Aʃaʃuassa udde mangke uatana'a waresi ringanni amiu.

⁶Manimbe aroddi, tawe inolaanna wakku apan radeaannu manga taumata apan aellehanna ere piaʃrangnge wuassia'u – mawala sia'u tawe paʃralanne amungkanngu imangitou piaʃrangnge ara'e tawe, ana waugu Mawu Ruata tawe mamile hati. ⁷Arawe manga taumata apan aellehanna piaʃrange udde mangnga'u manungku Mawu Ruata suete napamanara'u mamasinkatu Watti'u Aʃaʃuassa su taumata waʃine Yahudi, ere lai Itou suete napamanara m Petrus namasingkatu Watti'u Aʃaʃuassa udde su taumata n Yahudi. ⁸Ana waugu Mawu Ruata nangonggolu atatohassa si Petrus maola'a rasullu taumata n Yahudi, wuʃru nangonggola lai atatohassa sia'u maola'a rasullu taumata waʃine Yahudi. ⁹Yakobus, Petrus wuʃru Yohanes, apan aellehanna naola'a manga piaʃra'u jamaatta, mangnga'u manungku Mawu Ruata suete nangonggolu manara indi sia'u. Ne imangitou naa'agassa lima ringanni Barnabas wuʃru ia'u, maola'a sambau tatiala m pagaha hawe. See imangitou wuʃru iami sambaidda manungku iami sarun mammanara su wallatu manga pabbawalaga waʃine Yahudi, wuʃru imangitou su wallatu taumata n Yahudi. ¹⁰Tumba'u sambau darorongngi mangitou eteudde tadea'u iami umakkannu taumata asiangnga. Wuʃru ia'u sidutu maʃuassa mammanara udde.

Paulus nanagu si Petrus su Antiokhia

¹¹Su tempo Petrus nirumanta su Antiokhia, ia'u nanagu sitou ringannu uahahati, ana waugu pallaʃagune nassaʃa. ¹²Paarorone itou inuma'ianna u'anna suadio'a ringannu manga tuʃranga apan waʃine Yahudi. Arawe napawe manga taumata daroloʃrani Yakobus naranate, itou nassaʃiu marau wuassu manga tuʃranga apan waʃine Yahudi wuʃru maddirite umanna suadio'a ringanni mangitou, ana waugu matta'uttu manga taumata apan maapulu anambo n taumata udde sunatanna. ¹³Manga tuʃrangnga Yahudi apan waine lai nattanno ere lilangkamaʃe'i Petrus, na'oma n sara Barnabas niawoheanna lai nattanno pallaʃagu mangitou. ¹⁴Aroddi ia'u naasilo manungku pallaʃagu mangitou uapapaʃralla n atatuʃiddu Watti'u Aʃaʃuassa udde, ia'u nabbisara si Petrus su saruannu awadaalla apan uasemodda isudde. ¹⁵Amungkanngu Tuʃrangnga sangkatou Yahudi apan buatte nabbiakka naaʃihidda tau-

mata wałine Yahudi, anio Turřrangnga orassa indi maapulu mamata'u **manga** taumata waine mabbiakka ere taumata n Yahudi?"

Taumata n Yahudi wuřru wałine Yahudi niapaasałamatta ana waugu mangngimanna si Kristus

¹⁵Atonna tumuřrutta tanpa inariadianna, iami indi taumata n Yahudi wuřru wałine "taumata wałine Yahudi apan marosa." ¹⁶Salaiwe aroddi iami masingkata manungku taumata nasasangkapia Mawu Ruata tumba'u ana waugu mangngimanna si Yesus Kristus, wuřru wałine ana waugu tuttuřruta tita n agama. Iami sassane lai mangngimanna Mawu Yesus Kristus tadea'u iami masasangkapia Mawu Ruata wuassu pangangimanni ami udde, wałine ana waugu mappaattu tita n agama. **Ana** waugu mappaattu tita n agama, tawe saran sangkatou masasangkapia apia ringannu Mawu Ruata. ¹⁷Iami mappandumma masasangkapia apia ringannu Mawu Ruata ringannu mabbiakka uaukki Kristus. Arawe amungkangngu suete na'ola'a aroddi, inauranna iami ta'e lai "manga taumata marosa" ere lai manga taumata wałine Yahudi, apa indi atappasanne manungku ete Kristus apan naarosa siami? Natan-tuna tawe! ¹⁸Amungkangngu ia'u manattakke mapararisikka apia atorannu tita n agama apan suete ta'u nihohakka, ne ia'u napaalıatta'a manungku ia'u suete na'ola'a lumaławangnga tita udde. ¹⁹Arawe ia'u natete su saruannu tita n agama - nipate n tita udde sassane - tadea'u ia'u wotongnge mabbiakka hunane su Mawu Ruata. Ia'u suete niarussa su sambau ringanni Kristus. ²⁰Orassa indi wałinewe ia'u mabbiakka, arawe ete Kristus apan mabbiakka sulałummu wadanku. Wiakka apan irarřingiu orassa indi eteudde mabbiakka ipangngimanna Ana'u Mawu Ruata apan marangngu sia'u wuřru suete nanantillu wațangan-Ne ana waugu ia'u. ²¹Ia'u tawe mangngadio'a darangngu Mawu Ruata. Amungkangngu paa'aukku taumata ringannu Mawu Ruata mabbalı mapia apia ana waugu mappaamattu tita n agama, udde mangalene papate n Kristus tawe gunane!

Tumuřrutta tita n agama ara'e mangngimanna si Kristus

3 Manga turřrangnga taumata n Galatia! Iamiu woddo atonna. Tanne iamiu niarřinoante n wawono'i sai? Papate n Kristus su alu arussa suete ta'u tinala'a ringannu masema-semakka siamiu! ²Annama'a wałoa'a sia'u inolaanna sambau indi: Apa iamiu suete nanengkamma Gharřaho Mawu Ruata ana waugu mappaamattu tita n agama, ara'e ana waugu iamiu naaringikka Watti'u Ałaluassa wuassu Mawu Ruata

wurru mangngimanna si Kristus? ³Anio iamiu aroddi awoddone! Iamiu mannattake mabbiakka wakku ringannu Gharraho Mawu Ruata, ratadde orassa indi iamiu maapulu maasomba asasuungnga wuassu auatannu sassane? ⁴Tate gunane sarangkanambone apan suete niapendamanni amiu udde? Ratadde tawe gunane! ⁵Mawu Ruata nangonggolu Gharraho-Ne siamiu wurru na'ola'a manga alarrindu'a su wallatti amiu. Apa Mawu Ruata na'ola'a udde ana waugu iamiu mappamattu tita n agama ara'e ana waugu iamiu maddaringikka Watti'u Alaluassa udde wurru mangngimanna si Kristus?

⁶Udde ere lai uaworretta sulaumu Wuke Susi su ola'i Abraham - arendi, "Abraham mangngimanna Mawu Ruata wurru ana waugu pangangimanne udde itou nitarimatu Mawu Ruata maola'a taumata apan maaluaa naunggu Mawu Ruata." ⁷Nariaddi rinone iamiu manutukka manungku taumata apan atonna-tonna papapuluni Abraham eteudde taumata apan mangngimanna Mawu Ruata. ⁸Wuke Susi suete na'ellega paarorone manungku Mawu Ruata namala manga taumata waline Yahudi masangkapia apia ringannu Mawu Ruata, amungkanggu imangitou mangngimanna Sitou. Watti'u Alaluassa udde nipaasingkata paarorone si Abraham sulaumu paaire indi, "Wuassi'o, Mawu Ruata sarun mangalamatta alawo'u pabbawalagu taumata su wowo n runia indi." ⁹Araham mangngimanna, ne itou nialamatanna. Aroddi lai anambo n taumata apan mangngimanna sarun alamatanna suadio'a ringanni Abraham.

¹⁰Manga taumata apan uatundeeta su tita n agama, sarangkanambone mabbiakka su alunggu awawontoga. Ana waugu sulaumu Wuke Susi uaworretta, "Taumata apan tawe tumurrutta mappamattu sarangkanambone apan uaworretta sulaumu Wuke Tita n Agama, awontohannu Mawu Ruata!" ¹¹Tawe saran sangkatou apan masangkapia Mawu Ruata ana waugu mappamattu tita n agama. Olangge udde suete niapaalatta'a sulaumu Wuke Susi, "Tumba'u taumata apan mangngimanna Mawu Ruata na'oma n sara paa'aukke ringannu Mawu Ruata maola'a mapia apia, sarun maralukka!" ¹²Arawe tita n agama tawe maola'a pangaiannu pangangimanna. Sulaumu Wuke Susi uaworretta manungku taumata apan mappamattu tita n agama, sarun maralukka ana waugu tita udde.

¹³Arawe Kristus namallosi ite wuassu awawontogu tita n agama. Itou na'ola'a udde ringannu namala n watangan-Ne awontohanna ana waugu iite. Ana waugu sulaumu Wuke Susi uaworretta, "Niawontohante taumata apan nate niele su alu pangangeleanna." ¹⁴Kristus na'ola'a aroddi tadea'u alamatta apan pina'ire Mawu Ruata si Abraham ionggola lai su manga taumata waline Yahudi. Ringannu aroddi iite lai apan

mangngimanna Mawu Ruata, wotongnge manengkamma Gharraho, apan pina'ire Mawu Ruata udde.

Tita n agama ara'e paaire Mawu Ruata

¹⁵Manga turrangnga! Mappianne ia'u mappaamattu sambau tuladda wuassu apa apan suete niapendamanna miallo-miallo. Amungkangngu taumata ma'ola'a sambau paaire wurru paaire udde suete nia'u su sambau, ne tawe saran sangkatou apan wotongnge mamaļu paaire udde, ara'e manamba paaire udde. ¹⁶Manga paaire Mawu Ruata niola'u Mawu Ruata si Abraham wurru lai hunane su taumata papapulunni Abraham. Sulalummu Wuke Susi tawe uaworretta "wurru su manga taumata pappapulunni Abraham", atappasanne eteudde anambo n taumata. Apan uaworretta isudde eteudde "wurru hunane su taumata papapulunnu", atappasanne tumba'u sangkatou, eteudde Kristus. ¹⁷Apan ta'u iwaļo isindi eteudde indi: paaire Mawu Ruata suete niola'a wurru niwaidda paarorone. Tita n agama apan nionggolla 430 su tonnane wua isudde tawe maawaļu paairene wurru maapappassa paaire Mawu Ruata udde. ¹⁸Ana waugu amungkangu aonggolu Mawu Ruata uatundeeta su tita n agama, ne tate lai aonggola apan pina'ire. Ewe'e ana waugu Mawu Ruata suete na'ire si Abraham, ne Mawu Ruata nangonggolu udde sitou.

¹⁹Amungkangu aroddi, ipa'ura tita n agama nionggolla? Sasimbakke eteudde manungku tita udde nipanamba tadea'u mapaaļiatta'u laļawangngu taumata. Tita n agama udde tumba'u ipappaatta ma'oma n sara daranta n sangkatou papapulunni Abraham, apan nisaggo sulalummu paaire Mawu Ruata si Abraham. Tita n agama udde niwaļo manga mala'ekatta ringannu paļelene sangkatou taumata. ²⁰Ne, řinone pia darua m wageange, wakkute udde pia sangkatou paļelene. Arawe Mawu Ruata tawe mappanduma paļelene, ana waugu Itou sassane mamnara.

Atatohassu tita n agama

²¹Apa udde atappasanne manungku tita n agama uapaparřala m paaire Mawu Ruata? Tawe! Ana waugu amungkangngu tita n agama nionggolla maola'a laļannu wiakku taumata, ne taumata wotongnge masasangkapia Mawu Ruata ringannu laļanne tumurřutta tita n agama. ²²Arawe sulalummu Wuke Susi uaworretta manungku anambo n pabawalagu taumata mangke uatana'a su aļungngu tařřino n rosa. Ana waugu udde, aonggola apan pina'ire pinangiananne wuassu mangngimanna Mawu Yesus Kristus nionggolla simangitou apan mangngimanna.

²³Tantaḷanna taambe nia'omanna tempone iite mangngimanna Mawu Yesus Kristus, iite laḷu'arannu tita n agama ringannu mapia; iite naalihida niḷrimputa ma'oma n sara pangangimanni iite udde lumiatta'a. ²⁴Ringannu aroddi, tita n agama naola'a mandariaga siite ma'oma n sara Kristus rumanta ma'ola'a siite masasangkapia Mawu Ruata ana waugu iite mangngimanna si Kristus. ²⁵Orassa indi, ana waugu nia'omante tempone taumata sarun mangngimanna si Kristus, ne iite tate lai rariagannu tita n agama.

²⁶Ana waugu iamiu mangngimanna si Kristus Yesus, ne iamiu uaukka ringanni Tou; wuḷḷu ana waugu udde iamiu maola'a aḷaḷḷana'u Mawu Ruata. ²⁷Iamiu sarangkanambone suete nisaraḷḷani sulaḷummu aranni Kristus, nariaddi iamiu suete nanengkamma sulaḷummu watanganni amiu pallaḷagu n Kristus sassane. ²⁸Sulaḷummu olangnge indi tate lai paḷḷalane su wallatu taumata n Yahudi wuḷḷu taumata waḷine Yahudi, su wallatu allangnga wuḷḷu tawe allangnga, su wallatu esakka wuḷḷu wawine. Iamiu sarangkanambone sambau ana waugu Kristus Yesus. ²⁹Amungkangngu iamiu tatahuanni Kristus ne eteudde iamiu papapulunni Abraham. Ne iamiu sarun manengkamma apa apan suete pina'ire Mawu Ruata.

4 ¹⁻²Arawe ḷinone ta'u itaḷa'a ringannu masemakka, tantaḷanna sangkatou malloḷossa pussa'a n iamangnge uukke ta'e mamawo, pia taumata apan ualu'adda sitou wuḷḷu mammaduḷi sitou ma'oma n sara iamangnge wotongnge manantilu pussa'a udde sitou. Itou a'olaanna naola'a ere allangnga salaiwe ḷinone itou uatahuannu anambo n darotongnge udde. ³Aroddi lai iite: Tantaḷanna iite taambe natimmade, iite mattaḷḷuallangnga manga ghaḷḷaho apan uaparenta runia indi. ⁴Arawe napawe su temponete, Mawu Ruata mandolokku Anang-Nge su Runia. Anang-Nge udde niasungkanga wuassu sangkatou wawine wuḷḷu mabbia akka su aḷungngu parenta n tita n agama. ⁵Ringannu aroddi Itou namallosu manga taumata apan mabbia akka su aḷungngu parenta n tita n agama; tadea'u iite lai wotongnge maola'a aḷaḷḷana'u Mawu Ruata.

⁶Ana waugu ete iamiu udde aḷaḷḷana'u Mawu Ruata, Mawu Ruata nandolokku Ghaḷḷaho n Anang-Nge sinumutta sulaḷummu naungngu wuḷḷu naungku, eteudde Ghaḷḷaho apan mabbisara, "Iamangnga, oh Iamangku." ⁷Nariaddi, iamiu waḷine lai allangnga, ewe'e ana'a. Wuḷḷu ana waugu iamiu ana'u Mawu Ruata, ne Mawu Ruata sarun mangonggola siamiu aḷawo'u sarannapa apan suete nisaddia-Ne su manga aḷaḷḷanang-Nge.

Asasinggawangngi Paulus su manga taumata n Galatia

⁸Dorone iamiu tawe maailala Mawu Ruata, ana waugu udde iamiu naola'a allangngu manga tarino apan irarango ere mawu, arawe rinone waline Mawu Ruata. ⁹Arawe orassa indi iamiu maailala Mawu Ruata, ara'e mappianne lai isago, Mawu Ruata maailala siamiu. Ne anio iamiu maapulu mabelengnga apia su manga gharraho n runia indi, apan lome wuru asiangnga? Anio iamiu ta'e maapulu mai'allangnga apia su manga gharraho udde? ¹⁰Iamiu mallaghu manga allo, manga wulanna, wuru manga tonna apan suete nitantunna. ¹¹Ia'u susinggawangnga, arrenge asasaha'u indi siamiu tawe gunane.

¹²Manga tarango! Ia'u sumalanda siamiu tadea'u iamiu maola'a ere ia'u. Ana waugu ia'u lai suete naola'a ere iamiu. Iamiu tawe na'ola'a pasasala su saruangu. ¹³Asinungka iamiu ta'e maanaungnga apa apan naa'ola'a sia'u paarorone namasingkatu Watti'u Alaluassa udde siamiu. Panataranne ana waugu ia'u nirumadda'a. ¹⁴Su tempo udde iamiu maddingku, salaiwe wadangu naola'a ere wawono'a apan wahewalla siamiu. Ewe'e iamiu manarimma'u ere lai nanarimatu mala'ekattu Mawu Ruata ara'e ere manarimmatta si Kristus Yesus sassane. ¹⁵Iamiu lulluassa atonna su tempo udde. Arawe orassa indi, suapate alaluassa udde? Ia'u masingkata manungku su tempo udde iamiu maapulu mallasso'a mata ng kamiu sassane wuru ionggola sia'u, amunggangngu udde wotongge olaanna. ¹⁶Apa iamiu orassa indi massunna sia'u ere setta, ana waugu ia'u mabatti'u apia siamiu?

¹⁷Manga taumata waine udde ringannu marimada maddea'a siamiu, arawe manga pandumanni mangitou laleo. Imangitou tumba'u maapulu mapatalei ng kamiu wua dingani ami, tadea'u iamiu tumantalongnga simangitou ringannu marimada. ¹⁸Atonna mapia amunggangngu marimada su anambo n inolaanna apan mapia, sambaliate sidutu aroddi wuru arie tumba'u amunggangngu ia'u su sambau ringanni amiu. ¹⁹Manga alaranna'u aranguanna! Ia'u orassa indi uatataranga lai ana waugu iamiu. Ia'u uatataranga ere sangkatou inangnga apan uatataranga su tempo mangunsiwe. Ia'u sidutu sarun matataranga, amungkangu pallaagu n Kristus taambe nusippa su wadangu! ²⁰Ia'u malutu atonna matana'a su sambau su wallatti amiu orassa indi, tadea'u ia'u wotongge maggahatto ringanni amiu ringannu tingikka apan paralane, ana waugu ia'u wagga sarun ma'ola'a apa lai ringanni amiu!

Hagar wuṛru Sara maola'a tuḷada

²¹Manga tuṛrangnga apan maapulu mabbiakka su aḷungngu parenta manga tita n agama, paddaringikka sia'u! Ia'u sarun mamasingkata siamiu apa apan su ṛinone uawoṛretta sulalummu Wuke Tita n Musa. ²²Isudde uawoṛretta manungku Abraham pia dua ng katou ana'a: Inangngu ana'a sangkatou udde sangkatou allangnga, wuṛru inangngu ana'a waine udde sangkatou waḷine allangnga. ²³Ana'a wuassu wawine apan naola'a allangnga, niasungkanga ere inanaramanne ana waugu itou wuassu apalu n taumata. Arawe wuassu wawine waḷine allangnga, niasungkanga ana waugu pina'ire Mawu Ruata. ²⁴Indi wotongnge ipaatta maola'a sambau sasumandinga. Rua ng katou wawine udde, paṛṛimaunnapa darua paaire: sambau wuassu Wowo n Sinai – eteudde Hagar; aḷaṛṛanangnge niasungkanga maola'a allangnga. ²⁵Nariaddi, eteudde Hagar Wowo n Sinai, su leta'u Arab. Itou pinanumandingannu Soa n Yerusalem wuṛru anambo n tumanangnge apan orassa indi ta'e naola'a allangnga. ²⁶Arawe Yerusalem apan su surga eteudde Yerusalem waḷine allangnga, wuṛru eteudde inangngi ite. ²⁷Ana waugu sulalummu Wuke Susi uawoṛretta,

"Paalaluisse i'o wawine tinna, apan tawe saran paassa nangunsiwe!

Lallala'e wuṛru paggiote i'o apan saran paassa tawe namendama taddu'a mangngunsiwe!

Ana waugu wawine apan tinantangu awingnge sarun maasomba ana'a lembon anamboanne

wuassu wawine apan mabbiakka ringannu awingnge."

²⁸Manga tuṛrangnga! Eteudde iamiu sassane aḷaṛṛana'u Mawu Ruata apan niasungkanga ana waugu paaire Mawu Ruata; iamiu udde uasulungngi Ishak. ²⁹Su tempo udde ana'a apan niasungkanga tumuṛruttu apulu n taumata, mammate ana'a apan niasungkanga ana waugu apulu Ghaṛṛaho Mawu Ruata. Aroddi lai orassa indi. ³⁰Arawe apa apan uawoṛretta sulalummu Wuke Susi? Isudde uawoṛretta arendi: "Limbuarrete allangnga wawine udde su sambau ringannu anangnge, ana waugu ana'a wuassu allangnga wawine udde tawe uatahuanna su sambau ringannu ana'a wuassu waḷine allangnga udde." ³¹Nariaddi, manga tuṛrangnga, iite indi waḷinewe aḷaṛṛana'a wuassu sangkatou allangnga wawine; eteudde iite manga ana'a wuassu wawine apan waḷine allangnga.

Paa'aggasa apapallosi amiu

5 Iite orassa indi naliute, ana waugu Kristus suete namallosi itel! Ana waugu udde paa'agassa apapallosa udde, wuŕŕu ariete pattingka allangnga apia.

²Paanaunge, amungkangngu iamiu madorongnga maisunatta, udde mangalene Kristus tawe gunane siamiu. Nabbisara wisara indi, ete-udde ia'u sassane, Paulus. ³Paassa lai ia'u mappaanaungnga su taumata apan ma'isunatta, manungku itou rinone mappaamattu anambo n tita n agama! ⁴Amungkangngu iamiu maapulu masasangkapia apia ringannu Mawu Ruata wuassu laŕummu tita n agama, udde atap-pasanne paa'aukku ringanni Kristus nabassute. Ringannu aroddi iamiu mabbiakka su liuddu darangngu Mawu Ruata. ⁵Arawe siami indi, iam mangngantima manungku ringannu tuŕlungannu Gharraho Mawu Ruata wuŕŕu sulalummu pangangimanni ami si Kristus, Mawu Ruata namala ng kami masasangkapia apia ringanni Tou. ⁶Ana waugu amungkangu iite suete naaukka ringanni Kristus Yesus, su ola'u tumuŕrutta ara'e maddiri tumuŕrutta atorannu sunatta tate maola'a sambau hatto lai. Lembon apianne tumba'u mangngimanna si Kristus, wuŕŕu udde nilumiatta'a sulalummu darangngu ng kite su taumata waine.

⁷Dorone iamiu mammanara ringannu mapia! Orassa indi anio iamiu maddirite tumuŕrutta apia apulu Mawu Ruata? Isai suete nassaŕo'i amiu? ⁸Natantuna iapa ma'ola'a udde walnewe Mawu Ruata apan suete namago siamiu! ⁹"Ragi adio'a sarun mapaatuwo n anambo n taponna niluakka," unnu taumata. ¹⁰Salaiwe aroddi ia'u ta'e mangngimanna manungku ringirŕanni amiu tawe nawaŕu, ana waugu iite suete naaukka ringanni Kristus. Wuŕŕu ia'u mangngimanna manungku isai-sai apan mangngaliwu n ringirŕannu, sarun iŕruumannu Mawu Ruata.

¹¹Matataŕŕino sia'u, manga tuŕrangnga, anio ia'u mangke ipasseetta amungkangu ia'u ta'e mammasingkata manungku sunatta udde ta'e wotongnge? Amungkangngu atonna ia'u ta'e mammasingkata aroddi, ne bawaŕo'u su ola'u arussa ng Kristus tawe maaola'a patatiakka. ¹²Lembon apianne manga taumata apan mangngaliwu n ringirŕannu udde mappianne lapiddu sumabanga wuassu jamaatta!

¹³Iamiu suete niwagoanna maola'a taumata apan napallose. Arawe arie mappaattu apapallosi amiu udde sidutu ma'ola'a apulu naungngi amiu sassane. Arawe rinone iamiu sidutu uaa'akkana wuŕŕu sidutu uaa'imbe. ¹⁴Anambo n tita n agama naammulle sulalummu parenta sambau indi, "Rinone iamiu uararangngu su sansuŕungngu taumata ere lai iamiu mandangngu wadangngu sassane." ¹⁵Arawe amungkangu iamiu

mangke uaar̄rautta, paatemhamma, panginsueanne iamiu mar̄rimunsa'a suadio'a.

Apulu n Ghar̄raho Mawu Ruata wur̄ru apulu n taumata

¹⁶Pandumangku arendi: Wala'e Ghar̄raho Mawu Ruata mangehetta siamiu wur̄ru ariewe mabbiakka tumur̄rutta apulu m pallaḷagu n taumata. ¹⁷Ana waugu apulu n taumata uatataae n apulu n Ghar̄raho Mawu Ruata, wur̄ru apulu n Ghar̄raho Mawu Ruata uatataae n apulu n taumata. Itarua mangke tawe massomba, na'oma n sara iamiu tawe maaola'a apa apan ipaapulu ng kamiu. ¹⁸Arawe amungkangu Ghar̄raho Mawu Ruata mangngehetta siamiu, ne iamiu tawe paparentannu tita n agama.

¹⁹Apulu m pallaḷagu n taumata nilumiatta'a sulaḷummu manga inolaanna apan laḷeo, nallaḷuhuranna, wur̄ru tawe su rinone; ²⁰sulaḷummu pasasuba monganna, wur̄ru tararoti; sulaḷummu pasaseetta, uawawuḷo, mallu'adda awingnge, maḷihakka masa'u, wur̄ru tumba'u mar̄ringiddu watanganne sassane; patataḷei wur̄ru uasasamba'a, ²¹mangngune, mabbu'anna, tar̄ra ramea wur̄ru aḷawo'u inolaanna waine. Sulaḷummu sarangkanambone udde ia'u mapaanaungnga siamiu orassa indi, su ereapa lai ia'u napaananungnga siamiu rorone, manungku manga taumata apan ma'ola'a inolaanna ereudde tawe maola'a aḷar̄rana'u Mawu Ruata.

²²Arawe, amungkangu manga taumata aebetannu Ghar̄raho Mawu Ruata hessine eteudde: Imangitou uararangngu, imangitou lulluassa, imangitou pia atatammudu naungnga, imangitou masabare wur̄ru mapia su saruannu taumata waine, imangitou matur̄ruta, ²³imangitou masar̄rionto'a, wur̄ru wotongnge maatar̄rangnga apulu nanungnga. Tawe tita n agama apan manningaddu manga inolaanna ereudde. ²⁴Manga taumata apan naola'e pussa'a n Kristus Yesus, manga taumata udde suete nanantangngu pallaḷagu n taumata ringannu aḷawo'u apulu naungnge wur̄ru pallaḷagune. ²⁵Ghar̄raho Mawu Ruata suete nangonggola siite wiakka apan waku; ana waugu udde ete Itou lai rinone mangatokku wiakki ite. ²⁶Iite tawe wotongnge mattingkawunga, wur̄ru maddaḷaḷeo naungnga, wur̄ru uaa'une sangkatou ringannu waine.

Uatatuḷungnga

6 Manga tur̄rangnga! Amungkangngu sangkatou niaratinganna ma'ola'a rosa, rinone iamiu mabbiakka tuttur̄ruta Ghar̄raho Mawu Ruata, mangehetta taumata udde mabelengnga su laḷanna apan nar̄rino. Arawe iamiu rinone ma'ola'a udde ringannu masar̄rionto'a wur̄ru paariagai arie

ma'oma n sara iamiu sassane lai awono'anna. ²Rinone iamiu uata-tuḷungnga uapasanna winabbawa n taumata waine tadea'u ringannu aroddi iamiu tuttuḷruta parenta n Kristus. ³Amungkangu sangkatou massunna watanganne mappianna, wutte'e tawe, taumata udde nangawusu watanganne sassane. ⁴Suapa n taumata, ḷinone mamarikissa sassane apa pallaḷagune mapia ara'e laḷeo. Amungkangu mapia, itou wotongnge mamarabunga n inolaanne udde. Arawe arie itou manumandingi tou ringannu apa apan a'olaannu taumata waine. ⁵Ana waugu sangkatou-sangkatou ḷinone mamasanna winabbawane sassane.

⁶Taumata apan mannengkama aḷarḷa'i Kristus, ḷinone mattahia ringannu hurune anambo n apa apan mapia apan tatahuannanni tou.

⁷Arie awahianna. Mawu Ruata tawe ianalangnga! Apa apan isuanna eteudde lai apan itinganna. ⁸Amungkangu taumata massuanna tumuḷruttu pallaḷagu n taumata, itou sarun mangitingnga apapate wuassu pallaḷagune udde. Arawe amungkangu itou massuanna tumuḷruttu piaḷḷa'u Gharḷraho Mawu Ruata, itou sarun mangitingnga wiakka tutune wuḷḷu maḷannu-ḷannu wuassu Gharḷraho Mawu Ruata. ⁹Ana waugu udde arie iite mawusa ma'ola'a manga inolaanna mapia; ana waugu amungkangu iite tawe illoḷone mammanara manara udde su paassa iite sarun mangitingnga wuane. ¹⁰Nariaddi, tantaḷanna ta'e pia tempo siite, ḷinone iite ma'ola'a apapia su anambo n taumata, nipangillembu su manga tuḷḷranggi ite apan sulalammu pangangimanna sambau.

Iapaanaungnga wuḷḷu tabea'u

¹¹Paatutuḷḷe paapia-pia wageangnge indi apan ta'u niwoḷḷreta sassane ringannu woḷḷretta apan wahahewalla. ¹²Manga taumata apan maapulu mapaatolo m batanganne ringannu inolaannu runia, ete imangitou apan mappandumma mamata'i amiu tumuḷḷrutta atorannu sunatta. Arawe imangitou na'ola'a udde tumba'u tadea'u imangitou tawe sansarannu taumata n Yahudi ana waugu arussa Mawu Yesus. ¹³Manga taumata apan tuttuḷḷruta atorannu sunatta lai tawe tumuḷḷrutta tita n agama. Arawe imangitou maapulu iamiu sunatanna, tadea'u imangitou wotongnge lumuassa manungku iamiu tinumuḷḷruta atoranna udde. ¹⁴Arawe ia'u atonna-tonna maddiri lumuassu aḷawo'u apa, tumba'u su Mawu ng kite Yesus Kristus apan nate niarussa. Wuḷḷu ana waugu Itou suete nate niarussa, ne runia tate mangalene lai sia'u, wuḷḷu ana waugu runia indi, pendamangku ia'u lai ere natete. ¹⁵Nisunatta ara'e tawe nisunatta udde tawe maola'a hatto. Apianne eteudde maola'a taumata wakku. ¹⁶Su taumata apan mabbiakka ringannu ḷingidda udde, aroddi lai su

anambo n ałarřana'u Mawu Ruata, ia'u mangngantima Mawu Ruata sarun mangonggolu paddarame wurřu ałaman-Ne.

¹⁷Wua udde, arie pia sangkatou lai mapaasusa'u lai, ana waugu su wadanku pia manga tatiala manungku ia'u mallalarřenggennu Mawu Yesus.

¹⁸Doronganna Mawu ng kite Yesus Kristus sidutu mangalamatta manga turřangnga. Amin.

Tabea ng kami,
Paulus

SURATTI PAULUS SU JAMAATTU EFESUS

WISARA TAŁAANE

Sulałummu *Suratti Paulus Su Jamaattu Efesus*, mamamořrene ma-paatalagu Pandumannu Mawu Ruata tadea'u "Ułili m pati'uppu Runia, mapia su surga ara'e su runia, maola'a sambau ringanni Kristus ere sangkatou tembonanne" (1:10). Suratta indi maola'a lai sambau wawaggo su alařřana'u Mawu Ruata tadea'u imangitou maatutukka lałořro m pandumanna mapia wuassu Mawu Ruata mappa'aukka anambo n pabbawalagu taumata sulałummi Kristus.

Sulałummu wageangnge paarorone surattu Efesus indi niapaa-singkatta ereapa paa'aukka udde mariaddi. Ipanala'a n olangnge udde itou nabbatti'u ereapa Mawu Ruata Iamangnga suete namile alařřanang-Nge, ereapa Mawu Ruata sulałummi Yesus Kristus Anang-Nge, nang-ampunga wuřru namallosu alařřanang-Nge wuassu rosa, wuřru ere-apa paaire Mawu Ruata udde tohasannu Ghařřaho Mawu Ruata. Sulałummu wageangnge aruane, niwało su manga mabbawasane tadea'u imangitou mabbiakka su paddarame tadea'u pasasambau mangitou maola'a ere pabbawalaga apan mangngimanna si Kristus, wotongnge mariaddi.

Maddea'a mapaałiatta'a manungku alařřana'u Mawu Ruata naola'e sambau ana waugu naaukke ringanni Kristus, mamamořrene nappaattu mangapira sasanato'a. Jamaatta eteudde ere wadangnga wuřru Kristus maola'a temboanne, ara'e ere sambau wałe apan niapararisikka su rapappake watu eteudde Kristus, ara'e ere sangkatou wawine wuřru Kristus naola'a awingnge. Mamamořrene lembon natuno su tempo naanaungnga alařřattu Mawu Ruata sulałummi Kristus, na'oma n sara manga sasanato'a apan nipaatta sulałummu suranne niapaałiatta'a manungku naungnge lembon wahewalla ringannu adiangkamanna wuřru daralo su Mawu. Manga inolaanne niellehanne wuassu darangngu n Kristus, wuassu papate-Ne, pangangampu-Nge, apapia naung-Nge wuřru awawantu-Ge.

Laloŕrone

Panattaranne	1:1-2
Kristus wurru gharreda-Ne	1:3-3:21
Mabbiakka waku ere taumata n Sarrani	4:1-6:20
Panginsueanne	6:21-24

1 Aļarņana'u Mawu Ruata su Efesus, apan matuŗŗutta Mawu Yesus Kristus!

²Ia'u Paulus, rasulli Kristus Yesus wuassu apulu n Mawu Ruata, mangngantimma doronganna Mawu Ruata Iamangngi ite wuŗŗu Mawu Yesus Kristus mangngogolu aļamatta wuŗŗu paddarame siamiu.

Aļamattu Għarņaho Mawu Ruata sulaļummi Kristus

³Dalo su Mawu Ruata, Iamangngu Mawu ng kite Yesus Kristus!

Itou nangaļamatta siite ringannu aļawo'u aļamattu Mawu Ruata sulaļummu surga, ana waugu iite uaukka ringanni Kristus. ⁴Tantaļanna runia indi taambe nariaddi, Mawu Ruata suete namile siite sulaļummi Yesus Kristus ringannu pandumanna tadea'u iite maola'a pussa'a-Ne sassane wuŗŗu tawe saļane su saruan-Ne. Ana waugu darangngu n Mawu Ruata, ⁵ne, Itou suete nanantuna paarorone manungku sulaļummi Yesus Kristus, Itou sarun manga'u siite maola'a manga aļarņanang-Nge sassane. Wuŗŗu atonna eteudde apan tipusanni Tou. ⁶Dalo su Mawu Ruata apan mawantuga, ana waugu sulaļummu Anang-Nge apan arangnguanna, Itou lembon marangngu siite.

⁷Ana waugu wuassu papate n Kristus, iite nipallosu Mawu Ruata, atappasanne manungku Itou suete nangampungu siite wuassu manga rosa ng kite. ⁸Itou na'ola'a udde ana waugu Itou lembon marangngu siite, wuŗŗu darangngu udde nionggolla siite ringannu aļawo'u apande wuŗŗu asingkata. ⁹Tumuŗŗuttu apulu-Ne sassane, Mawu Ruata nama-singkata siite addapingngu manara-Ne; Itou suete nabbisara manungku manara-Ne udde sarun insueanna sulaļummi Kristus. ¹⁰Manara udde eteudde tadea'u aļawo'a, mapia udde su surga ara'e su runia, maola'a sambau ringanni Kristus ere sangkatou tembonanne. Wuŗŗu olangnge udde sarun insueannu Mawu Ruata amungkangu nia'omante tempone.

¹¹Mawu Ruata mammanara aļawo'a tumuŗŗuttu apulu-Ne wuŗŗu raŗrawen-Ne sassane. Ro'e n paarorone Itou suete namile siite, ana waugu Itou maapulu tadea'u iite maola'a aļarņanang-Nge ana waugu uaukka ringanni Kristus. ¹²Wala'e iite, apan paarorone mangngantima si Kristus, maddalo Mawu Ruata ana waugu awawantu-Ge!

¹³Iamiu lai suete naola'a aļarņana'u Mawu Ruata su tempo jamiu naaringikka tanata Mawu Ruata, eteudde Watti'u Aļaļuassa apan nangonggolu asasaļamatta siamiu. Iamiu mangngimanna Mawu Yesus Kristus, ana waugu udde Mawu Ruata nangonggolu tatiala pussa'a-Ne siamiu, eteudde Għarņaho-Ne apan suete pina'ire-Ne. ¹⁴Għarņaho udde naola'a wataŗŗu manungku iite sarun manengkamma apa apan suete pina'ire Mawu Ruata su aļarņanang-Nge. Indi mangngonggolu antimma

siite manungku Mawu Ruata sarun mamallosu aḷaḷḷanang-Nge. Dalo su Mawu Ruata ana waugu awawantu-Ge!

Aaḷiomanni Paulus

¹⁵Ana waugu udde, ro'e n ia'u naaringikka manungku iamiu mangngimanna Mawu Yesus, wuḷḷu iamiu suete niuḷḷakkanu anambo n aḷaḷḷana'u Mawu Ruata, ¹⁶ia'u tawe illoḷone maadiangkamanna su Mawu Ruata su ola'i amiu. Sidutu ia'u mannago ng karannu su tempo ia'u u'aḷiomanna. ¹⁷Ia'u sussaḷande tadea'u Mawu Ruata ng kite Yesus Kristus, Iamangnga apan mawantuga, nangonggolu Ghaḷḷaho-Ne siamiu. Ghaḷḷaho udde sarun ma'ola'a siamiu pande, wuḷḷu sarun mapaaḷiatta'u Mawu Ruata siamiu na'oma n sara iamiu maaillaḷa Sitou. ¹⁸Ia'u sumaḷande tadea'u Mawu Ruata mamu'a ḷingirḷannu ma'oma n sara maola'a masemakka; tadea'u iamiu maasunna apa apan aantimanni amiu wuassu Mawu Ruata apan namago siamiu. Wuḷḷu lai tadea'u iamiu maasingkata aroddi anambone aḷamatta apan maḷḷamaga apan suete nissaddia Mawu Ruata su aḷaḷḷanang-Nge; ¹⁹wuḷḷu aroddi ahewalle Mawu Ruata mammanara ringannu napene n taḷḷino su wadangngi ite apan mangngimanna. Taḷḷino Mawu Ruata udde naaḷihida taḷḷino apan ahewaḷanne, ²⁰apan nipaatti Tou su tempo napaawiakki Kristus apia wuassu papate wuḷḷu nangonggola Sitou aiananna atanggaraḷḷanne su sambau ringannu Mawu Ruata su surga.

²¹Aiananni Kristus udde mattanggaraḷḷane marau wuassu aḷawo'u aianannu pamarenta, aḷawo'u tembonanne, aḷawo'u piaraḷḷange, aḷawo'u manga tuangnga wuḷḷu isai lai apan suete niongoḷannu aiananne apan matanggakka, mapia udde mabbiakka su tempo indi, ara'e mabbiakka su tempo addantane. ²²Mawu Ruata napasuḷḷubawa n sarangkanambone udde su aḷunggu parenta n Kristus, wuḷḷu nangonggoli Kristus su jamaatta maola'a tembonannu aḷawo'u jamaatta. ²³Eteudde jamaatta wadangngi Kristus, nisuunggi Tou apan napasuunggu sarangkanambone su aḷawo'u tampa.

Wuassu papate mattuda n awawiakka

2 Dorone iamiu natete sulaḷummu pangangimanna ana waugu iamiu marosa wuḷḷu nilumawangnga manga parenta Mawu Ruata. ²Su tempo udde iamiu tuttuḷḷuta aḷawo'u apulu n runia indi; eteudde iamiu matuḷḷutta su tembonannu winalanganna, eteudde ghaḷḷaho apan marosa indi uaintaḷḷo sulaḷummu naungngu manga taumata apan mad-

diri tumuruttu Mawu Ruata. ³Dorone iite sarangkanambone lai uasulunggi mangitou; iite mabbiakka tutturuta pallalagu ng kite taumata wuṛṛu mammanara manara apan maaluaassa wadangnga wuṛṛu ringiranni ite. Su tempo udde iite naola'a manga taumata apan niarriaannu asasa'u Mawu Ruata, ere lai manga taumata waine.

⁴Arawe aroddi ahewalle darangngu Mawu Ruata! Itou aroddi marangngu siite, ⁵na'oma n sara su tempo iite ta'e nate sulaḷummu gharraho ana waugu manga laḷawangngi ite, Itou napaawiakki ite apia su sambau ringanni Kristus. Nariaddi tumba'u apapia naungngu Mawu Ruata iamiu naasomba asasaḷamatta. ⁶Ana waugu iite uauukka ringanni Kristus Yesus, Mawu Ruata napaawiakki ite apia su sambau ringanni Tou, tadea'u iite mamarenta lai suadio'a ringanni Tou sulaḷummu surga. ⁷Mawu Ruata na'ola'a udde tadea'u su tempo apan rumanta, taumata wotongnge maasilo aroddi ahewalle darangngu Mawu Ruata. Darangngu udde niapaasilo Mawu Ruata sulaḷummu apapia naung-Nge siite sulaḷummi Kristus Yesus. ⁸⁻⁹Mawu Ruata niuukkani amiu, ana waugu udde Itou nanaḷamatta siamiu, ana waugu iamiu mangngimanna Mawu Yesus. Asasaḷamatti amiu udde waḷinewe asombangu asahaddu sassane. Sarangkanambone udde aonggolou Mawu Ruata. Nariaddi, tawe saran sangkatou apan wotongnge mamunga m watanganne su olangnge udde. ¹⁰Ete iite indi riadiannu Mawu Ruata, wuṛṛu wuassi Kristus Yesus, Mawu Ruata na'ola'a siite, tadea'u iite mammanara manga inoanna apan mapia apan suete nissaddia n Tou siite.

Su sambau ana waugu Kristus

¹¹Manga turrangnga apan waḷine Yahudi! Paanaunge ririnu su tempo rorone: Iamiu isassago "taumata tawe nissunatta" unnu taumata n Yahudi apan mangnga'u ririne suete nissunatta (pandumanne apan suete naasomba tatiala niola'u taumata su wadangngi mangitou). ¹²Su tempo udde iamiu tawe uauukka ringanni Kristus, iamiu taumata lo'a apan tawe nasutta su pabbawalaga apan nipile Mawu Ruata. Iamiu tawe nasutta sulaḷummu paaire apan niola'u Mawu Ruata ringannu pabbawala-Ge. Iamiu mabbiakka sulaḷummu runia indi tawe antimma wuṛṛu tawe Mawu Ruata. Iamiu tawe nasutta sulaḷummu paaire apan niola'u Mawu Ruata ringannu pabbawala-Ge. Iamiu mabbiakka sulaḷummu runia indi tawe antimma wuṛṛu tawe Mawu Ruata. ¹³Arawe orassa indi, ana waugu iamiu suete nauukka ringanni Kristus Yesus, iamiu apan rorone marau, suete niapaarani ana waugu papate n Kristus. ¹⁴Ana waugu Kristus sassane mandarame ng kite. Itou napaaukku manga taumata n Yahudi wuṛṛu manga taumata waḷine Yahudi

naola'a sambau pabbawalaga. Tanda'a passaranna su wallatti mangitou, eteudde pasaseetta, suete niṛrimunsa'i Kristus ringannu nanantillu watangan-Ne sassane. ¹⁵Tita n agama Yahudi ringannu manga parenta wuṛru manga atoranne suete nipappasi Kristus tadea'u pabbawalaga darua udde maola'a sambau pabbawalagu taumata wakku, apan uauukka ringanni Tou. Ringannu olangnge udde Kristus nangapiddu paddarame. ¹⁶Wuassu papate-Ne su alu arussa, Kristus napaaukku pabbawalaga darua udde, wuṛru nandame n mangitou ringannu Mawu Ruata, na'oma n sara nawuṛite pasaseetta udde. ¹⁷Ana waugu udde Mawu Yesu nirimanta namasingkattu Watti'u Aḷaḷuassa su ola'u paddarame udde siamiu; mapia siamiu waḷine taumata n Yahudi apan rorone marau wuassu Mawu Ruata, ara'e lai su taumata n Yahudi apan marani Mawu Ruata. ¹⁸Sulaḷummi Kristus, iite sarangkanambone – mapia taumata n Yahudi ara'e taumata waḷine Yahudi – wuassu Ghaṛṛaho Mawu Ruata man sambau, wotongnge mangundani n Iamangnga.

¹⁹Ana waugu udde, iamiu tate lai nasutta taumata lo'a ara'e taumata n liudde. Orassa indi iamiu nareengke pabbawalagu Mawu Ruata. Iamiu lai naola'e aḷaṛṛana'u laḷoṛro n araratuannu Mawu Ruata. ²⁰Iamiu lai suete niapararisikka su rapappakke apan niaddo manga rasul wuṛru manga nabi, ringanni Kristus Yesu sambau watu apan apianne. ²¹Ete Itou apan nangatokku ahewallu waḷe udde naola'a Waḷe Mawu Ruata apan tumba'u hunane su Mawu. ²²Ana waugu mabbiakka uauukka ringanni Kristus, iamiu lai tantaḷanna iapararisikka su sambau ringannu manga taumata waine maola'a sambau Waḷe Mawu Ruata; isudde Mawu Ruata uatana'a ringannu Ghaṛṛaho-Ne.

Manara m Paulus su taumata waḷine Yahudi

3 Ana waugu udde ia'u Paulus, nitaṛro su tuttupanna ana waugu Kristus Yesu maola'a huna ng kamiu taumata waḷine Yahudi. ²Asinungka iamiu suete naaringikka manungku Mawu Ruata, ana waugu apapia naung-Nge, Itou suete nangonggola sia'u manara indi hunane siamiu. ³Mawu Ruata namasingkattu addapingngu manara-Ne wuṛru nabaḷo sia'u. (Su olangnge indi suete ta'u niwoṛreta aḷiu rosone ringannu maautta, ⁴wuṛru amungkangu iamiu mabbasa, iamiu sarun maasunna addapingi Kristus ere lai ia'u maasunna.) ⁵Dorone addapingnge udde tawe niapaasingkatta su taumata, arawe orassa indi Ghaṛṛaho Mawu Ruata suete namasingkata su manga rasul wuṛru nabi-Ne. ⁶Addapingnga udde ete indi: Sulaḷummi Watti'u Aḷaḷuassa udde, taumata waḷine Yahudi, maapendamma lai manga aḷamattu Mawu Ruata apan dorone nissaddia tumba'u su taumata n Yahudi.

Manga taumata wałine Yahudi naola'e wageanggu wadangnga sambau, wuřru manengkamma lai suadio'a apa apan suete pina'ire Mawu Ruata sulałummi Kristus Yesus.

⁷Mawu Ruata nangonggulu ałamatta sia'u - eteudde manara - mam-masingkatu Watti'u Ałaluassa udde. Ia'u nanengkamma manara udde wuassu tařrino Mawu Ruata apan mammanara sulałummu naungku. ⁸Su wallatu anambo n ałarřana'u Mawu Ruata, ete ia'u arałeoanne. Arawe Mawu Ruata nangonggolu ałamatta indi sia'u: Manara mammasing-katu Watti'u Ałaluassa su taumata wałine Yahudi su ola'u paa'ala ng Kristus apan tawe masue; ⁹wuřru lai tadea'u wuassia'u anambo n tau-mata maasingkata ereapa Mawu Ruata, Mandariaddi ulili m pati'uppa indi, napaamattu manara-Ne ro'e n dorone apan iadappingnga su runia. ¹⁰Pandumannu Mawu Ruata eteudde, tadea'u orassa indi, wuassu ja-maatta sarangkanambone apan uaagassa tařrino su winalanganna ma-singkatu apande Mawu Ruata su aławo'u inolaanne. ¹¹Mawu Ruata na'ola'a udde wuassu manara-Ne apan tawe panginsueanne, apan niolang-Nge sulałummi Kristus Yesus Mawu ng kite. ¹²Ringannu mang-ngimanna si Kristus wuřru ana waugu uaaukka ringanni Tou, iite niwala wotongnge mangundani Mawu Ruata ringannu napene m pangangi-manna. ¹³Ana waugu udde darorongku eteudde: arie paasinggawangnga su ola'u asasusa'u indi ana waugu iamiu, ana waugu sarangkanambone udde huna n apapianu.

Darangngu n Kristus

¹⁴Ana waugu udde ia'u niuamałintudda su saruannu Iamangnga. ¹⁵Ete wuassi Tou suapan pabbawalaga su surga wuřru su runia me-nengkamma pallałagu-Ne apan apianne. ¹⁶Ia'u u'aliomanna doronganna Mawu Ruata apan mawantuga maapulu manohassa naungngu ringannu Gharřaho-Ne. ¹⁷Doronganna ana waugu iamiu mangngimanna si Kris-tus, Kristus matana'a sulałummu naungngu, wuřru wiakku niwantanna wuřru niparentannu darangngu. ¹⁸Ia'u u'aliomanna doronganna sua-dio'a ringannu anambo n pabbawalagu Mawu Ruata, iamiu wotongnge maasunna aroddi ahewalle wuřru ało'engnge wuřru atanggakke wuřru ałaluamme darangngu ng Kristus, ¹⁹apan ringannu řingirřannu taumata tawe iasunna sara ng kadio'a. Doronganna iamiu maailala darangngu ng Kristus udde, na'oma n sara iamiu mapene n aapulu Mawu Ruata apan nasuungnga.

²⁰Ringannu tařrino Mawu Ruata apan mařřimadda mammanara su-lałummu naunggi ite, Mawu Ruata wotongnge ma'ola'a mannam-boanne wuassu apa apan wotongnge doronganni ite ara'e irarřingiddi

ite. ²¹Rinone Mawu Ruata wantuhanna sara marrawa mappulunna sulalummu jamaatta, wuassi Kristus Yesus. Daralo su Mawu Ruata saran malannu-lannu! Amin.

Paa'aukku wadangnga

4 Ana waugu udde ia'u - sangkatou taumata n ruumanna, apan nitarranganna ana waugu mangngimbe Mawu - sussaŋande siamiu: pabbiakke uaturruta ere io sangkatou taumata apan suete niwagoannu Mawu Ruata. ²Rinone naungngi amiu sidutu mawawo, masarrionto'a, wurru masabare. Paasiloa'a darangngunu ringannu uatatuŋungnga sangkatou ringannu waine. ³Pammanarate paarimadda su ipabbiakka su padderame tadea'u paa'aukka apan niola'u Gharraho Mawu Ruata udde mangke pappaduŋananna. ⁴Tumba'u pia badangnga sambau, wurru Gharraho sambau. Aroddi lai iamiu suete niwagoanna su pangangan-timma sambau apan uasuŋungnga. ⁵Mawu tumba'u sambau, sambau pangangimanna, wurru sambau pananaŋrani, ⁶wurru Mawu Ruata man sambau apan naola'a lamangngu anambo n n taumata. Ete Itou Mawu n ulili m pati'uppa, apan mammanara sulalummu sarangkanambone, wurru uatarriino sulalummu sarangkanambone.

⁷Iite sangkatou-sangkatou mannengkamma sambau aonggola tumuruttu apa apan nionggoli Kristus. ⁸Sulalummu Wuke Susi uaworretta,

"Su tempo Itou niuwawitta su tampa
apan atanggaŋanne,

Itou uapiddu manambo taumata n ruumanna;

wurru Itou nangonggolu manga aonggola su taumata."

⁹Ne, amungkangu iwisara "Itou niuwawitta" atappasanne manungku Itou paarorone suete sinumossokka na'oma n sara su tampa awawoanne su runia indi. ¹⁰Wurru Itou apan suete sinumossokka udde, ete Itou lai apan niuwawitta na'oma n sara su tampa atanggaŋanne wuassu alawo'u langitta na'oma n sara ulili m pati'uppa nialorroannu daranta-Ne. ¹¹Ete Itou apan "nangonggolu manga aonggola su taumata"; sangkawageanganna nitenega naola'a rasul, waine naola'a nabi; wurru waine lai naola'a mamamingkatu Wattiu Alaluassa udde, wurru waine lai netenega naola'a manga huru wurru mamamaduli jamaatta. ¹²Indi niolang-Nge tadea'u alarrana'u Mawu Ruata masuungnga wurru wotongnge mangimbe Mawu wurru mapararisikku wadangngi Kristus. ¹³Ringannu aroddi iite sarangkanambone naola'a sambau ana waugu pangangimanna apan uasuŋungnga wurru pasasunna apan uasuŋungnga su ola'u Ana'u Mawu Ruata. Wurru iite naola'a manga taumata timmade apan mallannu aatambanna asasuungge ere Kristus. ¹⁴Ne iite tate maola'a

lai ałarřana'a apan niałiwune, wuřru iaapiddu aławo'u hati n ałarřa'u manga taumata apan tarřa awusu. Imangitou mangngalıwu n taumata ringannu wawahia mangitou. ¹⁵Tawe! Mappianne iite mapaałiatta'u manga inolaanna apan atonna wuřru ringannu naungnga apan napene n darangngu, na'oma n sara su aławo'u inolaanna iite małannu-łannu masuungnga ere lai Kristus, apan naola'a tembonanni ite. ¹⁶Sulałummu piařra-Nge, anambo n wageangngu wadangnga udde uatokka mapia, wuřru pinasasamputu manga latto'anne sambau-sambau. Wuřru amungkangu suapan wageangnge udde mammanara su atokke, ne ahewallu wadangnga udde sarun tumuwo mabbalı timmade wuřru matohassa sulałummu darangngu.

Mabbiakka wakku sulałummi Kristus

¹⁷Ana waugu udde ringannu arannu Mawu, ete indi apan ta'u iwało wuřru ipanohassa: ariete lai mabbiakka ere taumata apan tawe maailała Mawu Ruata, wuřru marřingiddu runia indi. ¹⁸Řingirřanni mangitou marandumpe. Imangitou tawe maailała pabbiařřanna apan nionggolu Mawu Ruata, ana waugu imangitou atonna-tonna tawe asingkatta sara ng kadio'a su ola'u Mawu Ruata. Imangitou aroddi, ana waugu tawe maddaringikka Mawu Ruata. ¹⁹Imangitou tate lai apendamma massili, na'oma n sara imangitou tuttuřřuta apulu naungnga, wuřru mabbiakka sussandaga walate apulu naaungngi mangitou.

²⁰Arawe Kristus Yesus apan asingkatanni amiu wałinewe aroddi! ²¹Iamiu suete naaringikka su ola'i Tou! Wuřru naola'a sangkatou mallałarřenggen-Ne, iamiu suete niařřaanna lai su ola'u pallałagu Mawu Ruata apan tatahuannanni Tou! ²²Ana waugu udde tantanga'e pallałagu n taumata tabbe ringannu ola'u pabbiařřana tabbe apan tantałanna ihagohakku manga apulu n runia apan mangngalıwu. ²³Řinone ahewallu naungngu wuřru řingirřannu limbakkuanna. ²⁴Řinone iamiu mabbiakka ere taumata wakku apan niola'a uatuřřutu apulu naungngu Mawu Ruata; eteudde ringannu pallałagu apan atonna, matułidda wuřru susi.

²⁵Ana waugu udde manga tuřřangnga sarangkanambone, ariete mangawusu. Pa'ola'e mapia sangkatou ringannu sangkatou, ana waugu iite sarangkanambone uddewe suadio'a naola'a wageangngu wadangi Kristus. ²⁶Amungkangu iamiu masa'u, arie mamala n asasa'unu udde maarosa siamiu. Arie masa'u su ało'engngu allo, ²⁷tadea'u Setanna tawe tempone mamono'a siamiu. ²⁸Taumata apan inanaramanne manna'o řinone itou mangilloło manna'o. Mappianne itou mammanara tadea'u maasomba anna ringannu su řinone wuřru wotongnge mantułungngu taumata apan pia awunne. ²⁹Amungkangu iamiu maggahatto, arie

mappaattu wisara laleo. Pappaatte n manga wisara apan mannan-tiro wuṛru mantuḷungnu taumata waine. Manga wisara ereudde sarun mapaaranta n apapia su manga taumata apan naddaringikka. ³⁰Arie mapaasusa naungngu Ghaṛraho Mawu Ruata. Iamiu suete nissaṛrani ringannu Ghaṛraho Mawu Ruata. Ghaṛraho udde lai maola'a sambau wataṛru manungku Allo m Padarame sarun rumanta ringanni amiu. ³¹Timbuḷianete aḷawo'u taddu'u naungnga, mangngune wuṛru massa'u. Ariete lai umui wuṛru mallela. Ariete lai pia apendamma maddantina ara'e apendamma waine lai apan uasuḷungngu apendamma udde. ³²Arawe ṛinone naungngi amiu waresi wuṛru uaa'akkana sangkatou ringannu waine, wuṛru uaaonggolou ampunga ere lai Mawu Ruata nang-ampunga siamiu sulaḷummi Kristus.

Mabbiakka sulaḷummu asasemakka

5 Ete iamiu udde aḷaṛrana'u Mawu Ruata apan arangnguan-Ne, ana waugu udde iamiu ṛinone mattanno tuḷada Mawu Ruata. ²Wiakku ṛinone aintaṛroannu darangngu, ere lai Kristus marangngu siite. Itou nanantillu watangan-Ne ana waugu iite, maola'a sambau sasamba apan mawangngi wuṛru maaḷuassa naungngu Mawu Ruata.

³Ete iamiu udde aḷaṛrana'u Mawu Ruata. Ana waugu udde, manga inolaanna sussandaga wuṛru ipaadiri Mawu, ara'e awawaḷiu tawe ṛinone olaanna su wallatti amiu. Arie ma'oma n sara taumata waine pia sasimbakka ipabbisara manungku iamiu ma'ola'a inolaanna ereudde lai. ⁴Tawe su laḷanne lai iamiu mapaasabangngu manga wisara laleo wuṛru tawe su ṛinone. Ewe'e ṛinone iamiu u'aḷiomanna su Mawu Ruata. ⁵Panutukka paapia-pia: taumata apan pallaḷagune sussandaga, ara'e tawe matataṛrino, ara'e waḷiu (pallaḷagu ereudde nassuḷungngu lai massubba paaḷuanna), taumata udde tawe masutta su pabbawalaga apan paparentanni Kristus wuṛru Mawu Ruata.

⁶Iambaṛranga iamiu awusuannu manga hatto awusu. Ana waugu, ete manga hatto indi, apan maasa'u Mawu Ruata su saruannu manga taumata apan maḷawangnga Sitou. ⁷Nariaddi, imbaṛranga maggahawe manga taumata ereudde. ⁸Iamiu sassane dorone sulaḷummu ararandumma. Orassa indi iamiu naola'e aḷaṛrana'u Mawu, nariaddi iamiu orassa indi sulaḷummu asasemakka. Ana waugu udde iamiu ṛinone mabbiakka sulaḷummu asasemakka. ⁹Ana waugu wuassu asasemakka udde lumapputa aḷawo'u inolaanna apan mapia, matuḷidda, wuṛru waresi su aellegu Mawu Ruata. ¹⁰Paddea'awe maailaḷa apa apan maaḷuassa naungngu Mawu. ¹¹Arie ma'ola'a inolaanna apan tawe gunane apan a'olaannu manga taumata apan mabbiakka su laḷummu araranduma.

Arawe řinone iamiu manualaga inolaanna ereudde. (¹²Ana waugu inolaanni mangitou a'olaanna ringannu ma'immbuni udde ipagahatto lai maasilite.) ¹³Aławo'u inolaanna apan tatařranganna sulařummu asasemakka, sarun asiloanna ringannu matilangnga. ¹⁴Ana waugu anambo n apa apan aasilolaanna ringannu matilangnga, eteudde asasemakka. Ana waugu udde suete niwisara,

"Apu'ote, i'o apan mattiilla,
wurru pabbangunte wuassu papate!
Kristus sarun lumansiangnga si'o."

¹⁵Ana waugu udde, panutukka paapia-pia ereapa i'o mabbiakka. Arie mabbiakka ere taumata woddo; pabbiakke ere taumata pande. ¹⁶Paahuna'a mapia-pia tempo apan tatahuanannu, ana waugu tempo indi tempo apan laleo. ¹⁷Arie awodoanna, ewe'e panarřasidde apa apan ipaapulu Mawu.

¹⁸Imbarřangnga iamiu iwu'annu anggore, ana waugu udde maałaleo siamiu. Arawe řinone iamiu intarřoannu Gharřaho Mawu Ruata. ¹⁹Pappaatte manga wisara Mazmur, antari daralo wurru antari n taumata n Sarřani sulařummu manga hatto ng kamiu. Řinone iamiu ringannu naungnga apan małuassa, mangngantari n daralo su Mawu. ²⁰Sidutu wurru su aławo'u manara, řinone iamiu maadiangkamanna su Mawu Ruata lamangnga, sulařummu aranni Yesus Kristus Mawu ng kite.

Rua sangkawinganna

²¹Tadea'u ipangadatta si Kristus, řinone iamiu uatatařantupa sangkatou ringannu waine.

²²Wawine, padaringikka awingnge esakka ere lai madaringikka Mawu. ²³Ana waugu esakka maola'a piarřa'u awingnge wawine, ere lai Kristus naola'a tembonannu jamaatta wurru Itou sassane lai Ratu m Punnu Sařamattu jamaatta apan naola'a wadang-Nge. ²⁴Ere lai jamaatta tuttuřruta si Kristus, aroddi lai su aławo'u inolaanna, wawine řinone tumuřrutta awingnge esakka.

²⁵Esakka, paarangngue awingngu wawine, ere lai Kristus marangngu jamaatta wurru nate su alu arussa ana waugu jamaatta udde. ²⁶Kristus na'ola'a ereudde tadea'u Itou wotongnge mamaresi jamaatta udde ringannu ałarřang-Nge wurru ringannu ua'e n sasarřani, tadea'u wua udde Itou wotongnge manantilla su Mawu Ruata. ²⁷Ringannu aroddi Kristus napararisikku jamaatta udde ringannu mawantuga wurru na'ukkassa su saruan-Ne, ringannu tawe sangkule ara'e angngone. ²⁸Aroddi lai esakka řinone mandangngu awingnge wawine ere lai itou

mandangngu wadangnge sassane. Taumata apan mandangngu awingnge atappasanne ere lai itou mandangngu wadangnge sassane. (²⁹Taambe nariaddi pia taumata maddantinnu wadangnge sassane. Arawe, itou mammadulji wuṛṛu mandiaga ere lai Kristus mammadulji jamaan-Ne. ³⁰Iite masingkattu udde, ana waugu iite wageangngu wadangi Kristus.) ³¹Sulaḷummu Wuke Susi uaworṛetta, "Ana waugu udde sangkatou esakka sarun manantangngu hagurangnge maola'a sambau ringannu awingnge wuṛṛu itarua sarun maola'a sambau." ³²Tatialane udde pia atappasanne apan malaḷumma. Wuṛṛu ta'u isumandinga ringannu paa'aukki Kristus wuṛṛu jamaatta. ³³Arawe tatialane udde pia sasampange lai ringanni amiu; Ṛinone suapan esakka mandangngu awingnge wawine ere lai itou mandangngu wadangnge sassane wuṛṛu ṛinone suapan wawine mangaddatta awingnge esakka.

Aḷaṛṛana'a wuṛṛu hagurangnga

6 Manga aḷaṛṛana'a! Maola'a mallalaṛṛenggeni Kristus, paatuṛṛuta hagurangngu ana waugu eteudde apan ṛinone olaannu. ²"Pangaddatta si papanu ruam mamanu" eteudde parenta Mawu Ruata paarorone ringannu paaire, ³eteudde: "Tadea'u i'o su aḷaḷuassa wuṛṛu uukku maḷo'engnga su runia indi."

⁴Manga tuṛṛangnga apan naola'a iamangnga! Imbaṛṛanga walate apulu ma'inolaanna aḷaṛṛanangngu, ma'oma n sara naunggi mangitou masa'u. Arawe padduljanete imangitou ringannu mapia wuṛṛu ringannu aḷaṛṛa'u Mawu.

Allangnga wuṛṛu mawune

⁵Manga tuṛṛangnga apan naola'a allangnga! Paatuṛṛuta parenta mawunu su runia indi. Olaawe udde ringannu apendamma maaddata wuṛṛu matuṛṛuta ringannu atonna-tonna naaḷihida ere a'olaanni amiu si Kristus sassane. ⁶Arie ma'ola'a aroddi tumba'u su tempo iamiu aellehanna, tumba'u ana see maasomba daralo wuassu taumata. Arawe ṛinone iamiu ma'ola'a udde ere sangkatou allanggi Kristus apan tantaḷanna tuttuṛṛuta apulu Mawu Ruata ringannu ahewallu naungnga. ⁷Manara apan a'ola'anni amiu ere sangkatou allangnga udde ṛinone iamiu mammanara ringannu naungnga maḷuassa su Mawu apan a'imbeanni amiu, wuṛṛu tawe tumba'u su taumata. ⁸Paanaunge manungku suapan taumata, mapia allangnga ara'e taumata tawe allangnga, sarun manengkamma wawaḷinne wuassu Mawu su inolaanna mapia apan niola'i tou.

⁹Manga turrangnga apan naola'a mawu! Rinone pallaḷagu ng kamiu aroddi lai su saruannu manga allangngu. Ariete mappaattu wawansaga. Paanaunge manungku iamiu wurru manga allangngu udde, uasulungnga pia sangkatou mawu, eteudde Mawu apan su surga. Itou tawe mamile hati.

Ahiddu Mawu apan nasuungnga

¹⁰Pangudusanne, rinone iamiu maola'a matohassa ringannu atatohassa apan niasombanganni amiu wuassu Mawu, ana waugu iamiu uaaukka ringanni Tou. ¹¹Paata'e aḷawo'u peddetu pangalo apan nionggolu Mawu Ruata si'o, tadea'u iamiu wotongnge mando'oppa apapande apan laḷeo wuassu Setanna. ¹²Ana waugu iite mammanara, waḷinewe lumawangnga atatohassu manga setanna apan uaparenta su tempo apan laḷeo indi. Iite lumawangnga atatohassu manga gharraho laḷeo apan uaparenta winalanganna. ¹³Ana waugu udde, orassa indi, luḷrea'e aḷawo'u paddetu pangalo Mawu Ruata, tadea'u su allo apan laḷeo udde, iamiu wotongnge lumawangnga laḷarragu seetta. Wurru tadea'u napawe iamiu mammangalo sara m pangudusanne, iamiu ta'e matohassa.

¹⁴Rinone iamiu mangke uatehamma. Paata'e tatuḷruta su Mawu Ruata maola'a aiitta lawassa, wurru atatuḷidda maola'a laungngu wuassu atta'a. ¹⁵Rinone iamiu sidutu mabatti'u Watti'u Aḷaḷuassa apan mangngapiddu paddarame maola'a aampakku leddanu. ¹⁶Suapan tempo paata'e pangangimannu su Mawu maola'a sambau ahidda laḷinduma; ringannu pangangimanna udde iamiu wotongnge maapaddumma anambo n anaanna pia putungnge wuassu setanna. ¹⁷Anute asalaḷamatta udde maola'a sambau araposa waja, wurru wisara Mawu Ruata maola'a sambau haḷele wuassu Gharraho Mawu Ruata. ¹⁸Ola'e sarangkanambone udde, lapiddu u'aḷiomanna madorongnga tuḷungannu Mawu Ruata. Su aḷo'engngu tempo, aḷiomante su ereapa Gharraho Mawu Ruata ua'ehetta siamiu. Rinone iamiu sidutu uatehamma wurru arie iamiu mangilloḷo. Aḷiomante sidutu huna n anambo n aḷarḷana'u Mawu Ruata. ¹⁹Wurru aḷiomante lai huna ng kamiu, tadea'u su tempo ia'u mabbisara, Mawu Ruata mangonggola sia'u manga wisara apan narḷrino. Wurru tadea'u ia'u ringannu warḷrani wotongnge mabatti'u addappingu Watti'u Aḷaḷuassa udde. ²⁰Ana waugu ete Watti'u Aḷaḷuassa udde, ia'u naola'a sangkatou daroloḷrana, wurru orassa indi sulaḷummu tuttupanna. Aḷiomante tadea'u ia'u warḷrani mabbisara su ola'u Watti'u Aḷaḷuassa udde, su ereapa ia'u rinone mabbisara.

Tabea pangudusanne

²¹Tikhikus, turangi ite wuꞑꞑu mangangimbe apan matuꞑꞑutta su-
laꞑummu manara Mawu, sarun mamasingkata siamiu aꞑawo'u ino-
laangku, tadea'u iamiu masingkattu ola'u watanganku wuꞑꞑu manara'u.
²²Ana waugu udde ia'u nandolokki tou ringanni amiu mamasingkatu
ola'i ami siamiu sarangkanambone, tadea'u naungngu maꞑuassa.

²³Saꞑandeanna su Mawu Ruata Iamangnga, wuꞑꞑu Mawu Yesus
Kristus mamala n anambo n jamaatta uaukka wuꞑꞑu uararangngu wuꞑꞑu
sidutu mangngimanna si Kristus. ²⁴Saꞑandeanna Mawu Ruata sarun
mangaꞑamatta siamiu sarangkanambone apan mandangngu Mawu ng
kite Yesus Kristus ringannu darangngu apan tawe masue.

Tabea ng kami,
Paulus

SURATTI PAULUS SU JAMAATTU FILIPI

WISARA TAŁAANE

Jamaatta su Filipi eteudde jamaatta paarorone apan niapararisikki Paulus su Eropa. Filipi addone su wagengngu Makedonia, sambau provinsi n araratuannu Roma. *Suratti Paulus Su Jamaattu Filipi* indi niwořřeta su tempo Paulus sulałummu tuttupanna. Naungnge su tempo udde sussingawangnga ana waugu pia mamamanara n Sařřani apan mannałare sitou. Wuřřu lai ana waugu sulałummu jamaattu Filipi udde pia manga taumata apan mangngařřa'u manga ałařřa'a mangngałiwu. Salaiwe aroddi suratti Paulus indi tingikke maałuassa wuřřu napene n m pangangantima. Anio aroddi? Tawe baine tumba'u ana waugu Paulus lembon mangngimanna si Kristus.

Paulus namořřetu suratta indi ana waugu paarorone itou maadiangkamanna su jamaattu Filipi wuassu aonggola apan suete nisengkamma wuassi mangitou su tempo itou sulałummu asasusa. Wuřřu sulałummu suratta udde lai itou mangngonggolu sasasa simangitou, tadea'u imangitou wařřani wuřřu matammuda sumaruanna asasusa. Itou napaanaungnga simangitou, tadea'u imangitou masarřionto'a ere Mawu Yesus, wuřřu tawe paparentannu apendamma mawunga wuřřu mařřingiddu ririne sassane. Itou napaanaungnga simangitou manungku tumba'u ana waugu ałamattu Mawu Ruata sassane, Mawu Ruata na'ola'a simangitou uaukka ringanni Kristus ana waugu pangangimanni mangitou Sitou, wałine ana waugu imangitou matuřřuta mappaamattu manga atorannu agama apan suete nitantuna sulałummu tita n agama Yahudi. Manansuna Paulus namořřeta lai su ola'u ałaluassa wuřřu paddarame apan nionggolu Mawu Ruata su manga taumata apan mabbiakka uaukka ringanni Kristus.

Tatjala n suratta indi eteudde wisarane su ola'u ałaluassa, atatohassu naungnga, paa'aukka wuřřu asasabare n taumata n Sařřani sulałummu ipanna'innu pangangimanne si Kristus wuřřu sulałummu mabbiakka ere sangkatou taumata n Sařřani. Suratta indi mapaałiatta'a lai manungku aroddi arangngune Paulus su jamaattu Filipi udde.

Laloŕrone

Panattaŕranne	1:1-11
Ola'i Paulus sassane	1:12-26
Pabbawiakku taumata n Saŕrani	1:27-2:18
Ira-ira si Timotius wuŕru Epafroditus	2:19-30
Pananaungnga su manga seetta wuassu liudde wuŕru wuassu laŕumme	3:1-4:9
Paulus wuŕru manga hawene su Filipi	4:10-20
Panginsueanne	4:21-23

1 Manga tuṙrangnga aḷarṙana'u Mawu Ruata sarangkanambone apan uatana'a su Filipi, wuṙṙu apan uaaukke ringanni Kristus Yesus. Wuṙṙu manga tuṙrangnga piaṙrangnge see lai matatuḷungngu jamaatta!

Ia'u, Paulus, suadio'a ringanni Timotius, manga allangngi Kristus Yesus, **2**mangantimma doronganna Mawu Ruata Iamangngi ite wuṙṙu Mawu Yesus Kristus mangonggolu aḷamatta wuṙṙu paddarame siamiu.



Soa Filipi (1:1)

Aḷiomanni Paulus su jamaatta

3Suapawe ia'u maanaungnga siamiu, ia'u maadiangkamanna su Mawu Ruata. **4**Wuṙṙu suapan ia'u umaḷiomanni amiu sarangkanambone, ia'u u'aḷiomanna ringannu naungnga maḷuassa. **5**Ia'u maadiangkamanna su Mawu Ruata ana waugu ro'e n paarorone na'oma n sara orassa indi, iamiu suete nallaḷima sia'u mamasingkatu Watti'u Aḷaḷuassa wu-assu Mawu Ruata. **6**Mawu Ruata sassane apan nianattakku manara apan mapia udde siamiu, wuṙṙu ia'u mangantimma Itou sarun manassu manara udde ma'oma n sara masue su allo Kristus Yesus rumanta apia. **7**Atonna su tampane ia'u pia apendamma ereudde su saruanni amiu, ana waugu iamiu sarangkanambone sidutu marani su naungku. Ana waugu iamiu lai suadio'a ringanku, nanengkamma aḷamatta apan nionggolu Mawu Ruata sia'u: mapia orassa indi tantaḷanna ia'u sulaḷummu tut-tupanna ara'e lai su tempo ia'u su liudde ana waugu mangngesakku Watti'u Aḷaḷuassa udde. **8**Mawu Ruata masingkatta manungku ia'u atonna-tonna luṙṙintulu ng kamiu ringannu apendamu darangngu wuassi Kristus Yesus sassane.

9Ete indi aḷiomangku siamiu: doronganna iamiu lembon mandangu Mawu Ruata wuṙṙu sansuḷungngu taumata wuṙṙu sidutu aatambanna sulaḷummu asingkatta apan ṙinone wuṙṙu ṙingiranna apan pande. **10**Ringannu aroddi iamiu masingkatta mamile apa apan apianne, wuṙṙu

wiakku na'ukkassa wuassu angngo ara'e aławo'u aansilla su allo Kristus rumanta apia. ¹¹Wiakku sarun lumambalanna ringannu pallaḷagu apan atonna-tonna mapia apan darantane tumba'u wuassi Yesus Kristus sassane; ne Mawu Ruata sarun wantuhanna wuḷḷu raloanna.

Mabbiakka huna ng Kristus

¹²Ia'u maapulu iamiu maasingkata, manungku' manga inolaanna apan suete nariaddi sia'u, ewe'e naaola'a manambo taumata madaringikka wuḷḷu mangngimanna Watti'u Aḷaḷuassa udde. ¹³Pangilluḷeanne, anambo n mandariaga waḷe n araratuanna wuḷḷu manga taumata su soa indi masingkata manungku ia'u niḷḷuumanna ana waugu ia'u mabbatti'i Kristus. ¹⁴Wuḷḷu ia'u niḷḷuumanna indi naatamba manga taumata n Sarḷrani su soa indi lembon mangngimanna lai Mawu, na'oma n sara imangitou lembon warḷrani lai mamasingkatu tanata Mawu Ruata ringannu tawe matta'utta.

¹⁵Atonna pia sire pira wuassu wallatti mangitou apan mabbatti'i Kristus ana waugu naungge laḷeo wuḷḷu maapulu mattatiakka, arawe waine mabbatti'i Kristus ana waugu pia pandumma apan mapia. ¹⁶Manga taumata indi na'ola'a aroddi ana waugu imangitou mandangu Mawu Ruata wuḷḷu sia'u, ana waugu imangitou masingkata manungku Mawu Ruata suete napamanara'u mapaaḷiatta'a manungku Watti'u Aḷaḷuassa udde atonna. ¹⁷Arawe taumata waine mabatti'i Kristus ringannu pandumma laḷeo; imangitou mabatti'a hunane su wadangi mangitou sassane. Ringannu udde imangitou mangngantima wotongnge mapaaḷu su laḷummu ḷuumanna.

¹⁸Arawe tawe apane! Ana waugu salaiwe ereapa, mapia udde a'olaanna ringannu pandumma apan mapia ara'e ringannu pandumma apan nassaḷa, ne Kristus mangke iwabbatti'a lai; nariaddi ia'u lulluassa. Wuḷḷu ia'u sidutu uapendamma aroddi, ¹⁹ana waugu ia'u masingkata manungku ringannu manga aḷiomannu udde wuḷḷu ringannu samsbala Ghaḷḷaho n Yesus Kristus, ia'u sarun ipallosa. ²⁰Lembon ipaapulu'u wuḷḷu aantimanna eteudde tadea'u imbarḷrangnga ia'u tawe maa'sue manara'u. Arawe ia'u mangantimma tadea'u suapan tempo, nangillemba orassa indi, ia'u wotongnge maola'a warḷrani ma'oma n sara ringannu ahewallu apulun waddangku - mapia ia'u wiakka ara'e ia'u nate - Kristus mangke wabantuhanna. ²¹Ana waugu matataḷḷino sia'u, tudda n wia'u tumba'u si Kristus Wuḷḷu mate udde auntunganna. ²²Arawe amungkangu ringannu mabbiakka su runia indi, ia'u wotongnge ma'ola'a manara lembon pia gunane, ne ia'u wagga suapa apan sarun ta'u pileanna. ²³Ia'u wabollenganna wuassu rua m ba'a. Ia'u maa-

pulu atonna manantangnu runia indi see inai matana'a ringanni Kristus, ana waugu eteudde lembon apianne; ²⁴arawe ana waugu hunane su wadangu udde, mappianne amungkangu ia'u sidutu uatana'a su runia. ²⁵Ia'u mangngimanna su olangnge udde. Ana waugu udde ia'u masingkata, ia'u sidutu uatana'a ringanni amiu sarangkanambone, tadea'u wotongnge mantulunggi amiu maola'a lembon matohassa wurru lembon maluassa sulalummu pangangimanna su Mawu. ²⁶Ana waugu udde, amungkangu ia'u mabelengnga apia ringanni amiu, iamiu apan suete naaukka ringanni Kristus Yesus sarun maatahuanna lembon manambo lai pangiananne su ipalluassu riri'u.

²⁷Ne, apianne orassa indi eteudde manungku iamiu mabbiakka mapia ere su ipaapulu m Watti'u Alaluassa su ola'i Kristus udde. Ringannu aroddi tanne ia'u wotongnge mappassomba ng kamiu ara'e tate, ia'u sarun maaringikka manungku iamiu sidutu uaukka wurru mammanara suadio'a tumba'u sambau pandumma wurru sambau apulu; eteudde huna m pangangimanna apan uasulunggu Watti'u Alaluassa wuassu Mawu Ruata udde. ²⁸Rinone iamiu sidutu warrani; arie matta'uttu manga seennu. Ringannu aroddi iamiu mapaaljatta'a manungku imangitou sarun marugi, wurru iamiu sarun maauntunga, ana waugu Mawu Ruata sassane apan mangonggolu auntunganna siamiu. ²⁹Ana waugu Mawu Ruata suete nangonggolu alamatta siamiu, waline tumba'u ipangimanna si Kristus, arawe lai matatarangnga asasusa ana waugu Kristus. ³⁰Orassa indi iamiu suadio'a ringanku sulalummu manara apan uasulungnga; eteudde apan suete niasiloanni amiu, mammanaranku rorone, wurru apan ta'e mammanaranku sara orassa indi, ere lai suete niaringirani amiu su orassa indi.

Asasarjionto'a wurru awawantugi Kristus

2 Iamiu matohassa, ana waugu iamiu uaukka ringanni Kristus. Wurru iamiu nialiwurrana ana waugu Kristus mandanggu siamiu! Iamiu aebetannu Gharraho Mawu Ruata, wurru iamiu lai uararanggu wurru uasasumbala sangkatou ringannu waine. ²Ne, annama'a iamiu atonna-tonna mapaalwassu naungku ringannu manga inolaanna indi: Pabbiakke ringannu naungnga sambau, ringannu daranggu apan uasulungnga, ringannu ringiranna apan uasulungnga wurru tudda apan uasulungnga. ³Arie ma'ola'a sambau inolaanna hunane su watangannu sassane, ara'e ipamarabunga. Arawe rinone iamiu sangkatou-sangkatou ringannu masarjionto'a ma'ellega taumata waine mappianne wuassu watangannu sassane. ⁴Paaellehe aurangannu taumata waine; arie tumba'u au-

rangannu watangannu sassane. ⁵Rinone iamiu pia apendamma ere Yesus Kristus:

⁶Su pinangiananne Itou nassulunggu Mawu Ruata,
arawe Itou tawe mamendamma manungku
olang-Nge ere Mawu udde řinone
matatana'a aroddi Sitou.

⁷Arawe, Itou namallosu sarangkanambone
see naola'a ere sangkatou allangnga.

Itou naola'a ere taumata,
wurrũ aasiloanna mabbiakka ere taumata.

⁸Itou napaawawo n watangan-Ne, wurrũ mabbiakka
ringannu maturrũta su Mawu Ruata na'oma
n sara nate -

eteudde nate niarussa.

⁹Ana waugu udde Mawu Ruata namengketa Sitou,
su atanggaranne see nangonggolu tarřino Sitou
apan ahewalanne wuassu alawo'u tarřino apan waine.

¹⁰Ne, tadea'u ipangadatta Mawu Yesus,

anambo n riadianna su surga,

wurrũ su runia,

see lai su alunggu runia

sarun massubba Sitou.

¹¹Imangitou sarangkanambone sarun manga'u manungku ete Yesus

Kristus udde Mawu;

ringannu aroddi Mawu Ruata Iamangnga wantuhanna.

Lullansiangnga ere semakka apan mannemakka runia

¹²Ana waugu udde, manga turřangnga apan arangnguanna, su ereapa iamiu sidutu maturrũta sia'u su tempo ia'u uatana'a su pattangnganni amiu, ne nangillemba orassa indi su tempo iite mararaute, řinone iamiu sidutu tuturrũta sia'u. Iamiu suete nisařamattu Mawu Ruata, nariaddi sidutu pammanarate tadea'u paddaramenu maola'a masuungnga. Ola'e udde ringannu addata wurrũ taturrũta su Mawu Ruata, ¹³ana waugu Mawu Ruata sassane apan mammanara sulařummu ririnu ipa'ola'a siamiu mawala wurrũ wotongnge maaluassa naunggu Mawu Ruata.

¹⁴Manarate alawo'u manara ringannu tawe sumungkuta ara'e matatiakka. ¹⁵⁻¹⁶Ringannu aroddi iamiu mapaalřatta'a manungku ete-udde iamiu alarřana'u Mawu Ruata apan tawe angngone, mabbiakka

ringannu matulida wuṛṛu narṛino su pattangnanu taumata laḷeo wuṛṛu marosa. Wuṛṛu su tempo iamiu namasingkata simangitou watti'a apan mangngongolu wiakka, ṛinone iamiu maola'a ere semakka apan lullansiangnga mannemakka runia. Amungkangu iamiu mabbiakka ere-udde, ne ia'u pia pangiananne maapendamma aḷaḷuassa su ola'i amiu su tempo Mawu Yesus rumanta apia. Udde maola'a tatialane manungku manara'u pia gunane wuṛṛu pia gessine.

¹⁷Asinungka ia'u sarun pateanna wuṛṛu ṛarṛa'u maola'a ere sambau sasamba manampaliu wuassu sasamba ng kamiu su Mawu Ruata maola'a sambau tatiala manungku iamiu mangngimanna Sitou. Amungkangu udde atonna ṛinone maola'a aroddi, ia'u maadiangkamanna su olangnge udde wuṛṛu lulluassa suadio'a ringanni amiu. ¹⁸Aroddi lai ṛinone iamiu mammendama aḷaḷuassa wuṛṛu lullala'a suadio'a ringanku.

Timotius wuṛṛu Epafroditus

¹⁹Ia'u mangngimanna manungku ringannu tulungannu Mawu Yesus, ia'u ringannu maḷihakka nandolokki Timotius ringanni amiu, tadea'u ia'u maasomba aḷaḷuassu naungku su ola'u watti'i amiu. ²⁰Tumba'u Timotius sassane taumata apan ṛingiranne nassulungku, wuṛṛu atonna-tonna maṛringiddu laḷumanna'i amiu. ²¹Sarangkanambone apan waine tumba'u maṛringiddu watanganne sassane, waḷine huna n Yesus Kristus. ²²Iamiu sassane naasilote tialane manungku Timotius pia gunane. Itou suete nammanara maṛrimadda ringanku mabatti'u Watti'u Aḷaḷuassa wuassu Mawu Ruata. Iambua naaḷihida ana'a wuṛṛu iamangnga. ²³Ana waugu udde, napawe ia'u naasingkata manungku su ereapa hatto'u udde nasuete, ia'u sarun mandolokki tou ringanni amiu. ²⁴Ia'u mangngimanna manungku ringannu tulungannu Mawu, ia'u sassane lai tawe maḷannu sarun mattembo siamiu.

²⁵Su ola'u tuffangi ite Epafroditus apan nirolokki amiu malalaḷima sia'u, ia'u mammendama mappianne itou irolokka iapaawelengnga ringanni amiu apia. Itou suete nallaḷima sia'u sulaḷummu manara'u. ²⁶Itou maapulu atonna maisasomba ng kamiu sarangkanambone, wuṛṛu itou u'ambulisadda ana waugu iamiu suete naaringikka watti'a manungku itou marada'a. ²⁷Atonna itou marada'a na'oma n sara maranite n mate. Arawe Mawu Ruata niuukkani tou; wuṛṛu waḷine tumba'u sitou sassane, arawe sia'u lai, tadea'u ia'u tawe lembon masusa apia. ²⁸Ana waugu udde maggewaḷanna apulu'u mandolokki tou mabelengnga apia ringanni amiu, tadea'u iamiu lumuassa apia amungkangu massombate apia ringanni tou, wuṛṛu naungku lai mabbali ma-

tammuda. ²⁹Nariaddi, saļohoite itou ringannu ahewallu aļaļuassu naungnga ere sangkatou turřanga sulaļummu pangangimanna sambau. Addate anambo n taumata ere itou. ³⁰Su huna n manara ng Kristus, itou ete adio'a mate; itou nanantillu niawane ipantuļungku sulaļummu arannu.

Atatuļidda apan tutune

3 Panginsueanne, manga turřangu, řinone iamiu lumuassa ana waugu iamiu suete naaukka ringannu Mawu. Ia'u tawe maapendamma masahadda manuļe apia apa apan suete niworřeta siamiu paarorone; ana waugu olangnge udde mapia su asasaļamannu. ²Paatehamma su saruannu manga taumata apan ma'ola'a inolaanna laļeo, manga taumata apan wotongnge isago 'asu'. Imangitou mammata'a tadea'u manga taumata udde iapa sunatta. ³Sumbaļi ete iite manga taumata apan suete nanarimmattu sunatta apan tutune, waļinewe imangitou. Iite massubba Mawu Ruata ringannu aehettu Gharraho Mawu Ruata sassane, wuřru iite maadiangkamanna ana waugu iite mabbiakka su sambau ringanni Kristus Yesus. Iite tawe uatundeeta su manga inolaanna apan a'olaannu taumata. ⁴Su řinone ia'u wotongnge tumundeeta su manga inolaannu taumata udde. Ana waugu amungkangu pia sangkatou apan uapendamma itou pia pangianannu antimma su inolaannu taumata su runia indi, ia'u nangillembu lai. ⁵Ia'u nissunatta su tempo uukka uaļu allo. Ia'u niasungkanga ere sangkatou Israel, wuassu pabbawalagi Benyamin; ia'u taumata n Ibrani tutune. Sulaļummu taturřuta su manga tita n agama n Yahudi, ia'u nasutta su reengannu taumata n Farisi. ⁶Ia'u lembon mammanara mařřimada na'oma n sara ia'u mammate'jamaatta. Amungkangu ellehanna wuassu tita n agama n Yahudi, ia'u sangkatou taumata mapia apan tawe saļane. ⁷Arawe ana waugu Kristus, ne sarangkanambone apan dorone sassunnangu sambau auntunganna, orassa indi naola'a sambau apan maarugi. ⁸Waļine tumba'u manga inolaanna udde; arawe lai aļawo'u inolaanna apan sassunnangu ere manga inolaanna tumba'u maarugi. Apan tatahuanangu orassa udde lembon maareganne; eteudde maailaļa si Kristus Yesus Mawu'u. Ana waugu Kristus, ne ia'u suete namallosu manga aļawo'a. Aellehangku sarangkanambone udde ere sapadda, tadea'u ia'u wotongnge maasomba si Kristus, ⁹wuřru atonna-tonna uaukka ringanni Tou. Pasasambau apan mapia ringannu Mawu Ruata tate ta'u manaranna sassane, ringannu tuttuřuta tita n agama. Orassa indi ia'u pia paa'aukka apan mapia ringannu Mawu Ruata, ana waugu ia'u mangngimanna si Kristus. Nariaddi, paa'aukka apan mapia udde darantane wuassu Mawu Ruata, wuřru pinangianne ana waugu mangngimanna si Yesus Kristus. ¹⁰Tumba'u sambau

apan ipaapulu'u eteudde tadea'u ia'u maaillaḷa si Kristus, wuḷḷu maapendamma tarḷḷino apan napaawiakki Tou wuassu papate. Ia'u maapulu matatarḷḷanga suadio'a ringanni Tou wuḷḷu maola'a uasuḷungnga ere Itou su ola'u papate-Ne. ¹¹ Wuḷḷu ia'u mangantimma manungku ia'u sassane sarun iapaawiakka apia wuassu papate.

Tumaḷangnga maddumatingngu pattudanna

¹² Ia'u tawe mabbisara manungku ia'u naasombate auntunganna, ara'e nasuungke. Arawe ia'u sidutu maddea'a maapangaḷḷo aonggola apan suete nissaddia n Kristus Yesus. Ana waugu udde Itou suete nangarḷḷo sia'u, wuḷḷu niola'a pussa'a-Ne. ¹³ Natantuna, manga turḷḷangnga, atonna ia'u tawe naapendamma manungku ia'u suete naapangaḷḷo aonggola udde. Arawe pia sambau apan ta'u olaanna, eteudde timbuḷianante apa apan su liu'u wuḷḷu mangke mattinsahadde tadea'u maasomba apa su saruanguku. ¹⁴ Ana waugu udde ia'u sidutu tuttaḷangnga mattuda n tampa pangudusanne ana see maasomba auntunganna, eteudde mabbiakka su surga; ana waugu udde Mawu Ruata namago siite sulaluḷummi Kristus Yesus.

¹⁵ Iite sarangkanambone apan timmaddete su pangangimanna, ḷḷinone mabbiakka aroddi. Arawe amungkangu su wallatti amiu pia ḷḷingiranna waine, ne Mawu Ruata sarun manala'a lai siamiu. ¹⁶ Arawe olangnge udde ḷḷinone inunuannu: Iite ḷḷinone uatana'a mabbiakka tumuḷḷutta atoranna apan suete niola'i ite na'oma n sara orassa indi.

¹⁷ Manga turḷḷangnga sarangkanambone! Pattannote tuḷada'u. Iami suete nangonggolu tuḷada apan narḷḷino, ana waugu udde paatutuḷḷe paapia-pia manga taumata apan mattanno tuḷada ng kami udde. ¹⁸ Ia'u masokkate mamasingkata siamiu, wuḷḷu orassa iridi ta'u isuḷe apia ringannu lulluai, manungku pia manambo taumata apan mabbiakka mangngaḷiwu n atappasannu papate n Kristus su alu arussa. ¹⁹ Wiakku manga taumata ereudde panginsueanne papate, ana waugu mawu mangitou eteudde apulu m wadangngi mangitou sassane. Manga inolaanna apan maasili, eteudde ipammunga mangitou; ana waugu imangitou tumba'u marḷḷingiddu manga inolaanna apan ipaapulu n runia indi. ²⁰ Arawe ete iite tumana'u araratuannu surga. Ete wua isudde Ratu m Punnu Saḷamatti ite, Mawu Yesus Kristus, sarun rumanta. Ete Itou apan mangke rarḷadoanni ite. ²¹ Wadangngi ite apan lome wuḷḷu wotongnge marḷḷenessa indi, sarun waḷuanni Kristus maola'a ere wadang-Nge sassane apan mawantuga. Itou wotongnge ma'ola'a udde ana waugu Itou uatahuanna tarḷḷino mapassuḷḷubawa n sarangkanambone.

Manga tatantiro

4 Ana waugu udde, manga tuṛrangku apan arangnguanna, arod-dite ṛinone iamiu mabbiakka ringannu atonna-tonna mangngimanna Mawu. Naungku maapulu maisasomba ng kamiu! Ete iamiu ipaapulu'u apan maaluassa naungku.

²Tuṛrangku wawine Euodia wuṛru tuṛrangku Sintike! Ia'u madorongnga suapan wotongnge iradua naungnge sambau ere manga taumata apan pangangimanne lai sambau. ³Su hawe'u apan matuṛruta, ia'u madorongnga lai tadea'u tuṛranga massumbala wawine darua udde. Imangitou suete nammanara maṛṛimadda ringanku mabatti'u Watti'u Aḷaḷuassa wuassu Mawu Ruata; ere lai Klemen wuṛru anambo n taumata waine apan mammanara suadio'a ringanku. Manga aranni mangitou uawoṛretta sulaḷummu Wuke n Taumata Wiakka.

⁴Antimanna iamiu sidutu lulluassa ana waugu iamiu suete nabbiakka su sambau ringannu Mawu. Paassa lai ia'u mabbisara: lulluasse!

⁵Ṛinone anambo n taumata wotongnge maasilo pallaḷagu naunggu apan mapia. Ana waugu tate maḷannu lai Mawu sarun rumanta. ⁶Arie paasinggawanga su ola'u manga apa. Sulaḷummu aḷawo'u inolaanna, aḷiomante wuṛru padorongke su Mawu Ruata. Apa apan ipaapulu ng kamiu, waḷoa'e udde sidutu su Mawu Ruata ringannu wisara aadiangkamanna. ⁷Ne paddarame wuassu Mawu Ruata apan tawe asunnannu taumata, sarun mallu'adda naunggu wuṛru ṛingirṛannu apan suete naaukka ringanni Kristus.Yesus.

⁸Panginsueanne, manga tuṛrangnga, loṛroite ṛingirṛannu ringannu inolaanna apan mapia, apan wotongnge raloanna, eteudde inolaanna apan naṛrino, maaddata, apan matuḷida, waresi, masarṛionto'a, wuṛru mapia. ⁹Ola'e apa apan a'urumanna wuṛru asengkamani ami u wuassia'u: mapia wuassu manga wisara ara'e lai wuassu manga inolaanku. Mawu Ruata punnu paddarame, sarun mangalaḷamatta siamiu.

Wisara aadiangkamanna

¹⁰Sulaḷummu wia'u apan uaukka ringannu Mawu, ia'u naapendamman laḷumanna'a wahewa, ana waugu aroddite aḷannune, orassa indi iamiu pia tempone lai maṛṛingiddu wadanku. Pandumanku waḷinewe manungku iamiu naabuḷi'ute; atonna iamiu uanaungnga sia'u, arawe iamiu tawe maasomba tempone maḷapaḷiatta'u aakkanne. ¹¹Ia'u nama-singkatu indi waḷinewe ana waugu ia'u awussa, ana waugu ia'u suete nangurumma aḷaṛṛa'a mammendamman nasuungnga ringannu apa apan

piate. ¹²Ia'u suete namendamma mabbiakka asiangnga, wuꞑꞑu ma-bbiakka su asasuungnga. Ia'u naaillaꞑate addapingnge, ereapa sumaruana olange apan aroddi araꞑeone; mapia su tempo maꞑuassa ara'e lai su tempo susa, mapia su tempo ala ara'e lai su tempo asiangnga. ¹³Ringannu taꞑꞑino apan nionggoli Kristus sia'u, ia'u pia atatohassa sumaruanna aꞑawo'u asasusa sarangkanambone.

¹⁴Arawe iamiu suete nantuꞑungku sulaꞑummu asasusa'u; wuꞑꞑu apa apan niola'i amiu udde atonna wuꞑꞑu mapia. ¹⁵Manga tuꞑꞑangnga tau-mata n Filipi! Iamiu sassane masingkata atonna manungku su tempo ia'u nanantangngu Makedonia rorone, su tempo Watti'u Aꞑaꞑuassa udde niapasingkata paarorone, ete iamiu sambau jamaatta apan nallaꞑima sia'u; iamiu apan namendamma auntunganna wuꞑꞑu araruggi su sambau ringangku. ¹⁶Su tempo ia'u su Tesalonika wuꞑꞑu mappandumma sasumbala, nilumebete wuassu paassa iamiu nandoho n sasumbala sia'u. ¹⁷Udde waꞑine ia'u tumba'u maapulu manengkamma aonggola. Apa apan ipaapulu'u eteudde, tadea'u ia'u wotongnge maasilo manga pabbawua n manaranu apan maatamba auntungannu. ¹⁸Ia'u suete nanengkamma sarangkanambone - ewe'e nilumebete lai! Anambo n aonggola apan niroho ng kamiu sia'u, suete nitarimmata wuassi Epafroditus. Orassa indi ia'u uatahuanna anambo n apa apan pappandumangku. Manga aonggola wuassi amiu eteudde maola'a sambau sasamba haꞑurune mawangngi apan nionggole su Mawu Ruata wuꞑꞑu nisengkammu Mawu Ruata ringannu naungnga maꞑuassa. ¹⁹Mawu Ruata apan sassubbangku, apan napene m paa'ala sulaꞑummi Kristus Yesus, sarun manuungngu hausannu. ²⁰Dalo su Mawu Ruata lamangngi ite saran maꞑannu-ꞑannu! Amin.

Tabea panginsueanne

²¹Waꞑoa'a tabea'u su anambo n aꞑaꞑꞑana'u Mawu Ruata apan ua'aukka ringanni Kristus Yesus. Wuꞑꞑu sengkamma lai tabea wuassu manga tuꞑꞑanga apan suadio'a ringangku isindi. ²²Anambo n pabbawalagu Mawu Ruata su soa indi, nengilembote imangitou apan wuassu waꞑe n araratuanni Kaisar, nandoho n tabea siamiu.

²³Doronganna Mawu Yesus Kristus mangalaꞑamatta tuꞑꞑanga sarangkanambone.

Tabea ng kami,
Paulus wuꞑꞑu Timotius

SURATTI PAULUS SU JAMAATTU KOLOSE

WISARA TAŁAANE

Kolose eteudde sambau soa su leta'u Asia adio'a, su samba'a n Ra'i soa Efesus. Wałine Paulus apan napararisikku jamaatta su Kolose indi, arawe su tempo itou nandolokku manga mamamanara wuassu Efesus, soa wahewa su propinsi Roma su leta'u Asia adio'a, itou lai uapendama manungku itou lai ualu'adda jamaatta su Kolose udde. Paulus naaringikke watti'a manungku sulałummu jamaatta udde pia manga huru mangngarra'u manga ałarra'a nassała. Manga huru udde mangke mangngarra'a manungku tadea'u maailała Mawu Ruata wuřru maasomba asasałamatta ringannu nasuungnga, taumata řinone massubba "manga gharraho apan uatarřino wuřru uaparenta ułili m pati'uppa". Wua udde lai, unnu manga huru udde, taumata řinone matuřrutta lai mappattu manga atorannu sunatta, wuřru mappalli wuřru manga waine lai.

Suratti Paulus Su Jamaattu Kolose indi niwořřeta ipammasingkattu ałarra'u Sařrani apan narřino wuřru manningadu ałarra'a nassała apan iaarra'u manga huru awusu udde. Punnu suratta indi namasingkata manungku Yesus Kristus wotongnge mangonggolu Asasałamatta apan nasuungnga wuřru manungku manga ałarra'a waine udde tumba'u mappaarau n taumata wuassi Kristus. Sulałummi Kristus, Mawu Ruata suete nandiaddi runia indi, wuřru wuassi Kristus lai, Mawu Ruata nanałamatta. Tumba'u wuassu lałummu paa'aukka ringanni Kristus, runia pia antimma maasomba asasałamatta. Nanansuna Paulus nanała'a m paa'aukku ałarra'a mawantuga udde ringannu pabbawiakku taumata n Sařrani.

Řinone iapaasingkatta isindi manungku Tikhikus – apan uaapiddu suratta indi watukku Kolose si Paulus – daringananni Onesimus, allangnga apan nirolokki Paulus ana waugu iapaawelengnga ringannu mawune, eteudde Filemon, sangkatou lałorřo n jamaatta su Kolose.

Laloꝛꝛone

Paarorone	1:1-8
Pallaꝛagu wuꝛꝛu manara n Kristus	1:9-2:19
Wiakka wakku apan niapendamaniu manga taumata n Saꝛꝛani	2:20-4:6
Panginsueanne	4:7-18

1 ¹⁻²Manga tur̄rangnga aḷaḷḷana'u Mawu Ruata su Kolose apan tuttuḷḷruta uaaukka ringanni Kristus!

Ere sangkatou rasulli Kristus Yesus, – apan niteneḡu Mawu Ruata – ia'u, Paulus, su sambau ringannu tur̄rangḡi ite Timotius, mangantimma doronganna Mawu Ruata Iamangḡi ite mangonggolu aḷamatta wuḷḷu paddarame siamiu.

Aaḷiomannu aadiangkamanna

³⁻⁴Iamiu suete naaringikka manungku iamiu mangngimanna Mawu Yesus Kristus wuḷḷu iamiu marangḡu anambo n aḷaḷḷana'u Mawu Ruata. Ana waugu udde su tempo iami u'aḷiomanni amiu, iami sidutu maadiangkamanna su Mawu Ruata, Iamangḡu Mawu ng kite Yesus Kristus. ⁵Iamiu mangngimanna wuḷḷu iamiu marangḡu, ana waugu mangngantimma apa apan suete nissaddia Mawu Ruata su surga huna ng kamiu. Iamiu suete naaringikka su olangḡe udde, su tempo Watti'u Aḷaḷuassa udde niapaasingkata siamiu. ⁶Watti'a wuassu Mawu Ruata udde nassaḷiawukke su ahewallu runia, wuḷḷu wiakku taumata sidutu aaḷamatannu watti'a udde, ere lai wiakku niaḷamatanna ro'e n su tempo iamiu naaringikka ola'u darangḡu Mawu Ruata wuḷḷu atonna-tonna nusippa sulaḷummu naungḡu. ⁷Olangḡe udde niapaasingkati Epafras siamiu, hawe apan arangḡuanni ami. Itou udde allangḡi Kristus apan matuḷḷruta mammanara huna ng kite. ⁸Ete wuassi tou iami naaringikka manungku ringannu taḷḷino wuassu Ghaḷḷaho Mawu Ruata iamiu wotongḡe maddarangḡu.

⁹Ana waugu udde iami sidutu u'aḷiomanni amiu ro'e n iami naaringikka su ola'i amiu. Iami nadorongḡa su Mawu Ruata tadea'u Ghaḷḷaho Mawu Ruata mangonggolu apande wuḷḷu asingkata siamiu, na'oma n sara iamiu maasunna apa ipaapulu Mawu Ruata. ¹⁰Ringannu aroddi iamiu wotongḡe mabbiakka tuttuḷḷruta apulu Mawu Ruata, wuḷḷu sidutu malluassa naugḡe, na'oma n sara sulaḷummu aḷawo'u inolaanna iamiu wotongḡe mamasilo manga inolaanna apan mapia. Wuḷḷu asingkati amiu su ola'u Mawu Ruata sarun aatambanna lai. ¹¹Doronganna ringannu taḷḷino Mawu Ruata apan mawantuga, iamiu tohasanna ma'oma n sara iamiu wotongḡe matataḷḷranga ringannu sabare wuḷḷu naungḡa maḷuassa ¹²wuḷḷu ringannu wisara adiangkamanna su Iamangḡa. Ana waugu ete Iamangḡa udde apan nandiaddi siamiu wotongḡe manengkamma apa apan nissaddia Mawu Ruata su aḷaḷḷanang-Nge sulaḷummu araratuan-Ne apan masemakka. ¹³Itou suete namallosi ite wuassu taḷḷino n araranduma wuḷḷu nangingkati ite sulaḷummu aratuannu Anang-Nge apan arangḡuan-Ne. ¹⁴Wuassu Anang-Nge udde



Aaŋomanna (1:9)

iite suete nipallosa; atappasanne manga rosa ng kite suete niam-punganna.

Kristus wuŋŋu manara-Ne

¹⁵Eteudde Kristus hambaranna apan matualaga wuassu watangannu Mawu Ruata apan tawe asiloanna; eteudde Kristus Ana'a pahuŋune, apianne wuassu manga aŋawo'u inolaanna. ¹⁶Ana waugu ete sulaŋummi Tou Mawu Ruata nandiaddi aŋawo'u manga apa su surga wuŋŋu su wowo n runia, aŋawo'u apa apan aasiloanna wuŋŋu apa apan tawe asiloanna, nasutta lai alawo'u gharraho apan uatarŋino wuŋŋu uaparenta. Ahewallu runia indi niola'a sulaŋummi Kristus wuŋŋu hunane si Kristus. ¹⁷Tantaŋanna taambe nariaddi sarangkanambone, Kristus uddete dorone. Wuŋŋu ana waugu Itou lai, ne aŋawo'u inolaanna su tampanete sambau-sambau. ¹⁸Ete Itou tembonannu wuassu wadang-Nge, eteudde jamaatta, ana waugu ete Itou punnu pabbawiakku jamaatta udde. Ete Itou Ana'a pahuŋune, apan paarorone niapaawiakka apia wuassu papate, tadea'u Itou sassane apan maola'a apianne wuassu aŋawo'u riadianna. ¹⁹Mawu Ruata sassane mappandumma tadea'u alawo'u riadianna sulaŋummi wadangngu Mawu Ruata, aompaanna lai ringannu nasuungnga su wadangngu Anang-Nge. ²⁰Wuŋŋu sulaŋummi Anang-Nge udde lai Mawu Ruata naringida mandiaddi manga aŋawo'a maaukka apia

ringanni Tou – mapia udde su runia, ara'e lai su surga. Mawu Ruata nandiaddi udde wuassu papate n Anang-Nge su alu arussa.

²¹Dorone iamiu marau Mawu Ruata. Iamiu masseetti Tou ana waugu pallaḷagunu wuṛru ringirranu lajeo. ²²Arawe orassa indi, ringannu papate n Anang-Nge, Mawu Ruata na'ola'a paa'aukki amiu ringanni Tou maola'a mapia apia. Ringannu olangnge udde iamiu wotongnge iapidda sumaruanna Mawu Ruata sulaḷummu asasuungnga, atatuḷidda wuṛru tawe saḷane. ²³Arawe iamiu rinone sidutu matuṛṛuta mangngimanna wuṛru matohassa uarisikka su pangangimannu. Imbaṛṛanga iamiu mamallosu antimma apan suete nionggolla siamiu su tempo iamiu nanengkamma Watti'u Aḷaḷuassa wuassu Mawu Ruata. Watti'a udde suete niapaasingkata su anambo n taumata su ahewallu runia. Wuṛru ana waugu udde lai ia'u, Paulus, naola'e daroḷorran-Ne.

Pangangimbe m Paulus su jamaatta

²⁴Orassa indi ia'u maḷuassa matataṛṛanga huna ng kamiu. Ana waugu ringannu asasusa m wadanku, ia'u manuungngu apa apan ta'e rinone niapendamanni Kristus su jamaan-Ne, eteudde wadang-Nge. ²⁵Mawu Ruata nandolo'u maola'a mangangimbe jamaan-Ne huna ng kamiu. Ia'u rinone mapaasingkatu watti'a wuassu Mawu Ruata, sarangkanambone; ²⁶eteudde watti'a ro'e n aḷamonane apan sidutu iaadapingu Mawu Ruata su anambo n taumata, arawe orassa indi niapaaliatta'a su aḷarṛanang-Nge. ²⁷Su aḷarṛanang-Nge udde Mawu Ruata maapulu mapaliatta'a aroddi apiane wuṛru awantuge addapinge udde su anambo n pabbawalagu taumata. Addapinge eteudde: Kristus udde sulaḷummu wadangu, atappasanne iamiu lai sarun maapendamma awawantugu Mawu Ruata. ²⁸Eteudde Kristus apan iwabbatti'i ami su anambo n taumata. Iami mapaanaungnga wuṛru mangngarra'a simangitou sarangkanambone ringannu aḷawo'u apande. Tudde ng kami eteudde tadea'u suapan taumata wotongnge iapidda ringannu Mawu Ruata, ere sangkatou taumata apan nahurangke su pangangimanna, ana waugu suete naaukka ringanni Kristus. ²⁹Su ipadea'a olangnge udde ia'u mammanara ringannu maṛṛimadda. Ia'u mammanara ringannu ahewallu atatohassa apan nionggoli Kristus sia'u wuṛru apan mammanara sulaḷummu wadanku ringannu napene n taṛṛino.

2 Ia'u maapulu iamiu maasingkata ereapa ahewalle ia'u mammanara huna ng kamiu, wuṛru huna mangitou su Laodikia see anambo n taumata apan tawe maailala si'u sassane. ²Sarangkanambone indi ta'ulaanna tadea'u naungngi mangitou maola'a matohassa wuṛru imangitou

uuarangngu ma'oma n sara imangitou uasampinunutanna. Ringannu aroddi imangitou atonna-tonna maasunna wuɽɽu mangngimanna see lai maaillaɽa addapingu Mawu Ruata, eteudde Kristus sassane. ³Ete Kristus apan nani'attu aɽawo'u apande wuɽɽu asingkattu Mawu Ruata apan dorone uawuni.

⁴Ia'u namasingkatu indi tadea'u iamiu tawe uwahianni sai-sai apan pande mamaɽonotta siamiu. ⁵Ana waugu salaiwe ia'u uatana'a marau wuassi amiu, ere lai ia'u uatana'a su wallatti amiu. Wuɽɽu ia'u lulluassa maasilo siamiu uasampinunutanna wuɽɽu matohassa sulaɽummu pangangimanna si Kristus.

Pabbawiakka apan nasuungnga

⁶Manga tuɽrangnga suete nanengkamma si Kristus Yesus maola'a. Mawu. Ana waugu udde ɽinone iamiu mabbiakka su sambau ringanni Tou, ⁷wuɽɽu maɽramutta su laɽummi Tou. ɽinone iamiu mapararisikku wiakku ringanni Kristus maola'a rapappake. ɽinone iamiu lembon mangngimanna si Kristus, tuttuɽɽutta apa apan suete niarra'a siamiu. Wuɽɽu ɽinone naungngi amiu lulluassa ringannu wisara aadiangkamanna.

⁸ɽinone iamiu paatehamma, arie ma'oma n sara piaddu mamono'a siamiu ringannu manga aɽarra'u taumata apan tawe gunane, ewe'e tumba'u mangngaliwu. Manga aɽarra'a udde waɽine wuassi Kristus, ewe'e wuassu ɽingirannu taumata sassane wuɽɽu wuassu manga gharraho n tembonannu runia. ⁹Ana waugu ahewallu paa'apulu Mawu Ruata uatana'a sulaɽummi Kristus, eteudde su ola'u taumatane. ¹⁰Wuɽɽu ana waugu mabbiakka uaaukka ringanni Kristus, iamiu lai niongoɽannu wiakka apan nasuungnga. Ana waugu Kristus udde tembonannu aɽawo'u gharraho apan uataɽino wuɽɽu uaparenta.

¹¹Ana waugu uaaukka ringanni Kristus, iamiu suete nisunatta, waɽine ringannu sunatta apan niola'u taumata, ewe'e sunatta apan niola'i Kristus, apan namallosi amiu wuassu taɽɽino m pallalagu apan marosa. ¹²Ana waugu su tempo iamiu nissarraani, iamiu nilabinga su sambau ringanni Kristus; wuɽɽu ringannu sasarraani udde lai iamiu niapaawiakka apia su sambau ringanni Kristus ana waugu iamiu mangngimanna taɽɽino Mawu Ruata apan suete napaawiakki Kristus wuassu papate. ¹³Dorone, iamiu natete su pangangimanna ana waugu iamiu marosa, wuɽɽu ana waugu iamiu tawe nisunatta ere sangkatou taumata, Arawe orassa indi Mawu Ruata napaawiakki amiu su sambau ringanni Kristus. Mawu Ruata suete nangampungu alawo'u rosa ng kite, ¹⁴wuɽɽu tate nanusi surattu utangnga su saruanni ite, apan nangonggolu atoranna mawakkata siite. Ringannu nangarussa n suratta udde su alu arussa, Mawu Ruata

namappasa anambo n aalae su saruanni ite. ¹⁵Su alu arussa udde Kristus na'ola'a aławo'u gharraho apan uaparenta wuřru uatařrino naola'a tawe atatoħanne. Imangitou naola'a wawialannu awadaalla su tempo Kristus nangapiddi mangitou ere taumata n řuumanna sulařummu amamattu awawantu-Ge.

¹⁶Ana waugu udde, imbařranga mamala n taumata mapaasała ng kamiu su ola'u umanna ara'e ma'inumma ua'e, ara'e su ola'u manga allo wahewa n agama, ara'e manga ramea m wuřanna wakku, ara'e su ola'u allo n Sabatta. ¹⁷Sarangkanambone udde tumba'u mappaellegu inolaanna apan sarun rumanta, arawe semakku aławo'u inolaanna udde ete-udde Kristus! ¹⁸Imbařranga iamiu mapaawala m watangannu rugianu taumata apan mangngawusu naungge mawawo wuřru massubba manga mala'ekatta. Taumata udde mawunga ringannu manga řingirřannu runia wuřru mamarabunga manga sondapi tou sassane, ¹⁹na'oma n sara tate mangngimanna si Kristus apan naola'a tembonanne. Su ałunggu piarřa'i Kristus, ahewallu wadanga papaduřiananna wuřru niammula manga latto'anne, see tinumuwo tumuřruttu apulu Mawu Ruata.

Mate wuřru wiakka su sambau ringanni Kristus

²⁰Iamiu natete su sambau ringanni Kristus, wuřru suete nipallosa wuassu manga gharraho apan uatařrino runia indi. Ne anio iamiu mabbiakka ere taumata apan ta'e paparentannu runia indi? Anio iamiu ta'e tuttuřruta manga atoranna ereindi, ²¹"Arie pamita indi", "Arie pattemma udde" "Arie pangeřřeta indi"? ²²Anambo n atoranna udde eteudde aławo'u inolaanna apan amungkangu ipaatta, maola'a tate gunane lai. Udde tumba'u manga atoranna wuřru ałarřa'a apan niola'u taumata. ²³Atonna aellehanna olangge udde mapia; ringannu darolokke tadea'u taumata massubba mala'ekatta, mapaawawo n ririne wuřru mannansara watanganne; arawe sarangkanambone udde tawe gunane ipangehetta apulu n taumata.

3 Iamiu suete niapaawiakka apia su sambau ringanni Kristus. Ana waugu udde řinone iamiu mammanara tadea'u maasomba apapia wuassu surga, suapa Kristus uaparenta ringannu Mawu Ruata. ²Timmona'a řingirřannu su inolaanna isudde, arie su manga inolaanna su runia. ³Ana waugu iamiu natete, wuřru wiakku uawuni su sambau ringanni Kristus sulařummu Mawu Ruata. ⁴Ne, punnu wiakku apan tutune eteudde Kristus wuřru napawe itou asiloanna, ne iamiu lai sarun rumanta suadio'a ringanni Tou sulařummu atatulide!

Wiakka tabbe wuɽɽu wiakka wakku

⁵Ana waugu udde, tantanga'e paa'apulu n runia apan maɽwinasa ririnu, ere sandaga, manga inolaanna apan tawe matataɽɽino, apulu naungnga, tawe masabare, apulu apan laɽeo, wuɽɽu awawaɽiu (ana waugu awawaɽiu udde nassuɽungngu massubba paaɽuanna). ⁶Manga inolaanna ereudde mapaaɽatto n wontogu Mawu Ruata su manga taumata apan maɽawangnga. ⁷Dorone iamiu sassane lai tuttuɽɽuta manga apulu udde, su tempo iamiu paparentannu inolaanna udde.

⁸Arawe orassa indi ɽinone iamiu mandammem manga inolaanna laɽeo wuassu ririnu; ariete masa'u, ara'e mandona ara'e pia naungnga maddintinu taumata waine. Arie saran paassa sumabangnga wuassu moɽɽongu manga wisara laɽela ara'e wisara apan laɽeo. ⁹Arie panga-wusu sangkatou ringannu waine, ana waugu wiakka tabbe ringannu aɽawo'u pallaɽagune suete niramme ng kamiu. ¹⁰Iamiu orassa indi suete nionggolannu wiakka wakku. Imiu taumatate wakku, apan sidutu lallimbakuannu mandiriaddine eteudde Mawu Ruata, tumuɽɽuttu pahudde sassane. Pandumanne eteudde tadea'u iamiu maailaɽa Mawu Ruata ringannu mapia-pia. ¹¹Ana waugu wuassu inolaanna udde, nawuɽite aɽawo'u apendamma mappapaɽɽala n taumata n Yahudi wuɽɽu waɽine Yahudi, taumata nisunatta wuɽɽu taumata tawe nisunatta, tate lai paɽɽalane su wallatu taumata raho wuɽɽu taumata woddo; su wallatu allangnga wuɽɽu waɽine allangnga, ana waugu Kristus uddewe uatahuanna sarangkanambone, wuɽɽu Itou uauukka ringanni mangitou sarangkanambone!

¹²Eteudde tuɽɽanga sarangkanambone aɽaɽrana'u Mawu Ruata. Mawu ruata marangngu siamiu wuɽɽu namile siamiu maola'a pussa'a-Ne sassane. Ana waugu udde iamiu ɽinone mapaaɽiatta'u apapia, iamiu ɽinone uasasangkapia, masaɽɽionto'a, masaɽɽiologa wuɽɽu mataɽɽanga su asasusa. ¹³Iamiu ɽinone masabare sangkatou ringannu waine, wuɽɽu maapulu mangampunganga sangkatou ringannu waine. Mawu ringannu naungnga maɽuassa mangampunganga siamiu, nariaddi iamiu lai ɽinone mangampunganga sangkatou ringannu waine. ¹⁴Wuɽɽu apianne eteudde: Iamiu ɽinone uararangngu ana waugu ete darangngu udde map-paa'aukku manga tuɽɽangnga sarangkanambone ma'oma n sara masuungnga. ¹⁵ɽinone manga pangudusannu hatto udde insueannu paddarame apan nionggoli Kristus sulaɽummu naungngu. Ana waugu Mawu Ruata namago siamiu maola'a sambau wadange, tadea'u iamiu mabbiaɽka sulaɽummu paddarame wuassi Kristus udde. ɽinone iamiu maadiangkamanna. ¹⁶ɽinone manga aɽaɽra'i Kristus apan napene n aɽamatta umusippa sulaɽummu naungngu. ɽinone iamiu uatatantiro wuɽɽu

uaaonggolu ałarřa'a lembon apianne. Antaria'e Mazmur wuřru manga daralo see manga antari n Sařřani; pangantarite huna Mawu Ruata ringannu apendamu aadiangkamanna sulałummu naungngu. ¹⁷Aławo'u apa apan a'olaanni amiu ara'e sulałummu wisara, řinone udde olaanna wuřru iwisara sulałummu arannu Mawu Yesus. Aaļiomante su Mawu Ruata Iamangnga ana waugu inolaannu Mawu Yesus siamiu.

Paa'aukku taumata sulałummu wiakka apan wakku

¹⁸Manga tuřrangnga apan naola'a awingnga wawine! Paatuřruta su awingngu esakka, ana waugu aroddite pallaļagunu ere sangkatou taumata n Sařřani.

¹⁹Manga tuřrangnga apan naola'a awingnge esakka! Paarangngue awingngu wawine. Arie manggaļusa'a simangitou.

²⁰Manga ałarřana'a! Eteudde manara ng kamiu taumata n Sařřani sidutu tuttuřruta hagurangngu, ana waugu eteudde maaļuassa naungngu Mawu Ruata.

²¹Manga tuřrangnga apan naola'a iamangnga! Arie mapaasusa naungngu manga ałarřrangngu ma'oma n sara imangitou masusa naungnge.

²²Manga tuřrangnga apan naola'a allangnga! Sulałummu aławo'u inolaanna, řinone iamiu matuřruta mawunu su runia indi. Arie tumuřrutta simangitou tumba'u su tempo imangitou uariaga siamiu, ana waugu iamiu maapulu raloanna. Paatuřruta simangitou ringannu naungnga waresi, ana waugu iamiu mangngaddatta Mawu. ²³Aławo'u manara apan nionggolla siamiu, řinone manaranni amiu ringannu ahewallu naungnga, pařřimaunapa eteudde Mawu apan a'imbeanni amiu, wuřru waļine tumba'u taumata. ²⁴Paanaunge manungku iamiu sarun manengkamma laļantake wuassu Mawu Ruata. Apa apan nissaddia Mawu su ałarřrang-Nge, eteudde sarun ionggola siamiu. Ana waugu mawu apan atonna eteudde Kristus sassane. ²⁵Wuřru isai-sai apan na'ola'a pasasaļa, sarun mamasanna manga pasasaļane udde; ana waugu Mawu tawe mamile hati.

4 Manga tuřrangnga apan naola'a tuangnga! Řinone iamiu ma'ola'a manga allangngu ringannu apapia wuřru atatuļidda. Paanaunge manungku iamiu pia sangkatou tuangnga su surga.

Manga tatantiro

²Rinone iamiu umaļiomanna ringannu ma'uddupa wuŗru maantaga, lapiddu maadiangkamanna su Mawu Ruata. ³Iami lai aaljomana'a tadea'u Mawu Ruata mangoggolu allo mapia siami manaļiawukku watti'a su ola'a addapingi Kristus. Ana waugu olangnge udde ne ia'u orassa indi uatana'a sulaļummu tuttupanna. ⁴Aaljomante tadea'u ia'u wotongnge manaļa'a n addapinga udde ringannu masema-semakka, su ereapa pandumanne.

⁵Sulaļummu paa'aukki amiu ringannu manga taumata apan tawe mangngimanna, řinone iamiu mabbiakka su atatuļidda wuŗru mappa'attu aļawo'u tempo mapia udde, ringannu mapia-pia. ⁶Rinone manga inolaanna apan iwabbisara ng kamiu sidutu maaļuassa wuŗru apangi-mananna. Řinone iamiu maasingkata ereapa řinone iamiu sumimbakka manga aiwaļo n taumata.

Panginsueannu suratta wuŗru tabea

⁷Tikhikus, tuŗranggi ite apan arangnguanna, sarun mamasingkata siamiu su ola'a alawo'u inolaanku. Itou matammuda mammanara ringanni ami huna Mawu. ⁸Ia'u nandolokki tou ringanni amiu pandumanne tadea'u iamiu maasingkata ola'i ami wuŗru iamiu iapaaļuassa. ⁹Onesimus sarun inai su sampunna ringanni Tikhikus; itou sangkatou wuassu walahannu. Itou taumata matuŗrute, wuŗru iami marangngu sitou. Itou wuŗru Tikhikus sarun mamasingkata siamiu alawo'u apa apan nariaddi su tampa'u indi.

¹⁰Aristarkus, apan sulaļummu tuttupanna suadio'a ringanku, nandoho n tabea siamiu. Aroddi lai Markus, tuŗrangi Barnabas. (Iamiu suete nirohoannu watti'a ipanansomakka sitou amungkangu itou rumanta ringanni amiu.) ¹¹Tabea lai wuassi Yesus apan aranne lai isasago Yustus. Wuassu manga taumata n Yahudi apan nangimante Mawu Yesus, tumba'u imangitou n tallu apan orassa indi mammanara suadio'a ringanku mappaaattu manara Mawu Ruata. Imangitou atonna-tonna mantuļungku.

¹²Tabea wuassi Epafras. Itou lai wuassu walahannu. Itou allangngi Kristus Yesus, apan sidutu u'ajiomanni amiu ringannu maŗrimadda. Itou sussaļande Mawu Ruata tadea'u pangangimannu mabaļi matohassa wuŗru iamiu atonna-tonna natimmaddete, tadea'u iamiu lai nasuungnga tuttuŗruta apulu Mawu Ruata. ¹³Itou naasilo sassane manungku itou suete nammanara maŗrimada hunane siamiu wuŗru su manga taumata

su Laodikia wuṛṛu Hierapolis. ¹⁴Doktere Lukas, apan arangguanni ite, wuṛṛu Demas nandoho n tabea siamiu.

¹⁵Waḷoa'a lai tabea ng kami su manga manga tuṛṛangnga Sarṛani su Laodikia; wuṛṛu lai si Nimfa, wuṛṛu su manga jamaatta apan mattaṛṛamawu su waḷene sambau-sambau. ¹⁶Napawe suratta indi suete niwasa ng kamiu, suapa m botongnge wasa'a lai ringannu jamaatta su Laodikia. Aroddi lai iamiu sassane ṛinone mabbasa n suratta apan sarun iroho wuassu Laodikia siamiu. ¹⁷Wuṛṛu waḷoa'a si Arkhipus, "Insuete manara apan nionggolla si'o ipangngimbe Mawu."

¹⁸*Tabea wuassia'u, Paulus.* Ia'u sassane apan namoṛṛetu addoanne indi. Arie paabuḷiane manungku ia'u ta'e sulaḷummu tuttupanna!

Doronganna Mawu mangaḷamatta siamiu.

Tabea ng kami,
Paulus

SURATTI PAULUS PAARORONE SU JAMAATTU TESALONIKA

WISARA TALAANE

Tesalonika eteudde sambau inanggu Soa n Makedonia, sambau provinsi araratuannu Roma. Jamaatta su Tesalonika niaparisikki Paulus napawe itou nanantangke m Filipi. Arawe tawe nalannu wua udde, manga taumata n Yahudi apan naungnge laleo si Paulus mannattake mannoppolla manara m Paulus eteudde mabatti'u alarra'u Sarrani su manga taumata waline Yahudi apan suete namasilo n apulune su agama n Yahudi. Ringannu naungnga niwata'a Paulus nanantangu Tesalonika wufu inaita watukku Berea. Wua udde napawe itou na'omate su Korintus, itou nanengkamma suratta wuassi Timotius, hawene sangkamanaranna, su ola'u jamaatta su Tesalonika.

Nariaddi, *Suratti Paulus Apan Paarorone Su Jamaattu Tesalonika* niwofreta ipangonggolu sasasa wufu atotahassa simangitou. Paulus maadiangkamanna su watti'a apan niaringirrani tou su ola'u pangangimanna wufu darangngu mangitou. Itou napaanaungnga simangitou su ola'u wiakki tou sassane su tempo ta'e uatana'a su pattangnganni mangitou. Napawe suete namasingkattu sarangkanambone udde, Paulus sinumimbakka manga aiwalo mangitou su ola'u daranta n Kristus aruane. Amungkangu sangkatou taumata n Sarrani mate tanta'anna Kristus taambe rumanta apia, wotongngewe taumata udde manengkamma wiakka tutune wufu saran malannu-lannu wuassi Kristus? Tingngerate Kristus rumanta? Paulus nanantiro tadea'u imangitou sidutu mammanara ringannu matammuda lapiddu uaraffaddo daranta n Kristus ringannu napene n antimma.

Laloꝝrone

Panattaꝝranne	1:1
Aadiangkamanna wuꝝru daralo	1:2-3:13
Tatantiro su ola'u ereapa ꝑinone pallaꝝagu n taumata n Saꝝrani	4:1-12
Taꝝa' a su ola'u daranta n Kristus aruane	4:13-5:11
Manga tatantiro panginsueanne	5:12-22
Panginsueanne	5:23-28

1 Manga tuṙrangnga jamaatta su Tesalonika apan naola'a aḷaṙṙana'u Mawu Ruata Iamangnga wuṙṙu Mawu Yesus Kristus:

Iami, eteudde Paulus, Silas wuṙṙu Timotius mangngantimma do-
ronganna Mawu Ruata mangonggolu aḷamatta wuṙṙu paddarame
siamiu.



Soa Tesalonika (1:1)

Wiakka wuṙṙu pangangimannu manga taumata n Tesalonika

²⁻³Iami sidutu u'aliomanna su Mawu Ruata ana waugu manga tuṙrangnga sarangkanambone. Suapan iami umaḷiomanna su Mawu Ruata wuṙṙu Iamangngi ite, iami sidutu mannaungnga siamiu. Iami sidutu u'aliomanni amiu. Iami mannaungnga ereapa iamiu napaaliatta'a su-
laḷummu pallaḷagu manungku iamiu mangngimanna si Kristus, ereapa
iamiu mandangngu taumata waine, na'oma n sara iamiu mangngimbe
simangitou, wuṙṙu ereapa iamiu mangantimma ringannu matohassa su
Mawu ng kite Yesus Kristus. ⁴Iami masingkatta manga tuṙrangnga,
manungku Mawu Ruata mandangngu siamiu wuṙṙu suete namile siamiu
maola'a pussa'a-Ne sassane. ⁵Ana waugu iami namasingkatu Watti'u
Aḷaḷuassa siamiu waḷine tumba'u ringannu wisara, arawe lai ringannu
taṙṙino wuṙṙu Ghaṙṙaho Mawu Ruata. Wuṙṙu iami mangngimanna
atonna atatuliḷdu Watti'u Aḷaḷuassa udde. Iamiu masingkata ereapa
iami mabbiakka ana waugu iamiu su tempo iami uatana'a su pattanganni
amiu. ⁶Iamiu uantantalongnga pallaḷagu ng kami wuṙṙu tuḷada Mawu.
Salaiwe iamiu tumanite n uatataṙṙanga, iamiu mannaḷoho ringannu
naungnga maḷuassa watti'a apan iwabbatti'i ami siamiu. Aḷaḷuassa

udde nionggolu Gharraho Mawu Ruata. ⁷Ringannu udde iamiu naola'a tuɽadda su anambo n taumata n Sarrani su Makedonia wuɽru Akhaya. ⁸Ana waugu nanattakka wuassi amiu, watti'a su ola'u Mawu suete nia-paasingkata na'oma n sara watukku Makedonia wuɽru Akhaya. Wuɽru waɽine tumba'u udde lai; arawe watti'a su ola'u ereapa iamiu nangimanna Mawu Ruata na'omate su aɽawo'u tampa, na'oma n sara iami lasa'e lai maggahato n aɽawo'u hatto siamiu. ⁹Anambo n taumata udde uahahatto su ola'u ereapa iamiu nanaɽoho siami su tempo iami dorone nirumanta ringanni amiu. Imangitou uahahatto su ola'u ereapa iamiu nanantangu pasasubba paaɽuanna wuɽru nirumanta ringannu Mawu Ruata tinggassa apan wiakka wuɽru mattaɽramawu Sitou. ¹⁰Imangitou uahahatto lai su ola'u ereapa iamiu manggantimma daranta n Ana'u Mawu Ruata wuassu surga, eteudde Mawu Yesus, apan suete niapaa-wiakku Mawu Ruata wuassu papate. Ete Mawu Yesus udde lai apan manaɽamatta siite wuassu asasa'u Mawu Ruata apan sarun rumanta.

Pamamanara Paulus su Tesalonika

2 Manga tuɽrangnga! Iamiu sassane masingkata manungku patatambo ng kami siamiu pia gunane. ²Iamiu masingkata manungku ro'e n iami taambe nirumanta ringanni amiu su Tesalonika, iami suete niapaasusa wuɽru niaɽuandahanna su Filipi. Arawe salaiwe manambo taumata mandooppa siami, Mawu Ruata ng kite suete nangonggolu awawaɽrani siami ipabbatti'u Watti'u Aɽaɽuassa siamiu apan darantane wuassi Tou. ³Iami nangahe siamiu waɽine sambau inolaanna apan niuমাঝি; wuɽru lai waɽine ringannu pandumma apan wengkola wuɽru ipangngawusu. ⁴Tawe! Iami tawe nabbisara see ipalluassa naunggu taumata, ewe'e ipalluassa naunggu Mawu Ruata, apan mannaɽu'atta naunggi ami. Ana waugu iami aellehannu Mawu Ruata wotongnge manaɽiawukku Watti'u Aɽaɽuassa udde. ⁵Iamiu sassane masingkata manungku tawe saran paassa iami nassaɽo'a ara'e nangawusu siamiu ipamuni m pandumma apan laɽeo udde. Mawu Ruata mattatiale! ⁶Iami lai tawe mappandumma daralo wuassu taumata - mawae wuassi amiu ara'e wuassu taumata waine. Rinone maola'a sangkatou rasulli Kristus iami wotongnge madorongnga sarannapa siamiu. ⁷Arawe iami masarɽionto'a su tempo iami uatana'a su wallatti amiu, ere sangkatou inangnga uapadduɽi aɽarɽanangge. ⁸Ana waugu darangngu ng kami, iami uasaddia mangonggolla siamiu waɽine tumba'u Watti'u Aɽaɽuassa wuassu Mawu Ruata udde arawe wiakki ami lai. Ana waugu iami tumanite n marangngu siamiu! ⁹Asinungka iamiu ta'e maanaungnga ereapa arɽimade iami mattinsahadda wuɽru mammanara. Allo ɽabbi

iami mammanara tadea'u iami tawe mapaasusa n saran sangkatou wu-
 assi amiu su tempo iami mammasingkatu Watti'u Aļaļuassu Mawu
 Ruata udde siamiu.

¹⁰Iami mabbiakka ringannu na'ukkassa, su rinone wuřru tawe ang-
 ngone su saruanni amiu apan mangngimante si Kristus. Ete iamiu
 udde naola'a tiala ng kami; aroddi lai Mawu Ruata. ¹¹Iamiu masing-
 kata manungku iami ma'ola'a siamiu sambau-sambau ere sangkatou ia-
 mangnga mammaduļi aļarřanangge. ¹²Iami mannantiro siamiu, iami
 mangngonggolu sasasa siamiu wuřru iami mammata'a tadea'u iamiu ma-
 bbiakka aroddi olangge ma'oma n sara maalūassa naungngu Mawu
 Ruata. Ana waugu Mawu Ruata suete namago siamiu maola'a laļorřo n
 Runia Waku Mawu Ruata wuřru mamendamma awawantu-Ge.

¹³Pia lai sambau hatto waine apan naola'a siami sidutu maadiang-
 kamanna su Mawu Ruata. Hatto udde eteudde, manungku su tempo
 iami mammasingkatu watti'u Mawu Ruata siamiu, iamiu naddaringikka
 wuřru nanengkamma watti'a udde waļine ere watti'a wuassu taumata,
 arawe watti'a apan atonna-tonna wuassu Mawu Ruata. Ete Itou apan
 mammanara sulaļummu watangannu apan mangngimanna si Kristus.
¹⁴Manga turřangnga, asasusa apan niapendamanni amiu, suete niapen-
 damannu manga jamaattu Mawu Ruata su Yudea apan naola'a pussa'a
 n Kristus Yesus. Iamiu naapendamma asasusa wuassu pabbawalagi amiu
 sassane, ere lai niapendamannu manga jamaattu Mawu Ruata su Yu-
 dea udde wuassu wageangngu manga taumata n Yahudi. ¹⁵Manga tau-
 mata udde namate Mawu Yesus wuřru manga nabi, see nanansara siami.
 Imangitou masseettu anambo n taumata, wuřru Mawu Ruata atonna-
 tonna tawe maļuassa simangitou. ¹⁶Ewe'e imangitou lai mammaļaatta
 siami mabatti'a su manga walaga waļine Yahudi watti'a apan wotongge
 maasaļamatta manga walaga udde. Ringannu aroddi manga taumata n
 Yahudi udde sidutu mannamba rosa mangitou na'oma n sara reenganne
 masuungnga. Wuřru orassa indi imangitou panginsueanne niarantannu
 asasa'u Mawu Ruata!

Apulu m Paulus mattembo paassa lai manga taumata n Tesalonika

¹⁷Arawe manga turřangnga, ro'e n iami nattalei taļa ng kadio'a
 wuassi amiu - nattalei su mata arawe su naungnga tawe - iami
 lembon mannaungnga siamiu wuřru mappandumma atonna-tonna ana
 see massomba ng kamiu apia! ¹⁸Iami maapulu inai mattembo siamiu;
 wuřru ia'u, suete naannamma na'oma n sara paarua, arawe Setanna
 mammaļaatta siami. ¹⁹Atonna ete iamiu aantimanna wuřru maalūassa

siami. Ana waugu napawe Mawu Yesus rumanta, wuṛṛu iite sumaruanna Sitou, ne ete iamiu apan maaļuassa siami! ²⁰Atonna ete iamiu ilallala'a wuṛṛu maaļuassa siami!

3 Panginsueanne apulu ng kami tate niataṛṛanganna. Ana waugu udde iami maṛṛingidda mappianne iami itantanga sassane su Atena, ²tantaļuanna iami nandolokku tuṛṛangi ite Timotius. Itou sangkatou mamamanara Mawu Ruata apan mammanara suadio'a ringanni ami mam-masingkatu Watti'u Aļuļuassa su ola'i Kristus. Iami nandolokki Timotius ringanni amiu tadea'u itou mannohassa siamiu wuṛṛu mangong-golu sasasa siamiu ana see lembon mangngimanna lai si Kristus. ³Ringannu aroddi tawe saran sangkatou wuassi amiu apan sumorṛota ana waugu asasusa ng kite indi. Iamiu sassane masingkata manungku manga asasusa udde nasutta sulaļuumu pandumannu Mawu Ruata siite. ⁴Su tempo iami ta'e su sambau ringanni amiu, iami suete namasingkata siamiu su paarorone manungku iite sarun matataṛṛanga. Wuṛṛu udde atonna-tonna suete nariaddi; iamiu sassane masingkatte. ⁵Ana waugu udde ia'u nandolokki Timotius, ana waugu ia'u maapulu atonna maasingkata ereapa araṛṛimaddi amiu mangngimanna si Kristus. Ia'u susinggawangnga ana waugu Setanna wotongnge mamono'a siamiu ma'oma n sara anambo n asasahaddi ami maola'a tate gunane.

⁶Orassa indi Timotius nabelengke wuṛṛu suete nabbatti'a siami watti'a maaļuassa su ola'u ereapa iamiu mangngimanna si Kristus wuṛṛu uararangngu. Itou namasingkata siami manungku iamiu sidutu mangngado m pananaunganna mapia su ola'i ami sulaļuumu naungngu. Wuṛṛu iamiu maapulu maisasomba ng kami, ere lai iami maapulu maisasomba ng kamiu. ⁷Ana waugu udde manga tuṛṛangnga, sulaļuumu aļawo'u asasusa wuṛṛu patatuṛṛaddanni ami, iami niaļuwuṛṛanu watti'i amiu. Pangangimannu si Kristus naahewalla naungngi ami ⁸na'oma n sara orassa indi iami naependamma atonna-tonna mabbiakka, sambaliate iamiu sidutu uarisikka matohassa, uauukka ringannu Mawu. ⁹Aroddi ahewalle apendammu aadiangkamanni ami su Mawu Ruata su aļawo'u aļuļuassa apan niapendamanni ami su saruan-Ne ana waugu iamiu. ¹⁰Allo ṛabbi iami sussaļande Sitou ringannu awawira n daļuumu naungnga, tadea'u iami wotongnge masasomba sassane ringanni amiu ipanuungngu apa apan ipaapulu ng kamiu see ipangimanna si Kristus aroddi olangnge.

¹¹Antimanna Mawu Ruata Iamangngi ite sassane, wuṛṛu Mawu ng kite Yesus Kristus manuļidda laļanni ami ipadumatingngi amiu! ¹²Antimanna Mawu ma'ola'a siamiu lembon marangngu sangkatou ringannu waine wuṛṛu lembon marangngu su anambo n taumata, na'oma n sara darangngunu udde aatambanna, ere lai darangngu ng kami siamiu. ¹³Ringannu aroddi Mawu sarun manohassa naungngu, na'oma n

sara iamiu ma'ukkasa wuṛṛu tawe saḷane su saruannu Mawu Ruata Iamangngi ite, su tempo Mawu ng kite Yesus rumanta suadio'a ringannu anambo n taumata apan naola'a pussa'a-Ne.

Wiakka apan maaḷuassa naunggu Mawu Ruata

4 Panginsueanne manga tuṛrangnga, iami suete nanuḷada siamiu su ola'u ereapa iamiu ṛinone mabbiakka malluassa naunggu Mawu Ruata. Atonna iamiu suete nabbiakka ereudde. Arawe orassa indi sulaḷummu taṛṛino Mawu Yesus, iami sumaḷande siamiu wuṛṛu mamata'i amiu tadea'u iamiu lembon maddea'a lai olangnge udde! ²Ana waugu iamiu suete naasingkata manga tatantiro apan suete nionggoli ami siamiu sulaḷummu taṛṛino Mawu Yesus. ³Ete indi ipaapulu Mawu Ruata tadea'u iamiu tumba'u mabbiakka ringanni Tou, susi, mangngindau n aḷawo'u pallaḷagu apan laḷeo. ⁴Suapan esakka su wallatti amiu ṛinone maasingkata ereapa mabbiakka ringannu awingnge wuṛṛu ringannu inolaanna apan maaḷuassa naunggu Mawu Ruata wuṛṛu taumata. ⁵Arie mabbiakka tuttuṛṛuta apulu n daḷummu naunggu su saruannu awingngu, ere niola'u manga taumata apan tawe maaillaḷa Mawu Ruata. ⁶Sulaḷummu olangnge ereudde, arie saran sangkatou ma'ola'a pasasaḷa su tuṛrange, ara'e mallinga. Dorone iami suete napaanaungnga ringannu atonna siamiu, manungku Mawu sarun maṛṛuumannu manga taumata apan ma'ola'a manga pasasaḷa ereudde. ⁷Mawu Ruata mammago siite, waḷine tadea'u see iite mabbiakka sussandaga, ewe'e tadea'u iite mabbiakka maaḷuassa naunggu Mawu Ruata. ⁸Taumata apan tawe madingikka aḷaṛṛa'a indi waḷinewe tawe madingikka taumata, arawe tawe madingikka Mawu Ruata apan nangonggolu Ghaṛṛaho-Ne susi siamiu.

⁹Tate gunane lai iami mamorṛettu suratta siamiu su ola'u ereapa iamiu ṛinone mandanggu manga tuṛrangnga apan sambau su pangangimanna. Iamiu sassane suete niaṛṛaannu Mawu Ruata ana see iamiu uararangngu. ¹⁰Wuṛṛu olangnge indi suete niapaalatta'i amiu su saruannu manga tuṛrangnga apan pangangimanna sambau su Makedonia. Arawe manga tuṛrangnga, iami sumaḷande atonna siamiu, tadea'u wiakki amiu maola'a lembon apianne lai. ¹¹Pattinsahadde mabbiakka ringannu matammuda wuṛṛu tawe mailaḷo'a su hatto n taumata waine. Ṛinone iamiu mammanara maddea'a anni amiu sassane, ere lai iami dorone suete nandolokki amiu.

¹²Amungkangu iamiu mabbiakka aroddi, iamiu tate uatundeetta sisai-sai, wuṛṛu manga taumata apan tawe mangngimanna si Kristus, sarun mangaddatta siamiu.



Daranta n Mawu

¹³Manga turrangnga, iami maapulu tadea'u iamiu maasingkata apa apan řinone su ola'u manga taumata apan natete; tadea'u iamiu tawe masusa naungnga ere manga taumata waine apan tawe antimme. ¹⁴Iite mangngimanna manungku Mawu Yesus suete nate wuřru nabbiakka apia. Ana waugu udde iite mangngimanna lai manungku Mawu Ruata sarun mapaawiakku apia anambo n taumata apan mangngimanna Mawu Yesus wuřru apan natete, tadea'u imangitou mabbiakka su sampunna ringanni Tou.

¹⁵Tumuřruttu olangnge udde, indete aļarŗa'u Mawu apan iapaassingkati ami siamiu; Su tempo Mawu Yesus rumanta, iite apan ta'e wiakka, tawe malliu řoro manga taumata apan natete dorone. ¹⁶Pařradote mala'ekatta mawantuga sarun umui ringannu tingikka ma'ikkatta wuřru trompetu Mawu Ruata iapatuntingikka maola'a sambau tatiala iapa-saddia. See Mawu Yesus sassane sarun sumossokka wuassu surga, wuřru manga taumata n Sařrani apan natete sarun iapaawiakka dorone. ¹⁷Wua udde, iite apan ta'e wiakka su tempo udde sarun masengkenga su sampunna ringanni mangitou sulaļummu winabbawa maisasomba Mawu Ruata su winalanganna. See iite matana'e ringannu Mawu saran maļannu-ļannu. ¹⁸Ana waugu udde, řinone iamiu uatatohassa naungnga ringannu mappaamattu manga wisara indi.

Paasaddiate su daranta n Mawu

5 Manga turrangnga, iami salaiwe lasa'e mamorrettu suratta siamiu anggerate tempone apan na'etta'a, manga olangnge udde sarun mariaddi. ²Ana waugu iamiu sassane masingkata ringannu masemakka manungku allo n daranta Mawu udde sarun rumanta ere tarra ta'o su tempo rabbi. ³Amungkangu taumata mabbisara, "Sarangkanambone mañannaba wuřru matammuda," ne ete su tempo udde inarrombanganne imangitou sarun arriannu papate wuřru tawe saran sangkatou apan wotongnge maatařangnga. Olangnge udde sarun mariaddi sangkarřondapa, ere taddu'u sangkatou wawine apan sarun mangunsiwe. ⁴Arawe iamiu wařinewe taumata apan mabbiakka sulařummu araranduma, na'oma n sara allo udde naarřindu'a siamiu ere daranta n sangkatou tarra ta'o. ⁵Turřanga sarangkanambone eteudde taumata apan mabbiakka sulařummu asemakka; iamiu nasutta su allo apan masemakka. Iite wařine taumata apan mabbiakka sulařummu araranduma, ara'e nasutta su rabbi apan maranduma. ⁶Ana waugu udde imbarřanga iite tumba'u mattiilla ere taumata waine. Iite řinone uariaga wuřru řingirřanni iite řinone masemakka. ⁷Su tempo rabbi taumata mattiilla, wuřru su tempo rabbi lai taumata mabbaři wu'anna. ⁸Arawe iite indi manga taumata apan nasutta su allo apan masemakka; ana waugu řingirřanni iite řinone masemakka. Iite řinone sidutu manggimanna Mawu wuřru mandangu manga taumata waine wuřru manggantimma ringannu atonna manungku Mawu Ruata sarun manařamatta siite. Eteudde ahidda apan uařindumma siite sulařummu manara lumařangnga araranduma. ⁹Mawu Ruata namile siite wařine iřřuumanna, arawe tadea'u maasomba asasařamatta wuassu Mawu ng kite Yesus Kristus. ¹⁰Itou nate huna ng kite, tadea'u su tempo Itou rumanta apia - tanne iite ta'e wiakka, ara'e natete - iite wotongnge mabbiakka su sambau ringanni Tou. ¹¹Ana waugu udde řinone iamiu sidutu uasasasa wuřru uatohassa ere lai a'olaanni amiu orassa indi.

Manga tatantiro panginsueanne wuřru tabea

¹²Manga turrangnga, iami sumařande tadea'u iamiu mangadata taumata apan mammanara su pattangngani amiu; eteudde imangitou apan suete nipile Mawu mamiarřa'a wuřru manantiro siamiu. ¹³Pangaddatta simangitou ringannu mapia-pia wuřru ringannu paddararangngu ana waugu ipannaungnga apa apan suete niola'i mangitou. Pabbiakke sidutu ringannu paddarame.

¹⁴Iami madoronga lai, Manga tuṛṛangnga, taggue ringannu paddarame taumata apan maddirī mammanara; tohassa naungngu taumata apan matta'utta; tuṛṛung'a taumata apan wotongnge iatuṛṛung, wuṛṛu paasabare su saruannu awadaalla. ¹⁵Paariagai tadea'u arie pia taumata apan mabaṛṛissu aṛṛaṛeo ringannu aṛṛaṛeo. Paddea'e sidutu ringannu ma'ola'a aṛṛapia, sangkatou ringannu waine wuṛṛu su anambo n taumata.

¹⁶Ṛinone iamiu sidutu lulluassa, ¹⁷wuṛṛu sidutu u'aṛṛiomanna. ¹⁸Sulaṛṛummu alawo'u inolaanna ṛinone iamiu maadiangkamanna, ana waugu eteudde ipaapulu Mawu Ruata wuassi amiu taumata apan mabbiakka uauukka ringanni Kristus Yesus.

¹⁹Arie manarṛanga Gharṛaho Mawu Ruata. ²⁰Arie mangadio'a manga watti'a apan nionggolu Gharṛaho Mawu Ruata. ²¹Sarangkanambone ṛinone iannamma, wuṛṛu aṛṛapia sarun tatturṛutanna. ²²Pangindaute n aṛṛawo'u hati n aṛṛaṛeo.

²³Antimanna Mawu Ruata sassane nangonggolu paddarame siite, ma'ola'a siamiu taumata apan atonna-tonna mabbiakka huna Mawu Ruata sassane. Doronganna Mawu Ruata mallu'adda ahewallu wadangngu, mapia gharṛaho, ṛimuudda, wuṛṛu lai wadangngu, ma'oma n sara tawe sangkule su tempo Mawu ng kite Yesus Kristus rumanta apia. ²⁴Mawu Ruata, apan suete namago siamiu, sarun ma'ola'a olangnge udde ana waugu Itou tawe maabbuli.

²⁵Aṛṛiomana'a iami, manga tuṛṛangnga!

²⁶Paa'adate sarangkanambone ringannu aakkannu pasasangkaturṛangannu taumata n Sarṛani.

²⁷Sulaṛṛummu tarṛino Mawu, ia'u sumaṛṛande tadea'u iamiu mabbasa n suratta indi su anambo n tuṛṛanga apan sambau su pangangimanna.

²⁸Antimanna Mawu ng kite Yesus Kristus mangaṛṛamatta siamiu.

Tabea ng kami,
Paulus

SURATTI PAULUS ARUANE SU JAMAATTU TESALONIKA

WISARA TAŁAANE

Ałajingu su ola'u daranta n Kristus aruane ta'e sidutu maalapputu manga hatto sulałummu jamaattu Tesalonika. *Suratti Paulus Aruane Su Jamaattu Tesalonika* niwořřeta ipanginsue manga hatto udde. Imangitou pia řingiranna manungku tempone Kristus rumanta aruane nia'omante. Řingiranna udde nassała, unni Paulus. Ana waugu tantałanna Kristus taambe nabelengnga watukku runia, arařřagissa wuřřu ałajeo su runia sarun aatambanna, dorone ipapiařřa'u sangkatou apan asingkatanna "Taumata Laėjo" wuřřu apan mannałare si Kristus.

Paulus mangke mannantiro su mabbawasane manungku imangitou sidutu mangngimanna si Kristus, salaiwe wiakki mangitou susa wuřřu imangitou řinone matatařřanga. Paulus mannantiro tadea'u imangitou sangkatou-sangkatou mammanara ipaddea'a wiakki mangitou, ere lai Paulus wuřřu manga hawene. See lai imangitou mařřimada ma'ola'a apapia.

Lałorřone

Panattařřanne	1:1-2
Daralo wuřřu darolokka	1:3-12
Tatała'a su ola'u daranta n Kristus aruane su runia	2:1-17
Tatantiro su ola'u ereapa řinone pallałagu n taumata n Sařřani	3:1-15
Panginsueanne	3:16-18

1 Manga tuṛrangnga jamaatta su Tesalonika, apan naola'a pabbawa-lagu Mawu Ruata Iamangngi ite wuṛru Mawu Yesus Kristus! Iami eteudde Paulus, Silas wuṛru Timotius ²mangngantimma doronganna Mawu Ruata Iamangnga wuṛru Mawu Yesus Kristus mangonggolu aḷamatta wuṛru paddarame siamiu.

Ru'umanna apan ola'anna su daranta n Kristus

³Manga tuṛrangnga, iami sidutu ma'adiangkamanna su Mawu Ruata ana waugu iamiu. Wuṛru mangngimanna si Kristus, wuṛru iamiu lembon uararangngu sangkatou ringannu waine. ⁴Ana waugu udde anio iamiu uahahatto su ola'i amiu suapan iami mattembo manga jamaattu Mawu Ruata. Ringannu maḷuassa iami mabatti'a ereapa iamiu sidutu mangngimanna si Kristus sulaḷummu pananansara wuṛru asasusa apan niapendamanni amiu.

⁵Isindi nasemakke aroddi atuḷidde pamamarikissu Mawu Ruata: Iamiu suete natataṛranga ana waugu Runia Waku Mawu Ruata, ana waugu udde iamiu wotongnge sumutta sulaḷumme. ⁶Itou sarun ma'ola'a atatuḷidda, wuṛru sarun mabaḷissu asasusa su taumata apan napaasusa ng kamiu. ⁷Wuṛru siamiu apan orassa indi uatataṛranga – aroddi lai siami – Mawu Ruata sarun mangonggolu aḷaḷuassa su allo Mawu Yesus sumossokka wuassu surga wuṛru mamasilo m batangan-Ne ringannu manga mala'ekatta apan matohassa, ⁸wuṛru ringannu putungnga apan mabbanala. Itou sinumossoka maṛruummannu manga taumata apan tawe mangngimanna Mawu Ruata wuṛru maddiri mabbiakka su apulu m Watti'u Aḷaḷuassa su ola'u Mawu ng kite Yesus Kristus. ⁹Manga taumata udde sarun manengkamma ruumanna papate sarangkaḷo'enge, iramme su liudde wuassu ammuḷannu taumata Mawu wuṛru wuassu taṛṛino-Ne apan mawantuga; ¹⁰sarangkanambone udde sarun mariaddi su allo Itou rumanta apia ana wantuhannu aḷaṛranang-Nge wuṛru addatannu anambo n taumata apan mangngimanna. Iamiu lai isudde su sambau ringannu pabbawalagu Mawu Ruata udde, ana waugu iamiu suete nangimanna watti'a apan niapaasingkati ami siamiu.

¹¹Ana waugu udde iami sidutu u'aḷiomanni amiu. Iami u'aḷiomanna tadea'u Mawu Ruata ma'ola'a siamiu wotongnge mabbiakka tumuṛrutta apulu-Ne; ana waugu udde Itou namaggo siamiu. Doronganna Mawu Ruata, ringannu taṛṛino-Ne, manuungngu apulu-Ne ma'ola'a apapia, wuṛru manuungngu anambo n manara apan a'olaanni amiu ana waugu mangngimanna si Kristus. ¹²Ringannu aroddi Mawu ng kite Yesus Kristus wantuhanni amiu, wuṛru iamiu lai wantuhannu Mawu Yesus

ana waugu apapia naungngu Mawu Ruata ng kite wuṛṛu Mawu Yesus Kristus.

Taumata laḷeo

2 Su ola'u daranta Mawu ng kite Yesus Kristus, wuṛṛu su ola'u iite iammulle iapaatana'a suadio'a ringanni Tou, ete indi ta'u doronganna siamiu: ²Arie maḷiha-ḷihakka umaḷingu ara'e umambuḷisada ana waugu watti'a manungku nia'omante allone Mawu Yesus rumanta apia. Asinungka watti'a udde darantane wuassu sambau watti'u nabi, ara'e wuassu sambau aḷaṛṛa'a; ara'e wotongnge mariaddi piaddu nabbi-sara manungku iami suete namoṛṛeta aroddi sulaḷummu sambau suratti ami. ³Salaiwe ereapa, arie mapaawala n taumata mangawusu siamiu. Ana waugu tantaḷanna taambe nia'omanna allo udde, ṛinone mariaddi dorone olangnge indi: Manambo taumata sarun massinaada, maddandilli Kristus; wuṛṛu Taumata Laḷeo apan suete nitantuna iapaasutta su naraka, sarun mamasilo m batanganne. ⁴Ringannu mawunga Itou sarun lumawangnga wuṛṛu mananggøku watangan-Ne su anambo n inolaanna apan sassubbannu taumata, ara'e anambo n paaḷuanna apan sassunnannu taumata udde Mawu Ruata. Ewe'e lai Itou sarun uma'ianna sulaḷummu Waḷe Mawu Ruata wuṛṛu mamasingkata manungku eteudde Itou Mawu Ruata.

⁵Naunge, manungku ia'u suete namasingkata siamiu sarangkanambone udde, su tempo ia'u ta'e su sambau ringanni amiu. ⁶Wuṛṛu iamiu masingkata apa apan orassa indi ta'e maawae sarangkanambone udde mariaddi. Paṛṛadote su tempo apan suete tinantunu Mawu Ruata, Taumata Laḷeo udde sarun rumanta. ⁷Atatohassa apan mammanara aḷaḷeo udde mannatakke mammanara ringannu maḷanna-ḷannaba, arawe ta'e tataṛranganna. Napawe mananarange udde suete niapaasaḷiu, ⁸wakkute udde asiloante Taumata Laḷeo udde. Napawe Mawu Yesus ruman-tate, Itou sarun mamate Taumata Laḷeo udde ringannu singangu wuassu moṛro-Nge, wuṛṛu mamate sitou ringannu asasemakku daranta-Ne. ⁹Taumata laḷeo udde sarun rumanta ringannu sambau taṛṛino apan wahewalla wuassu Setanna. Itou sarun ma'ola'a aḷawo'u hati n aḷaṛṛindu'a wuṛṛu manga inolaanna apan wahewalla napene m bawahia. ¹⁰Itou sarun mappaattu aḷawo'u awusune apan laḷeo ipangaḷiwu manga taumata apan sarun mate. Imangitou sarun mate ana waugu tawe maddaringikka wuṛṛu maddiri m wattia'a apan naṛṛino wuassu Mawu Ruata apan wotongnge manaḷamatta simangitou. ¹¹Ana waugu udde Mawu Ruata na-paaranta n taṛṛino apan mangngaḷiwu mangitou, na'oma n sara imangitou nangimanna watti'a apan nassaḷa udde. ¹²Sombange, anambo n tau-

mata apan maapulu n rosa wuḥḥu tawe mangngimanna apa apan su ḥinone udde sarun iḥruumanna.

Iamiu nipile ana waugu iapaasaḥamatta

¹³Manga tuḥḥangnga apan arangnguannu Mawu! Ḥinone iamiu sidutu maadiangkamanna su Mawu Ruata su ola'i amiu, ana waugu ro'e n paarorone Mawu Ruata suete namile siamiu iapaasaḥamatta. Olangnge udde mariaddi wuassu apa apan nimmanara Ghaḥḥaho Mawu Ruata siamiu tadea'u iamiu maola'a aḥaḥḥana'u Mawu Ruata apan susi wuḥḥu ana waugu iamiu mangngimanna watti'u Mawu Ruata. ¹⁴Ana waugu udde Mawu Ruata namago siamiu sulaḥummu Watti'u Aḥaḥuassa apan niapaasingkati ami siamiu. Mawu Ruata namago siamiu, ana waugu Itou maapulu tadea'u iamiu lai maapendama awawantugu Mawu ng kite Yesus Kristus. ¹⁵Ana waugu udde, Manga tuḥḥangnga, darisikke paatohassa wuḥḥu pangagasse sidutu su manga aḥaḥḥa'a apan suete nionggoli ami siamiu, mapia udde uahahati ara'e lai su suratta.

¹⁶⁻¹⁷Doronganna Mawu ng kite Yesus Kristus sassane, wuḥḥu Mawu Ruata Iamangngi ite mallimbatta wuḥḥu manohassa naungngu, tadea'u iamiu wotonge maamanara wuḥḥu mamasingkatu apapia. Ana waugu Mawu Ruata marangngu siite, wuḥḥu ana waugu apapia naung-Nge Itou napaatammuda wuḥḥu mangngantimma apapia.

Aaḥiomana'awe iami

3 Panginsueanne, Manga tuḥḥangnga, aaḥiomana'awe iami. Aaḥiomante tadea'u watti'a wuassu Mawu wotongnge sidutu mas-saḥjawukka ringannu maḥihakka wuḥḥu sengkamanna ringannu mapia, ere lai suete nariaddi siamiu dorone. ²Aaḥiomante lai tadea'u Mawu Ruata manaḥamatta siami wuassu manga taumata laḥeo. Ana waugu tawe anambo n taumata mangngimanna watti'a wuassu Mawu udde.

³Arawe Mawu matuḥḥuta. Itou sarun manohassa siamiu wuḥḥu mallu'adda siamiu wua si Laḥeo. ⁴Wuḥḥu iami mangngimanna atonna su Mawu su ola'i amiu, manungku iamiu tantaḥanna mammanara wuḥḥu sidutu mammanara apa apan iradolokki ami siamiu.

⁵Doronganna Mawu mangehetta siamiu ana see wotongnge lembon maasunna manungku Mawu Ruata marangngu siamiu wuḥḥu manungku Kristus nangonggolu atatamudda siamiu.

Sidutua'a su mammanara

⁶Manga tuřrangnga, wuassu tařřino Mawu Yesus Kristus, iami nandolokka tadea'u iamiu mangindau manga tuřrangnga, apan mabbiakka wolo'a, wuřřu maddiri tumuřřutta manga alařřa'a apan niapaasingkati ami simangitou. ⁷Iamiu sassane masingkata manungku iamiu sarun mattanno tuřadda ng kami. Iami tawe su awawolo'a su tempo iami uatana'a ringanni amiu. ⁸Iami tawe mammo'o n annu taumata ringannu tawe mamaekka. Ewe'e allo řabbi iami mammanara mattinsahadda tadea'u iami tawe mapaasusa n sai-sai wuassu wallatti amiu. ⁹Iami ma'ola'a udde waline ana waugu iami maapulu manuřadda siamiu. ¹⁰Su tempo iami ta'e uatana'a su pattanganni amiu, iami nangonggolu atoranna indi, "Taumata apan maddiri mammanara, tawe wotongge umanna."

¹¹Iami nabbisara arendi ana waugu iami naaringikka manungku pia manga taumata su wallatti amiu apan mabbiakka su amamalassa. Imangitou tawe mammanara, tumba'u ma'ilařo'a su hatto n taumata waine. ¹²Wuassu tařřino Mawu Yesus Kristus iami nandolokku manga taumata udde wuřřu niapaanaungnga, tadea'u imangitou mammanara ringannu matammuda wuřřu maddea'a wiakki mangitou sassane.

¹³Arawe iamiu arie paawusa ma'ola'a apapia. ¹⁴Asinungka ta'e pia taumata apan maddiri tumuřřutta apa apan niapaasingkati ami sulařummu suratta indi. Paatehamma su saruannu taumata ereudde wuřřu arie maggawe n tou tadea'u itou masili. ¹⁵Arawe arie itou olaanna ere seetta; tumba'u tantiroite itou ere sangkatou tuřrangnga.

Manga wisara panginsueanne

¹⁶Eteudde Mawu punnu paddarame ng kite. Doronganna Itou sidutu manonggolu paddarame siamiu su alařo'u inolaanna. Doronganna Mawu makkundinganna tuřrangnga sarangkanambone.

¹⁷*Tabea wuassia'u, Paulus.* Ia'u sassane namořřetu wageangnge indi. Ete indi tiala apan ta'u niwořřeta sulařummu anambo n suratta niwořře'u.

¹⁸Doronganna Mawu ng kite Yesus Kristus mangařamatta tuřrangnga sarangkanambone.

Tabea ng kami,
Paulus

SURATTI PAULUS PAARORONE SI TIMOTIUS

WISARA TALAANE

Timotius udde sangkatou taumata n Saṛṛani apan ta'e waku su leta'u Asia adio'a, apan naola'a hawe wuṛṛu masasumbala m Paulus sulaḷummu manara m Paulus. Iamangngi Timotius sangkatou taumata n Yunani wuṛṛu inangngene sangkatou taumata n Yahudi. Sulaḷummu *Suratti Paulus Paarorone Si Timotius*, niwaḷo tatallu hatto apan pia passampaanne sambau ringannu waine.

Paarorone eteudde iapaanaungnga si Timotius su ola'u manga aḷaṛṛa'a apan nassaḷa nissombanganna sulaḷummu jamaatta. Manga aḷaṛṛa'a udde naola'a sambau aḷaṛṛa'a nipallaḷo'annu aḷaṛṛa'u Yahudi wuṛṛu aḷaṛṛa'u waḷine Yahudi pinangianannu pangangiamanna manungku ulili m pati'uppa naḷaḷeote wuṛṛu asasaḷamatta tumba'u asombanganna amungkangu taumata pia asingkata su ola'u addapinga udde, wuṛṛu tuttuṛṛuta mianga atoṛṛanna ere manga atoranna tawe wotongge maawingnga, mappalli n manga anna wuṛṛu waine lai.

Aruane, eteudde manga tatantiro si Timotius su ola'u pamamaduli jamaatta wuṛṛu su ola'u patataṛṛamawu. Nisemakka sitou pallaḷagu n taumata apan wotongge maola'a mallala'u adda wuṛṛu masasumbala jamaatta. Panginsueanne Timotius niaṛṛaanna su ola'u ereapa itou wotongge maola'a sangkatou allangngi Yesus Kristus apan mapia wuṛṛu su ola'u winabbawane su aḷawo'u taumata apan naola'a reengannu jamaatta.

Lalaṛṛone

Paarorone	1:1-2
Manga tatantiro su jamaatta wuṛṛu manga mamamanarane	1:3-3:16
Manga tatantiro si Timotius su ola'u manarane	4:1-6:21

1 ¹⁻²Timotius, ana'u apan tutune sulaŕummu Mawu! Suratta indi wuassia'u, Paulus, rasulli Kristus Yesus wuassu parenta Mawu Ruata, Punnu Saŕamati ite wuŕru wuassu parenta n Kristus Yesus, pangantimanni ite.

Doronganna Mawu Ruata Iamangnga wuŕru Kristus Yesus Mawu ng kite mangonggolu aŕamatta, darangngu wuŕru paddarame siamiu.

Paatehamma su aŕaŕra'a mangngaŕiwu

³Ia'u maapulu tadea'u i'o sidutu uatana'a su Efesus ere lai suete ta'u niwaŕo si'o su tempo ia'u inai watukku Makedonia. Ana waugu su Efesus pia sire pira taumata apan mannaŕiwukku aŕaŕra'a nassaŕa, wuŕru i'o ŕinone maningaddi mangitou. ⁴Waŕoa'a simangitou tadea'u ariete lai maddaringikka manga wa'e wuŕru manga watti'u arariaddiannu pabbawalaga apan tawe panginsueanne. Sarangkanambone udde tumba'u mandanta m pabbawawuŕo, wuŕru tawe mappamattu pandumannu Mawu Ruata apan tumba'u wotongnge aillaŕanna sulaŕummu pangangimanna Sitou. ⁵Pandumannu tatantiro'u udde tadea'u taumata wotongnge maatahuanna naungnga waresi, wuŕru laŕummu naungnga apan susi, ana see atonna-tonna mangngimanna Mawu, wuŕru ringannu aroddi, wotongnge uararangngu sansuŕungge. ⁶Pia sambageanganna taumata apan maddirite mabbiakka ereudde lai, wuŕru inumaŕiwute sulaŕummu patatiakka apan tawe gunane. ⁷Imangitou maapulu maola'a manga huru n agama, wutte'e imangitou sassane tawe maasunna manga wisara apan ipappaatti mangitou ara'e manga inolaanna apan iapaasingkati mangitou ringannu ahewallu naungnga.

⁸Iite masingkata manungku tita n agama udde mapia, amungkaŕu ipaatta ringannu mapia. ⁹ŕinone naunganna manungku tita niola'a waŕine hunane su taumata mapia, ewe'e su taumata apan maŕawangnga tita, manga taumata laŕeo, taumata maŕawangnga, su taumata marosa, taumata tawe agamane, taumata tumba'u maŕringiddu runia, su taumata apan namate iamangnge wuŕru inangngene, wuŕru manga taŕra pate sarangkanambone, ¹⁰su manga taumata masandaga, esakka uapulu n esakka, maŕrampasa, taŕra wahia, matatiala awusu, wuŕru suapan taumata apan ma'ola'a inolaanna lullawangnga aŕaŕra'a apan naŕŕino. ¹¹Aŕaŕra'a udde niasombanganna sulaŕummu Watti'u Aŕaŕuassa apan pananaŕiwukke tinantilla sia'u, eteudde Watti'u Aŕaŕuassa wuassu Mawu Ruata apan mawantuga wuŕru ŕinone raloanna.

Apendamma aadiangkamanna ana waugu ałamattu Mawu Ruata

¹²Ia'u maadiangkamanna si Kristus Yesus Mawu ng kite. Itou suete nangonggolu atatohassa si'u ipangimbe Sitou, wuꞑꞑꞑ Itou mammadama manungku ia'u wotongnge su manara udde, ¹³salaiwe dorone ia'u mangngaꞑuandaga wuꞑꞑꞑ mandaleo see mangngadio'a Sitou. Arawe Mawu Ruata marangngu sia'u, ana waugu su tempo udde ia'u taambe nangimanna, nariaddi ia'u wagga apa apan a'olaangku. ¹⁴Wuꞑꞑꞑ ia'u nialamatannu Mawu ng kite. Itou nangonggolu atatohassa si'u ipangimanna Sitou wuꞑꞑꞑ mandangngu taumata sansuꞑungnga. Apande udde nionggolla siite sarangkanambone apan uaaukke ringanni Kristus Yesus. ¹⁵Mangke atonna wisara indi - ana waugu udde ꞑinone sengkamanna wuꞑꞑꞑ pangimananna - : "Kristus Yesus nirumanta su runia indi ana waugu manaꞑamatta taumata marosa." Wuꞑꞑꞑ ete ia'u taumata marosa apan lembon aꞑaꞑeanne. ¹⁶Ana waugu udde Mawu Ruata marangngu sia'u, tadea'u Kristus Yesus wotongnge mapaaꞑiatta'u anambo n asasabare-Ne sia'u, taumata apan arosanne indi. Wuꞑꞑꞑ indi maola'a sambau tuꞑada su anambo n taumata apan mangngimanna Sitou wuꞑꞑꞑ maasomba wiakka tutune wuꞑꞑꞑ maꞑannu-ꞑannu. ¹⁷Mawu Ruata, Ratu su aꞑo'engngu tempo, ꞑinone addatanna wuꞑꞑꞑ sidutu raloanna, ana waugu ete Itou punnu saꞑamatta sarangkaꞑo'engnge, apan tawe iasilo wuꞑꞑꞑ tinggassa! Amin.

¹⁸Timotius, ana'u, Manara indi ta'u itantilla si'o, mannaungnga tatana Mawu Ruata apan niapaasingkatu manga nabi sulaꞑummu jamaatta su ola'u ririnu. ꞑinone tanata udde maola'a waꞑunna si'o sulaꞑummu manaranu apan mapia. ¹⁹Pammanarate ringannu pangangimanna apan atonna wuꞑꞑꞑ ringannu laꞑummu naungnga apan waresi. Pia manga taumata apan tawe maddaringikka tingikku laꞑummu naungnge, na'oma n sara naꝼrimunsa'e pangangimanni mangitou. ²⁰Su wallatti mangitou eteudde Himeneus wuꞑꞑꞑ Aleksander. Taumata darua udde suete ta'u niꝼrumanna tinantilla su Setanna, tadea'u imangitou mangilloꞑo mallobosa Mawu Ruata.

Patataꝼramawu n Jamaatta

2 Paarorone, ia'u sumaꝼande tadea'u sasaꝼande, aꝼiomanna, wuꝼꝼꝼ aꝼiomannu awadaalla, see adiangkamanna iwaꝼo su Mawu Ruata huna n anambo n taumata; ²huna manga ratu wuꝼꝼꝼ huna anambò n taumata apan uataꝼꝼino. Padorongke tadea'u iite wotongnge mabbiakka ringannu matammuda wuꝼꝼꝼ paddarame su Mawu Ruata ringanni pal-

laʔagu apan mapia. ³Eteudde apianne wuʔru maaʔuassa naungngu Mawu Ruata, Punnu Saʔamatti ite. ⁴Itou maapulu tadea'u anambo n taumata maasomba asasaʔamatta wuʔru masingkatu apapia. ⁵Ana waugu, tumba'u pia sambau Mawu Ruata, wuʔru tumba'u sangkatou mananangnga n Mawu Ruata wuʔru taumata, eteudde Kristus Yesus. ⁶Itou sangkatou taumata apan suete nanantillu watangan-Ne ipamalloso anambo n taumata wuassu manga rosa mangitou. Ringannu udde Mawu Ruata napaalʔatta'a su tempo apan na'etta'a, manungku Itou maapulu tadea'u anambo n taumata masaʔamatta. ⁷Wuʔru ana waugu eteudde ia'u nirolokka inai ringannu manga taumata waʔine Yahudi iapapasingkata simangitou watti'a su ola'u pangangimanna apan atonna. Apan ta'u iwabatti'a indi udde atonna, Ia'u tawe mamahia.

⁸Ia'u maapulu tadea'u suapan tampa m papunna esakka umaliomanna ringannu naungnga susi, tawe asasa'u ara'e pabbawawuʔo.

⁹Rinone papunna wawine mallogakka watanganne ringannu tawe ete pia lembone wuʔru mappedetu pedeta pia atoranne. Arie mappaattu uta'a atokke maasili ara'e manga laʔogakka wuʔawanna ara'e mutiara, ara'e laubba aregane massagada. ¹⁰Arawe rinone wawine mallogaka watanganne ringannu manga pallaʔagu apan mapia su ereapa udde rinone olaannu wawine apan massubba Mawu Ruata. ¹¹Wawine rinone mangngurumma ringannu maʔannaba wuʔru matuʔruta. ¹²Ia'u mapasaʔa amungkangu wawine mangngarra'a ara'e mamarenta esakka; imangitou rinone maʔannaba. ¹³Ana waugu paarorone nariaddi eteudde Adam wua udde Hawa. ¹⁴Wuʔru waʔine Adam, ewe'e ete wawine apan niawono'anna, na'oma n sara nilumawangnga parenta Mawu Ruata. ¹⁵Salaiwe aroddi, wawine sarun masaʔamatta ringannu mangunsiwe n ana'a, sambaʔiate itou ringannu masaʔrionto'a sidutu mangngimanna si Kristus wuʔru sidutu marangngu taumata waine wuʔru mabbiakka huna Mawu Ruata sassane.

Mallaʔu'adda jamaatta

3 Mangke atonna wisara'u indi, "Taumata apan maapulu maola'a mallaʔu'adda jamaatta, maapulu n sambau manara apan maarega." ²Sangkatou mallaʔu'adda jamaatta rinone taumata tawe saʔane, tumba'u sangkatou awingnge, masabare, pande, wuʔru maaduna; itou maapulu manolo'oho raho su waʔene, wuʔru wotongnge mangarra'a taumata; ³arie taumata tarra wu'anna, ara'e tarra wawuʔo. Ewe'e itou rinone sangkatou masaʔrionto'a, wuʔru maʔutu m paddarame. Tawe wotongnge itou waʔiu n roitta. ⁴Rinone itou masingkata mangatokku laʔorro m baʔene ringannu mapia, wuʔru mangarra'a aʔaʔranangnge matuʔruta wuʔru maadatta sitou. ⁵Ana waugu amungkangu taumata wagga manga-

tokku laḷoḷḷo m waḷene sassane, ereapa itou wotongnge mangatokku jamaattu Mawu Ruata? ⁶Sangkatou mallala'uada jamaatta tawe wotongnge taumata wakkute sinumutta Saḷḷani, ana waugu takka itou mabbala mawunga see awontohanna ere Setanna dorone. ⁷Rinone itou taumata apan pia aranne mapia sulaḷummu soa; ana waugu amungkangu tawe aroddi, ne itou sarun alaundahannu taumata, na'oma n sara manawo su lima n Setanna.

Masasumbala jamaatta

⁸Rinone masasumbala jamaatta lai taumata mapia wuḷḷu matuḷida; tawe waḷiu n roitta tawe tumanite n manambo ma'inumma anggore. ⁹Rinone imangitou matohassa su pangangimanna ringannu naungnga waresi su alaḷḷa'u pangangimannu taumata n Saḷḷani apan suete nia-paaliatta'u Mawu Ruata. ¹⁰Rinone imangitou iannamma asuene, wuḷḷu amungkangu imangitou tawe saḷane, wakkute udde imangitou wotongngete massumbala sulaḷummu jamaatta. ¹¹Awingngi mangitou lai rinone taumata mapia, waḷine taumata apan taḷḷa watti'u wahia. Imangitou rinone masingkata mattuḷḷadana, wuḷḷu tawe mamahia su alaḷawo'u inolaanna. ¹²Masasumbala jamaatta rinone awingnge tumba'u sambau. Rinone itou masingkata mangatokku alaḷḷanangnge wuḷḷu laḷoḷḷo m waḷene ringannu mapia. ¹³Manga taumata apan massumbala ringannu mapia sulaḷummu jamaatta, sarun addatanna wuḷḷu lembon waḷḷani mabbisara su ola'u pangangimanni mangitou si Kristus.

Addapingu agama ng kite

¹⁴Ia'u mangantimma tate maḷanu lai ia'u sarun mattembo si'o. Sa-laiwe aroddi, ia'u namoḷḷetu suratta indi lai si'o, ¹⁵tadea'u amungkangu ia'u maḷannu, i'o masingkate ereapa iite mabbiakka maola'a pabbawalagu Mawu Ruata, eteudde jamaattu Mawu Ruata apan wiakka. Ete jamaatta indi apan naola'a alu tatungkale wuḷḷu rapappaku alaḷḷa'a apan narḷḷino wuassu Mawu Ruata. ¹⁶Tawedu saran sangkatou wotongnge massinaada, aroddi ahewalle addapingu agama ng kite:

Itou namasilo m watanganne sulaḷummu lihiddu taumata,
wuḷḷu niapaaliatta'u Ghaḷḷaḷaḷo Mawu Ruata,
see aellehannu manga mala'ekatta.

Wattinge niapararingikka su wallatu manga pabbawalaga,
wuḷḷu Itou apangimananna su ahewallu runia
wuḷḷu niapaasengkenga su surga.

Manga huru awusu

4 Gharraho Mawu Ruata ringannu masemakka nabbisara manungku su tempo apan sarun rumanta, sangkawageanganna taumata sarun massinaaddi Kristus. Imangitou sarun tumuruttu manga gharraho apan manggaliwu wurru tumantalonga manga alarra'u gharraho laleo, ²apan niapaasingkatu taumata lilangkamafe'a wurru tarra wahia. Lalummu naunggu manga taumata udde marandumpe. ³Imangitou manggarra'a taumata ana see tawe maawingnga wurru tawe umanna anna ipappalli. Sumbali anna udde niola'u Mawu Ruata iapaanna ringannu aadiangkamanna Sitou wuassu taumata apan suete nangimanna si Kristus wurru naailalate alarra'a apan atonna wuassu Mawu Ruata. ⁴Alawo'u saranapa apan niola'u Mawu Ruata udde mapia, wurru tawe saran sambau lai apan sarun ipappalli amungkangu suete nisengkamma ringannu aadiangkamanna su Mawu Ruata. ⁵Ana waugu alamatta wuassu Mawu Ruata wurru aaliomanna mauola'a anna udde tawe palline.

Mangangimbe si Kristus Yesus apan mammanara ringannu mapia

⁶Amungkangu i'o mangarra'u sarangkanambone udde su manga turanga su pangangimanna sambau, i'o sarun maola'a mamamanara n Kristus Yesus apan mammanara ringannu mapia. Wurru i'o sidutu mappaduli niawanu ringannu wisara Mawu Ruata apan pangngimananni ite, wurru ringannu manga alarra'a apan atonna apan suete nipangimanannu alannunete indi. ⁷Paaraua'u manga watti'a wawahia apan tawe gunane. Rinone wadangu inaramma su pabbiarra'na mattarramawu. ⁸Mannarammu wadanga tumba'u adio'a hunane, arawe mannarammu pangangimanna mahuna su alawo'u inolaanna, ana waugu pia paaire su ipabbiakka tempo indi wurru tempo addantane. ⁹Olangge udde atonna wurru rinone sengkamanna wurru pangimananna ringannu ahe-wallu naungnga. ¹⁰Ana waugu udde iite mammanara marimadda, ana waugu iite pia antimma atonna su Mawu Ruata apan wiakka; eteudde Punnu Salamattu anambo n taumata, nangillembu taumata apan mangngimanna.

¹¹Tantiroa'e sarangkanambone udde wurru dolorra'e manga taumata tumuruttu. ¹²Arie mamala n sangkatou, taumata ma'ellega si'o adio'a ana waugu i'o ta'e umbasanna. Arawe rinone i'o maola'a tulada su manga taumata apan mangngimanna hattonu wurru palla'agunu, su ola'u daranggunu su sansulungu wurru mangngimanna Mawu Yesus

Kristus, ringannu naungnga apan waresi. ¹³Tantañanna udde, ma'oma n sara ia'u rumanta, i'o ñinone paarimadda mabbasa n Wuke Susi su saruannu manga taumata, wuñru manna simangitou wuñru manggarra'a simangitou. ¹⁴Arie i'o maabuñi mappattu apande wuassu Gharraho Mawu Ruata apan nionggolla si'o su tempo manga piarra'u jamaatta nangaddo n lima mangitou su wowo m puanu, wuñru manga nabi namasingkatu tanata Mawu Ruata su ola'u ririnu. ¹⁵Pammanarate sarangkanambone udde ringannu atonna-tonna, tadea'u manaranu asiloannu awadaalla. ¹⁶Paariagai ririnu wuñru paariagai lai añañranggu. Ñinone i'o matuñruta ma'ola'a sarangkanambone udde, ana waugu ringannu aroddi i'o sarun manañamatta mapia su ririnu sassane aroddi lai manga taumata apan maddaringikka si'o.

Pamamanara su saruannu manga taumata apan pangangimanna sambau

5 Arie i'o tumanite n marraigissa mamuño taumata mattimmaranna wuassi'o arawe ahei itou maddaringikka wisaranu, olaawe itou ere iamangngu. Aroddi lai manga taumata umbasanna, marñuala, olaawe ere tuñranggu, ²wuñru manga wawine timmade ere inangngu. Wuñru manga marñuala ñinone olaannu ere sangkatou tuari, ringannu pallañagu apan waresi.

³Addate manga wawine wañu apan atonna-tonna mabbiakka sassane.

⁴Arawe amungkangu sangkatou wawine wañu pia añañrana'a ara'e manga pulunna, ete imangitou udde apan paarorone onggoñannu tatantiro manungku imangitou ñinone ma'ellega lañummu wañe n mangitou, wuñru mabbalissa apapia n timmade wuñru iupungngi mangitou. Ana waugu pallañagu udde mañuassa naungngu Mawu Ruata. ⁵Wawine wañu apan atonna-tonna sassane, wuñru tawe isai-sai apan wotongnge mammaduñi sitou, tumba'u uaantimma Mawu Ruata. Allo ñabbi itou sidutu u'añiomanna su Mawu Ruata madorongnga tuñungan-Ne. ⁶Arawe wawine wañu apan maapulu mabbiakka mañuassa, itou natete salaiwe itou ta'e wiakka. ⁷Wañoa'e manga tatantiro indi simangitou, tadea'u imangitou mabbiakka tawe sañane. ⁸Arawe amungkangu pia taumata apan tawe mamaduñi manga tuñrange, nangillembo ete lañoño m bañene sassane, taumata udde nassinaaddu pangangimanne; itou maddañeoanne wuassu taumata apan tawe mangngimanna.

⁹Tumba'u wawine wañu apan naatuñruta atoranna indi wotongnge iworñeta sulañummu arannu manga wawine wañu; apan uukke tawe maurangnga wuassu annumu puño su tonnane, dorone tumba'u paassa maawingnga, ¹⁰tinumelengga ere sangkatou wawine apan ma'ola'a apapia,

ereindi: itou suete namaduḷi manga aḷaḷḷanangge ringannu mapia, naungnge maḷuassa mangimbe raho matana'a su waḷene, mangimbe manga taumata mangngimanna, massumbala manga taumata susa, wuḷḷu mammanara atonna-tonna aḷawo'u manara apan mapia.

¹¹Arie pabboḷḷeta'a su wuke udde manga wawine waḷu apan ta'e dario'a. Ana waugu amungkangu apendammu apulu naungngi mangitou matohassa apia, imangitou maapulu maawingnga apia, wuḷḷu manantangke n Kristus. ¹²Ne imangitou nassaḷa ana waugu tawe tinumuḷḷuta paaire apan nionggolla sitou. ¹³See lai imangitou mangke manggolo'a allo uawaḷeḷenganna sussutta su waḷe n taumata. Wuḷḷu araḷeoanne lai eteudde imangitou mandaḷeo arannu taumata waine wuḷḷu sussutta su hatto n taumata waine see uahahatto manga inolaanna apan tawe ḷinone ipagahatto. ¹⁴Ana waugu udde ia'u maapulu tadea'u manga wawine waḷu ta'e dario'a maawingnga apia, maasomba ana'a wuḷḷu mammaduḷi laḷoḷḷo m baḷe, tadea'u manga seetti ite tawe maasomba tempone mandaḷeo aranni ite. ¹⁵Ana waugu pia manga wawine waḷu apan niaḷiwunete tinumantalongnga ghaḷḷaḷa laḷeo. ¹⁶Arawe amungkangu sangkatou wawine n Saḷḷani pia sangkatou laḷoḷḷo n waḷene inawaḷuanna, itou ḷinone massumbala manga wawine waḷu udde; arie pabbala'a jamaatta mapaduḷi simangitou. Ringannu aroddi jamaatta wotongnge massumbala manga wawine waḷu apan atonna-tonna tawe tuḷḷrange.

¹⁷Piaḷḷa'u jamaatta apan ma'ola'a manarane ringannu mapia, ḷinone onggolaḷḷu aaddata paarua anambone, nangillembu wuassi mangitou apan maḷḷimadda mannase wuḷḷu mangarḷa'a. ¹⁸Ana waugu sulaḷummu Wuke Susi uawoḷḷetta, "Sapi apan tantaḷanna maḷḷinda ganduma mapataḷei watu n ganduma wuassu raene, arie pa'iitta moḷḷonge," wuḷḷu lai "Taumata apan mammanara ḷinone manengkamma laḷantake." ¹⁹Arie manengkamma aansilla su saruannu sangkatou piaḷḷa'u jamaatta, tabane'e tohasannu rua ng katou sakassi ara'e nallebe wua isudde. ²⁰Taumata apan ma'ola'a rosa, ḷinone tagguanna su saruannu anambo n jamaatta, tadea'u ingana'a waine lai matta'utta.

²¹Su saruannu Mawu Ruata, Kristus Yesu wuḷḷu manga mala'ekatta apan napile, ia'u sumaḷande tadea'u i'o tumuḷḷutta manga tatantiro indi ringannu tawe massunna laḷeo su saruanni sai-sai ringannu tawe masasamba'a. ²²Arie tumanite maḷihakka mangalaḷamatta sangkatou itenega maola'a mangangimbe Mawu. Amungkangu taumata waine marosa, arie lai aḷiuannu rosa udde. Paariagai ririnu tadea'u sidutu waresi.

²³Arie lai tumba'u ma'inumma ua'e; pa'inumma lai anggore adio'a ipallaḷima tinainu mammanara, ana waugu i'o masokka rumadda'a.

²⁴Rosa n sambageanganna taumata, ro'e n ḷaambe niparikisanna, niasiloante ringannu masemakka. Arawe rosa n taumata waine wakḷute asingkatanna saḷimmurine. ²⁵Aroddi lai manga inolaanna mapia lapiddu

asiloanna. Wuṛṛu apan masahadda asiloanna, tawe sidutu mangke uawuni.

6 Manga taumata n Saṛṛani apan naola'a allangnga, ṛinone massunna manungku mawu mangitou ṛinone addatanna, tadea'u taumata tawe wotongnge mandaḷeo arannu Mawu Ruata ara'e aḷaṛṛa'i ite. ²Manga allangnga apan mawune taumata n Saṛṛani, tawe wotongnge mangngadio'a mawune ana waugu imangitou labbisa taumata n Saṛṛani. Ewe'e ṛinone imangitou mangimbe mawu mangitou udde ringannu lembon apiane lai, ana waugu mawu apan a'imbeanna ringannu mapia, eteudde sambau taumata mangngimanna apan arangnguanna.

Aḷaṛṛa'a apan tawe su ṛinone wuṛṛu paa'ala tutune

Sarangkanambone indi ṛinone iaṛṛa'a wuṛṛu itantironu. ³Isai-sai apan mangngaṛṛa'u aḷaṛṛa'a uapapaṛṛala n aḷaṛṛa'a apan naṛṛino wuassu Mawu ng kite Yesus Kristus, wuṛṛu ringannu aḷaṛṛa'u agama ng kite, ⁴ete itou taumata mawunga wuṛṛu wagga n apa-apa! Radange eteudde apulune uasasimbaka wuṛṛu uatatiakka su ola'u manga wisara na'oma n sara sumappute naungnga laḷeo, patataḷei, aḷuandaga, wuṛṛu pasasunna apan laḷeo, ⁵wuṛṛu pasase'etta apan tawe masue. Laḷannu ṛingiddu manga taumata udde niaḷiwunete wuṛṛu nassaḷate. Imangitou massunna manungku wotongnge maala wuassu agama.

⁶Atonna agama mangngonggolu auntunganna apan wahewalla, amungkangu taumata maḷuassa ringannu sarannapa apan tatahuananne. ⁷Ana waugu tawe saran sambau apan niapiddi ite sulaḷummu runia indi, wuṛṛu tawe saran sambau sarannapa apan iapiddi ite watukku liudde! ⁸Nariaddi amungkangu pia anna wuṛṛu laubba, udde wotongngete. ⁹Arawe taumata apan maapulu maola'a ala, inawono'anna wuṛṛu niasamettu aḷawo'u aapulu apan woddo wuṛṛu mandaḷeo. Manga aapulu udde ma'ola'a taumata maṛṛimunsa'a wuṛṛu masilaka. ¹⁰Ana waugu wuassu aapulu n roitta, lumappute aḷawo'u aḷaḷeo. Pia sambageanganna taumata apan maddea'a roitta na'oma n sara tate tumuṛṛutta lai aḷaṛṛa'u Saṛṛani, ana see imangitou niaṛṛiaannu manambo asasusa naṛṛimunsa'a naungngi mangitou.

Manga tatantiro si'o sassane

¹¹Arawe ete i'o taumata tatahuanannu Mawu Ruata, nariaddi i'o ṛinone mangindau n sarangkanambone udde. Padea'a maola'u taumata mapia su aellegu Mawu Ruata, apan mattaṛramawu Mawu Ruata, mang-

ngimanna si Kristus, mandanggu sansulunge, masabare sulaŕummu asa-susa, wuŕru masarŕionto'a. ¹²Pabbiakke atonna-tonna maola'a sangkatou taumata n Sarŕani tadea'u i'o wotongge maapaŕarŕo aonggolou wiakka tutune wuŕru maŕannu-ŕannu. Ana waugu eteudde Mawu Ruata namago si'o su tempo i'o nanga'u su saruannu awadaalla manungku i'o mangngimanna si Kristus. ¹³Wuŕru orassa indi su saruannu Mawu Ruata apan nangonggolou niawa su aŕawo'u sarannapa, wuŕru su saruanni Kristus Yesus apan nangonggolou tatiala atonna si Pontius Pilatus, ia'u madorongnga indi wuassi'o: ¹⁴Paaturŕute anambo n parenta udde ringannu naungnga waresi wuŕru tawe urangge ma'oma n sara Mawu ng kite Yesus Kristus rumanta apia. ¹⁵Daranta-Ne sarun itantunnu Mawu Ruata sassane su tempone apan narŕino. Tumba'u Itou sassane uatahuanna; Itou mawantuga, Ratu wuassu aŕawo'u ratu, wuŕru Mawu wuassu aŕawo'u mawu. ¹⁶Ete Itou apan tawe arŕinoannu papate; Itou mabbiakka sulaŕummu asasemakka apan tawe wotongge aundanianni sai-sai. Tawe saran sangkatou taumata apan suete naasilo, ara'e wotongge ma'ellega Sitou. Ete Sitou addata wuŕru tarŕino ma'oma n sara maŕannu-ŕannu! Amin.

¹⁷Su manga taumata ala su runia indi, ŕinone i'o madorongnga tadea'u imangitou arie mamunga wuŕru arie mangantimma manga saranapa apan tawe tantune - ereudde paa'ala. Imangitou ŕinone pia antimma su Mawu Ruata apan mangonggolou aŕawo'a siite ringannu manambo tadea'u iite wotongge maatemma paa'ala udde. ¹⁸Padorongke simangitou mapaaŕiatta'u apapia, ringannu ma'ola'a aŕawo'u inolaanna apan mapia, masarŕionto'a, wuŕru laghune mapia. ¹⁹Ringannu arodidi imangitou mangngammulu paa'ala apan maola'a sambau roitta uaraddo apan mapia su tempo addantane. Wuŕru ringannu udde imangitou sarun maasomba wiakka ma'oma n sara maŕannu-ŕannu, eteudde wiakka apan tutune.

²⁰Apa apan suete tinantilla siamiu, paariagai udde mapia-pia, Timotius! Paarau manga hatto apan tawe gunane wuŕru patatatiakka su ola'u inolaanna apan mangngaliwu isassago "Asingkata". ²¹Ana waugu pia manga taumata apan mabbisara manungku imangitou pia asingkata udde, na'oma n sara massaŕate amatta wuassu manga aŕarŕa'u Sarŕani apan pinangimananni mangitou paarorone.

Antimanna Mawu Ruata mangaŕamatta manga turŕangnga.

Tabea ng kami,
Paulus

SURATTI PAULUS ARUANE SI TIMOTIUS

WISARA TAŁAANE

Suratti Paulus Aruane Si Timotius, wageangnge ahewałanne wawořre-tannu manga tatantiro si Timotius sassane, eteudde hawe sangkamaranna wuřru: masasumbala apan ta'e dario'a. Punnu lałořro n tantantirone eteudde tadea'u Timotius masabare. Itou tattantiroanna wuřru sassasanna tadea'u sidutu matuřruta mannałiawukku watti'a su ola'u Mawu Yesus Kristus see lai uaaggasa Paaire Tabbe wuřru Watti'u Ałaluassa wuassu Mawu Ruata, salaiwe uasaruanna asasusa wuřru pattatiakka.

Timotius sassane niapaanaungnga tadea'u tawe lumało'a sulałummu pattatiakka apan woddo wuřru tawe gunane. Pattatiakka ereudde tawe gessine apa-apa, tumba'u mandałeo řingidu taumata apan maddaring-ikka pattatiakka udde.

Su saruannu sarangkanambone udde Timotius niapaanaungnga tadea'u mattanno tułada m wiakki Paulus – eteudde panggangimanne si Kristus, asasabarene, darangngune, atatammude, wuřru asasusa apan niapendamane sulałummu pananansara sitou.

Lałořrone

Paarorone	1:1-2
Daralo wuřru sasasa	1:3-2:13
Tatantiro wuřru iapaanaungnga	2:14-4:5
Tała'a su ola'u wiakki Paulus	4:6-18
Panginsueanne	4:19-22

1 ¹⁻²Timotius, ana'u apan aranguanna! Ia'u Paulus, namorretu suratta indi si'o, wuɽɽu mangngantimma doronganna Mawu Ruata lamangnga wuɽɽu Mawu ng kite Kristus Yesus mangonggolu aɽamatta, darangu wuɽɽu paddarame si'o.

Wuassu apulu Mawu Ruata, ia'u nitenega naola'a rasulli Kristus Yesus wuɽɽu nirolokka mamasingkatu wiakka apan pina'ire Mawu Ruata. Wiakka udde nisengkammi ite ana waugu iite uaaukka ringanni Kristus Yesus.

Aadiangkamanna wuɽɽu tatantiro

³Ia'u umaɽiomanna su Mawu Ruata apan a'imbeangku ringannu awawira naungnga ere lai suete niola'u iupungngu aɽamona'u dorone. Ia'u sidutu maadiangkamanna su Mawu Ruata napawe ia'u maanaungnga si'o sulaɽummu aɽiomanna, mapia allo ara'e ɽabbi. ⁴Ia'u maanaungnga asasusa naungngu. Ana waugu udde ia'u maapulu tassuɽunge maisasombanu tadea'u atonna-tonna ia'u maɽuassa, ⁵Ia'u maanaungnga pangangimannu apan atonna-tonna si Kristus, ere lai pangangimanni iupungngu Lois wuɽɽu inangngu Eunike. Wuɽɽu ia'u mangantimma i'o lai pia pangangimanna ereudde. ⁶Ana waugu udde ia'u mapaanaunga si'o mapawiačku aɽamatta apan nionggolu Mawu Ruata si'o su tempo ia'u nangado n lima'u si'o. ⁷Ana waugu Ghaɽraho apan nionggolu Mawu Ruata siite, waɽinewe Ghaɽraho apan ma'ola'a siite mataɽo. Arawe Ghaɽraho Mawu Ruata udde maatohassa siite, nepene n darangu wuɽɽu maɽɽaddannu watanganne.

⁸Ana waugu udde arie masili mangonggolu tatiala su ola'u Mawu ng kite, wuɽɽu arie lai masili su ola'u riri'u, apan niɽruumanna ana waugu Itou. Arawe ɽinone i'o ringannu atatohassa wuassu Mawu Ruata, sidutu sulaɽummu asasusa lai ana waugu Watti'u Aɽaɽuassa udde. ⁹Mawu Ruata mannaɽamatta siite wuɽɽu namago siite, tadea'u maola'a aɽaɽanang-Nge. Itou na'ola'a udde waɽine ana waugu apa apan suete nimmanara ng kite, ewe'e ana waugu panduman-Ne sassane wuɽɽu darangu-Ne. Itou nandangngu siite sulaɽummi Kristus Yesus ro'e n runia indi taambe niriaddi. ¹⁰Wuɽɽu orassa indi, Mawu Ruata napaaɽiatta'u aɽamanne siite ringannu daranta n Ratu m Punnu Saɽamatti ite Kristus Yesus. Mawu Yesus napassuɽrubawa n tarrino m papate wuɽɽu nangapiddu wiakka sarangkaɽo'enge sulaɽummu Watti'u Aɽaɽuassa udde.

¹¹Su ipabbatti'u Watti'u Aɽaɽuassa uddewe Mawu Ruata namile sia'u maola'a rasul wuɽɽu huru. ¹²Ana waugu udde ia'u natataɽranggu sarangkanambone indi, arawe ia'u sidutu mangngimanna, ana waugu

ia'u masingkata atonna, isai apan pangimananku. Ia'u mangantimma manungku apa apan suete nitantilli Tou sia'u, Itou lai wotongnge maariaga udde saran Allo ng Kiamatta. ¹³Tantuṛṛute ringannu atonna-tonna aḷaṛṛa'a mapia indi apan suete ta'u nionggolla siamiu. Wuṛṛu ṛinone i'o sidutu uaagasa pangangimanna wuṛṛu darangngu apan naola'a tatahuananni ite ana waugu uaaukka ringanni Kristus Yesus. ¹⁴Ringannu sumbala wuassu Ghaṛṛaho Mawu Ruata apan wiakka sulaḷummu wadangi ite, ṛinone i'o uariaga ringannu mapia-pia manga inolaanna maaregga apan suete tinantilla si'o.

¹⁵I'o masingkata manungku anambo n taumata su leta'u Asia suete nanantangku, nasutta lai Figelus wuṛṛu Hermogenes. ¹⁶Arawe laḷoṛṛo m baḷe n Onesiforus masokkate malluassa naungku. Doronganna Mawu mapaaḷiatta'u darangngu-Ne simangitou. Salaiwe ia'u sulaḷummu tutupanna, Onesiforus tawe masili n inolaangku udde. ¹⁷Aroddi ia'u na'omate su Roma, itou lapiddu nadea'a sia'u na'oma n sara itou nassomba'u. ¹⁸Wuṛṛu i'o masingkata manungku su Efesus itou masokka mantuḷungku. Doronganna Mawu mapaaḷiatta'u darangngu-Ne sitou su allo Mawu mamarikissa anambo n pabbawalagu taumata.

Tantara n Kristus apan matuṛṛuta

2 Timotius, ana'u! Ṛinone i'o mabbali matohassa ana waugu aḷamatta apan nionggolla siite, ana waugu iite uaaukka ringanni Kristus Yesus. ²Aḷaṛṛa'a paarorone suete niaringiṛṛanu wuassia'u su saruannu awadaalla, ṛinone itantillu su manga taumata apan wotongnge apangimananna wuṛṛu pande mangarra'a taumata waine.

³Po ṛinone sarun matataṛṛanga lai ere tantara n Kristus Yesus apan matuṛṛuta. ⁴Sangkatou tantara apan tantaḷanna mammanara, maddiri mammanara hausanne sassane, ana waugu itou maapulu malluassa naungngu tembonanne. ⁵Sangkatou mattandinganna tawe maauntunga sulaḷummu sambau tandinganna, amungkangu itou tawe tumuṛṛutta manga atoranne. ⁶Mabbawailla apan suete nammanara maṛṛimada, ete itou apan paarorone maasomba hessi n sinuananne. ⁷Ringira'a wisara'u udde, ana waugu Mawu sarun mangonggolu ṛingidda si'o ipassunna sarangkanambone udde.

⁸Naungete indi: Watti'u Aḷaḷuassa apan ta'u niapaasingkata udde, eteudde watti'a su ola'i Yesus Kristus, papapulunni Daud; ete Itou Kristus apan nabbiakka apia wuassu papate. ⁹Ana waugu mabatti'u Watti'u Aḷaḷuassa udde, ia'u natataṛṛanga; ewe'e lai na'oma n sara niṛṛapussa ere sangkatou taumata laḷeo. Arawe wisara Mawu Ruata tawe iaṛṛapussa. ¹⁰Ana waugu udde ia'u tawe matta'uttu sarangkanam-

bone udde hunane su manga taumata apan suete nipile Mawu Ruata, tadea'u imangitou lai maasomba asasa lamatta apan ionggola sulalummi Kristus Yesus, wuṛṛu tatantalongannu awawantuga saran maḷannu-ḷannu.

¹¹Mangke atonna wisara'u indi,

”Amungkangu iite suete nate suadio'a ringanni Tou,
iite sarun mabbiakka lai suadio'a ringanni Tou.

¹²Amungkangu iite sidutu matammuda,

iite sarun mamarenta lai suadio'a ringanni Tou.

Amungkangu iite massinaadi Tou,

Itou lai sarun massinaadi ite.

¹³Amungkangu iite maḷawangnga

Itou sidutu matuṛṛuta

ana waugu Itou tawe maapanompolla watangan-Ne sassane.”

Allangnga apan naasomba daralo

¹⁴Rinone i'o mapaanaungnga su manga taumata su ola'u saranganambone indi. Su saruannu Mawu Ruata, tantiroi imangitou, tadea'u tawe mattatiakka su ola'u manga wisara wakku. Udde tawe gunane, ewe'e tumba'u mangngaliwu manga taumata apan maddaringikka.

¹⁵Rinone i'o mammanara atonna-tonna tadea'u i'o a'uannu Mawu Ruata mola'a sangkatou taumata apan wotongnge mangimbe Sitou. Pappandumpe tadea'u i'o tawe masili su ola'u manaranu, ewe'e mangngarṛa'u aḷarṛa'a apan su ṛinone wuassu Mawu Ruata. ¹⁶Pangindau manga hatto tawe gunane wuṛṛu mangaluandaga Mawu Ruata. Manga hatto ereudde tumba'u maaola'a taumata lembon daḷeo. ¹⁷Aḷarṛa'u manga taumata udde maalju ere ṛadda'a kanker apan mahiadda. Su wallatti mangitou nasutta lai Himeneus wuṛṛu Filetus. ¹⁸Imangitou suete nalliu wuassu aḷarṛa'a apan su ṛinone, wuṛṛu nangaliwu m pangangimannu sangkawageanganna taumata. Imangitou nabbisara manungku pabbawangunna wuassu papate suete nariaddi. ¹⁹Arawe pinangiananne matohassa apan niola'u Mawu Ruata, tawe ia'io'a. Su wowone uawoṛṛetta arendi, ”Mawu masingkatu manga taumata pussa'a-Ne”, wuṛṛu ”Taumata apan mabbisara manungku itou pussa'a Mawu, taumata udde ṛinone tate ma'ola'a inolaanne apan nassaḷa”.

²⁰Sulalummu waḷe apan wahewalla pia aḷawo'u sarannapu. Piaddu niola'a wuassu saḷa'a ara'e, wuḷawanna, arawe piaddu lai wuassu alu ara'e leta'a. Pia ipapaatta su pandumanna apan mawantuga, wuṛṛu pia lai ipappaatta su tudda inanaramanna. ²¹Taumata apan mammaresi watanganne wuassu anambo n aḷaḷeo, taumata udde sarun ipaatta su pandumma apan apianne. Itou maola'a pussa'a apianne wuṛṛu mahuna



su mawune. Itou sasaddianna ipaatta su aławo'u manara apan mapia. ²²Pangindau manga lałumanna'u taumata dario'a. Pabbiakke tumuřruttu apulu Mawu Ruata, paatuřruta su aławrangnge wuřru paarangngu taumata sansuļunga, wuřru pia atatammudu naungnga. Pabbiakke aroddi suadio'a ringanni mangitou apan sussaļande madorongnga tuļunganna su Mawu ringannu naungnga waresi. ²³Arie lumaļo'a su pattatiakku manga taumata woddo apan waggan apa-apa. Iō masingkata manungku sarangkanambone udde tumba'u mapaaļapputu pattatiakka. ²⁴Taumata apan mammanara manara Mawu tawe řinone mattatiakka; itou řinone masarřionto'a su anambo n taumata, wuřru wotongnge mangarřa'a taumata ringannu mapia wuřru masabare. ²⁵Itou řinone ringannu masi'ome mangarřa'a manga taumata maļawanga; doronganna Mawu Ruata sarun mangonggolu allo su manga taumata udde mawaļu wuassu manga rosa mangitou wuřru ma'illaļa aļarřa'a su řinone. ²⁶Ringannu aroddi imangitou maatutukke apia, wuřru napallose wuassu sedda n Setanna apan suete nangiitta simangitou wuřru mammata'i mangitou tumantalongnga apulune.


Manga allo panginsueanne

3 Naunge'o indi: Su manga allo panginsueanne sarun pia asasusa manambo. ¹Taumata tumba'u mařringiddu ririne sassane, apulune roitta, mawunga wuřru taļimořronganna. Imangitou tařra adio'a taumata, tařra rona timmade, wagga maadiangkamana, wuřru maddantinu ino-

laannu Saṛrani. ³Imangitou maddiri mandangngu taumata sansuḷunge, tawe mangonggolu ampunga, imangitou apulune mandaḷeo arannu taumata waine, taṛra wata'a, imangitou maṛṛaggisa, wuṛru maddiri n apapia. ⁴Imangitou apulune mandaḷeo taumata, mawunga wuṛru tawe maṛṛingidda maḷo'e. Imangitou apulune tuttuṛruta laḷumanna'u runia wuassu tumuṛrutta aḷaṛra'u Mawu Ruata. ⁵Salaiwe su ola'u wadanga, imangitou matuṛruta mappamaṛtu tita n agama, arawe maddiri manengkamma laḷoṛro n watiti'u agama udde sassane. Paarau manga taumata ereudde. ⁶Pia su wallatti mangitou apan suete sinumutta su manga waḷe, see mammono'a manga wawine lome apan anamboanne rosane wuṛru paparentannu anambo n apulune. ⁷Manga wawine udde sidutu mammiṛra'a, arawe tawe saran paassa maasunna aḷaṛra'a apan atonna wuassu Mawu Ruata. ⁸Su ereapa Yanes wuṛru Yambres nilumawangnga si Musa rorone, aroddi lai manga taumata udde nilumawangnga aḷaṛra'a wuassu Mawu Ruata. Riṅidi mangitou nahohakke, wuṛru pangangimanni mangitou nisiladde. ⁹Arawe imangitou tawe maasomba apa-apa, ana waugu awawoddo mangitou sarun asingkatannu anambo n taumata, ere lai nariaddi si Yanes wuṛru Yambres.

Manga tatantiro

¹⁰Arawe i'o suete tinumuṛruta manga aḷaṛra'u, pallaḷagu'u, wuṛru tudda pabbiṛrangku. I'o suete naasilo sassane ereapa ia'u atonna-tonna mangngimanna si Yesus Kristus wuṛru marangngu su sansuḷunggu taumata. I'o lai masingkatu asasabare'u wuṛru atatammu'u. ¹¹I'o naasilote sia'u sassansaranna wuṛru ia'u uatataṛranga. I'o masingkatu anambo n apan nariaddi sia'u su Antiokhia, su Ikonium, wuṛru su Listra; wuṛru i'o masingkata lai anambo n asasusa'u! Arawe Mawu nanaḷamatta sia'u wuassu sarangkanambone udde. ¹²Atonna anambo n taumata apan maapulu mabbiakka mattaṛramawu, wuṛru mabbiakka uaaukka ringanni Kristus Yesus sarun sansaranna, ¹³arawe manga taumata laḷeo wuṛru manga taumata taṛra ḷinga sarun mabbaḷi lembon aḷeoanne. Imangitou mallinga taumata waine, wutte'e imangitou sassane niaḷinganna lai. ¹⁴Arawe i'o, Timotius, ṛinone i'o sidutu uaaggasa manga aḷaṛra'a narṛino apan suete niaṛra'a si'o wuṛru pangimanannu atonna; ana waugu i'o masingkata isai manga hurunu. ¹⁵I'oṛinone mannaungnga manungku ro'e n ta'e dario'a i'o masingkate m Wuke Susi. Wuke Susi udde wotongnge mangonggolu pasasunna si'o tadea'u maasomba asasaḷamatta sulaḷummu pangangimanna si Kristus Yesus. ¹⁶Sarangkanambone apan uawoṛretta sulaḷummu Wuke Susi, tinantiro Mawu Ruata wuṛru pia gunane ipangaṛra'a aḷaṛra'a su ṛinone, ipanaggu, wuṛru ipangapia apan nassaḷa,



Tampa m pananahipunanna wuke tempo n dorone (3:15)

wurru ipangarra'a taumata tadea'u mabbiakka tumuruttu apulu Mawu Ruata. ¹⁷Ringannu Wuke Susi udde taumata apan mangngimbe Mawu Ruata wotongnge peddetannu asasuungnga su alawo'u manara apan mapia.

4 Kristus Yesus sarun rumanta apia su runia indi mamarikissa manga taumata apan wiakka wurru nate; wurru Itou sarun rumanta marenta ere sangkatou Ratu. Ana waugu udde ia'u sumalande siamiu su saruannu Mawu Ruata wurru Kristus Yesus; ²Rinone i'o mamasingkatu watti'a wuassu Mawu Ruata udde, wurru sidutu mammata'a tadea'u taumata maddaringikka, apa imangitou maapulu ara'e maddiri. Rinone i'o mapaangimannu taumata, manta'e m pasasala, wurru mangonggolu sasasa simangitou. Arra'ete taumata ringannu anambo n asasabare. ³Ana waugu sarun a'omanna tempone taumata maddirite lai madingikka alarra'a apan narfino. Arawe imangitou sarun tumurutta apulu mangitou sassane, wurru mangammulu huru manambo iapaarra'u manga inolaanna apan mapia su aringikku talinga n mangitou. ⁴Imangitou sarun marapinga talinga su watti'a atonna, arawe sarun madingikka wa'e tawe gunane. ⁵Salaiwe aroddi, i'o rinone uaparenta watangannu sulalummu alawo'a apan mariaddi. Paasabare sulalummu asasusa, ola'e manaranu mabatti'u Watti'u Alaluassa udde wurru amata'e ringannu mapia-pia manaranu ere sangkatou mangangimbe Mawu Ruata.

⁶Su ola'u riri'u, nia'omante tempone ia'u sarun mate maola'a sambau sasamba su Mawu Ruata. Tate malannu lai ia'u sarun manantanggu runia indi. ⁷Ia'u suete nattalumma ringannu mapia-pia, wurru na'omate

su akkitta panginsueanne. Ia'u sidutu tuttuṛṛuta Mawu Yesus saran pangudusanne. ⁸Wuṛṛu orassa indi laṅantaku naauntunga uaraṛṛaddo sia'u. Su Allo ng Kiamatta, Mawu, Mallaṛṛuungnga apan matuḷidda udde sarun manantillu laṅantake udde sia'u, ana waugu ia'u mabbiakka uauukka ringannu Mawu Ruata. Wuṛṛu waḷine tumba'u ia'u sassane apan manengkamma laṅantake udde, arawe lai anambo n taumata apan uaraṛṛaddo daranta Mawu ringannu ahewallu naungnga.

Manga tatantiro panginsueanne

⁹Rantate ringanku ringannu maḷiha-ḷihakka, ¹⁰ana waugu Demas suete nanantangku ana waugu nandangute runia indi. Itou nanute watukku Tesalonika. Kreskes nabatukke n Galatia, wuṛṛu Titus watukku Dalmatia. ¹¹Tumba'u Lukas natantanga ringanku, ana waugu itou wotonge mallaḷima manara'u. ¹²Ia'u suete nandolokki Tikhikus inai watukku Efesus. ¹³Amungkangu i'o rumanta, apira'a laubbu sunge apan ta'u tinantanga su Troas su waḷe n Karpus. Apira'a lai manga wuke'u, lembonete manga wuke apan suranne niola'a wuassu pisi.

¹⁴Aleksander, taṛṛa ola'a witu'a udde suete na'ola'a manga inolaanna apan laḷeo sia'u. Mawu sarun mabbaḷissa sitou tumuṛṛuttu inolaanne. ¹⁵I'o sassane ṛinone paatehamma sitou, ana waugu itou maddiri maddaringikka watti'i ite.

¹⁶Su tempo ia'u paarorone sinumimbakka, tawe saran sangkatou apan uaringanna sia'u; sarangkanambone nanantangku. Doronganna Mawu Ruata tawe mapaasaḷa n mangitou su olangnge indi! ¹⁷Arawe Mawu uaringanna sia'u. Itou nangonggolu atatohassa na'oma n sara ia'u wotongnge mamasingkatu aḷawo'u Watti'u Aḷaḷuassa udde, tadea'u daringiṛṛanu anambo n taumata apan waḷine Yahudi. ¹⁸Wuṛṛu ia'u napallose wuassu papate. Atonna Mawu Ruata sarun mamallosa wuassu aḷawo'u pandumma apan laḷeo su riri'u. Itou sarun mangapi'u ringannu saḷamatta sulaḷummu araratuan-Ne su surga. Ṛinone Itou wantuhanna saran maḷannu-ḷannu! Amin.

Tabea Panginsueanne

¹⁹Tabea'u si Priskila wuṛṛu Akwila wuṛṛu su amonanni Onesiforus. ²⁰Erastus uatana'a su Korintus, wuṛṛu Trofimus suete tinantangku marada'a su Miletus. ²¹Amungkangu wotongnge rantate tantaḷanna taambe tempo n masunge.

Ebulus, Pudes, Linus, wuṛru Klaudia nandoho n tabea mangitou si'o; aroddi lai anambo n tuṛṛanga waine sulaḷummu pangangimanna sambau.

²²Doronganna Mawu makkundinganna si'o.

Doronganna Mawu mangaḷamatta Manga tuṛṛangnga!

Tabea ng kami,
Paulus

SURATTI PAULUS SI TITUS

WISARA TALAANE

Titus eteudde sangkatou taumata waline Yahudi apan suete sinumutta agama n Sarrani ana see naola'e ringanna sangkamanarana wufru massumbala si Paulus sulaumu manarane. Suratta indi tuddane si Titus apan su tempo udde uatana'a su Kreta ana waugu suete tinantangi Paulus poiaronodi iapapadduli jamaatta. Pia tatallu hatto apan iapaasingkatta sulaumu suratta indi.

Paaronone, Titus niapaanaungnga su ola'u pallaagu n taumata apan wotongge maola'a piarra'u jamaatta. Hatto udde iapaasingkatta ana waugu pallaagu manga taumata su Kreta anamboanne laleo. Aruane, Titus nitantiroanna su ola'u ereapa rinone itou mangarra'a alawo'u taumata apan naola'a reengannu jamaatta udde, eteudde ammulannu taumata esakka wufru wawine apan timmaddete (rinone lai mangarra'a manga taumata maddario'anna wuassi mangitou), ammulannu taumata dario'a, wufru taumata allangnga. Panginsueanne Titus niarraanna su ola'u ereapa rinone pallaagu n taumata n Sarrani. Ahunanne eteudde manungku taumata n Sarrani rinone masarriorito'a wufru maapulu m padarame, arie maddantinnu taumata, arie maapulu m pattatiakka ara'e mandanta m pabbawawulo.

Lalorone

Panattaranne	1:1-4
Manga piarra'u jamaatta	1:5-16
Manara n alawo'u ammulannu taumata sulaumu jamaatta	2:1-15
Tatantiro wufru iapaanaungnga	3:1-11
Panginsueanne	3:12-15

1 Ana'u Titus! Ia'u, Paulus, namorretu suratta indi ere ola'u sangkatou allangngu Mawu Ruata wuɽɽu rasulli Yesus Kristus. Ia'u niple wuɽɽu nirolokka mantuɽungu manga taumata apan niple Mawu Ruata tadea'u maola'a matohassa sulaɽummu pangangimanni mangitou. Ia'u lai ɽinone mangehetta simangitou tadea'u maasingkatu aɽaɽɽa'a apan naɽɽino niaɽɽa'u agama ng kite. ²Aɽaɽɽa'a udde pinangiananne wuassu antimma manungku iite sarun manengkamma wiakka tutune wuɽɽu maɽannu-ɽannu. Mawu Ruata suete na'ire m wiakka udde ro'e n panattaɽɽannu runia indi - wuɽɽu tawe mariaddi Mawu Ruata mangawusu. ³Su tempo apan suete nitantunna, Mawu Ruata mapaaɽiatta'u paaire-Ne udde sulaɽummu tanata-Ne. Tanata udde suete niwaɽo si'u, wuɽɽu ia'u namasingkatu tanata udde ana waugu darolokku Mawu Ruata Punnu Saɽamatti ite.

⁴Titus, eteudde i'o atonna-tonna ana'u, ana waugu i'o wuɽɽu ia'u suadio'a suete nangimanna si Kristus.

Ia'u mangantimma doronganna Mawu Ruata lamangnga wuɽɽu Kristus Yesus Ratu m Punnu Saɽamatti ite, mangonggolou aɽamatta wuɽɽu padderame si'o.

Manara n Titus su Kreta

⁵Ia'u manantangngu su Kreta tadea'u i'o wotongnge mangatokku manga manara apan ta'e wotongnge iaatokka. Wuɽɽu tadea'u lai i'o mamile manga piaɽɽa'u jamaatta su aɽawo'u soa. Wuɽɽu paanaunge manga tantiro'u indi: ⁶Sangkatou piaɽɽa'u jamaatta ɽinone sangkatou apan tawe saɽane; itou ɽinone tumba'u uatahuanna awingnga sangkatou; manga aɽaɽɽanangnge ɽinone mangngimanna si Kristus wuɽɽu waɽinewe ana'a laɽeo wuɽɽu tawe iaatokka. ⁷Mallaɽu'ada jamaatta udde taumata apan mangngatokku manara Mawu Ruata, tawe wotongnge itou pia pasasaɽane. Tawe wotongnge mawunga ara'e taɽɽa wuɽo, ara'e taɽɽa wu'anna, ara'e taɽɽa wawuɽo ara'e waɽiu n roitta. ⁸ɽinone itou maɽuassa manarimmattu taumata su waɽene, maapulu manga inolaanna apan mapia, wotongnge maɽɽadannu aapulu naungnge, matuɽidda, susi wuɽɽu ma'uddupa. ⁹Itou ɽinone uaaggasa atonna aɽaɽɽa'a apan wotongnge apangimananna, ere lai suete niaɽɽa'a sitou. Ringannu aroddi itou wotongnge manantiro taumata ringannu aɽaɽɽa'a su ɽinone, wuɽɽu mapaaɽiatta'u pasasaɽa manga taumata apan lullawangnga Sitou.

¹⁰Ana waugu manambo taumata apan maapulu mabbawuɽo, lembonete manga taumata apan dorone agamane Yahudi; imangitou mangngawusu taumata waine ringannu aawusu mangitou. ¹¹Manga taumata ereudde ɽinone sappingana moɽɽonge, ana waugu imangitou

mannongkaku anambo n amonanna ringannu manga ałarřa'a apan laleo. Imangitou ma'ola'a udde tumba'u ana waugu maapulu maddea'a auntunganna apan tawe su řinone! ¹²Suete su paassa nabi mangitou sassane, inarantanne wuassu Kreta lai, nabbisara, "Manga taumata n Kreta sidutu mangngawusu, wuřru ere winatangnga małarřaga apan a'ombanganna wuřru wolo'a." ¹³Apa apan suete niwisara nabi udde mangke atonna. Ana waugu udde řinone i'o managu simangitou ringannu mařragisa; tadea'u imangitou sidutu uaagassa ałarřa'a su řinone, ¹⁴wuřru tate lai mangngimanna manga watti'u n Yahudi ara'e manga atoranna apan niola'u manga taumata maddiri n ałarřa'a apan nařřino udde. ¹⁵Sarangkanambone udde susi su manga taumata apan susi. Arawe su manga taumata apan řingiranne laleo wuřru tawe pangangimanne, tawe sambau sarannapa apan susi, ana waugu řingiranne wuřru lałummu naungngi mangitou nalaleote! ¹⁶Imangitou mabbisara manungku imangitou maaillała Mawu Ruata, wutte'e inolaanni mangitou massinaaddu Mawu Ruata. Imangitou maarantina, wuřru imangitou tawe tumuřrutta, ete imangitou udde taumata apan tawe maola'a manarane apan mapia.

Manga pinangianannu ałarřa'a apan nařřino

2 Arawe i'o Titus, řinone i'o mangarřa'u ałarřa'a apan su řinone. ²Arřa'ete manga timadde esakka, tadea'u imangitou mařradanna, pande wuřru mabbiakka ere sangkatou taumata apan řinone addatanna. Řinone lai imangitou uaaggasa ałarřa'a apan su řinone wuassu Mawu Ruata, mandangngu ringannu ahewallu naungnga wuřru matatarřanga ringannu sabare. ³Aroddi lai řinone i'o mangarřa'a manga wawine apan timmaddete tadea'u pallałagu mangitou matatarřino su taumata apan mabbiakka tumuřruttu apulu Mawu Ruata sassane. Tawe wotongnge imangitou mangaluandaga taumata waine, wuřru tawe wotongnge tarřa inumma ua'e maawu'anna. Řinone imangitou mangarřa'u manga ałarřa'a apan mapia, ⁴tadea'u ringannu ałarřa'a udde imangitou wotongnge maapangarřa'a manga mařřuala mandangngu awingnge wuřru ałarřanangge, ⁵maola'a pande, mabbiakka susi wuřru maola'a inangnga su lałorřo m bałe apan mapia wuřru masallunga awingnge. Ringannu aroddi tawe saran sangkatou apan wotongnge mapaasała m watti'u Mawu Ruata.

⁶Aroddi lai, tantiroi lai manga ałarřana'a umbasana tadea'u imangitou lai masiřrongnga. ⁷Su aławo'u inolaanna řinone i'o maola'a tułada m pallałagu apan mapia. Amungkangu i'o mangarřa'a, řinone i'o tawe mamahia wuřru atonna-tonna. ⁸Pappaatte n manga wisara mapia, apan

tawe iapaasała n taumata, tadea'u manga seennu masili ana waugu tawe inolaanna laleo apan wotongnge iwatti'i mangitou su ola'i ite.

⁹Manga allangnga rinone masallunga mawune, wuřru maaluaassa naungnge sulařummu aławo'u inolaanna. Imangitou tawe wotongnge manompolla, ¹⁰ara'e manna'o. Rinone imangitou mapaaliatta'a manungku imangitou sidutu uatana'a mapia wuřru matammuda, tadea'u ringannu pallařagu mangitou udde taumata maddalo ałarra'u Mawu Ruata, Punnu Sařamatti ite.

¹¹Ana waugu Mawu Ruata suete napaaliatta'u darangngu-Ne ipanařamatta anambo n taumata. ¹²Darangngu Mawu Ruata udde mangngarra'a siite tadea'u tate lai mabbiakka uaparařala n apulu Mawu Ruata wuřru tate tumuřrutta apulu n runia. Iite niařraanna mabbiakka sulařummu runia indi ringannu masingkata manabare, matuřida wuřru matuřruta Mawu Ruata. ¹³Orassa indi iite tantařanna uarařrado Allo apan aantimanni ite udde; su Allo udde runia sarun maasilo awawantugi Yesus Kristus, eteudde Mawu Ahewařanne wuřru Ratu m Punnu Sařamatti ite. ¹⁴Itou suete nanantillu watangan-Ne ana waugu iite wuřru ana waugu mamallosi ite wuassu aławo'u ałaleo, wuřru na'ola'a siite sambau pabbawalaga apan nařu wuassu aławo'u rosa wuřru tumba'u naola'a pussa'a-Ne sassane, wuřru mařrimada ma'ola'a apapia.

¹⁵Tantiroa'e sarangkanambone udde, wuřru ařra'ete see tagguete manga madararingikka si'o ringannu sařraungnga. Arie mapaawala n saran sangkatou mangadio'a si'o.

Pallařagu n taumata n Sařrani

3 Paanaunga'a su manga lařořo n jamaatta tadea'u imangitou matuřruta manga piařrange wuřru tembonannu araratuanna, see matuřruta wuřru maapulu ma'ola'a manga inolaanna apan mapia. ²Wařoa'a simangitou tadea'u tawe mangaľuandaga ara'e matatiakku manga taumata, ewe'e mabbiakka masarřionto'a. Rinone imangitou sidutu masambiolo su saruannu anambo n taumata. ³Ana waugu dorone iite sassane lai woddo, niuমাঁiwu wuřru maľawangnga. Iite niallangngu aławo'u aapulu n runia; iite mabbiakka ringannu pandumanna apan laleo wuřru mangngune, wuřru uasaseetta. ⁴Arawe Mawu Ruata, Punnu Sařamatti ite napaaliatta'u darangngu-Ne wuřru apapia naung-Nge siite. ⁵Itou nanařamatta siite, wařine ana waugu iite suete na'ola'a apapia, ewe'e ana waugu Itou sassane tinumaľantupi ite. Itou nanařamatta siite sulařummu Ghařraho Mawu Ruata, apan nangonggolu arariadianna wakku siite wuřru wiakka wakku ringannu nangukkassu řařra-Ne siite. ⁶Mawu Ruata namobbokku Ghařraho-Ne siite sulařummu Anang-Nge

Yesus Kristus, Ratu m Punnu Sałamatti ite, ⁷tadea'u wuassu darangngu Mawu Yesus, iite wotongnge maaukka apia ringannu Mawu Ruata wuṛṛu iite maasomba wiakka tutune wuṛṛu saran maḷannu-ḷannu apan aantimanni ite. ⁸Wisara indi atonna-tonna.

Ia'u maapulu i'o mangarṛa'u olangnge indi, tadea'u manga taumata apan mangngimanna Mawu Ruata atonna-tonna maddea'a ma'ola'a manga manara apan mapia wuṛṛu mahuna su anambo n taumata. ⁹Pangindaute manga pattatiakka apan tawe gunane, manga watti'u aḷamona, pattatiakka wuṛṛu pabbawawuḷo su ola'u tita n agama. Sarangkanambone udde tawe gunane wuṛṛu tawe gessine. ¹⁰Taumata apan mandanta m pattatiakka sulaḷummu jamaatta, ṛinone itou tagguanna paassa ara'e paarua; wua udde ariete lai maggawe n tou. ¹¹Po masingkate manungku taumata ereudde laḷeo wuṛṛu manga rosane ma-paaliatta'a manungku itou nassaḷa.

Manga tatantiro panginsueanne

¹²Napawe ia'u suete nandolokki Artemas ara'e Tikhikus ringannu, paalihakke maddea'a tempone rumanta ringangu su Nikopolis, ana wangu ia'u pia apulu matana'a isudde su aḷannu n tempo masunge. ¹³Pattinsahadde ringannu atonna-tonna manumbala si Zenas, mapapande n tita udde, wuṛṛu Apolos, tadea'u imangitou wotongnge inai umamatta wuṛṛu tawe asueannu manga apa. ¹⁴Manga taumata ng kite ṛinone mangurumma aḷarṛa'a, ma'ola'a inolaanna apan mapia tadea'u wotongnge mapaasuungngu sarannapa apan ipaapulune; arie ma'oma n sara imangitou mabbiakka tawe gunane.

¹⁵Manga tuṛṛanga sarangkanambone apan suadio'a ringangu, nandoho n tabea siamiu. Waḷoa'a tabea ng kami su manga hawe ng kite apan su pangangimanna sambau.

Doronganna Mawu mangalamatta tuṛṛanga sarangkanambone.

Tabea ng kami,
Paulus

SURATTI PAULUS SI FILEMON

WISARA TALAANE

Filemon eteudde sangkatou taumata n Sarani apan tinumelengnga wurru alimangke naola'a reengannu jamaatta su Kolose. Itou uatahuanna sangkatou allangnga aranne Onesimus. Allangnga udde nasaliute wua dinganni Filemon, mawune udde, wua udde awagananna naola'a ereapa itou naggawete m Paulus su tempo Paulus sulaummu tutupanna. Ringannu alarra'i Paulus, Onesimus naola'e taumata n Sarani.

Suratti Paulus si Filemon indi naola'a ere sambau sasaande Paulus tadea'u Filemon maapulu maddame m Onesimus, allangnge udde, apan tantaanna nirolokki Paulus mapule. Paulus sinumalande tadea'u Filemon manarimmatti Onesimus apia, waline tumba'u ere sangkatou allangnga apan suete niampunganna, arawe lai ere sangkatou taumata n Sarani

Lalorrone

Panattaranne	1-3
Daranggu wurru pangangimanni Filemon	4-7
Darorongnga su ola'i Onesimus	8-22
Panginsueanne	23-25

1 Turřanga Filemon, hawe wuřru ringanni ami! Ia'u, Paulus, sangkatou taumata n řuumanna ana waugu Kristus Yesus, su sampunna ringannu turřangi ite Timotius, namořretu suratta indi si'o, ²wuřru su jamaatta apan uammulla su wařenu; wuřru su wawine ng kite Afia, wuřru hawe sangkamanaranni ite Arkhipus.

³Iami mangantimma doronganna Mawu Ruata Iamangngi ite wuřru Mawu Yesus Kristus mangonggolu ařamatta wuřru paddarame siamiu.

Aakkanna wuřru pangangimanni Filemon

⁴Suapan ia'u umařiomanna, ia'u mannago n arannu turřanga wuřru maadiangkamanna su Mawu Ruata. ⁵Ana waugu ia'u naaringikka manungku turřanga atonna-tonna mangngimanna Mawu Yesus wuřru mandangngu anambo n ařařra'u Mawu Ruata. ⁶Ia'u u'ařiomanna tadea'u pasasangkaturřangi ite ere manga taumata mangngimanna sarun maggesi m pasasunna apan lembon wahewalla su ařawo'u ařamatta apan tatahuananni ite ana waugu uauukka ringanni Kristus. ⁷Turřanga Filemon, darangngunu su anambo n ařařrana'u Mawu Ruata maařuassa sia'u wuřru mangonggolu sasasa sia'u! Anambo n ařařrana'u Mawu Ruata nilumuassa ana waugu i'o.

Sasařande huna n Onesimus

⁸Ana waugu udde, ere sangkatou turřanga apan su pangangimanna sambau, ia'u wotongnge mandolokku ma'ola'a apa apan sarun olaannu. ⁹Arawe ana waugu ia'u marangngu si'o, ia'u tumba'u madorongnga. Ia'u indi sangkatou timmade wuřru orassa indi ta'e tatařranganna sulařummu tutupanna ana waugu Kristus Yesus. ¹⁰Ia'u Paulus, mangapiddu sambau darorongnga si'o su ola'i Onesimus, ana'u sulařummi Kristus. Ana waugu sulařummu tutupanna indi ia'u naola'e iamangngu pangangimanne. ¹¹Dorone itou tawe gunane si'o, arawe orassa indi itcu piate gunane, wařine tumba'u si'o sassane, arawe sia'u lai.

¹²Orassa indi taumata arangnguangku udde nirolokke apia ringannu. ¹³Rinone ia'u pia apulu manarřanga sitou ringangu maola'a hahantinu, tadea'u itou wotongnge massumbala sia'u, su ařannune ia'u tatařranganna sulařummu tutupanna indi ana waugu mammasingkatu Watti'u Ařařuassa wuassu Mawu Ruata. ¹⁴Arawe ia'u maddiri ma'ola'a apa-apa amungkangu taambe naasomba paaire wuassi'o. Ia'u lembon maapulu amungkangu i'o mammanara ringannu apulu naungngu sassane; ia'u maddiri mamatangngu.

¹⁵Asinungka Onesimus narraenu taʔa ng kadio'a tadea'u i'o wotongnge maasomba sitou apia sarangkaʔo'engnge. ¹⁶Orassa indi itou waline tumba'u sangkatou allangngu, itou nangillembu wua isudde. Itou uddewe nassuʔungngu taumata n Saʔrani apan arangnguanna. Itou lembon mahuna si'u, lembonete lai si'o! Itou lembon mahuna lai mapia ere sangkatou allangnga aroddi lai ere sangkatou turanga sulaʔummu Mawu!

¹⁷Ana waugu udde, i'o ma'ellega sia'u ere sangkatou hawe sulaʔummu paa'aukku taumata n Saʔrani, tarimmata'e apia Onesimus ere lai i'o nanarimmatti ia'u. ¹⁸Amungkangu itou nassaʔa ara'e pia apa niwallasanna si'o, ia'ute mamaekka sarangkanambone udde. ¹⁹Ne, mappianne ia'u mamorreta sassane isindi: *Ia'u Paulus, sarun mamaekka sarangkanambone.* (Salaiwe tate ta'u iapaanaungnga manungku i'o sassane lai nabbalassa si'u, eteudde wiakku apan wakku ere sangkatou taumata n Saʔrani.) ²⁰Ana waugu udde, ringannu arannu Mawu, annama'a tuʔunga'a ia'u, paaʔuasa'a naungku nassuʔungngu ere sangkatou turanga sulaʔummi Kristus.

²¹Ia'u namorretu suratta indi ringannu mangngimanna manungku i'o sarun tumurutta darorongku. Ewe'e ia'u lai masingkata i'o sarun ma'ola'a nangillembu wua isudde. ²²Tantaʔanna udde tuʔunga'a ia'u sadii wabbo'a su waluenu, ana waugu ia'u manggantimma Mawu Ruata sarun madaringikka aʔiomannu manga turangnga sarangkanambone wuru mangapi'u apia ringanni amiu.

Tabea panginsueanne

²³Epafra, apan suadio'a ringanku sulaʔummu tutupanna ana waugu Kristus Yesus, nandoho n tabeane si'o. ²⁴Sengkamma lai tabea manga hawe'u: Markus, Aristarkhus, Demas wuru Lukas.

²⁵Doronganna Mawu Yesus Kristus mangaʔamatta siamiu.

Tabea ng kami,
Paulus

SURATTA SU TAUMATA N IBRANI

WISARA TAĀAANE

Suratta Su Taumata n Ibrani indi tuddane su sambau ammuḷannu taumata n Sarḫani, apan sidutu uasaruanna wāwono'a, asinungka sarun massinaddu pangangimanni mangitou si Kristus. Mamamoḫḫetu suratta indi mattinsahadda mannasa simangitou tadea'u imangitou sidutu mangngimanna. Ana waugu udde itou napaalḫatta'a manungku eteudde Yesus Kristus pallaḫawannu Mawu Ruata apan nasuungnga. Tatallu hatto apan niapaasingkatu mamamoḫḫetu suratta indi. Paarorone, eteudde Mawu Yesus Ana'u Mawu Ruata - Ana'a apan uataḫḫino saran maḫannuḫannu. Ana'u Mawu Ruata udde mapaalḫatta'u taturḫu-Ne su Iamangnga sulaḫummu asasusa-Ne. Ana waugu Ana'u Mawu Ruata, Mawu Yesus mattanggaḫḫana wuassu manga nabi sulaḫummu Paaire Tabbe. Itou lai mattanggaḫḫana wuassu mala'ekatta ara'e lai Musa sassane. Aruane, Mawu Ruata suete napaalḫatta'a manungku Mawu Yesus eteudde imam apan tawe panginsueanne apan mattanggaḫḫane wuassu manga imam sulaḫummu Paaire Tabbe. Atallune, sulaḫummu Mawu Yesus, taumata apan mangngimanna Sitou niapaalḫiu wuassu rosa wuḫḫu atata'utta wuḫḫu wuassu papate. Ana waugu Imam Wahewa, Mawu Yesus nangonggolu asasaḫamatta tutune su taumata, apan tawe ia'onggola ringannu mangngapiddu sasamba wuḫḫu manga inolaanna waine sulaḫummu agama n Yahudi. Manga ammuḫanna udde tumba'u mangngonggolu tuḫadane wuassu asasaḫamatta tutune udde, waine tawe.

Ringannu namasingkatu manga tuḫada m pangangimannu manga piaḫḫange apan tinumelengke sulaḫummu watti'u taumata n Israel (addoanne 11), mamamoḫḫetu suratta indi mannantiro mabbawasane tadea'u sidutu matuḫḫuta. Sulaḫummu addoanne 12 itou mannasa simangitou tadea'u tutuḫḫuta saran panginsueanne, ringannu tumba'u ma'ellega Mawu Yesus. Itou mannasa simangitou lai tadea'u masabare su asasusa wuḫḫu masabare mamasanna aḫawo'u aaḫuandaga wuḫḫu soddo'a su wadangi mangitou. Pangudusannu suratta indi eteudde tatantiro wuḫḫu taumata.

Lalorrone

Paarorone: Eteudde Kristus pallaḷawannu Mawu	
Ruata apan nasuungnga	1:1-3
Kristus mattanggarana wuassu mala'ekatta	1:4-2:18
Kristus mattanggarana wuassi Musa wuḷḷu Yosua	3:1-4:13
Apapia manara n Kristus ere sangkatou imam	4:14-7:28
Apapia m paaire n Kristus	8:1-9:28
Apapia su sasamba n Kristus	10:1-39
Hunane pangangimanna	11:1-12:29
Tatantiro wuḷḷu wisara panginsueanne	13:1-25

Mawu Ruata nabbisara sulaḷummu Anang-Nge

1 Su tempo rorone Mawu Ruata masokka uahahatto n iupungngi ite sulaḷummu manga nabine ringannu mappaattu anambo n daḷanna. ²Arawe su tempo panginsueanne indi Itou uahahatto ng kite sulaḷummu Anang-Nge. Sulaḷummu Anang-Nge indi Mawu Ruata nandiaddi uḷilim pati'uppa. Wuḷḷu Mawu Ruata suete nanantuna lai manungku ete Anang-Nge indi apan manahuanna aḷawo'u sarangkanambone. ³Ete Itou apan napaatualagu awawantugu Mawu Ruata apan lullendapa; ete Itou hambarana apan masemakka wuassu wadangu Mawu Ruata sassane. Ete Itou lai apan mammaduḷi paa'aukku uḷilim pati'uppa indi ringannu ḷengetan-Ne apan lembon mataḷḷino. Napawe Itou suete namala n taumata nipallosa wuassu manga rosa mangitou, Itou inuma'ianna su addera n araratuanna su surga su sambau ringannu Mawu Ruata, tembonanne apan atanggaḷanne.

Awawantugu Ana'u Mawu Ruata

⁴Ana'a udde naasombate aianan-Ne apan lembon atanggaḷanne wuassu mala'ekatta, wuḷḷu aranna apan nionggolu Mawu Ruata Sitou lai lembon awantuhanne wuassu aranna apan nionggolla su mala'ekatta. ⁵Taambe saran paassa Mawu Ruata nabbisara arendi su sangkatou mala'ekatta,

"Ete I'o Ana'u;

su allo indi Ia'u maola'a Iamangngu."

Taambe saran paassa lai Mawu Ruata nabbisara arendi su ola'u manga mala'ekatta, su aḷawo'u tampa,

"Ia'u sarun maola'a Iamangnge,

wuḷḷu itou sarun maola'a Ana-U."

⁶Arawe su tempo Mawu Ruata nandolokku Anang-Nge pahuḷu watukku runia indi,

Mawu Ruata nabbisara arendi,

"Anambo n mala'ekattu Mawu Ruata ḷinone massubba Ana'u udde."

⁷Su ola'u manga mala'ekatta udde, Mawu Ruata nabbisara arendi,

"Mawu Ruata nandiaddi manga mala'ekan-Ne nabbaḷi anginna,

wuḷḷu manga allang-Nge nabbaḷi ḷenggamu putungnga."

⁸Arawe su Ana'a udde, Mawu Ruata nabbisara,

"Addera n araratuannu, oh Mawu, sarun ma'oma n sara

maḷannu-ḷannu!

Araratuannu udde araratuanna apan matuḷida.

⁹I'o maapulu n atatuḷidda, wuḥḥu maddantinu awawengkola;
ana waugu uddewe Mawu Ruata, Mawu Ruata-Nu namile Si'o,
wuḥḥu nangonggolu awawantuga Si'o apan mandanta n aḷaḷuassa,
nilumambalanna wuassu manga hawe-Nu."

¹⁰Mawu Ruata lai nabbisara,

"I'o, Mawu, apan su aḷamonane nandiaddi runia,
wuḥḥu I'o sassane nandiaddi langitta.

¹¹Sarangkanambone udde sarun mawuḷi,
wuḥḥu mabbali tabbe ere laubba;
arawe I'o sarun tawe mawaḷu.

¹²Uḷilim pati'uppa indi sarun lappuan-Nu ere laubba,
wuḥḥu sarun hantia-Nu ringannu waine.

Arawe I'o saran paassa tawe mawaḷu,
wuḥḥu wiak-Ku tawe pangudusanne."

¹³Tawe saran paassa Mawu Ruata nabbisara arendi su saran sangkatou
mala'ekatta,

"Aiana'e su samba'a uanang-Ku,
ma'oma n sara manga seenu Ta'u iapaasubba Si'o."

¹⁴Amungkangu aroddi, manga mala'ekatta udde apa imangitou? Ete
imangitou udde manga ghaḥḥaho apan mangngimbe Mawu Ruata, wuḥḥu
apan iradolokku Mawu Ruata iapaatuḷungngu manga taumata apan
sarun manengkamma asasaḷamatta.

Asasaḷamatta apan wahewalla

2 Ana waugu udde iite ḥinone lembon mangaggasa atonna-tonna
manga aḷaḥḥa'a apan suete niaringiḥḥani ite, tadea'u iite tawe
manantangngu pangangimanni ite. ²Manga tanata apan niapaasingkatu
mala'ekatta su iupungngi ite udde nasemakke atonna, wuḥḥu taumata
apan tawe tumuḥḥrutta ara'e ma'ola'a, sarun manengkamma ḥuumanna
apan uasuḷungngu pallaḷagune. ³Apa lai ringannu asasaḷamatta apan
maggewaḷanne wuassu manga tanata udde! Amungkangu iite tawe
mangngimanna su asasaḷamatta udde, iite sarun tawe maḷiu wuassu
ḥuumanna. Ana waugu ete Mawu sassane apan paarorone namasing-
kattu asasaḷamatta udde, wuḥḥu manga taumata apan paarorone naaring-
ikka suete napaatualagu atatuḷiddu watti'a udde siite. ⁴Su liuddu udde,
Mawu Ruata mannohassa tatiala manga taumata udde ringannu na'ola'a
aḷawo'u hati n aḷaḥḥindu'a wuḥḥu manga inolaanna apan wahewalla see
lai nattahia manga aonggolu Ghaḥḥaho Mawu Ruata tumuḥḥruttu apulu-
Ne sassane.

Wawu'a laḷanna su taumata iapaasaḷamatta

⁵Manga mala'ekatta tawe naasomba taḷḷino wuassu Mawu Ruata ipamarenta runia wakku apan sarun rumanta, eteudde runia apan tantaḷanna ipagahato ng kite indi. ⁶Arawe su sambau wageangnge sulaḷummu Wuke Susi uawoḷḷetta arendi,

"Apate taumata udde, o Mawu Ruata, na'oma n sara I'o sidutu uanaungnga sitou?

Taumata tumba'u taumata, arawe I'o sidutu mappaduḷi simangitou!

⁷Su tempo apan maḷihakka I'o mandiaddi sitou mabbawoanna adio'a wuassu mala'ekatta.

I'o nangonggolu ai'ananna sitou apan mawantuga wuḷḷu lembon aaddatanna.

⁸ See lai na'ola'a sitou tembonannu sarangkanambone."

Ne, amungkangu iwisara manungku Mawu Ruata nandiaddi taumata "tembonannu sarangkanambone", udde atappasanne manungku tawe saran sambau apan tawe su aḷungngu taḷḷino n taumata. Salaiwe aroddi, iite orassa indi tawe maasilo taumata uataḷḷino sarangkanambone. ⁹Arawe iite suete naasilo Mawu Yesu uataḷḷino! Itou niwawo adio'a wuassu mala'ekatta tumba'u taḷa ng kadio'a, tadea'u su apapia naungngu Mawu Ruata Itou wotonge mate ana waugu anambo n taumata. Iite ma'ellega Itou orassa indi nionngolannu aiananna apan mawantuga wuḷḷu lembon aaddatanna, ana waugu Itou suete natataḷḷanga na'oma n sara nate. ¹⁰Atonna su ḷinonete Mawu Ruata - apan nandiaddi uḷilimpatu'uppa ringannu paḷduman-Ne sassane - nandiaddi Mawu Yesu mananaḷamatta apan nasuungnga sulaḷummu asasusa. Ringannu aroddi Mawu Ruata wotongnge mangahe taumata nambo iapaawantuga suadio'a ringannu Mawu Yesu. Ana waugu ete Itou mamamu'a laḷanna simangitou tadea'u wotongnge iapaasaḷamatta.

¹¹Mawu Yesu namaresi taumata wuassu manga rosa mangitou; wuḷḷu Itou apan namaresi udde; see imangitou apan niwaresi udde, uatahuanna Mawu Iamangnga sambau. Ana waugu udde Mawu Yesu tawe masili manga'u simangitou maola'a manga tuḷḷang-Nge. ¹²Mawu Yesu nabbisara su Mawu Ruata,

"Ia'u sarun mamasingkata su manga tuḷḷang-Ku su olang-Ngu udde.

Ia'u sarun maddalo Si'o sulaḷummu ammuḷanni mangitou."

¹³Mawu Yesu nabbisara lai, "Ia'u sarun mangantimma Mawu Ruata." Wuḷḷu Itou nabbisara lai, "Indiwe Ia'u, su sambau ringannu aḷaḷḷana'a apan suete nionngolu Mawu Ruata Sia'u."

¹⁴Ana waugu manga taumata apan nisaggo n Tou ana'a udde, ete-udde sangkatou taumata apan wotonge mate, ne Mawu Yesus sassane naola'a uasulungngi mangitou wuṛṛu mabbiakka sulaḷummu ola'u taumata. Itou na'ola'a aroddi, tadea'u ringannu papate-Ne Itou wotongnge maṛṛimuns'a Setanna apan uataṛṛino papate. ¹⁵Ringannu olange aroddi Itou namallosu manga taumata apan su aḷo'engngu pabbiarṛane naola'a allangnga ana waugu matta'uttu papate. ¹⁶Nilumiatta'e manungku waḷine mala'ekatta apan nituḷungi Tou, ewe'e papapuluni Abraham. ¹⁷Indi atappasanne manungku Itou ṛinone maola'a uasulunga ringannu manga tuṛṛa-Nge sulaḷummu aḷawo'a. Wuṛṛu ringannu udde Itou wotongnge maola'a Iman Wahewa apan matuṛṛuta wuṛṛu marangngu. Ringannu manara-Ne udde rosa n taumata wotongnge aampunganna. ¹⁸Wuṛṛu ana waugu Itou sassane suete natataṛṛanga wuṛṛu niwono'anna, Itou naapattulungu manga taumata apan niarṛiaannu wawono'a, ana waugu Itou sassane suete niwono'anna wuṛṛu natataṛṛanga.

Mawu Yesus maggewaḷanna wuassi Musa

3 Manga tuṛṛangnga sansulungnga Saṛṛani apan suete niwagoannu Mawu Ruata lai! Annama'a ṛingirṛa'a paalaḷumma su ola'u Mawu Yesus indi! Mawu Ruata nandolokki Tou sassane maola'a Imam Wahewa sulaḷummu agama apan pangngimananni ite. ²Itou matuṛṛuta Mawu Ruata apan suete namile Sitou su manara udde, ere lai Musa rorone matuṛṛuta mappaamattu manarane su Waḷe Mawu Ruata. ³Arawe Mawu Yesus lai ṛinone addatanna lembon ahewaḷanne wuassi Musa. Ana waugu taumata apan mapararisikku waḷe, ṛinone maasomba aaddata maggewaḷanne wuassu waḷe udde sassane. ⁴Atonna aḷawo'u waḷe piaddu mapararisikke, arawe namangunna sarangkanambone eteudde Mawu Ruata sassane. ⁵Musa matuṛṛuta ere sangkatou mangangarṛa'a su Waḷe Mawu wuṛṛu mabatti'u manga inolaanna apan sarun iapaasingkatu Mawu Ruata su tempo apan sarun rumanta. ⁶Arawe Kristus matuṛṛuta ere sangkatou Ana'a apan uariaga Waḷe Mawu Ruata. Wuṛṛu ete iite indi Waḷe Mawu Ruata, amungkangu iite sidutu maṛṛimadda wuṛṛu sidutu mangngimanna maasomba apa apan aantimanni ite.

Pangangilloḷo n aḷarṛana'u Mawu Ruata

⁷Ana waugu udde, ere su wisara n Gharṛaho Mawu Ruata,

"Amungkangu su allo indi iamiu maaringikka tingikku Mawu Ruata,

⁸ ariewe iamiu maddiri maddaringikka,
ere iupunggu ałamonanu,
su tempo imangitou nilumawangnga Mawu Ruata, wuřru
nanału'atta Mawu Ruata su wadda'a.

⁹"Poiaroddi iupunggu ałamonanu namono'a Sia'u, wuřru nanalu'atta
Sia'u,' unnu Mawu Ruata,
'sumbałi imangitou naasilote inolaang-Ku appatu puło su
tonnane ałannune.'

¹⁰Ana waugu udde Ia'u nasa'u simangitou wuřru Ia'u nabbisara,
'Imangitou sidutu maddiri tumuřrutta wuřru tawe tumuřrutta
manga parenta-U.'

¹¹Ia'u nasa'u wuřru nassalu,
'Imangitou sarun tawe maasutta su soa udde
wuřru mangilloło ringang-Ku.'"

¹²Manga tuřrangnga, paatehamma arie ma'oma n sara piaddu sang-
katou wuassu wallatti amiu apan pia naungnge aroddi alałeone wuřru
tawe pangangimanne, na'oma n sara itou mabelengnga wuřru mangin-
dau Mawu Ruata apan wiakka! ¹³Nariaddi, tadea'u tawe saran sang-
katou wuassu wallatti amiu apan awono'annu rosa na'oma n sara
lumawangke Mawu Ruata, řinone iamiu uatataggu su miallo-miallo
tantałanna iite ta'e mabbiakka su tempo apan isassago "Allo Indi" su-
lałummu Wuke Susi. ¹⁴Iite sarangkanambone uddewe sanggaweanna su-
lałummu manara ringanni Kristus, sawałiate saran pangudusanne iite
uaaggasa pangangimanna apan tatahuananni ite ro'e n paarorone.

¹⁵Ete indi apan uawořretta sulałummu Wuke Susi,

"Amungkangu su allo indi iamiu naaringikka tingikku Mawu Ruata,
imbarařnga iamiu tawe madaringikka, ere iupunggu ałamona,
su tempo imangitou lullawangnga Mawu Ruata."

¹⁶Ne, isai manga taumata apan madaringikka tingikku Mawu Ruata
see nilumawangnga Sitou? Eteudde anambo n taumata apan nipařra'i
Musa sinumabanga wuassu leta'u Mesir, are? ¹⁷Wuřru sisai lai Mawu
Ruata nasa'u appatu puło su tonnane ałannune? Ete simangitou apan
marosa, apan nanawo see nate su wadda'a, are? ¹⁸Su tempo Mawu
Ruata nassalu arendi, "Imangitou sarun tawe maasutta su soa udde ana
see maasomba pangillołoanna ringang-Ku" - isai lai apan ipapandumu
Mawu Ruata? Apan ipappandume eteudde manga taumata apan lul-
lawangnga Mawu Ruata, are? ¹⁹Orassa indi iite naasunnate manungku
imangitou tawe maasutta, ana waugu imangitou tawe mangngimanna
Mawu Ruata.

4 Aroddi paaire Mawu ta'e ipappaatta, wuřru iite sarun ipaailloło
ere suete nipa'ire-Ne. Nariaddi, řinone iite mandiaga tadea'u arie
piaddu sangkatou wuassu wallatti amiu apan tawe maatemma allo m

pangillooanna apan suete nipa'ire udde. ²Ana waugu Watti'u Aļaļuassa udde suete niapaasingkata siite ere lai simangitou. Arawe simangitou watti'a udde tawe gunane. Ana waugu su tempo imangitou naaringikka, imangitou tawe mangimanna. ³Arawe iite apan mangngimanna manengkamma pangangilloo apan suete nipa'ire Mawu Ruata udde. Udde uasulunga ringannu apa apan suete niwaļo Mawu Ruata, arendi,

"Ia'u nasa'u wuřru nassalu,

'Imangitou sarun tawe maasutta

wuřru maasomba pangillooanna su sambau ringang-Ku."

Mawu Ruata nabbisara aroddi salaiwe manara-Ne nasuete ro'e n Itou nandiadi runia indi. ⁴Ana waugu su ola'u allo appetune, pia uawořretta sulaļummu Wuke Susi arendi, "Su allo appetune Mawu Ruata nangilloo wuassu anambo n manara-Ne." ⁵Su olangnge udde lai niwořreta arendi, "Imangitou sarun tawe maasutta su wanua udde see maasomba pangillooanna su sambau ringang-Ku." ⁶Nariaddi imangitou apan paarorone atonna naaringikka watti'a su ola'u Watti'u Aļaļuassa udde, tawe maasengkamma pangangilloo udde ana waugu imangitou tawe mangngimanna. Amungkangu aroddi natualage manungku pia manga taumata waine apan wotonge maasengkamma pangangilloo udde. ⁷Ana waugu Mawu Ruata suete nanantunu sambau allo apan waine lai, apan isassago "Allo Indi". Manga pira tonna wua udde Mawu Ruata nabbisara su olangnge udde sulaļummi Daud, su addoanne apan ere niwořretta tanginna,

"Amungkangu su allo indi iamiu maaringikka tingikku Mawu Ruata, imbařranga iamiu tawe maddaringikka."

⁸Amungkangu unnu wisara Yosua suete nangonggola su manga taumata udde pangangilloo apan pina'ire Mawu Ruata, ne Mawu Ruata tate mabbisara apia su ola'u allo waine. ⁹Nariaddi, su pabbawalagu Mawu Ruata ta'e pia paaire pangangilloo ere lai Mawu Ruata nangilloo su allo appetune udde. ¹⁰Ana waugu taumata apan nanengkamma pangangilloo apan nipa'ire Mawu Ruata sitou udde, sarun mangilloo lai wuassu anambo n manarane, ere lai Mawu Ruata. ¹¹Ana waugu udde, wette iite maddea'a ringannu atonna-tonna ana see maasengkamma allo m pangangillooanna apan suete nipa'ire Mawu Ruata udde. Arie pia sangkatou wuassiite tawe maasomba ere imangitou rorone, ana waugu tawe mangngimanna Mawu Ruata.

¹²Wisara Mawu Ruata eteudde wisara apan wiakka wuřru matohassa; mařoroanna wuassu haļeļe rorone rua m ba'a. Wisara udde uusippa ma'oma n sara su wallatu niawa wuřru ghařraho; ma'oma n sara su wallattu manga passi'uanna wuřru duřri n liudda, na'oma n sara maasingkata aļaļummu řingiranna wuřru apulu naungngu taumata. ¹³Taweddu sambau riadianna apan uawuni su aellegu Mawu Ruata.

Aławo'u sarannapa uatantole wuřru wawu'anna su saruan-Ne. Wuřru iite sarun mangongolu sasimbakka Sitou.

Mawu Yesus Imam Wahewa lembon mawantuga

¹⁴Ana waugu udde iite řinone uaaggasa matohassa su panga'uannu pangangimanni ite. Ana waugu iite uatahuanna Imam Wahewa lembon mawantuga, apan suete sinumutta na'oma su saruannu Mawu Ruata - eteudde Yesus Kristus Ana'u Mawu Ruata. ¹⁵Imam Wahewalli ite udde wařnewe imam apan tawe maapendama manga ałallome ng kite. Arawe Itou suete niwono'anna sulařummu aławo'u inolaanna, ere iite lai sassane; tumba'u Itou tawe na'ola'a rosa! ¹⁶Ana waugu udde, wette iite ringannu awawarřani sumaruanna Mawu Ruata apan mammarenta ringannu naungnge mapia. Mawu Ruata sarun umakkana wuřru mangalamatta siite tadea'u iite maasomba tulunganna marřino su tempone.

5 Suapan imam wahewa nipile wuassu wallatu taumata, wuřru ni-tenega iapa'imbe Mawu Ruata maola'a mangangapiddu tingikki mangitou. Manarane eteudde mangngapiddu manga aonggola su Mawu Ruata wuřru sasamba ipangampungna rosa. ²Imam wahewa udde sassane lome su aławo'u inolaanna wuřru ana waugu udde itou wotongnge mattingkaola'a masarřionto'a su saruannu taumata apan wagga n apa-apa wuřru apan niuwalıwu n dařanne. ³Wuřru ana waugu itou sassane lome, ne itou řinone mangonggolu sasamba, wařine tumba'u ana waugu rosa n taumata, arawe ana waugu rosane lai sassane. ⁴Tawe saran sangkatou apan mapaatenu watanganne sassane maola'a imam wahewa. Tau-mata maola'a imam wahewa, amungkangu Mawu Ruata mamago sitou su manara udde - naalřihida ere Harun.

⁵Aroddi lai Kristus. Itou tawe napaatenegu watanganne sassane maola'a Imam Wahewa. Mawu Ruata nabbisara Sitou,

"Ete I'o Ana-U;

su allo indi Ia'u maola'a Mawu Iamang-Ngu."

⁶Su wageangge waine Mawu Ruata nabbisara lai,

"I'o uddewe Imam sara mařannu-řannu,
naalřihida Imam Melkisedek."

⁷Su tempo Mawu Yesus mabbiakka su runia indi, Itou u'aliomanna wuřru sussařande ringannu u'ui wuřru lulluai su Mawu Ruata, apan wotongge manařamatta Sitou wuassu papate. Wuřru ana waugu Itou matuřruta Mawu Ruata ringannu napene ng addatta, ne Itou niringirřana. ⁸Mawu Yesus uddewe Ana'u Mawu Ruata, arawe sa-laiwe aroddi, Itou mattingkaola'a matuřruta sulařummu asasusa-Ne. ⁹Ne

napawe Itou niola'a manana lamatta apan nasuungnga, Itou naola'a punnu asala lamatta saran mala nnu-lannu hunane su anambo n taumata apan matu rruuta Sitou, ¹⁰wu rru Mawu Ruata lai napa al iatta'i Tou naola'a sangkatou Imam Wahewa, ere Imam Melkisedek!

Iapaanaungnga

¹¹Su ola'u a'iannu Mawu Yesus ere sangkatou Imam Wahewa, manambo apan iapaasingkati ami siamiu, arawe masahadda mana la'a n udde, ana waugu iamiu maliwue atonna massunna. ¹²Su rironone nia'omante tempone siamiu maola'a huru, arawe wutte'e iamiu ta'e wotonge pangurumma lai su taumata waine su ola'u al arra'a paarorone wuassu al arra'u Mawu Ruata. Iamiu taambe maasengkamma anna apan maattika; iamiu tumba'u wotongnge ma'inumma susu. ¹³Taumata apan ta'e ma'inumma susu, atappasanne itou ta'e ana'a wakku niasungkanga; itou taambe asingkatta su ola'u apa apan nar rino wu rru apa apan nassa la. ¹⁴Anna apan maattika udde wuattu taumata timmade ana waugu asingkane, wotongngete mar rindidda suapa mapia wu rru suapa apan la leo.

6 Ana waugu udde, wette iite mangasala te manassu manga al arra'a sansunne, su ola'u al arra'a mattanggar ranna su taumata n Sar rani, wu rru arie tumba'u mar rindiddu manga al arra'u agama ng kite paarorone. Arie iite manule apia pinangianannu al arra'a manungku taumata rironone mangillo lo ma'ola'a manga inolaanna apan tawe gunane wu rru rironone mangngimanna Mawu Ruata, ²ara'e pinangianannu al arra'a su ola'u pananar rani ara'e mangaddo n lima su wowo n taumata, ara'e su ola'u mabbiakka apia napawe suete nate, ara'e ruumanna saran mala nnu-lannu. ³Wette iite, amungkangu Mawu Ruata mamala, mattudate n al arra'a apan manansuna!

⁴Ana waugu, manga taumata apan suete nassinaadu Mawu Ruata, tate wotongnge ar ranna apia. Imangitou dorone sula lumpe n asase makka wuassu Mawu Ruata, wu rru suete naatemma aonggolou Mawu. Imangitou lai suete niintar rannu Ghar raho Mawu Ruata. ⁵Imangitou masingkata wuassu ola'u pabbiar rani mangitou manungku wisara Mawu Ruata udde mapia, wu rru imangitou suete naapendama manga al amatta apan napene n tar rino wuassu tempo apan sarun rumanta. ⁶Arawe wua udde imangitou nassinaadu Mawu! Apa wotongnge mangar rra'a simangitou apia mawalu wuassu manga rosa mangitou. Ana waugu imangitou tanta lanna mangngarussa n Ana'u Mawu Ruata apia wu rru mang galusa'a Sitou su saruannu awadaalla.

⁷Leta'a apan mangngirrupa ua'e ng kuranna apan masokka manawo su leta'a udde, see tinuwoante manga sasuanne apan mahuna su tau-mata apan mamamadduljine, leta'a udde nialamatannu Mawu Ruata. ⁸Arawe amungkangu leta'a udde tatuwoannu manga akke wufru sa-suanna roaanna, ne leta'a udde tawe gunane wufru sarun wontohannu Mawu Ruata wufru panginsueanne tutunganna ma'oma n sara masue.

⁹Arawe manga turrangnga apan arangnguanna, salaiwe iami mabbisara aroddi, arawe iami mangngimanna su ola'i amiu. Iami mangngimanna manungku iamiu suete nanengkamma manga inolaanna apan lembon mapia, eteudde manga alamatta apan maola'a sambau wage-angnga wuassu asalamannu. ¹⁰Mawu Ruata waljine Mawu Ruata tawe matuljida. Itou tawe maabulj apa apan mammanaranni amiu Sitou; wufru darangngu apan niapaasilo ng kamiu Sitou su tempo nantulungu manga turrangnga apan pangangimanna sambau, dorone wufru sara orassa indi. ¹¹Iami maapulu taasulunge tadea'u iamiu sangkatou-sangkatou marimadda saran panginsueanne, ma'oma n sara iamiu manengkamma apa apan aantimanni amiu udde. ¹²Iami maddiri iamiu mabbalj wolo'a. Arawe iami maapulu tadea'u iamiu mabbiakka ere manga taumata apan mannengkama apa apan suete pina'ire Mawu Ruata, ana waugu mangngimanna Sitou wufru ana waugu uararaddo ringannu asabare.

Paaire Mawu Ruata tawe wotonge mawaļu

¹³Su tempo Mawu Ruata na'ire si Abraham, Itou nassalu manungku Itou sarun mapaatipussu apa apan suete pina'ire-Ne. Wufru ana waugu tawedu mattanggaranne wuassu Mawu Ruata, ne Itou nassalu ringannu aran-Ne sassane. ¹⁴Itou nabbisara, "Ia'u ma'ire sarun mangalamatta si'o wufru ma'ola'a pabbawalagu mabbalj manambo," ¹⁵Abraham uaraddo ringannu sabare, ne itou nanengkamma apa apan pina'ire Mawu Ruata sitou. ¹⁶Amungkangu manga taumata massalu, itou massalu ringannu arannu taumata waine apan mattanggarana wuassi tou, ne sasalu udde mangudusu alawo'u pattatiakka. ¹⁷Mawu Ruata maapulu manualaga su manga taumata apan manengkamma paaire-Ne, manungku Itou tawe mamaļu riin-Ne. Ana waugu udde Itou nanamba sasalu su paaire-Ne udde. ¹⁸Darua inolaanna udde apan tawe wotonge mawaļu: Mawu Ruata tawe mangawusu su ola'u paaire wufru sasalu-Ne. Ana waugu udde, iite apan uasirungke ringannu Mawu Ruata, nionggolannu sasasa apan matohassa ipangagassa antimma apan uawilatta su saruanni ite. ¹⁹Antimmi ite udde ere walango apan ualabinga malaļumma wufru maola'a sambau pangangaleanna apan matohassa wufru tawe

singkałone su pabbiařrani ite. Antimma udde nallapasa su lařindumu Wabbo'a Lembon Susi su Wałe Mawu su surga. ²⁰Mawu Yesus suete namu'a lařanna watukku tampa udde siite, wuřru suete sinumutta poiaroddi naola'a Imam Wahewa ng kite sara mařannu-řannu, ere Imam Melkisedek.

Imam Melkisedek

7 Melkisedek indi eteudde sangkatou ratu wuassu Salem wuřru imam wuassu Mawu Ruata Lembon Atanggařanne. Su tempo Abraham nawelengnga wuassu pangalo napaarugi manga ratu, Melkisedek nirumanta nanařoho sitou wuřru nangařamatta. ²Ne Abraham nangonggola si Melkisedek sambau wuassu mapuřo apan niaarřo n tou. (Aranna Melkisedek atappasanne, paarorone, "Ratu n Atatuřidda"; pia atappasanne lai "Ratu m Paddarame".) ³Su ola'i Melkisedek indi tawe tařaane suapa-suapa manungku itou pia hagarangnga ara'e iupungnga; tawe lai tařaane su ola'u niasungkanganne ara'e papatene. Itou nassuřunga ere Ana'u Mawu Ruata; itou udde imam saran mařannu-řannu.

⁴Nariaddi, iite isindi maasilo aroddi ahewalle Melkisedek indi; itou aroddi ahewalle na'oma n sara Abraham, iamangngu ařamona ng kite, nangonggola sitou sambau wuassu mapuřo ařawo'u ina'uře wuassu pangalo udde. ⁵Sulařummu tita n agama Yahudi tinantuna manungku manga imam papapulnı Lewi řinone manganu sambau wuassu mapuřo addapatu taumata n Israel, eteudde manga tuřrangı mangitou sassane, salaiwe imangitou suadio'a papapulnı Abraham. ⁶Melkisedek wařinewe papapulnı Lewi, arawe itou nanengkamma lai sambau wuassu mapuřo asombangi Abraham, wuřru nangařamatta lai si Abraham apan suete lai nanengkamma manga paaire Mawu Ruata. ⁷Atonna tawe wotongnge iapaasařa manungku taumata apan niařamatanna mabbawoanna wuassu taumata apan nangařamatta sitou. ⁸Manga imam apan nanengkamma darorongnga sambau wuassu mapuřo wageangnge udde, eteudde taumata apan wotongnge mate. Arawe tumuřruttu Wuke Susi, Melkisedek apan nanengkamma aonggola sambau wuassu mapuřo udde, eteudde taumata apan sidutu wiakka. ⁹Wotongnge iwisara, manungku Lewi - apan papapulnı nanengkamma samhau wuassu mapuřo asombangu pabbawalagu Israel - namaekka lai wageangnge udde si Abraham, su tempo Abraham namaekka si Melkisedek. ¹⁰Salaiwe Lewi taambe niasungkanga, arawe wotongnge iwisara itou sulařumpe m wadangngı Abraham iupungnga ařamonane, su tempo Melkisedek nassomba n Abraham.

¹¹Su ařungngu piařra'u manga Imam Lewi, tita n agama Yahudi niinggolla su taumata n Israel. Ana waugu manga Imam Lewi dorone udde tawe maaola'a ringannu masuungnga apa apan mammanaranne,



Imammu Lewi (7:11)

ne řinone pia imam waine, eteudde apan ere Imam Melkisedek, wuřru wařine lai wuassu wageangngu Imam Harun! ¹²Ne amungkangu a'iannu manga imam nawařu, tita n agama Yahudi řinone mawařu lai. ¹³Apan ipappandumme isindi eteudde Mawu ng kite; Itou wuassu pabbawalaga waine, wuřru taambe saran paassa wuassu pabbawalage nammanara ere sangkatou imam. ¹⁴Anambo n taumata masingkata manungku Mawu ng kite niarantanne wuassu pabbawalagi Yehuda; wuřru Musa tawe saram paassa nanaggo m pabbawalaga udde su tempo itou mabbisara su ola'u manga imam.

Sangkatou imam waine ere Melkisedek

¹⁵Olangge apan iwabbisara indi naola'a lembon matualaga lai, ringannu daranta n sangkatou imam waine ere Melkisedek. ¹⁶Itou nite-nega naola'a imam, wařine ana waugu manga atorannu taumata, arawe wuassu wiakke apan natatařrino wuřru tawe panginsueanne. ¹⁷Ana waugu sulařummu Wuke Susi niwisara, "I'o ewe'e sangkatou imam saran mařannu-řannu ere Imam Melkisedek." ¹⁸Nariaddi, orassa indi atoranna apan tabbe tate saileanna, ana waugu lomete wuřru tate gunane. ¹⁹Tita

n agama Yahudi tawe maaola'a sambau inolaanna apan masuungnga. Ana waugu udde iite orassa indi nionngolannu pangangantima lembon apianne; ringannu aroddi iite wotongnge mangundani Mawu Ruata.

²⁰See lai, sarangkanambone udde lapiddu ringannu sasalu wuassu Mawu Ruata. Tawe sassalu ere udde su tempo manga imam waine nitenege. ²¹Arawe Mawu Yesus nitenege maola'a imam, nappaattu sasalu, su tempo Mawu Ruata nabbisara Sitou,

"Mawu suete nassalu,

wurru Itou sarun tawe mamaļu ringidde,

'Ete I'o imam saran maļannu-ļannu.'"

²²Ringannu udde lai Mawu Yesus naola'a watarru su sambau paaire apan lembon apianne.

²³Pia lai hatto sambau: manga imam apan waine udde manambo, ana waugu imangitou sangkatou-sangkatou natete, na'oma n sara tate naassu manarane. ²⁴Arawe Mawu Yesus mabbiakka saran maļannu-ļannu, nariaddi wuassu manarane ere sangkatou imam, tawe na'ingkata su taumata waine. ²⁵Ana waugu udde saran maļannu-ļannu Mawu Yesus wotongnge manaļamatta manga taumata apan nirumanta ringannu Mawu Ruata sulaļummi Tou, ana waugu Itou mabbiakka saran maļannu-ļannu ipangapiddu sasaļande su Mawu Ruata, hunane su manga taumata udde.

²⁶Nariaddi, Mawu Yesus eteudde Imam Wahewa apan pappandu-manni ite. Itou susi; Sitou tawe niasombanganna pasasaļa ara'e rosa sara ng kadio'a. Itou niŗrae wuassu manga taumata marosa, wurru niru-itta su tampa lembon atanggarranne wuassu aļawo'u langitta. ²⁷Itou tawe ere manga imam wahewa waine, apan miallo-miallo řinone mangapiddu sasamba ana waugu manga rosane sassane rorone, wua udde ana waugu rosa m pabbawalaga. Mawu Yesus nangapiddu sasamba tumba'u paassa ma'oma n sara maļannu-ļannu, su tempo Itou nattingkaola'u wadang-Nge sassane naola'a sambau sasamba. ²⁸Tita n agama Yahudi mappaatenege taumata apan tawe nasuungnga maola'a imam wahewa. Arawe wuassu tita udde, Mawu Ruata na'ola'a paaire ringannu sasalu manungku Itou mapaatenege maola'a sangkatou Imam Wahewa, Ana'a apan suete niola'a Ratu m Punnu Saļamatta apan nasuungnga saran maļannu-ļannu.

Mawu Yesus Imam Wahewa ng kite

8 Punnu anambo n hatto indi eteudde: Iite uatahuanna Imam Wahewa apan ereudde, apan ua'ianna mammarenta su sambau ringannu Mawu Ruata Lembon Ahebaļanne su surga. ²Itou manarane

naola'a sangkatou Imam Wahewa su Wabbo'a Lembon Susi, eteudde sulaḷummu rasannu Mawu apan tutune, apan niapararisikku Mawu, waḷine niapararisikku taumata.

³Aḷawo'u imam wahewa niteneḡa iapa'onggolu sasamba ara'e aonggola su Mawu Ruata. Aroddi lai Imam Wahewa ng kite; Itou ḡinone pia dorotongnga olaanna sasamba. ⁴Unnu wisara Itou uatana'a su runia indi, Itou tawe maola'a imam, ana waugu piate imam apan mangapiddu sasamba radoronganna sulaḷummu tita n agama Yahudi. ⁵Manara apan a'olaanni mangitou ere sangkatou imam udde, tumba'u sambau hambaranna ara'e lintau wuassu apa apan su surga. Udde suete niapaasingkatu Mawu Ruata si Musa rorone, su tempo Musa maapulu mapararisikku Rasannu Mawu. Mawu Ruata nabbisara arendi si Musa, "Naunge! Sarangkanambone udde ḡinone olaannu tumuḡḡuttu tuḷadane apan niapaasilo si'o raso su wowone." ⁶Arawe orassa indi Mawu Yesus naasomba manara imam apan lembon awantuhanne wuassu apan nimanara manga imam udde. Ana waugu paaire apan niola'a su wallatu Mawu Ruata wuḡḡu taumata, eteudde paaire apan lembon apianne ana waugu pinangianannu paaire hunane su manga inolaanna apan lembon apianne.

⁷Unnu wisara tawe auranganne paaire apan paarorone, ne salaiwe lasa'e ma'ola'a paaire aruane. ⁸Arawe Mawu Ruata suete naasomba pasasaḷa su pabbawalage, na'oma n sara Mawu Ruata nabbisara,

"Naunge, sarun rumanta tempone,

Ia'u sarun makkiinnu paaire apan wakku su pabbawalagu Israel, wuḡḡu su pabbawalagu Yehuda.

⁹Waḷine ere paaire apan niola'u Mawu Ruata su iupungngu aḷamona mangitou

su tempo Ia'u mangnehetta simangitou sumabangnga wuassu leta'u Mesir.

Imangitou maḷawangnga su paaire apan suete Ta'u niola'a ringanni mangitou;

ana waugu udde Ia'u tate mappanduma simangitou.

¹⁰Arawe orassa indi, ete indi paaire apan sarun olaangku su pabbawalagu Israel

su miallo-miallo apan sarun rumanta unnu Mawu:

Ia'u sarun mantarḡo n tita-U sulaḷummu ḡingirḡanni mangitou wuḡḡu iworḡeta su naungngi mangitou.

Ia'u sarun maola'a Mawu Ruata mangitou,

wuḡḡu imangitou sarun maola'a pabbawala-U.

¹¹Imangitou salaiwe lasa'e mangarḡa'a hawene laḷorḡo n soa, ara'e mamasingkata turḡangge,

'Illaḷaite Mawu,'

Ana waugu imangitou sarangkanambone, timmade, dario'a,
sarun maa'illaḷa Sia'u.

¹²Ia'u sarun mangampunga manga pasasaḷa mangitou,
wuḷḷu tate lai mannaungna manga rosa mangitou.”

¹³Ringannu napaasingkattu sambau paaire wakku, Mawu Ruata na'ola'a
paaire apan paarorone udde natabbete wuḷḷu naḷaḷeote, wuḷḷu apa apan
tabbete sarun maḷihakke mawuḷi.

Ola'u pasasubba su runia wuḷḷu ola'u pasasubba su surga

9 Paaire apan paarorone pia manga atorannu patataḷḷamawu, wuḷḷu
pia lai tampa patataḷḷamawuanna niola'u taumata. ²Sambau rasanna
niapararisikka, apan wageangnge su saruane nisaggo Wabbo'a Susi.
Isudde pia aianannu soḷo, wuḷḷu pia lai medda ringannu roti apan
ipasubba Mawu Ruata. ³Su wageangu laḷumme, eteudde su liuddu
pampele aruane, pia wabbo'a apan isassago Wabbo'a Lembon Susi.
⁴Sulaḷummu wabbo'a udde pia medda pangangadoannu sasamba apan
niola'a wuassu wuḷawanna panutunganna dupa, wuḷḷu pia lai Wan-
tala Paaire apan sarangkahe walle papi'unannu wuḷawanna. Sulaḷummu
wantala udde pia urinna wuḷawanna laḷoḷḷoannu manna, ta'inni Harun
apan nassollate, wuḷḷu rua ng kuḷappa watu pamamorretanna apan su
wowone wawoḷḷetannu mapuḷo tita n Mawu Ruata. ⁵Su wowo m wan-
tala udde pia darua mala'ekatta, eteudde riadianna pia papaidde apan
mammasingkata manungku Mawu Ruata uatana'a isudde lai. Papai-
ddu mala'ekatta darua udde uasiappakka su wowo n laḷuubu Wantala,
eteudde tampa m pangangampunganna rosa. Arawe sarangkanambone
udde tawe iataḷa'a orassa indi sambau-sambau.

⁶Aroddite sarangkanambone niatokka. Miallo-miallo manga imam
sussutta sulaḷummu wageangngu saruannu rasanna udde mappaamattu
manara mangitou. ⁷Apan sussutta su wageangnge laḷumme su rasanna
udde tumba'u imam wahewa. Itou mammanara udde tumbau santonna
paassa. Udde mammanaranne ringannu mangngapiddu ḷaḷḷa ipasubba
Mawu Ruata ana waugu watanganne sassane wuḷḷu ana waugu manga
rosa apan niola'u pabbawalage su liuddu ḷingiranne. ⁸Ringannu ato-
ranna udde, Ghaḷḷaho Mawu Ruata napaalḷatta'a ringanu masemakka,
manungku tantaḷanna rasanna su saruane udde ta'e uarisikka, laḷanna
suttanna watukku Wabbo'a Lembon Susi udde taambe mawu'a. ⁹Indi
maola'a hambarannu orassa indi: atappasanne manungku manga sa-
samba wuḷḷu manga aonggola winatangnga apan nionggolla su Mawu
Ruata, tawe maasuungngu laḷummu naungngu taumata apan maṅg-

ngapiddu aonggola udde. ¹⁰Ana waugu manga laḷaghu udde tumba'u matatarḷino su anna, inumanna, wuḷḷu aḷawo'u laḷaghu m pamamaresi. Sarangkanambone udde tumba'u atorannu wadanga apan tumba'u ma'oma n sara tempone Mawu Ruata mallimbakku.

¹¹Arawe Kristus suete nirumanta ere sangkatou Imam Wahewa wuassu inolaanna apan mapia wuḷḷu piate. Su Rasannu Mawu suapa Itou mappamattu manarane ere sangkatou Imam Wahewa eteudde rasanna apan lembon mawantuga wuḷḷu lembon nasuungnga. Udde tawe niola'u taumata; atappasanne waḷine niarantanne wuassu runia apan niriaddi indi. ¹²Mawu Yesus sinumutta su Wabbo'a Lembon Susi sulaḷummu rasanna udde tumba'u paassa ma'oma n sara maḷannu-ḷannu. Su tempo udde Itou tawe nangapiddu ḷaḷḷa ng kambinga esakka ara'e ḷaḷḷa n ana'u sapi olaanna sassamba; Itou nangapiddu ḷaḷḷa n Tou sassane, wuḷḷu ringannu udde Itou nanubusa rosa ng kite saran maḷannu-ḷannu. ¹³ḷaḷḷa ng kambinga wuḷḷu sapi esakka wuḷḷu awu n sassamba ana'u sapi, nipaatta ipammokka manga taumata apan laḷeo tumuḷḷuttu atorannu agama tadea'u imangitou mawaresi. Ne, amungkangu ḷaḷḷa wuḷḷu awu udde wotongnge maawaresi aḷaḷeo manga taumata udde, ¹⁴nangilembote lai ḷaḷḷa n Kristus! Sulaḷummu Ghaḷḷaho awasa, Kristus nanantillu watangan-Ne sassane su Mawu Ruata maola'a sambau sassamba apan nasuungnga. ḷaḷḷa-Ne mammaresi laḷummu naungngi ite wuassu laḷaghu n agama apan tawe gunane, tadea'u iite wotongnge maapangimbe Mawu Ruata apan wiakka.

¹⁵Ana waugu udde Kristus naola'a Paḷelene su sambau paaire apan wakku, tadea'u taumata apan suete niwagoannu Mawu Ruata wotongnge manengkamma manga aḷamatta awasa apan suete pina'ire Mawu Ruata. Sarangkanambone udde wotongnge mariaddi ana waugu piateddu nate, eteudde Kristus; wuḷḷu papate-Ne udde namallosu manga taumata wuassu manga pasasaḷa apan niola'i mangitou su tempo paaire paarorone ta'e ipappaatta.

¹⁶Amungkangu pia suratta pussa'a, ḷinone lai pia tatialane manungku taumata apan na'ola'a suratta udde natete. ¹⁷Ana waugu suratta pussa'a tawe iapaatta tantaḷanna taumata apan na'ola'a suratta udde ta'e wiakka. Suratta udde wotongnge ipaatta tumba'u napawe taumata udde natete. ¹⁸Ana waugu udde paaire paarorone lai ḷinone tohassannu ḷaḷḷa. ¹⁹Paarorone atonna Musa namasingkatu anambo n tita n Mawu Ruata su pabbawalagu Israel. Wua udde Musa nanganu ḷaḷḷa n ana'u sapi wuḷḷu ḷaḷḷa ng kambinga esakka, see nillo'annu ua'e, wua udde nialassa su Wuke Manga Tita n Mawu Ruata wuḷḷu su anambo n pabbawalagu Israel ringannu nappaattu nannaḷo hisop wuḷḷu wambuḷu n domba lihidde ere ate. ²⁰Lapiddu ma'ola'a udde Musa nabbisara, "Ete indi ḷaḷḷa apan mannhassa paaire wuassu Mawu Ruata apan ḷinone

turrutanni amiu.” ²¹Wua udde ringannu inolaanna apan uasulungnga, Musa nanebboku řarřa udde lai su Rasannu Mawu wuřřu su ařawo’u sarannapa m patatařramawuanna. ²²Atonna tumuřřuttu tita n agama Yahudi, ařawo’u sarannapa a’ukkasannu řarřa; wuřřu rosa tumba’u wotongge aampunganna ringannu mapaaturu n řarřa.

Sasamba n Kristus namappasa rosa

²³Ringannu olangge ereudde manga sarannapa apan mammasilo manga inolaanna su surga, řinone ukkasanna. Arawe su manga inolaanna su surga udde sassane raddeaanna sasamba apan lembon apianne. ²⁴Ana waugu Kristus tawe sinumutta su Wabbo’a Susi inolaannu taumata, apan tumba’u hambarannu Wabbo’a Susi apan řinone. Mawu Yesus sinumutta sassane su surga; poiaroddi orassa indi Itou uasaruanna Mawu Ruata hunane siite. ²⁵Imam wahewa n Yahudi suapan tonna sussutta watukku Wabbo’a Lembon Susi sulařummu Waře Mawu ringannu uaapiddu řarřa n sambau winatangnga. Arawe Kristus tawe sinumutta manantillu watangan-Ne masokka-sokka. ²⁶Ana waugu amung-



Imam Wahewalla su Tamba Apan Lembon Na’ukkassa (9:25)

kangu aroddi, udde atappasanne Itou masokkate matatařřanga ro’e n runia indi niriaddi. Arawe wutte’e, orassa indi su tempo apan panginsueanne indi, Itou nirumanta tumba’u paassa mamappasa rosa ringannu nanantillu wadang-Nge sassane. ²⁷Mawu Ruata suete nanantuna manungku taumata mate tumba’u paassa wuřřu wua udde parikisannu Mawu Ruata. ²⁸Aroddi lai Kristus tumba’u paassa tinantilla maola’a sasamba ipanubussa rosa n anambo n taumata. Itou sarun rumanta apia su aruane, wařine manginsue hatto m paddarosa, arawe mařamatta manga taumata apan uarařřaddo daranta-Ne.

10 Tita n agama Yahudi tumba'u mangngonggolu hambaranne apan maḷabbuka su ola'u manga inolaanna mapia apan sarun rumanta, wuḗru waḷine hambaranna apan su řinone wuassu manga inolaanna udde. Tawe mariaddi tita udde wotongnge mapaasuunggu tau-mata apan rudanta massubba Mawu Ruata ringannu uaapiddu sasamba, salaiwe suapan tonna mannantilu manga sasamba apan uasuḷungnga. ²Unnu wisara, manga taumata apan massubba Mawu Ruata udde atonna-tonna suete niwaresi wuassu rosa, imangitou tate lai pia naungnga uapendama rosa, wuḗru sasamba tate lai itantila. ³Arawe wutte'e manga sasamba apan tinantilla suapan tonna udde, ewe'e mappanaungnga su taumata su ola'u manga rosa mangitou, ⁴ana waugu atonna řařa n sapi wuḗru řařa ng kaminga esakka tawe maatubusa rosa.

⁵Ana waugu udde su tempo Kristus sinumutta su runia, Itou nabbi-sara su Mawu Ruata,

'I'o tawe maapulu n aonggola wuḗru sasamba;
arawe I'o suete nanaddia wadanga, Sia'u.

⁶I'o maddiri n sasamba tattutungana
ara'e sassamba ipanubbusa rosa.

⁷See Ia'u nabbisara, 'Ete indi Ia'u, oh Mawu Ruata!

Ia'u nirumanta tadea'u tumuḗrutta apulu-Nu,
ere uawoḗretta su ola'u riri-U sulaḷummu Wuke Susi.'"

⁸Paarorone Kristus nabbisara, "I'o tawe mappandumma aonggola wuḗru sassamba; I'o maddiri n sasamba wuassu winatanga apan iatambuna maola'a aonggola wuḗru sasamba ipanubbusa rosa." Kristus nabbisara aroddi, salaiwe aḷawo'u sasamba udde nionggolla tumuḗrutta tita n agama Yahudi. ⁹Wua udde Kristus nabbisara, "Ete indi Ia'u, oh Mawu Ruata! Ia'u nirumanta tadea'u tumuḗrutta apulu-Nu." Nariaddi Mawu Ruata namappasa aḷawo'u sasamba apan tabbe udde, wuḗru nihantiannu sassamba n Kristus. ¹⁰Yesus Kristus suete tinumuḗruta apa apan ipaapulu Mawu Ruata wuḗru nanantillu watanganne maola'a sassamba. Ringannu sasamba udde, apan niolangnge tumba'u paassa ma'oma n sara maḷannu-ḷannu, iite sarangkanambone niwaresi wuassu rosa.

¹¹Suapan imam taumata n Yahudi mappamattu manarane ere sangkatou imam su miallo-miallo, wuḗru masokka itou mangonggolu sasamba uasuḷungnga. Arawe manga sasamba udde atonna-tonna tawe maatubbusa rosa. ¹²Arawe Kristus tumba'u nangonggolu sambau sasamba ipanubbusa rosa, wuḗru sasamba udde ipappaatta saran maḷannu-ḷannu. Napawe suete nanantillu sasamba udde, Kristus inuma'ianna su uanannu Mawu Ruata wuḗru mammarenta suadio'a ringanni Tou. ¹³Wuḗru orassa indi Kristus uaḗrado ma'oma n sara Mawu Ruata ma'ola'a manga seenne massuḗrubawa Sitou. ¹⁴Nariaddi ringannu sa-

samba sambau, Kristus napaasuungnu manga taumata apan suete niwaresi wuassu rosa.

¹⁵Su olangnge udde Gharraho Mawu Ruata nangonggolu lai tatialane siite. Gharraho Mawu Ruata mabbisara,

¹⁶'Ete indi paaire apan sarun olaang-Ku ringanni mangitou miallo-miallo apan sarun rumanta', unnu wisara Mawu,

'Ia'u sarun mantarfo n tita-U sulaumu naungngi mangitou, wufru mamorrettu tita udde su laumu ringiranni mangitou.'

¹⁷Mawu Ruata nabbisara lai, "Ia'u tate mannaungnga manga rosa wufru manga alaleo mangitou." ¹⁸Nariaddi, manga rosa wufru manga alaleo udde suete niampunganna, ne lasa'e lai mangonggolu sasamba ipangampungna rosa.

Wette iite mangundani Mawu Ruata

¹⁹Ne, Manga turangnga, ana waugu papate Mawu Yesus udde iite orassa indi warrani sumutta su Wabbo'a Lembon Susi. ²⁰Mawu Yesus suete namu'a sambau la'anna apan wakku siite, eteudde la'anna apan mangonggolu pabbawiakka. La'anna udde sumabbi passaranne eteudde Kristus sassane. ²¹Wufru iite orassa indi uatahuanna sangkatou imam wahewalla, apan uariagga Wa'e Mawu Ruata. ²²Ana waugu udde, wette iite mangundani Mawu Ruata ringannu naungnga matulida wufru pangangimanna apan matohassa; ringannu naungnga apan suete niukassa wuassu apendamma apan sa'a, wufru ringannu wadangnga apan suete niukkassu ua'e waresi. ²³Rinone iite uaagasa atonna su antima apan pangimananni ite, ana waugu Mawu Ruata wotongnge apangimananna wufru Itou sarun manuungnu paaire-Ne. ²⁴Wufru rinone iite ua'aellaga sandingananna, tadea'u iite wotongnge uasasasa mandangngu sansulungnga wufru ma'ola'a manga inolaanna apan mapia. ²⁵Rinone iite sidutu maammula suadio'a, wufru imbaranga wolo'a ere taumata waine. Iite rinone lembon maturruta uatohassa, ana waugu iite masingkata manungku tate ma'annu lai Mawu sarun rumanta.

²⁶Ana waugu amungkangu watti'a apan atonna wuassu Mawu Ruata suete niapassingkata siite, arawe iite sidutu ma'ola'a rosa ringannu apulu naungnga, ne tate lai sasamba ipamappasa rosa ng kite. ²⁷Tumba'u sambau apan plate siite eteudde sumaruanna pamamarikisannu Mawu Ruata ringannu putungngu asasa'one apan sarun manutungnga ma'oma n sara masue manga taumata apan lullawangnga Sitou! ²⁸Taumata apan tawe tumurrutta tita apan suete nionggoli Musa, iruumanna mate ringannu tawe ampungnge, amungkangu pia sakassi darua ara'e sire tallu, itou niatialante nassa'a. ²⁹Aroddi awakkane ruumanna apan iong-

gola su taumata apan maṛṛinda Ana'u Mawu Ruata. Taumata udde mangngadio'a ṛaṛra m paaire Mawu Ruata, eteudde papate n Kristus apan namaresi sitou wuassu rosa. Itou mangngadio'a Ghaṛraho apan mangngonggolu aḷamatta. ³⁰Iite masingkata isai Itou apan nabbisara, "Ia'u sarun mabbalissa! Ia'u sarun makkuumanna!" wuṛṛu lai nabbisara, "Mawu sarun makkuungngu aḷaṛṛanang-Nge." ³¹Asasusa eteapa amungkungu manawo su lima Mawu Ruata Apan Wiakka!

³²Naungete ereapa ola'u manga tuṛṛanga su tempo naḷiu. Su tempo udde, napawe semakku Mawu Ruata nilumansianga si'o, iamiu anamboanne uatataṛṛanga, arawe iamiu sidutu mammanara ringannu maṛṛimada. ³³Pattaṛṛa assa iamiu aaḷuandahanna wuṛṛu a'olaanna tawe aregane su saruannu awadaalla. Pattaṛṛa assa lai iamiu uatataṛṛanga ringanni mangitou apan a'olaanna aroddi, ³⁴wuṛṛu iamiu lai mammen-dama su sambau, asasusa n taumata apan su tuttuṛṛanna. Wuṛṛu su tempo manga aḷawo'a apan tatahuananni amiu aṛṛoanna, iamiu nengnkamma udde ringannu naungnga maḷuassa, ana waugu iamiu masingkata manungku iamiu ta'e uatahuanna sambau apan lembon mapia, apan mataṛṛanga saran maḷannu-ḷannu. ³⁵Ana waugu udde, arie naungnga maadio'a, ana waugu amungkungu iamiu sidutu mangngimanna, ne pia laḷantakke apan wahewalla su inolaannu udde! ³⁶Iamiu ṛinone masabare, tadea'u iamiu wotongnge mapa'ola'a apulu Mawu Ruata wuṛṛu ringannu aroddi iamiu manengkamma apa apan suete nipa'ire n Tou.

³⁷Ana waugu sulaḷummu Wuke Susi uarorṛetta,

"Ete taḷa ng kadio'a lai,

ne Itou apan sarun rumanta udde,

sarun rumanta ringannu maḷihakka;

Itou sarun tawe mangaddo maḷannu daranta-Ne.

³⁸Wuṛṛu pabbawala'u apan naṛṛino sarun mangngimanna wuṛṛu mabbiakka;

arawe amungkungu pia wuassu wallatti mangitou apan sussaṛṛota ne Ia'u tawe maḷuassa sitou."

³⁹Iite indi waḷinewe pabbawalaga apan sussaṛṛota wuṛṛu u'aliwu. Arawe iite uddewe pabbawalaga apan mangngimanna Mawu Ruata wuṛṛu apan iapaasaḷamatta.

Pangangimanna

11 Pangangimanna eteudde mangngimanna atonna-tonna su manga apa apan aantimanna, atappasanne pia pangangantima su apa apan tawe asiloanna. ²Ana waugu pangangimanna, ne manga taumata su tempo naḷiu iaḷuassu Mawu Ruata.

³Ana waugu mangngimanna, ne iite maasunna manungku runia indi niola'u rengetannu Mawu Ruata; nariaddi, apa apan aasilooanna, niola'a wuassu apa apan tawe iasilo.

⁴Ana waugu mangngimanna, ne Habel nangonggolu sasamba apan apianne su Mawu Ruata wuassu aonggoli Kain. Ana waugu pangangimanne udde, Habel tinarimmatu Mawu Ruata naola'a sangkatou taumata apan mapia, ana waugu nilumiatta'e manungku Mawu Ruata nanengkamma aonggole. Habel natete, arawe ana waugu pangangimanne udde, ne itou ta'e uahahatto sara orassa indi.

⁵Ana waugu mangngimanna, ne Henokh tawe nate, ewe'e nasengkenga wuṛṛu niapiadda ringannu Mawu Ruata. Tawe saran sangkatou apan wotonge maisasomba n tou, ana waugu itou suete niapaasengkengu Mawu Ruata. Sulalummu Wuke Susi uawoṛṛetta manungku tantaḷanna Henokh taambe niapaasengkenga, itou maaluassa naungngu Mawu Ruata. ⁶Amungkangu tawe pangangimanna, tawe saran sangkatou apan wotongnge maaluassa naungngu Mawu Ruata. Ana waugu taumata apan rumanta ringannu Mawu Ruata ṛinone mangngimanna manungku pia Mawu Ruata, wuṛṛu manungku Mawu Ruata mangonggolu wawaḷinne su taumata apan maddea'a Sitou.

⁷Ana waugu mangngimanna, ne Nuh niapasingkatannu Mawu Ruata su ola'u apa apan sarun mariaddi su allo murine, apan tawe asiloanni tou. Nuh tinumuṛṛuta Mawu Ruata na'oma n sara itou nallanginnu apalla apan salimmurine niasingkatanna napanalamatta wadangge wuṛṛu laḷoṛṛo m baḷene. Ringannu aroddi runia niṛṛuumanna, arawe Nuh sassane ana waugu pangangimanne niapaaliatta'u Mawu Ruata ere sangkatou taumata apan mapia.

⁸Ana waugu mangngimanna, ne Abraham tinumuṛṛuta Mawu Ruata su tempo Mawu Ruata namago sitou, wuṛṛu nandolokki tou inai watumku wanua apan suete pina'ire Mawu Ruata sitou. See Abraham inaite ringannu awagananna suapa sarun patuddanni tou. ⁹Ringannu mangngimanna, Abraham natana'a ere sangkatou raho su leta'a apan suete pina'ire Mawu Ruata sitou udde. Abraham uatana'a isudde su rasanna. Aroddi lai Ishak wuṛṛu Yakub, apan nanengkamma paaire apan nassuḷungnga wuassu Mawu Ruata. ¹⁰Ana waugu Abraham tantaḷanna uaraṛṛaddo soa apan ilakki'inna wuṛṛu iaparisikku Mawu Ruata ringannu rapappake apan matohassa.

¹¹Ana waugu mangngimanna, ne Abraham wotongnge naasomba pabbawalaga wuassi Sara, salaiwe Abraham tumanite n timmade, wuṛṛu Sara lai sassane tinna. Abraham mangngimanna manungku Mawu Ruata sarun mapaatipussu paaire-Ne. ¹²Salaiwe Abraham su tempo udde ere taumata apan wadange natete, arawe itou naasomba pabbawa-

laga, apan anambone tawe iareengnga – ere anambo n anumpitanna su langitta wuṛṛu anne su winggi n apanne.

¹³Anambo n taumata udde sidutu mangngimanna ma'oma n sara mate. Imangitou tawe naasengkamma manga inolaanna apan pina'ire Mawu Ruata, arawe tumba'u ma'ellega wuṛṛu mannaḷoho wuassu marau. Wuṛṛu ringannu udde imangitou nabbaḷo manungku imangitou tumba'u taumata raho wuṛṛu mamamaḷintadu runia indi. ¹⁴Taumata apan nabbisara aroddi mapaaḷiatta'a ringannu masemakka, manungku imangitou tantaḷanna maddea'a wanua apan maola'a leta'a pussa'a atatanaanni mangitou. ¹⁵Waline wanua apan suete tinantangi mangitou udde apan sidutu irarṛingidi mangitou. Ana waugu amungkangu aroddi, ne manambote tempo simangitou ipabelengnga apia su wanua udde. ¹⁶Arawe nasemakke, manungku imangitou maapulu n sambau soa lembon mapia, eteudde Soa su surga. Ana waugu udde Mawu Ruata tawe masili amungkangu imangitou managone Mawu Ruata mangitou, ana waugu Mawu Ruata suete nanaddia sambau soa simangitou.

¹⁷Ana waugu mangngimanna lai, Abraham nanantilli Ishak maola'a sambau sasamba su tempo itou niannamannu Mawu Ruata. Ete tumba'u si Abraham Mawu Ruata nangonggolu paaire-Ne, arawe Abraham maapulu nanantillu anangnge apan man sambau udde. ¹⁸Mawu Ruata suete nabbisara si Abraham, "Wuassi Ishak indi, i'o sarun maasomba pabbawalaga apan pina'ire-U si'o." ¹⁹Abraham nangimanna manungku Mawu Ruata wotongnge mapaaawiakki Ishak apia wuassu papate – nariaddi, wotongnge iwisara, manungku Abraham suete nanengkamma si Ishak apia wuassu papate.

²⁰Ana waugu mangngimanna, ne Ishak na'ire manga aḷamatta si Yakub wuṛṛu si Esau su allo addantane.

²¹Ana waugu mangngimanna, tantaḷanna Yakub taambe nate, itou nangaḷamatta manga aḷarṛana'i Yusuf – ringannu uasandaka su pua n ta'inne wuṛṛu massubba Mawu Ruata.

²²Ana waugu mangngimanna, ne Yusuf – su tempo maranite n mate – nabbisara su ola'u sasabangu taumata n Israel wuassu Mesir, wuṛṛu nanantangu tanata, su ola'u winaḷunanne rinone olaanna ereapa.

²³Ana waugu mangngimanna, ne hagaranggi Musa namuni n tou aḷannune tallu wuḷanna napawe itou niasungkanga. Imangitou na'ellega manungku itou sangkatou ana'a apan maṛṛamaga, wuṛṛu imangitou tawe matta'utta lumawangnga parenta n ratu.

²⁴Ana waugu mangngimanna, Musa napawe nahewalle, maddiri isago ana'u maṛṛuala n ratu Mesir. ²⁵Mappianne itou matatarṛanga su sambau ringannu pabbawalagu Mawu Ruata wuassu itou mattemma aḷaḷuassa taḷa ng kadio'a mabbiakka su paddarosa. ²⁶Musa mammadama manungku maareganne marau itou maasomba aaḷuandaga ana

waugu Ratu m Punnu Sałamatta apan pina'ire Mawu Ruata udde, wu-
 assu maasomba aławo'u darotongngu wanua n Mesir; ana waugu Musa
 uaantima lałantake su allo murine.

²⁷Ana waugu mangngimanna, ne Musa nanantangu Mesir ringannu
 tawe matta'utta su asasa'u n ratu. Musa niuamatta mattuda m
 pattudanne ere ola'u itou naasilote Mawu Ruata apan tawe asiloanna
 udde. ²⁸Ana waugu mangngimanna, ne Musa nallaghu m Paskah wuřru
 namarenta tadea'u iwokka rařra su ngara waļe n taumata n Israel
 taddea'u Mala'ekattu Papate tawe mamate aļarřana'a pahuļu mangitou.

²⁹Ana waugu mangngimanna, ne manga taumata n Israel wotongge
 tumumbe Tahaļoangnga Mařramu, pařrimaunnapa imangitou u'amatta
 su leta'a mamara, arawe manga taumata n Mesir niallupu tahaļoangnga
 udde, su tempo imangitou maannamma tumumbe lai.

³⁰Ana waugu mangngimanna, manga taumata n Israel napaarřa'a
 manga darandungu Yerikho napawe imangitou namaļiwutta sulaļummu
 pitu allo aļannune. ³¹Ana waugu mangngimanna lai, ne Rahab, wa-
 wine masandaga udde, tawe niapate suadio'a ringannu manga taumata
 apan lullawangnga Mawu Ruata; ana waugu itou nanaļoho ringannu
 masarřionto'a manga mallaļinge n taumata n Israel.

³²Ne, ia'u wotongge lai tawe illoļone mabbisara, arawe orassa tawe
 natimu sia'u. Ana waugu ia'u lai taambe nanago n Gideon, Barak,
 Simson, Yefta, Daud, Samuel wuřru manga nabi. ³³Ana waugu mang-
 ngimanna, ne imangitou suete napaarugi manga araratuanna. Imangitou
 ma'ola'a apa apan su řinone, na'oma n sara naasengkamma apa apan
 suete pina'ire Mawu Ruata. Imangitou nanggattumu manga mořrongu
 singa, ³⁴namaduma putungnga apan wahewalla, naļiu wuassu pappi-
 litanu haļele. Imangitou lome, arawe nabbali matohassa; imangitou
 masarřaungnga sulaļummu pangalo na'oma n sara napaarugi manga tan-
 tara m pabbawalagu lumalo'a. ³⁵Ana waugu mangngimanna, ne manga
 wawine naasomba apia manga taumatane apan natete.

Paiddu lai apan maapulu sansaranna ma'oma n sara mate, wuřru ma-
 ddiri ipallosa, ana waugu maapulu iapaawiakka apia su sambau ringannu
 pabbawiakka apan lembon mapia. ³⁶Piaddu lai aalaundahanna, pap-
 puuļanna, niřrapussu řate wuřru tinařro su tutupanna. ³⁷Imangitou ti-
 nuntungannu watu na'oma n sara nate, piaddu niponggo'u lařřahari,
 wuřru piaddu nipate n haļele. Imangitou lullallele ringannu laubba wu-
 assu pisi n domba ara'e pisi ng kambinga; imangitou asiangnga, pap-
 pateanna wuřru sassansaranna. ³⁸Runia indi waļinewe tampa su řinone
 si mangitou. Imangitou lullallele su wadda'a wuřru manga wuidda, see
 uatana'a sulaļummu manga liangnga wuřru sulaļummu manga lořřangu
 leta'a.

³⁹Tumanite m wahewalla auntunganna apan niaobaannu anambo n taumata udde ana waugu pangangimanni mangitou! Arawe imangitou tawe maasengkamma apa apan suete pina'ire Mawu Ruata, ⁴⁰ana waugu Mawu Ruata pia pandumanna apan lembon apianne siite. Pandumanne eteudde manungku tumba'u uaaukka su sambau ringanni ite imangitou sarun masuungnga.

Mawu Ruata Iamangngi ite

12 Ne, su ola'i ite sassane, uapaaliwutta siite manambo atonna mattatjala! Ana waugu udde wette iite mandamme n anambo n apa apan mammakkata siite wuṛṛu rosa apan sidutu uareeta siite. Wuṛṛu wette iite ringannu ma'udduppa sumutta su pattalumanna apan sasaruannani ite. ²Rinone aellegi ite tuddane su Mawu Yesus, ana waugu ete Itou namangunna pangangimanni ite wuṛṛu nappaduḷi wuassu paarorone saran panginsueanne. Mawu Yesus natatarṛanga susa su alu arussa! Itou tawe mannaungnga manungku mate su alu arussa udde sambau inolaanna apan maasili. Itou tumba'u mannaungnga alaḷuassa apan sarun apendaman-Ne su allo murine. Orassa indi Itou ua'ianna su samba'a uanannu Mawu Ruata wuṛṛu mamarenta suadio'a ringanni Tou.

³Annama'a ṛingira'a ereapa اساسane Mawu Yesus sinumaruanna manga taumata marosa apan nilumawangnga Sitou aroddi alaṛṛage! Ana waugu udde arie maadio'a naungngu wuṛṛu mallone. ⁴Ana waugu sulaḷummu manaranu lullawangnga rosa, iamiu taambe saran paassa mammanara na'oma n sara napaaturo n ṛaṛṛa. ⁵Wuṛṛu imbarranga maabuḷi n tanata Mawu Ruata indi, apan nionggolla siamiu manga alaṛṛanang-Nge:

”Alaṛṛana'u, paatutuṛṛe paapia-pia alaṛṛa'u Mawu, wuṛṛu arie naungngu maadio'a amungkangu Itou masa'u si'o.

⁶Ana waugu Mawu mangarra'a manga taumata apan arangnguan-Ne, wuṛṛu Itou mammuulla manga taumata apan Itou suete nanga'u maola'a alaṛṛanang-Nge.”

⁷Rinone iamiu manengkamma hahesekku Mawu Ruata maola'a sambau alaṛṛa'a wuassu sangkatou iamangnga. Ana waugu apa suete pia sangkatou ana'a tawe iṛṛuumannu iamangnge? ⁸Amungkangu iamiu tawe iṛṛuumanna ere alaṛṛanangnge waine indi, iamiu waline ana'a surriwa, ewe'e ana'a uata'a. ⁹Iite pia iamangnga su runia. Itou mangarra'a siite, wuṛṛu iite manggaddatta sitou. Ne, nangillembu su saruatnu Iamangngi ite su surga, natantuna iite lembon matuṛṛuta Sitou tadea'u iite wiakka. ¹⁰Hagurangngi ite su runia mangarra'a siite tumba'u su-

laḷummu tempo apan pia pattaalanne, tumuruttu apa apan su apendami mangitou mapia. Arawe Mawu Ruata manggarra'a siite hunane su apapia ng kite sassane, tadea'u iite wotongnge maola'a susi suadio'a ringanni Tou. ¹¹Atonna su tempo iite aarraanna, ruumanna udde tawe maaḷuassa naungngi ite, ewe'e tumba'u maasusa. Arawe maḷiu wua isudde, siite apan suete niarraanna, ruumanna udde ma'ola'a siite mabbiakka tutturuta apulu Mawu Ruata, wuḷru mangngonggolu apendam paddarame siite.

Tatantiro wuḷru iapaanaungnga

¹²Ana waugu udde, tohasse limanu apan lome wuḷru wuunu apan mangngindo udde! ¹³Aamate sidutu su laḷanna apan maḷaukka, tadea'u leddanu u'ento udde tawe maggaḷisa, ewe'e sarun mapia.

¹⁴Paddea'e ringannu wotongnge mabbiakka su paddarame ringannu anambo n taumata. Paddea'e lai see mabbiakka susi, tumba'u ringannu Mawu. Ana waugu tawe saran sangkatou wotongnge maasilo Mawu amungkangu itou tawe mabbiakka ereudde. ¹⁵Paariagai arie ma'oma n sara piaddu sangkatou apan sumabbanga wuassu ammuḷannu apapia naungngu Mawu Ruata, tadea'u tawe piaddu maola'a ere sasuanne apan pia pasangkade su pattangnganni amiu ma'oma n sara mandanta n asasusa wuḷru mandaleo anambo n taumata ringannu pasangkade. ¹⁶Paariagai tadea'u tawe piaddu mabbiakka sussandaga ara'e tawe mangadata inolaannu Gharraho, ere suete niola'i Esau. Itou nabbaḷu'u watanganne ere sangkatou ana'a pahuḷu, ana waugu tumba'u sanlama'a anna. ¹⁷Iamiu masingkata manungku wua udde Esau maapulu maasomba aḷamatta udde wuassu iamangnge, arawe itou nito'e. Ana waugu salaiwe ringannu laḷuai itou maddea'a laḷanne ipangapia passasaḷane, arawe allo ipaddea'a udde nasuete.

¹⁸Manga turrangnga tawe nirumanta sumaruanna apa-apa ere sinaruanu pabbawalagu Israel dorone. Imangitou sinumaruanna apa apan wotongnge iapita, eteudde Wowo n Sinai ringannu putungnge apan lukkenggama; imangitou sinumaruanna araranduma, wasa tuudda wuḷru tandi'a; ¹⁹Imangitou sinumaruanna tingikku trompeta, wuḷru tingikka apan ma'ikkatta. Su tempo manga taumata n Israel naaringikka tingikka udde, imangitou madorongnga ringannu sasalaḷande tadea'u tingikka udde tate mabbisara apia simangitou. ²⁰Ana waugu imangitou tawe maataranga madingikka parenta apan niapaasingkatu tingikka udde. Ana waugu tingikka udde mabbisara, "Anambo n taumata apan namita wowone indi, tawe pilene apa udde winatanga ara'e lai isai, ḷinone tungannu watu ma'oma n sara mate." ²¹Apa apan niasiloannu manga

taumata n Israel udde aroddi ahewalle na'oma n sara Musa nabbisara, "Ia'u matta'utta wuṛṛu mangngindo!"

²²Arawe, iamiu suete nirumanta watukku Wuiddu Sion wuṛṛu soa Mawu Ruata apan wiakka, eteudde Yerusalem apan su surga ringannu mala'ekan-Ne su ṛiwune. ²³Iamiu uasemodda su ammula apan maaḷuassa - ammuḷannu aḷaṛṛana'a pahuḷu Mawu Ruata, apan manga aranne uawoṛretta sulaḷummu surga. Iamiu nirumanta sumaruanna Mawu Ruata, Mallarṛuungngu pabbawalagu taumata. Iamiu sumaruanna manga ghaṛṛaho manga taumata mapia, apan suete niola'a nasuungnga. ²⁴Iamiu nirumanta sumaruanna Mawu Yesus, Uatangnga paaire apan wakku udde; iamiu sumaruanna ṛaṛṛa wawokka apan wotongge maola'a tatubbusu inolaanna apan lembon apianne wuassu apan nitubbusanu ṛaṛṛa n Habel.

²⁵Ana wangu udde, paatehamma arie ma'oma n sara iamiu maddiringikka Sitou apan mabbisara udde. Imangitou apan maddiringikka Sitou apan nirumanta su runia wuṛṛu namasingkatu watti'u Mawu Ruata, tawe maataḷangngu watanganne. Lembonete lai iite indi apan uararingikka Sitou mabbisara wuassu surga! Amungkangu iite maddiri maddiringikka Sitou, iite tawe maataḷangnga wuassu ṛuumanna! ²⁶Su tempo udde tingikke naaṛṛindu'a runia. Arawe orassa indi Itou na'ire, "Paassa lai, ia'u sarun mamaṛṛindu'a waḷine tumba'u su runia ewe'e su langitta lai." ²⁷Wisara "Paassa lai" mannantiro manungku ahewallu runia apan suete niolang-Nge sarun iio'a wuṛṛu iramme, tadea'u mallambe tumba'u sarannapa apan tawe umio'a.

²⁸Ana wangu udde, ṛinone iite maadiangkamanna su Mawu Ruata, ana wangu iite nanengkamma wuassi Tou sambau araratuanna apan tawe umio'a. Ṛinone iite maadiangkamanna wuṛṛu mattarṛamawu Mawu Ruata ringannu addata wuṛṛu atata'utta, tumuṛṛuttu pallaḷagu apan ipaapulu-Ne sassane. ²⁹Ana wangu Mawu Ruata ng kite ere putungnga apan maatutungnga.

Ereapa mapaaḷuassu naungngu Mawu Ruata

13 Ṛinone iamiu sidutu mandangngu sangkatou ringannu waine ere sansuḷungngu manga taumata n Saṛṛani apan uasasangkatuṛṛanga. ²Arie humago'a mapaatana'a su waḷenu manga taumata apan ta'e awagananni amiu. Ana wangu ringannu ma'ola'a aroddi, plate taumata, ringannu tawe niatutukka suete napaatana'u mala'ekatta su waḷene. ³Naunge'o manga taumata sulaḷummu tuttuṛpanna, paṛṛimau napa iamiu lai isudde sulaḷummu tuttuṛpanna su sambau ringanni mangitou. Wuṛṛu

manga taumata apan a'olaanna walate apulu naungnga, řinone iamiu mannaungnga simangitou pařrimau napa iamiu lai a'olaanna aroddi.

⁴Anambo n taumata řinone mamasilo n addatta su paa'awingnga, ana waugu udde řinone sangkawinganna uararingikka sangkatou ringannu waine. Taumata apan lařeo wuřru taumata masandaga sarun parikisannu Mawu Ruata.

⁵Imbařranga wiakku paparentannu awawařiu n roitta, arawe řinone iamiu mařuassa ringannu saranapa apan tatahuananni amiu. Ana waugu Mawu Ruata suete nabbisara, "Ia'u tawe mapaawala ara'e manantangi amiu." ⁶Ana waugu udde iite wařrani mabbisara,

"Eteudde Mawu Matatuřungku,
ia'u tawe matta'utta.

Apa apan wotongnge olaannu taumata su saruanku?"

⁷Imbařranga maabuři manga piařrangu apan namasingkatu tanata Mawu Ruata siamiu. Paaellehe ereapa imangitou mabbiakka wuřru ere-apa imangitou mate, wuřru tannoite pangangimanni mangitou. ⁸Yesus Kristus uasuřungnga, mapia rorone, orassa indi, wuřru saran mařannu-řannu. ⁹Imbařranga mapaawala n ařawo'u hati n ařařra'a maaheranga apan mangalařiwu ng kamiu. Naunggi ite řinone tohasannu apapia naungngu Mawu Ruata, eteudde apan mapia; imbařranga ringannu manga atoranna su ola'u anna. Manga taumata n tiwatta apan matuřruta su manga atoranna udde tawe naasomba hunane.

¹⁰Iite uatahuanna sambau tampa n sasamba pangonggořannu sasamba su Mawu Ruata. Wuřru manga imam apan mangngimbe Sitou sulařummu Rasannu Mawu, tawe su řinone umanna sasamba apan uaraddo su wowo n tampa n sasamba udde. ¹¹Řařra m winatangnga apan suete nionggolla maola'a sambau sasamba tatubbusa rosa, nia-piddu imam wahewa watukku Wabbo'a Lembon Susi, arawe wadangu winatangnga udde sassane tutunganna su liuddu paddasananna. ¹²Ana waugu udde Mawu Yesus nate lai su liuddu ngara wahewa n Soa tadea'u mamesi ařařranang-Nge wuassu rosa ringannu dařra-Ne sassane. ¹³Ana waugu udde, wette iite inai ringanni Tou su liuddu padasananna wuřru mamendama aařuandaga suadio'a ringanni Tou. ¹⁴Ana waugu su runia, iite tawe tampa atatanaanna apan mařannu; iite maddea'a tampa atatanaanna apan sarun rumanta. ¹⁵Ana waugu udde, ringannu tatangngannu Mawu Yesus, řinone iite sidutu maddalo Mawu Ruata; udde maola'a sambau aonggolu aadiangkamanni ite Sitou, apan nionggoli ite ringannu wisara m wiwikka ipaddalo aran-Ne. ¹⁶Arie maabuři ma'ola'a apapia wuřru uatatuřungnga, ana waugu eteindi manga sasamba apan maařuassa naungngu Mawu Ruata.

¹⁷Paatuřrute parenta manga piařrangu, wuřru paasallunga simangitou. Ana waugu imangitou sidutu mařringiddu niawanu, wuřru imangi-

tou řinone sumimbakka ola'i amiu su Mawu Ruata. Amungkangu iamiu matuřřuta simangitou, imangitou wotongnge mammanara ringannu naungnga maľuassa; amungkangu tawe, ne imangitou sarun mammanara ringannu naungnga susa, wuřřu udde tawe maauntunga siamiu.

¹⁸Sidutua'e umaľiomanni ami. Iami mangngimanna laľummu naungngi ami waresi, ana waugu sulaľummu aľawo'u manara, iami sidutu maapulu ma'ola'a apa su řinone. ¹⁹Nangilembo ia'u sumaľande, tadea'u iamiu umaľiomangku tadea'u Mawu Ruata ringannu maľihakka mangapi'u mabelengnga ringanni amiu.

Aaľiomanna pangudusanne

²⁰Mawu Ruata suete napaawiakku Mawu ng kite Yesus Kristus wuassu papate. Ana waugu papate-Ne udde Itou orassa indi naola'a Mallaľu'adda Mawantuga siite, eteudde manga dombane. Papate-Ne udde lai mannohassa paaire apan tawe pangudusanne apan niola'u Mawu Ruata ringanni ite. ²¹Antimanna Mawu Ruata punnu paddarame udde manuungngi amiu ringannu aľawo'u apapia apan pappandumanni amiu ipa'ola'a apulu-Ne. Antimanna ringannu tatanggannu Mawu Yesus Kristus, Mawu Ruata mammanara sulaľummu naungngi ite, apa apan ipaapulu-Ne. Řinone Kristus raloanna saran maľannu-ľannu! Amin.

Pangudusannu Suratta

²²Ia'u sumaľande tadea'u iamiu tumuřřutta manga tatantiro'u indi ringannu masabare, ana waugu sura'u indi tawe tumanite n maľo'e. ²³Řinone iamiu masingkata manungku tuřřangi ite Timotius nipallose wuassu tutupanna. Amungkangu itou na'omate su tampa'u indi, ia'u sarun mangapiddi tou su tempo ia'u mattembo siamiu.

²⁴Waľoa tabea ng kami su anambo n piařřangu wuřřu su anambo n pabbawalagu Mawu Ruata. Sengkama lai tabea wuassu manga tuřřanga su Italia.

²⁵Doronganna Mawu Ruata mangaľamatta manga tuřřanga sarangka-nambone.

SURATTI YAKOBUS

WISARA TAŁAANE

Suratti Yakobus indi tuaddane su "anambo n pabbawalagu Mawu Ruata apan uasałiawukka su ahewallu runia". Ringannu mappaatu aławo'u sasanato'a, Yakobus namořreta sulałummu suranne indi manga tatantiro wuřru ałarra'a apan a'olaannu taumata n Sařrani su pallałagu wuřru inolaannu taumata n Sařrani. Wuassu pangangimannu taumata n Sařrani, itou nanała'a n aławo'u inolaanna ere paa'ala wuřru paa'asiangnga, wawono'a, pallałagu apan mapia, pasasunna sała, pangangimanna wuřru inolaanna, manga wisara, apapande, patatatiakka, awawunga, awawawo naungnga, su ola'u mapaasala n taumata waine, matuřrupassi, asasabare wuřru aalıomanna.

Suratta indi mangngařra'a manungku sulałummu mappaamattu agama n Sařrani, pangangimanna řinone rarundinganannu pallałagu.

Lalořrone

Panattařanne	1:1
Pangangimanna wuřru apapande	1:2-8
Paa'asiangnga wuřru paa'ala	1:9-11
Sasału'ata wuřru wawono'a	1:12-18
Maddaringikka wuřru mammanara	1:19-27
Iapaanaungnga tadea'u tawe mamile hati n taumata	2:1-13
Pangangimanna wuřru inolaanna	2:14-26
Taumata n Sařrani wuřru manga wisarane	3:1-18
Taumata n Sařrani wuřru runia	4:1-5:6
Aławo'u tatantiro	5:7-20

1 Manga turrangnga ałarřana'u Mawu Ruata sarangkanambone apan uasalıawukka su ahewallu runia! Tabea wuassia'u, Yakobus, allangngu Mawu Ruata wuřru allangngi Yesus Kristus.

Pangangimanna wuřru apapande

²Manga turrangnga! Amungkangu iamiu sumaruanna aławo'u hati m bawono'a, řinone itarimatti amiu ere auntunganna. ³Ana waugu iamiu masingkata, manungku amungkangu iamiu sidutu mangngimanna Mawu su tempo wabbono'anna, asombange eteudde: iamiu maola'a masabare. ⁴Riagai tadea'u asasabare naunggu udde sidutu aatambanna ma'oma n sara atonna-tonna iamiu maola'a masuungnga see tawe urangge sara ng kadio'a. ⁵Amungkangu pia sangkatou wuassu wallatti amiu apan woddo, řinone itou sumařande su Mawu Ruata, ne Mawu Ruata sarun mangonggolu apande sitou; ana waugu su aławo'u taumata, Mawu Ruata sarun mangonggola ringannu naungnga małuassa wuřru ringannu apendamu darangngu. ⁶Arawe taumata apan madoronga, řinone mangngimanna: itou tawe wotongge mapapadua. Ana waugu taumata uapapadua udde ere wallade su tahařoangnga apan tattipannu anginna uawařelenganna. ⁷⁻⁸Taumata. ereudde tawe matana'a řingiranne; itou tawe mapakkawessa apa-apa su aławo'u manga apa apan niolangnge. Ana waugu udde, ariete lai itou mangantimma maasomba apa-apa wuassu Mawu.

Paa'asiangnga wuřru paa'ala

⁹Taumata n Sařřani apan asiangnga řinone lulluassa amungkangu Mawu Ruata manduitti tou. ¹⁰Wuřru taumata n Sařřani apan ala, řinone lumuassa lai, amungkangu Mawu Ruata mapaawawo n tou. Ana waugu taumata ala sarun mawuři ere wunga n ahuranganna. ¹¹Su tempo matannallo lumapputa ringannu paddisa apan mařoso, ne ahuranganna udde sarun tumolangnga ma'oma n sara manontonga wungane wuřru mawuřite lai arařřansange. Aroddi lai taumata ala; itou sarun mařřimuns'a su tempo itou mappaaammattu manarane.

Sasařu'ata wuřru wawono'a

¹²Lařumanna'a su taumata apan masabare su tempo itou naasomba wawono'a. Ana waugu napawe itou naatařřanga wawono'a udde, itou sarun manengkamma lařantake, eteudde wiakka apan suete pina'ire

Mawu Ruata su manga taumata apan mandangngu Mawu Ruata. ¹³Amungkangu pia sangkatou niawono'annu wawono'a ereudde, ariewe itou mabbisara, "Wawono'a indi darantane wuassu Mawu Ruata," ana waugu Mawu Ruata tawe awono'annu aļaleo, wuřru tawe lai mamono'a saran sangkatou. ¹⁴Arawe taumata niawono'anna, amungkangu itou wolenganna wuřru panemmannu apulune sassane apan laļeo. ¹⁵Wua udde, amungkangu apulune apan laļeo udde tuřrutanna, ne lumappute rosa; wuřru amungkangu rosa nahurangke, ne inuļeanne papate.

¹⁶Ariewe iamiu aawusuanna, manga tuřrangku apan aranguanna! ¹⁷Suapan aonggola apan mapia wuřru laļantake apan nasuungnga darantane wuassu surga, nisossoku Mawu Ruata, Mandariaddi aļawo'u asesakka su langitta. Itou Mawu Ruata apan tawe mawaļu, wuřru tawe lai mapaaranta n ararandumma. ¹⁸Wuassu apulu-Ne sassane Itou nandiaddi siite aļařranang-Nge wuassu řengetan-Ne apan atonna. Itou nandiaddi udde tadea'u iite maasomba tampa apan apianne su wallatu anambo n riadian-Ne.

Maddaringikka wuřru mammanara

¹⁹Panutukke indi paapia-pia, manga tuřrangnga apan aranguanna! Suapan taumata řinone maļihakka maddaringikka, arawe maļiwue mabbisara wuřru maļannu masa'u. ²⁰Taumata maļihakka masa'u tawe maaola'a inolaanne apan mapia, apan maaļuassa naungngu Mawu Ruata. ²¹Ana waugu udde, rammea'e aļawo'u inanaramanna apan nal-laļuhuranna wuřru laļeo. Sengkampe ringannu awawawo naungnga wisara apan nisuanu Mawu Ruata sulalummu naungngu, ana waugu wisara udde pia tařrinone manaļamatta siamiu.

²²Řinone iamiu tumuřrutta apa apan niwisara Mawu Ruata, arie tumba'u maddaringikka, na'oma n sara iamiu mangawusu watanganni amiu sassane. ²³Taumata apan maddaringikka wisara Mawu Ruata, arawe tawe tumuřrutta, udde ere taumata apan tantaļanna ma'ellega hatine apan atonna su saruanu sařruminanna. ²⁴Napawe itou naatutukke mapia-pia, itou inaita wuřru lapiddu naabuļi ereapa ola'u hatine udde. ²⁵Tita n Mawu Ruata nasuungnga wuřru pia tařrinone mamallosu taumata. Wuřru taumata apan mammarikissa wuřru mannutukka mapia-pia lapiddu tuttuřruta tita udde, wuřru waļinewe tumba'u maddaringikka see timbuļiananna, taumata udde sarun aļamatannu Mawu Ruata sulalummu aļawo'u inolaanne.

²⁶Amungkangu pia sangkatou mammendama watanganne sangkatou apan matuřruta su agama, arawe itou tawe maariaga lilane, ne itou nangawusu watanganne sassane; patatařramawune tawe gunane.

²⁷Taturruta su agama apan waresi wurru tutune su aellegu Mawu Ruata Iamangnga eteudde: mantulungngu alarřana'a asisi m pařussa wurru manga wawine wařu apan susa, wurru uariaga wadangnga sassane ta-dea'u tawe lařeoannu runia indi.

Tatagu su pasasunna sařa

2 Manga turrangku! Ere sangkatou taumata apan mangngimanna Mawu Yesus Kristus, Mawu Apan Mawantuga, arie iamiu mamile taumata ana waugu ola'u ririne. ²Ana waugu amungkangu pia sangkatou taumata ala apan ualurře n sinsinga wuřawanna wurru laubba mapia nirumanta su ammuřannu, see nirumanta lai sangkatou asiangnga apan ualurře n laubba nahahesa'a, ³ne iamiu lembon mangngaddatta taumata laungge mapia udde. Iamiu mabbisara sitou, "Wette Tuan, aiana'a su addera apianne indi." Arawe su taumata apan asiangnga iamiu mabbisara, "Darisikke poiaroddi," ara'e "A'iante su rapappake isindi." ⁴Ringannu ma'ola'a aroddi, iamiu na'ola'a palařarřae su wallatu sandingananni amiu wurru ma'ellega taumata wuassu řingiranna apan lařeo.

⁵Paanaunge, manga turrangnga apan arangnguanna! Taumata asiangnga su runia indi, nipile Mawu Ruata maola'a taumata ala sulařummu pangangimanna. Manga taumata udde sarun maola'a reengannu alarřana'u Mawu Ruata ere suete nipa'ire Mawu Ruata su taumata apan mandangngu Sitou. ⁶Arawe iamiu ewe'e mangngařuandaga taumata asiangnga, wutte'e ete taumata ala apan mandařeo wurru mangngapidi amiu watukku pallařuumanna. ⁷Ete imangitou apan mangngařuandaga aranna awantuhanne apan nisengkammi amiu wuassu **Mawu Ruata!**

⁸Iamiu ma'ola'a su řinone, amungkangu iamiu tumurřutta tita n Araratuanna sulařummu wageangu Wuke Susi indi, "Pandangngu san-sulungu ere iamiu mandangngu watangannu sassane." ⁹Arawe amungkangu iamiu mammile taumata ana waugu ola'u ririne, iamiu ma'ola'a rosa, wurru tita n Mawu Ruata napaalřatta'a manungku eteudde iamiu lumařawangnga tita. ¹⁰Taumata apan nilumawanga sambau wuassu wallatu marga tita Mawu Ruata, udde atappasanne nilumawangnga saranganambone. ¹¹Ana waugu isai nabbisara, "Arie passandaga," ete itou lai nabbisara "Arie pamate." Nariaddi amungkangu iamiu tawe sumandaga, arawe mammate, ne iamiu lumařawangnga tita udde lai. ¹²Pabbisarate wurru pa'ola'e ere taumata apan sarun parikisanna tumurřutta tita ~~Mawu Ruata~~ apan mamallosu taumata. ¹³Ana waugu Mawu Ruata tawe mapaalřatta'u darangngu-Ne su taumata apan tawe maaillařa darangngu. Arawe darangngu mattohasanna wuassu řuumanna!


Pangangimanna wuṛṛu inolaanna

¹⁴Manga tuṛṛangnga! Apa hunane taumata mabbisara, "Ia'u tau-mata apan mangngimanna", amungkangu itou tawe mapaaḷiatta'u pallaḷagune? Wotongge pangangimanna ereudde maasaḷamatta sitou? ¹⁵Unnu wisara sangkatou tuṛṛanga esakka ara'e wawine mappanduma laubba wuṛṛu tawe maasuungngu anna su miallo-miallo. ¹⁶Apa hunane iamiu mabbisara sitou, "Saḷamate mappaaṭtu laubba wakku wuṛṛu saḷamatta umanna!" -- amungkangu iamiu tawe mangonggolu apa apan pappandumani tou su wiakke? ¹⁷Aroddi lai ringannu pangangimanna, amungkangu tawe ipaaḷiatta'u pallaḷagu, ne pangangimanna udde tawe gunane.

¹⁸Asinungka piaddu mabbisara, "Pia taumata uatundeeta su pangangimanne wuṛṛu pia lai uatundeeta su pallaḷagune." Ia'u sarun sumimbaka, "Ta'ea'o sia'u ereapa taumata pia pangangimanna ringannu tawe pallaḷagu wuṛṛu ia'u sarun mapaa'ḷiatta'u pallaḷagu manungku ia'u pia pangangimanna." ¹⁹Iamiu mangngimanna manungku Mawu Ruata tumba'u sambau, are? Ne manga ghaṛṛaho laḷeo lai mangngimanna wuṛṛu imangitou mangngindo ng katata'utta! ²⁰Iamiu tumanite m woddo! Apa wotonge iapaasilo siamiu manungku tawe gunane pia pangangimanna wuṛṛu tawe pallaḷagu? ²¹Pa'ellege si Abraham iupungu aḷamona ng kite. Itou sinengkammu Mawu Ruata ringannu mapia ana waugu pallaḷagune, eteudde su tempo itou nanantilli Ishak anangnge, su Mawu Ruata su wowo n mezbah. ²²Isindi natualage manungku pangangimanna ṛinone iapaḷiatta'u pallaḷagu tadea'u masuungnga. ²³Udde nassuḷungu wageanggu Wuke Susi indi, "Abraham mangngimanna Mawu Ruata, wuṛṛu ana waugu pangangimanne udde Mawu Ruata nanengkamma sitou naola'a sangkatou apan tinumuṛṛuta apulu Mawu Ruata." Ana waugu udde Abraham nisago "Hawe Mawu Ruata." ²⁴Natualage orassa indi, manungku taumata itarimmatu Mawu Ruata ringannu mapia ana waugu inolaannu taumata udde, wuṛṛu waḷene tumba'u ana waugu pangangimanne.

²⁵Pa'ellega lai si Rahab, wawine masandaga udde. Itou tinarimmatu Mawu Ruata ringannu mapia ana waugu pallaḷagune, eteudde su tempo itou nanarimmatu matataṛṛa so'o n taumata n Israel su waḷene wuṛṛu nantuḷungi mangitou tinumaḷangnga su laḷanna waine.

²⁶Ne, su ereapa wadanga ringannu tawe ghaṛṛaho, udde wadanga nate, aroddi lai pangangimanna tawe pallaḷagu, udde pangangimanna apan nate.



Tali pangagasanna su moŕrongu awaŕo (3:3)

Lila n taumata

3 Manga tuŕrangnga! Arie tumanite n manambo wuassu wallatti amiu maapulu maola'a huru. Iamiu masingkata manungku iite apan naola'a huru sarun parikisanna ringannu nangillembu wuassu taumata waine. ²Iite sarangkanambone masokka ma'ola'a pasasaŕa. Arawe taumata apan taambe na'ola'a pasasaŕa ringannu manga wisarane, itou taumata nasuungnga, apan wotongnge maa'uŕinna ahewallu ririne. ³Amungkangu iite manuŕri n tali su moŕrongu awaŕo tadea'u itou tumuŕrutta apulu ng kite, ne iite wotongnge mamiaŕra'u ahewallu wadangu awaŕo udde. ⁴Panganute lai sambau apalla maola'a sasumandinge. Salaiwe apalla sambau inolaanna apan aroddi ahewalle wuŕru iaapidu anginna apan ma'ikkatta, arawe itou iappiaŕra'u auŕinna apan tumanite n adio'a, tumuŕruttu apulu manganguŕinna. ⁵Aroddi lai lila ng kite: salaiwe lila ng kite udde adio'a, arawe itou wotongnge mamarabunga m watanganne su manga inolaanna apan wahewalla.

Rangngoa'e aroddi ahewalle mahurangnge wotonge tutungannu putungnga apan tumanite n adio'a! ⁶Lila nassuŕungu putungnga. Su wadangi ite, itou naola'a punnu aŕaŕeo apan mannaŕiawukku aŕaŕeo su ahewallu wadangi ite. Ringannu putungnga apan darantane wuassu naraka, itou nanutungnga ahewallu wiakki ite. ⁷Aŕawo'u winatangnga maŕaŕraga, manu'u winalanganna, winatangnga tuttondo n tianne wuŕru inassa wotongnge ŕaroanna, wuŕru suete niŕŕaro n taumata. ⁸Arawe lila n taumata tawe iaŕŕaro n sangkatou taumata. Lila udde laŕeo wuŕru tawe

iapiarra'a; napene n racunna maapate. ⁹Iite mappaatta ipaadiangkamanna su Mawu Ruata Iamangngi ite, arawe lai ipammontoga san-sulunggu taumata, apan suete niola'a tumuruttu lihiddu Mawu Ruata. ¹⁰Wuassu morronga apan sambau sumabanga manga wisara aadiangkamanna wurru lai wisara a'ane. Rinone tawe aroddi! ¹¹Apa pialimatana n ua'e apan mapaasabangu ua'e mapia wurru ua'e mapetta wuassu alimatane sambau? ¹²Alu ara, manga turrangku, tawe mabbua n zaitun, wurru alu angore tawe mabbua n ara. Alimatana n ua'e mapakkada tawe mapaasabangu ua'e mapia.

Apapande apan nirumanta wuassu surga

¹³Amungkangu su wallatti amiu pia sangkatou apan pande wurru pia buddine, rinone itou mapaaliatta'a ringannu mabbiakka mapia, wurru ringannu ma'ola'a inolaanna apan mapia, apan rarundingannu awawo naungnga wurru apapande. ¹⁴Arawe amungkangu iamiu tarra luadda, naungnge laleo, wurru marringiddu ririnu sassane, arie mamarabunga n apande udde, ana waugu ringannu udde iamiu mamajelongngu watti'a mapia wuassu Mawu Ruata. ¹⁵Apande ereudde tawe wuassu surga. Itou wuassu runia wurru wuassu apulu naungngu taumata, wurru wuassu setanna! ¹⁶Suapa pia lu'adda wurru pallaagu marringiddu wadangnga sassane, isudde lai asombanganna pabbawawulo wurru alawo'u inolaanna apan laleo. ¹⁷Arawe taumata apan pia apande niarantane wuassu surga, itou paarorone-ronne waresi, wua udde maapulu m padarame, masarionto'a, wurru maturruta. Itou napene n darangngu, wurru mabbua manga pallaagu apan mapia. Itou tawe manamba'a wurru tawe mallilangkama'e'a. ¹⁸Atonna apapia udde wua m bualannu padarame apan niasi'u taumata apan maapulu m padarame!

Uahahawe n runia

4 Wuassuapa darantane alawo'u pabbawawulo wurru pattatiakka su wallatti amiu? Walinewe udde nirumanta wuassu manga apulunu apan sidutu uawawulo sulalammu ririnu ana see maasomba alaluassu runia! ²Iamiu maapulu, arawe tawe maasomba, ne iamiu maapulute mate. Iamiu marrimada arawe tawe maasomba apa radeaanni amiu, ne iamiu matatiakke wurru mabawulote. Iamiu tawe maasomba apa-apa ana waugu tawe madorongnga su Mawu Ruata. ³Wurru amungkangu lai iamiu suete nadorongnga, iamiu tawe maasomba lai, ana waugu tudda n darorongngu nassala; apa apan radoronganni amiu udde tumba'u

aļāļuassu watangannu sassane. ⁴Iamiu udde taumata maļawangnga! Iamiu masingkate manungku amungkangu iamiu uahahawe n runia, ne iamiu sarun maola'a seettu Mawu Ruata? Nariaddi isai-sai apan maola'a hawe n runia indi, itou maola'a seettu Mawu Ruata. ⁵Arie massunna manungku Wuke Susi tawe pinangiananne mabbisara, "Sulaļummu wadangi ite Mawu Ruata nangado n Għaṛraho apan matohassa apulune." ⁶Salaiwe aroddi, aļamattu Mawu Ruata apan nionggolla siite mattohasanna wuassu apulu n għaṛraho ng kite udde. Ana waugu udde sulaļummu Wuke Susi niwoṛreta lai, "Mawu Ruata mandooppa taumata mawunga, arawe inuļeanne Itou mandangngu taumata apan naungnge mawawo."

⁷Ana waugu udde, paaturṛute Mawu Ruata wuṛṛu ro'apete Setanna, ne Setanna sarun tumaļangnga wuassi amiu. ⁸Pangundanite Mawu Ruata, ne Mawu Ruata lai sarun mangundani ng kamiu. Ukkase limanu, iamiu apan marosa! Wuṛṛu paatilangke naungngu, iamiu apan naungnge uapenga! ⁹Ṛinone atonna-tonna iamiu sumassilla wuṛṛu lumuai lapiddu lumalo; ṛinone laļagenu maola'a laļuai wuṛṛu aļāļuannu maola'a اساسا! ¹⁰Ṛinone iamiu sumallungu watangannu su saruannu Mawu, ne Mawu sarun manduitti amiu.

Iapaanaungnga tadea'u arie mapaasaļa n taumata

¹¹Manga tuṛrangnga, arie iamiu uaaļuandaga ara'e mapaasaļa n sangkatou ringannu waine. Taumata apan mangalaundaga wuṛṛu mapaasaļa n tuṛrange sansuļunga Saṛrani, itou mangngalaundaga wuṛṛu mapaasaļa n tita n Mawu Ruata. Wuṛṛu amungkangu iamiu mapaasaļa n tita n Mawu Ruata, udde atappasanne iamiu tawe tumuṛrutta manga tita udde, ewe'e maola'a lai mapaasaļa n tita udde. ¹²Wutte'e tumba'u sangkatou apan wotongnge makkuumannu taumata wuṛṛu mamarikissa taumata. Eteudde Mawu Ruata apan uatarrino manaļamatta wuṛṛu mamate. Nariaddi, isai iamiu, na'oma n sara iamiu mapaasaļa n sansuļunga taumata?

Iapaanaungnga tadea'u arie mataļimorṛonganna

¹³Manga tuṛrangnga apan nabbisara, "Allo indi ara'e tiṛrabbi iamii sarun inai watukku soa sambau wuṛṛu matana'a poiaroddi santonna aļannune ana waugu mabbaļu'a wuṛṛu maddea'a roitta," - daringiṛre'o tatantiro'u indi. ¹⁴Apa apan sarun mariaddi su wiakku tiṛrabbi, iamiu sassane lai wagga! Iamiu tumba'u ere timbulla apan aellehanna taļa

ng kadio'a, wua udde mawuḷi. ¹⁵Rinone iamiu mabbisara arendi, "Amungkangu Mawu mamala, iamii sarun mabbiakka wuḷru mamma-nara indi ara'e udde." ¹⁶Arawe orassa indi iamiu namarabungga wuḷru mataḷimorronganna. Anambo n wisaranu udde nassaḷa.

¹⁷Ana waugu udde, taumata apan masingkatu apapia apan rinone manaranne, arawe itou tawe nammanara, taumata udde marosa.

Iapaanaungnga su manga taumata ala

5 Manga tuḷrangnga, manga taumata ala! Padaringikka tatantiro'u. Rinone iamiu lumuai wuḷru lumallu ana waugu iamiu sarun matataḷrangga asasusa! ²Paa'alanu nawukku'e. Peddeni niante m wa'u'a. ³Wuḷawanna wuḷru saḷaanu nitaiante, taine sarun maola'a tatiala lumawangnga siamiu wuḷru sarun umanna wadangu ma'oma n sara masue ere putungnga. Iamii suete nangombo n darotongnga su tempo maranite n allo m panginsueanne. ⁴Iamii tawe namaekka laḷantaku manga taumata apan mammanara su wawaiḷannu. Orassa indi paddaringikke sasaliomanni mangitou! Manga taumata apan nangammullu wua m bawaiḷannu, mangngintuḷi ma'iontolla wuḷru aintuḷi mangitou na'omate su taḷinga Mawu ruata, Mawu Ruata Lembon Mataḷrino. ⁵Iamii suete nabbiakka su aḷaḷuassa, wuḷru naatemmate apapia n runia indi. Iamii paḷrimaunnapa ere tantalaḷanna mapaatawa m wadangnga ipaḷraddo allo pamamototanna. ⁶Iamii maḷruumanna wuḷru mammate manga taumata apan tawe saḷane, wuḷru imangitou tawe lumawangnga siamii.

Asasabare wuḷru aaliomanna

⁷Ana waugu udde, paasabarete manga tuḷrangku, ma'oma n sara Mawu rumanta. Pa'ellege ereapa asabarene sangkatou mabbawaila ualaḷraddo ma'oma n sara letangge mangonggolu hessine apan maarega sitou. Ringannu asasabare itou uaraḷraddo uranna su tempo manga rongnga matontonga wuḷru uranna su tempo maddongnga. ⁸Rinone iamii lai masabare wuḷru pia naungnga wahewalla, ana waugu allo n daranta Mawu maranite.

⁹Arie sumamboḷre wuḷru mapapaḷransila, tadea'u iamii tawe irḷruumannu Mawu Ruata. Paanaunge! Mallarḷruungnga maranite, wuḷru nasaddiate rumanta. ¹⁰Manga tuḷrangnga, paanaunge manga nabi apan mabbisara ringannu arannu Mawu. Imangitou masabare wuḷru mataḷrangga su asasusa. Nariaddi ola'e imangitou ere sambau tuḷada. ¹¹Imangitou nisago su laḷumanna'a ana waugu imangitou masabare.

Iamiu suete naaringikka su ola'u asasabare n Ayub, wuɽɽu iamiu masingkata lai ereapa panginsueanne Mawu nangaɽamatta sitou. Ana waugu Mawu lembon marangngu wuɽɽu naung-Nge mapia.

¹²Apan apianne eteudde: Arie massalu, mawae ringannu arannu langitta, ara'e arannu runia, ara'e ringannu manga apa lai. Waɽoa'e "Ore" amungkangu pandumannu ore, wuɽɽu "Tawe" amungkangu pandumannu tawe; tadea'u iamiu tawe maasomba ruumannu Mawu Ruata.

¹³Amungkangu su wallatti amiu pia sangkatou apan tantaɽanna massusa, ɽinone itou umaɽiomanna. Amungkangu piaddu lulluassa, ɽinone itou mangantari maddalo Mawu Ruata. ¹⁴Amungkangu piaddu marada'a ɽinone itou mamago manga piaɽɽa'u jamaatta. Wuɽɽu ɽinone manga piaɽɽa'u jamaatta udde umaɽiomannu taumata marada'a udde wuɽɽu mamuɽɽa n lana sulaɽummu arannu Mawu.

¹⁵Amungkangu aalɽiomanni mangitou niruitta ringannu pangangimanna, Mawu sarun mapaapia n taumata marada'a udde, wuɽɽu mangampunganga manga rosa apan suete niolangnge. ¹⁶Ana waugu udde, ɽinone iamiu uaa'a'u pasasaɽa wuɽɽu uaa'alɽiomanna, tadea'u iamiu iapaapia. Aalɽiomannu taumata apan tuttuɽɽuta apulu Mawu Ruata, pia taɽɽino apan wahewalla. ¹⁷Elia taumata lai ere iite. Itou u'alɽiomanna ringannu atonna-tonna, tadea'u tawe manguranna, ne tawe nanguranna tallu tonna annumu wuɽanna aɽannune. ¹⁸Wua udde itou inumaɽiomanna apia, see langitta nanossokku uranna na'oma n sara leta'a nangonggolu hessine apia.

¹⁹Manga tuɽrangku! Amungkangu wuassu wallatti amiu pia sangkatou apan maddirite tumuɽɽutta aɽaɽɽa'u Mawu Ruata, wua udde sangkatou waine napaawelengngu taumata udde ringannu Mawu Ruata, ²⁰naungete addoanne indi: Taumata apan na'ola'a taumata marosa mabelengnga wuassu laɽanne apan nassaɽa, taumata udde nanaɽamatta niawa n taumata marosa udde wuassu papate wuɽɽu na'ola'a manambo rosa niampunganna.

Tabea ng kami,
Yakobus

SURATTI PETRUS

PAARORONE

WISARA TALAANE

Suratti Petrus Paarorone indi tuddane su manga taumata n Sarṛani apan uasaḷiawukka su ahewallu wageanggu sawannakka wuassu leta'u Asia Adio'a. Imangitou nisaggo "walaga nipile Mawu Ruata". Pandumannu suratta indi paarorone eteudde mannohassa pangangimannu manga mabbawasane apan tantaḷanna uapendamma asasusa wuṛṛu sansara ana waugu mangngimanna si Kristus. Petrus napaanaungnga lai su mabbawasane ola'u Watti'u Aḷaḷuassa su ola'i Yesus Kristus apan maola'a atatohassu pangantimanni mangitou. Ana waugu Yesus Kristus natete, nabbiakka apia wuṛṛu naddiandi sarun rumanta apia. Wuassu pangangimanne udde imangitou ṛinone matataṛṛanga, lapiddu manutukka manungku asasusa mangitou maola'a sambau sasaḷu'atta tanne imangitou atonna-tonna mangngimanna si Kristus. Wuṛṛu ṛinone lai imangitou mangngimanna manungku imangitou sarun walṛisannu Mawu su tempo Mawu Yesus Kristus rumanta apia.

Wuassu lai mannohassa pangangimannu manga mabbawasane sulalḷummu asasusa udde, Petrus madorongnga tadea'u imangitou mabbiakka maola'a mallaṛṛenggeni Kristus.

Lalorṛone

Panattaṛṛanne	1:1-2
Tatantiro tadea'u mannaungnga manungku Mawu Ruata manaḷamatta taumata	1:3-12
Tatantiro tadea'u mabbiakka tumba'u hunane su Mawu Ruata	1:13-2:10
Manara n taumata n Sarṛani sulalḷummu asasusa	2:11-4:19
Awawawo naungnga wuṛṛu pangangimbe taumata n Sarṛani	5:1-11
Panginsueanne	5:12-14

1¹⁻²Manga turrangnga pabbawalaga nipile Mawu Ruata, apan uasajawukka su anambo n banua su leta'u Pontus, Galatia, Kapadokia, Asia wurru Bitinia! Ia'u, Petrus, rasulli Yesus Kristus, mangngantimma doronganna Mawu Ruata mangonggolu alamatta wurru padarame siamiu ringannu manambo-nambo.

Iamiu nipile maola'a alarrana'u Mawu Ruata uasulunggu ere pandumannu Mawu Ruata lamangnga. Wurru Gharraho Mawu Ruata suete na'ola'a siamiu pabbawalaga apan na'ukkassa, tumba'u su Mawu Ruata, tadea'u iamiu maturruta su Mawu Yesus Kristus wurru niukkassu rarra-Ne.

Antimma apan matohassa

³Wette iite maadiangkamanna su Mawu Ruata, lamanggu Mawu ng kite Yesus Kristus! Itou lembon maranggu siite, ana waugu udde Itou nangonggolu wiakka wakku siite, ringannu napaawiakku Mawu Yesus Kristus apia wuassu papate. Indi nangonggolu antimma apan matohassa siite. ⁴Iite mangngantimma maatahuanna manga alamatta apan suete nisaddia Mawu Ruata su alarranang-Nge, eteudde manga alamatta apan niadone su surga, na'oma n sara tawe malaleo, ara'e mawukku'a ara'e mawulle. ⁵Sarangkanambone udde ionggola siamiu, ana waugu iamiu mangngimanna Mawu Ruata. Ne iamiu rariagannu tarfino Mawu Ruata tadea'u iamiu manengkamma asalamatta apan nasaddiate iapaalatta'a su allo pangudusanne.

⁶Ana waugu udde rinone iamiu lumuassa, salaiwe orassa indi tumba'u tala ng kadio'a iamiu sarun masusa ana waugu iamiu naependama anambo n hati m bawono'a. ⁷Tuddane eteudde mattiala manungku tanne atonna-tonna iamiu mangngimanna Mawu ara'e tawe. Wulawanna lai apan wotonge mahohakka, iannamma su putungnga. Ne pangangimanni amiu maareganne wuassu wulawanna, nariaddi rinone lai iannama tadea'u maola'a matohassa. Wurru ringannu aroddi iamiu sarun raloanna wurru addatanna lapiddu iruitta su allo Mawu Yesus Kristus rumanta apia. ⁸Iamiu maranggu Sitou, salaiwe dorone iamiu tawe naasilo Sitou. Wurru iamiu mangngimanna Sitou, manimbe orasa indi iamiu tawe maasila Sitou. Ana waugu udde iamiu lulluassa, wurru uapaendama lalala'a apan mahewa wurru tawe iawisara. ⁹Ana waugu tudda m pangangimannu nia'omanna, eteudde asalamattu niawanu.

¹⁰Asalamatta indi apan a'inunuanna wurru sassaransirannu manga nabi, wurru imangitou ma'innau alamatta apan ionggolu Mawu Ruata siamiu. ¹¹Imangitou mammarikissa ereapa wurru anggerate olangnge udde sarun mariaddi, apan ipappandumu Gharraho n Kristus sulalummu

wadangi mangitou. Su tempo udde Gharraho-Ne nabbało simangitou su ola'u manga asasusa apan řinone apendamanni Kristus wuřru su ola'u awawantu-Ge apan manansuna wua udde. ¹²Su manga nabi udde Mawu Ruata namasingkata manungku apa apan a'olaanni mangitou, wařine hunane simangitou, ewe'e hunane si'o; eteudde manga inolaanna apan orassa indi aaringirřani amiu ringannu masemakka wuassu mabbawatti'u Watti'u Alařuassa su ola'i Yesus Kristus. Imangitou namasingkatu manga olangnge udde siamiu ringannu tarřino Gharraho Mawu Ruata apan niapaapida wuassu surga. Wuřru lai manga mala'ekatta maapulu lai maasingkata watti'a apan iapaasingkati mangitou udde.

Bawaggo su pabbiarřana apan susi

¹³Ana waugu udde, řinone iamiu sidutu uariaga. Paatehamma wuřru pangantimpe atonna-tonna su alařatta apan sarun ionggola siamiu su tempo Mawu Yesus rumanta apia. ¹⁴Paaturřute Mawu Ruata wuřru arie mabbiakka tumurřutta apulunu dorone, su tempo iamiu taambe naail-lařa Mawu Ruata. ¹⁵Arawe, řinone iamiu susi su alařo'u inolaanni amiu, ere lai Mawu Ruata apan namaggo siamiu udde susi. ¹⁶Sulařummu Wuke Susi uaworřetta, "Řinone iamiu susi, ana waugu Ia'u susi."

¹⁷Iamiu mannago Mawu Ruata udde lamangnga su tempo iamiu u'alomanna Sitou. Ne, ete Mawu Ruata udde apan mamarikissa tau-mata tumurřutiu inolaannu sangkatou-sangkatou ringannu tawe pilene. Ana waugu udde tantařanna iamiu ta'e su runia indi, řinone iamiu mamantuga Mawu Ruata sulařunimu wiakku. ¹⁸Iamiu masingkata apa apan buatte nipamaekka tadea'u ipamallosi amiu wuassu pabbiarřana apan tawe gunane apan tinantillu iupunggu alařomonanu. Bawaekke wařinewe saranapa apan wotongnge mawulle ere inai sařa'a ara'e wuřawanna, ¹⁹ewe'e sambau saranapa apan lembon maarega; eteudde wadangi Kristus sassane, apan naola'a ere domba nionggolla sasamba su Mawu Ruata ringannu tawe angnone. ²⁰Kristus nipile Mawu Ruata ro'e n runia indi taambe niriaddi. Wuřru su miallo-miallo maddani m panginsueannu tempo indi, Itou nirumanta su runia tadea'u iamiu iapaasařamatta. ²¹Ete wuassi tou iamiu mangngimanna Mawu Ruata apan suete napaawiakki Tou apia wuassu papate wuřru namantuga Sitou. Nariaddi ete Mawu Ruata apan pangimananni amiu wuřru ete su Mawu Ruata lai apan pangantimanni amiu.

²²Ana waugu iamiu maturřuta su alařra'u Mawu Ruata, ne iamiu namaresi wadanga wuřru iamiu tuttařantupu manga taumata pangangimanne sambau ringannu atonna-tonna. Ana waugu udde, řinone iamiu uararangngu sangkatou ringannu waine ringannu alařuassu naunggu.

²³ Ana waugu wuassu řengetannu Mawu Ruata apan wiakka wuřru awasa udde, iamiu suete niola'a taumata wakku apan wařine inariadianne wuassu taumata, ewe'e wuassu Mawu Iamangnga apan awasa. ²⁴ Sulařummu Wuke Susi uawořretta arendi,

"Anambo n pabbawalagu taumata ere nannařo,
wuřru ahewallu awawantu-Ge ere wunga nannařo.

Nannařo tinumolangnga, wungane lai natontonga;

²⁵ arawe řengetannu Mawu Ruata sidutu sarangkařoengnge."

Řengetanna udde Watti'u Ařařuassa apan suete niapaasingkata siamiu.

Watu apan wiakka wuřru walaga apan susi

2 Ana waugu udde, rammea'e wuassu ririnu ařawo'u ařařeo; ariete lai pamahia, wuřru arie pallilangkamaře'a. Ariete mannaunga lařeo, wuřru arie pangngadio'a taumata waine. ² Řinone iamiu maola'a ere ana'a wakku niasungkanga, sidutu marou n susu ghařraho apan waresi. Řingannu aroddi iamiu sarun tumuwo wuřru iapaasařamatta. ³ Sulařummu Wuke Susi uawořretta arendi, "Iamiu suete naapendama sassane aroddi apiane Mawu."

⁴ Ana waugu udde, rantate řingannu Mawu. Itoii naařihida watu apan wiakka, watu apan niramme n taumata ana waugii sansunnanna tawe gunane; arawe nipile Mawu Ruata maola'a watu apan maarega. ⁵ Iamiu naařihida manga watu apan wiakka. Ana waugu udde řinone iamiu pia apulu ipaatta ipa'ola'a Waře Mawu Ruata apan pia ghařraho. Řingannu aroddi iamiu naola'a manga imam, apan mabbiakka tumba'u hunane su Mawu Ruata, wuřru sulařummi Yesus Kristus mangnggola su Mawu Ruata, sasamba m pangngimanna apan ipaapulu Mawu Ruata. ⁶ Ana waugu sulařummu Wuke Susi uawořretta arendi,

"Ia'u suete namile sambai watu maarega,
apan Ta'u niaddo su Sion maola'a watu apianne;
wuřru taumata apan mangngimanna Sitou tawe iapaasusa
naungge."

⁷ Watu udde lembon maarega siamiu apan mangngimanna. Arawe su taumata apan tawe mangngimanna, matipusse manga aradoanne su Wuke Susi ereindi,

"Watu apan tawe ipaattu manga ma'aola'a waře udde
wutte'e naola'a watu apianne."

⁸ Wuřru

"Eteudde watu apan maatara taumata,
watu apan naaema'a simangitou."

Imangitou natara ana waugu imangitou tawe mangngimanna wisara Mawu Ruata. Ete aroddi suete tinantunu Mawu Ruata su ola'i mangitou.

⁹Arawe iamiu udde pabbawalaga apan niapile, manga imam apan mangngimbe ratu, pabbawalaga naukkassa, tumba'u huna Mawu Ruata, pabbawalagu Mawu Ruata sassane. Mawu Ruata namile siamiu wurru namago siamiu sinumabanga wuassu araranduma sumutta su asasemakke apan maḷendappa ringannu pandumma tadea'u iamiu mamasingkatu watti'a su ola'u manga inolaan-Ne apan wahewalla. ¹⁰Dorone iamiu waḷine pabbawalagu Mawu Ruata, arawe orassa indi iamiu nareengke aḷarḷana'u Mawu Ruata. Dorone iamiu tawe rangnguannu Mawu Ruata, arawe orassa indi iamiu manengkamma darangngu-Ne.

Manga allangngu Mawu Ruata

¹¹Manga turḷangnga apan arangnguanna! Iamiu uddewe taumata lu-maḷo'a wurru mattindaho su runia indi. Ana waugu udde ia'u sumaḷande siamiu tadea'u iamiu tawe tumurḷutta apulu n taumata apan sidutu uapapangalo lullawangnga ḷimuudda. ¹²Pallaḷagunu su wallatu taumata apan tawe maillaḷa Mawu ḷinone lembon mapia, na'oma n sara napawe imangitou mangngadio'a siamiu ere taumata laḷeo, imangitou lai sarun manga'u inolaannu apan mapia na'oma n sara imangitou sarun maddalo Mawu Ruata su allo daranta-Ne.

¹³Ringannu arannu Mawu, ḷinone iamiu maturḷuta su manga tembonannu taumata: mapia su Kaisar apan naola'a tembonanne apan apianne, ¹⁴aroddi lai su gubernure apan nitebo'u Kaisar iapaḷrumannu taumata apan ma'ola'a aḷaḷeo wurru mangngaddatta taumata apan ma'ola'a apapia. ¹⁵Ana waugu Mawu Ruata maapulu tadea'u ringannu manga inolaannu apan mapia iamiu marḷapinga moḷḷongu taumata apan wagga maggahatto. ¹⁶Rinone iamiu mabbiakka ere taumata walate apulune, arawe arie mappaaatu apulu naungngu udde ipallindumma aḷaḷeo, ewe'e pabbiakke ere sangkatou allangngu Mawu Ruata. ¹⁷Pangadate anambo n taumata, paarangngu manga turḷangngu apan sansuḷungnga Sarḷrani. Ata'utte Mawu Ruata, wurru pangadate Kaisar.

Asasusa n Kristus maola'a tuḷadda

¹⁸Manga turḷangnga apan naola'a mangangimbe, turḷute mawunu ringannu aḷawo'u aadata; waḷine tumba'u simangitou apan naungnge mapia wurru masarḷionto'a, arawe simangitou lai apan marḷagisa.

¹⁹Mawu Ruata sarun mangałamatta siamiu, amungkangu iamiu ana waugu naatutukka apulu Mawu Ruata, masabare maataranga inolaanna apan wengkolla. ²⁰Ana waugu amungkangu iamiu masabare matatarangu ruumanna apan rinone marria'a siamiu ana waugu pasasa? Arawe amungkangu iamiu ringannu sabare matataranga asasusa apan narria'a siamiu ana waugu na'ola'a apapia, ne Mawu Ruata sarun mangałamatta siamiu. ²¹Ana waugu eteudde Mawu Ruata namago siamiu. Ana waugu Kristus sassane suete natataranga asasusa ana waugu iamiu, wurru ana waugu udde Itou nangongolu tulada siamiu, tadea'u iamiu manaturrutta wafada-Ne. ²²Tawe saran paassa Itou na'ola'a rosa, wurru taambe pia sangkatou taumata naaringikka Sitou namahia. ²³Su tempo Itou lallelanna, Itou tawe nabalissu lafela. Su tempo Itou uatataranga, Itou tawe namansaga; Itou tumba'u nanantillu hatto-Ne su Mawu Ruata, Mallaaruungnga apan matulida udde. ²⁴Kristus sassane namasanna manga rosa ng kite su watangan-Ne roso su alu arussa, tadea'u iite mapallosa wuassu tarino n rosa, wurru mabbiakka tutturuta apulu Mawu Ruata. Ete manga lessa ng Kristus apan nangapia siamiu. ²⁵Dorone iamiu ere domba nilamammiranne, arawe orassa indi iamiu suete niapidda apia tumantalongnga Malla'u'adda wurru Mamamaduli niawanu.

Rua sangkawinganna

3 Aroddi lai iamiu, manga awingnga wawine, rinone tumurutta su awingngu tadea'u amungkangu su wallatti mangitou apan piaddu tawe mangngimanna watti'u Mawu Ruata, ete pallaaganu wotongge ma'ola'a simangitou mangngimanna. Wurru tawe wotonge iamiu mabbisara n apa-apa simangitou, ²ana waugu imangitou naasilote pallaaganu apan matulida wurru susi. ³Arie araramagu tumba'u araramaga su liudde, ere tuladane mallaukka uta'a ara'e mappattu lafoggakka, ara'e laubba apan maarega. ⁴Arawe rinone araramagu lumapputa wuassu lajumu naunggu, pallaaganu apan masarionto'a wurru matammuda; ana eteudde araransanga apan tawe panginsueanne wurru lembon maarega su aellegu Mawu Ruata. ⁵Ringannu olangnge indi su tempo rorone manga wawine pia agamane apan uantimma Mawu Ruata mallogaka ririne ringannu tutturuta awingngi mangitou. ⁶Sara lai aroddi, itou maturuta si Abraham wurru nanago n tou mawune. Turanga orassa indi naola'a alarana'i Sara, amungkangu iamiu ma'ola'a inolaanna apan mapia wurru tawe matta'uttu apa-apa.

⁷Wurru iamiu lai, manga awingnga esakka, rinone mabbiakka ringannu napene m pasasunna su saruannu awingngu, wurru ringannu

asingkata manungku ete imangitou udde pabbawalaga apan lome. Olaawe imangitou ringannu addata, ana waugu imangitou su sambau ringanni amiu, sarun manengkamma ałamattu pabbiařřana apan tutune wuassu Mawu Ruata. Olaawe indi, tadea'u tawedu maasaława'a aalıomannu.

Nasusa ana waugu ma'ola'a apapia

⁸Panginsueanne eteudde: Řinone manga tuřřangnga uasampinunutta wuřřu su apendama sambau. Řinone iamiu uararangngu ere sangkatuřřanganna. Wuřřu řinone iamiu uaa'akkana, wuřřu uasasarřionto'a. ⁹Arie mabbalıssu ałaleo ringannu ałaleo, ara'e lałela wałisanu lai lałela; arawe wałisete ringannu madorongnga ałamatta wuassu Mawu Ruata. Ana waugu Mawu Ruata namago siamiu tadea'u iamiu manengkamma ałamatta wuassi Tou. ¹⁰Sulałummu Wuke Susi uawořřetta arendi,

”Taumata apan maapulu mabbiakka

wuřřu maapulu mamendama miallo-miallo apan mapia,
řinone mandiaga mořřonge tadea'u tawe maggahatto manga
inolaanna lałeo

wuřřu tawe maapabbisara m bawahia.

¹¹Itou řinone mangindau n ałaleo wuřřu ma'ola'a apapia;
řinone itou marusahada atonna-tonna ana see maasomba
paddarame.

¹²Ana waugu Mawu sidutu ma'ellega manga taumata apan tuttuřřuta
apulu-Ne,

wuřřu Mawu sidutu maddaringikka manga aalıomanni mangitou;
arawe Mawu lullawangnga manga taumata apan ma'ola'a
ałaleo.”

¹³Isai maapulu mandaleo si'o, amungkangu iamiu małuassa ma'ola'a apapia? ¹⁴Arawe salaiwe iamiu uatatařřanga ana waugu ma'ola'a manga inolaanna mapia, iamiu naauntunga! Arie paata'utti sai-sai wuřřu arie suminggawangnga. ¹⁵Arawe sulałummu naungngu, řinone iamiu mangonggolu addata si Kristus sassane ana waugu Itou Mawu. Wuřřu řinone iamiu sidutu uasaddia sumimbaka anambo n taumata apan maiwało siamiu su ola'u antimma apan tatahuannanni amiu. ¹⁶Arawe olaawe udde ringannu masarřionto'a wuřřu aaddata. Wuřřu řinone lałummu naungngu waresi, tadea'u amungkangu iamiu ałuandahanna ana waugu iamniu mabbiakka ringannu mapia ere tumatantalongngi Kristus, ne taumata apan mangngałuandaga udde sarun masili sassane. ¹⁷Mappianne matatařřanga ana waugu ma'ola'a apapia – amungkangu

udde apulu Mawu Ruata – wuassu uatataranga ana waugu ma'ola'a ałaleo. ¹⁸Ana waugu Kristus sassane nate tumba'u paassa, ma'oma sara małannu-łannu ana waugu rosa n taumata – sangkatou apan tawe sałane, nate huna n taumata apan nassała. Kristus na'ola'a udde tadea'u Itou wotongnge mangehetta siamiu ringannu Mawu Ruata. Itou nipate su ola'u wadanga arawe niaapawiakka apia su ola'u Gharraho. ¹⁹Sulałummu Gharraho Itou inai namasingkatu watti'u Mawu Ruata su manga gharraho apan uaruumanna: ²⁰eteudde gharraho manga taumata apan maławangnga Mawu Ruata su tempo Nuh. Su tempo udde Mawu Ruata uararaddo ringannu sabare tantałanna Nuh mallanginnu apalle. Tumba'u manga taumata apan sulałummu apalla – sarangkanambone sire ualu – apan nisalamatta wuassu manawangnga apan wahewalla udde. ²¹Ne riadianna udde naola'a sambau sasumandinga wuassu sasarrani apan orassa indi manalamatta siamiu. Sasarrani indi waline sambau lałagu ipammaresi wadanga wuassu anambo n luhuda, ewe'e maola'a sambau pairenu su Mawu Ruata wuassu lałummu naungnga apan mapia. Sasarrani udde manalamatta siamiu ana waugu Yesus Kristus suete nabbiakka apia wuassu papate, ²²wurru suete nasengkenga su surga. Orassa indi Itou uatarano suadio'a ringannu Mawu Ruata wurru uaparenta anambo n malaekatta, anambo n tembonanne see lai anambo n atathassa.

Wiakka apan wakku

4 Ana waugu Kristus suete natataranga su ola'u wadanga, iamiu lai řinone manohassa ririnu ringannu apulu naungnga ereudde. Ana waugu taumata apan uatataranga su ola'u wadanga, tate lai ma'ola'a rosa. ²Ana waugu udde, řinone iamiu sidutu mabbiakka su runia indi tutturuta apulu Mawu Ruata, wurru waline tutturuta apulu n taumata. ³Su tempo apan nałiu, iamiu małannute maapulu ma'ola'a apa apan a'olaannu manga taumata apan tawe maallała Mawu. Iamiu mabbiakka su ałaleo. Iamiu tutturuta apulu naungnga, mabbu'anna, maddamea, ma'inumma wurru massubba paałuanna apan maarantina. ⁴Orassa indi taumata apan tawe maallała Mawu, tinumiangnga manungku iamiu tawe nabbiakka ere imangitou, ma'ola'a rosa walate apulune. Ana waugu udde imangitou manggałuandaga siamiu. ⁵Arawe imangitou řinone mangonggolu sasimbakke su Mawu Ruata apan nasaddiate mamarikissa taumata wiakka wurru nate. ⁶Ana waugu udde Watti'u Ałaluassa suete niapaasingkata lai su manga taumata nate. Pandumanne tadea'u imangitou apan suete niparikisanna ere su ola'u wadanga – ere

lai anambo n taumata apan sarun parikisanna – wotongnge mabbiakka su ola’u gharraho, tumurrutta apulu Mawu Ruata.

Mangangatokku aonggolu Mawu Ruata

⁷Sarangkanambone maranite m panginsueanne, ana waugu udde rinone iamiu ua’ulinna apulu m wadanga wurru uariaga, tadea’u iamiu wotongnge umañomanna. ⁸Nangillembu wuassu sarangkanambone udde, rinone iamiu atonna-tonna uararangngu sangkatou ringanu waine, ana waugu ringannu uararangngu iamiu sarun uaa’ampungu lai. ⁹Rinone iamiu uasasañoho sangkatou ringannu waine sulalummu wañenu sambau-sambau, ringannu tawe sumamboñre. ¹⁰Iamiu sambau-sambau suete nanengkamma aonggola apan uapapañjala wuassu Mawu Ruata. Ana waugu udde ere sangkatou mangangatokka apan mapia wuassu manga aonggolu Mawu Ruata rinone iamiu mapaahuna n apande udde siamiu suadio’a. ¹¹Taumata apan namasingkatu watti’a, rinone mama-singkatu watti’a wuassu Mawu Ruata; taumata apan mangngimbe taumata waine, rinone mangimbe ringannu atatohassa wuassu Mawu Ruata, tadea’u añawo’u manara, Mawu Ruata wotonge wantuhanna sulalummi Yesus Kristus. Ete Itou apan uatañrino wurru ñihone wantuhanna ma’oma sara mañannu-ñannu. Amin.

Asasusa n taumata n Sarñani

¹²Manga turangnga apan arangnguanna! Iamiu orassa indi lembon uatatañranga susa ana waugu tantañanna iaannamma. Arawe arie tumiangnga, paññimaunnapa ere pia sambau riadianna apan wahewalla mariaddi siamiu. ¹³Ewe’e rinone iamiu mamendama añañuassa ana waugu uatatañranga suadio’a ringanni Kristus. Ne napawe awawantugi Kristus niapañañatta’a, iamiu sarun lumuassa. ¹⁴Iamiu naauntunga amungkangu iamiu añañuandahanna ana waugu iamiu mallañañreggenni Kristus. Udde atappasanne Gharraho apan mawantuga, eteudde Gharraho Mawu Ruata udde sulalummu naunggu. ¹⁵Arie pia sangkatou wuassu wallatti amiu uatatañranga ana waugu itou tañña pate, ara’e tañña ta’o, ara’e taumata lañeo, ara’e ana waugu itou uañalo’a hatto n taumata waine. ¹⁶Arawe amungkangu iamiu uatatañranga ana waugu iamiu taumata n Sarñani, ariewe masili ana waugu inolaanna udde. Pañañkamante su Mawu Ruata, manungku iamiu uapiddu aranni Kristus.

¹⁷Nia’omante tempone Mawu Ruata mamarikissa runia. Wurru ete pabbawalagu Mawu Ruata sassane apan sarun parikisanna paarorone.

Ne, amungkangu Mawu Ruata manattakke mamarikissa siite, ereapate manga taumata apan tawe mangngimanna Watti'u Aļaļuassa wuassu Mawu Ruata udde? ¹⁸Sulaļummu Wuke Susi uawořetta arendi,

”Amungkangu manga taumata apan mapia lai ete masahadda iapaasaļamatta,

nangillembote lai mariaddi su manga taumata marosa apan tawe maaillaļa Mawu!”

¹⁹Ana waugu udde, amungkangu pia taumata apan uatatařrangana ana waugu Mawu Ruata mappandumma aroddi, řinone manga tumata udde mabbiakka ringannu mapia wuřru manantillu watanganne su Mandariaddi mangitou. Itou sidutu mapaatipussu paaire-Ne.

Ammuļannu domba Mawu Ruata

5 Ia'u madorongnga aellegu manga piařra'u jamaannu. Ia'u namořreta indi, ere sangkatou tuřrangana piařrange wuřru ere taumata apan suete naasilo sassane asasusa ng Kristus, wuřru sarun wantuhanna lai suadio'a, napawe awawantugi Kristus niapaasilote su taumata. Ia'u sumaļande ²tadea'u iamiu mallu'adda ammuļannu domba apan tinantillu Mawu Ruata siamiu. Lu'arete imangitou ringannu aļaļuassu naungnga su ereapa ipaapulu Mawu Ruata, wuřru arie ringannu ipabawata'a. Arie lai ma'ola'a manaranu ana see maasomba auntunganna, ewe'e ana waugu iamiu atonna-tonna maapulu mangimbe. ³Arie pa'ola'a ere tembonanne



Mallu'adda domba (5:2)

simangitou, apan tinantilla siamiu, ewe'e iamiu řinone maola'a tuļada simangitou. ⁴Wuřru su tempo Mallaļu'adda Mawantuga udde rumanta apia, iamiu sarun manengkamma mahkota apan maļendapa wuřru tawe sarun mawulle saļendame.

⁵Aroddi lai tuŕŕanga, manga umbasanna maŕŕuala. Paatuŕŕuta su manga timmade. Tuŕŕanga sarangkanambone rinone tawe mamara-bunga wuŕŕu uaa'imbe sangkatou ringannu sangkatou ringannu awa-wawo naungnga. Ana waugu sulaŕummu Wuke Susi uawoŕŕetta arendi, "Mawu Ruata mannompola taumata mawunga, arawe mandangngu tau-mata naungnge mawawo." ⁶Ana waugu udde panantille m watangannu su aŕungngu lima Mawu Ruata apan matohassa, tadea'u Itou mapaatang-gaki amiu napawe nia'omante tempone. ⁷Tantila'e anambo n asasingga-wangngu su Mawu Ruata, ana waugu Itou uapaduŕi siamiu.

⁸Rinone iamiu paatehamma wuŕŕu paariaga! Ana waugu Se-tanna udde seetti amiu. Itou ere singa u'amatta mammaŕintadu runia lapiddu mannuntingikka maddea'a pabbawiakke. ⁹Roopete itou ringannu pangangimanna apan matohassa, ana waugu iamiu masing-kata manungku manga tuŕŕangnga sansuŕungnga Saŕŕani apan waine su ahewallu runia uatataŕŕanga lai ere iamiu. ¹⁰Arawe napawe iamiu suete natataŕŕanga sangkatempo, Mawu Ruata sassane sarun manuung-nge amiu. Itou sarun mapaatagekki amiu wuŕŕu manohassa siamiu see mapaarisikki amiu. Ana waugu ete Itou udde Mawu Ruata apan naung-Nge lembon mapia, apan suete namago siamiu mamendama suadio'a awawantu-Ge sarangkaŕo'engnge sulaŕummi Kristus. ¹¹Ete Itou apan uataŕŕino sara maŕannu-ŕannu. Amin.

Tabea su pangudusannu suratta

¹²Sura'u apan maautta indi ta'u niwoŕŕeta siamiu ringannu sasumbala n Silas, apan aantimangku sangkatou tuŕŕanga Saŕŕani apan matuŕŕuta. Ia'u maapulŕ mangonggolu sasasa siamiu, wuŕŕu manohassa pangangi-manni amiu manungku apa apan ta'u niwoŕŕeta indi watti'a atonna su ola'u darangngu Mawu Ruata. Rinone iamiu mangke uaantimma su da-rangngu udde.

¹³Manga hawe jamaatta sambau su Babilon, apan nipile Mawu Ruata lai, napawawa n tabea siamiu; aroddi lai ana'u Markus apan arangnguanna. ¹⁴Paa'adate sangkatou ringannu waine ringannu napene n darangngu ere tuŕŕanga rundusa Saŕŕani.

Antimanna Mawu mangonggolu paddarame siamiu sarangkanam-bone apan naola'a pussa'a n Kristus.

Tabea ng kami,
Petrus

SURATTI PETRUS

ARUANE

WISARA TALAANE

Suratti Petrus Aruane indi tuddane su anambo n taumata n Saṛrani apan paarorone. Suratta indi niwoṛṛeta hunane ipandoopa manara manga huru mangngaṛṛa'u aḷaṛṛa'a nassaḷa, wuṛṛu lai ipaningadu manga pallaḷagu laḷeo apan suete niaṛṛa'u manga huru udde. Tadea'u tawe awono'annu aḷaṛṛa'a udde, taumata n Saṛrani ṛinone mangngimanna aḷaṛṛa'a apan atonna su ola'u Mawu Ruata wuṛṛu su ola'i Yesus Kristus - eteudde aḷaṛṛa'a apan niapassingkatu manga taumata apan suete naasilo wuṛṛu naaringikka sassane Mawu Yesus mangngaṛṛa'a.

Paarorone apan iassassila sulaḷummu suratta indi eteudde manga taumata apan mangngaṛṛa'a manungku Kristus tate rumanta apia su tempo aruane. Suratta indi mannaḷa'a manungku daranta n Kristus udde ere ola'u maḷiwue ana waugu Mawu Ruata "maddiri pia sangkatou apan mawinasa. Itou maapulu tadea'u anambo n taumata mawaḷu wuassu manga rosane."

Laḷoṛrone

Panattaṛṛanne	1:1-2
Bawago Mawu Ruata su taumata n Saṛrani	1:3-21
Manga huru awusu	2:1-22
Daranta ng Kristus aruane	3:1-18

1 Manga tuřrangnga apan atonna-tonna mangngimanna ere iamil Yesus Kristus, eteuddde Mawu Ruata wuřru Ratu m Punnu Sařamatti ite, namala ng kite mangngimanna Sitou, ana waugu Itou pia paa'ola'a apan su řinone.

Suratta indi wuassi Simon Petrus, sangkatou allangnga wuřru rasullu Mawu Yesus Kristus. ²Doronganna Mawu Ruata mangonggolu ařamatta wuřru paddarame siamiu ringannu manambo-nambo, ana waugu iamiu maailařa Mawu Ruata, wuřru Yesus, Mawu ng kite.

Bawago wuřru pamamile Mawu

³Mawu Ruata suete nappaattu tařřino-Ne sassane wuřru nangonggolu ařawo'u sarannapa siite apan ipappaatta su patatařramawuanna. Inolaanni Tou indi wuassu apa apan niasingkatanni ite su ola'u Mawu Yesus Kristus, apan suete namago siite mamendamma awawantu-Ge wuřru apapia-Ne. ⁴Ringannu olangnge udde Mawu Ruata nangonggolu manga ařamatta apan wahewalla wuřru maarega siite apan suete pina'ire n Tou. Ringannu manga ařamatta udde iamiu wotongnge mařiu wuassu manga apulu lařeo apan manggohakku runia indi, wuřru iamiu manengkamma pallařagu Mawu Ruata. ⁵Ana waugu udde, pařřusahade atonna-tonna tadea'u iamiu sidutu mangngimanna Mawu Yesus Kristus wuřru pangangimannu udde rarundinganannu wiakka apan mapia. Su liuddu wiakka apan mapia iamiu wotonge maola'a taumata pia asingkata, ⁶wuřru su liuddu pia asingkata, iamiu lai wotongnge maauřinna apulu naunggu. Wuřru su liudde maauřinna apulu naungga, řinone lai iamiu mandiaga ririnu ana see masabare sumaruanna ařawo'u manimmala. Su liuddu masabare sumaruanna ařawo'u manimmala, iamiu lai řinone mabbiakka tuttuřřuta apulu Mawu Ruata. ⁷Wuřru mabbiakka tuttuřřuta su apulu Mawu Ruata řinone lai suungannu darangngu su manga manga tuřrangnga apan su pangangimanna sambau. Wua udde řinone lai darangngunu su manga tuřrangnga pangangimanna sambau suungannu darangngu su anambo n taumata. ⁸Sarangkanambone eteudde manga pallařagu apan pappandumanni amiu. Amungkangu manga pallařagu udde pia siamiu ringannu manambo-nambo, iamiu mabbaři mařřimada wuřru pia buane, wuřru maailařa Yesus Kristus Mawu ng kite ringannu lembon mapia lai. ⁹Arawe taumata apan tawe pallařagu ereudde, řingiranne maautta; itou tawe maasilo wuřru itou naabuři manungku manga rosane apan nařiu suete niwaresi.

¹⁰Ana waugu udde, manga tuřrangnga, pařřusahade lembon mařřimada tadea'u bawago Mawu Ruata wuřru pamamile-Ne su ririnu udde maola'a lembon matohassa. Amungkangu iamiu ma'ola'a udde,

iamiu tawe sumorrotta wuassu pangangimannu. ¹¹Ringanni aroddi iamiu sarun onngoḷannu taḫḫino sumutta su Araratuanna apan saran maḷannu-ḷannu wuassu Mawu wuḫḫu Ratu m Punnu Saḷamatti ite Yesus Kristus.

¹²Ana waugu udde, ia'u sidutu mapaanaungnga siamiu su olangnge udde, salaiwe iamiu masingkate wuḫḫu mangke mangngimanna aḷaḫḫa'u Mawu Ruata apan suete nisengkammi amiu udde. ¹³Tantaḷanna ia'u ta'e wiakka, ia'u mangke mapaanaungngi amiu su olangnge udde. ¹⁴Ana waugu ia'u masingkata manungku tate maḷannu lai ia'u sarun manantanggu runia indi, ana waugu Mawu ng kite Yesus Kristus suete namasingkata sia'u ringannu masemakka. ¹⁵Ne ia'u sarun maḫḫusahada tadea'u napawe ia'u natete lai, iamiu sidutu mannaungnga apia manga inolaanna indi.

Manga taumata apan naasilo awawantugi Kristus

¹⁶Su tempo iamii namasingkata siamiu aroddi awantuge daranta Mawu ng kite Yesus Kristus, iamii tawe uatundeetta su manga wa'e iaḫḫa'u taumata. Awawantugi Kristus udde suete niasiloanni amii ringannu mata ng kami sassane. ¹⁷Iamii poiarroddi su tempo Itou nia-datanna wuḫḫu niwantuhanu Mawu Ruata lamangnga. Su tempo udde niaringiḫḫana tingikka wuassu Apan Lembon Mawantuga, nabbisara Sitou, "Ete indi Ana'u arangnguang-Ku. Itou maaḷuassa naung-Ku!" ¹⁸Iamii sassane naaringikka tingikka udde nirumanta wuassu surga su tempo iamii su sambau ringanni Tou su wowone apan susi udde.

¹⁹Ana waugu udde iamii lembon mangngimanna lai tanata Mawu Ruata apan ipaasingkatu manga nabi. Mappianne iamii mangngimanna tanata udde, ana waugu tanata udde ere soḷo apan mannekakka tampa maranduma madatingngu matannallo sumabanga, wuḫḫu semakku aḫḫusuallo manemakka laḷummu naunggu. ²⁰Lembonete lai iamii ḫinone mannaungnga indi: Tanata Mawu Ruata apan ipappasingkatu manga nabi tawe wotongnge itaḷa'a tumuḫḫuttu adapannu sassane. ²¹Ana waugu, tawe saran paassa tanata Mawu Ruata ipappasingkata tumba'u ana waugu apulu n taumata. Arawe Ghaḫḫaho Mawu Ruata uataḫḫino su tamuata apan mammasingkatu tanata Mawu Ruata sassane.

Manga huru awusu

2 Su tempo apan naḷiu su wallatu pabbawalagu Mawu Ruata suete nirumanta manga nabi awusu. Aroddi lai su wallatti amiu sarun rumanta lai manga huru awusu. Imangitou sarun mangarra'u manga

ałarfa'a nassała, apan maapate taumata. Wuřru imangitou sarun ma-ddandilu Tembonanne apan suete namallosi mangitou. Ringannu aroddi imangitou nandanta m papate su watanganni mangitou sassane, apan sarun marria'a simangitou ringannu malihakka. ²Salaiwe aroddi, manambo taumata sarun tumantalongnga ola'u wiakku manga huru awusu udde apan tatařrinoannu apulu naungngi mangitou. Wuřru inolaannu manga huru udde sarun mamolengnga manambo taumata mangałuandaga Lałanna Narřino mattuda Mawu Ruata. ³Ana waugu imangitou masarria'u, ne manga huru awusu udde sarun mabatti'a siamiu manga watti'a iaarřangge sassane ana see maasomba auntuunganna wuassi amiu. Arawe pamamarikisanna apan mařruumanni mangitou małannute nissaddia, wuřru papate apan suete nitantuna simangitou tantałanna uarařraddo simangitou.

⁴Manga mala'ekatta apan marosa lai tawe iwala Mawu Ruata małiu wuassu řuumanna, ewe'e iramme sulałummu naraka. Imangitou iwontola sulałummu rampissa apan maranduma wuřru tarřanganna poiaroddi madatingngu Allo m Pamarikisanna. ⁵Aroddi lai runia su tempo rorone Mawu Ruata tawe namala n tou małiu wuassu řuumanna. Mawu Ruata napaaranta n manawangnga wahewalla su runia manga taumata laleo su tempo udde. Tumba'u Nuh su sambau ringannu sire pitu waine apan niapaasałamatta, ana waugu Nuh namasingkatu watti'a su ola'u wiakka apan maaluassa naungngu Mawu Ruata. ⁶Uasulungnga lai ere Sodom wuřru Gomora: Mawu Ruata nanutungnga manga soa udde ringannu putungnga tadea'u maola'a tułada su ola'u apa apan sarun mariaddi su manga taumata laleo. ⁷Arawe Lot nipaasałamatta, ana waugu itou tinumuřruta apulu Mawu Ruata; itou lembon natatarřanga ana waugu pallałagu tawe matatarřino wuassu manga taumata laleo. ⁸Su pattangannu manga taumata udde, Lot apan mapia udde mabbiakka ringannu naungnga susa, ana waugu miallo-miallo itou maasilo wuřru maaringikka pallałagu mangitou apan laleo. ⁹Nariaddi, Mawu masingkata ereapa manałamatta manga taumata tuttuřruta apulu-Ne su tempo imangitou uasaruanna manga wawono'a. Wuřru Mawu masingkata ereapa manahipunna manga taumata laleo udde sansaranna su Allo m Pamarikisanna, ¹⁰lembonete su manga taumata apan tuttuřruta apulu naungngi mangitou apan laleo wuřru mangałuandaga tarřino Mawu Ruata.

Aroddi awarřanine wuřru awungane manga huru awusu udde na'oma n sara imangitou tawe go'ane mangałuandaga manga riadianna apan mawantuga sara lai su surga! ¹¹Arawe manga mala'ekatta apan mattohasanna marau wuřru lembon tarřino wuassu manga huru awusu udde, tawe mangansila manga riadianna apan mawantuga udde ringannu wisara aaluandaga su saruannu Mawu. ¹²Arawe manga huru udde waline

hampa! Imangitou ere winatanga niasungkanga see sametanna wuṛṛu pateanna. Imangitou tawe maṛṛingidda, arawe tumba'u mammanara tuttuṛṛuta apulu naungnga, na'oma n sara imangitou mandoopa manga hatto apan tawe iasunna mangitou ringannu manga wisara aaḷuandaga. Ana waugu udde wuassu manga pallaḷagu mangitou sassane, imangitou sarun mate ere manga winatangnga maḷaṛṛaga. ¹³Maola'a wawaḷissu asaṣusa apan suete niola'i mangitou, imangitou sarun matataṛṛanga susa. Inolaanna apan maaluassa naungngi mangitou eteudde ma'ola'a aḷawo'u inolaanna su allo allattune maddea'a mapaawusa n apulu n wadangi mangitou. Amungkangu imangitou uaianna su sambau ringanni amiu sulalumu andeangngu anna, pallaḷagu mangitou maarantinna ana waugu imangitou niwu'annu apulu naungngi mangitou. ¹⁴Imangitou tawe illoḷone ma'ola'a rosa, wuṛṛu aḷutuanni mangitou ma'ellega wawine masandaga. Wuṛṛu taumata apan wakku mangngimanna wuṛṛu ta'e matuḷu pangangimanne, waḷonotanni mangitou. Naungngi mangitou nimumarampe n awawaḷiu. Ete imangitou udde taumata apan niawontohante! ¹⁵Ana waugu imangitou maddiri umamatta su laḷanna matuḷida, ne imangitou nialiwune. Imangitou niumamatta su laḷanni Bileam ana'i Beor dorone. Bileam indi mangke maapulu maasomba roitta wuassu inolaanne apan laḷeo. ¹⁶Arawe itou naasomba tatagu su inolaane apan laḷeo udde, ne su tempo keledaine nabbisara ringannu tingikku taumata. Ne nabi udde niwata'a mangilloḷo m pallaḷagune apan naaḷihida ere wewa udde.

¹⁷Manga huru awusu udde naḷihida ere aḷimata ng kua'e apan namara wuṛṛu naaḷihida ere rallamma nitiuppu anginna aḷisusu. Mawu Ruata suete nanaddia tampane, sambau tampa apan tumanite maranduma. ¹⁸Imangitou na'ola'a manga papasingkata apan napene m papaḷo notta wuṛṛu tawe loṛṛone; apulune sussandaga iapaati mangitou ipangaḷiwu manga taumata apan wakku napallosa wuassu tampa n taumata apan mahbiakka su aḷaḷeo. ¹⁹Manga huru awusu udde naddiandi n apapalossa su manga taumata udde, arawe imangitou sassane niallangngu manga inanaramanna apan mandaḷeo taumata. Ana waugu amungkangu taumata tawe naaroappa wawono'a, ne itou maola'a allangngu alaḷeo udde. ²⁰Taumata apan maailaḷa Mawu wuṛṛu Punnu Saḷamatti ite Yesus Kristus, napallose wuassu taṛṛino n runia apan maaluḷuhuda taumata. Arawe amungkangu saḷimurine itou niasametta apia na'oma n sara tawe naaroapa manga taṛṛino udde, ne ola'u taumata udde panginsueanne maddaḷeoanne lai wuassu paarorone. ²¹Mappianne manga taumata ereudde tawe saran paassa naasingkata laḷannu apapia Mawu Ruata, wuassu imangitou masingkata, arawe wua udde maddiri tumuṛṛutta manga parenta apan nionggolu Mawu Ruata simangitou. ²²Apa apan a'olaanni mangitou napaḷiatta'u sasanato'a indi, "Asu sarun

umanna apia anna apan buatte nimutane," wuṛṛu "Wawi apan buatte nireno, sarun mabelengnga apia tumalinggi su tona."

Paaire su ola'u daranta Mawu

3 Manga turrangnga apan arangnguanna! Ete indi sura'u aruane siamiu. Sulaḷummu suratta darua indi, ia'u mangke mappandumma mapaasabangu manga ṛingiranna apan mapia siamiu. ²Ia'u mandolokka tadea'u iamiu mannaungnga manga wisara apan rorone suete niwisara manga nabi Mawu Ruata, wuṛṛu parenta n Mawu. Ratu m Punnu Saḷamatta apan niapassingkatu manga rasul siamiu. ³Paarorone, iamiu ṛinone masingkata manungku su allo-allo pangudusanne, sarun rumanta manga taumata apan pabbawiakke paparentannu apulu naungngi mangitou sassane. Imangitou sarun mangaḷuandaga siamiu, ⁴ringannu mabbisara arendi, "Anaude Mawu na'ire rumanta! Orassa indi suapa Itou? Manga iamangngu aḷamona ng kite natete arawe aḷawo'a mangke uasulungnga ere ro'e n runia indi niriaddi!" ⁵Imangitou atonna tawe manga'u manungku su aḷamonane Mawu Ruata nandiaddi langitta wuṛṛu runia wuassu ṛengtane-Ne. Runia niriaddi-Ne wuassu ua'e, wuṛṛu ringannu ua'e; ⁶wuṛṛu ringannu ua'e lai - eteudde ua'e manawangnga wahewa - runia ng kaḷamona udde nihohakka. ⁷Arawe langitta wuṛṛu runia apan sara orassa indi, nipaduḷianannu ṛengetannu Mawu Ruata udde lai, ana see tutungannu putungnga su tempo addantane. Orassa indi langitta wuṛṛu runia ta'e papaduḷiananna ma'oma n sara allo manga taumata apan laḷeo udde iṛruumanna wuṛṛu pateanna.

⁸Arawe manga turrangku, hatto sambau indi arie paabuḷiane: manungku su aellegu Mawu, allo massallo tawe paṛḷalane ringannu sarriwu su tonnane - itarua udde nassulungnga Sitou. ⁹Mawu tawe maḷiwue mangonggolu apa apan suete nipa'ire-Ne, salaiwe piaddu mas-sunna aroddi. Arawe Itou masabare siamiu, ana waugu Itou maddiru pia sangkatou apan mate. Itou maapulu tadea'u anambo n taumata mawaḷu wuassu manga rosane.

¹⁰Arawe Allo daranta Mawu sarun rumanta ere daranta n taṛṛa ta'o. Su Allo udde langitta sarun mawaḷi ringannu tingikka rudallu'a, wuṛṛu manga sarannapa su langitta sarun masue matutungnga, wuṛṛu runia ringannu aḷawo'u laḷoṛṛone sarun mawaḷi. ¹¹Ana waugu sarangkanambone udde sarun ṛimunsaanna ringannu olangnge apan aroddi, ereapate ṛinone iamiu mahbiakka? Iamiu mahbiakka susi wuṛṛu hunane tumba'u su Mawu Ruata sassane, ¹²tantaḷanna iamiu uaraṛṛaddo wuṛṛu luṛṛintulu daranta n Allo Mawu Ruata. Su Allo udde langitta sarun masue matutungnga, wuṛṛu ana waugu saḷihangnge, ne manga sarannapa su langi-

tta sarun monossa. ¹³Arawe iite uarado apa apan suete pina'ire Mawu Ruata, eteudde langitta wakku wuuru runia wakku, isudde mangke pia atatuidda.

¹⁴Ana waugu udde, manga tuuranga apan arangguanna, tanta'anna iamiu uarado Allo udde, pappandumpe atonna-tonna mabbia'akka susi wuuru tawe pasasa'ala su saruannu Mawu Ruata. Wuuru paddu'ianete paa'aukka apan mapia ringannu Mawu Ruata. ¹⁵Pendamete manungku asabare Mawu ng kite maola'a sambau tempo apan niongoli Tou siamiu tadea'u wotongge masalamatta. Paulus, tuurangi ite apan arangguanna, suete namorreta aroddi lai siamiu. Itou namorretu udde ringannu apande apan niongolu Mawu Ruata sitou. ¹⁶Sula'ummu anambo n suranne, Paulus sidutu mamorretu ola'u hatto udde. Atonna pia manga pira hatto apan masahadda passunanne sula'ummu manga suratti tou udde. Wuuru wageangge udde iwaba'elungu manga tau-mata apan waggan apa-apa wuuru apan lome pangangimanne. Olangge udde tawe maatiangnga, ana waugu manga wageangge waine wuassu Wuke Susi a'olaanni mangitou aroddi lai. Apa apan a'olaanni mangitou udde tumba'u manongkaki mangitou sassane.

¹⁷Arawe iamiu manga tuurangu apan arangguanna, maasingkate olangge udde. Ana waugu udde, paatehamma, arie iamiu iawolengnga sula'ummu ararandumu manga taumata la'leo, ma'oma n sara iamiu manawo wuassu tampa dararisiranu apan matohassa. ¹⁸Rinone iamiu lembon maappendamma alamattu Mawu Yesus Kristus, Mawu wuuru Punnu Salamatti ite, wuuru rinone iamiu lai lembon maailala Sitou. Daralo Sitou, orassa indi wuuru ma'oma n sara ma'annu-l'annu! Amin.

Tabea ng kami,
Petrus

SURATTI YOHANES

PAARORONE

WISARA TAĀAANE

Suratti Yohanes Paarorone indi niwořřeta ringannu tuddane darua. Paarorone mangngonggolu sasasa su manga mabbawasane tadea'u imangitou mabbiakka uaukku Mawu Ruata wuřřu Anang-Nge Yesus Kristus. Aruane eteudde mappanaungnga simangitou tadea'u tawe tumantalongnga manga aĵařřa'a nassaĵa apan maaĵaĵeo paa'aukki mangitou ringannu Mawu Ruata wuřřu Yesus Kristus. Manga aĵařřa'a nassaĵa udde rapappake wuassu pangangimanna manungku aĵawo'u saranapa apan ua'eřřettu runia, hessine aĵaĵeo; nariaddi, Mawu Yesus Ana'u Mawu Ruata tawe mariaddi suete naola'a taumata. Manga huru apan mangangařřa'u manga aĵařřa'a apan nassaĵa udde mabbisara manungku niapasaĵamatta udde atappasanne nipallosa wuassu aĵawo'u manara m pabbawiakka su runia indi; imangitou mangngařřa'a lai manungku asaĵamatta tawe sampune ringannu inolaanna mapia ara'e darangngu su sandingananna taumata.

Uapapařřala manga aĵařřa'a udde, mamamořřetu suratta indi namasingkata ringannu matualaga manungku Mawu Yesus Kristus atonna-tonna suete naola'a taumata tutune. Itou namasingkata lai manungku anambo n taumata apan mangngimanna Mawu Yesus lapiddu mandangngu Mawu Ruata, řinone lai mandangngu sangkatou ringannu sangkatou.

Laloꝛꝛone

Panattaꝛꝛanne	1:1-4
Asasemakka wuꝛꝛu araranduma	1:5-2:29
Aꝛꝛana'u Mawu Ruata wuꝛꝛu aꝛꝛana'u Setanna	3:1-24
Apan naꝛꝛino wuꝛꝛu nassaꝛa	4:1-6
Inolaannu taumata ipandangngu	4:7-21
Pangangimanna apan mangngapidu asasaꝛamatta	5:1-21

Rengetanna apan wiakka

1 Laḷorḷo n suratta indi mannaḷa'a ola'u Rengetanna apan mangngonggolu wiakka, eteudde Rengetanna apan plate ro'e n wuassu aḷamonane. Iami suete naaringikka, wuḷḷu suete naasilo mata ng kami sassane. Iami suete naellega, wuḷḷu suete nangagasu lima ng kami. **2**Su tempo wiakka udde niapaaliatta'a, iami naasilo. Ana waugu udde iami nattiala su olange udde. Iami mammasingkata siamiu su ola'u wiakka tutune wuḷḷu saran maḷannu-ḷannu, apan su sambau ringannu Mawu Ruata Iamangnga, wuḷḷu apan suete niapaaliatta'a siami. **3**Apa apan suete niasiloanna wuḷḷu niaringiḷḷani ami, eteudde lai apan iapasingkati ami siamiu, tadea'u iamiu suadio'a ringanni ami wotongnge maapendamma wiakka uauukka ringannu Iamangnga wuḷḷu ringannu Anang-Nge Yesus Kristus. **4**Iami namorḷretu indi tadea'u naungngi ite atonna-tonna maḷuassa.

Eteudde Mawu Ruata asasemakka

5Ete indi watti'a apan suete niaringiḷḷani ami wuassu Anang-Nge wuḷḷu apan iwabbatti'i ami siamiu: Mawu Ruata eteudde asasemakka, wuḷḷu Sitou tawe araranduma sara ng kadio'a. **6**Amungkangu iite mabbisara manungku iite mabbiakka uauukka ringanni Tou, arawe iite mabbiakka su araranduma, ne iite nangawusu mapia ringannu wisara ara'e lai ringannu pallaḷagu. **7**Arawe amungkangu iite mabbiakka sulaḷummu asasemakka ere lai Mawu Ruata sulaḷummu asasemakka, ne iite mabbiakka uauukka atonna, uasangkapia sangkatou ringannu waine, wuḷḷu ḷarḷa Mawu Yesus, Anang-Nge, namaresi siite wuassu aḷawo'u rosa.

8Amungkangu iite mabbisara manungku iite tawe paddarosa, iite nangawusu watanganni ite sassane; wuḷḷu Mawu Ruata tawe sulaḷummu naungngi ite. **9**Arawe amungkangu iite manga'u aḷawo'u rosa ng kite su Mawu Ruata, Itou sarun manipussa paaire-Ne wuḷḷu ma'ola'a atatuḷidda. Itou sarun mangampungu manga rosa ng kite wuḷḷu mangukasa siite wuassu aḷawo'u aḷaḷeo ng kite. **10**Arawe amungkangu iite mabbisara manungku iite tawe paddarosa, iite maḷrangngo manungku Mawu Ruata udde tarḷa awusu wuḷḷu iite tawe uaraddo m wisara Mawu Ruata sulaḷummu naungngi ite.

Kristus mattatujungi ite

2 Aļarřana'u! Ia'u namorřetu indi siamiu tadea'u iamiu tawe ma'ola'a rosa. Arawe amungkangu piaddu lai ma'ola'a rosa, ne iite pia sangkatou sumasimbake, eteudde Yesus Kristus apan matuļida udde; Itou sarun sumaļande ng kite su saruannu Iamangnga. ²Ringannu pamamanara n Yesus Kristus uddewe manga rosa ng kite niampunganna. Wuřru waļine tumba'u manga rosa ng kite sassane, ewe'e rosa n anambo n tau-mata lai.

³Amungkangu iite matuřruta su manga parenta Mawu Ruata, udde tatialane manungku iite maaillaļa Mawu Ruata. ⁴Taumata apan mabbisara, "Ia'u maaillaļa Mawu Ruata," arawe maddiri tumuřrutta manga parenta-Ne, taumata udde tařra wahia, wuřru Mawu Ruata tawe sulaļummu naungge. ⁵Arawe taumata apan matuřruta wisara Mawu Ruata, taumata udde marangngu Mawu Ruata ringannu nasuungnga. Udde tatialane manungku iite mabbiakka uauukka ringannu Mawu Ruata. ⁶Isai-sai nabbisara manungku itou mabbiakka uauukka ringannu Mawu Ruata, itou řinone mabbiakka manantuřrutta lempangi Kristus.

Parenta apan wakku

⁷Manga tuřrangnga apan arangnguanna! Apa niwořre'u indi waļinewe sambau parenta apan wakku. Indi parenta tabbe apan suete niapaasingkata siamiu ro'e n iamiu nanattakka mangngimanna si Kristus; eteudde watti'a wuassu Mawu Ruata apan suete niaringiřrani amiu ro'e n iamiu taambe nangimanna.

⁸Salaiwe aroddi, parenta apan ta'u niwořreta indi wakku lai; ana waugu atatuļide wotongge aellehanna su wadangi Kristus wuřru lai su wadangi amiu. Ana waugu araranduma mabbuļite wuřru asasemakka apan atonna mannatake lullansiangnga.

⁹Taumata apan nabbisara manungku itou sulaļummu asasemakka arawe taumata udde ta'e maddantinu tuřrange, taumata udde ta'e su araranduma sara orassa indi. ¹⁰Taumata apan marangngu tuřrange, mabbiakka sulaļummu asasemakka na'oma n sara wuassi tou tawe sarun mapaema'u taumata waine sulaļummu rosa. ¹¹Arawe taumata apan maddantinnu tuřrange, udde sulaļummu araranduma. Itou u'amatta sulaļummu araranduma, wuřru wagga watukuapa amatanne, ana waugu araranduma udde naawuta sitou.

¹²Ia'u namorřetu suratta indi siamiu, Aļarřana'u, ana waugu rosanu suete niampunganna ana waugu Kristus. ¹³Ia'u namorřetu suratta indi

siamiu, manga iamangnga, ana waugu iamiu maailaḷa Sitou apan uddete ro'e n aḷamonane. Ia'u namoḗretu suratta indi siamiu, manga umbasanna maḗruala, ana waugu iamiu suete nangema'i Aḷaḷeo.

¹⁴Ia'u namoḗretu suratta indi siamiu manga dario'a, ana waugu iamiu maailaḷa Mawu Ruata Iamangnga. Ia'u namoḗretu suratta indi siamiu, manga iamangnga, ana waugu iamiu maailaḷa Ḥengetanna apan uddete ro'e n aḷamonane. Ia'u namoḗretu suratta indi siamiu manga umbasanna maḗruala, ana waugu iamiu matohassa. Wisara Mawu Ruata uatana'a sulaḷummu naungngu, wuḗru iamiu suete nangema'i Aḷaḷeo.

¹⁵Ariete mandangngu runia indi, ara'e aḷawo'u sarannapa apan sulaḷummu runia indi. Amungkangu iamiu mandangngu runia, iamiu tawe mandangngu Iamangnga. ¹⁶Aḷawo'u sarannapa sulaḷummu runia indi – apan ipaapulu m pallaḷagu n taumata marosa, apan a'ellehanna see ianemma wuḗru ipamarabunga – sarangkanambone udde manga inolaanna apan tawe wuassu Mawu Ruata, ewe'e wuassu runia. ¹⁷Runia wuḗru aḷawo'u sarannapa sulaḷumme apan ipaapulu n taumata, tantaḷanna ma-buḷi. Arawe taumata apan tuttuḗruta apulu Mawu Ruata, sidutu ma-bbiakka saran maḷannu-ḷannu.

Seetti Kristus

¹⁸Aḷaḗrana'u panginsueannu tempo maranite! Suete niapaasingkata siamiu paarorone, manungku Seetti Kristus sarun rumanta; wuḗru orassa indi nirumantate anambo n taumata apan masseetti Kristus. Udde tatialane manungku panginsueannu runia maranite. ¹⁹Manga seetti Kristus eteudde manga taumata apan suete nanantangi ite, ana waugu imangitou su ḗnone waḷine taumata su sambau ringanni ite. Amungkangu imangitou taumata su sambau ringanni ite, imangitou mangke uaammulla ringanni ite. Arawe imangitou nanantangi ite, tadea'u matualage manungku tawe saran sangkatou wuassi mangitou apan atonna-tonna nasutta su reenganni ite.

²⁰Arawe iamiu suete nanengkamma Ghaḗraho Mawu Ruata apan niwobboki Yesus Kristus wuḗru ana waugu udde iamiu sarangkanambone maailaḷa aḷaḗra'a apan naḗrino udde. ²¹Nariaddi ia'u namoḗretu suratta indi siamiu waḷinewe ana waugu iamiu waggan aḷaḗra'a apan naḗrino, arawe ana waugu iamiu naaillaḷate wuḗru iamiu lai masingkate manungku tawe awusune sulaḷummu aḷaḗra'a apan naḗrino udde.

²²Isai nangawusu eteudde taumata apan nabhisara manungku Mawu Yesus waḷinewe Ratu m Punnu Saḷamatta apan pina'ire Mawu Ruata. Taumata udde Seetti Kristus; itou tawe manga'u Iamangnga ara'e Ana'a. ²³Taumata apan tawe manga'u Ana'a, atappasanne tawe manengkamma

Iamangnga lai. Wuřru taumata apan mangnga'u Ana'a, atappasanne manngkama lai Iamangnga.

²⁴Ana waugu udde, watti'a apan suete niaringiřrani amiu ro'e n panattařranne iamiu mangngimanna, řinone rariaganni amiu mapia-pia sulařummu naungnga. Amungkangu watti'a udde, tatutuřranni amiu mapia-pia, iamiu sarun mabbiakka sidutu uauukka ringannu Ana'a wuřru Iamangnga. ²⁵Wuřru ete indi apan pina'ire n Kristus sassane siite: wiakka tutune wuřru saran mařannu-řannu.

²⁶Ia'u namořřetu suratta indi siamiu su ola'u manga taumata apan tantařanna mangngawusu siamiu. ²⁷Arawe su ola'i amiu sassane, Kristus suete namobboku Ghařraho-Ne siamiu. Wuřru sulařummu Ghařraho-Ne ta'e ringanni amiu, arie pia taumata waine mangařra'a siamiu. Ana waugu Ghařraho-Ne mangngařra'a siamiu su ola'u ařawo'a; wuřru apa apan ia'ařra-Nge udde atonna, wařine wahia. Ana waugu udde, řinone iamiu tumuřřutta apa apan niařra'u Ghařraho udde, wuřru řinone iamiu sidutu mabbiakka uauukka ringanni Kristus.

²⁸Nariaddi, ařařrana'u, paasidutute mabbiakka uauukka ringanni Kristus, tadea'u su tempo Itou rumanta apia, iite sumaruanna Sitou ringannu napene ng kawawařrani, wuřru tawe ma'imbuni ana waugu massili. ²⁹Iamiu masingkate manungku Kristus mabbiakka tuttuřřuta apulu Mawu Ruata. Ana waugu udde iamiu řinone masingkata lai manungku suapan taumata apan mabbiakka tuttuřřuta apulu Mawu Ruata eteudde lai ana'u Mawu Ruata.

Manga ařařrana'u Mawu Ruata

3 Pa'ellege, Mawu Ruata aroddi arangngune siite, na'oma n sara iite nia'u ařařranang-Nge. Wuřru atonna ete iite udde ařařrana'u Mawu Ruata. Ana waugu udde runia apan lařeo indi tawe maailařa siite, ana waugu runia tawe maailařa Mawu Ruata. ²Manga tuřrangnga apan arangnguanna! Ete iite orassa indi ařařrana'u Mawu Ruata, arawe ola'i ite su tempo addantane taambe natualaga. Arawe iite masingkata manungku amungkangu Kristus rumanta, iite sarun maola'a ere Itou, ana waugu iite sarun maasilo Sitou sulařummu olang-Nge apan nasuungnga. ³Anambo n taumata apan pia antimma indi su saruanni Kristus, mandiaga ririne tadea'u atonna-tonna susi, waresi wuassu rosa ere lai Kristus udde lai susi.

⁴Taumata apan ma'ola'a rosa, nilumawangnga tita Mawu Ruata; ana waugu rosa uddewe lařawangnga su tita Mawu Ruata. ⁵Iamiu masingkata manungku Kristus nirumanta ana waugu mamappasa manga rosa n taumata, wuřru paddarosa tawe sulařummu watangan-Ne. ⁶Anambo n

taumata apan mabbiakka uaaukka ringanni Kristus, tawe sidutu ma'ola'a rosa. Taumata apan sidutu ma'ola'a rosa, saran paassa tawe maasilo si Kristus ara'e maaillaļa Sitou.

⁷Manga aļarřana'u, arie mamala n taumata mamono'a siamiu. Taumata apan tuttuřruta apulu Mawu Ruata, uddewe ana'u Mawu Ruata ere lai Kristus Ana'u Mawu Ruata. ⁸Arawe taumata apan matatana'a ma'ola'a rosa, ete itou uddewe ana'u Setanna, ana waugu Setanna marosa ro'e n aļamonane. Ana waugu udde Ana'u Mawu Ruata nirumanta, eteudde makkimunsa'a manara n Setanna.

⁹Taumata apan naola'e Ana'u Mawu Ruata, tawe sidutu ma'ola'a rosa, ana waugu pallalagu Mawu Ruata sassane tatahuananni tou. Wuřru ana waugu Mawu Ruata udde Iamangnge, ne itou tawe sidutu ma'ola'a rosa. ¹⁰Ete indi papařralane wuassu alařřana'u Mawu Ruata wuřru aļarřana'u Setanna: suapan taumata apan tawe tumuřrutta apulu Mawu Ruata, ara'e tawe mandangngu tuřrange, itou waline ana'u Mawu Ruata.

Paa'akkana sangkatou ringannu sangkatou

¹¹Ro'e n paarorone suete niapaasingkata watti'a indi siamiu: Iite řinone umakana sangkatou ringannu waine. ¹²Ariewe iite ere Kain, apan naola'a ana'u Setanna wuřru namate tuřrange sassane. Anio Kain namate tuřrange? Ana waugu manga inolaanna apan niolange udde nassala, arawe inolaannu tuřrange udde narřino.

¹³Ana waugu udde, manga tuřrangku, arie tumiangnga amungkangu manga taumata su runia indi maddantini amiu. ¹⁴Iite masingkata manungku iite naļiute wuassu papate, wuřru nabbiakke apia. Iite masingkatu udde, ana waugu iite u'akkanu sansuļungngu taumata. Taumata apan tawe umakkana, atappasanne ta'e tatařřinoannu papate. ¹⁵Taumata apan maddantinu tuřrange, eteudde tařra pate, wuřru iamiu masingkata manungku sangkatou tařra pate tawe maatahuanna wiakka tutune wuřru saran maļannu-ļannu. ¹⁶Ringannu laļanne indi iite maasingkata ereapa mandangngu sansuļungnga taumata: Kristus suete nanantillu wiakke huna ng kite. Ana waugu udde, iite lai řinone manantillu wiakki ite huna manga tuřrangngi ite! ¹⁷Amungkangu sangkatou apan wiakke natimu naasilo tuřrange wiakke tawe natimu, arawe maddiri mantuļungngu tuřrange udde, ereapa taumata udde wotongnge mabbisara manungku itou mandangngu Mawu Ruata? ¹⁸Aļarřana'u! Arie iite umakkana tumba'u su mořřonga ara'e tumba'u ringannu wi-sara. Řinone iite umakkana ringannu aakkana apan tutune, apan nia-paaliatta'a ringannu inolaanni ite.

Awawarrani su saruannu Mawu Ruata

¹⁹Aroddiwe olangnge iite maasingkata manungku iite nareengnga ałarřana'u Mawu Ruata apan atonna, wuřru naungngi ite wotongnge matammuda su saruannu Mawu Ruata. ²⁰Iite masingkata, manungku amungkangu iite iapaasała naungngi ite, asingkatu Mawu Ruata magge-wařanne wuassu asingkatu naungngi ite, wuřru Itou masingkatu sarangkanambone. ²¹Nariaddi, manga tuřrangku apan arangnguanna, amungkangu naungngi ite tawe mapaasała ng kite, iite wotongnge sumaruanna Mawu Ruata ringannu awawarrani. ²²Wuřru apa apan radoronganni ite wuassi Tou, iite sarun maasomba, ana waugu iite tuttuřruta manga parenta-Ne wuřru ma'ola'a apa apan maaluassa naung-Nge. ²³Parenta-Ne siite eteudde: Iite řinone mangngimanna Anang-Nge, eteudde Yesus Kristus, wuřru iite řinone uararangngu, ere suete niparenta n Kristus siite. ²⁴Anambo n taumata apan tuttuřruta manga parenta Mawu Ruata, mabbiakka uauukka ringannu Mawu Ruata, wuřru Mawu Ruata uauukka ringanni mangitou. Wuřru iite masingkata manungku Mawu Ruata mabbiakka uauukka ringanni ite, ana waugu Itou suete nangong-golu Gharřaho-Ne siite.

Gharřaho řinone wuřru gharřaho manggaliwu

4 Manga tuřrangnga apan arangnguanna! Arie pangimanna anambo n taumata apan mangnga'u Gharřaho Mawu Ruata, arawe annama'a asuene imangitou tanne gharřaho mangitou udde niarantanne wuassu Mawu Ruata ara'e tawe. Ana waugu manambo nabi awusu apan u'amatta su aławo'u tampa. ²Ereindi olangnge tadea'u iamiu maasingkata apa udde Gharřaho Mawu Ruata ara'e tawe: Taumata apan mangnga'u Yesus Kristus nirumanta su runia naola'a taumata, taumata udde pia Gharřaho apan darantane wuassu Mawu Ruata. ³Arawe taumata apan tawe manga'u olangnge indi su ola'u Mawu Yesus, tawe uatahuanna Gharřaho Mawu Ruata. Taumata udde pia gharřaho wuassu Setti Kristus. Tuřranga suete naaringikka manungku Gharřaho udde sarun rumanta, wuřru orassa indi itou uddete sulalummu runia indi.

⁴Arawe Ałarřana'u, iamiu pussa'a Mawu Ruata, Iamiu suete napaaema'u manga nabi awusu, ana waugu Gharřaho 'apan tatahuananni amiu lembon matařrino wuassu gharřaho apan su taumata tatahuanannu runia indi. ⁵Manga nabi awusu udde mabbisara su ola'u runia, wuřru runia maddaringika wisara mangitou, ana waugu imangitou pussa'a n

runia. ⁶Arawe ete iite indi ałarřana'u Mawu Ruata; wuřru taumata apan maailała Mawu Ruata, madingikka wisara ng kite. Taumata wałine pussa'a Mawu Ruata maddiri madingikka wisara ng kite. Aroddiwe olangnge iite maasingkatu pařřalannu Gharřaho apan mangngonggolu ałarřa'a apan atonna, wuřru gharřaho apan mangngałiwu.

Mawu Ruata udde maakkana

⁷Manga tuřřangnga apan arangnguanna! Wette iite maa'akkana sangkatou ringannu sangkatou, ana waugu aakkana darantane wuassu Mawu Ruata. Taumata apan u'akkana, eteudde ana'u Mawu Ruata wuřru itou maailała Mawu Ruata. ⁸Taumata apan tawe umakkana, tawe maailała Mawu Ruata; ana waugu Mawu Ruata udde maakkana. ⁹Mawu Ruata napaalıatta'a manungku Itou u'akkani ite ringannu nandolokku Anang-Nge tinggasa sulałummu runia tadea'u iite maasomba wiakka wuassu Anang-Nge udde. ¹⁰Ete indi aakkana: Wałine iite apan suete niuamakkanu Mawu Ruata, arawe Mawu Ruata apan niuamakkani ite wuřru nandolokku Anang-Nge tadea'u wuassi Tou iite maasomba aampungu rosa ng kite.

¹¹Manga tuřřangnga apan arangnguanna, amungkangu Mawu Ruata aroddi arangngune siite, iite lai řinone marangngu su sansułunga taumata. ¹²Tawe saran sangkatou apan suete naasilo Mawu Ruata, arawe amungkangu iite uararangngu, Mawu Ruata uaaukka ringanni ite wuřru darangngu-Ne masuungnga sulałummu watanganni ite.

¹³Ana waugu Mawu Ruata suete nangonggolu Gharřaho-Ne siite, ne iite masingkate manungku iite suete nabbiakka uaaukka ringannu Mawu Ruata, wuřru Mawu Ruata mabbiakka uaaukka ringanni ite. ¹⁴Iami sassane suete naasilo Ana'u Mawu Ruata, wuřru iami namasingkata manungku Itou nirolokku Iamangnga maola'a Ratu m Punnu Sałamattu runia indi. ¹⁵Isa-sai apan mangnga'u manungku Yesus udde Ana'u Mawu Ruata, Mawu Ruata mabbiakka uaaukka ringannu taumata udde, wuřru taumata udde lai mabbiakka uaaukka ringannu Mawu Ruata. ¹⁶Iite sassane masingkata wuřru mangngimanna darangngu Mawu Ruata siite.

Mawu Ruata udde marangngu. Taumata apan wiakke paparentannu darangngu, taumata udde uaaukka ringannu Mawu Ruata, wuřru Mawu Ruata uaaukka ringanni tou. ¹⁷Darangngu niola'a nasuungnga sulałummu watanganni ite, tadea'u iite pia awawařřani su Allo m Pamamarikisanna. Iite sarun pia awawařřani, ana waugu wiakki ite sulałummu runia indi ere lai wiakki Kristus. ¹⁸Taumata apan uapendama darangngu Mawu Ruata, tawe apendama matta'uta; ana waugu da-

rangngu apan nasuungnga mapaawuŋi n atata'uta. Nariaddi natualage manungku taumata apan taambe naappendama darangngu Mawu Ruata ringannu nasuungnga amungkangu taumata udde matta'utta sumaruanna Allo m Pamamarikisanna.

¹⁹Iite mandangngu, ana waugu Mawu Ruata doronete nandangngu siite. ²⁰Amungkangu pia sangkatou mabbisara, "Ia'u marangngu Mawu Ruata," arawe itou tawe mandangngu tuŋrange, taumata udde taŋra wahia. Ana waugu taumata apan tawe mandangngu tuŋrange apan aasilooanne, tawe mariaddi wotongnge mandangngu Mawu Ruata apan tawe asilooanne. ²¹Ana waugu udde, ete indi parenta apan nionggoli Kristus siite: Isai apan mandangngu Mawu Ruata, ŋinone lai mandangngu tuŋrange.

Auntunganni ite su wowo n runia

5 Taumata apan mangngimanna manungku Yesus udde Ratu m Punnu Saŋamatta apan pina'ire Mawu Ruata, taumata udde ana'u Mawu Ruata. Taumata apan mandangngu sangkatou Iamangnga, marangngu lai anangnge. ²Ringannu laŋanne indi iite maasingkata manungku iite marangngu aŋaŋrana'u Mawu Ruata: Iite mandangngu Mawu Ruata wuŋru tuttuŋruta manga parenta-Ne. ³Ana waugu, mandangngu Mawu Ruata atapasanne tuttuŋruta manga parenta-Ne. Wuŋru manga parenta-Ne tawe maawakkata siite, ⁴ana waugu suapan aŋaŋrana'u Mawu Ruata wotongnge maarooppa runia apan laŋeo indi. Wuŋru iite mandooppa runia ringanu pangangimanni ite. ⁵Isai wotongnge maarooppa runia? Tumba'u taumata apan mangngimanna manungku Yesus udde Ana'u Mawu Ruata.

Tiala su ola'i Yesus Kristus

⁶Ete Yesus Kristus apan nirumanta su runia ringannu ua'e n Sasarŋani wuŋru ringannu ŋaŋra m papate-Ne. Itou nirumanta waŋine tumba'u ringannu ua'e sassane, arawe ringannu ua'e wuŋru ŋaŋra. Wuŋru Ghaŋraho Mawu Ruata sassane nangonggolu tialane manungku udde atonna, ana waugu Ghaŋraho taambe namahia. ⁷Pia tatallu mattatiale: ⁸Ghaŋraho Mawu Ruata, ua'e wuŋru ŋaŋra – imangitou n tallu udde mangngonggolu tatiala apan nasuŋungnga. ⁹Iite mangngimanna su tatiala n taumata, arawe tatiala wuassu Mawu Ruata mattohasanna lai. Wuŋru eteudde tatiala apan nionggolu Mawu Ruata su ola'u Anang-Nge. ¹⁰Ana waugu udde, taumata apan mangngimanna su Ana'u Mawu Ruata, suete nanengkamma tatiala udde sulaŋummu naungnge; arawe taumata apan tawe mangngimanna Mawu Ruata, nassunnate manungku

Mawu Ruata tařra wahia, ana waugu itou tawe mangngimanna apa apan iwabařo Mawu Ruata su ola'u Anang-Nge. ¹¹Ete indi tatialane udde: Mawu Ruata suete nangonggolu wiakka tutune wuřru mařannu-řannu siite, wuřru Anang-Nge uddewe punnu wiakka udde. ¹²Taumata apan uatahuanna Ana'u Mawu Ruata, uatahuanna wiakka udde; wuřru taumata apan tawe uatahuanna Sitou, tawe uatahuanna wiakka udde.

Wiakka tutune wuřru saran mařannu-řannu

¹³Ia'u namořretu suratta indi siamiu apan mangngimanna Ana'u Mawu Ruata, tadea'u iamiu masingkata manungku iamiu plate biakka tutune wuřru saran mařannu-řannu. ¹⁴Wuřru iite wařrani sumaruanna Mawu Ruata, ana waugu iite mangngimanna manungku Itou naddaringikka aařiomanni ite, amungkangu iite madorongnga apa apan uatuřruta su apulu-Ne. ¹⁵Ana waugu iite masingkata manungku Itou maddaringikka siite amungkangu iite madorongnga Sitou, ne iite masingkata lai manungku Itou nangonggolu apa apan radoronganni ite Sitou.

¹⁶Amungkangu iamiu naasilo sangkatou sansuřlungnga taumata n Sařrani ma'ola'a rosa apan tawe maaola'a taumata udde awuřianu wiakka tutune wuřru saran mařannu-řannu, řinone iamiu umařiomanna su Mawu Ruata; ne Mawu Ruata sarun mangonggolu wiakka udde sitou. Indi matatařrino simangitou apan rosane tawe maawuři m wiakki mangitou udde. Arawe pia lai rosa apan maawuři m wiakka udde su taumata. Su olangnge udde ia'u tawe mabbisara manungku iamiu řinone umařiomanna su Mawu Ruata. ¹⁷Anambo n inolaanna apan nassařa uddewe rosa, arawe pia rosa apan tawe maaola'a taumata awuřianu wiakka tutune wuřru saran mařannu-řannu udde.

¹⁸Iite masingkata manungku anambo n taumata apan suete naola'a ařařrana'u Mawu Ruata, tawe sidutu ma'ola'a rosa, ana waugu Ana'u Mawu Ruata uasirungnga sitou, wuřru i Lařeo tawe mapa'ola'a apa-apa sitou.

¹⁹Iite masingkata manungku iite pussa'a Mawu Ruata, salaiwe ahe-wallu runia indi su ařunggu tařrino ng Kařařeo.

²⁰Iite masingkata manungku Ana'u Mawu Ruata suete nirumanta wuřru suete nangonggolu pasasunna siite, tadea'u iite maailařa Mawu Ruata apan nařrino. Iite mabbiakka uaaukka ringannu Mawu Ruata apan nařrino wuřru mabbiakka uaaukka ringannu Anang-Nge Yesus Kristus. Ete indi Mawu Ruata apan nařrino, wuřru ete indi wiakka tutune wuřru saran mařannu-řannu.

²¹Manga ařařrana'u, paaraua'e watanganni amiu wuassu ařawo'u paařuanna!

SURATTI YOHANES

ARUANE

WISARA TALAANE

Suratti Yohanes Aruane indi niwoŕŕetu "piaŕŕa'u jamaatta" su "Inangnga apan nipile Mawu Ruata" wuŕŕu su manga aŕaŕŕanangge apan arangnguanne. Asinungka pandumannu wisara "Inangnga wuŕŕu aŕaŕŕanangge" eteudde sambau jamaatta wuŕŕu manga anggotane.

Sulaŕummu suranne apan maatta indi mamamoŕŕetu suratta indi madorongnga darua inolaanna su mabbawasane. Paarorone tadea'u imangitou mandangngu sangkatou ringannu waine. Aruane, tadea'u imangitou paatehamma su saruannu manga huru awusu wuŕŕu manga aŕaŕŕa'u huru udde.

Laloŕŕone

Panattaŕŕanne	1-3
Hunane darangngu	4-6
lapaanaungnga su ola'u manga aŕaŕŕa'a apan saŕa	7-11
Panginsueanne	12-13

1 Su Inangnga apan suete nipile Mawu Ruata, wuṛṛu su manga aḷaṛṛana'u Inangnga. Suratta indi wuassia'u, piarra'u jamaatta apan atonna-tonna marangngu siamiu. Waḷine tumba'u ia'u, arawe anambo n taumata apan maailaḷa Mawu Ruata apan naṛṛino, marangngu siamiu lai. ²Ana waugu Mawu Ruata uatana'a sulaḷummu naungngi ite, wuṛṛu sidutu uatana'a ringanni ite saran maḷannu-ḷannu.

³Antimanna iite onggolannu aḷamatta, aakkana wuṛṛu paddarame wuassu Mawu Ruata Iamangnga, wuṛṛu Yesus Kristus Ana'u Iamangnga udde. Antimanna sarangkanambone udde tatahuananni ite ringannu naungnga apan matuḷida wuṛṛu ringannu darangngu.

Atatuḷidda wuṛṛu darangngu

⁴Ia'u lembon lulluassa napawe naasingkata manungku pia aḷaṛṛana'u Inangnga apan mabbiakka tuttuṛṛuta aḷaṛṛa'u Mawu Ruata, ere lai suete nirolokku Mawu Ruata Iamangnga siite. ⁵Ana waugu udde, Inangku, ia'u sumaḷande tadea'u iite sarangkanambone uararangngu. Apa ta'u iwabbaḷo indi waḷine sambau tita apan wakku; tita indi suete nionggolla siite ro'e n iite nanattakka mangngimanna. ⁶Mandangngu atappasanne mabbiakka tuttuṛṛuta manga parenta Mawu Ruata. Wuṛṛu manga parenta apan suete niaringiṛṛani amiu ro'e n paarorone eteudde manungku iamiu rinone mabbiakka uararangngu sangkatou ringannu sangkatou.

⁷Manambo taṛṛa wahia nassaḷiawukke su ahewallu runia. Imangitou eteudde manga taumata apan tawe manga'u manungku Yesus Kristus nirumanta su runia indi naola'a sangkatou taumata. Taumata ereudde uddewe taṛṛa wahia, wuṛṛu Seetti Kristus. ⁸Ana waugu udde, paariagaite arie ma'oma n sara iamiu awuḷiannu apa apan suete nionggoli ami siamiu. Paddea'e tadea'u iamiu manengkamma laḷantake wuassu Mawu Ruata.

⁹Taumata apan tawe uaaggasa aḷaṛṛa'i Kristus, arawe sinumewada wuassu apa apan niarra'i Kristus, taumata udde tawe maatuahanna Mawu Ruata. Taumata apan sidutu uatundeeta su aḷaṛṛa'i Kristus, atappasanne uatahuanna Mawu Ruata Iamangnga aroddi lai Ana'a. ¹⁰Ana waugu udde, amungkangu pia taumata ruṃanta wuṛṛu mabatti'a siamiu aḷaṛṛa'a apan tawe niarra'i Kristus, arie manarimmattu taumata udde sulaḷummu waḷenu ara'e mattabea sitou. ¹¹Ana waugu taumata apan mattabea su taumata ereudde suadio'a lai itou ma'ola'a aḷaḷe ringannu taumata udde.

Manga wisara panginsueanne

¹²Ta'e manambo atonna apan ta'u iwaŋo siamiu, arawe pendamanna apianne tawe sulaŋummu suratta. Ia'u mangantimma wotongnge maatembo wuŋru maggahato ng kamiu, tadea'u naungngi ite atonna-tonna lulluassa.

¹³Manga aŋaŋrana'a wuassu tuŋrangi Inangnga wawine apan nipile Mawu Ruata lai, napaapiddu tabea su Inangnga.

SURATTI YOHANES

ATALLUNE

WISARA TALAANE

Suratti Yohanes Atallune indi niwoꝛretu sangkatou "piaꝛra'u jamaatta" aranne Gayus. Mamamoꝛretu suratta indi maddalo si Gayus ana waugu sumbalane su mianga taumata n Saꝛꝛani waine. Itou lai napaanaungnga si Gayus su ola'u sangkatou esakka aranne Diotrefes.

Laꝛoꝛrone

Panattaꝛꝛanne	1-4
Gayus niraloanna	5-8
Diotrefes niapaasaꝛa	9-10
Demetrius niraloanna	11-12
Panginsueanne	13-15

1 Turřanga Gayus apan arangnguanna!

Ia'u piařra'u jamaatta, apan atonna-tonna mandangnu si'o, ²u'aļiomanna tadea'u antimanna turřanga tawe auranganne wuřru sarangkanambone mapia-pia si'o, ere lai řimuudde mapia-pia lai. ³Ia'u lulluassa tassuļungge, su tempo manga pira turřanga Sařrani na'oma wuřru nabbatti'a sia'u manungku aroddi atuřrune turřanga su Mawu Ruata apan su řinone udde, ana waugu atonna turřanga wotongge sidutu mabbiakka tuttuřruta aļařra'u Mawu Ruata. ⁴Taweddu apan lembon maaluassa naungku, wuassu ia'u maaringikka manungku manga aļařrana'u mabbiakka tuttuřruta aļařra'u Mawu Ruata.

Gayus niraloanna

⁵Turřangu! Turřanga aroddi atuřrune sulaļummu manara apan a'olaanna turřanga su manga hawe labbisa taumata n Sařrani; ewe'e lai manga taumata n Sařrani apan taambe niasingkatannu lai, a'imbeanni amiu. ⁶Imangitou suete namasingkata su jamaatta apan pammanaranni ami su ola'u darangngunu udde. Tuļunga'a imangitou tadea'u wotongge maassu amatanni mangitou wuřru ringannu aroddi maaluassa naunggu Mawu Ruata, ⁷ana waugu sulaļummu amatanna mabatti'u ola'i Kristus, imangitou tawe naasengkamma sasumbala sara ng kadio'a wuassu manga taumata apan tawe maallaļa Mawu Ruata. ⁸Ana waugu udde, iite manga taumata n Sařrani řinone mantuļungngu manga turřangi ite apan labbisa taumata n Sařrani ereudde, tadea'u iite wotongge su sambau sulaļummu manara mangitou mabatti'u aļařra'a su řinone wuassu Mawu Ruata.

Diotrefes wuřru Demetrius

⁹Ia'u suete namořretu suratta apan maautta su jamaatta, arawe Diotrefes apan maapulu maola'a piařra'u jamaatta, maddiri tumuřrutta sia'u. ¹⁰Napawe ia'u rumanta, ia'u sarun mamasingkatu aļawo'u inolaanne, eteudde inolaanna apan laļeo wuřru awusu apan niwisara n tou su ola'i ami! Arawe sarangkanambone udde taambe nasuungnga maola'a hunane. Su tempo manga hawe labissa taumata n Sařrani udde nirumanta, itou maddiri manarimmatti mangitou. Ewe'e lai itou nangingadu manga taumata apan maapulu manarimmattu manga turřanga udde, wuřru itou nandolokku manga taumata udde sumabbanga wuassu jamaatta!

¹¹Tuṛṛanga apan arangnguanna, ariewe mattanno apa apan laḷeo udde. Pattannote apa apan mapia. Taumata apan inolaanne mapia uddewe pussa'a Mawu Ruata. Wuṛṛu taumata inolaanne laḷeo taambe naaillaḷa Mawu Ruata.

¹²Anambo n taumata maddalo si Demetrius. Ewe'e Mawu Ruata lai maddalo sitou. Iamiu lai maddalo sitou wuṛṛu tuṛṛanga masingkata manungku apa apan iwabbatti'i ami udde apangimananna.

Tabea ainsue n suratta

¹³Ta'e manambo atonna apan ta'u iwaḷo siamiu, arawe ia'u mam-mendama mappianne arie sulaḷummu suratta. ¹⁴Ia'u mangantimma lai tate maḷannu iite massomba, wuṛṛu iite wotongge maggahatto suadio'a.

¹⁵Antimanna Mawu Ruata mangaḷamatta tuṛṛanga.

Manga hawenu su tampa'u indi nandoho n tabea lai sio. Waḷoa'a tabea'u su anambo n manga hawe ng kite sambau-sambau.

SURATTI YUDAS

WISARA TAĀANE

Suratti Yudas indi niwoṛṛeta hunane iapaanaungnga su mabbawasane tadea'u maantaga su saruannu manga huru awusu apan mannago n watanganne Saṛṛani. Sulaḷummu suratta apan maautta indi apan laḷoṛṛone ere lai suratti Petrus aruane, mamamoṛṛene mangngonggolu sasasa su mabbawasane tadea'u sidutu mammanara maddea'a pangangimanna.

Laḷoṛṛone

Panattaṛṛante	1-2
Pallaḷagu, aḷaṛṛa'a wuṛṛu ola'u manga huru awusu	3-16
Tatantiro tadea'u sidutu mangngimanna	17-23
Aaḷiomanna daralo	24-25

1 Manga turrangnga apan suete niwagoanna wurru lembon arangnguannu Mawu Ruata lamangnga, see rariaganna ana waugu Mawu Yesus Kristus. Naola'a allangngi Yesus Kristus, ia'u - Yudas - turrangngi Yakobus, ²mangngantimma:

Antimanna Mawu Ruata mangonggolu alamatta, darangngu wurru paddarame siamiu ringannu manambo-nambo.

Manga huru awusu

³Manga turrangnga apan arangnguanna! Ia'u atonna-tonna pia pandumanna mamorrettu suratta siamiu su ola'u asalamatta apan suete niapendamanni ite suadio'a. Arawe orassa indi ia'u pia pandumma mangarra'a siamiu ringannu suratta indi tadea'u iamiu sidutu mammannara maddea'a pangangimanna apan paassate nionggolu Mawu Ruata ma'oma n sara malannu-lannu su alarranang-Nge. ⁴Ana waugu ringannu niawagananni ite, pia manga taumata waine apan sinumutta naijala'o'a su pattangnganni ite. Imangitou manga taumata laleo, apan mam-malolongngu watti'a su ola'u darangngu m Mawu Ruata ng kite, tadea'u imangitou pia tempo mapaasabangngu apulu naungngi mangitou laleo. Wurru imangitou manola'u Mawu Yesus Kristus, eteudde sangkatou Tembonanne wurru Mawu ng kite. Roe n alamonane ruumanni mangitou suete niapaasingkata sulaummu Wuke Susi.

⁵Sarangkanambone udde iamiu masingkate. Arawe ia'u maapulu mapaanaungngi amiu su ola'u ereapa Mawu manalamatta pabbawalagu Israel wuassu leta'u Mesir, arawe wua udde namate manga taumata apan tawe mangngimanna su wallatti mangitou. ⁶Paanaunge lai manga mala'ekatta apan nalliu passarannu tarfino mangitou, naoman sara nanantangu tampa atatanaanni mangitou. Mawu Ruata namantungu manga mala'ekatta udde ringannu rate apan tawe mawu'a, sulaummu tampa apan maranduma su alungngu runia. Poiaroddi imangitou sidutu tataaranganna ma'oma n sara imangitou irru'umanna su Allo apan wahewalla udde. ⁷Naunge'o lai soa Sodom wurru Gomora wurru manga soa maranine, apan inolaannu tumanangnge ere lai inolaannu manga mala'ekatta udde. Imangitou sussandaga wurru ma'ola'a alaleo, na'oma n sara imangitou niramme sulaummu putungnga apan tawe panginsueanne, tadea'u maola'a sambau pannanaunganna su anambo n taumata.

⁸Aroddi lai manga taumata udde maringiddu baljawa na'oma n sara imangitou ma'ola'a rosa su wadangngi mangitou sassane. Imangitou mangngadio'a tarfino Mawu Ruata wurru mangngaluandaga manga inolaannu Mawu apan mawantuga su surga. ⁹Mikhael sassane, apan naola'a

tembonannu manga malaekatta, tawe pallaḡagu ereudde. Su tempo itou natatiakku Setanna sulaḡummu pabbawawuḡo su ola'u isai apan naasomba winaḡunanni Musa, Mikhael tawe warḡani makkuumannu Setanna ringannu wisara ipangngadio'a. Mikhael tumba'u nabbisara, "Mawu sarun mamuḡo si'o"! ¹⁰Arawe ringannu manga aaḡuandaga, manga taumata udde namangalo aḡawo'u apa apan tawe asunnanni mangitou. Imangitou nasuḡunga ere manga winatangnga apan tawe riḡgide, apan maasingkatu inolaanne wuassu nianaramanne. Arawe ete inolaanna udde naaḡaḡeo simangitou. ¹¹Nasilakate imangitou! Imangitou suete niu-mamatta su laḡanni Kain. Tadea'u maasomba roitta, imangitou namontollu wadangge su inolaanna laḡeo ere Bileam. Wuḡḡu imangitou lai nipate ana waugu nilumawanna ere Korah. ¹²Su tempo iamiu na'ola'a andeangnga, pallaḡagu manga taumata udde maarantinna su wallatti amiu. Ana waugu imangitou u'anna manambo-nambo ringannu tawe masili, wuḡḡu tumba'u marḡingiddu watanganne sassane. Imangitou naaḡihida winabbawa iattalla'u anginna, arawe tawe manguranna. Imangitou lai ere alu apan tawe mabbua salaiwe su tempo m pabbawua; manga alu apan suete niabutta ramunne wuḡḡu natete abbi. ¹³Ere lai lua'a maḡaraga su tahaḡoangnga lullupa, aroddi lai imangitou lullupa manga inolaanna apan maasili. Imangitou ere lai manga anumpitanna apan lullallele apan suete nisaddia Mawu Ruata tampane sulaḡummu araranduma apan masaddatta ma'oma n sara maḡannu-ḡannu.

¹⁴Henokh, pangangawanna appitune wuassi Adam, dorone suete namasingkatu ola'u manga taumata udde. Henokh nabbisara, "Pa'ellega, Mawu sarun rumanta ringannu su riwune mala'ekan-Ne apan susi, ¹⁵ana waugu makkuumannu anambo n taumata. Mawu sarun makkuumannu manga taumata laḡeo ana waugu manga inolaanni mangitou apan tawe matataḡḡino. Wuḡḡu Itou sarun makkuumannu taumata marosa wuḡḡu laḡeo, ana waugu anambo n manga wisarane apan ipangngaḡuandaga.

¹⁶Manga taumata udde sidutu sussungkuta wuḡḡu mapaasaḡa n taumata waine. Imangitou mabbiakka tuttuḡḡuta manga apulu naungngi mangitou apan marosa. Imangitou taḡḡa watti'u watanganni mangitou sassane, wuḡḡu massaḡo'u taumata ana see maasomba auntunganna."

Iappanaungnga wuḡḡu ipanantiro

¹⁷Arawe tuḡḡangu apan arangnguanna, paanaunge apa apan dorone niwisara manga rasulu Mawu ng kite Yesus Kristus. ¹⁸Imangitou namasingkata paarorone siamiu manungku maddani n allo m panginsueanne sarun rumanta manga taumata apan sarun mangaḡuandaga siamiu, ete-udde manga taumata apan mabbiakka tuttuḡḡuta apulu mangitou apan

marosa. ¹⁹Ete imangitou indi apan mapaaranta m patatiakka. Imangitou tawe tatařřinoannu Għarřaho Mawu Ruata, ewe'e tatařřinoannu pal-lařagu n runia. ²⁰Arawe iamiu manga turřangku, padduřianete sidutu wiakku sulařummu pangangimannu si Yesus Kristus. Pangangimannu udde lembon susi. Tantařanna udde aařiomante ringannu Tarřino Għarřaho Mawu Ruata, ²¹wurřu pabbiakke sidutu sulařummu daranggu Mawu Ruata tantařanna iamiu ualařřado ařamatti Yesus Kristus Mawu ng kite, apan sarun mangongogolu wiakka tutune wurřu saran mařannu-řannu siamiu.

²²Matatařřino su manga taumata apan naungnge niuমাঁিৱু, řinone iamiu mappa'ellegu paa'akkana. ²³Wořengke taumata udde paasab-banga'a wuassu lařummu putungga ana see imangitou masařamatta. Su saruannu manga taumata waine řinone iamiu mapaařiatta'u daranggu rarundinganannu apendama matta'utta, arawe arantinte n sara lai laubbi mangitou apan napene n luhudu ařařeo mangitou apan marosa.

Aařiomanna daralo

²⁴Mawu Ruata, apan wotongnge mallu'adda siamiu ana see tawe manawo, wurřu wotongnge mangapiddu su araratuan-Ne apan mawantuga ringannu ařařuassa apan tawe urangge, ²⁵tumba'u Itou sassane Mawu Ruata, Punnu Sařamatti ite sulařummu Yesus Kristus Mawu ng kite. Ete Itou Mawu Ruata apan mawantuga, ahewařanne, pia tarřino, wurřu pia sařřaungge ro'e n ařamonane ma'oma n sara orasa indi wurřu saran mařannu-řannu! Amin.

SONDAPPA SI YOHANES

WISARA TAŁAANE

Sondappa Si Yohanes indi niwořřeta su tempo n taumata n Sařřani isa-ssingada wuřřu sassansaranna ana waugu mangngimanna Mawu Yesu Kristus sangkatou Mawu. Pandumannu mamamořřene paarorone ete-udde mangngonggolu antimma see atatohassa su mabbawasane, wuřřu lai ipannasa simangitou tadea'u sidutu mangngimanna su tempo sassan-saranna wuřřu isassingada.

Lałořřo m wuke indi su wageangnge ahewałanne natahia wuassu manga pira arariaddi n sondappa wuřřu aellega apan niwatti'a ringannu mappaattu sasumandinga apan atappasanne wotongnge asunnannu manga taumata n Sařřani su tempo udde, arawe masahadda sunnannu manga taumata waine. Punnu řingidda apan iapaasingkatta sulałummu wuke indi masokka isułe sulałummu aławo'u hati n inolaanna ringannu aławo'u wageangngu aellega. Salaiwe niasombanganna manambo addapatta apan uapapařřala su ola'u pananała'a lałořřo n wuke indi, arawe lałořřo n řingiranne masemakka, eteudde sulałummi Kristus, Mawu Ruata panginsueanne sarun mallimbuakka anambo n seen-Ne, nasutta lai Setanna. Wuřřu amungkangu auntunganna udde inasombangante, Mawu Ruata sarun manantilu surga apan wakku wuřřu runia apan wakku maola'a sambau lałantake su ałarřanang-Nge apan matuřřuta.

Lalořřone

Panattařřanne	1:1-8
Aellega paarorone wuřřu manga suratta su pitu jamaatta	1:9-3:22
Wuke lałulułunanna wuřřu pitu segele	4:1-8:1
Pitu trompeta	8:2-11:19
Naga wuřřu winatangnga rua m bua	12:1-13:18
Aławo'u hati n aellega	14:1-15:8
Pitu asasa'u Mawu Ruata	16:1-21

Ananawo m Babel, papate n winatangnga, nabi tarra	
wahia wurru Setanna	17:1-20:10
Ruumanna panginsueanne	20:11-15
Surga waku, runia waku, Yerusalem waku	21:1-22:5
Panginsueanne	22:6-21

1 Laŕoŕro n wuke indi mabatti'a su ola'u apa apan suete niapaaliatta'u Mawu Yesus su ola'u manga arariaddianna apan sarun mariaddi. Mawu Ruata namasingkata Mawu Yesus tadea'u Itou mamasingkata su manga allangngu Mawu Ruata, apa apan řinone maľihakke mariaddi. Kristus nandolokku mala'ekan-Ne si Yohanes, allang-Nge, iapapasingkatu manga arariaddianna udde sitou. ²Ne Yohanes nabbati'e n sarangkanambone apan niasilianne udde; wuřru ete indi watti'i tou su ola'u tanata n Mawu Ruata apan tinohassu Mawu Yesus Kristus wuassu tati-lane. ³Laľumanna'a su taumata apan mabbasa wuřru maddaringikka watti'u papatta m wuke indi see tuttuřruta apa apan uawořretta sulaľummu wuke indi. Ana waugu tate maľannu lai sarangkanambone indi sarun mariaddi.

Tabea su pitu jamaatta

⁴Manga tuřranga apan uatana'a su pitu jamaatta su leta'u Asia! Ia'u Yohanes, mangngantimma iamiu onngoľannu aľamatta wuřru aľaľuassa wuassu Mawu Ruata - eteudde Itou apan nirumanta, apan nirumantate wuřru apan nirumanta sarangkaľo'engnge - wuřru lai wuassu pitu ghařraho apan uatana'a su saruannu addera n araratuannu Mawu Ruata, ⁵wuřru wuassi Yesus Kristus, mattatiala apan matuřruta. Ete Itou apan paarorone niapaawiakka apia wuassu papate wuřru ete Itou ahebbalanne uaparenta manga ratu n runia.


Mawu Yesus mandangngu siite, wuřru ringannu papate-Ne, Itou napaaliu ng kite wuassu manga rosa ng kite, ⁶wuřru nandiadi siite sambau pabbawalagu manga imam, apan mangngimbe Mawu Ruata, lamang-Nge. Mawu Yesus Kristus eteudde awantuhanne wuřru uatařrino sarangkaľo'engnge. Amin!

⁷Pa'ellega Itou rumanta sulaľummu winabbawa! Anambo n taumata sarun ma'ellega Sitou, nasutta imangitou lai apan nangusu'a Sitou. Anambo n pabbawalaga su runia sarun lumaľo n Tou. Ore, Atonna! Amin!

⁸"Ete Ia'u apan paarorone wuřru pangodusanne," wisara n Mawu Ruata, apan nirumanta, apan nirumantate, wuřru nirumanta sarangkaľo'engnge, Apan Lembon Tařrino.

Aellega su ola'i Kristus

⁹Ia'u Yohanes, tuřrangu apan maľuassa wuřru mařsusa suadio'a ringanni amiu sulaľummu asasusa apan nařria'a su mallaľařrenggenni



Tarḡanusa m Patmos (1:9)


Kristus. Iite masabare matatarḡanga ana waugu pabbawalaga pussa'a-Ne. Ia'u niramime su Patmos ana waugu ia'u mammasingkatu tanata Mawu Ruata, apan tinohassu Mawu Yesus sulaḡummu tiala-Ne. ¹⁰Su allo Mawu, ia'u niasuttannu Gharḡaho Mawu Ruata, see ia'u naaringikka tingikka apan ma'ikkatta - nassuḡunggu tingikku trompeta - mabbisara su liu'u. ¹¹Tingikka udde nabbisara, "Woḡḡetta'a apa apan niasiloannu, wuḡḡu ongoḡa'a wuke udde su pitu jamaatta apan isassago indi: Efesus, Smirna, Pergamus, Tiatira, Sardis, Filadelfia, wuḡḡu Laodikia."

¹²Ia'u nanaile watukku liudde ma'ellega isai udde mabbisara sia'u. See ia'u naasilo pitu m bua ledda n soḡo apan niola'a wuassu wuḡawanna. ¹³Su pattanggannu manga ledda n soḡo udde uarisikka sangkatou apan niasiloanna naaḡihidda taumata. Itou uaḡuḡḡe n jubah alo'engnge na'oma n sara ledda. Su sabba-Nge, Itou uapaattu laḡindumu ro'o wuassu wuḡawanna. ¹⁴Utang-Nge mawira ere wambuḡu n domba, awirane ere sangarena. Mata-Ne luḡḡenggama ere putungnga; ¹⁵ledda-Ne luḡḡena naaḡihida witu'a ittattambuna. Tingik-Ke naaḡihidda tingikku ua'e mappampassa apan wahewalla. ¹⁶Lima uanan-Ne uaagassa anum-pitanna pitu, wuḡḡu wuassu moḡḡo-Nge sinumabangnga haḡele maḡḡoro sammata, apan ḡoḡḡone rua m ba'a. Hati-Ne lullansiangnga naaḡihidda matannallo su allo allattune. ¹⁷Su tempo ia'u naasilo, ia'u nassumaga su saruan-Ne ere taumata nate. Arawe Itou namita n lima-Ne aikkatanna sia'u see nabbisara, "Arie paata'utta! Ete Ia'u apan paarorone wuḡḡu pangudusanne. ¹⁸Ete Ia'u Itou apan wiakka! Ia'u natete, arawe pa'elege, Ia'u wiakka saran maḡannu-ḡannu. Ia'u uatarḡino papate, wuḡḡu su wowo n runia n taumata nate. ¹⁹Ana waugu udde woḡḡetta'a manga ino-

laanna apan niasiloannu, eteudde manga inolaanna apan sarun mariaddi oiaassa indi wuṛṛu manga inolaanna apan sarun mariaddi saḷimmurine. ²⁰Ete indi addapinga wuassu anumpitanna pitu apan niasiloannu su lima uanang-Ku, wuṛṛu wuassu pitu ledda n soḷo wuḷawanna udde: Anumpitanna pitu udde eteudde manga mala'ekatta su pitu jamaatta, wuṛṛu pitu ledda n soḷo udde eteudde pitu jamaatta udde.”

Tanata su Efesus

2 ”Su mala'ekattu jamaatta su Efesus, woṛṛetta'a arendi: Ete indi tanata wuassi Tou apan uaagassa anumpitanna pitu su lima uanan-Ne, wuṛṛu u'amatta su wallatu pitu ledda n soḷo wuḷawanna udde. ²Ia'u



Pitu ledda n soḷo wuḷawanna (2:1)

masingkatu apa apan a'olaanni amiu: Iamiu mammanara maṛṛimadda wuṛṛu iamiu matammuda atonna. Ia'u masingkata manungku iamiu tawe mangonggolu naungnga su taumata laḷeo. Wuṛṛu manga taumata mangnga'u watanganne rasul, wutte'e waḷine, suete niannamanni amiu wuṛṛu niasombanganni amiu, manungku imangitou taṛṛa awusu. ³Iamiu masabare wuṛṛu iamiu uatataṛṛanga ana waugu Ia'u, wuṛṛu naungngi amiu tawe maadio'a. ⁴Arawe indi sasimba-U siamiu: Iamiu tate mandangngu Sia'u ere rorone. ⁵Ana waugu udde, paanaungete tumanite n marau iamiu nanawo! Awaḷute wuassu manga rosanu, wuṛṛu pa'ola'e ere inolaanni amiu rorone. Amungkangu tawe, ne Ia'u sarun rumanta ringanni amiu wuṛṛu manawutta ledda n soḷonu udde wuassu tampane. ⁶Arawe

pia sambau apapia siamiu, eteudde: Iamiu maddantinu pallaḷagu ma'laḷarṅgenni Nikolaus apan iaaranting-Ku lai.

⁷Isai-sai apan maaringikka, ṛinone manutukka apa apan iapaasingkatu Ghaṛṛaho Mawu Ruata su manga jamaatta!

Imangitou apan naauntunga, sarun Ta'u iwala umanna wua wuassu punnu pabbawiakka apan tuttuwo su Waillu Mawu Ruata."

Tanata su Smirna

⁸"Su mala'ekattu jamaatta su Smirna, woṛṛetta'a arendi: Ete indi tanata wuassi Tou apan paarorone wuṛṛu pangudusanne – apan nate tete wuṛṛu nabbiakka apia. ⁹Ia'u masingkatu manga asasusanu; Ia'u masingkata iamiu asiangnga arawe wutte'e iamiu ala! Ia'u masingkatu manga aaluandaga apan ipangaḷuandaga siamiu wuassu manga taumata apan mangnga'u ririne Yahudi, wutte'e waḷine; ete imangitou udde pabbawalagu Setanna! ¹⁰Arie matta'uttu asasusa apan Tate maḷannu lai apendamanni amiu. Paanaunge, Setanna sarun mantarṛo n sangkawa-geanganna wuassi amiu sulaḷummu tutupanna, ana waugu ipamono'a siamiu. Iamiu sarun matatarṛanga mapuḷo allo aḷannune. Ṛinone iamiu matuṛṛuta Sia'u ma'oma n sara mate, ne Ia'u sarun mangonggola siamiu wiakka tutune wuṛṛu saran maḷannu-ḷannu apan maola'a sambau laḷantaku naauntunga.

¹¹Isai-sai apan wotongge maaringikka, ṛinone manutukka apa apan iapaasingkatu Ghaṛṛaho Mawu Ruata su manga jamaatta.

Imangitou apan naauntunga, saran paassa tawe matatarṛanga papate aruane."

Tanata su Pergamus

¹²"Su mala'ekattu jamaatta su Pergamus, woṛṛetta'a arendi: Ete indi tanata wuassi Tou apan uaagasa haḷele maṛṛoro apan ṛorone rua m ba'a. ¹³Ia'u masingkata suapa iamiu uatana'a, eteudde su araratuannu Setanna. Iamiu matuṛṛuta Sia'u. Ewe'e su tempo Antipas, matatiala-U apan matuṛṛura udde, nipate su saruannu su tampa n Setanna, iamiu tawe naddandila manungku iamiu mangngimanna Sia'u. ¹⁴Salaiwe aroddi pia manga pira inolaani amiu apan tawe maaḷuassa Sia'u: Pia sangkadoanna taumata su wallatti amiu apan mangngimanna aḷarṛa'i Bileam. Bileam nangaṛṛa'a si Balak ereapa mangema'u taumata n Israel su rosa; ringannu nassaḷo'i mangitou umanna anna apan suete nionggolla su paaḷuanna wuṛṛu na'inolaanna sussandaga. ¹⁵Aroddi lai su wallatti amiu

ġia manga taumata apan uaaggasa aġarġa' u manga mallajarġengenni Nikaus. ¹⁶Ana waugu udde, awaġute wuassu manga rosanu! Amungkangu tawe, tate maġannu lai Ia' u sarun rumanta ringanni amiu wuġġu maġangalo manga taumata udde ringannu haġele apan uaraddo su moġong-Ku.

¹⁷Isai-sai apan maaringikka, ġinone manutukka apa apan iapaasingkatu Gharġaho Mawu Ruata su manga jamaatta!

Imangitou apan naauntunga, sarun Ta' u iwala umanna manna apan uawuni, wuġġu sambau-sambau sarun manengkama wuassia' u sambau watu mawira. Su watu udde uawoġretta sambau aranna wakku, apan awagananni sai-sai, tumba' u taumata apan nanengkamma."

Tanata su Tiatira

¹⁸"Su mala'ekattu jamaatta su Tiatira, woġretta' a arendi:

Ete indi tanata wuassu Ana' u Mawu Ruata, apan mata-Ne lukkeng-gama naaġihida putungga, wuġġu ledda-Ne lukkena naaġihidda witu' a nitambuna. ¹⁹Ia' u masingkatu anambo n apa apan a'olaanni amiu - Ia' u masingkata iamiu mandangu sansuġunggu, iamiu matuġġuta, iamiu mammanara, wuġġu iamiu maaddana matataġġanga. Ia' u masingkata iamiu orassa indi mammanara mannamboanna wuassu paarorone. ²⁰Arawe indi sasimba-U siamiu: Iamiu nangonggolu naungga si Izebel, wawine apan mangnga' u watanganne daroloġġannu Mawu Ruata udde. Manambote manga allang-Ku niawusuanne wuġġu niarġanna sussandaga wuġġu u'anna anna apan suete pinassubba paaġuanna. ²¹Suete Ta' u niongoġġannu tempone itou mawaġu wuassu manga rosane, arawe itou maddiri mamallosu inolaanne sussandaga udde. ²²Paanaungete! Ia' u sarun mangema' i tou ma'oma n sara mataddu' a su tampa atatiġġanne. Isudde itou wuġġu manga taumata apan sussandaga ringanni tou sarun matataġġanga atonna. Sarangkanambone udde Ta' u olaanna orassa indi - tabbene'e amungkangu imangitou mangado manga inolaanna apan laġeo su sambau ringanni tou. ²³Manga mallajarġengenne sarun Ta' u pateanna lai tadea' u anambo n jamaatta maatutukka manungku ete Ia' u, Itou apan masingkatu ringiranna wuġġu naunggu taumata. Iamiu sarun Ta' u waġisanna tumuġġuttu inolaannu sangkatou-sangkatou.

²⁴Arawe iamiu waine su Tiatira apan maddiri tumuġġutta aġarġa' a laġeo udde, wuġġu maddiri mangurumma aġarġa' u Setanna. Ia' u mabbisara manungku Ia' u tawe manamba winabbawanu apan mawak-kata. ²⁵Arawe ma'oma n sara Ia' u rumanta apia, ġinone iamiu sidutu tuttuġġuta apa apan suete niatahuananni amiu. ²⁶⁻²⁷Imangitou apan naauntunga, wuġġu saran pangudusanne ma'ola' a apa ipaapulu-U, sarun

Ta'u onngoŋannu taŋŋino apan uasuŋungnga ere Ta'u sinengkama wuassu lamang-Ku. Imangitou sarun manengkama taŋŋino wuassia-U ipama-renta manga pabbawalaga ringannu ta'inna atta'a, wuŋŋu ipakkimuna'a manga pabbawalaga udde ere urinna leta'a. ²⁸Imangitou sarun manengkama anumpitannu aŋŋusuallo wuassia-U.

²⁹Isai-sai wotongnge maaringikka ŋinone manutukka apa apan iwabbisara Ghaŋŋraho Mawu Ruata su manga jamaatta!"

Tanata su Sardis

3 "Su mala'ekattu jamaatta su Sardis, woŋŋetta'a arendi: Ete indi tanata wuassi Tou apan uatahuanna pitu ghaŋŋraho wuassu Mawu Ruata wuŋŋu anumpitanna pitu udde. Ia'u masingkata apa apan a'olaanni amiu. Unni Tou iamiu wiakka, wutte'e nate! ²Ana waugu udde apu'ote, wuŋŋu panohasse apa apan ta'e pia siamiu tantaŋanna udde taambe nate abbi. Ana waugu Ia'u naaratingnga manungku inolaanni amiu, taambe saran sambau apan nasuungnga su saruannu Mawu Ruata. ³Nariaddi, naungete apia apa apan suete niaŋŋa'a siamiu rorone wuŋŋu apa apan suete niaringiŋŋani amiu. Ola'e udde wuŋŋu awaŋute wuassu manga rosanu. Amungkangu iamiu tawe maatimpu'o, Ia'u sarun rumanta ringanni amiu ere sangkatou taŋŋa ta'o; wuŋŋu iamiu wagga tingngerate tempone Ia'u rumanta. ⁴Arawe su pattangani amiu su Sardis ta'e pia taumata uariaga tadea'u laungnge sidutu waresi. Imangitou udde sarun umamatta suadio'a ringang-Ku ringannu uapedettu mawira, ana waugu imangitou su ŋinone mappaattu udde. ⁵Simangitou apan naauntunga sarun luŋŋeannu jubah mawira. Aranni mangitou tawe Ta'u pappasanna wuassu Wuke n Taumata Wiakka. Wuŋŋu su saruannu lamang-Ku wuŋŋu manga mala'ekan-Ne Ia'u sarun manga'u manungku imangitou udde pussa'a-U.

⁶Isai-sai wotongnge maaringikka, ŋinone manutukka apa apan nia-paasingkatu Ghaŋŋraho Mawu Ruata su manga jamaatta!"

Tanata su Filadelfia

⁷"Su mala'ekattu jamaatta su Filadelfia, woŋŋetta'a arendi:

Ete indi tanata wuassi Tou apan susi wuŋŋu tutune. Ete Itou uaaggasa a'unsi apan tatahuananni Daud; amungkangu Itou mamu'a, tawe saran sangkatou wotongnge maŋŋuuda, wuŋŋu amungkangu Itou maŋŋuuda, tawe saran sangkatou wotongnge maawu'a. ⁸Ia'u masingkatu apa a'olaanni amiu. Ia'u masingkata manungku iamiu tawe tuma-

rite n matohassa; iamiu suete tinumuṛṛuta aḷaṛṛa-U wuṛṛu matuṛṛuta Sṇ'u. Siamiu suete Ta'u niwu'a sambau ngara, apan tawe iaṛṛuudi sai-sai lai. ⁹Naungete indi: Manga taumata apan naola'a pabbawalaga Setanna udde, manga taṛṛa awusu apan mangnga'u watanganne Yahudi wutte'e waḷine, sarun Ta'u olaanna ma'oma n sara imangitou ramanta umaḷintudda su saruannu. Wuṛṛu imangitou sarun maasingkata manungku Ia'u marangngu siamiu. ¹⁰Ana waugu iamiu suete tinumuṛṛuta parenta-U tadea'u mangngimanna, Ia'u lai sarun manillumma siamiu wuassu tempo n asasusa apan sarun mariaddi su ahewallu runia. Olangnge udde sarun mariaddi ipamono'a anambo n taumata su runia. ¹¹Ia'u maḷihakke rumanta! Paariagai paapia-pia apa apan tatahuananni amiu, tadea'u tawe saran sangkatou mangarṛo laḷantaku auntungannu. ¹²Taumata apan naa'untunga, sarun Ta'u olaanna ere sambau diṛṛi sulaḷummu Waḷe Susi Mawu Ruata-U, wuṛṛu itou sarun matana'a su tampa udde saran maḷannu-ḷannu. Arannu Mawu Ruata-U, wuṛṛu arannu soa Mawu Ruata-U - eteudde Yerusalem wakku apan sarun umonto'a wuassu surga, wuassu Mawu Ruata-U - sarun Ta'u iwoṛṛeta su wadangu taumata udde. Wuṛṛu lai arang-Ku apan wakku sarun Ta'u iwoṛṛeta su waddange.

¹³Isai-sai wotongnge maaringikka, ṛinone manutukka apa apan nia-paasingkatu Gharaḷaho Mawu Ruata su manga jamaatta!"

Tanata su Laodikia

¹⁴"Su mala'ekattu jamaatta su Laodikia, woṛṛetta'a arendi:

Ete indi tanata wuassu Awantuhanne Amin, Mattatjala apan matammuda wuṛṛu narṛino, punnu aḷawo'u sarannapa apan niola'u Mawu Ruata. ¹⁵Ia'u masingkatu apa a'olaanni amiu; Ia'u masingkata iamiu tawe masunge wuṛṛu lai tawe lai maḷoso. Ṛinone iamiu sambau su wal-latu darua udde! ¹⁶Arawe iamiu ma'ihamma; tawe maḷoso, tawe lai masunge. Ana waugu udde iamiu sarun Ta'u imuta iapaasabanga wuassu laḷummu moṛṛong-Ku. ¹⁷Iamiu mabbisara, 'Iami ala wuṛṛu aḷawo'a mangke pia; iami tawe urangnge apa-apa.' Arawe iamiu wagga aroddi aasiangnge wuṛṛu aroddi maasusa ririnu! Iamiu asiangnga, tantoḷe wuṛṛu wuta. ¹⁸Ana waugu udde Ia'u manantiro siamiu tadea'u mamalli wuḷawanna wuassia-U, eteudde wuḷawanna apan apianne, tadea'u iamiu maola'a ala. Pamallite lai laubba mawira wuassia-U tadea'u iamiu pia peddeta wuṛṛu ipami'unte wadangi amiu apan tantoḷe wuṛṛu maasili. Wuṛṛu pamallite lai undama ipamuṛṛa matanu tadea'u iamiu wotongnge maasilo. ¹⁹Manga taumata apan arangnguang-Ku, ete imangitou apan Ta'u tagguanna wuṛṛu wabbaḷanna. Ana waugu udde

řinone iamiu mařřimadda mammanara, wuřřu awařute wuassu manga rosanu. ²⁰Pa'ellega! Ia'u uarisikka su saruannu ngara wuřřu maneg-kela. Amungkangu pia taumata apan naaringikka tingi-U, wuřřu nanu'a ngara, Ia'u sarun sumutta maisasomba n tou; Ia'u sarun umanna suařio'a ringanni tou wuřřu itou umanna suadio'a ringang-Ku. ²¹Imangitou apan naauntunga, sarun Ta'u iwala uma'ianna su addera n araratuang-Ku su sambau ringang-Ku, ere Ia'u sassane lai suete na'auntunga wuřřu orassa indi ua'ianna suadio'a ringannu Iamang-Ku su addera n araratuang-Ne.

²²Isai-sai wotongge maaringikka, řinone manutukka apa apan nia-paasingkatu Ghařřaho Mawu Ruata su manga jamaatta!"

Pasasubba su surga

4 Wua udde ia'u naasomba aellega lai. Ia'u naasilo sambau ngara nawu'a su surga. Wua udde inaringikka lai tingikka apan paarorone suete nabbisara sia'u ere tingikku trompeta. Tingikka udde nabbisara, "Wette rangante isindi. Ia'u sarun mamasingkata si'o apa apan sarun mariaddi murine." ²Ia'u lapiddu niintařřoannu Ghařřaho Mawu Ruata. See ia'u naasilo su surga pia sambau addera n araratuanna, wuřřu pia sangkatou ua'ianna su addera n araratuanna udde. ³Hati n taumata udde lullansiangnga naařihidda permata baiduri pandan wuřřu permata delima. Sambau randipakka ere zamrud uapařiwutta addera n araratuanna udde.

⁴Sulařummu atokke mařimbulunna apan uapařiwutta addera n araratuanna udde, pia rua m puřo appata addera n araratuanna waine. Isudde ua'ianna rua m puřo appata piařrange apan uapedettu mawira, wuřřu uařuře n araposa wuřawanna. ⁵Wuassu addera n araratuanna udde lukkena semakku sawallo wuřřu sinumabanga tingikku rallu'a mappose. Wuřřu su saruannu addera n araratuanna udde pia pitu sořo lukkeng-gama; eteudde pitu Ghařřaho Mawu Ruata. ⁶Pia lai isudde su saruannu addera n araratuanna sambau apan aellehanna ere tahařoangnga kaca, matilangnga ere kristal.

Uapařiwutta addera n araratuanna, suapan sandiřřane, pia ap-pata riadianna, apan su saruane wuřřu su liudde napene mata. ⁷Riadianna paarorone aellehanna naařihida singa, aruane naařihida sapi esakka. Atallune hatine naařihida hati n taumata. Aiappane aellehanna naařihida manu'a rajawali tantařanna tuttalla'a. ⁸Sire appata riadianna udde, sambau-sambau pia papaidde annuma, wuřřu su ahewallu wadange, wuřřu sulařumme napene mata. Allo řabbi manga riadianna udde tawe illořone mangngantari,

"Susi, susi, susi arannu Mawu, Mawu Ruata Lembon Tarřino;
apan nirumanta, suete nirumanta, wuřru nirumantate
sarangkaļo'engnge."

⁹Sire appata riadianna udde mangngantari antari n daralo, addata wuřru aadiangkamanna Sitou apan ua'ianna su addera n araratuanna udde, eteudde Itou apan wiakka saran maļannu-ļannu. Wuřru su tempo manga riadianna udde mangngantari, ¹⁰sire rua m puļo appata piařrange udde uaruutta su saruannu taumata apan ua'ianna su addera n araratuanna udde, see nassubba Sitou apan wiakka saran maļannu-ļannu. Wua udde imangitou nanuntungngu manga araposa n araratuanni mangitou su saruannu addera n araratuanna udde lapiddu nabbisara,

¹¹"O Mawu, O Mawu Ruata ng kami!

Tumba'u I'o sassane apan wotongnge manengkama daralo,
addata wuřru tarřino.

Ana waugu ete I'o apan na'ola'a sarangkanambone,
wuřru wuassu apulu-Nu lai sarangkanambone udde suete
nariaddi wuřru wiakka."

Luļunnu wuke wuřru Ana'u Domba

5 Wua udde ia'u naasilo sambau luļunnu wuke su lima n Tou apan ua'ianna su addera n araratuanna udde. Wuke udde napene m wořretta su rua m baane wuřru nireetannu pitu m bau segele. ²See ia'u naasilo sangkatou mala'ekatta apan matohassa u'aļiata ringannu tingikka apan ma'ikkatta. "Isai wotongnge mamesangnga manga segele indi wuřru mamu'a wuke indi?" ³Arawe mapia ete su surga ara'e su runia, ara'e su wanta n runia tawe niasombanganna saran sangkatou apan wotongnge maawu'a wuke udde, wuřru ma'ellega laļumme. ⁴Ne ia'u nilumuai atonna-tonna ana waugu tawe saran sangkatou apan wotongnge maawu'a wuke udde, wuřru ma'ellega laļumme. ⁵See sangkatou wuassu manga piařrange udde nabbisara sia'u, "Arie palluai! Pa'ellege! Singa wuassu pabbawalagu Yehuda, papapulunni Daud apan wahewalla, suete naauntunga! Itou wotongnge mamesangnga pitu segele udde wuřru mamu'a wuke udde."

⁶Wua udde ia'u naasilo sambau Ana'u Domba apan uarisikka su-pattangngannu addera n araratuanna udde, papaļiwutannu sire appata riadianna wuřru anambo n piařrange. Ana'u Domba udde aellehanna naaļihida ere suete nipototta. Itou pia pitu tatandu'a wuřru pitu mata; eteudde pitu Gharřaho Mawu Ruata apan suete nirolokka su ahe-wallu runia. ⁷Wua udde Ana'u Domba udde inumamatta wuřru nanganu luļunnu wuke udde wuassu lima uanannu taumata apan ua'ianna su

addera n araratuanna udde. ⁸Tantaḷanna Ana'ū Domba udde ma'ola'a aroddi, inumaruutta sire appata riadianna udde wuḥḥu sire rua m puḷo appata piaḥḥange udde su saruan-Ne. Imangitou sangkatou-sangkatou uaaggasa kecapi wuḥḥu mangko wuḷawanna laḷoḥḥoannu amania, eteudde manga aalḥomannu pabbawalagu Mawu Ruata. ⁹Imangitou mangngantari n sambau antari apan wakku:

"I'o wotongge manganu wuke udde
wuḥḥu mamesangnga manga segelene.

Ana waugu I'o suete nipate, wuḥḥu ringannu papate-Nu,
taumata wuassu aḷawo'ū ḥuanganna wahasa, araratuanna, wuḥḥu
pabbawalaga suete niwallian-Nu hunane su Mawu Ruata.

¹⁰I'o suete nandiaddi simangitou sambau pabbawalagu manga imam
sassane,
tadea'ū imangitou mangimbe Mawu Ruata ng kite,
wuḥḥu mamarenta su wowo n runia."

¹¹Wua udde ia'ū naasilo lai. Ia'ū naaringikka tingikku mala'ekatta
su ḥiwune wuḥḥu su jutane anambone. Imangitou uarisikka ua-
paḷiwutta addera n araratuanna wuḥḥu sire appata riadianna see manga
piaḥḥange udde, ¹²Wuḥḥu imangitou mangngantari ringannu tingikka
apan ma'ikkatta,

"Ana'ū Domba apan suete nipototta udde, ḥinone manengkama
taḥḥino,
paa'ala, apande wuḥḥu atattohassa;

Itou ḥinone addatanna, wantuhanna wuḥḥu raddaloanna!"

¹³See ia'ū naaringikka aḷawo'ū riadianna su langitta, su runia, su wanta
n runia wuḥḥu sulaḷummu tahaḷoangnga - aunne aḷawo'ū riadianna su
uḷilim pati'uppa indi - mangngantari,

"Itou apan ua'ianna su addera n araratuanna, wuḥḥu Sangkatou
Ana'ū Domba udde,

mangke raddaloanna wuḥḥu aaddatanna see awantuhanne wuḥḥu
uataḥḥino saran maḷannu-ḷannu!"

¹⁴Ne sire appata riadianna udde sinumimbakka, "Amin!" Wuḥḥu manga
piaḥḥa'a udde inumaruuta wuḥḥu nassubba.

Manga segele

6 Wua udde ia'ū naasilo Ana'ū Domba udde namesangnga segele
paarorone su wallatu segele pitu udde. See ia'ū naaringikka sambau
su wallatu riadianna udde nabbisara, "Wette!" Tingikke naaḥihidda ere
tingikku rallu'a. ²Ne ia'ū naasilo, see niasiloanna sambau awaḷo mawira.
Sumasa'ene uaaggasa sambau anaanna wuḥḥu itou niongoḷannu sambau

mahkota. Itou u'amatta ere sangkatou apan naauntunga inai mangar̄ro auntunganna.

³Wua udde Ana'u Domba udde namesangnga segele aruane, wuṛṛu ia'u naaringikka riadianna aruane nabbisara, "Wette!" ⁴See awaḷo waine sinumabanga lai. Awaḷo udde maṛṛamu wambuḷune. Sumasa'ene nionggolaṅṅu taṛṛino ipammuli m paddarame su wowo n runia, tadea'u taumata mapapate. Ne itou nionggolaṅṅu haḷele wahewa sammata.

⁵See Ana'u Domba udde namesangnga segele atallune. Wuṛṛu ia'u naaringikka riadianna atallune nabbisara, "Wette!" Ia'u na'ellega, ne niasiloangku sambau awaḷo ma'itumma sumasa'ene uaaggasa sampare tatimbanganna su limane. ⁶Wuṛṛu ia'u naaringikka sambau apan niaringiṛṛana ere tingikka apan u'ui wuassu pattangannu sire appata riadianna udde. Tingikka udde nabbisara, "Salliteṛṛe ganduma apan mapia, arega n laḷantaku allo massallo, wuṛṛu tallu n liteṛṛe gandumma paṛṛalane aregane ere laḷantaku allo massallo lai. Arawe imbaṛṛanga mandalaḷeo manga alu n Zaitun wuṛṛu wailu anggore!"

⁷Wua udde Ana'u Domba udde namesangnga segele aiappane. Wuṛṛu ia'u naaringikka riadianna aippane nabbisara, "Wette!" ⁸Ia'u na'ellega, see niasiloangku sambau awaḷo hatine namillosa. Sumasa'ene aranne Papate. Wuassu liudde, itou tatantalongannu Runia m Papate marani-rani. Taṛṛino su wageangge aiappane su runia indi tinantilla simangitou, tadea'u imangitou wotongge mamate sulaḷummu pangalo, sulaḷummu ṛutumma, ara'e alaṛṛusa'itta wuṛṛu wuassu manga winatangnga maḷaṛṛaga.

⁹Wua udde Ana'u Domba udde namesangnga segele aḷimane. Ne ia'u naasilo su aḷunggu medda n sasamba pia ṛimuuddu manga taumata nate nipate ana waugu mannohassa tanata Mawu Ruata sulaḷummu tiala mangitou. ¹⁰Imangitou u'ui ringannu tingikki mangitou apan ma'ikkatta, "Oh Mawu Lembo n Taṛṛino, apan susi wuṛṛu naṛṛino! Pira ng katempo lai aḷannune Po mamarikissa laḷoṛṛo n runia wuṛṛu maṛṛuumanni mangitou ana waugu suete namate siami?" ¹¹Imangitou sangkatou-sangkatou nionggolaṅṅu jubah mawira sambau. See imangitou nirolokka niapailloḷo taḷa ng kadio'a lai, ma'oma n sara masuungnga reengannu manga hawe sangkamanaranna wuṛṛu manga tuṛṛangi mangitou apan sarun pateanna lai ere imangitou.

¹²See ia'u naasilo Ana'u Domba udde namesangnga segele aianume. Nariaddite linukka apan masaddata. Matannallo nabbali ma'itumma ere maḷaṛṛenessa ma'itumma haḷagga, wuṛṛu wuḷanna nabbaḷi maṛṛamu ere ṛaṛṛa. ¹³Manga anumpitanna mannawo wuassu langिता su wowo n runia naaḷihidda wua ng kalu ara apan taambe naḷaha napuḷidda wuassu alune su tempo niio'u anginna ma'ikkatta. ¹⁴Langitta nawuḷi naaḷihidda ere suratta niluḷunna, wuṛṛu anambo n wowone

wurru manga taranusa niingkata wuassu tampane. ¹⁵See manga ratu n runia, manga tembonanne, manga tembonannu tantara, manga tau-mata ala wurru taumata pia tarino, wurru manga taumata waine lai, mapia allangnga ara'e tawe allangnga, sarangkanambone na'imbuni m watanganne sulalummu manga liangnga ara'e su wallatu watu su wowone. ¹⁶Su manga wowone wurru su manga watu udde, imangitou u'ui, "Aema'e siami! Wuniaawe iami wuassu aellegi Tou apan ua'ianna su addera n araratuanna, wurru wuassu asasa'u n Ana'u Domba udde! ¹⁷Allo maasansara nirumantate, orassa indi imangitou napaasabangu asasa'u mangitou, wurru tawe saran sangkatou apan wotongnge sumaruanna simangitou!"

Marasutta appatu puḷo appata su riwune taumata wuassu pabbawalagu Israel

7 Wua udde, ia'u naasilo sire appata mala'ekatta uarisikka su apata pabbuuanu runia. Imangitou mannaranga anginna appata su runia tadea'u tawe anginna apan tumiuppa su ammaranne, ara'e su tahaḷoangnga, ara'e su manga aaluanna. ²See ia'u naasilo sangkatou mala'ekatta waine nilumapputa wuassu samba'a ra'i. Itou uaapiddu segele wuassu Mawu Ruata apan wiakka. Ringannu tingikka ma'ikkatta mala'ekatta udde namaggo sire appata mala'ekatta apan suete naasomba tarino Mawu Ruata ipanggohakku ammaranne wurru tahaḷoangnga. ³Mala'ekatta udde nabbisara, "Paaliwue'o manggohakku ammaranne ara'e tahaḷoangnga, ara'e manga aaluanna amungkangu iami taambe nangonggolu tatiala segele su pakkanu manga allangngu Mawu Ruata ng kite." ⁴See ia'u niwaḷoanna manungku reenganne 144.000 su atoune apan nionngolannu tatiala n segelu Mawu Ruata su pakkani mangitou. Manga taumata udde nianu wuassu sire mapuḷo dua pabbawalagu Israel; ⁵wuassu pabbawalaga sambau, 12.000 su atoune. Eteudde wuassu walagi: Yehuda, Ruben, Gad, ⁶Asyer, Naftali, Manasye, ⁷Simeon, Lewi, Isakhar, ⁸Zebulon, Yusuf wurru Benjamin.

Taumata apan tumanite manambo

⁹Wua udde ia'u na'ellega apia, see niasiloanna taumata tumanite manambo – tawe saran sangkatou taumata apan wotongnge maareengngu anambone. Imangitou udde manga taumata wuassu aḷawo'u pabbawalaga, ruanganu, araratuanna, wurru wahasa. Ringannu uapeddetu jubah mawira-wira wurru ringannu uaaggasa manga ranna ng kalu pa-

lem su limane, manga taumata manambo udde dirumarisikka sinumaruanna addera n araratuanna wuṛṛu sinumaruanna Ana'u Domba udde. ¹⁰See ringannu tingikka ma'ikkatta imangitou u'ui, "Asasaḷamatti ite darentane wuassu Mawu Ruata ng kite, apan ua'ianna su addera n araratuanna, wuṛṛu wuassu Ana'u Domba udde!" ¹¹Anambo n mala'ekatta uarisikka uapaḷiwutta addera n araratuanna wuṛṛu manga piaṛrange see sire appata riadianna udde. Manga mala'ekatta udde uaruutta su saruannu addera n araratuanna see nassubba Mawu Ruata. ¹²Imangitou u'ui, "Amin! Dalo su Mawu Ruata ng kite apan mawantuga wuṛṛu pande. Itou ṛinone onggolaṅnu aḷawo'u aadiangkamanna wuṛṛu addata. Itou uataṛṛino wuṛṛu matohassa saran maḷannu-ḷannu! Amin."

¹³Sangkatou wuassu wallatu manga piaṛrange udde naiwaḷo sia'u, "Manga taumata apan ualṛṛe n juba mawira indi, isai imangitou wuṛṛu wuassuapa imangitou nirumanta?"

¹⁴"Ia'u wagga Tuangnga. Tuangnga sassane masingkata," sasimba'u.

Ne itou nabbisara sia'u, "Ete indi manga taumata apan suete ringannu saḷamatta naralukka wuassu pananansara apan wahewalla. Imangitou suete nabbansala jubah mangitou wuṛṛu niola'i mangitou nabbaḷi mawira ringannu ṛaṛra n Ana'u Domba udde. ¹⁵Ana waugu udde imangitou uarisikka su saruannu addera n araratuannu Mawu Ruata, wuṛṛu mattaṛramawu Sitou allo ṛabbi su Waḷe Mawu. Wuṛṛu Itou apan ua'ianna su addera n araratuanna udde sarun masemodda ringanni mangitou wuṛṛu manirungnga simangitou. ¹⁶Imangitou tate maapendama maḷunussa ara'e marou; matannallo ara'e paddisa mapaḷatta tate maaloṣo simangitou, ¹⁷ana waugu Ana'u Domba apan ua'ianna su pat-tangngannu addera n araratuanna udde sarun maola'a mallaḷu'addi mangitou. Itou sarun mangehetta simangitou watukku aḷimata n ua'e m pabbawiakka. Wuṛṛu Mawu Ruata sarun mamedda aḷawo'u allo mata wuassu mata mangitou."

Segele appitune

8 Napawe Ana'u Domba udde namesangnga segele appitune, surga nabbaḷi maḷannaba, aḷannune iraṛrangngo setenga ng ka'orassa. ²See ia'u naasilo sire pitu mala'ekatta uarisikka su saruannu Mawu Ruata, wuṛṛu imangitou nionggolaṅnu pitu m bua trompeta.


³Sangkatou mala'ekatta waine, apan uaapiddu sambau pananunganna amania wuḷawanna, nirumanta wuṛṛu dirumarisikka su saruannu medda n sasamba. Sitou nionggolaṅnu manambo amania ipanguntudu manga aaliomannu anambo n pabbawalagu Mawu Ruata wuṛṛu iaddo su medda n sasamba wuḷawanna apan uaraddo su saruannu

addera n araratuanna. ⁴Su sambau ringannu manga aaljomannu pabba-walagu Mawu Ruata, timbbulu dupa apan luṛṛenggama udde tuttimbula madduitta wuassu lima mala'ekatta apan uarisikka su saruannu Mawu Ruata udde. ⁵Wua udde mala'ekatta nanganu pananutunganna amania udde, wuṛṛu niloṛṛoante m putungnga wuassu medda n sasamba, see tinuntunga su wowo n runia. Ne rallu'a naposete wuṛṛu sawallo ma'ilatte, wuṛṛu nariaddite linukka.

Manga trompeta

⁶Napawe wua udde, sire pitu mala'ekatta apan uaaggasa trompeta udde uasasaddiate mattiuppa.

⁷Mala'ekatta paarorone nattiuppe trompeti tou, ne uranna eisse wuṛṛu putungnga laḷo'annu ṛaṛṛa nangansala su runia. Sepertiga wuassu runia nasue natutungnga; aroddi lai sepertiga wuassu manga aaluanna, wuṛṛu aḷawo'u nannaḷo apan ma'elomma.



Trompeta (8:7)

⁸See mala'ekatta aruane nattiuppa trompeti tou, ne sambau apan tu-manite m wahewalla niasiloanna naaljihidda wowone apan lukkenggama niwontola su tahaḷoangnga. See sepertiga wuassu tahaḷoangnga, nawaḷu nabbali ṛaṛṛa, ⁹wuṛṛu natete lai sepertiga wuassu aḷawo'u winatangnga su tahaḷoangnga; aroddi lai narṛimunsa'a sepertiga wuassu manga apalla.

¹⁰Wua udde mala'ekatta atallune nattiuppa trompeti tou, ne sambau anumpitanna apan wahewalla, lukkenggama ere soḷo, nanawo wuassu langitta, see nema'a su sepertiga wuassu manga saḷukka wuṛṛu aḷimata n ua'e. ¹¹(Arannu anumpitanna udde "Mapetta".) Ne sepertiga wuassu ua'e nabbali mapetta, wuṛṛu natete lai anambo n taumata ana waugu na'inumma ua'e apan nabbali mapetta udde.

¹²See mala'ekatta aiappane nattiuppa trompeti tou. Ne niapuulle sepertiga wuassu matannallo, sepertiga wuassu wuḷanna, wuṛṛu sepertiga

wuassu manga anumpitanna, na'oma n sara nawulite sepertiga wuassu semakki mangitou. Wuṛru lai sepertiga wuassu allo tawe maasemakka wuṛru aroddi lai sepertiga wuassu ṛabbi.

¹³Ana see ia'u na'ellega, ne ia'u naaringikka sambau manu'a rajawali tantaḷanna tuttalla'a matanggakka su winalanganna, u'ui, "Silaka! Silaka! Nasilakate anambo n taumata su runia napawe niaringirante sire tallu mala'ekatta waine apan mattiuppa trompenne murine!"

9 See mala'ekatta alimane nattiuppa trompeti tou, wuṛru ia'u naasilo sambau anumpitanna nanawo wuassu langitta su wowo n runia. ²Anumpitanna udde niongoḷannu a'unsi n rampisu papate. Ne anumpitanna udde namu'a rampisu papate udde, see timbula sinumabbanga wuassu laḷumme ere timbula wuassu sunggila apan wahewalla. Matannallo wuṛru winalanganna nabbali maranduma ana waugu timbula wuassu rampisa udde. ³See wuassu laḷummu timbula udde sinumabbangke manga saṛṛappalanna apan sinumossoka watukku runia. Manga saṛṛappalanna udde niongoḷannu taṛṛino apan uasulungnga ere lai nionggolla su kalajengking. ⁴Imangitou isassingadda umanna nannaḷo, ara'e aaluanna ara'e manga sinuananna waine. Imangitou tumba'u wotongnge mangenggena manga taumata apan su pakkane tawe segele wuassu Mawu Ruata. ⁵Manga saṛṛappalanna udde tawe wotongnge mamate manga taumata udde, ewe'e tumba'u manansara simangitou lima wuḷanna aḷannune. Taddu'a apan ni'uittu manga saṛṛappalanna udde naaḷihidda taddu'a ni'uittu kalajengking. ⁶Aḷannune lima wuḷanna udde, manga taumata maddea'a tadea'u mate, arawe imangitou tawe mate; imangitou maapulu mate arawe papate marau wuassi mangitou.

⁷Awa'u saṛṛappalanna udde naaḷihidda awaḷo apan uasaddia inai mappangalo. Su pua mangitou aellehanna pia sambau naaḷihidda araposa n aratuanna wuḷawanna. Hati mangitou naaḷihidda hati n taumata. ⁸Uta'i mangitou naaḷihidda uta'u wawine, wuṛru isi mangitou naaḷihidda isi n singa. ⁹Sabba'i mangitou laḷindumannu sambau saranapa naaḷihidda laubba atta'a. Tingikku papaidi mangitou naaḷihidda ammuḷannu roda wawoḷengannu awaḷo apan tantaḷanna inai mapapangalo. ¹⁰Imangitou pia toḷene wuṛru pia a'uinne naaḷihidda kalajengking. Wuṛru sulaḷummu toḷe mangitou udde pia atatohassi mangitou ipanansara taumata aḷannune lima wuḷanna. ¹¹Imangitou pia ratu apan uaparenta simangitou, wuṛru ratu udde eteudde mala'ekatta apan uatahuanna rampisu papate. Aranne sulaḷummu wisara n Ibrani Abadon; wuṛru sulaḷummu wisara n Yunani Apolion (atappasanne "Manggahakka").

¹²Silaka apan paarorone naḷiute. Nasue udde pia darua lai silaka apan sarun rumanta.

¹³Wua udde mala'ekatta ai'annume nattiuppa trompeti tou. Ne ia'u naaringikka tingikka nirumanta wuassu appatu pabbuuannu Mezbah wuławanna apan uaraddo su saruannu Mawu Ruata. ¹⁴Tingikka udde nabbisara su mala'ekatta aiannume udde, "Pallosa'a sire appata mala'ekatta apan rařrapusanna su Sařlukku Efrat udde!" ¹⁵See sire apata mala'ekatta udde nipallose. Imangitou suete nisaddia mandiaga orassa, allo, wuławanna wuřru tonna, udde hunane ipamate sepertiga wuassu anambo n taumata. ¹⁶Ia'u niwařoanna manungku reengannu tantara uasa'e awařo udde dua řasutta su jutane anambone. ¹⁷Wuřru sulařummu aellega, ia'u naasilo manga awařo udde wuřru manga sumasa'ene. Manga sumasa'ene ualuru n laubba atta'a mařramu lukkeng-gama, ma'elomma naalihidda watu nilam, wuřru maririkka naalihidda belerangnga. Pua manga awařo udde naalihidda pua n singa, wuřru wuassu mořronge sussabbanga putungnga, timbula, wuřru belerangnga. ¹⁸Sepertiga wuassu anambo n taumata, nipate n tatallu asasusa udde; eteudde putungnga, timbula, wuřru belerangnga apan sinumabbanga wuassu mořrongu manga awařo udde. ¹⁹Atatohassu manga awařo udde uaraddo su mořronge wuřru lai su tořene. Manga tořene naalihidda atoanna pia puane. Ringannu tořene udde, manga awařo mannansara taumata.

²⁰Arawe lambe m walagu taumata apan tawe nipate manga asasusa udde, tawe lai manantangngu lanna'u lima mangitou sassane. Imangitou tawe illořone massubba manga ghařraho lařeo wuřru manga paařuanna wuławanna, sařa'a, witu'a, watu wuřru alu apan tawe maasilo wuřru tawe maaringikka, ara'e lai maa'amatta. ²¹Imangitou lai tawe manantangngu manga inolaanni mangitou apan lařeo, eteudde pamamate, wařiimmata, pasasandaga wuřru panana'o.

Mala'ekatta wuřru luřunnu wuke adio'a

10 See ia'u naasilo sangkatou mala'ekatta matohassa waine sinumo-ssoka wuassu surga. itou papi'unannu winabbawa wuřru sambua randipakka uapařiwutta su puane. Hatine lullansiangnga naalihida matannallo, wuřru leddane naalihidda pařařranu putungnga. ²Su limane pia sambau luřunnu wuke adio'a apan wawu'anna. Ledda aikkatanne uarřinda tahařoangnga, wuřru leddane aarři uarřinda ammaranne. ³See itou inumui ringannu tingikka ma'ikkatta naalihidda tingikku manga singa. Napawe mala'ekatta udde suete niemui, pitu rallu'a sinumibakka ringannu tingikka mappose. ⁴Aroddi pitu rallu'a udde nattingikka, ia'u maapulu mamorřettu apa niwisarane, arawe ia'u naaringikka tingikka

wuassu surga nabbisara, "Arie pabbattia'a apa apan niwaļo m pitu rallu'a udde; arie pabbořreta'a!"

⁵See mala'ekatta apan ta'u niasiloanna uarřinda tahaļoangnga wuřru ammaranne udde namatte n lima aikkatanne watukku langitta. ⁶Itou nassalu ringannu arannu Mawu Ruata apan wiakka saran maļannu ļannu, apan nandiaddi langitta wuřru runia wuřru tahaļoangnga see lai manga aļawo'a apan mabbiakka sulaļumme. Mala'ekatta udde nabbisara, "Tempone tate lai iasořrota! ⁷Arawe napawe mala'ekatta appitune nattiuppa trompeti tou, Mawu Ruata sarun ma'ola'a řiin-Ne apan uawuni, ere suete niwatti'a su manga allang-Nge eteudde manga nabi."

⁸Wua udde tingikka apan ta'u niaringiřrana wuassu surga udde, nabbisara apia sia'u. Itou nabbisara, "Roote panganu luļunnu wuke apan wawu'anna su lima mala'ekatta apan uarřinda tahaļoangnga wuřru ammaranne udde."

⁹Ne ia'u inaitte nattuda mala'ekatta udde wuřru nadorongnga tadea'u itou mangonggolu luļunnu wuke adio'a udde sia'u. Itou nabbisara, "Anute wuřru ante indi. Sulaļummu tiannu itou sarun maola'a mapetta, arawe sulaļummu mořřongu itou matemangnga naaļihidda puļa."

¹⁰Ia'u nanganu luļunna adio'a udde wuassu limane see nianna. Sulaļummu mořřonga pendamanna ere temanggu puļa, arawe napawe ta'u niallupa, sulaļummu tianna itou nabaļi mapetta. ¹¹Wua udde ia'u nirolokka, "Wattia'a paassa lai watti'u Mawu Ruata su ola'u manga pabbawalaga, manga araratuanna, manga wahasa, wuřru manga ratu."

Rua ng katou tiala

11 Wua udde ia'u nionngoļannu alu sampaddi apan lihidde ere ta-tumma'inna auukka, see nirolokka, "Roote panguukka Waļe Mawu wuřru Mezbah. Reenga'a pira anambo n taumata apan mattarřamawu sulaļumme. ²Arawe arie manguukka rallaka su samba'a n liuddu Waļe Mawu udde, ana waugu wageangge udde suete tinantilla su manga taumata apan tawe maailļa Mawu. Imangitou sarun mařřinda soa apan susi udde appatu puļo dua su wuļanne aļannune. ³Ia'u sarun mandolokku rua ng katou tiala-U apan uaļuřre m peddeta ilallaļo, wuřru imangitou sarun mamasinkatu watti'u Mawu Ruata aļannune 1260 su allone."

⁴Rua ng katou tiala udde, eteudde rua m bua alu n Zaitun wuřru rua m bua ledda n soļo apan uaraddo su saruañnu Mawu uļilimpatu'uppa. ⁵Amungkangu taumata maannama ma'ola'a inolaanna

apan laleo simangitou, ne wuassu morrongi mangitou sumabbangke putungnga apan maapate manga seenne. Ringannu olangnge aroddi, anambo n taumata apan maapulu mannansara simangitou sarun iapate. ⁶Imangitou pia tarfino ipanutubba langitta tadea'u tawe manguranna tantaļanna imangitou mammasingkatu watti'u Mawu Ruata. Imangitou uatahuanna lai tarfino su anambo n alimata n ua'e, ipamaļu ua'e mabbali rarra. Wuřru imangitou uatahuanna lai tarfino ipamuulla runia ringannu alawo'u hati ng kasasusa, suapan tempo ipaapulu mangitou.

⁷Napawe imangitou suete nabbatti'u watti'i mangitou, winatangnga apan sinumabanga wuassu rampisu papate sarun lumawanna simangitou. ⁸Wuřru winalunanni mangitou sarun iapatalallada su amatannu soa wawalla, suapa Mawu mangitou niarussa. Aranna sasanato'u soa udde, eteudde Sodom ara'e Mesir. ⁹Manga taumata wuassu anambo n araratuanna, pabbawalaga, wahasa sarun maasilo winalunanni mangitou, tallu allo mattangnga alannune, wuřru tawe mamala m winalunanna udde ilabbinga. ¹⁰Tumana'u runia sarun lumuassa ana waugu inapateannu tiala darua udde. Imangitou sarun maddamea wuřru sarun maa'agilu aonggola, ana waugu rua ng katou nabi udde suete nandanta n anambo n asasusa su anambo n taumata su runia. ¹¹Napawe tallute allo mattangnga, nirumantate sasangngo ipabbiakka wuassu Mawu Ruata wuřru sinumutta apia sulaļummu nabi darua udde. Ne imangitou nabuatte dirumarisikka, na'oma n sara taumata apan naasilo simangitou nata'utta atonna. ¹²Wua udde rua ng katou nabi udde naaringikka tingikka ma'ikkatta namago si tarua wuassu surga, "Wette rangante isindi!" See su saruannu aellegu seetti mangitou, itarua nirumangante su surga, aoppannu winabbawa. ¹³Ne su tempo udde nariaddite linukka apan masaddata. Sepermapuļo wuassu soa udde narřimunsa'a, wuřru pitu řiwu taumata nate ana waugu linukka udde. Manga taumata waine lembon matta'utta, see imangitou nadalote awawantugu Mawu Ruata su surga.

¹⁴Silaka aruane naljudde. Arawe pa'ellege! Silaka atallune ete taļa ng kadio'a lai sarun manansuna.

Trompete appitune

¹⁵See mala'ekatta appitune nattiuppe trompeti tou, ne su surga niarřingirante manga tingikka ma'ikkatta apan mabbisara, "Tarfino ipamarenta runia orassa indi sulaļummu lima Mawu ng kite wuřru Ratu m Punnu Saļamatta apan suete pina'ire-Ne. Itou sarun mamarenta saran maļannu-ļannu!" ¹⁶Ne sire rua m puļo appata piařrange apan

ua'ianna su addera n araratuanni mangitou su saruannu Mawu Ruata, inumaruutta wuṛṛu nassubba Mawu Ruata.

¹⁷Imangitou nabbisara,

"Mawu, Ruata Lembon Taṛṛino,

apan nirumanta, wuṛṛu nirumantate!

Iami maadiangkamanna Si'o ana waugu I'o suete nappaattu

taṛṛino-Nu apan wahewalla,

wuṛṛu nanattakke mammarenta!

¹⁸Manga taumata apan tawe maailaḷa Mawu, mammangalo

ana waugu temponete I'o mapaasabangu asasa'u-Nu,

wuṛṛu temponete lai I'o mamarikissa manga taumata nate.

Ete indi tempone ipangonggolu laḷantake su manga allang-Ngu,

manga nabi,

wuṛṛu su anambo n pabbawala-Gu, eteudde anambo n taumata apan

mattaṛṛamawu Si'o,

timmade ara'e dario'a

Ete indi tempone ipaṛṛimunsa'a manga taumata apan naṛṛimunsa'a

runia!"

¹⁹Ne, nawu'ate Waḷe Mawu Ruata su surga, wuṛṛu niasiloante

Wantalu Paaire sulaḷumme. See nariaddite sawallo ma'ilatta wuṛṛu

tingikku rallu'a mappose wuṛṛu ruddallu'a, see lai linukka wuṛṛu uranna

eissa apan masassaga.

Wawine wuṛṛu naga

12 See niasiloanna su langitta sambau apan maṛṛindu'a wuṛṛu tumanite n maatiangnga. Sangkatou wawine ualḷuṛṛe n matannallo

peddene, tantaḷanna uarisikka su wowo n wuḷanna. Su puane pia sambau araposa n araratuanna niola'a wuassu mapuḷo dua anumpitanna.

²Wawine udde, tantaḷanna pia illoṛṛo, wuṛṛu ana waugu temponete mangunsiwe, ne itou mangngintuḷi n atatauddu'a.

³See niasiloante apia su langitta sambau apan maṛṛindu'a. Pia sambau naga maṛṛamu apan wahewalla atonna pia puane pitu wuṛṛu tatan-

dunge mapuḷo. Suapan puane pia araposa n araratuanna. ⁴Ringannu toḷene itou nanggemonnu sepertiga wuassu manga anumpitanna su

langitta wuṛṛu nituntunga watukku runia. Naga udde uarisikka su saruannu wawine apan mangunsiwete udde ringannu panduma mangallupa

anangnge, napawe itou niasungkangke. ⁵See wawine udde nangunsiwete n sangkatou ana'a esakka apan sarun mamarenta anambo n pabbawala

ringannu tatumma'inna atta'a. Arawe ana'a udde niaṛṛo wuassu

wawine udde, see niapidida ringannu Mawu Ruata wuṛṛu su saruannu addera n araratuan-Ne. ⁶Ne wawine udde tinumaḷangnga su wadda'a, su tampa apan suete nissaddia Mawu Ruata sitou. Su tampa udde itou sarun padduḷiananna 1260 allo aḷannune.

⁷See su surga nariaddite pangalo. Mikhael wuṛṛu manga mala'ekanne mapapangalo lumawanna naga udde. Wuṛṛu naga udde lai nilaḷimannu manga mala'ekanne, lumawanna si Mikhael. ⁸Arawe naga udde niapaarugi. Itou wuṛṛu manga mala'ekanne tate iwala matana'a su surga. ⁹Naga apan wahewalla udde niramme su liudde! Ete itou atoanna timmade udde apan aranne Setanna ara'e Ghaṛṛaho Laḷeo, apan nangawusu ahewallu runia. Itou niramme su runia su sambau ringannu manga mala'ekanne.

¹⁰See ia'u naaringikka tingikka apan ma'ikkatta su surga mabbisara, "Ete orassa indi tempone Mawu Ruata manaḷamatta pabbawala-Ge! Orassa indi Mawu Ruata napaaliatta'u taṛṛino-Ne ere sangkatou Ratu! Orassa indi Ratu m Punnu Saḷamatta apan suete pina'ire udde suete napaaliatta'u taṛṛino-Ne! Ana waugu apan nangansila manga tuṛṛangi ite su saruannu Mawu Ruata, allo wuṛṛu ṛabbi, suete niapaasabbanga wuassu surga. ¹¹Manga tuṛṛangi ite suete napaarugi n tou ringannu ṛaṛṛa n Ana'u Domba udde, wuṛṛu ringannu watti'a apan atonna wuassu Mawu Ruata apan niwatti'i mangitou. Imangitou maḷuassa nanantillu niawa mangitou ma'oma n sara mate. ¹²Ana waugu udde, ṛinone surga wuṛṛu sarangkanambone apan uatana'a suḷalumme, lumala'a! Arawe nasilakate runia wuṛṛu tahaḷoangnga, ana waugu Setanna sinumossokke ringanni amiu ringannu asasa'une apan wahewalla, ana waugu itou masingkata, manungku tempone tate maḷannu lai."

¹³Su tempo naga udde naatutukka manungku itou nirammete su runia, itou nanattakke mangngenggena wawine apan suete nangunsiwe n ana'a esakka udde. ¹⁴Arawe wawine udde niongoḷannu darua papaiddu manu'a rajawali apan maḷalakka, tadea'u itou tumalla'a su tampa atanaanne su wadda'a, suapa itou sarun padduḷiananna tallu tonna annumu wuḷanna aḷannune, maḷiuda wuassu aenggenu naga udde. ¹⁵Ne naga udde napaasabbangu ua'e wuassu moṛṛonge apan manambo atonna watukku wawine udde, tadea'u mapa'elekki tou. ¹⁶Arawe runia nassumbala wawine udde; runia namu'a moṛṛonge, wuṛṛu nangallupa ua'e apan sinumabbanga wuassu moṛṛongu naga udde. ¹⁷Naga mangke nasa'u atonna su wawine udde, na'oma n sara itou inaita namangalo pabbawalaga waine wuassu wawine udde, eteudde anambo n taumata apan tuttuṛṛuta manga parenta Mawu Ruata, wuṛṛu nattiala su ola'u Mawu Yesus wuṛṛu taṛṛino-Ne. ¹⁸See naga udde dirumarisikka sɿ apanne.

Winatangnga darua

13 Wua udde ia'u naasilo sambau winatangnga nilumapputa wu-
 assu laɭummu tahaɭoangnga. Itou pia tatandunge mapuɭo wuɾɾu
 puane pitu. Suapan tatandunge pia araposa n araratuanna, wuɾɾu sua-
 pan puane uaworɾetta sambau aranna aaɭuandaga su Mawu Ruata.
²Winatangnga apan ta'u niasiloanna udde oɭangnge naaɭihidda ere ma-
 can tutul, wuɾɾu leddane naaɭihidda beruangnga, wuɾɾu sasumigge
 naaɭihidda sasumiggu singa. See winatangnga udde nionggolannu naga
 atatohassi tou sassane, wuɾɾu addera n araratuanne, wuɾɾu taɾɾinone
 apan wahewalla. ³Sambau wuassu wallatu pitu pua m winatangnga
 udde aellehanna ere lessa apan wahewalla, arawe lessa udde napiate.
 Ahewallu runia uatantalongnga winatangnga udde ringannu tuttiangnga.
⁴Wuɾɾu imangitou maddalo naga udde ana waugu itou suete nangong-
 golu taɾɾinone su winatangnga udde. Wuɾɾu imangitou massubba wi-
 natangnga udde lai. Imangitou nabbisara, "Tawe suɭungnge winatangnga
 indi! Tawedu wotongnge mamangalo lumawanna sitou!"

⁵Winatangnga udde niwala mabbisara manga inolaanna apan ipam-
 munga wuɾɾu ipangngaɭuandaga Mawu Ruata. Itou niwala mamma-
 renta appatu puɭo dua su wuɭanne aɭannune. ⁶See itou mannattakke
 mangangaɭuandaga Mawu Ruata, wuɾɾu arannu Mawu Ruata. Arod-
 di lai tanga atatanaannu Mawu Ruata, wuɾɾu sarangkanambone apan
 uatana'a su surga lai niaɭuandahanne. ⁷Itou niwala lai lullawanna pab-
 bawalagu Mawu Ruata lapiddu mandugi simangitou. Wuɾɾu taɾɾino su
 aɭawo'u pabbawalaga, araratuanna, wahasa, wuɾɾu walaga nionggolla si-
 tou. ⁸Winatangnga udde sarun subbannu anambo n taumata apan ma-
 bbiakka su wowo n runia indi, tabbene'e manga taumata apan aranne
 niworɾeta tantaɭanna runia indi taambe nariaddi, sulaɭummu wuke n tau-
 mata wiakka pussa'a n Ana'u Domba apan suete nipototta.

⁹Ana waugu udde, amungkangu iamiu wotongnge maddaringikka,
 paddaringikke watti'a indi: ¹⁰"Taumata apan ɾinone iɾɾuumanna, atonna
 itou sarun iɾɾuumanna. Wuɾɾu taumata apan ɾinone pateannu haɭele,
 atonna itou sarun pateannu haɭele. Ana waugu udde walagu Mawu
 Ruata ɾinone matammuda wuɾɾu matuɾɾuta."

¹¹See ia'u naasilo sambau winatangnga waine sinumabbanga wuassu
 laɭummu runia. Itou pia tatandunge darua ere tatandu'u ana'u domba.
 Tingikke ere tingikku naga. ¹²Su saruannu winatanga apan paarorone
 udde itou nappaattu taɾɾino apan wahewalla apan niasombanganne wu-
 assu winatangnga udde lai. Ahewallu runia wuɾɾu anambo n apan
 uatana'a su wowone, niwata'a massubba winatangnga paarorone udde,
 apan lessane wahewalla napiate. ¹³Winatangnga aruane udde na'ola'a

manga aļarřindu'a apan wahewalla. Su saruannu awadaalla itou na'ola'a putungnga niumontō'a wuassu langitta watukku runia. ¹⁴ Wuřru anambo n taumata apan mabbiakka su runia niawusuanne ringannu manga aļarřindu'a apan wotongge olaanne su saruannu winatangnga apan paarorone udde. Wuřru imangitou sarangkanambone nirolokka mandarisikku sambau paaļuanna wuassu winatangnga apan suete niessa n halele, arawe ta'e wiakka. ¹⁵ Winatangnga aruane udde niwala mangonggolu singangu su paaļuanna udde, na'oma n sara paaļuanna udde wotongge mabbisara wuřru mamate anambo n taumata apan niaddiri ma-subba sitou. ¹⁶ Anambo n taumata, timmade wuřru dario'a, ala wuřru asiangnga, allangnga wuřru tawe allangnga, niwata'u winatangnga udde iapaasengkama tatiala su lima aikkatanni mangitou ara'e su pakkani mangitou. ¹⁷ Tawe saran sangkatou wotongge mamalli ara'e mabbaļu'u sarannapa, amungkangu itou tawe tatiala udde, eteudde arannu winatangnga udde sassane, ara'e wořretta papasingkatu aranna udde.

¹⁸ Isindi řinone pia apande. Taumata apan masiřrongnga wotongge mandeengngu atappasanne wuassu anambo n winatangnga udde, ana waugu reenganna udde, eteudde arannu sangkatou taumata. Reenganne eteudde 666.

Ana'u Domba wuřru aļarřanang-Nge

14 Wua udde ia'u naasilo, see niasiloanna Ana'u Domba udde uari-sikka su wowo n Wuiddu Sion. Suadio'a ringanni Tou pia 144.000 su atoune taumata apan su pakkanu sangkatou-sangkatou uawořretta aran-Ne wuřru arannu Mawu Iamang-Nge. ² See ia'u naaringikka tingikka wuassu langitta mangngelekkka naaļihidda tingikku ua'e wahewalla apan mappampassa wuřru naaļihidda tingikku rallu'a apan ma-saddata. Tingikka udde niarřingirřana naaļihidda tingikku musikka wu-assu mananalangnga kecapi apan tantaļanna mannengkella kecapine. ³ Su saruannu addera n araratuanna wuřru sire appata riadianna wuřru manga piařrange uapaļiwutta addera n araratuanna udde, 144.000 su atoune udde manggantari sambau antari wakku. Antari udde tawe aurumannu saran sangkatou, tumba'u sire 144.000 su atoune udde apan suete nipallosa wuassu runia. ⁴ Imangitou udde manga taumata apan sidutu na'ukkassa ere mařřuala susi, ana waugu tawe uauukka suadio'a ringannu wawine. Imangitou uatantalongnga Ana'u Domba udde suapan tampa Itou inai. Wuassu wallatu anambo n taumata, tumba'u imangitou apan suete nipallosa maola'a sasamba apan paarorone su Mawu Ruata wuřru su Ana'u Domba. ⁵ Tawe saran paassa imangitou mangawusu; wuřru imangitou tawe anggone saran adio'a.

Sire tallu mala'ekatta

⁶See ia'u naasilo sangkatou mala'ekatta waine apan tuttalla'a manggaka su langitta. Mala'ekatta udde uaapiddu watti'a su ola'u Watti'u Aļaļuassa apan awasa iapaasingkatta su taumata n runia ete-udde su anambo n pabbawalaga, ruanganna, wahasa wuŗru araratuanna. ⁷Mala'ekatta udde u'ui ringannu tingikka apan ma'ikkatta, "Aata'utte Mawu Ruata wuŗru paddalote awawantu-Ge! Ana waugu nia'omante tempone Mawu Ruata mamarikissa taumata. Subbaite Itou apan nandi-addi langitta, runia, tahaļoangnga wuŗru aļawo'u aļimata n ua'e!"

⁸Mala'ekatta aruane nanansuna mala'ekatta paarorone lapiddu inumui, "Nanawote! Soa m Babel apan wahewalla nanawote! Itou suete na'ola'a aļawo'u pabbawalaga niwu'annu anggore - eteudde anggore wuassu apulu n sasandage!"

⁹Sangkatou mala'ekatta atallune nanansuna darua mala'ekatta udde, lapiddu inumui ringannu tingikka ma'ikkatta, "Taumata apan massubba winatangnga udde ringannu paaļuanne, wuŗru pia tatiala m winatangnga udde su pakkane ara'e su limane, ¹⁰taumata udde sarun ma'inumma anggore wuassu Mawu Ruata, eteudde anggoru asasa'u-Ne apan suete nilaļinni Tou sulaļummu tampane, apan tawe nihaingnga sara ng kadio'a! Anambo n taumata udde sarun sansaranna sulaļummu putungnga wuŗru belerangnga su saruannu manga mala'ekatta susi wuŗru su saruannu Ana'u Domba udde. ¹¹Timbula wuassu putungnga apan mannan-sara manga taumata udde sidutu tuttimbula saran maļannu-ļannu. Allo rabbi tawe illoļone imangitou sassansaranna, eteudde imangitou apan massubba winatangnga udde wuŗru paaļuanne, anambo n taumata apan pia tatialan arannu winatangnga udde!"

¹²Sulaļummu olangge indi pabbawalagu Mawu Ruata apan matuŗruta su manga parenta Mawu Ruata wuŗru matuŗruta Mawu Yesus, rinone matammuda.

¹³See ia'u naaringikka tingikka wuassu surga mabbisara, "Woŗretta'a indi: Manattaka orassa indi, aļaļuassa su manga taumata apan nate tantaļanna mangngimbe Mawu!"

"Atonna!" sasimbaku Ghaŗraho Mawu Ruata. "Imangitou sarun mangilloļo mammanara masahadda, ana waugu hessi m pangangimbe mangitou sidutu uatantalongnga simangitou."

Runia itinganna

¹⁴Wua udde ia'u na'ellega, ne niasiloanna sambau winabbawa apan mawira. Su wowo n winabbawa udde ua'ianna sangkatou apan

aellehanna ere taumata. Su pua-Ne pia sambau araposa n araratuanna wuławanna, wuŗru su lima-Ne pia sambau haļele maŗŗoro. ¹⁵Wua udde sangkatou mala'ekatta waine sinumabanga wuassu Waļe Mawu Ruata. Ringannu tingikka apan ma'ikkatta, itou inumui Sitou apan ua'ianna su wowo n winabbawa udde, "Limbea'e haļele-Nu udde wuŗru orassa indi pangitingke, ana waugu temponete m pangangitingnga; runia naļahate wotonggete itinganna!" ¹⁶See Itou apan ua'ianna su wowo n winabbawa udde nallimbete n haļele-Ne watukku runia, ne runia a'itingante.

¹⁷Wua udde ia'u naasilo lai sangkatou mala'ekatta waine lai sinumabanga wuassu Waļe Mawu su surga. Itou lai uaaggasa haļele sammata apan maŗŗoro.

¹⁸Napawe wua udde, sangkatou mala'ekatta waine, apan uatarřino putungnga, nirumanta wuassu mezbah. Ringannu tingikka ma'ikkatta itou inumui su mala'ekatta apan uaaggasa haļele maŗŗoro udde, "Limbea'e haļelenu udde wuŗru ti'ote manga wua n anggore su runia, ana waugu manga wuane naļahate!" ¹⁹Ne mala'ekatta udde nallimbete n haļelene watukku runia wuŗru nani'o manga wua n anggore wuassu alune, see nilombo sulalummu hahilingannu anggoru asasa'u Mawu Ruata apan wahewalla. ²⁰Manga wua n anggore udde nihilingnga su liuddu soa, wuŗru wuassu hahilingannu anggore udde mangngelekkke řaŗa naaļihida saļukka, araune tallu řasutta kilometeŗre, wuŗru aļaļumme marani n dua meteŗre.

Mala'ekatta ringannu asasusa apan panginsueanne

15 Wua udde ia'u naasilo su langitta sambau apan maatiangnga wuŗru tawe suļungge. Pia sire pitu mala'ekatta wuŗru pitu asasusa apan panginsueanne. Ete indi panginsueanne Mawu Ruata mappaaranta n asasa'u-Ne.

²Napawe wua udde ia'u naasilo sambau apan aellehanna naaļihidda tahaļoangnga kaca uaļalo'a m putungnga. Ia'u naasilo lai manga taumata apan suete naauntunga su winatangnga wuŗru paaļuanne, wuŗru naauntunga su manga taumata apan aranne nitalannu woŗretu reenganna. Manga taumata apan naa'untunga udde uarisikka su winggi n tahaļoangnga kaca lapiddu uaaggasa kecapi apan nionggolu Mawu Ruata simangitou. ³Wuŗru imangitou mangantari antari Musa, allangu Mawu Ruata, wuŗru antari n Ana'u Domba. Arendi tingikke,

"Mawu, Ruata Lembon Tarrino,

tumanite n wahewalla wuŗru maatiangnga manga inolaan-Nu!
Ratu n aļawo'u pabbawalaga

tumanite n matuḷidda wuṛṛu tawe saḷane manga inolaan-Nu!

⁴Isai apan tawe matta'uttu, Mawu?

Isai maddiri mamasingkatu awawantu-Gu?

Tumba'u I'o apan na'ukkassa.

Aḷawo'u pabbawalaga sarun rumanta massubba Si'o

ana waugu manga parenta-Nu apan matuḷidda

suete niaasiloannu anambo n taumata."

⁵Napawe wua udde ia'u naasilo Waḷe Mawu su surga nawu'a, wuṛṛu Rasannu Mawu udde sulaḷumme. ⁶See sire pitu mala'ekatta wuṛṛu pitu asasusa udde sinumabbanga wuassu Waḷe Mawu Ruata. Peddeti mangitou wuassu linen apan waresi wuṛṛu sussaḷendapa. Wuṛṛu imangitou uaḷuṛṛe n laḷinduma sabba'a apan niola'a wuassu wuḷawanna. ⁷Wua udde sambau wuassu wallatu riadianna appata udde nangoggola su sire pitu mala'ekatta udde pitu m bau cawanna wuḷawanna apan napene n asasa'u Mawu Ruata, - Mawu Ruata apan wiakka saran maḷannu-ḷannu. ⁸Ne Waḷe Mawu Ruata udde napenete n timbulla wuassu awawantuga wuṛṛu taṛṛino Mawu Ruata. Wuṛṛu tantaḷanna pitu asasusa apan niapiddu sire pitu mala'ekatta udde taambe nasue, tawe saran sangkatou apan wotongge maasutta sulaḷummu Waḷe Mawu Ruata.

Manga cawanna asasa'u Mawu Ruata

16 Ana see ia'u naaringikka tingikka wahewalla wuassu laḷummu Waḷe Mawu Ruata nabbisara su sire pitu mala'ekatta udde, "Roote wuṛṛu laḷina'e laḷoṛṛo n pitu cawanna asasa'u Mawu Ruata udde su wowo n runia!"

²Ne mala'ekatta paarorone inaita wuṛṛu nallaḷinnu laḷoṛṛo n cawanne su runia. Ne nilumappute manga pinsula apan mahiadda wuṛṛu tumanite n mataddu'a su anambo n taumata apan pia tatiala m winatangnga udde, wuṛṛu su manga taumata apan massubba paaḷuanne.

³Napawe wua udde mala'ekatta aruane nallaḷinnu laḷoṛṛo n cawanne su tahaḷoangnga. Ne ua'e n tahaḷoangnga nabbaji ere ṛaṛṛa n taumata nate, wuṛṛu natete manga riadianna apan mabbiakka sulaḷummu tahaḷoangnga.

⁴Wua udde mala'ekatta atallune nallaḷinnu laḷoṛṛo n cawanne su manga saḷukka wuṛṛu manga aḷimata n ua'e, ne aḷawo'u ua'ene nabbaji ṛaṛṛa. ⁵Ia'u naaringikka mala'ekatta apan uataṛṛino ua'e nabbisara, "Ruumanna apan niemangngu udde matuḷidda, I'o Lembon Susi, Mawu Ruata apan nirumanta, wuṛṛu nirumantate! ⁶Imangitou suete napaaturo n ṛaṛṛa m pabbawalagu Mawu Ruata wuṛṛu ṛaṛṛa manga nabi; orassa indi I'o mappa'inummu ṛaṛṛa simangitou. Atonna, naṛṛinote udde

maola'a simangitou!" ⁷Ana see ia'u naaringikka tingikka wuassu mezbah nabbisara, "Mawu, Mawu Ruata Lembon Tarrino, atonna wuṛru su atatujidda manga ruumanna apan niema'a siami!"

⁸Napawe wua udde mala'ekatta aippane nallaḷinnu laḷoṛṛo n cawanne su matannallo, ne matannallo niwala mannutungnga tau-mata ringannu saḷihangnge apan maḷoso udde. ⁹Taumata natutungngu saḷihangnge, wuṛru imangitou namontoga arannu Mawu Ruata, apan uataṛrino manga asasusa udde. Salaiwe aroddi, imangitou maddiri mawaḷu wuassu manga rosa mangitou wuṛru maddiri maddalo awawantugu Mawu Ruata.

¹⁰See mala'ekatta aḷimane nallaḷinnu laḷoṛṛo n cawanne su addera n araratuannu winatangnga udde. Ne ahewallu araratuannu winatangnga udde nabbaji maranduma, wuṛru taumata mangngi'i lila ana waugu atataddu'a. ¹¹See imangitou namontoge Mawu Ruata su surga ana waugu imangitou nataddu'a wuṛru ana waugu manga pinsuli mangitou. Arawe imangitou tawe mawaḷu lai wuassu pallaḷagu mangitou apan laḷeo.

¹²Napawe wua udde mala'ekatta aiannume nallaḷinnu laḷoṛṛo n cawanne watukku Saḷukku Efrat apan wahewalla udde. Ne saḷukka udde namara na'oma n sara manga ratu wuassu samba'a ra'i wotongnge sumabbi umamatta. ¹³See ia'u naasilo tatallu ghaṛraho laḷeo apan olangnge naaḷihidda aakka. Aakka udde sambau-sambau sussabbanga wuassu moṛṛongu naga, wuassu moṛṛongu winatangnga, wuṛru wuassu moṛṛongu nabi awusu. ¹⁴Imangitou eteudde manga ghaṛraho laḷeo apan ma'ola'a manga aḷaṛṛindu'a. Tatallu ghaṛraho udde inaite su anambo n manga ratu su ahewallu runia wuṛru nangammule mangitou mapapangalo su Allo apan wahewalla, eteudde Allo wuassu Mawu Ruata Lembon Tarrino.

¹⁵"Daringirrete! Ia'u rumanta ere taṛra ta'o! Aḷaḷuassa su taumata apan sidutu uataṛrapa wuṛru uariaga peddene, ma'oma n sara itou tawe umamatta tantoḷe wuṛru masili su saruannu awadaalla!"

¹⁶Wua udde manga ghaṛraho udde nangammullu manga ratu udde su tampa apan sulaḷummu wisara n Ibrani isassaggo Harmagedon.

¹⁷Napawe wua udde mala'ekatta appitune nallaḷinnu laḷoṛṛo n cawanne su winalanganna. Ne niaringikke tingikka apan ma'ikkatta wuassu addera n araratuannu Waḷe Mawu, apan nabbisara, "Nasute!"

¹⁸See nariaddite sawallo ma'ilatta wuṛru tingikku rallu'a mappose wuṛru ruddallu'a, lapiddu linukka apan wahewalla. Tawe saran paassa pia linukka aroddi ahewalle ro'e n taumata niriaddi. Ete indi linukka apan ahewalanne! ¹⁹Soa wahewalla udde natahia tallu ng kaadoanna, wuṛru naṛrimunsa'e lai manga soa su anambo n araratuanna su runia. See Mawu Ruata naanaungnga Babel apan wahewalla udde. Ne Mawu

Ruata napa'inummi tou anggoru wuassu cawannu Mawu Ruata – ete-udde anggoru asasa'u-Ne apan nangillembo. ²⁰Anambo n tarřanusu nawontola, wuřru anambo n wowone nawuřussa. ²¹Uranna eisse apan wahewa, sambau-sambau awakkane lima m puřo su kilone, nanawo wuassu langitta nangema'a manga taumata. Ne imangitou namontoga Mawu Ruata ana waugu اساسا n uranna eisse apan wahewalla udde.

Sumasandaga wahewalla

17 Wua udde sangkatou wuassu sire pitu mala'ekatta apan uaggasa cawanna pitu udde nirumanta ringanku wuřru nabbisara, "Wette, ia'u sarun manta'e si'o ereapa sumasandaga apan wahewalla udde sarun iřruumanna, eteudde soa wahewalla apan niapararisikka su winggi manga sařukka. ²Manga ratu n runia ma'ola'a ařařeo ringanni tou, wuřru tumana'u runia nabbali wu'anna ana waugu na'inumma anggoru sasandage."

³See Gharraho Mawu Ruata nangintarřo sia'u, wuřru mala'ekatta udde nangapi'u watukku wadda'a. Poiaroddi ia'u naasilo sangkatou wawine ua'ianna su wowo n sambau winatangnga wambuřune marřamu uaitumma, wuřru napene m worřetta ringannu manga aranna aařuandaga su Mawu Ruata. Winatangnga udde puane pitu wuřru tatandunge mapuřo. ⁴Wawine udde ualurře n laubha ungu wuřru marřamu uaitumma, see lařogarřanu wuřawanna, manga permata, wuřru mutiara. Su limane itou uaaggasa sambau mangko wuřawanna napene n inolaanne apan maarrantina wuřru lařeo, hessi n sasandage. ⁵Su pakkane uaworřetta sambau aranna apan iaaddappinga. Aranna udde eteudde, "Babel Apan Wahewalla, inangngu manga sumasandaga wuřru taumata lařeo su runia." ⁶See ia'u naasilo manungku wawine udde niwu'annu řarřa m pabbawalagu Mawu Ruata wuřru řarřa manga taumata apan nipate ana waugu maturřuta Mawu Yesus.

Su tempo ia'u naasilo wawine udde, ia'u tinumiangnga. ⁷See mala'ekatta udde nabbisara sia'u, "Anio i'o tinumiangnga? Mappianne ia'u mamasingkata si'o addapingu wawine udde wuřru addapingu winatangnga apan sasa'eanne, eteudde winatangnga pitu puane wuřru mapuřo tatandunge. ⁸Winatangnga udde rorone suete nabbiakka, arawe orassa indi tate mabbiakka apia. Ete adio'a lai itou sumabbanga wuassu rampisu papate wuřru inai mattuda n tampa m papatene. Manga taumata apan mabbiakka su runia, apan aranne tawe uaworřetta sulalummu Wuke n Taumata Wiakka tantařanna runia taambe niriaddi sarun tumiangnga napawe maasilo winatangnga udde. Ana waugu winatanga udde rorone suete nabbiaka. Orassa indi itou tate nabbiaka lai, arawe itou sarun rumanta apia.

⁹Su olangnge indi rinone pia apande wuṛṛu pasasunna. Pua pitu udde eteudde pitu wuidda; eteudde manga wuidda tampa m wawine udde ua'ianna. Wuṛṛu pitu pua udde lai, eteudde sire pitu ratu: ¹⁰sire lima wuassi mangitou nanawote, sangkatou ta'e uaparenta, wuṛṛu sangkatou lai taambe nirumanta. Amungkangu itou rumantate, itou tumbau mamarenta taḷa ng kadio'a. ¹¹Wuṛṛu winatangnga apan rorone suete nabbiakka, arawe tempo indi tate nabbiakka lai; eteudde ratu aualune. Itou udde sangkatou wuassu wallatu sire pitu ratu udde lai, apan orassa indi tantaḷanna mattuda n tampa apateanne.

¹²Mapuḷo tatandu'a apan aellehanna udde, eteudde sire mapuḷo ratu apan taambe nanattakka mamarenta. Arawe imangitou sarun ongoḷannu taṛṛino mamarenta maola'a sangkatou ratu su sambau ringannu winatangnga udde sulaḷummu sangka orassa aḷannune. ¹³Sire mapuḷo ratu udde sarangkanambone pia pandumanne apan uasuḷungnga; imangitou sarangkanambone nanantillu atatohassa wuṛṛu taṛṛino mangitou su winatangnga udde. ¹⁴Imangitou sarun mamangalo lumawanna Ana'u Domba udde. Arawe Ana'u Domba udde wuṛṛu mallaḷaṛṛenggen-Ne apan matuṛṛuta apan suete niwagoan-Ne wuṛṛu nipile-Ne udde sarun mapaarugi manga ratu udde, ana wangu ete Itou Mawu n aḷawo'u tuangnga, wuṛṛu Ratu n aḷawo'u ratu."

¹⁵Mala'ekatta udde nabbisara lai, "Ua'e apan aellehannu udde, tampa n aianannu sumasandaga udde, eteudde manga pabbawalaga, manga tumana'u soa, manga araratuanna wuṛṛu manga wahasa. ¹⁶Mapuḷo tatandu'a apan aellehannu udde wuṛṛu winatangnga udde sarun marantinu sumasandaga udde. Imangitou sarun mangarṛo aḷawo'u sarannapa apan tatahuananne, wuṛṛu mapaatantole n tou. Imangitou sarun uminassa ṛemessi tou wuṛṛu mamate sitou ringannu putungnga. ¹⁷Ana wangu Mawu Ruata suete nangaḷore naungngi mangitou mapaa-mattu pandumannu Mawu Ruata. Mawu Ruata suete na'ola'a simangitou sangkire ipanantillu taṛṛino mangitou su winatangnga udde, tadea'u winatangnga udde mamarenta ma'oma n sara matipussa apa apan suete niapaasingkatu Mawu Ruata.

¹⁸Wawine apan niasiloannu udde, eteudde soa apan wahewalla apan uaparenta manga ratu su runia."

Ananawo n soa Babel

18 Napawe wua udde ia'u naasilo sangkatou mala'ekatta waine sinumossoka wuassu surga. Itou uatahuanna taṛṛino apan wahewalla, wuṛṛu awawantuge naaola'a ahewallu runia nabbaḷi masemakka.

²Ringannu tingikka apan ma'ikkatta, itou inumui, "Nanawote! Ba-

bel wahewalla nanawote! Orassa indi itou nabbalite tampa manga setanna wurru manga gharraho laleo. Sula lumme mabbiakka alawo'u hati manu'a apan laleo wurru iaarantinu taumata. ³Ana waugu alawo'u pabbawalaga suete na'inumma anggoru apulu m pasasandage. Manga ratu su runia sussandaga ringanni tou, wurru manga mabbawalu'a su runia nabbali ala ringannu apulune apan tawe ia'u linna udde."

⁴See ia'u naaringikka tingikka waine wuassu surga nabbisara,

"Sabbangke, alarrana-U! Sabbangke wuassu la lumme!

Imbarranga iamiu tumantalongnga manga rosane,
wurru tumurrutta mamasanna ruumanne!

⁵Ana waugu rosane ua'ombo sara langitta,
wurru Mawu Ruata uanaungnga alaleone.

⁶Ola'awe itou su ereapa itou suete na'ola'a siamiu;
walisete itou paarua wuassu anambo n palla lagu apan suete niolangge.

Lo rroi mangkone ringannu ua'e inumanna apan paarua maattirrana wuassu ua'e inumanna

apan nasaddiate iapa'inumma siamiu.

⁷Onggola'a sitou paparranga wurru asasusa
apan anambone uasulungngu awawantuga wurru paa'ala apan nionggole su wadange sassane.

Ana waugu itou sidutu mabbisara su watanganne,

'Ia'u indi ratu apan mammarenta:

Ia'u waline wawine walu;

ia'u sarun tawe mamendama asasusa!


⁸Ana waugu ete olangge udde, ne tumba'u sula lummu allo massallo
itou sarun maasomba silaka

- radda'a, asasusa wurru alarrutumma.

Wurru itou sarun tutungannu putungnga,
ana waugu Mawu Ruata plate tarriino ipakkuunggi tou udde."

⁹Manga ratu n runia apan suadio'a sula lummu inolaanne sussandaga wurru apulu naungngu wawine udde sarun lumuai wurru lumallu n soa udde napawe imangitou naasilo timbulla sussa loi wuassu putungnga apan mannutungnga sitou. ¹⁰Imangitou sarun rumarisikka wuassu marau ana waugu imangitou matta'uttu asasusane. Imangitou nabbisara, "Uare, waline hampa silakane soa apan tinumelenge indi - soa m Babel apan matohassa! Tumba'u sula lummu sangka orassa ruumannu suete niapaamatta!"

¹¹Manga mabbawalu'a su runia lai lulluai wurru lulla lo ana waugu wawine udde, ana waugu tate saran sangkatou lai apan mamalli manga sarannapa walu'anni mangitou. ¹²Tateddu mamalli wulawanna, safa'a, permata, wurru mutiara mangitou; wurru lai malarrrenessa linen, ungu,



Manga sarannapa waļu'anna (18:11)

sutera, wuřru maļarřnessa mařramu ua'itumma; alawo'u hati ng kalu apan maļawa asombanganna, sarannapa wuassu gadinga wuřru wuassu alu apan maarega, wuassu witu'a, atta'a, wuřru pualam; ¹³pisi ng kalu matemangnga, manga rampa, setinggi, mur, wuřru amania; anggore wuřru lana, taponna wuřru ganduma; sapi wuřru domba, awaļo wuřru kereta, manga allangnga, see lai niawa n taumata. ¹⁴Manga mabbaļu'a nabbisara su wawine udde, "Sarangkanambone apan ipaapulunu maola'a pussaanu nawuļite lai, wuřru aļawo'u paa'alanu wuřru ararřmagu nawuļite. I'o tate maasomba apia!" ¹⁵Manga mabbawalu'a apan naalate ana waugu mabbaļu'a su soa udde sarun rumarisikka wuas marau, ana waugu imangitou matta'utta arřinoannu asasusane. Imangitou sarun lumuai wuřru lumaļo, ¹⁶see mabbisara, "Uare, waļine hampa silakane soa apan tinumelengke indi! Inanaramanne itou uaļurře m peddeta linen, maļarřnessa ungu wuřru maļarřnessa mařramu ua'itumma; inanaramanne itou napene n laļoggaka wuļawanna, permata wuřru mutiara! ¹⁷Arawe tumba'u sulaļummu sangka orassa, itou niawuļiante m paa'alane udde!"

Anambo n apitenna, sumasa'ene, wuřru mamamanara ng kapalla, see anambo n taumata apan manarane su tahaļoangnga, uarisikka wuas marau. ¹⁸Wuřru nangintuļi su tempo imangitou naasilo timbula susapputta wuassu putungnga apan mannutungnga soa udde. Imangitou inumui, "Tawe saran paassa pia soa waine apan wahewalla ereindi!" ¹⁹Ne imangitou nangalasse n awu su pua mangitou maola'a tatiala

lullaŋo, see nilumuai wuŋŋu u'ui, "Uare, waŋine hampa silakane soa apan wahewalla indi! Paa'alane suete naaola'a anambo n taumata apan uatahuanna apalla su tahaŋoangnga nabbaŋi ala! Arawe tumba'u sulaŋummu sangka orassa, itou inawuŋiante n aŋawo'u sarannapa!"

²⁰Ei surga, lala'e ana waugu arŋarŋimunsu'a'u soa udde! Ei, aŋarŋana'u Mawu Ruata, manga rasul, manga nabi, lala'e! Ana waugu Mawu Ruata suete narŋuumanni tou maola'a sambau bawaliŋisu sarangkanambone apan niola'i mangitou siamiu!

²¹Napawe wua udde, sangkatou mala'ekatta apan matohassa namengketa sambau watu - ere ahewallu watu ng gahilinganna apan wahewalla - see tinuntunga watukku tahaŋoangnga lapiddu nabbisara, "Arendi olangnge soa m Babel apan tinumelengke udde sarun iramme ringannu ma'ikkatta ma'oma n sara tate asombanganna apia. ²²Tingikku musikka wuassu manalangnga kecapi, wuassu manga tarŋa antari, wuassu manalangnga wansi wuŋŋu wuassu mananiuppa trompeta, tate lai iaringikka wuassu laŋummu soa m Babel! Tate lai asombanganna sangkatou mamanara apandeanne isudde, wuŋŋu tingikku watu ng gahilinganna lai tate aringirana. ²³Taumata tate lai maasilo semakku soŋo sulaŋummu soa; wuŋŋu tate aringirana lai ramea andeangngu awingnga isudde. Manga mabbawalu'i amiu eteudde manga taumata apan tinumelengke su runia, wuŋŋu ringannu manga apande m wali'i matanu i'o mangngawusu alawo'u pabbawalaga su runia!"

²⁴Babel niŋŋuumanna ana waugu sulaŋummu soa udde suete niasombanganna rarŋa manga nabi, rarŋa manga aŋarŋana'u Mawu Ruata - aunne rarŋa n anambo n taumata apan suete nipate su wowo n runia indi.

19 Napawe wua udde ia'u naaringikka sambau naalihipda tingikku taumata nambo wuassu surga apan u'ui, "Paddalote Mawu Ruata! Ruata ng kite eteudde Mawu Ruata apan mannaŋamatta; Itou Mawu Ruata awantuhanne wuŋŋu mataŋŋino! ²Pallaŋruung-Nge matuŋidda wuŋŋu masiŋŋonga! Itou suete narŋuumannu sumasandaga apan wahewalla, apan nandaŋeo runia ringannu sasandage. Mawu Ruata suete narŋuumannu sumasandaga udde, ana waugu ete itou namate manga allangngu Mawu Ruata." ³See tingikku taumata nambo udde niumui apia, "Paddalote Mawu Ruata! Timbulu putungnga apan nangepoddu soa wahewalla udde sarun tumimbula sarangkaŋo'engnge!" ⁴Ne sire rua m puŋo appata piaŋŋange wuŋŋu sire appata riadianna apan uapaŋiwutta addera n araratuanna udde inumaruwta wuŋŋu nassubba Mawu Ruata apan ua'iana su addera n araratuanna, Imangitou nabbisara, "Amin! Paddalote Mawu Ruata!"

Andeangngu awingngu Ana'u Domba

⁵See niaringirrana wuassu addera n araratuanna udde tingikku wisara apan mabbisara, "Paddalote Mawu Ruata, ei manga allangngu Mawu Ruata, wuṛṛu anambo n taumata - timmade dario'a - apan msubba Mawu Ruata!" ⁶Napawe wua udde ia'u naaringikka sambau ere tingikku ammuḷannu taumata nambo atonna; tingikke naalihidda lua'a mabbasse wuṛṛu ere rallu'a mappose. Ia'u naaringikka imangitou mabbisara, "Paddalote Mawu Ruata! Ana waugu Mawu Ruata ng kite Lembon Taṛṛino udde, orassa indi uaparenta! ⁷Wette iite lumala'a wuṛṛu lumuassa; wette iite maddalo awawantu-Ge! Ana waugu nia'omante allo ng kawingnga apan uaaggasa arannu Ana'u Domba udde, wuṛṛu pare-Ne nasaddiate iawingnga Sitou. ⁸Peddeta lenan apan sussaḷendapa suete nionggolla sitou iapaaluṛṛe." (Peddeta lenanna udde eteudde manga inolaanna apan mapia apan niola'u alaṛṛana'u Mawu Ruata.)

⁹See mala'ekatta udde nabbisara sia'u, "Woṛṛetta'a indi: 'Laḷumanna'a su tauṛnata apan niwagoanna su andeangngu awingngu Ana'u Domba udde.' " See mala'ekatta udde nanamba apia, "Ete indi watti'a atonna wuassu Mawu Ruata."

¹⁰Ia'u nassuniaga su saruannu mala'ekatta udde ana waugu nassubba sitou, arawe itou nabbisara sia'u, "Arie! Arie passubba sia'u, passubbate Mawu Ruata! Ana waugu ia'u lai allangnga ere i'o wuṛṛu ere anambo n tuṛṛangu apan uaaggasa matohassa su watti'u Mawu Yesu!"

Ana waugu ete watti'u Mawu Yesu udde mannantiro manga tauṛmata apan mabatti'u papatta.

Sumasa'e awaḷo mawira

¹¹Wua udde ia'u naasilo surga nawu'a, see niasiloanna sambau awaḷo mawira. Sumasa'e-Ne aranne Matuṛṛuta wuṛṛu Atonna. Itou matuḷidda sulaḷummu mangema'u ruumanna wuṛṛu sulaḷummu pangalo apan niolang-Nge. ¹²Mata-Ne naalihidda ṛenggamu putungnga wuṛṛu su pua-Ne Itou ualuṛṛe manambo araposa n araratuanna. Su wada-Nge uawoṛṛetta sambau aranna; wuṛṛu tumba'u Itou sassane masingkatu aranna udde. ¹³Jubah apan ualuṛṛe Sitou suete niammo sulaḷummu ṛaṛra. Wuṛṛu Itou nisaggo "Ṛengetannu Mawu Ruata". ¹⁴Tantara m pangalo wuassu surga uatantalongnga Sitou ringannu uasa'e manga awaḷo mawira, wuṛṛu uapeddetu lenan mawira wuṛṛu waresi. ¹⁵Wuassu moṛṛo-Nge sinumabanga sammata haḷele apan maṛṛoro wuṛṛu ringannu haḷele udde Itou sarun mapaarugi manga pabbawalaga, wuṛṛu Itou

sarun mamarenta simangitou ringannu tatumma'ina atta'a. Itou sarun mamakka n anggore sulaḷummu pamamakkannu anggoru asasa'u Mawu Ruata Apan Lembon Tarrino. ¹⁶Su jubah-Ne wuḷḷu su palang-Nge uawoḷḷetta aranna indi, "Ratu n aḷawo'u ratu, wuḷḷu Mawu n aḷawo'u tuangnga."

¹⁷Ana see ia'u naasilo sangkatou mala'ekatta uarisikka su wowo n matannallo. Ringannu tingikka ma'ikkata itou inumui su anambo n manu'u winalanganna, "Wette paammule, tadea'u iite inai su andeangnga wahewalla apan ilallaghu Mawu Ruata! ¹⁸Wette uminassa manga ḷemessu manga ratu, wuḷḷu ḷemessu manga tembonannu tantara, wuḷḷu ḷemessu taumata apan nate su pangalo; wette uminassa ḷemessu manga sumasa'e awaḷo wuḷḷu ḷemessu manga awaḷone wuḷḷu ḷemessu anambo n taumata, timmade ara'e dario'a, allangnga wuḷḷu tawe allangnga!"

¹⁹Wua udde ia'u naasilo winatangnga udde, wuḷḷu manga ratu n runia ringannu manga ammuḷannu tantara mangitou, uaammulla mapangalo lumawanna Sitou apan uasa'e awaḷo mawira udde, wuḷḷu manga tantara-Ne. ²⁰Ne winatangnga udde niasametta suadio'a ringannu nabi awusu apan suete na'ola'a manga aḷaḷḷindu'a su saruannu winatangnga udde. (Ringannu manga aḷaḷḷindu'a uddewe winatangnga udde nangawusu manga taumata apan uatahuanna tatiala m winatangnga udde, wuḷḷu manga taumata apan massubba paaḷuannu winatangnga udde.) See winatangnga udde wuḷḷu nabi awusu udde niramme ta'e wiakka sulaḷummu tahaḷoangngu putungnga apan lukkenggama ringannu belerangnga. ²¹Wuḷḷu ammuḷannu tantara mangitou nipate n haḷele apan sinumabbanga wuassu moḷḷongu sumasa'e awaḷo mawira udde. Ne manga manu'u winalanganna lai nirumanta wuḷḷu niuminassa ḷemessi mangitou apan nipate udde.

Su ola'u tempo sarḷiwu su tonnane

20 Napawe wua udde ia'u naasilo sangkatou mala'ekatta sinumossoka wuassu surga. Su limane uaaggasa a'unsi n rampisu papate wuḷḷu sambau ḷarḷapussa apan masallaka. ²See itou nanametta naga udde, atoanna timmade, - eteudde Setanna ara'e Ghaḷḷaho Laḷeo udde - wuḷḷu niḷrapussa sarḷiwu su tonanne aḷannune. ³Wua udde mala'ekatta udde nandamme n naga udde watukku rampisu papate, see nangunsi n rampisa udde, wuḷḷu nisegele tadea'u naga udde tate lai maapangawusu manga pabbawalaga tantaḷanna tempo sarḷiwu su tonnane udde taambe nasue. Wua udde itou ḷinone ipallōsa sulaḷummu tempo apan maḷihakka.

⁴See ia'u naasilo manga addera n araratuanna, wuṛṛu manga tau-mata apan ua'ianna su manga addera n araratuanna udde inonggoḷannu taṛṛino ipangema'u ruumanna. Ia'u lai naasilo manga ṛimuuddu taumata apan suete niponggo'a puane ana waugu imangitou mattiala su ola'u Mawu Yesus, wuṛṛu mammasingkatu tanata Mawu Ruata. Manga tau-mata udde tawe massubba winatangnga, ara'e lai paaḷuanne. Imangitou lai tawe saran paassa nanengkama tatiala manga winatangnga udde su pakkana ara'e su lima mangitou. Ne imangitou nabbiakka apia wuṛṛu namarenta ere sangkatou ratu suadio'a ringanni Kristus saṛṛiwu su ton-nane aḷannune. ⁵Ete indi panattaṛṛannu taumata nate niapaawiakka apia. (Arawe manga taumata nate waine tawe niapaawiakka apia su-laḷummu saṛṛiwu su tonnane udde.) ⁶Laḷumanna'a su manga taumata apan niapaawangunna apia su panattaṛṛanne udde. Imangitou wotong-nge maola'a pussa'a Mawu Ruata. Papate aruane tawe maattaṛṛino si-mangitou. Imangitou sarun maola'a manga imammu Mawu Ruata wuṛṛu manga imammī Kristus; wuṛṛu imangitou sarun mamarenta suadio'a ringanni Tou saṛṛiwu su tonnane aḷannune.

Setanna niapaarugi

⁷Napawe nasuete tempo n saṛṛiwu su tonnane udde, Setanna sarun ipallosa wuassu tattupanne, ⁸wuṛṛu itou sarun inai mangawusu pabbawa-laga apan uasaliawukka su ahewallu runia, eteudde Gog wuṛṛu Magog. Setanna nangammuli mangitou inai mapapangalo, sambau ammuḷanna apan wahewalla atonna, ere anne su tahaḷoangnga. ⁹Ne imangitou nas-saliawukke su ahewallu runia, see nattalliwunte atatana'annu aḷaṛṛana'u Mawu Ruata wuṛṛu soa arangnguannu Mawu Ruata. Arawe putungnga nonto'a wuassu langitta wuṛṛu namate simangitou. ¹⁰See Setanna apan nangawusu simangitou udde, tinuntunga sulaḷummu tahaḷoangngu putungnga wuṛṛu belerangnga. Ete isudde tampane winatangnga wuṛṛu nabi awusu udde niramme paarorone. Imangitou sarun sansaranna allo ṛabbi saran maḷannu-ḷannu.

Ruumanna panginsueanne

¹¹Napawe wua udde ia'u naasilo sambau addera n araratuanna mawira apan wahewalla wuṛṛu Itou apan ua'ianna su wowone. Langitta wuṛṛu runia nawuḷi wuassu saruan-Ne na'oma n sara tate lai iasilo. ¹²Wuṛṛu ia'u naasilo manga taumata nate, timmade dario'a, uarisikka su saruannu addera n araratuanna udde. Ne manga wuke niwu'ate. See

sambau wuke apan waine niwu'ate, eteudde Wuke n Taumata Wiakka. Wua udde ruumanna niema'a su taumata nate, uasulunggu pallaḷagune tumurruttu apan uaworretta sulaḷummu manga wuke udde.

¹³See tahaḷoangnga nanantillu manga taumata nate sulaḷumme. Papate wurru Runia m Papate lai nanantillu manga taumata nate sulaḷummi tou. Wurru manga taumata nate sarangkanambone udde nirruumanna uasulunggu pallaḷagu mangitou. ¹⁴Wua udde Papate wurru Runia m Papate tinuntunga sulaḷummu tahaḷoangngu putungnga. (Tahaḷoangngu putungnga indi eteudde papate aruane.) ¹⁵Manga taumata apan aranne tawe uaworretta sulaḷummu Wuke n Taumata Wiakka, iramme sulaḷummu tahaḷoangngu putungnga.

Langitta wakku wurru runia wakku

21 See ia'u naasilo langitta apan wakku wurru runia wakku. Langitta paarorone wurru runia paarorone nawulite, wurru tahaḷoangnga lai nawuli. ²Ne ia'u naasilo soa susi udde, eteudde Yerusalem wakku, nonto'a wuassu surga wuassu Mawu Ruata. Soa udde suete nissaddia ere sangkatou maa'awingnga wawine nipeddetanna iapasasomba maa'awingnga esakka. ³See ia'u naaringikka wuassu addera n araratuanna udde mabbisara ma'ikkatta, "Orassa indi tampa atatanaannu Mawu Ruata suadio'a ringannu taumata! Itou sarun mabbiakka suadio'a ringanni mangitou, wurru imangitou sarun maola'a aḷarḷanang-Nge. Mawu Ruata sassane sarun matana'a ringanni mangitou wurru maola'a Mawu Ruata mangitou. ⁴Itou sarun mamappasa alawo'u allo mata wuassu mata mangitou. Papate sarun tate lai, asasusa, laḷuai, ara'e aḷarḷusa'itta tate lai. Manga inolaanna tabbe nawulite!"

⁵See Itou apan ua'ianna su addera n araratuanna udde nabbisara, "Orassa indi sarangkanambone Ta'u olaanna wakku!" Itou nabbisara lai sia'u, "Worretta'a indi, ana waugu manga wisara indi atonna, wurru wotongge apangimananna." ⁶See Itou nabbisara, "Nasuede! Ete Ia'u paarorone wurru pangudusanne; ete Ia'u Mawu apan wuassu Panattaranne ma'oma m Panginsueanne. Suapan taumata marou, Ta'u iapa'inumma ringannu tawe bawaekke, wuassu aḷimata n ua'e apan manggonggolu wiakka. ⁷Manga taumata apan naauntunga sarun manengkama manga wawalissu inolaanne udde wuassia-U. Ia'u sarun maola'a Mawu Ruatane, wurru itou sarun maola'a ana-U. ⁸Arawe taumata mataḷo, taumata mandalaḷeo, taumata mawunga, taḷra pate, taumata masandaga, taumata apan mappattu wal'i'i mata, massubba paaḷuanna, wurru taḷra wahia, sarun iramme sulaḷummu tahaḷoangngu

putungnga wuṛṛu belerangnga apan lukkenggama, eteudde papate aruane.”

Yerusalem waku

⁹Sangkatou wuassu wallatu sire pitu mala'ekatta apan suete nanga-gassa manga cawanna napene m pitu asasusa panginsueanne udde niru-manta ringanku wuṛṛu nabbisara, "Wette! Ia'u sarun mamamtingiddu Maa'awingnga si'o eteudde awingngu Ana'u Domba." ¹⁰Ne Gharraho Mawu Ruata nangintarṛo sia'u, wuṛṛu mala'ekatta udde nangapi'u watukku wowone apan tumanite n matanggaka. Itou namamingiddu Yerusalem sia'u, soa susi udde, soa udde nonto'a wuassu surga, wuassu Mawu Ruata, ¹¹ringannu araṛṛamaga wuṛṛu awawantugu Mawu Ruata. Soa udde sussaṛendapa naaṛihidda watu permata, naaṛihidda watu baiduri pandan apan matilangnga naaṛihidda kristal. ¹²Darandunge uapaṛiwutta matanggaka wahewalla, ringannu ngarane mapuḷo dua, wuṛṛu rariagannu sire mapuḷo dua mala'ekatta. Suapan ngarane uawoṛṛetta manga arannu mapuḷo dua pabbawalagu Israel. ¹³Pia tatallu ngara apan uasaruanna suapan punnu anginna: tatallu su samba'a ra'i, tatallu su samba'a timukka, tatallu su samba'a sawannaka, wuṛṛu tatallu su samba'a waṛṛata. ¹⁴Darandungu soa udde niapararisikka su wowo mapuḷo dua watu rapappake. Su manga watu rapappake udde uawoṛṛetta manga arannu sire mapuḷo dua rasullu Ana'u Domba udde.

¹⁵Mala'ekatta apan uahahatto'u udde pia tatumma'inna auukka wu-assu wuḷawanna, ipanguukka soa udde, manga ngarane wuṛṛu daran-dunge. ¹⁶Soa udde uataṛṛa wu'u appata - aḷo'engnge nassuḷungngu aḷalakke. Ne mala'ekatta udde nanguukka soa udde ringannu tatumma'ina auukke; inauranna aḷo'engnge 2400 km; aḷalakke wuṛṛu atanggake nassuḷungngu alo'engnge. ¹⁷Su tempo mala'ekatta udde nanguukka darandunge, inauranna atanggaku darandunge udde annumu puḷo su meteṛṛene. Uuṛṛana apan nipaattu mala'ekatta udde eteudde uuṛṛana apan ipappaattu taumata lai. ¹⁸Darandungu soa udde niola'a wuassu watu baiduri pandan, arawe soane sassane wuassu wuḷawanna tutune, matilangnga naaṛihidda kaca. ¹⁹Manga watu rapappaku soa udde niloggaku aḷawo'u watu permata. Watu rapappake apan paarorone niola'a wuassu watu baiduri pandan, aruane wuassu watu nilam, atallune wuassu watu yakut, aiappane wuassu watu zamrud, ²⁰aḷimane wuassu watu baiduri sepah, aiannume wuassu watu delima, appitune wuassu watu ratna cempaka, auaḷune wuassu watu pirus, assione wuassu watu topas, appuḷone wuassu watu krisopras, appuḷone assa wuassu watu lazuardi, wuṛṛu appuḷone dua wuassu watu kecubung. ²¹Mapuḷo dua

ngarane niola'a wuassu mapuḷo dua mutiara, sambau-sambau niola'a wuassu sambau mutiara. Laḷanna su soa udde niola'a wuassu wuḷawanna tutune, matilangnga naaḷihidda kaca apan sussaḷendapa.

²²Ia'u tawe naasilo Waḷe Mawu Ruata su soa udde, ana waugu Waḷe Mawune eteudde Mawu sassane, Mawu Ruata Lembon Taḷḷino, wuḷḷu Ana'u Domba udde. ²³Soa udde tate mappandumma semakku matanallo ara'e semakku wuḷanna, ana waugu awawantugu Mawu Ruata mananemakke, wuḷḷu eteudde Ana'u Domba soḷone. ²⁴Manga pabbawalaga su runia sarun umamatta sulaḷummu asasemakke, wuḷḷu manga ratu lai sarun mangapiddu paa'ala mangitou watukku soa udde. ²⁵Manga ngara n soa udde wawu'anna miallo-miallo; tawe iḷḷuuda, ana waugu isudde tawe ḷabbine. ²⁶Awawantuga wuḷḷu paa'ala manga pabbawalaga sarun iapiddu watukku laḷummu soa udde. ²⁷Arawe taumata apan ino-laanne maarantina, ara'e taumata taḷḷa wahia - aunne aḷawo'u alaḷeo, tawe maasutta sulaḷumme. Apan wotongnge maasutta tumba'u taumata apan aranne uawoḷḷetta sulaḷummu Wuke n Taumata Wiakka, Wuke n Ana'u Domba udde.

22 Mala'ekatta udde namantingida sia'u saḷukka apan ua'ene mangngonggolu wiakka. Saḷukka udde sussaḷendapa naaḷihidda kristal wuḷḷu mangngelekka wuassu addera n araratuannu Mawu Ruata wuḷḷu Ana'u Domba udde, ²su pattangngannu laḷanna su soa udde. Su winggi n saḷukka udde, su rua m baane pia allu punnu wiakka, apan mabbua paapuḷo dua santonna, eteudde paassa sambuḷanna. Rongngane ipappaatta ipangngundama manga pabbawalaga. ³Sulaḷummu soa udde tawe saran sambau sarannapa apan niaḷḷinoannu wontogu Mawu Ruata.

Addera n araratuannu Mawu Ruata wuḷḷu Ana'u Domba udde sarun iaddo sulaḷummu soa udde. Manga allang-Nge sarun mattaḷḷamawu Sitou, ⁴wuḷḷu ma'ellega hati-Ne. Aran-Ne sarun iwoḷḷeta su pakkani mangitou. ⁵Imangitou tate mappandumma soḷo ara'e semakku matanallo, ana waugu tate ḷabbi lai, wuḷḷu Mawu Ruata sassane sarun manemakka simangitou. Ne imangitou sarun mamarenta ere sangkatou ratu saran maḷannu-ḷannu.

Daranta Mawu Yesus

⁶See mala'ekatta udde nabbisara sia'u, "Manga wisara indi atonna wuḷḷu wotongnge apangimananna. Mawu Ruata apan nangonggolu Ghaḷḷaho-Ne su manga nabi, suete nandolokku malaekan-Ne mamantingidu su manga allang-Nge apa apan sarun maḷihakke mariaddi."

⁷"Panutukke indi!" wisara Mawu Yesus, "Ia'u sarun maḷihakka rumanta. Laḷumanna'a su taumata apan tuttuḥḥuta manga ḥengetanna sulaḷummu wuke indi!"

⁸Ia'u Yohanes, suete naaringikka wuḥḥu naasilo sarangkanambone indi. Napawe ia'u suete naaringikka wuḥḥu naasilo udde, ia'u inumarutta su saruannu mala'ekatta apan suete namantingiddu sarangkanambone udde sia'u, wuḥḥu ia'u ḥinone massubba sitou, 'arawe itou nabbisara si'u, "Arie! Arie massubba sia'u! Passubate Mawu Ruata! Ana waugu ia'u lai allangnga ere i'o, wuḥḥu ere manga tuḥḥangnga manga nabi wuḥḥu anambo n taumata apan tuttuḥḥuta manga tanata sulaḷummu wuke indi!" ¹⁰See ia'u nabbisara apia, "Imbaḥḥanga mangadappingu manga papatta sulaḷummu wuke indi, ana waugu tempone maranite sarangkanambone indi sarun mariaddi. ¹¹Taumata apan laḷeo, sidutu ma'ola'a aḷaḷeo; taumata iaarantina wala'e itou mapaarantinu watanganne; taumata apan tuttuḥḥuta apulu Mawu Ruata, wala'e sidutu itou tuttuḥḥuta apulu Mawu Ruata, wuḥḥu taumata apan mabbiaikka tumba'u hunane su Mawu Ruata sassane, wala'e sidutu mabbiaikka hunane su Mawu Ruata sassane."

¹²"Panutukke indi" wisara Mawu Yesus, "Tate maḷannu lai Ia'u sarun rumanta ringannu uaapiddu laḷantakke ipabbaḷissa aḷawo'u taumata tumuḥḥuttu inolaannu sambau-sambau. ¹³Ete Ia'u apan paarorone wuru pangudusanne; Ete Ia'u Mawu apan Panattaḥḥanne ma'oma n sara Panginsueanne."

¹⁴Laḷumanna su taumata apan nabbansala jubahne na'oma n sara nawaresi, ana waugu imangitou wotongnge umanna wuassu alu m pabbawiakka wuḥḥu sumutta sulaḷummu soa udde sumabbi ngarane. ¹⁵Arawe manga taumata apan ma'ola'a pallaḷagu laḷeo, taḥḥa waḷi'i mata, manga taumata sussandaga, taḥḥa pate, masasubba paaḷuanna, wuḥḥu manga taumata taḥḥa wahia, mapia ringannu wisara ara'e lai ringannu pallaḷagu, anambo n taumata udde tampane su liuddu soa udde.

¹⁶Ia'u, Mawu Yesus, suete nandolokku malaeka-U siamiu tadea'u itou mamasingkatu manga olangnge indi su manga jamaatta. Ia'u indi papapulunni Daud; ete Ia'u aḥḥusuallo apan masemakka udde."

¹⁷Ghaḥḥaho Mawu Ruata wuḥḥu Maa'awingnga Wawine nabbisara, "Wette!" Suapan taumata apan naaringikka indi ḥinone lai mabbisara, "Wette!" Isai apan marou, ḥinone itou rumanta! Wuḥḥu isai apan maapulu, ḥinone itou manganu ua'e apan mangonggolu wiakka udde ringannu tawe bawaecke.

Pangudusanne

¹⁸Su aḷawo'u taumata apan naaringikka manga wisara papatta sulaḷummu wuke indi, ia'u, Yohanes, mangonggolu pananaunganna indi: amungkangu pia taumata manamba manga wisara su papatta indi, ne Mawu Ruata sarun manamba lai ruumannu taumata udde ringannu manga asasusa apan niwoḷḷeta sulaḷummu wuke indi. ¹⁹Wuḷḷu amungkangu taumata nanggaingnga salaiwe sampaddi wuassu manga wisara n papatta indi, ne Mawu Ruata lai sarun manggaingnga wageangge apan niwoḷḷeta sulaḷummu wuke indi - eteudde wageangge wuassu punnu wiakka wuḷḷu wuassu soa susi udde.

²⁰Itou apan namasingkatu anambo n watti'a indi nabbisara, "Atonna, Ia'u maḷihakke rumanta!" Amin!

Rantate, o Mawu Yesus!

²¹Saḷandeanna Mawu Yesus sarun mangonggolu aḷaman-Ne su anambo n aḷaḷḷana'u Mawu Ruata!